


Tí Nuevo Testamento cuènte Inchéni Jesucristo

C'óna Nquiva



New Testament in Popoloca, San Juan Atzingo

Tí Nuevo Testamento cuènte Inchéni Jesucristo

C'óna Nquìva

New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

b9b09122-b3f6-59f0-9594-749907b32b5b

Contents

SAN MATEO	1
SAN MARCOS	91
SAN LUCAS	148
SAN JUAN	244
LOS HECHOS	315
ROMANOS	399
1 CORINTIOS	434
2 CORINTIOS	470
GALATAS	492
EFESIOS	504
FILIPENSES	516
COLOSENSES	524
1 TESALONICENSES	532
2 TESALONICENSES	539
1 TIMOTEO	543
2 TIMOTEO	553
TITO	560
FILEMÓN	564
HEBREOS	566
SANTIAGO	592
1 PEDRO	601
2 PEDRO	611
1 JUAN	617
2 JUAN	626
3 JUAN	627
SAN JUDAS	629
APOCALIPSIS	632

Tí tan jína chrónka ch'ín Mateo

Tí sín k'uaxrjeníxin ch'ín Jesús
(Lc. 3.23-38)

¹ Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham.

² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kichó ch'án.

³ Ch'ín Judá mé it'é tí ch'ín Fares la ko ch'ín Zara la tí ìné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram.

⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón.

⁵ Ch'ín Salmón mé it'é tí ch'ín Booz la ìné mé tjan Rahab. Ch'ín Booz mé it'é tí ch'ín Obed la ìné tí ch'ín Obed mé tjan Rut. Tí ch'ín Obed mé it'é tí ch'ín Isaí.

⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko ìné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa.

⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías.

⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acáz la ch'ín Acáz mé it'é tí ch'ín Ezequías.

¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías.

¹¹ Ch'ín Josías mé it'é tí ch'ín Jeconías la ko kichó ch'án. Tí sín a mé k'uéjó sín tí yaon a ntá xrinahya ikui tí sín Babilonia sákjuíko sín tí sín israelita kixin ts'ejóchjina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel.

¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor.

¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud.

¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob.

¹⁶ Ch'ín Jacob mé it'é tí ch'ín José la ch'ín José mé k'óna xii tjan María la jehe tjan María mé ìné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrji k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrji k'uaxrjeníxin

tí ch'ín David la ntá tí sín Babilonia sákjuíko tí sín israelita chjasén sín la ntá í jnko catorce t'áchrjì k'uéjò la ntá kokjíhi Cristo.

Kokjíhi Jesucristo

(Lc. 2.1-7)

¹⁸ Tí kokjíhi Jesucristo mé xíkíhi kónhen. Tí tjan María ìné ch'án mé tsotehe tjan ch'ín José. A ntá naxa kuákjahya kíchó sín ntá kónoxín kixin jehe tjan la ó tjejá tjan kixin tíha la kjuachaxièn Nchakuen Dios.

¹⁹ Ch'ín José mé tí nkexro ts'óna xì tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehe ch'án tjan kixin tjinkaon ch'án kixin ninkexró tsonoehya.

²⁰ Ntá tí naxa tjenkayáxin ch'án kixin xíkaha sich'e ch'án ntá kotáchríen ch'án chrónkaxín titàya k'uúkuèn ch'án ikui ijnko ángel kuènte Ìnchéni nixja, chrónka kixin:

—José jaha mé k'uaxrjeníxian David. Tóxakuanhya la ko chrakonhya chrókuákjá tjan María ts'óna ichjián kixin tí xjan tsochónta tjan la kjuachaxin kuènté Nchakuen Dios ikui mé k'óna tí xjan a.

²¹ Sinchekokjíhi tjan ijnko xjan ntoa la its'in xjan Jesús mé xíkaha its'in xjan kixin jehe xjan tsjakjìin ijíé chojni —mé xíkaha chrónka tí ch'ín ángel.

²² Kaín tíha kónhen kixin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchrò xíkíhi:

²³ Ijnko tjan naxa chóntahya chojni ntoa mé tsjak'eyá tjan la tsochónta tjan ijnko xjan,

la sinchek'in sín ch'án Emanuel,*

la tíha t'axrjexín kixin Dios tjejókoni. Mé xíkaha chrónka itén Dios.

²⁴ Ntá k'uàya ch'ín José ntá kjuínchexiteyá ch'án tí nkehe k'uetoan tí ángel kuènte Ìnchéni la kuákja ch'án tjan María ts'óna ichjién ch'án.

²⁵ A ntá kjónté xíkaha la naxa kójnkojiéhya sín tí naxa kokjìehya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjìxín ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uètuènhen ch'án tí naciòn a. A ntá xrinahya iso chojni ntoa kjuixìn ijnko chjasin nó tjitoxìn yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé.

* 1:23 Isaías 7.14

² Ntá kjuanchankí sín kixin:

—¿Nketí tjen tí xjan tsíkokjíhi ts'óna tí rey ts'etuenhen tí sín judío? K'uíkonxínni tí konotsé kuènte ch'án nó tjitoxin yaon na ntá ó kjuini kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xikaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén.

⁴ Ntá tí ch'ín rey k'uetoan kixin síxrakoa kaín tí sín nchat'á t'etoan la kaín tí sín tjako tí ley la ntá kjuanchankíhi sín ch'án nketí chrókokjéxín tí nkexro Cristo.

⁵ Ntá jehe sín kjuátehe sín kixin:

—Tsokjéxín xjan chjasin Belén estado Judea mé xikaha tsíkjin tí sín tsíchronka itén Dios. Ntáchro xikihi:

⁶ Jaha chjasin Belén nonte Judá,

jaha la jehya ijnko chjasin imá ntsí;

kixin tí nonte ts'axrjéxín tí nkexro antsí t'etoan,

la jehe ch'án ts'ayakonhen tí chjasin kuéntana mé chjasin Israel.*

Mé xikaha nixja itén Dios.

⁷ Ntá imó k'uíyehé ch'ín Herodes tí sín mago la kjuanchankíhi ch'án sín nkesá kjuankixin k'uíkon sín tí konotsé.

⁸ Ntá chrónka sín ntá tuénxín k'uetoan ch'án kixin sátsji sín chjasin Belén la ntáchro ch'án kixin:

—Sátjirá ntiha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntiha tsotjahá xjan kjuasáya —mé xikaha k'uetoan ch'ín Herodes.

⁹ Ntá kuínhin tí sín mago tí nkehe k'uetoan tí ch'ín rey ntá sákjuí sín la xík'ikon sín tí konotsé inaá la kjuítaón va ntja la ntá chréhe sín hasta kjuák'e va chrítaón tí nchia tjen tí xjan a.

¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín.

¹¹ La k'uixenhen sín tí nchia la k'uíkon sín tí xjan kjuák'eko tí tjan María ìné xjan. Ntá k'uéjoxin toch'ín sín la chjéhe sín kjuasáya ntá kuakitjehé sín tí nkehe kjuikao sín la kjuanjon sín chica oro la ko ihnti tsochéxin chjincó la ko xroan xraxé náxrjón.

¹² Ntá chr'éxin kotáchrién sín chrónkaxín kixin chrókanhya sín tí tjen ch'ín Herodes. Méxra kjanxín sín í jnko ntja la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'ín José chrónkaxín titàya k'uíkon ch'án ijnko ángel kuènte Ìnchéni chrónka kixin:

—T'àyá sátsjikoa xjan la ko ìné xjan la sátsjirá chjasin Egipto la ntahó ts'ejorá hasta tsoxrjankajia, kixin tí ch'ín Herodes

* 2:6 Miqueas 5.2

xritjeyá tí xjan chrók'óyán ch'án xjan —mé xikaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko ìné xjan la sákjuí sín chjasin Egipto tí tie a.

¹⁵ Ntahó k'uéjó sín hasta ik'uén ch'ín Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchrónka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyaha ch'án”.†

Ch'ín Herodes mé k'uetoan its'en xjan

¹⁶ A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uetoan ch'án kixin its'en kaín tí chánjan ntoá síin chjasin Belén ó chóna iyó nánó la ko tí xjan naxa chónahya iyó nánó. Mé xikaha k'uetoan ch'án kixin ó xraxinkaon ch'án nkehe kuínhin ch'án chrónka tí sín mago.

¹⁷ Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkama tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.‡
Mé xikaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuènte Ìnchéni mé k'uíkonxín ch'ín José kotáchrién ch'án tí kjuák'e ch'án chjasin Egipto mé ntáchro kixin:

²⁰ —T'àyá sátsjikoa tí xjan la ko tí ìné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xikaha k'uetoan tí ch'ín ángel.

²¹ Ntá ch'ín José mé k'uàya ch'án la sákjuíko ch'án tí xjan la ko tí ìné xjan la sákjuí sín chjasin Israel.

²² A ntá kuínhin ch'ín José kixin ch'ín Arquelao xjeen ch'ín Herodes mé k'uetoan ch'án tí estado Judea la ntá chrakon ch'án la sáchrókjuihya ch'án ntiha. A ntá kotáchrién ch'án chrónkaxín Dios kixin sáchrókjuí ch'án estado Galilea.

²³ Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uéjó sín. Mé xikaha xiteyá tí nkehe tsíchrónka tí sín k'uénixja itén Dios senó. K'uéntáchro sín kixin jehe ch'án mé tsíkítexín sín nazareno.

3

Juan el Bautista mé kjuák'e ch'án nteje
(Mr. 1.1-8; Lc. 3.1-9, 15-17; Jn. 1.19-28)

† 2:15 Oseas 11.1 ‡ 2:18 Jeremías 31.15

¹ **A** ntá tí yaon a kjuák'e ch'ín Juan Bautista nteje Judea la kjuako ch'án.

² Ntáchro ch'án kixin:

—Tjtoherá ijíará la tjínkirá tí nkehe tjenkayáxinrá kixin í séhya itsi kjuachaxién Dios.

³ Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuènte tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixin Ìnchéni.

Takitjehérá ijnko ntja ntoí.”*

⁴ Tí iké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. **A** ntá tí nkehe kjóne ch'án mé kochjoá la ko itsjen kotsjenta tónoxín nteje.

⁵ Itsjé chojni kuixin sín chjasin Jerusalén la ko í so chjasin siín estado Judea la ko chjinaxón tí ntarío Jordán kixin tsinhin sín nkexrí tjechrónka ch'án.

⁶ Ntá chrónka sín ijje sín ntá ch'ín Juan kuikítexín ch'án sín tí ntarío Jordán.

⁷ Ntá xrínahya k'uikon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuènte Dios ó tsi?

⁸ T'ichjánxin kixin chrók'uejorá jnkójina chrókjuákoxinrá kixin chaxín kjuítóxinhínrá tí nkehe tjenkayáxinrá.

⁹ Jahará nchehnerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham.

¹⁰ Tí chica hacha ó tjechónhen tsochrínjinxín tí nta. **A** ntá kaín xín nta t'ónahya to jína mé tsochrínjin kixin tsoche.

¹¹ Janhan mé inta tikítexián chojni kixin tsjakoixin sín kixin ó kjuítóxinhin sín ntíé sín. **A** ntá tí nkexro itsi chr'éxin mé tsíkítexínrá tí Nchakuen Dios la ko xrohi. Antsí tjetóxin t'etóan ch'án a ntá janhan la kánhyó. Méxra chrókósuàna sáchrókjuikjan tokaté ch'án.

¹² Jehe ch'án la ó tjexraá ch'án pala sinchetjuáxin ch'án noatrigo kixin tí ntachjiji trigo la ókjé ts'ejo ch'án a ntá tí noatrigo la tsjenájín ch'án la ts'enkachjina ch'án. **A** ntá tí ntachjiji trigo la tsjakaxín ch'án ijnko xrohi ts'ankahya jnkochrín — mé xikaha kjuako ch'ín Juan.

Kuikite ch'ín Jesús

(Mr. 1.9-11; Lc. 3.21-22)

* 3:3 Isaías 40.3

¹³ Ntá ch'ín Jesús kjuixin ch'án nó estado Galilea ikui ch'án tí ntario Jordán tí tjen ch'ín Juan kixin ch'ín Juan tsikite tí jehe ch'án.

¹⁴ A ntá tí saoxin chrohya ch'ín Juan chrókuikite tí ch'ín Jesús ntáchro ch'án kixin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka kixin jeheni chrókuikitia tí jaha —ichro ch'ín Juan.

¹⁵ Ntá kjuátehe ch'ín Jesús kixin:

—A ntá jie la títóhé tí xikaha tjenkayáxian kixin t'ichjánxin tsikiteni kixin sinchexiteyáni tí nkehe k'uetōan Dios.

Ntá ch'ín Juan kuítekaon ch'án la xikaha kjuích'e ch'án.

¹⁶ Ntá tió kuikite tí ch'ín Jesús la ntá xrínahya titàya xitjehe nkajní la k'uikon ch'án tí Nchakuen Dios, éxí kontóá tsjehe, k'uinkajinxin nkaya nkajní ntá kjuák'e chrítaón kja ch'ín Jesús.

¹⁷ Ntá xrínahya kuínhin sín ijnko tan kuixin nkaya nkajní ntáchro kixin:

—Tíhi mé xjanna la imá tjuaha ch'án la imá chàna kixin nchexiteyana ch'án.

4

Ch'ín Tsochren chrókjuachroe ch'ín Jesús

(Mr. 1.12-13; Lc. 4.1-13)

¹ Ntá tí Nchakuen Dios mé sákjuiko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús.

² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta.

³ Ntá ch'ín Tsochren mé kóchjinehe tí ch'ín Jesús kixin tjinkaon chrókjuachaxin ch'án. Ntáchro ch'án kixin:

—Tí chaxin jaha Xjeen Dios la ntáche tí xro i kixin chrók'óna niotja.

⁴ Ntá kjuátehe ch'ín Jesús ntáchro kixin:

—Náhi. Ntáchro xroon itén Dios kixin: “Jehya niotja ó chrók'uejóhónxin chojni. Náhi. Kaín tí tán nixja Dios tjejóhónxin chojni”* —ichro ch'án.

⁵ Ntá ch'ín Tsochren mé sákjuiko ch'ín Jesús tí chjasin tjóá mé chjasin Jerusalén, la sákjuiko ch'án tí chrítaón tí kja njnko a

⁶ la ntáchro ch'án kixin:

—Tí chaxin Xjeen Dios jaha la títóhé t'anótjénxian tí noi ntihi kixin ntáchro xroon itén Dios kixin: Dios mé ts'etuñhen tí sín ángel kuènte ch'án kixin ts'ayakonhan sín.

Tsotsé sín itjá

kixin tsotéhya totá ts'itja xro tí ts'anótjén†

* 4:4 Deuteronomio 8.3 † 4:6 Salmo 91.11-12

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjinihya chrókjuásixián kjuaxroan kjuachaxin kuènte Ìnchéni Dios”[‡] —ichro ch'ín Jesús.

⁸ A ntá tió kjuixixín sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín xín tí naciòn siín chjasintajni la ko tí nkehe t'etòan kuènte.

⁹ La ntáchro ch'ín Tsochren kixin:

—Kaín tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'ín Tsochren.

¹⁰ Ntá kjuátehe ch'ín Jesús ntáchro ch'án kixin:

—Sátjia Satanás kixin xroon itén Dios ntáchro kixin: “Chrókjuikosáyehé Ìnchéni Dios la jehó ch'án chrókjuich'ehé xra”[§] —ichro ch'ín Jesús.

¹¹ A ntá ch'ín Tsochren mé kuítóhe tí ch'ín Jesús la iso tí sín ángel ikui tsjinkitsa tí jehe ch'án.

Ch'ín Jesús kjuankixin ch'án tí xra kuènte ch'án estado Galilea (Mr. 1.14-15; Lc. 4.14-15)

¹² A ntá ch'ín Jesús mé kuínhin ch'án kixin tí ch'ín Juan mé tjechjina ch'án ntòechiso a, a ntá jehe ch'án mé sákjuí ch'án estado Galilea.

¹³ Kuítóehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabulón la ko estado Neftalí.

¹⁴ Mé xikaha kjuích'e ch'án kixin tsoxiteyá tí nkehe tsíkjin ch'ín Isaías, ijnko nkexro k'uéchrónka itén Dios. Ntáchro ch'án kixin:

¹⁵ Tí estado Zabulón la ko Neftalí tí ntja chrínta ntayaon la tí nó chók'á tjitoxin yaon tí ntario Jordán, mé tí estado Galilea tí tjejó tí sín jehya judío.

¹⁶ Mé ntiha tjejó tí sín siín tí sítié mé ts'ikon sín ijnko xrohi jié, la tí sín éxí tsík'en xritjejó sín mé ts'inkaséyanxín ts'ejó sín.

¹⁷ Ntá kjuankixin kjuako ch'ín Jesús ntáchro ch'án kixin:

—Tjitóxinhinrá ntjará. Tsákjára ijnko ntja nixin kixin kjuachaxin kuènte Dios tjen nkaya nkajni la í séhya tsi.

Ch'ín Jesús k'uíyehé noó chojni k'uétsé koche (Mr. 1.16-20; Lc. 5.1-11)

¹⁸ Ntá sákjuí ch'ín Jesús chrínta ntayaon Galilea ntá xrínahya k'uíkon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehe sín mé koche xritsé sín. Ntá tinkák'e sín nchísén chrínki ntá.

19 Ntá ch'ín Jesús nixjehe sín ntáchro ch'án kixin:

—Chréhérá tí janhan ntá tsotjahará xra tsjéyará chojni.

20 Ntá tuénxín kuítóhe sín tí nchísén k'uétséya sín koche, ntá sákjuíko sín ch'án.

21 Ntá kjínhya kjuíji ch'án ntá k'uíkon ch'án ijnko yaá sín, jnkokoá kichó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabárcō la tjejójtjōnīte sín tí nchísén tséya sín koche. Ntá kjaixin tí sín a k'uíyēhe ch'ín Jesús.

22 La ntá tuénxín kuítóhe sín tí ntabárcō la ko tí it'é sín ntá sákjuíchréhe sín tí ch'ín Jesús.

Kjuakohe ch'ín Jesús nchónhya chojni

(Lc. 6.17-19)

23 Ntá sákjuí ch'ín Jesús nkuíxín tí estado Galilea la kjuakoxin ch'án tí nínko Israel siín jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitōhe ch'án jína kaín chojni chóna kaín xín chin la ko kaín kjuatjoté.

24 Ntá kaín xín tí sín tjejó tí estado Siria mé kuínhin sín kuènte Jesús la kjuikao sín kaín xín tí sín níhi chóna kaín chin la ko tí sín imá tjotéhe sín la ko tí sín chóna nchakuen tí jínahya la ko tí sín t'aniáte sín la ko tí sín síxénká toté sín, la ntá ch'ín Jesús mé kjuínchekitōhe ch'án sín jína.

25 Ntá itsjé chojni kjuíchréhe tí ch'ín Jesús, mé kjuixin sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntarío Jordán.

5

Kjuakoxin ch'ín Jesús ijnko jnā

1 K'uíkon ch'ín Jesús kixin k'uéjó nchónhya chojni la ntá chrìn ch'án ijnko jnā la ntaha kjuák'etjāxin ch'án. Ntá tí sín k'uájiko ch'án a mé kóchjina sín chjinaxón tjejóntaxin sín tí tjen ch'án.

2 Ntá ch'ín Jesús kjuankíxin kjuakohe ch'án sín kixin:

Tí nkexro tjejó náxrjón

(Lc. 6.20-23)

3 —Náxrjón tjejó tí sín nohe kixin t'ichjánxinhin sín nkehe kuènte Dios kixin ntá jehe sín mé tsochóna sín tí kjuachaxin kuènte Dios.

4 'Náxrjón tjejó tí sín t'ává kixin Dios mé sinchechéhe asén sín.

5 'Náxrjón tjejó tí sín hnkehya asén kixin jehe sín mé ts'áyéhe sín tí nonte tsjanjon Dios.

6 'Náxrjón tjejó tí sín éxí yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkitsa sín kixin ts'áyéhe sín tí nkehe tjinkaon sín.

7 'Náxrjón tjejó tí sín tikonóhe kichó sín kixin ntá Dios kjaxin tsikonóhe tí jehe sín.

8 'Náxrjón tjejó tí sín kótjóá asén kixin ntá jehe sín sátsjik'ikon sín Dios.

9 'Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

10 'Náxrjón tjejó tí sín kjónté tjejóttasótexín sín kixin kjuínchexiteyéhe sín Dios kixin ntá jehe sín mé kuènte sín nkaya nkajní.

11 'Náxrjón tjejórá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro sín kixin tinkachónkirá tí janhan.

12 Chrókócháhará la ko kjuaxróxin chrók'uejórá kixin ntá chr'éxin jahará ts'ayéhérá ijnko nkehe antsí má jína nkaya nkajní. Mé xikaha kjuasóte tí sín k'uéjó ósé k'uéchrónka sín tí itén Dios.

Jahará la éxí yóhe xijnta la ko éxí xrohi t'inkaséyanxín chjasintajni

(Mr. 9.50; Lc. 14.34-35)

13 'Jahará mé yóhe éxí xijnta chjasintajni. A ntá tí chrók'uánkéhé tí jní tí xijnta la ntá xitjahya chrókójní ínaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

14 'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá.

15 La ko kohya nkexro sinchek'ákjen ijnko lámpara ntá tsjak'e chrínkí ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro siin tí nchia ntiha.

16 Mé xikaha tí jahará chrókóyóhará éxí tí xrohi t'inkaséyanxín kixin ts'ikon kaín chojni tí xra jína tjejoch'erá la ntá chrókjuanchehe sín kjuasáyé It'eni tjen nkaya nkajní.

Kjuako ch'in Jesús kuènte tí ley

17 'Jahará chróntáchrohýará kixin k'uinka kixin tsjakjíyan tí ley tsík'etōan ch'in Moisés la ko tí nkehe kjuako tí sín k'uéchrónka itén Dios. Náhi. Jehya xikaha k'uinka kixin tsjakjíyan tíha. Náhi. K'uinka janhan kixin tsjákoxian nkehe chaxín t'axrjexín tíha.

18 Chaxín xrjanka kixin tí naxa tjen nkajní la ko chjasintajni la kohya ninkehó ley tsjinhya, mé tsjinhya nijnko punto la

nijnko letra kuèté tí ley tsjixinjian tsoxiteyá kaín tí nkehe t'ichjánxin tsoxiteyá.

¹⁹ Mé xikaha tí nkexro tsitekakonhya tí nkehe k'ueṭoan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsi tí kjuachaxin kuènte Dios. A ntá tí nkexro tsitekaon la ko tsjakohé ókjé nkexro tsitekaon sín, mé antsí imá ts'etṭoan sín tí tsi kjuachaxin kuènte Dios.

²⁰ Méxra tjonkará kixin t'ichjánxin kixin antsí jína ts'ejorá la tsoyóahyará tí sín tjako ley la ko tí sín fariseo kixin tí tsoyóhara sín la ntá xitjahya tsákjárá tí kjuachaxin kuènte Dios tjen nkaya nkajní.

Kjuako ch'in Jesús kuènte tí kjuanínkaon

(Lc. 12.57-59)

²¹ 'Jahará tsikinínra kixin tí sín ósé tsík'ítuenhen sín kixin: "T'oyánhyará kichuára* kixin tí nkexro t'oyán kichó mé t'ichjánxin tsjasóte sín."

²² A ntá janhan tjonkará kixin jnkojín nkexro tsonínkakonhen kichó mé t'ichjánxin tsjasóte. A ntá tí nkexro t'ántaxínhin kichó la mé tí sín t'etṭoan mé sinchekitoexín ijje ch'án. La ntá tí nkexro tsontáche kichó kixin tsixénká ch'án la tíha mé sátsji tsjasótexín tí siín xrohi.

²³ A ntá tí tsjikuehéra Dios nkehe tsochjehéra ch'án ntá tsjanrá tí altar ntá tsoxráxinkáonrá tí jnkojín kichuára kjuanjonkoará sín

²⁴ la ntá tí xikaha la titohéra tí nkehe tí altar la sátsjirá tsonixjehéra ch'án jnkojína kixin í tsokohya kjuanínkaon. La ntá tsjixin la ntá tsjihará tsjánjonrá tí nkehe tjinkáonrá tsjánjonrá.

²⁵ Tí siín jnkojín nkexro tjanchia jie tí jahará la tjinkaon chrókjuikoára ch'án juzgado, a ntá íchá jína jnkokoá chrókjuenkayáxinrá, jehe ch'án la ko jahará, ntia ó, kixin ntá sáchrókjuihará tí tjen ch'in juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policía kixin ts'ixenhenrá ntoechiso.

²⁶ A ntá chaxín tjonkará kixin tí ts'ikjahará sín ntoechiso la ts'axrjéxinhyará ntiha tsjixinjian tsjenkeherá sín kaín xín chichaon chontará.

Ch'in Jesús kjuako kixin chrókjuasinhya sín jie, chróchóntahya sín chojni chjin ókjé

²⁷ 'Jahará tsikinínra tí nkehe tsík'ítuenhen tí sín ósé ntáchro kixin: "Chrókjuásinhyará jie, chróchontahyará chojni chjin ókjé."†

* 5:21 Éxodo 20.13; Deuteronomio 5.17 † 5:27 Éxodo 20.14; Deuteronomio 23.21

28 **A** ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

29 **A** ntá tí ikuan chjina chrókuásixián jie la chrókuakitsjenkiá ikuan la chróchr'an ikjín kixin íchá jína ts'ítjayan it'o cuerpo kuéntá kixin jehya kuenté cuerpo kuéntá sátsji tsjasótexín tí siín xrohi.

30 **A** ntá tí itja chjina chrókuásixián jie la chrókóchrínjian tí tjá a la chróchr'an ikjín kixin íchá jína ts'ítjayan it'o cuerpo kuéntá kixin jehya kuenté cuerpo sáchrókjui tsjasóte tí siín xrohi.

*Ch'in Jesús kjuako kixin chrók'uitjéhya kichó sín
(Mt. 19.9; Mr. 10.11-12; Lc. 16.18)*

31 **Kj**axin tsík'ítuenhen tí sín ósé kixin tí nkexro tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'itjéxín kichó sín.‡

32 **A** ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuítóhe ch'án tjan kixin tsjasin tjan jie. **A** ntá tí nkexro tsotehe ijnko tjan tsíkítsínkehe la kjaxin ó kjuasin ch'án jie.

Ch'in Jesús kjuako kixin chjiníhya chrók'uákjexinini ihnié Dios

33 **Kj**axin tsíkinhínra tsík'ítuenhen tí sín ósé kixin: "T'ichjánxin sinchexiteyará tí nkehe tsintáchrórá kixin chrók'uákjexinhyará ihnié Inchéni chjini."§

34 **A** ntá janhan mé tjonkará kixin chrók'uákjexinhyará ihnié Dios ninkehó la ko chrók'uákjexinhyará nkajni kixin ntaha tjen Dios t'etöan.

35 La ko chrók'uákjexinhyará chjasintajni kixin ntaha tjejókjen toté ch'án la ko chrók'uákjexinhyará chjasin Jerusalén kixin ntiha la itjen tí Rey t'etöan.

36 La tjenkayáxixínhyará ikjárá ó kixin jahará xitjahya tsjakérá ijnko kaxíhi tjóá o nijnko kaxíhi tié.

37 Tí nkehe tsontáchrórá chaxín la chaxín la tí nkehe náhi la náhi la kohya nkehe chrókuakét'oxinrá chróchrónkará. **A** ntá ichrén nkehe tjakét'oxinrá tsochrónkará la táha mé jínahya.

*Ch'in Jesús tjako ch'án kuènte tí sín t'itjáyenhya ichrén
kjuanínkaon*

(Lc. 6.29-30)

38 **J**ahará mé ó tsíkinhínra tsík'ítuenhen tí sín ósé kixin tí takitsjenki sín ikonrá la kjaxinrá chrókuakitsjenkírá ikon sín. **A** ntá tí chrókuakitsjenki sín nënorá la kjaxinrá chrókuakitsjenkírá neno sín kjaxin.*

‡ 5:31 Deuteronomio 24.1-4 § 5:33 Números 30.2; Deuteronomio 23.21 * 5:38 Éxodo 21.24; Levítico 24.20; Deuteronomio 19.21

³⁹ A ntá janhan mé tjonkará kixin tí jnkojín nkexro ichrén nkehe jínahya sit'ahará la jahará ch'ehyará xikaha. Náhí. Tí chjéhe ijnko nkexro ijnko tuāan la ntá tjóka tí í jnko nānko tuāan.

⁴⁰ La tí siín jnkojín nkexro tjanchia jje la tjinkaon sín chrókuakitsjaha sín camisá la tūtohé sín sátsjiko sín tí ka t'ínkayate kjaxin.

⁴¹ La tí t'etuānhanrá sín tsámárá nkehe ijnko kilómetro la tjakét'oxinrá í yaá kilómetro.

⁴² Tí jnkojín nkexro tsjanchia nkehe la tí tjinkaon ch'án nkehe la chróntáchrohyará kixin “náhi”, chrókjuincheckjenrá ch'án.

*Tjuèhérá tí sín nínkakonhanrá sín
(Lc. 6.27-28, 32-36)*

⁴³ Kjaxin ó tsíkinhínrá tsík'ítuenhen tí sín ósé kixin: “Tjuèhérá tí nkexro choxinrá la tsoninkákonhénrá tí sín jínahya kjuít'ahará.” †

⁴⁴ A ntá janhan mé tjonkará kixin chrótjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjinkakonhya tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya.

⁴⁵ Tí xikaha sich'erá la ntá jahará chaxín xjeen It'eni tjen nkaya nkajní kixin jehe ch'án mé t'etoan ch'án tsjiton yaon ts'inkaséyenhen tí sín jínahya la ko tí sín jína la ko kjaxin t'etoan ch'án kixin ts'aniá ichrin tí siín tí sín jína la ko tí sín jínahya.

⁴⁶ Tí jehó tjuèhérá tí nkexro tjuàhará, ¿la ntá nkehe chrókjuachará? A ntá kjaxin tí sín nchekjènkjì la xikaha ch'e sín.

⁴⁷ La tí jehó nixjehérá tí sín kíchuárá la ntá, ¿á chaxín imá jína tíha ní? Kixin tí xikaha la kjaxin tí sín chónhya Dios la xikaha ich'e sín.

⁴⁸ Kjaxinrá jahará ntoá chrók'uejorá kixin It'eni tjen nkaya nkajní la antsí má ntoá tjen ch'án.

6

Kjuako ch'ín Jesús kuèté tí xra jína

¹ Chrókjuásixínhyará kjuaxroan tí nkehe tinkachónkirá kixin tjinkáonrá chrók'uikon chojni ó. A ntá jahará tí xikaha chrókjuich'erá ntá It'eni tjen nkaya nkajní la ninkehó nkehe tsotjáhyará ch'án.

² Tí tjínkitsará ijnko chojni nòa la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xikaha ch'e sín t'óxroan sín nkaxenhen nínko la ko tí ntja kixin chrók'uikon chojni la chrókjuikosáyehe sín tí jehe

† 5:43 Levítico 19.18

sín kixin jína tjejóch'e sín. A ntá janhan ntáxrjan kixin ó kjuixin k'uáyéhe sín nkehe la í ts'áyèhya sín inaá.

³ A ntá tí jahará tíó chrókjuínkĩtsará ijnko chojni chaxín nòla la íchá jína kixin chrókónoehya ninkexró kjónté ijnko nkexro tjuá jína.

⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'eni ts'ikon ch'án kixin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'ín Jesús nkexrí tsonixjeheni Dios
(Lc. 11.2-4)

⁵ A ntá tíó nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen nĩnko la ko ts'ejó sín esquina calle kuènte ntasin kixin ts'ikon kaín chojni kixin tjejónixjehé sín Dios. Ntá janhan chaxín ntáxrjan kixin jehe sín la xikaha kjuích'e sín la ó kjuixin k'uáyéhe sín nkehe la í ts'áyèhya sín inaá.

⁶ A ntá tíó nixjehérá Dios la t'ixenhénrá nchia ntóará la t'ikjehérá tí puerta la nixjehérá It'eni kixin ntaha tjekoará ch'án. A ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ Ntá tíó chrónixjehérá Dios la chrókjatèehya chrónixjará kixin chrókóyóahyará éxí tí sín chónhya Dios kixin jehe sín tjenkayáxin sín kixin nchónhya tsonixja sín, la mé xikaha mé chrókuinhin Dios, ichro sín.

⁸ A ntá jahará chrókóyóahyará éxí tí jehe sín. It'eni ó nohe ch'án nkehe t'ichjánxinhanrá kjónté naxá tjanchéhyará ch'án.

⁹ Méxra xikihi chróntáchorá:
It'eni tjen nkaya nkajní jaha imá tjóá.

¹⁰ Chrókui tí kjuachaxin kuènta.

Chrókjuích'e tí nkehe tóxrjínhan jaha ntihi chjasintajni éxí tjech'e nkaya nkajní.

¹¹ Ijie la tsjánjuan tí niotja t'ichjánxinhinni.

¹² T'oxíka tí nkehe jínahya kjuích'eni kixin kjaxin jeheni ts'itjáyhenni tí nkehe kjuích'eheni chojni.

¹³ Tjtoéhyani kixin xrahya chrókjuasinni jie. Nchekaáni kaín tí jínahya chrókónhenni,

kixin jaha mé kuèntá tí kjuachaxin kixin ó noheni kixin jaha tjetétogan tí kjuachaxin jnkochríxín. Amén.

¹⁴ Tí jahará ts'itjáyanhanrá tí nkexro kjuasinhánrá ichrén jie la mé kjaxin It'eni tjen nkaya nkajní mé ts'ikon ch'án kixin xikaha kjuích'erá la ntá kjaxin jehe ch'án ts'oxíka ch'án tí jie kjuásinrá.

¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá kjaxin It'eni tjen nkaya nkajní ts'ikon kixin

xikaha kjuich'erá k'uitjáyanhyará la ntá kjaxin jehe ch'án la ts'óxikahya ch'án tí jie chontará.

Ch'in Jesús kjuako kixin chrók'óxroanhya sín kixin kjónehya sín

16 'A ntá tí jahará tí naxa kjóntehyará kixin tjinkáonrá tsonixjehérá Dios la ntá chrók'uejohyará éxí t'avará éxí ch'e tí sín jehya jnkójínxón tjenkayáxin sín. Mé xikaha ch'e sín kixin tjinkaon sín ts'ikon chojni kixin naxa kjónehya sín. Tí xikaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín ínaá.

17 A ntá tí jahará kjónté naxa kjóntehyará kixin tjinkáonrá tsonixjehérá Dios la t'ontirá ikonrá la tjéntóará kjará

18 kixin tsonoehya chojni kixin naxa kjóntehyará. Jehó It'eni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

Tí nkehe chaxín tjete síin nkaya nkajní

(Lc. 12.33-34)

19 'Jahará chrókjuásitonhyará nkehe tjete ntihi chjasintajni kixin ntihi la ts'in kué tí nkehe tjete sinchek'itjáyanhanrá va la ko tsochjisen tí chichaon la ko xíchee ts'ixenhen tsaáhará.

20 Íchá jína tjásitonrá tí nkehe tjete nkaya nkajní kixin ntaha kohya iko sinchek'itjayan nkehe la tsochjisenhya tí nkehe la ko kohya xíchee ts'ixenhen tseé.

21 A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

22 Tí ikonrá mé éxí yóhe ijnko xrohi t'inkaséyanxín tí cuerpo kuéntará. Tí jína ikonrá la ntá kjaxin kuenté tí cuerpo kuéntará mé chóna xrohi.

23 A ntá tí ikonrá la jínahya la ntá kuenté tí cuerpo kuéntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon

(Lc. 16.13)

24 'Kohya ninkexró tsjacha sich'ehe xra yaá lamó. Tí xikaha chrókjuich'e ch'án la ntá ijnko tsonínkakonhen ch'án la tí í jnko tsotjuèhe ch'án o ijnko la tsitekakonhen ch'án la tí í jnko la tsitekakuenhya ch'án. Méxra xitjahya chrókjuich'ehe chojni xra Dios tí tjinkaon sín chróchóna sín itsje chichaon.

Dios mé t'áyakonhen tí xjeen ch'án

(Lc. 12.22-31)

25 'A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uítsará. ¿Á

jehya a_{nt}sí má sínkí tí kjuachón chróchontará, a_{nt} ntá kánhyó sínkí tí nkehe chrókjónterá, la á jehya a_{nt}sí má sínkí tí cuerpo kuèntará, a_{nt} ntá kánhyó sínkí tí ka chrók'uítsará?

²⁶ Xrácinkáonrá nkexrí síin tí koxroxé xritjaka. Jehé va la t'en_{ka}hya va noa la ko tjáhya va la ko chóntahya va nketí ts'in_{ka}chjínayá va tí noa, la kjánchó It'éní tjen nkaya nkajní la tjanjon ch'án nkehe sine va. A_{nt} ntá jahará mé a_{nt}sí tjetóan a_{nt} ntá tí koxroxé la kénhyó.

²⁷ ¿Á tjejó jnkojínrá tjenkayáxinrá kíxin tí chrókóxakonhanrá imá a_{nt} ntá naxá chrók'uankírá it'ó metro ntetoxinrá inaá?

²⁸ ¿Nkekuènté kíxin imá tóxakonhanrá ikará ó? Tsjehérá nkexrí sít'ánkí tí catsjo síin nteje. Tí itsjo la ní ch'ehya xra la ko tjonhya.

²⁹ La tjonkará kíxin kjónté ch'ín rey Salomón k'uéchónta itsjé chichaon la naxá kjuíncheyóehya ch'án nkexrí náxrjón tsjehe tí tsjo a.

³⁰ A_{nt} ntá tí Dios la nchek'itsa tí ka yoa síin nteje kjónté ijie síchón ka la ntóye tsochexín tí nkaxenhen tja, a_{nt} ntá jahará mé a_{nt}sí chrókjuintak'itsará ch'án. ¿A_{nt} ntá nkekuènté títekákonhyará ch'án?

³¹ Méxra xikaha chrókóxakuanhyará chrókjuanchankíhyará kíxin nkehe chrókjónterá o nkehe chrók'uirá o nkehe chrók'uítsará.

³² Kaín tí nkehe la tí sín chónhya Dios mé tóxakonhen sín tíha. A_{nt} ntá jahará chontará It'éní tjen nkaya nkajní la mé nohe ch'án kaín nkehe t'ichjánxinhanrá.

³³ A_{nt} ntá senó mé chrókjuéyará tí kjuachaxin kuènté Dios la chrókjuínchexiteyará tí nkehe jína tjinkaon ch'án, a_{nt} ntá jehé ch'án mé tsjanjon ch'án kaín nkehe t'ichjánxinhanrá.

³⁴ Tóxakuanhyará tí nkehe tsonhen ntóye xikaha kíxin ntóye la í jnko yaon táha la jnkojnko yaon tjikao kjuaxikaon kuènte.

7

Chrók'uantaxíenhyará kíchuára

(Lc. 6.37-38, 41-42)

¹ 'Chrókuékahyará ókjé chojni jie kíxin ntá Dios kjaxin chrókjuanchahya jie tí jahará.

² A_{nt} ntá Dios la tsjanchia ch'án jie tí jahará tí tsékará ókjé chojni jie. A_{nt} ntá tí xikaha sích'erá la mé xikaha tsonhanrá kjaxin.

³ ¿A_{nt} ntá nkekuènte tsjehé tí chjínínó ntsí tjenkánkí ikon tí kíchuá tí naxá ántosán tí inta jíé tjenkánkí ikuan?

⁴ A_{nt} ntá tí chonta jaha tí nta jie tjenkánkí ikuan, ¿a_{nt} ntá nkexrí kíxin chróntáche tí kíchuá kíxin: "Tjítóhé tsakitsjenkíni tí chjínínó ntsí tjenkánkí tí kuan?"

⁵ A ntá jaha la ntoáhya tjenkayáxian. Senó chrókuakitsjenkiá tí nta jíe tjenkánkí ikuan kíxin ntá chrók'uikuan tsakitsjenkiá chjínínó ntsí tjenkánkí ikon tí kíchuá.

⁶ 'Chróchjeéhyará tí nkehe tsikótjóá tí konjā kíxin jehe va tsokjan va tsonínkakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjete kíxin tsinkátja va la tsokuen.

Tjanchia la tjéyá la t'inka puerta

(Lc. 11.9-13; 6.31)

⁷ 'Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe.

⁸ Kíxin tí nkexro tjanchia nkehe la ts'áyéhe tí nkehe la tí nkexro tjejá nkehe la ts'itja la tí nkexro t'inka puerta la tsoxitjehe.

⁹ '¿Á tjejó jnkójín nkexro ntihi chrókjuanjon xro chrókjóne xjeen tí chrókjuanchia xjan niotja? Kja náhí.

¹⁰ O tí chrókjuanchia xjan ijnko koche la, ¿á chróchjehe ch'án tí xjeen ch'án konche chrókjóne ní? Kja náhí.

¹¹ A ntá jahará kjónté jínahyará la ó nohará nkehe jína chjehérá xjaanrá. A ntá It'eni tjen nkaya nkajní kjaxin antsí tsochjehe ch'án nkehe jína tí nkexro tsjanchia nkehe.

¹² 'Méxra xikaha chrókuikosáyehérá kíchuará éxí yóhe nkexrí tjinkáonrá chrókuikosáyahará sín mé xikaha k'uetqan ch'ín Moisés la ko xikaha ntáchro tí xroon kuènte tí sín k'uéchronka itén Dios ósé.

Tí puerta tekahya

(Lc. 13.24)

¹³ 'T'ixeenxínrá tí puerta tekahya. Kíxin tí puerta la ko tí ntja ts'itjayanxín chojni la imá iton la ko teka la nchónhya chojni sátsji tí ntja ntiha.

¹⁴ A ntá tí puerta la ko tí ntja sátsjixinni tí kjuachón la tekahya ntiha la ko tsjéhya chojni ts'itja tí ntja a.

Tí to mé tjátsqanxínni tí nta

(Lc. 6.43-44)

¹⁵ 'Méxra tóxakonhanrá tí ts'ikonrá itsi tí sín ch'ia tsontáchro sín kíxin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jjehe.

¹⁶ Jahará la chrókuátsqanxínrá tí jehe sín kíxin tí xra ch'e sín kíxin tí ntach'i la xitjahya chrók'óna to uva la ko tí kach'i xitjahya chrók'óna to higo.

¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína.

¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína.

¹⁹ Kaínxín tí nta t'ónahya to jína mé tsochrínjin la tsoche.

²⁰ Mé xíkaha chrókjuatsòanxínrá jahará tí sín jehya jína kíxin tí xrā tjejóch'e sín.

Jehya kaín chojni ts'ixenhen tí kjuachaxién Dios tjen nkaya nkajní

(Lc. 13.25-27)

²¹ 'Kénhya chojni tsontácho: “Ìnchéni, Ìnchéni”, mé ts'ixenhen sín tí kjuachaxién Dios tjen nkaya nkajní. Náhi. Jehó tí nkexro sinchexiteyá tí nkehe tóxrjínhin T'aná t'etòan tjen nkaya nkajní.

²² Tsjixraká tí yaon a la ntá itsjé sín tsontácho sín kíxin: “Ìnchéni, Ìnchéni, k'uénixjaxínni ihniá la ko tí ihniá mé kuakitsjexínni nchakuen tí jínahya la ko kjuachaxién ihniá kjuasixínni nchónhya kjuaxroan.”

²³ A ntá janhan tsjatahā kíxin: “Janhan la chonhya tí jahará. Tìtonará sátjirá kíxin jahará imá jínahyará.”

Ch'ín Jesús kjuíncheyóexin ch'án kíxin yaá nchia

(Lc. 6.47-49; Mr. 1.22)

²⁴ Méxrā tí nkexro tinhin tí nkehe ntáxrjan la titekaon ch'án la jehe ch'án mé éxí yóhe ijnko nkexro chóna kjuaxrexinkaon jína la kjuích'éna nchia chrítaón tjo.

²⁵ A ntá xrínahya xrakoa chrin, ikui yeé ntāninche la tjiān chjéhe xrīnto la kjónté xíkaha la xíkaha tí nchia kíxin itjo tjekjen nchia.

²⁶ A ntá tí nkexro tinhin tí xrjanka la titekakonhya mé jehe la éxí yóhe ijnko nkexro lontj la kjuích'éna ch'án ijnko nchia tí siín nchesen.

²⁷ La ntá xrínahya xrakoa chrin ntá āntsí kóyéé ntāninche tí tsāka la ko chjéhe xrīnto la ntá xíka tí nchia, la ijnko kjuachrakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kíxin nkexrí kjuako ch'án.

²⁹ Kíxin kjuako ch'án éxí ijnko nkexro chóna imá kjuachaxin la tóyóehya ch'án tí sín maestro kjuako tí ley.

8

Ch'ín Jesús kjuínchekitohe jína ijnko chojni chóna chin lepra

(Mr. 1.40-45; Lc. 5.12-16)

¹ A ntá ch'ín Jesús k'uínkajinxin ch'án tí jnā la chréhe nchónhya chojni.

² La ntá kóchjina ijnko ch'ín níhi chóna chin lepra la kjuák'exín toch'in ch'án nkayakon ch'ín Jesús la ntácho ch'án kíxin:

— Ìnchéni tí tjinkávan la jína chrókjuínchekitoḥéni jína — ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntáchro ch'án kixin:

— Méxra xikaha tjinkávan. Ntá jie sintakitoḥa jína.

Ḃ ntá tuénxín kuitoḥe ch'án jína la ó kjuín tí chin k'uéchénta ch'án.

⁴ La ntá ntáchro ch'ín Jesús kixin:

— Ninkexró chenkahya ntihi. Jehó sátjia tjákehé tí ch'ín nchat'á kixin kuitoḥa jína la ko sátjikoá tí nkehe tsík'etoan ch'ín Moisés* kixin ntá xikaha tsonoexín kaín xín chojni kixin ó kuitoḥa jína — mé xikaha k'uetoan ch'ín Jesús.

Ch'ín Jesús kjuínchekitoḥe jína ijnko nkexro ch'ehe xra ijnko capitán romano

(Lc. 7.1-10)

⁵ Ḃ ntá tió k'uixenhen ch'ín Jesús chjasin Capernaum la ntá xrínahya kóchjina ijnko capitán romano la chrónòá ch'án

⁶ ntáchro ch'án kixin:

— Ìnchéni ntóeni itjen ijnko ch'ín ch'ehe ni xra mé níhi ch'án, tjetsínka ch'án, tsík'en toté ch'án la imá tjtóḥe ch'án — ichro ch'án.

⁷ Ḃ ntá ch'ín Jesús kjuátéḥe ch'án ntáchro ch'án kixin:

— ¿Á sátsjia sintakitoḥa jína tí ch'ín a? — ichro ch'án.

⁸ Ntá tí ch'ín capitán kjuátéḥe kixin:

— Náhi, Ìnchéni, tósuèheni kixin chrók'uixenhen ntóeni kixin jehya chojni jínani. Jehó chrókjuánjuan kjuachaxin kuéntá, ntá tí ch'ín ch'ehe ni xra chrókuitoḥe ch'án jína.

⁹ Janhan na kjaxin chonta chojni t'etuanna la ko kjaxin janhan tétuanḥan tí sín soldado. Tió tétuanḥan ijnko sín sátsji sín la ntá ó sátsji sín. La kjaxin tió tétuanḥan ijnko sín kixin xrakoa sín la mé tji sín. La ko tió tétuanḥan ijnko nkexro ch'ena xra kixin sich'e xra la ich'e xra — ichro ch'án.

¹⁰ Ntá kuínhin ch'ín Jesús ntá kóxakonhen ch'án kixin xikaha chro tí ch'ín a, ntá nixjeḥe ch'án tí sín chréḥe ch'án ntáchro ch'án kixin:

— Chaxín ntáxrjan kixin kuénté tí nación Israel la k'uitjahya janhan ninkexró tinkáchónki xikaha éxi tinkáchónki tí ch'ín i.

¹¹ Janhan xrjanka kixin nchónhya chojni ókjé tjixín tí tjtóxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuènte Dios.

¹² Ḃ ntá itsjé tí sín chrók'uejó tí tjen tí kjuachaxin kuènte Dios la ts'axrjexín sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'ín Jesús mé nixjeḥe ch'án tí ch'ín capitán ntáchro ch'án kixin:

* 8:4 Levítico 14.1-32

—Sátjia nt̄oḁ. Éxí kuítekávān jaha la tsoxiteyá tsonhen tíha —ichro ch'án.

La ntá tí ch'ín ch'e xṛḁ la o tuénxín tí hora a tsíkitoḁhe ch'án jína.

Ch'ín Jesús kjuínchekitoḁhe ich'ee ch'ín Pedro jína
(Mr. 1.29-31; Lc. 4.38-39)

¹⁴ A ntá sákjuí ch'ín Jesús tí nt̄oḁ ch'ín Pedro la ntaha k'uíkon ch'án kixin tí ich'ee ch'ín Pedro la níhi tjan tjetsínka tjan la chónṫa tjan sóa.

¹⁵ Ntá itsé ch'án itja tjan la ntá kjuínhin tjan tí sóa la ntá k'uínkatjen tjan la kjuankixin yaxínhin tjan kixin tsjanjon tjan nkehe sine sín.

Ch'ín Jesús kjuínchekitoḁhe nchónhya tí sín níhi jína
(Mr. 1.32-34; Lc. 4.40-41)

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chónṫa nchakuen tí jínahya. La ntá jnkokoá nixja ch'án la k'uaxrjexín tí nchakuen tí jínahya tí jehe sín la kjaxin kjuínchekitoḁhe ch'án jína kaín tí s̄inníhi.

¹⁷ Mé xíkaha kjuích'e ch'án kixin tsoxiteyá tí nkehe tsíchrónka tí ch'ín Isaías tí ch'ín k'uéchrónka itén Dios. Mé ntáchro ch'án xíkíhi: “Jehe ch'án kuákja ch'án tí chin chónṫani la ko jehe ch'án kuámá ch'án tí kjuatjoté.”† Mé xíkaha ichro itén Dios.

Tí sín tjinkaon tsochréḁe tí ch'ín Jesús
(Lc. 9.57-62)

¹⁸ Tió k'uíkon ch'ín Jesús kixin nchónhya chojni k'uántatjen sín ch'án la ntá k'ueṫoḁn ch'án kixin ts'átòye sín í jnko chrínta nta.

¹⁹ La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

—Maestro tjinkaonni chróchréḁeni tí jaha kjónté nketi tjinkávān sátsjia —ichro tí ch'ín a.

²⁰ La ntá kjuátéḁhe ch'ín Jesús ntáchro ch'án kixin:

—Tí koxróntá chónṫa va itjueé va la ko tí koxroxé chónṫa va kaké va. A ntá tí Xjeen Dios K'óna Chojni mé chónṫahya nketi ts'ok'èxin ch'án.

²¹ A ntá ijnko tí chojni k'uájiko ch'án, mé ntáchro ch'án kixin:

—Ínchéni, t̄it̄ohéni senó sátsjikjaváni it'éni —ichro ch'án.

²² La ntá kjuátéḁhe ch'ín Jesús ntáchro ch'án kixin:

—Náhi, chréhé tí janhan. T̄it̄ohé kixin tí chojni tsík'en la jnkokón sín tsík'en tsjavá kíchó sín —mé xíkaha ichro ch'ín Jesús.

Ch'ín Jesús kjuínchek'ixrata tí xrint̄o la ko tí nta
(Mr. 4.35-41; Lc. 8.22-25)

† 8:17 Isaías 53.4

23 Ntá ch'ín Jesús k'uixenhen tí ntabárc̣o la k'uixenko ch'án tí sín k'uájiko ch'án.

24 La ntá xrínahya imá síchrica nṭa la ó chjina sítikia nṭa tí ntabárc̣o. La kjánchó ch'ín Jesús la tjejua ch'án.

25 La ntá tí sín k'uájiko ch'án kjuínchek'aya sín ch'án la ntáchro sín kixin:

—Ínchéni nchekaáni kixin tí ntabárc̣o la ó meró ts'aniánkí nṭa —ichro sín.

26 Ntá kjuátehe ch'án ntáchro ch'án kixin:

—¿Nkekuènté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xikaha ntá k'uàya ch'án la k'uētuenhen ch'án tí xṛinṭo la ko tí ntayaon la ntá tuénxín k'uixrata.

27 La ntá imá chrakon sín la ntáchro sín kixin:

—¿Xá nkexro tíhi? Kjónté xṛinṭo la ko ntayaon la mé nchexiteyéhe ch'án —ichro sín.

Tí sín chón̄ta nchakuen tí jínahya tí nonte Gadara

(Mr. 5.1-20; Lc. 8.26-39)

28 Ntá tió k'uátòye ch'ín Jesús tí ntayaon a ntá kjuíji sín tí nonte Gadara. La ntá yaá chojni chón̄ta nchakuen tí jínahya k'uaxrjexín tòyé chojni tsík'en la kóchjinehe sín ch'án. Jehé sín mé imá jiehe sín la kohya ninkexró tjacha ts'atsínka tí nṭa ntiha.

29 La ntá kjuankíxin k'óyako sín ntáchro sín kixin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kixin ṣinchekjasóteni kjónte nax̄a kjuixrakáhya tí yaon tsjasóteni? —ichro sín.

30 A ntá ntiha kánhyó kjín síin itsjé cochíno xrine va.

31 La ntá tí nchakuen tí jínahya mé chrónóeh̄e tí ch'ín Jesús kixin:

—Tí tsétōan kixin sátsjini la chrókjuánjuan kjuachaxin chrók'uixenhenni tí cochíno —ichro sín.

32 Ntá ntáchro ch'ín Jesús kixin:

—Tí xikaha la sátjia —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajinx̄in va ntiha kjuítsínkayá va tsaka, ntá kjuítsínkankí va nṭa, kjuínhin va nṭa.

33 La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchón̄ta tí nchakuen tí jínahya.

34 A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kixin xikaha tsíkónhen la chrónóeh̄e sín ch'án kixin sáchrókjui ch'án ókjé.

9

Ch'ín Jesús kjuínchekitohe jína ijnko chojni tsík'en toté
(Mr. 2.1-12; Lc. 5.17-26)

¹ La ntá kjuixin tíha ntá ch'ín Jesús mé k'uúixenhen ch'án ijnko ntabárcō la k'uátsínka ch'án í jnko lado chrínta ntā la kjuíji ch'án chjasén ch'án.

² A ntá ntiha kuikao sín ijnko ch'ín tsík'en toté la tjetsínkaták'á ijnko kania. Ntá k'uúikon ch'ín Jesús kixin chaxín tinkáchónki sín ch'án la ntá nixjehē ch'án tí sǐnníhi ntáchro ch'án kixin:

—Xjeenni nchechéhé asán. Tí jie chonta la ó kjuixin kjuíinhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kixin:

—Tí ch'ín i mé ncheyóhe ch'án asén ch'án Dios kixin xíkaha nixja ch'án.

⁴ Ntá ch'ín Jesús mé ó nohe ch'án kixin nkehe tí kjo sín asén sín ntá ntáchro ch'án kixin:

—¿Nkekuènté kixin xíkaha jínahya tjenkayáxinrá?

⁵ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuíinhin ch'án tí jie yámá ch'án o á antsí xrahya chróntátjan ch'án kixin chrók'uúinkatjen ch'án sáchrókjui ch'án?

⁶ Méxra tsjákoxiā kixin tí Xjeen Dios K'óna Chojni mé ntihi chjasintajni chóna kjuachaxin tsjakjiihin ijie chojni.

Ntá ntáche ch'án tí sǐnníhi a kixin:

—Ijie la t'inkatjen tjatsíyan kaniāa na sátsjia ntoā —ichro ch'án.

⁷ Ntá tí ch'ín tsík'en toté na tuénxín k'uúinkatjen ch'án la sakjuí ch'án ntoe ch'án.

⁸ Ntá kaín tí sín siín ntiha k'uúikon sín kixin xíkaha kónhen la imá chrakon sín la kjuanchehe sín Dios kjuasáya kixin tí nkexro imá kjuakoxin ch'án kjuachaxin kuènte Dios.

Ch'ín Jesús k'uúyehē ch'án tí ch'ín Mateo
(Mr. 2.13-17; Lc. 5.27-32)

⁹ A ntá ch'ín Jesús sákjuixin ch'án ntiha la k'uúikon ch'án ijnko ch'ín it'in Mateo tjetjaxin ch'án ntiha nchekjènkj ch'án. Ntá ntáchro ch'ín Jesús kixin:

—Chrèhé tí janhan —ichro ch'án.

Ntá ch'ín Mateo tuénxín k'uúinkatjen ch'án chrèhe ch'án tí ch'ín Jesús.

¹⁰ A ntá chr'éxin ch'ín Jesús kjuák'e ch'án ntoe tí ch'ín Mateo la ntaha xranjon nkehe sine ch'án la ntá itsjé tí sín nchekjènkj la ko í so sín chóna jie mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án.

11 La ntá tí sín fariseo kjaxin k'uikon sín xikaha la kjuanchankíhi sín tí sín k'uájiko ch'ín Jesús, ntáchro sín kixin:

—¿Nkekuènté kixin tí ch'ín maestro kuèntará mé neko ch'án tí sín nchekjènkí la ko tí í so sín chóna jìe? —ichro sín.

12 Ntá ch'ín Jesús la kuínhin ch'án nkehe tí tjo sín la ntáchro ch'án kixin:

—Tí sín níehya la t'ichjánxienhya sín nkexro sich'e xroan. Náhi. Jehó tí chojni níhi mé t'ichjánxinhin sín nkexro sich'ehe sín xroan.

13 Sátjirá la ts'ítjará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan tjínkavan kixin chrókuikonóghérá chojni la tjínkakhonhya kixin chrók'oyánrá iko chrókjuánjonrá.”* Mé xikaha ichro itén Dios. Janhan na k'uinkahya ntihi kixin chrók'uíyaha chojni jína tjejó. Náhi. K'uinka kixin ts'íyaha tí chojni chóna jìe kixin chrókuítóhe sín tí ijíe sín ntá chrókjuánkí sín tí tjenkayáxin sín —ichro ch'án.

Kjuanchankí sín kuènte tí nehya sín

(Mr. 2.18-22; Lc. 5.33-39)

14 Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kixin:

—Jeheni la ko tí sín fariseo la jnkoyaxon nehyaní, a ntá tí sín xrikoá la, ¿nkekuènte xikahya ch'e sín? —ichro sín.

15 Ntá kjuátehe ch'ín Jesús, ntáchro ch'án kixin:

—¿Xá chrók'uává kaín tí sín tsík'íyehé sín tsochjina tsothehe ijnko chojni kixin naxa tjen tí ch'ín tsíkóthehe tjejóko sín ntiha? A ntá tsjixraká ijnko yaon tsotsé sín tí ch'ín tsíkóthehe sátsjiko sín ch'án ntá kaín tí sín tsíkóchjina mé ts'avá sín la í sinehya sín.

16 Nijnko chojni chrókjuak'eniéhe tí ka ó ntaxin it'ò ka nixin kixin ntá chrókjuixéhe tí ka nixin chrók'uitjían tí ka ntaxin ntá antsí má chrók'uichje.

17 La ko kjaxin éxí yóhe chrókuikiahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'uichje tí tjuaxran ntaxin. Ntá chrók'uitjían tí xran la ko chrok'uitjían tí tjuaxran. Ntá tí xranvino nixin chrókuikia ijnko tjuaxran nixin la ntá xikaha la yóí nkehe chrók'uitjíanhya.

Ch'ín Jesús kjuínchexechón tí tjachjin xjeen ch'ín Jairo la ko kjuínchekítóhe jína ijnko tjan kuákóxin iké ch'án

(Mr. 5.21-43; Lc. 8.40-56)

18 Ntá naxa tjenixja ch'ín Jesús la ntá ikjui ijnko ch'ín t'etoan kuènte tí sín judío la kjuák'exín toch'in ch'án nkayakon tí ch'ín Jesús la chrónóghé ch'án kixin:

* 9:13 Oseas 6.6

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróxechón tjan —ichro ch'án.

¹⁹ Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uájiko ch'án.

²⁰ A ntá itjen ijnko chojni chjin níhi tjan, ó teyó nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án

²¹ kixin tjenkayáxin tjan kixin kjónté chrínta iké ch'án ó chrókuákóxin tjan, la táhó chrókuítogexín tjan jína.

²² Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítóha jína kixin kuítekávan tí janhan —ichro ch'án.

Na ntá tuénxín ó kuítóhe tjan jína.

²³ Ntá tió kjuíji ch'ín Jesús ntogé tí ch'ín judío t'etogán la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsíkójnko tsé la tsjánkama sín xjan.

²⁴ La ntá ntáchro ch'ín Jesús kixin:

—Tí xjan méhe títoghérá, kixin tsík'enhya xjan, la tjejua xjan ó —ichro ch'an.

Ntá kjuanoá sín ch'án.

²⁵ A ntá tí k'uaxrje kaín chojni la ntá ch'ín Jesús la k'uixenhen ch'án la itsé ch'án itja tí tjan a la ntá tuénxín k'uínkatjen tjan.

²⁶ Ntá kuenté chjasin ntiha la kuínhin sín kixin xíkaha kónhen.

Ch'ín Jesús kjuínchekitoghe jína yaá sín t'ikonhya

²⁷ Ntá sákjuíxin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehé sín ch'án ntáchro sín kixin:

—Tíkonogéhéni jaha tsík'axrjeníxian David.

²⁸ Ntá k'uixenhen ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á titekávan kixin tsjácha sít'a xíkaha? —mé xíkaha kjuanchankí ch'án.

Ntá kjuátoghe sín kixin:

—Jeén, Ìnchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xíkaha kuítekávan la tsoxiteyá —mé xíkaha ichro ch'án.

³⁰ La ntá tuénxín ó jína t'ikon sín. Ntá ch'ín Jesús k'uetuenhen sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitoghe jína ijnko ch'ín nósin

³² Tió sákjuí tí sín k'uék'ikonhya, a ntá iso chojni kjuikao sín ijnko ch'ín nósin ch'án la chóna ch'án nchakuen tí jínahya.

³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankixin nixja ch'án. Ntá kaín chojni la k'uikon sín la ntáchro sín kixin:

—Nunca t'ikonhyéni ijnko kjuaxroan xikaha kuenté tí nación Israel —ichro sín.

³⁴ A ntá tí sín fariseo ntáchro sín kixin:

—Tí nkexro t'etuenhen tí nchakuen tí jínahya tsíkjanjon kjuachaxin mé xikaha takitsje tí ch'ín i tí nchakuen tí jínahya —mé xikaha ichro sín.

Ch'ín Jesús kuikonóehē ch'án chojni

³⁵ Ntá k'uátsínka ch'ín Jesús itsjé chjasin jié la ko chjasin ntsi la kjuakoxin ch'án jnkojnko nínko Israel. Chrónka ch'án tí tan jína nkexrí tjen tí kjuachaxin kuènte Dios. La ntá kjuínchekitohe ch'án jína chojni níhi chóna kaín xín chin la ko chojni chóna kjuatjoté.

³⁶ K'uikon ch'án kixin nchónhya chojni k'uéjé sín ntá kuikonóehē ch'án sín kixin imá tóxakonhen sín la k'uéjé sín éxi kolélo chónahya nkexro t'ayakonhen.

³⁷ Ntá ntáche ch'án tí sín k'uájiko ch'án kixin:

—Chaxín ntáxrjan janhan kixin imá tsík'óna, kjánchó chojni sich'e xra mé tsjéhya.

³⁸ Chrókjuanchehérá tí Ìnché tí nonte kixin chróchr'án ch'án itsjé chojni chrókjuich'e xra —mé xikaha ichro ch'ín Jesús.

10

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuenhen asén chojni la ko sinchekitohe sín jína kaín chojni chóna kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo.

³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkj la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo.

⁴ La ko kjaxin ch'ín Simón, mé kuènte tí sín cananista, la ko kjaxin ch'ín Judas Iscariote, mé tí nkexro chr'éxin kjuínchekji tí ch'ín Jesús.

Ch'ín Jesús k'uetuēnhen tí teyó sín ḱixin sátsjikjako sín kjuachaxin kuènte Dios

(Mr. 6.7-13; Lc. 9.1-6)

⁵ Ntá k'uetuēnhen ch'ín Jesús tí teyó sín ḱixin sátsji sín la k'uetōan ch'án ḱixin:

—Tj́ihyará tí tjejó tí sín jehya judío la ko t'ixēnhyará tí chjasin síin estado Samaria.

⁶ Náhí. Íchá jína sájtjírá tí tjejó tí chojni éxí kolélo kjuíchroe kuènte naciōn Israel.

⁷ Sájtjírá tjákohérá sín ḱixin kjuachaxiēn Dios tjen nkaya nkajní la í séhya tsi.

⁸ Sínchekitoherá jína chojni níhi la ko sínchekitoherá jína tí sín chōnta chin lepra la ko sínchexechónrá chojni tsík'en la takítsjerá tí nchakuen tí jínahya. Jahará kjaxin kuitōnhanrá tí kjuachaxiēn Dios, méxra chrókjuachahyará jahará kjaxin.

⁹ 'Chrókjuikuahyará ninkehó chichaon oro la ko ninkehó chichaon plata la ko ninkehó chichaon cobre

¹⁰ la ko tí sájtjírá ntja la chrókjuikuahyará ka bolsa la chrókjuikuahyará yaá ka chrók'uínkayaterá la ko chrókjuankahyará tokatárá la ko chrókjuikuahyará nta tjixinrá. Tí nkexro ch'e xra la jehí síin kjuachaxin ntiha chrókjōne.

¹¹ 'A ntá tió tsjasánrá ijnko chjasin jié o ijnko chjasin ntsí la tjéyará ijnko nkexro tsjanjon kjuachaxin la ntōe sín ntahó chrókuitōhará ntá tsjixin tí xra ntá sátsjirá.

¹² A ntá tió t'ixēnhénrá ntōe sín la nixjehérá sín tjákoxinrá jnkōjina.

¹³ A ntá tí chaxín jína asén sín la ts'áyéhe sín tí kjuaxróxin, a ntá tí náhi la sájtjikorá tí kjuaxroxin.

¹⁴ A ntá tí tsochrohya sín tsjanjon sín kjuachaxin tsitōhará la tjinkakonhya sín tsinhin sín tí nkehe tsochronkará na mé t'axrxéxinrá tí ntōe sín o tí chjasén sín la t'oxēnjínrá tí inche chōnta totárá.

¹⁵ A ntá chaxín tjōnkará ḱixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchōnta sín jiē la kánhyó tsjasóte sín, a ntá tí sín chjasin a la antsí tsjasóte sín ḱixin k'uéjóróxinhya sín tí tan chrókuaáxin sín.

Ókjé sín tsonínkakonhen tí sín kuènte Cristo

¹⁶ 'Janhan tsochr'an tí jahará éxí yóhe chróchr'an kolélo ts'ejóyakjan kolóbo. Listo chrók'uejorá éxí konche xikaha la chrók'uejorá éxí kontóá chrókójiyahyará.

¹⁷ Chrókóxakonhanrá ḱixin itsi chojni tsotsé sín tí jahará la sátsjikoará sín tí tjejó tí sín t'etōan la ko nkaxenhen tí ninkōé sín tsjatiáxinrá sín.

18 La ntá tsjikaánrá sín tí tjejó tí sín t'etōan la ko tí siín tí sín rey kíxin tinkachónkirá tí janhan. Ntá jína tsochronkará kíxin tinkachónkirá tí janhan nkayakon tí jehe sín la ko nkayakon tí sín chónhya Dios.

19 A ntá tió sátsjikoará sín tí tjejó tí sín t'etōan la tóxakuanhyará nkehe tsontáchorá o nkexrí tsonixjará kíxin tió tsjixraká tí hora la ntá Dios mé tsjinkĩtsará tsonixjará.

20 Kíxin jehya jahará tsonixjará. Náhi. Tí Nchakuen It'eni mé tsochrónka nkehe tsonixjará.

21 'Ntá iso chojni mé tsjikaán sín tí kichó sín kíxin its'en la ko tí it'é mé tsjikaán tí xjeen. A ntá tí xjan mé tsokjan tsonínkakohen tí it'é kíxin its'en.

22 Kaínxín chojni chjasintajni tsonínkakohenrá sín kíxin tinkachónkirá tí janhan. A ntá tí nkexro tsítóehya tsinkáchónki sín tí janhan hasta tsjéje chjasintajni mé tsaá.

23 Tió má chónkíhará sín ijnko chjasin la ntá sátsjirá í jnko chjasin. La ntá chaxín tsoxrjanka kíxin tí Xjeen Dios K'óna Chojni mé tsokjan tí naxa tjixinhya ts'atsínkará kaín tí chjasin Israel.

24 Tí nkexro xrakohe la kánhyó tjetōan la tí maestro la antsí tjetōan, la ko kjaxin tí nkexro ch'e xra la tjetōanhya la antsí tjetōan tí lamo.

25 A ntá tí nkexro xrakohe chrókjuakoxin ch'án éxí tí nkexro kjuakohe ch'án la ko tí nkexro ch'e xra chrókjuakoxin ch'án éxí tí lámoé ch'án ch'ehe ch'án xra. Tí ch'ín ñché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

*Nkexro tí chróchrakohénrá
(Lc. 12.2-9)*

26 Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kíxin chrókónoehya chojni chr'éxin.

27 Tí nkehe tjonkará sítié la t'ichjánxin tsochronkará tió itsi xrohi t'inkaséyanxín tí yaon. La ko tí nkehe tjonkará ijie ninxeró noehya la t'ichjánxin chronkará chrókuinhin kaín sín.

28 Chróchrakuénhyará tí sín t'óyán cuérpóé chojni kíxin asén chojni xitjahya ts'óyán sín. Íchá jína chróchrakohénrá tí nkexro tsjacha sinchek'itjáyanxín cuérpóé chojni la ko asén chojni tí xrohi ts'ankahya.

29 '¿Á chrókóxixinhya yaá koxroxé ntsíntsí ijnko chichaon ntsí? A ntá kjónté xikaha la chrók'uánótjenhya nijnko tí jehe va nonte tí chrókjuanjonhya It'eni kjuachaxin.

30 A ntá kjónté tí kaxihí chóntha ikjára la ó nohe ch'án nkekjaín ka chontará.

³¹ *A* ntá jahará chróchrakonhyará kixin tóyóahyará tí koxroxé kixin antsí sínkí tí jahará, *a* ntá tí koxroxé, kjónté nchónhya va, la kánhyó sínkí tíha.

Tí sín tósuehya tsochrónka sín kixin tinkáchónki sín Cristo nkayakon chojni

(Lc. 12.8-9)

³² 'Kaín tí chojni tsochrónka kixin tinkáchónkina sin nkayakon chojni la janhan mé kjaxin tsòxrjanka kixin choxian tí jehe sín nkayakon T'aná tjen nkaya nkajní.

³³ *A* ntá tí nkexro sinchemána tsontáchró sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

Jnkokoáhya tsjenkayáxin chojni kixin ó kui Inchéni Jesús

(Lc. 12.51-53; 14.26-27)

³⁴ 'Tjenkayáxinhyará kixin k'uinkakian kjuaxróxin chjasintajni. Náhi. Janhan k'uinkakianhya kjuaxróxin. Tsjanjónko kichó chojni kixin k'uinka janhan.

³⁵ Janhan k'uinka kixin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí tikinta tsonínkakonhen ich'ee.

³⁶ Mé xikaha tí sín tsonínkakonhen kichó la mé tí sín naxa jéhya sín.

³⁷ *A* ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuèntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuèntana.

³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuèntana.

³⁹ Tí nkexro tjinkaon kixin kohya nkehe chrókónhen sín mé ts'itjáyan sín, *a* ntá tí nkexro chrókjuinçek'itjáyanxín asén kixin tinkáchónki sín tí janhan la mé tsaá sín.

Tí nkexro ts'áyéhe nkehe

(Mr. 9.41)

⁴⁰ 'Tí nkexro chrókjuanjon kjuachaxin chrók'uejorá la mé éxi chrók'uáyéhe sín tí janhan la ko tí nkexro chrók'uáyéhe tí janhan la éxi yóhe chrók'uáyéhe sín tí nkexro ichr'ánna k'uinka.

⁴¹ La tí nkexro chrókjuanjon kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxi ts'áyéhe tí nkexro kjuako. La ko tí nkexro chrókjuanjon kjuachaxin tsjak'e ijnko chojni jína kixin jína ch'án mé xikaha ts'áyéhe sín nkehe éxi ts'áyéhe tí nkexro jína.

⁴² *A* ntá tí nkexro sinčekitonhen ijnko vaso ntá kin kjónté ijnko chojni noehya má, chréhe tí janhan, la mé chaxín

ntáxrjan kixin tí ch'ín a mé chaxín ts'áyéhe ch'án nkehe jína kixin xikaha kjuích'e ch'án.

11

*Ch'ín Juan Bautista k'uetuēhen iso sín
(Lc. 7.18-35)*

¹ Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuixin ch'án ntiha la sákjuikjako ch'án iso chjasin chjinaxón ntiha.

² A ntá ch'ín Juan mé tjechjina ch'án ntōechiso ntá xrínahya kuínhin ch'án nkerí xra tjech'e Cristo. La ntá k'uetuēhen ch'án iyó tí sín k'uék'ajiko ch'án kixin sátsjitsjehe sín tí ch'ín Jesús.

³ Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin:

—¿Á jaha tí nkexro itsi ní o á naxa tsochónhenni í jnko nkexro? —ichro sín.

⁴ A ntá kjuátehe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uíkonrá la ko tí nkehe kuínhíná.

⁵ Chēkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchóna chin lepra la ó kótjóa sín kuítóhe sín jína la ko tí sín k'uékienhya la ó tinhin sín jie. Kjaxin tí sín tsík'en na ó xechón sín inaá la ko kaín tí sín nòa mé síxraohe sín tí tan jína tsaáxin sín.

⁶ Méxra imá náxrjón tí nkexro kohya nkehe t'inkákonhen tinkáchónki tí janhan.

⁷ Tió sákjuí sín ntá ch'ín Jesús kjuankixin nixjehe ch'án tí sín k'uéjé la chrónka ch'án kuēte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrinto?

⁸ Tí náhí, la ¿nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la tjejó sín tí nchia kuēte tí sín rey.

⁹ ¿A ntá nkehe k'uíkonrá? ¿Á ijnko nkexro chrónka itén Dios? Jehe chaxín la antsí chóna ch'án kjuachaxin la tí sín k'uéchrónka itén Dios la kánhyó.

¹⁰ Ch'ín Juan mé tí nkexro kui éxí xikaha chrónka xroon itén Dios ósé. Mé ntáchro xikihi:

Janhan mé tsochr'an ijnko nkexro tsochrónka itan kuētana tsitónxin ntia,

kixin tsjasiyóxin ch'án ntia kuētá.*

Mé xikaha chrónka itén Dios.

* 11:10 Malaquías 3.1

11 Ntá ijnko nkehe chaxín tsotjonkará kixin kaín tí nkexro k'uéjé senó la kánhyó tjetóan sín la antsí tjetóan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios tjen nkaya nkajní la antsí tjetóan sín la ntá jehe ch'ín Juan la kénhyó.

12 Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chóna kjuachaxin mé tsjacha sín.

13 Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan.

14 A ntá tí jahará chrókuitekáonrá tíhi; kixin ch'ín Juan la mé ikui kixin tí xra kuènte ch'ín Elías tsjintaxín sich'e ch'án kixin ch'ín Elías la t'ichjánxin chrókui ch'án inaá.

15 Tí nkexro tjinkaon chrókuinhin la chrókuinhin.

16 ¿Nkexrí chrókuintayóaxian tí chojni tjejó ijie? Tóyóhe sín tí chánjan tjejótxaxín sín ntasin tsítán sín la t'íyehé sín kichó sín

17 ntáchro sín kixin: “K'uánoani flauta kjánchó jahará la tehyará. Itsjeni isón kuènte chojni tsík'en la ntá k'uaváhyará la ko tsjankahyará.”

18 Kixin tí ikui ch'ín Juan la kjónehya ch'án la k'uíhya ch'án vino la jahará ntáchrórá kixin ijnko nchakuen tí jínahya mé chóna ch'án.

19 A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrórá kixin imá itsjé kjóne ch'án la imá ik'ui ch'án la ko imá t'ito ch'án tí chojni chóna jje la ko tí sín nchekjènkj, ichrorá. A ntá tí kjuachaxin kuènte Dios mé tjakoxín tí xjeen ch'án.

Tí chjasin titekakonhya

(Lc. 10.13-15)

20 Ntá ch'ín Jesús mé kjuankixin ch'án ntáche ch'án tí sín tjejó iso tí chjasin imá kjuasixín ch'án kjuaxroan kixin kjónté xikaha la naxa kuinkáchónkihya sín Dios.

21 Ntá ntáchro ch'án kixin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxí k'uíkonrá jahará ntá tí chrókójehe sín la tjoka chrókuinkáchónki sín Dios la tjoka chrókjuakoxín sín chrók'uinkáya sín ka tié la ko nteso chrókjuinchek'ia sín asén sín.

22 Ntá ntáxrjan kixin tí yaon tsitoxén ijie chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín.

23 A ntá jahará chojni chjasin Capernaum tjenkayáxinrá kixin imá nohará a ntá sátsjirá nkaya nkajní, ichrorá, kjánchó chaxínhya. Jahará la tsjasinkajinxinrá ntíha sátsjirá tsjasótiará

tí síin tí sín tsík'en. Tí chrókjuásian tí kjuaxroan tí chjasin Sodoma éxí kjuásian chjasánrá la tí chjasin la kjá naxa chrók'uixin sín naxa chrók'uitjáyanyha sín tí yaon ijie kixin tjoka chrókuitekaon sín.

²⁴ A ntá tjonkará kixin tió sinchekitoéxín Dios ijie chojni la antsí tsjasótiará la tí sín chjasin Sodoma la kénhyó tsjasóte sín.

Xrákirá tí tjén janhan la ts'ok'áhará

(Lc. 10.21-22)

²⁵ Ntá tí yaon a ch'ín Jesús mé nixjehe ch'án It'é ch'án ntáchro ch'án kixin:

—Tjáncháha kjuasáya It'eni mé Ìnché nkaya nkajni la ko chjasintajni kixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kixin ts'itja tí sín noehya.

²⁶ Mé xikaha It'eni jaha kóxrínhan kixin xikaha tsonhen —ichro ch'ín Jesús.

²⁷ Ntá ntáchro ch'ín Jesús kixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsík'jeyá ch'án tsochóxin sín ch'án.

²⁸ Xrákirá kaín rá tí tjén janhan tí jahará imá tsíkóxrjérá kjuich'erá xra la yamára nkehe iye la ntá janhan mé sintak'ok'áhará.

²⁹ Tákjára tí xra kuéntana la ts'itjará kuéntana kixin janhan mé jina asenná la ntahnkehya. Ntaha mé ts'itjará ts'ok'èxin asánrá.

³⁰ Tí xra tsotjahará la xrahya la tí nkehe tsotjahará la yehya.

12

Tí sín k'uajiko ch'ín Jesús mé ik'uín sín iso noatrigó ijnko yaon t'ok'éhe tí sín Israel

(Mr. 2.23-28; Lc. 6.1-5)

¹ A ntá ijnko yaon la ch'ín Jesús k'uátsínka ch'án ijnko nonte síin noatrigó tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankíxin sín ik'uín sín iso noatrigó a kixin sine sín.

² A ntá iso tí sín fariseo k'uíkon sín kixin xikaha kjuich'e tí sín xriko ch'ín Jesús la ntá ntáchro sín kixin:

—Tsjehé tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon i —ichro sín.

³ Ntá kjuátehe ch'ín Jesús kixin:

—Jahará za kjuinchekuáxinhyará tí xroon chrónka nkehe kjuich'e ch'ín David la ko tí sín k'uajiko ch'án tió k'uén sín kjinta?

⁴ **A** ntá jehe sín mé k'uixenhen sín tí nchia kuènte Dios la kaín sín kjóne sín tí niqtjā tsíkóyaon kuènte Dios kjónté kohya kjuachaxin sine ch'án ni tí sín k'uájiko ch'án. Jehó siín kjuachaxin sine tí sín ncha't'á.

⁵ Jahará çá nchekuáxinhyará tí xroon tsíkjin ch'ín Moisés ntáchro kixin tí sín ncha't'á kuènte n̄inko mé t'ok'èhya sín tí yaon sábadó la kjónté x̄ikaha la jehya jiē tíha?

⁶ Ntáxrjan kixin itjén janhan la antsí má chonta kjuachaxin la ntá tí n̄inko la kénhyó.

⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan Dios tjínkavan kixin chrókuiikonóehérá chojni la tjínkakhya kixin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhyará tí janhan kixin ninkehó jiē chontahya.

⁸ **A** ntá tí Xjeen Dios K'óna Chojni mé chóna kjuachaxin ts'etōan nkexrí tsonhen tí yaon t'ok'éheni —ichro ch'ín Jesús.

*Ch'ín Jesús kjuínchekitohe jína ijnko chojni tsíxámá tja
(Mr. 3.1-6; Lc. 6.6-11)*

⁹ Ntá ch'ín Jesús mé sákjuixin ch'án ntiha la k'uixenhen ch'án ijnko n̄inko Israel.

¹⁰ Mé ntiha itjen ijnko ch'ín tsíxámá tja. Na ntá tjejóntaxín iso sín fariseo a tjínkaon sín tsjanchia sín jiē. La ntá kjuanchankíhi sín ch'án kixin:

—çÁ siín kjuachaxin sinchekitohe ní jína ijnko chojni níhi tí yaon t'ok'éheni ní? —ichro sín.

¹¹ Ntá kjuátēhe ch'ín Jesús ntáchro ch'án kixin:

—Jnkojín tí jahará chontará ijnko kolélo chrókjuítsínkaya ijnko tòye tí yaon t'ok'éheni çá chrókjuíhyará chrókuakitsjetaónrá va tòye ní?

¹² Kjánchó tí chojni antsí má tjete sínkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

¹³ Méxra nixjehe ch'án tí ch'ín níhi a, ntáchro ch'án kixin:

—Tjéntóá tjá —ichro ch'án.

A ntá tí ch'ín níhi tja kjuentoá tja ch'án la ó kjuixin kuitohe jína éxí tí ijnko tja ch'án x̄ikaha.

¹⁴ Ntá tí sín fariseo kónínkaon sín k'uaxrjexín sín ntiha sákjuí sín la kjuenkayáxin sín nkexrí ts'óyan sín tí ch'ín Jesús.

Itén Dios senó chrónka kuènte ch'ín Jesús

¹⁵ **A** ntá ch'ín Jesús mé kónohe ch'án kixin x̄ikaha tjenkayáxin sín la ntá sákjuixin ch'án ntiha la itsjé sín chréhe sín ch'án. Kjuínchekitohe ch'án jína kaín tí sinníhi

* 12:7 Oseas 6.6

16 la k'uetoan ch'án kixin tsochrónkahya sín noxín kixin nkexro tí jehe ch'án.

17 Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsintáchro ch'án xikihi:

18 Ntihi tjen tí nkexro ch'ena xr̥a la janhan mé kjuéyá ch'án, janhan tjuah̥a ch'án la chàna kixin itjen ch'án.

Tsotjah̥a ch'án tí nchakuenná

la jehe ch'án mé tsochrónka ch'án nkexrí sintakitoaxián ijíé chojni chjasintajni.

19 Tsonínkakuenhya ch'án chojni la chjinihya ts'óyako ch'án, la ko kohya nkexro tsinhin itén ch'an tí ntía.

20 Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe síhnhichikóá.

Jehe ch'án nax̥a sich'e ch'án xr̥a tsjixrakájia tí yaon ts'etoan ch'án.

21 La kaín xín chojni chjasintajni mé tsitekaon sín tí jehe ch'án.†

Mé xikaha chrónka itén Dios ósé.

Tí sín fariseo mé ntáchro sín kixin ch'ín Tsochren t'etuenhen asén tí ch'ín Jesús

(Mr. 3.19-30; Lc. 11.14-23; 12.10)

22 Ntá iso chojni sákjuikohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. A ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án.

23 Ntá kaín xín chojni la chrakon sín la tjanhankíhi kichó sín ntáchro sín kixin:

—¿Á jehya xjeen David tíhi? —ichro sín.

24 Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuènte ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

25 Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkojín gobierno jnkokoáhya tjenkayáxin sín ntá tjanjonko kichó sín na mé ts'itjáyan tí kjuachaxin ts'etoanxín sín, la ko kjaxin tí sín jnkokoá chjasin o tí sín jnkokoá nchia jnkokónhya tjenkayáxin sín la kjaxin xikaha ts'itjáyan sín.

26 A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin nax̥a chrók'uetoan.

27 Jahará ntáchrorá kixin janhan kuakítsjexián tí nchakuen tí jínahya kjuachaxin kuènte ch'ín Beelzebú. A ntá tí chaxín xikaha la ntá ¿nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoxin sín kixin ntoáhya tjenkayáxinrá.

† 12:21 12.18-21 Isaías 42.1-4

28 **A** ntá janhan mé kuakítsjexián tí nchakuen tí jínahya kjuachaxin kuènte Nchakuen Dios la tíha mé chrókónoaxínrá kíxin tí kjuachaxién Dios mé ó kui tí tjejorá.

29 '¿Nkexrí chrók'uixenhen ijnko nkexro ijnko ntøe ijnko ch'ín jiehe la chrókuakitsjehe ch'án tí nkehe chóna ch'án? Senó la chrókónteto ch'án kíxin jína chrókueéhe sín ch'án.

30 'Tí nkexro titekakonhya tí janhan la mé nínkakonna sín. **A** ntá tí nkexro tjinkakonhya tí janhan mé t'inkákonhen tí xra it'a.

31 'Méxra xrxanka kíxin Dios tsjakjlin jnkojnko jie tjasin chojni la ko kaín nkehe jínahya nixja sín. **A** ntá tí t'ántaxínhin sín Nchakuen Dios la xitjahya tsjlin ijie sín.

32 La ko xrxanka kíxin kaín nkehe t'ántaxínhínrá tí Xjeen Dios K'óna Chojni la tsjakjlin Dios. **A** ntá tí ts'antaxínhínrá Nchakuen Dios la ntá mé í tsjlinhya tí ijjará kjónté ntihi chjas-intajni la ko kjónté tí chr'éxin.

*Tí nta chrókjuatsøanxín sín tí to jína
(Lc. 6.43-45)*

33 'Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsøanxínni tí to a.

34 Jahará tsík'axrjenixinrá konche. ¿Nkexrí jína chróntáchrórá jahará tí jehya jínará? Tí nixja ir'vará la éxi ntáchro asánrá mé nixja ir'vará.

35 Ijnko chojni jína mé jína nixja kíxin jína asén ch'án. **A** ntá ijnko chojni jínahya mé nixja tí nkehe jínahya kíxin tí asén ch'án kjaxin jínahya.

36 Ntá tjonkará kíxin itsi tí yaon tsjixixín tío sinchekitoexín Dios ijie chojni ntá tsonohará kaín nkehe chjini sínixjará.

37 Kíxin tí nkehe nixjará tsjakoxin á kjuásinrá jie ní o náhi.

*Tí sín jehya jína tjanchehe sín ch'ín Jesús kíxin tsjakoxin ch'án
ijnko kjuaxroan jie
(Mr. 8.12; Lc. 11.29-32)*

38 Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchro sín kíxin:

—Maestro, tjinkaonni chrók'uikonni chrókjuásian ijnko kjuaxroan náxrjón tsonoexínni kíxin nkexro jaha —ichro sín.

39 Ntá kjuátehe ch'ín Jesús ntáchro ch'án kíxin:

—Tí sín jínahya la ko tí sín kuítóhe Dios mé tjanchia sín chrókjuásian kjuaxroan náxrjón. Kjánchó tsjakoxinnya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé.

40 Éxi yóhe kjuák'e ch'ín Jonás iní yaon la iní tie nkaxenhen tsee koche jie mé xikaha tí Xjeen Dios K'óna Chojni tsjak'e nkaxenhen tøyé tsoxravá iní yaon la iní tie.

41 **A** ntá tí yaon tsitoexín ijíé chojni la ntá tí sín chjasin Nínive mé tsjanchia sín jje kíxin tí sín tjejó jie, kíxin tí sín chjasin Nínive mé kuítóhe sín ijíé sín tió kuínhin sín itén Dios chrónka ch'ín Jonás. **A** ntá ijie itjén janhan la antsí má chonta kjuachaxin. **A** ntá tí ch'ín Jonás la kénhyó k'uéchónta ch'án kjuachaxin, kjánchó jahará kuitekákonhyará tí janhan.

42 Kjaxin tí yaon tsitoexín ijíé chojni la tí tjan reina k'uetóan kjuixín nó Sur mé tsjanchia tjan jje kíxin tí sín tjejó ijie kíxin jehe tjan kjuixín imá ikjín kíxin chrókuinhin tjan tí kjuaxrexinkaon jína k'uékjako ch'ín Salomón. **A** ntá ijie itjén janhan la janhan antsí má nòna a ntá ch'ín Salomón la kénhyó k'uénohe ch'án.

Tió tsokjan tí nchakuen tí jínahya
(Lc. 11.24-26)

43 **A** ntá ijnko nchakuen tí jínahya tsík'axrjexín ijnko chojni la mé ixri tí nonte xámá xritjeyá nketí náxrjón ts'ok'éhe. **A** ntá k'uitjahya nketí náxrjón ts'ok'éhe.

44 La ntá kjuenkayáxin kíxin: “Áxri tsokjan ntóna k'uaxrjéxian”, ichro. **A** ntá tió ikjan tí nchakuen la t'ikon éxí ijnko nchia kohya ninkexró la éxí ijnko chojni tsík'ánjón ntóe la náxrjón tsjehe tí nkaxenhen nchia.

45 **A** ntá k'uíkon tí jínahya xíkaha tjen nchia la ntá sákjuíkakjín í jnko yato nchakuen tí jínahya antsí má jínahya. **A** ntá kaín k'uíxenhen tí ntiha. **A** ntá antsí má jínahya kónhen tí ch'ín a, a ntá tí senó la kénhyó. Mé xíkaha tsonhen kaín tí sín siín ijie titekakonhya.

Tí iné la ko kichó ch'ín Jesús
(Mr. 3.31-35; Lc. 8.19-21)

46 Ntá ch'ín Jesús naxa tjenixjehe ch'án chojni la ntá xrinahya kjuíji iné ch'án la ko kichó ch'án. Ntá kuítóhe sín ntója ó la tjinkaon sín chrónixjehe sín ch'ín Jesús.

47 Ntá ijnko nkexro ntiha sákjuíchénka tí ch'ín Jesús, ntáchro ch'án kíxin:

—Iná la ko kichua tjejó sín ntója la tjinkaon sín chrónixjaha sín tí jaha.

48 **A** ntá ch'ín Jesús kjuátehe ch'án nixjehe ch'án tí nkexro chrónka a, ntáchro ch'án kíxin:

—¿Xá nkexro tí naná la ko nkexro tí kichiná? —ichro ch'án.

49 Ntá kjuakoxín tja ch'án tí sín xriko ch'án la ntáchro ch'án kíxin:

—Tí sín i la mé naná la ko kichiná.

50 Tí jnkojín sín i nchexiteyá nkehe tjinkaon T'aná tjen nkaya nkajní na mé táha mé naná la ko kichiná mé xíkaha t'íkuān tí jehe sín —ichro ch'án.

13

Ch'ín Jesús mé kjuíncheyóexin ch'án éxí ijnko chojni t'enka nontee

(Mr. 4.1-9; Lc. 8.4-8)

¹ A ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjaxín ch'án chrínta ntayaon.

² Ntá k'uíxikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabárcō kjuák'etjaxín ch'án la kaín sín na tí chrínta ntā ó kuítóhe sín.

³ A ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxí ijnko ch'ín sákjuík'enka nontee

⁴ mé xíkaha sákjuík'enka ch'án iso tí noatrigo a. Ntá iso noa la tsík'ánótjen ntja ntá ikui koxroxé k'uínka va noa.

⁵ A ntá iso noa na mé k'uitji chrík'á xrō tí kohya itsjé nche ntá tjoka k'uayan kixin ntaha tjínhya chóntha nche.

⁶ Ntá tí kjuítōn yaon la ntá tí ka la xámá kixin nínkahya chóntha nuèe.

⁷ A ntá í so noa kjuítsínkak'á tí síin kach'i na k'uánkí tí kach'i a na ntá í xitjahya k'uánkí tí noatrigo a kixin tsíkjate tí kach'i.

⁸ A ntá tí noa tsík'itjí nche jína na ntá tíó k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta.

⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuènté kjuíncheyóexin ch'ín Jesús

(Mr. 4.10-12; Lc. 8.9-10)

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuènté xíkaha nixjehé sín ncheyóexián? —ichro sín.

¹¹ A ntá ch'ín Jesús kjuátehe ch'án ntáchro ch'án kixin:

—Jahará la Dios me tsjinkítsa tsonohará tí nkehe noehya í so chojni kuènte tí kjuachaxin kuènte Dios. A ntá tí jehe sín a la náhi.

¹² Tí nkexro ó chóntha nkehe la antsí ts'áyéhe sín kixin antsí má tsochóntha sín. A ntá tí nkexro chónthahya la kjónté tí ntsí chóntha sín la ts'axrjehe sín.

¹³ Mé xíkaha kjuíntayóaxuán kjuákuaxián sín kixin jehe sín t'ikon sín la ntá kjónté tjátsoanhya sín la tzejótinhin sín a ntá kjónté kienxínhya sín.

¹⁴ Mé xíkaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xíkíhi:

Jehe sín tsinhin sín a ntá tsienxínhya sín

la ts'ikon sín la tsjatsōanhya sín tí nkehe ts'ikon sín.

15 Imá icha asén tí sín chjasin i.
 Chónta sín ntatsjon kjánchó ts'íkjehe
 la chónta sín ikon sín kjánchó t'ikonhya sín,
 kixin chrók'uikonhya sín
 la chrókuienhya sín la ko
 xitjahya kíenxín sín,
 kixin í tjinkakonhya sín chrókjan sín kixin janhan mé
 chrókjuintakitohā sín jína.*

Mé xikaha tsíkjin ch'ín Isaías.

16 Ntá ntáchro ch'ín Jesús inaá kixin:

—A ntá jahará la imá náxrjón tjejorá kixin t'ikonrá la ko
 tinhínrá.

17 Chaxín xrjanka kixin itsjé tí sín k'uéchrónka itén Dios la ko
 tí sín jína mé k'uétjinkaon sín chrók'uikon sín tí nkehe t'ikonrá
 la ntá k'uikonhya sín la ko k'uétjinkaon sín chrókuihin sín tí
 nkehe tjejotinhínrá la ntá kuíenhya sín.

*Ch'ín Jesús chrónkaxín nkexrí t'axrjexín tí nkexro sákjuík'enka
 (Mr. 4.13-20; Lc. 8.11-15)*

18 Tinhínrá nkexrí t'axrjexín tí ch'ín sákjuík'enka nontee.

19 Tí nkexro kuínhin tí itén Dios chrónka nkexrí tí kjuachaxin
 kuénte Dios la ntá kíenxínhya sín la yóhe tí noa xènjintja ntja.
 Ó kui ch'ín Tsochren ntá kjuínchek'itjāyan ch'án tí itan jína
 kuínhin sín.

20 A ntá tí tje kjuítsínkak'á xro la mé t'axrjexín kixin tí chojni
 kuínhin itén Dios la tjoka kóxrjínhin sín la kuínkáchónki sín.

21 Kjánchó nínkahya chónta nuèe na ntá itsi tí kjuaxróxinhya
 o tsochónkíhi sín chojni chrók'óyán sín kixin tí itén Dios
 kuítekaon sín, a ntá tsítōhe sín tí tinkáchónki sín Dios.

22 A ntá tí tje kjuítsínkak'á kach'í na mé éxí yóhe ijnko chojni
 kuínhin itan jína kjánchó tjitoxienhya ntje sín kixin tóxakonhen
 sín tí xrā chónta sín chjasintajni la ko tjinkaon sín tsochónta sín
 itsjé nkehe. Kaín tíha mé t'inkákonhen tí itén Dios kuínhin sín
 la ntá xikaha xitjahya sich'ehe sín xrā Dios.

23 A ntá tí tje k'uínka tí nonte chónta nche jína na mé yóhe
 tí chojni kuínhin tí itén Dios na ko kíenxín sín la ntá xikaha
 jína ch'ehe sín Dios xrā. Na iso sín la yóhe éxí tí tje k'óna ijnko
 ciento neno noa la iso sín la yóhe tí k'óna sesenta neno noa la
 iso sín la yóhe tí k'óna treinta neno noa —mé xikaha chrónka
 ch'ín Jesús.

*Ch'ín Jesús kjuíncheyóexin ch'án éxí tí kajnto k'uánkíkué tí
 noatrigo*

24 Ntá ch'ín Jesús kjuíncheyóexin ch'án inaá ntáchro ch'án
 kixin:

* 13:15 13.14–15 Isaías 6.9–10

—Tí kjuachaxin kuènte Dios mé yóhë ijnko ch'ín k'uënka noa jína nõntee ch'án.

²⁵ A ntá tió k'uéjójua kaín sín ntá ikui ijnko nkexro nínkakonhen sín la k'uënka ch'án kajnto chrík'á tí noa a la ntá sákjuí ch'án.

²⁶ La ntá tí noatrigó k'uánkí la ntá ó sítintaa la ntá ntiha kjaxin kónoxíxin k'uánkí tí kajnto.

²⁷ Ntá tí sín ch'e xra mé sákjuínixjehe sín tí lámoe sín la ntáchro sín kixin: “Tí noa k'uènká nõntaa la noa jína tíha. A ntá ¿nketí kjuixín tí kajnto tsik'ayan?” ichro sín kjuanchankí sín.

²⁸ Ntá kjuátēhe tí inché tí nonte ntáchro kixin: “Kjá ijnko nkexro nínkakonna mé kjuích'e xíkaha”, ichro ch'án. Ntá tí sín ch'e xra mé kjuanchankí sín kixin: “¿Á tjinkávan kixin sátsjini tsakitsjenkíni tí kajnto?” ichro sín.

²⁹ A ntá kjuátēhe ch'án kixin: “Náhi. Tí sátsjia tsakítsjenkiá tí kajnto la kjá chõnte tí katrigo ts'axrjenkí.

³⁰ Íchá jína tjtõhé kixin ts'ánkíkué tsjixin tsotjájiani. Ntá ts'etuenhenni tí sín tsotjá kixin senó ts'ejo sín tí kajnto la sinchenteto sín kixin tsoche la ntá chr'éxin tsotjá sín tí noatrigó ntá ts'inkachjina tí noa a” —mé xíkaha chrónka ch'ín Jesús.

Ch'ín Jesús kjuíncheyóexin ch'án éxi tí xroan ijnko ntayoa it'in mostaza

(Mr. 4.30-32; Lc. 13.18-19)

³¹ Ntá ch'ín Jesús kjaxin kjuíncheyóexin inaá ntáchro ch'án kixin:

—Tí kjuachaxin kuènte Dios mé éxi yóhë ijnko tje mostaza k'uënka ijnko chojni nõntee ch'án.

³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jíé la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

Ch'ín Jesús kjuíncheyóexin ch'án éxi tí xroan t'ánkíxin niotja
(Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kixin:

—Tí kjuachaxin kuènte Dios mé éxi yóhë tí xroan t'ánkíxin niotja. Kjuinkíkjanxin ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesús tí nixja ch'án
(Mr. 4.33-34)

³⁴ Ch'ín Jesús kjuakõhe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án.

³⁵ Mé xikaha kjuako ch'án kixin tsoxiteyá tí nkehe tsíchrónka ijnko nkexro k'uéchrónka itén Dios ntáchro xikihi: Mé tsoníxjāxian sintayóaxión nkehe tson táxrjan tí nkehe ninkexró noehya desde k'óna chjasintajni.†

Ch'ín Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjehe ch'ín Jesús tí sín a ntá sákjuí sín kaín sín la jehe ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kixin:

—Chrónkaxián nkexrí t'axrjexín tí kajnto k'uánkíkué tí noa trigo tí nonte —ichro sín.

³⁷ Ntá ch'ín Jesús kjuátehe ch'án ntáchro ch'án kixin:

—Tí nkexro k'uēnkā tí noa jina mé tí Xjeen Dios K'óna Chojni.

³⁸ A ntá tí nonte mé chjasintajni tíha. Tí noa jina mé éxí yóhe tí chojni kuákja kjuachaxin kuente Dios. La ntá tí kajnto mé éxí yóhe tí chojni t'etuēnhen Tsochren.

³⁹ Tí nkexro nínkakhenni mé k'uēnkā tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel.

⁴⁰ Éxí xrenájín tí kajnto la tsoche mé xikaha tsonhen tió tsjixixín tsjeje chjasintajni.

⁴¹ Tí Xjeen Dios K'óna Chojni mé ts'etuēnhen tí sín ángel kixin tsakitsjexín sín tí tjet'etoan Dios kaín tí chojni tjachroe í so chojni la ko tí sín ch'e tí nkehe jínahya.

⁴² La tsochr'án sín sátsji sín tí tjā siín xrohi la ntaha tsotsjánka sín la sinetaón neno sín.

⁴³ Ntá kaín xín tí sín nchexiteyá tí nkehe tjinkaon Dios mé éxí tí yaon xikaha tsotsjehe sín tí tjet'etoan It'éni Dios. Tí nkexro tjinkaon chrókuinhin la chrókuinhin —mé xikaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

⁴⁴ Tí kjuachaxin kuente Dios mé éxí yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'ēma ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uēna ch'án tí nonte a.

Ch'ín Jesús kjuíncheyóexin éxí ijnko xro perla tjete

⁴⁵ Ntá ntáchro ch'ín Jesús kixin:

—Kjāxin tí kjuachaxin kuente Dios mé éxí yóhe ijnko nkexro tjejá xro perla náxrjón.

† 13:35 Salmo 78.2

46 Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxi ijnko nchísén tséya sín koche

47 Ntáchro ch'ín Jesús kixin:

—Kjaxin tí kjuachaxin kuènte Dios mé éxi yóhe ijnko nchísén tséya chojni koche t'enkí sín tí ntayaon la ntá tsotsé nchónhya clase koche.

48 Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntá la ntaha ts'ejótjaxin sín la tsíchéhe sín koche jína la t'enka sín ntaxra. La ntá tí jehya koche jína la it'e sín.

49 Mé xikaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsitohe tí chojni jína.

50 La tsochr'án sín tí sín jínahya sátsji sín tí tjen tja tí síin xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjete ntaxin

51 Ntá ch'ín Jesús mé kjuanchankí ch'án kixin:

—¿Á tiénxinrá jahará kaín tí nkehe ní? —ichro ch'án.

Ntá kjuátehe sín kixin:

—Jeén, Ìnchéni, ó kíenxínni —ichro sín.

52 Ntá ntáchro ch'ín Jesús kixin:

—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxi yóhe ijnko ìnché nchia chóna itsjé nkehe tjete tjejóchjina la ntá nohe ch'án tsakitsje tí nkehe tjete nixin la tí nkehe tjete ntaxin —mé xikaha ichro ch'ín Jesús.

Ch'ín Jesús kjuák'e ch'án chjasin Nazaret

(Mr: 6.1-6; Lc. 4.16-30)

53 Ntá kjuixin nixja ch'ín Jesús kjuíncheyóexin ch'án tíha na ntá sákjuixin ch'án ntiha.

54 La ntá sákjuí ch'án chjasén ch'án Nazaret. Ntaha kjuankíxin kjuakoxin ch'án tí nínko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín i la, ¿nketí tsíxrakohe ch'án kixin imá nohe ch'án la ko nkexrí kixin tjasin ch'án kjuaxroan?

55 ¿Á jehya tíhi xjeen tí ch'ín carpintero la ìné ch'án mé María? La ko chóxinni tí kíchó ch'án a mé ch'ín Jacobo la ko ch'ín José la ko ch'ín Simón la ko ch'ín Judas.

56 Kjaxin tí sín chjin kíchó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

57 Mé xikaha chrohya sín tsitekakonhen sín ch'án. Ntá ntáchro ch'ín Jesús kixin:

—Nkuíxín tjikosáyehē chojni ijnko nkexro chrónka itén Dios. A ntá tí sín chjasén ch'án la ko kaín tí sín ntōe ch'án mé tjikosáyehya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kíxín kuítékakuenhya sín ch'án.

14

Ik'uén ch'ín Juan Bautista

(Mr. 6.14-29; Lc. 9.7-9)

¹ A ntá tí yaon a ntá tí ch'ín Herodes mé tí nkexro k'uētoan tí estado Galilea mé kuínhin ch'án nkexrí ichro ch'ín Jesús.

² Ntá nixjehē ch'án tí sín ch'ehe ch'án xra, ntáchro ch'án kíxín:

—Kjá tíha la ch'ín Juan Bautista ó tsíxechón ch'án ínaá. Mé xíkaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'ētoan kíxín ch'ín Juan tsonetoxín cadena la ko tsjak'echjina ch'án. Mé xíkaha kjuích'e ch'án kíxín xíkaha tsíkjanchia tí tjan Herodías, tí tjan ichjién tí ch'ín Felipe, kíchó ch'án.

⁴ Tí ch'ín Juan tsíntáche ch'án tí ch'ín Herodes kíxín:

—Jehya jína tsochonta tí ichjién tí kichuá —mé xíkaha tsíntácho ch'án.

⁵ Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kíxín kaín sín ntáchro sín kíxín ch'ín Juan mé nixja itén Dios, ichro sín.

⁶ A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehē ch'án. A ntá imá kóxrjinhin ch'ín Herodes nkexrí ité tjan.

⁷ La ntá nixjehē ch'án tjan k'uákjenxin ch'án ihnjé Dios ntáchro ch'án kíxín tsochjéhe ch'án tjan kjónté jnkójín nkehe tsjanchia tjan, ichro ch'án.

⁸ Ntá jehe tjan la senó kjuíkjanchankíhi tjan ìné tjan ntá ìné tjan tsíntachro kíxín ikja ch'ín Juan mé tsjanchia tjan ntá jehe tjan mé nixjehē tjan tí ch'ín Herodes ínaá ntáchro tjan kíxín:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kíxín xíkaha kjuanchia tjan. Na ntá kaín tí sín síin ntiha ó kuínhin sín kíxín kjuínchenohe ch'án Dios kíxín ichrén nkehe tsjanchia tjan tsjanjon ch'án.

¹⁰ Méxra k'uētoan ch'án kíxín ts'óchrínjin sín ikja ch'ín Juan tí tjan ch'án ntōechiso.

¹¹ Ntá kjuíkao sín kjuíkoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuíkénhen tjan ìné tjan.

12 Ntá tí sín k'uék'ajiko ch'án a mé sákjuíkakitsje sín tí cuérpəé ch'án la sákjuíkjavá sín. La ntá chr'éxín la sákjuí sín sákjuíchénka sín tí ch'ín Jesús kixin xíkaha tsíkónhen ntiha.

Ch'ín Jesús kjuínchekjine ch'án in'ó mil chojni
(Mr. 6.30-44; Lc. 9.10-17; Jn. 6.1-14)

13 Ntá tí kuínhin ch'ín Jesús kixin xíkaha tsíkónhen la ntá jehó ch'án sákjuí ch'án k'ui't'ótjen ch'án ijnko ntabárco la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjen ch'án la ntá k'uaxrjexín sín chjasén sín la ntá totó sín sákjuíchréhe sín ch'án.

14 A ntá k'uaxrjexín ch'ín Jesús tí ntabárco a, a ntá k'uíkon ch'án kixin nchónhya chojni siín ntiha ntá kuíkonóehə ch'án tí jehe sín na ntá kjuínchekitohe ch'án jína tí sín níhi tsíkjikəo sín.

15 La ntá ó k'uúxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuənhén sín kixin sátsji sín tí chjasin ntsí chjinaxón tsjik'ena sín nkehe sine sín —ichro sín.

16 Ntá kjuátəhe ch'ín Jesús, ntáchro ch'án kixin:

—T'ichjánxínhya sátsji sín. Chjəhərá sín nkehe sine sín —ichro ch'án.

17 Ntá kjuátəhe sín kixin:

—Chóntahyani itsjé nkehe. Jehó in'ó niotja la ko yaá koche chóntani —ichro sín.

18 Ntá ntáchro ch'ín Jesús kixin:

—Xrakoanará tí nkehe méhe ntihi —ichro ch'án.

19 Ntá k'uetəan ch'án kixin kaín xín sín ts'ixitjəxín sín tí chrítaón kaxi a. Ntá kuákja ch'án tí in'ó niotja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'ə ch'án tí niotja chjéhe ch'án tí sín k'uájiko ch'án la jehe sín mé k'óxikəyəhe sín chjéhe sín tí chojni siín a.

20 Ntá kaín sín kjuixin kjóne sín kókjəhe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxəhe sín la mé teyó ntaxra kaón.

21 Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

Ch'ín Jesús mé tjetjitaón ch'án nta
(Mr. 6.45-52; Jn. 6.16-21)

22 Ntá kjuixin tíha ntá k'uetuənhen ch'ín Jesús tí sín k'uájiko ch'án kixin ts'it'ótjen sín tí ntabárco ts'atòyə sín í jnko nánko ntəyaon. Ntá jehe ch'án nəxə kuítóhe ch'án nixjəhe ch'án tí sín siín ntiha.

23 Ntá kjuixin xíkəyəhe sín na ntá jehó ch'án chríin ch'án ijnko jnə tsonixjəhe ch'án It'é ch'án tjen nkaya nkajní. Na ntá ó k'uúxin tie la jehó ch'ín Jesús itjen ch'án ntiha.

24 La ntá tí ntabárc̄o na mé tjenkátaón nt̄a jnk̄osiné nt̄ayaon. Ntá imá chjéhe nt̄a tí ntabárc̄o ḱixin tí xr̄intō la chjéhe la xitjahya sátsji ntabárc̄o.

25 Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí nt̄ayaon la ntá kóchjinehe ch'án tí tjejó sín.

26 Na ntá tí sín k'uájiko ch'án mé k'uíkon sín ḱixin tjetjitaón ch'án tí nt̄ayaon na ntá imá chrakon sín la k'óyako sín. Ntáchro sín ḱixin kjuacha sín ichro sín, chrakon sín.

27 Na ntá nixjehe ch'ín Jesús tí jehe sín ntá ntáchro ch'án ḱixin:

—Nchefuérte asánrá, chrakonhyará. Janhan kjuihá —ichro ch'án.

28 Ntá ch'ín Pedro mé nixjehe ch'án Ìnchéni, ntáchro ch'án ḱixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí nt̄a tsijini tí tjen jaha —ichro ch'án.

29 Ntá ntáchro ch'ín Jesús ḱixin:

—Xrákiá.

Ntá k'uínkajinxin ch'ín Pedro tí ntabárc̄o la kjuanḱixin ch'án tjetjitaón ch'án nt̄a sákjuíchréhe ch'án tí tjen ch'ín Jesús.

30 A ntá xrínahya ntá kónohe ch'án ḱixin imá chjéhe xr̄intō chrítaón nt̄a, ntá chrakon ch'án la kjuanḱixin tinkák'aniánkí ch'án nt̄a, ntá k'uèya ch'án ntáchro ch'án ḱixin:

—Ìnchéni, nchekaáni —ichro ch'án.

31 A ntá tuénxín ch'ín Jesús mé itsé ch'án tja ch'ín Pedro la ntáchro ch'án ḱixin:

—Intsíkoá tinkachónkia tí janhan. ¿Nkekuènté títekákonhya? —ichro ch'án.

32 Na ntá tió k'ujit'ótjen sín yóí sín tí ntabárc̄o la ntá tuénxín k'uíxratá tí xr̄intō.

33 Ntá kaín xín tí sín tjejóxehen tí ntabárc̄o mé k'uéjóxin tochr'in sín nkayakon ch'ín Jesús la ntáchro sín ḱixin:

—Jaha mé chaxín Xjeen Dios —ichro sín.

Ch'ín Jesús mé kjuínchekitohe jína tí chojni níhi nonte Genesaret

(Mr. 6.53-56)

34 Ntá tió k'uátòye sín tí nt̄ayaon ntá kjuíji sín tí nonte Genesaret.

35 Ntá tí sín siín ntiha tjoka kjuátsoan sín ḱixin jehe ch'ín Jesús tíha, ntá kuínhin tí sín chjasin chjinaxón ntiha la ntá kuíkao sín kaín tí sín níhi tí tjen ch'án.

36 Na ntá chrónóhehe sín ch'án ḱixin chrókuítóhe ch'án ḱixin kjónté chrínta iké ch'án chrókuákóxin sín, la ntá kaín tí sín kuákóxin iké ch'án mé kuítóhe sín jína.

15

Tí jie tjasin chojni
(Mr. 7.1-23)

¹ **A** ntá chjasin Jerusalén kjuixin iso sín fariseo la ko iso tí sín maestro tjako tí ley la kjuichréhe sín tí ch'ín Jesús. Ntá kjuanchankíhi sín ch'án kixin:

² —¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntihya sín itja sín ntá kjónté ine sín? —ichro tí sín fariseo a.

³ **A** ntá kjuanchankí ch'ín Jesús kixin:

—¿Nkekuènté jahará kjaxin títékákonhyará nkehe tsík'etōan Dios? **A** ntá jahará tjinkáonrá naxa chrókuinkachónkirá tí nkehe kuinkáchónki tí sín tsík'axrjeníxinrá.

⁴ Ntáchro Dios kixin: “Tsochontehérá kjuasáya it'ará la ko ìnará”, la ko ntáchro ch'án kixin: “Tí nkexro t'ántaxínhín it'é la ko ìné la chrók'uen.”*

⁵ **A** ntá jahará tsíntáchrórá kixin ó nchōxon kixin ijnko nkexro tsochénka it'é la ko ìné kixin: “It'éni, ìnéni, chrokjuahya tsjinkitsani tí jaha kixin kaín nkehe chóntani la ó chjéheni Dios.”

⁶ **A** ntá jnkójín nkexro tsontáchro ch'án tíhi ntá í t'ichjánxinhya tsjinkitsa tí it'é la ko tí ìné, mé xikaha tsixrorá. Mé xikaha jahará kuitohérá tí nkehe k'uetōan Dios kixin tjinkáonrá chrókjuich'erá éxí kjuich'e tí sín tsík'axrjeníxinrá.

⁷ Jahará la jehya jnkójínxón tjenkayáxinrá. Ntoá tsíntáchró tí ch'ín Isaías, tí nkexro k'uéchrónka itén Dios ósé. Mé chrónka ch'án kixin nkexrí tjejorá la xikaha tsíkjin ch'án kixin:

⁸ Tí chojni tí chjasin i ir'va ó xraxinkakonxín sín tí janhan a ntá tí asén sín la ikjín kuitōhe sín tí janhan.

⁹ Méxra ó chónko tóchjina sín xraxinkaon sín tí janhan kixin tí nkehe tjako sín la tí nkehe tsík'etōan chojni ó.† Mé xikaha ichro itén Dios.

¹⁰ Ntá k'uíyēhe ch'ín Jesús tí chojni inaá la ntáchro ch'án kixin: —Chrókuinhínrá la ko chrókuiénxinrá.

¹¹ Kaín nkehe ine chojni la ó nchōxon, jehya jie. Tí jie la tí nkehe t'axrjexín ir'va chojni —mé xikaha ichro ch'ín Jesús.

¹² **A** ntá tí sín k'uájiko ch'ín Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

¹³ Ntá kjuátehe ch'án ntáchro ch'án kixin:

—Kaín tí ka jehya T'aná tjen nkaya nkajní k'uēnkaxin la mé ts'axrjenkixin nuèe.

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

14 Nté t̄t̄ohé sín. Tí jehe sín la ntakótán sín la t'et̄uēnhen sín í so sín ntakótán. A ntá tíó ijnko chojni ntakótán t̄jitaón nt̄ia la ntá yóí sín ts'anót̄jenyá sín ichrén t̄òyē —ichro ch'án.

15 Ntá ntáchro ch'ín Pedro k̄ixin:

—Chronka nkexrí t'axrjexín tíha —ichro ch'án.

16 Ntá k̄juát̄ehē ch'ín Jesús ntáchro ch'án k̄ixin:

—¿Á k̄jaxinrá jahará tiénxinhyará?

17 ¿Á tiénxinhyará k̄ixin kaín tí nkehe ineni na s̄át̄ji nkaya t̄seeni na ko x̄ík'axrjexín tí cuérp̄oeni inaá?

18 A ntá tí nkehe t'axrjexín ir'va chojni la t'axrjeníxin asén chojni la tíha la mé tí j̄iē t̄jasixín chojni.

19 Kaín tíha mé t'axrjeníxin asén chojni, mé tí j̄inahya t̄jenk̄ayáxin sín la ko tí t'óyán k̄íchó sín la ko tí t̄jachehē k̄íchó sín la ko tí chón̄ta sín í jnko chojni ch̄jin ókjé la ko teé sín la ko tí k̄juach'ia la ko tí t'ántaxín̄h̄in k̄íchó sín.

20 Tí nkehe a mé t̄jasixín chojni j̄iē. A ntá tí sineni k̄jonté nchexiteyáhyani ts'ónti t̄jani la tíha la jehya j̄iē —mé x̄íkaha ichro ch'ín Jesús.

*Ijnko tjan jehya sín israelita mé kuinkáchónki tí ch'ín Jesús
(Mr: 7.24-30)*

21 Ntá ch'ín Jesús mé k'uaxrjexín ch'án ntiha la ntá sák̄juí ch'án nó ch̄jasin Tiro la ko ch̄jasin Sidón.

22 Ntá ikui ijnko chojni ch̄jin na mé ijnko tjan cananea na k̄juák'e tjan tí ch̄jasin ntiha. Kóch̄jinehe tjan tí ch'ín Jesús la k'uèya tjan ntáchro tjan k̄ixin:

—Ìnchéni, Xjeen David, t̄ikonóehéni k̄ixin tí x̄jeenni ch̄jin la mé níhi tjan chón̄ta tjan ijnko nchak̄uen tí j̄inahya —ichro tí tjan a.

23 A ntá ch'ín Jesús la ninkehó k̄juát̄ehēya ch'án. A ntá tí sín k'uáj̄iko ch'án na kóch̄jina sín la ntáche sín ch'án k̄ixin:

—Tét̄uēnhén tjan s̄át̄s̄ji tjan k̄ixin tinkák'óyako tjan chréhe tjan tí jeheni —ichro sín.

24 Ntá ntáchro ch'ín Jesús k̄ixin:

—Dios mé ichr'án̄na ts̄jéyá jehó tí kolélo k̄juíchroē kuènte nació̄n Israel —ichro ch'án.

25 A ntá tí tjan a kóch̄jina la k̄juák'exín toh'in tjan nkayakon tí ch'ín Jesús la ntáchro tjan k̄ixin:

—Ìnchéni, t̄jínk̄itsani —ichro tjan.

26 A ntá ch'ín Jesús k̄juát̄ehē ch'án ntáchro ch'án k̄ixin:

—Jehya tí j̄ina chrókuak̄its̄jah̄a niót̄j̄a tí x̄jan ntá chrót̄jah̄a kon̄ia chrók̄jónē va —ichro ch'án.

27 A ntá jehe tjan la ntáchro tjan k̄ixin:

—Chaxín x̄íkaha, ìnchéni. K̄jánchó k̄jonté tí kon̄ia na tí nkehe ts̄jix̄enjinnk̄í mesa kuènte ìnché la ine va —ichro tjan.

28 Ntá ntáchro ch'ín Jesús kixin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuitõhe jína.

Ch'ín Jesús mé kjuínchekitohe jína nchónhya chojni níhi

29 Ntá ch'ín Jesús mé sákjuíxin ch'án ntiha la kjuíji ch'án chrínta ntayaon Galilea. Ntá chrín ch'án ijnko jna la ntiha kjuák'etjaxín ch'án.

30 Ntá kójnkotsé itsjé chojni tí tjen ch'án la kjuíkao sín tí sijníhi, mé tí sín xitjahya tji la ko tí sín t'íkonhya la ko tí sín nixjahya la ko tí sín tsixénká la kaín xín tí í so sijníhi. K'uejo sín tí sijníhi toté tí ch'ín Jesús kixin jehe ch'án mé sinchekitohe ch'án sín jína.

31 Kaín chojni la imá chrakon sín kixin k'uíkon sín kixin tí sín k'uénixjahya la ó nixja sín la tí sín tsixénká la tsíkitohe sín jína la tí sín xitjahya tji la ó tji sín la ko tí sín k'uék'íkonhya la ó t'íkon sín. Méxra kjuanchehe sín kjuasáyé tí Dios kuente tí sín Israel.

Ch'ín Jesús mé kjuínchekjine noó mil chojni

(Mr. 8.1-10)

32 Ntá k'uíyehé ch'ín Jesús tí sín k'uájiko ch'án la ntáchro ch'án kixin:

—Imá tikonóahá kaín tí chojni kixin ó ní yaon tjejókoni sín ntá kjuèhe sín nkehe sine sín. Tjinkakonhya chrókuétuanhan sín sáchrókjui sín ntõe sín kixin naxa nehya sín la ntia ó tsotienxín sín kjinta —ichro ch'án.

33 Ntá ntáchro tí sín k'uájiko ch'án kixin:

—Ntá jaha la ó noha kixin nteje tjejóni la kohya nkehe toshjéheni kaín xín tí chojni a —ichro sín.

34 Ntá ch'ín Jesús mé kjuanchankíhi sín, ntáchro ch'an kixin:

—¿Nkekjaín niõtjã chontará? —ichro ch'án.

Ntá ntáchro sín kixin:

—Yato niõtjã chóntani la ko iso koche ntsíntsí —ichro sín.

35 Ntá ch'ín Jesús k'uetõan ch'án kixin kaín xín sín ts'ixitjaxín sín nonte, ichro ch'án.

36 Ntá kuákja ch'án tí yato niõtjã la ko tí koche ntsíntsí la kjuanchehe ch'án kjuasáyé Dios. Ntá kóchrít'õ ch'án tí niõtjã a la ntá k'uetuēhen ch'án tí sín k'uájiko ch'án kixin ts'óxíkayehé sín tí niõtjã la ko tí koche kaín xín tí sín siín a, sine sín.

37 Na mé kaín xín sín kjóne sín na kókjehe sín ntá kjuenájín sín yato ntaxra tot'õ tí nkehe naxa tsíxehe.

38 A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a.

39 Ntá ch'ín Jesús mé nixjehe ch'án sín sákjuí sín la ntá k'uit'ótjen ch'án ntabárcõ la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxín sín ch'án la kjuanchehe sín ch'án kixin chrókjuakoxín ch'án ijnko kjuaxroan kixin á chaxín jehe ch'án tsíkixín ch'án tí tjen Dios.

² A ntá ch'ín Jesús na kjuátēhe ch'án, ntáchro ch'án kixin:

—Jahará ntáchrórá kixin ijie ntá kónjín ó tsi ijnko yaon jina kixin kjátse nkajní.

³ La ntá nchítjen ntáchrorá kixin ijie la náxrjónhya kixin kjátse nkajní la tjenkáya tjuí. Méxrā jahará ntoáhya tjenkayáxinrá. Ó nohará tjátsoanrá tí nkajní, a ntá tjátsoanhyará tí kjuaxroan sítónhen jie.

⁴ Tí sín jínahya la tí sín titekakonhya la tjanchia sín ijnko kjuaxroan jíé. A ntá ts'ikonhyará í jnko kjuaxroan, jehó tí kjuaxroan kuente ch'ín Jonás mé ts'ikonrá —mé xikaha ichro ch'ín Jesús.

Ntá kuítóhe ch'án sín la sákjuí ch'án.

Ch'ín Jesús ntáchro kixin chrókuitekakonhya sín tí nkehe tjako tí sín fariseo

(Mr. 8.14-21)

⁵ Ntá tí sín k'uájiko ch'ín Jesús mé k'uátòye sín ntayaon la ntá k'uitjáyenhen sín tsíkjikohya sín niotja.

⁶ Ntá ntáchro ch'ín Jesús kixin:

—Chrókóxakonhanrá kixin tí xroan ts'ánkixin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kichó sín ntachro sín kixin:

—Mé xikaha ichro ch'án kixin tsíkjikohyani niotja —ichro sín.

⁸ Ntá kónohe ch'ín Jesús kixin nkehe tí kjo sín kichó sín, ntá ntáchro ch'án kixin:

—¿Nkekuènté tjórá kixin chontahyará niotja? Jahará la intsíkoá tinkachónkirá tí janhan.

⁹ Jahará zá naxa tiénxinhyará la ko á xráxinkákonhyará tí in'ó niotja k'óxikayeheni kjóne tí in'ó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe?

¹⁰ La ko zá xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe?

¹¹ A ntá ¿nkekuènté kixin kuiénxinhyará kixin janhan la jehya kuente niotja tjénixja tió ntáxrjan kixin chrókóxakonhanrá kixin

tí xroan ts'ánkíxin niotjé tí sín fariseo la ko tí sín saduceo? —mé xíkaha ichro ch'ín Jesús.

¹² Na ntá kuienxín sín kíxin nixjahya ch'án kuènte tí xroan t'ánkíxin niotja. Náhi. Tjenixja ch'án kíxin chrókóxakonhen sín kíxin tí nkehe tjako tí sín fariseo la ko tí sín saduceo.

Chrónka ch'ín Pedro kíxin ch'ín Jesús mé tí nkexro Cristo
(Mr. 8.27-30; Lc. 9.18-21)

¹³ Kjuíji ch'ín Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kíxin:

—¿Nkehe tjo sín kíxin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátehe sín ntáchro sín kíxin:

—Iso sín mé ntáchro sín kíxin Juan Bautista, ichro sín. A ntá í so sín na mé ntáchro sín kíxin Elías, ichro sín. A ntá í so sín mé ntáchro sín kíxin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'ín Jesús kíxin:

—¿A ntá jahará nkechorá kíxin nkexro tí janhan? —ichro ch'án.

¹⁶ A ntá ch'ín Simón Pedro kjuátehe ch'án ntáchro ch'án kíxin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'ín Jesús ntáchro ch'án kíxin:

—Náxrjón tjen jaha Simón xjeen Jonás kíxin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha.

¹⁸ Méxra ntáxrjan kíxin jaha mé Pedro mé t'axrjexín kíxin ijnko xro la chrítaón tí xro mé sit'ána nínko la kjónté tí kjuachaxin kuènte kjuach'én la tsjachahya sinchek'itjáyan.

¹⁹ Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní siín kjuachaxin.

²⁰ Ntá ch'ín Jesús mé k'uetuènhen ch'án tí sín k'uájiko ch'án kíxin ninkexró tsochénkahya sín kíxin jehe mé tí Cristo.

Ch'ín Jesús chrónka ch'án kíxin its'en ch'án
(Mr. 8.31—9.1; Lc. 9.22-27)

²¹ Ntá ch'ín Jesús kjuankíxin ch'án chénka ch'án tí sín k'uájiko ch'án kíxin t'ichjánxín satsji ch'án chjasin Jerusalén la ntaha la tí sín t'etóan kuènte nínko la tí sín nchat'á tjetóan la ko tí sín maestro tjako ley mé imá sinchekjasóte sín ch'án. La chrónka ch'án kíxin ts'óyán sín ch'án kjánchó tí nixin yaon mé tsoxechón ch'án inaá.

22 Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehe ch'án ntáchro ch'án kíxin:

—Kjá Dios tsjanjonhya kjuachaxin xíkaha tsonhan Inchéni kíxin jaha la xitjahya tsjasóte xíkaha —ichro ch'ín Pedro.

23 A ntá ch'ín Jesús mé kuinkátjía ch'án la nixjehe ch'án tí ch'ín Pedro, ntáchro ch'án kíxin:

—Sátjia ntáha, Sátanas. Tjiatéhya tí jaha tí nkehe tsonna. Jaha chrók'uínkakonhén tí nkehe tjinkaon Dios. Jaha tjenkayáxinhya éxí tjinkaon Dios. Náhí. Tjenkayáxian éxí tjenkayáxin chojni ó —ichro ch'ín Jesús.

24 Ntá nixjehe ch'ín Jesús tí í so sín k'uájiko ch'án, ntáchro ch'án kíxin:

—Jnkójnra tjinkáonra tsochréhéra tí janhan la t'ichjánxin tsitohérahá kaín tí nkehe tjaké asánra, ntá tsámára tí ntacruz kuéntará, a ntá tsochréhérahá tí janhan.

25 A ntá tí nkexro tjinkaon jehó sinchekaá asén la ts'itjayan. A ntá tí nkexro chrókjuinçek'itjayanxín asén kíxin tinkáchónki sín tí janhan la tsaá.

26 ¿A ntá nkehe tsonhen tí chrókjuacha ijnko chojni chróhónta kaín nkehe siín chjasintajni a ntá tí kjuachón chrókjuinçek'itjayan? ¿Nkehe chrókjuenka chojni kíxin chróhónta tí kjuachón?

27 Tí Xjeen Dios K'óna Chojni tsikao ch'án tí kjuachaxin jié kuénte It'é ch'án tjen nkaya nkajni la kaín tí sín ángel tsikao ch'án na ntá tsjenkehe ch'án jnkojnko chojni nkexrí tí xra kjuích'e jnkojnko tí jehe sín.

28 Chaxín xrxanka kíxin isorá tjejorá ntihi la naxa ts'énhyará naxa ts'ikonjiará kíxin nkexrí tí kjuachaxin tsochónta tí Xjeen Dios K'óna Chojni tí tsikao ch'án kjuachaxin jié —ichro ch'ín Jesús.

17

Ch'ín Jesús mé k'uixitóxin nkexrí tsjehe ch'án

(Mr. 9.2-13; Lc. 9.28-36)

1 Ntá injón yaon chr'éxin ntá ch'ín Jesús mé sákjujiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jna imá noi.

2 Ntá ntiha tjejó sín ntá xrínahya k'uíkon sín kíxin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjákini tsjehe éxí yaon la ko iké ch'án la k'óna imá tjóá la tsjehe éxí yóhe ijnko xrohi t'inkaséyan.

3 Na ntá xrínahya k'uíkon sín itjen ch'ín Moisés la ko tí ch'ín Elías tjejótjo sín tí ch'ín Jesús.

4 Na ntá ch'ín Pedro mé ntáche ch'án tí ch'ín Jesús kíxin:

— Ìnchéni, jína kixin tjejóni ntihi. Tí tjinkávan la chrókuich'énani iní nchia la mé ijnko kuéntá jaha la ijnko kuènte ch'ín Moisés la í jnko kuènte ch'ín Elías — ichro ch'án.

⁵ Ntá naxa tjenixja ch'ín Pedro na ntá xrinahya ikui ijnko tjuj imá t'inkaséyan kjuák'etja chrítaón tí jna tjejó sín. Ntá xrinahya chríkjan tí tjuj kuínhin sín itén ijnko nkexro nixja na mé ntáchro kixin:

— Tíhi mé xjanna. Imá tjuahā ch'án la ko chàna kixin itjen ch'án. Chrókuinhínrá tí nkehe tjako ch'án — ichro Dios.

⁶ Kuínhin tí sín k'uájiko ch'án xikaha la ntá kjuítsínka sín nonte kixin imá chrakon sín.

⁷ Na ntá ch'ín Jesús mé kóchjina tí tjejó sín la kuákóxin sín ch'án la ntáchro ch'án kixin:

— T'aya chrakonhyará — ichro ch'án.

⁸ Na ntá xrinahya k'uíkon sín kixin kohya ninkexró. Jehó ch'ín Jesús mé tjen.

⁹ Na ntá tí k'uínkajinxin sín tí jna ntá k'uetōan ch'ín Jesús, ntáchro ch'án kixin:

— Ninkexró chenkahyará tí nkehe k'uíkonrá ijie hasta tsox-echónjian tí Xjeen Dios K'óna Chojni — ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

— ¿Nkekuènté ntáchro tí sín maestro tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? — ichro sín.

¹¹ Ntá kjuátehe ch'ín Jesús, ntáchro ch'án kixin:

— Chaxín senó itsi ch'ín Elías kixin tsjasiyóxin ch'án kaín nkehe.

¹² Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxi kóxrjinhin sín. Mé xikaha kjaxin tí Xjeen Dios K'óna Chojni la mé kjaxin sinchekjasóte tí jehe sín — mé xikaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuènte Juan Bautista.

*Ch'ín Jesús mé kjuínchekitohe jína ijnko xjan t'aniáte
(Mr. 9.14-29; Lc. 9.37-43)*

¹⁴ Ntá tió k'uíji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'in ch'án nkayakon ch'án. La ntáchro ch'án kixin:

¹⁵ — Ìnchéni, tikonóhéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án ntá.

¹⁶ Ntá kjuikaoni ch'án ntihi la tí sín xrikoá la kjuachahya sín kjuínchekitohe ch'án jína.

¹⁷ A ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jje. ¿Xá hasta nkesá tjinkáonrá naxa ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uətuənhen ch'án tí nchəkuen tí jínahya la ntá k'uaxrxjín tí nchəkuen tí jínahya tí chánjan la tuénxín kuítóhe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuənté kixin kjuachahyani kuakitsjeni tí nchəkuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakítsjerá nchəkuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxí ijnko tje mostaza intsí la ntá chróntácherá tí jna kixin: “Sátjixian ntihi la sátsjia ókjé”, chróchorá chróntácherá tí jna la ntá tí jna sáchrókjuixin ntihi. Mé xíkaha kaín nkehe chrókjuachará chrókjuich'erá tí chaxín tinkachónkirá tí janhan.

²¹ A ntá tí tsakítsjerá ijnko nchəkuen tí jínahya la t'ichjánxin tsonixjehérá Dios la ko sintehyará.

Ch'ín Jesús chrónka ch'án ínaá kixin its'en ch'án

(Mr. 9.30-32; Lc. 9.43-45)

²² Naxa k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'ətoan sinchekjasóte sín ch'án

²³ la ts'óyán sín ch'án. A ntá tí yaon níxin ntá tsoxechón ch'án ínaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenkə ch'án tí nkehe kjuanchia tí sín kuənte ninko

²⁴ Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkj kuənte ninko mé sákjuítsjehe sín tí ch'ín Pedro la kjuanchankí sín kixin:

—Tí maestro kuəntá la, ¿a tjenkahya ch'án tí nkehe tjanchia tí sín nchekjènkj kuənte ninko? —ichro sín.

²⁵ Ntá kjuátəhe ch'ín Pedro, ntáchro ch'án kixin:

—Kjá tjenkə ch'án —ichro ch'án.

Ntá k'uúixenhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenkə tí nkehe tjanchia tí sín t'ətoan chjasintajni, á tí sín kuənte ntiho o á tí sín tsikjixín ókjé? —ichro ch'ín Jesús.

²⁶ Ntá kjuátəhe ch'ín Pedro, ntáchro ch'án kixin:

—Tí sín tsíkjixín ókjé mé tjenka sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxinhya chrókjuenka sín.

²⁷ Kjánchó tjínkaonhya tsonínkaon ninkexró ntihi. La ntá sátsjia tí ntayaon sátsjikoá tí ichjon chóna gancho tséxin sín koche la ntaha itsé tí chjon chrínki ntayaon. Ntá tsákjá tí koche saoxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenka kaín tí tjásikáha sín la ko tí tjásikehé sín jaha. Táha mé sátsjikoá tjenka —ichro ch'ín Jesús.

18

¿Nkexro tí imá ts'etoan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etoan tí kjuachaxin kuènte nkaya nkajní? —ichro sín.

² Ntá ch'ín Jesús mé k'uíyehé ch'án ijnko chánjan la kjuak'e jnkosiné tí tjejó tí jehe sín

³ la ntáchro ch'án kixin:

—Chaxín xrjanka kixin tí ts'ónahyará éxi ijnko xjan ntsí ntá xitjahya tsákjárá tí kjuachaxin kuènte Dios.

⁴ Tí jnkójín nkexro ts'óna éxi tí chánjan ihnkehya la mé antsí tjejoan ntiha.

⁵ A ntá tí nkexro ts'áyehé ijnko chánjan kixin tinkáchónki sín tí janhan la mé xikaha éxi chrók'uáyehé sín tí janhan —mé xikaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ 'Tí jnkójín nkexro chrókjuachroe ijnko chánjan ntsi tinkáchónki tí janhan la íchá jína chrókjuincheteyá sín ch'án ijnko xro tsík'óna xrochre ntá chrókjuikakánkí ch'án ntayaon njnka.

⁷ Imá náxrjónhya tjejó tí sín chjasintajni kixin síin nkehe tjasixín chojni jie. Xrácín la jehí síin, a ntá nòa tí nkexro tjasin tí nkehe tsjasixín chojni jie.

⁸ 'Tí itjá o totá tjásixián jie na chrókójína chrókochrínjian chróchr'an ikjín kixin íchá jína chróchonta kjuachón kjónté it'oo itjá o it'oo totá. Á ntá tí yói itjá o yói totá chróchonta tsjásixián jie la tíha mé sátsjixián tí síche xrohi jnkochrín.

⁹ La ko kjaxin tí ikuan tjásixian jie na chrókójína chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yói ikuan chróchonta tsjásixián jie la tíha mé sátsjixián tí síche xrohi jnkochrín.

Kjuíncheyóexin ch'ín Jesús éxí ijnko kolélo tsík'itjáyan
(Lc. 15.3-7)

¹⁰ 'Chrókókjoníehyará nijnko tí chánjan ntsíntsí. Tjonkará kixin nkaya nkajní la tí sín ángel kuénte tí xjanntsí la xráxín tjejó sín tí tjen T'aná nkaya nkajní.

¹¹ Tí Xjeen Dios K'óna Chojni la mé ikui kixin chrókjuinchekaá tí chojni xrichroe.

¹² 'Jahará nkechrorá? Ijnko chojni chóna ijnko ciento kolélo ntá chrók'uitjáyan ijnko va na ¿á chrókuítóehya ch'án tí noventa y nueve va tí jnā ó ā ntá á chrókjuikjeyáhya ch'án tí ijnko tí ko k'uitjáyan ní?

¹³ A ntá tí tsjacha ch'án ts'itja ch'án va ntá antsí tsochéhe ch'án kixin tí kolélo k'uitja ch'án la ntá kánhyó tsochéhe ch'án kixin tjejó tí noventa y nueve ko tsík'itjáyanhya va.

¹⁴ Mé xikaha kjaxin It'éni tjen nkaya nkajní la tjinkakonhya ch'án kixin chrók'uitjáyan ninkexró kjónté ijnko chojni kánhyó tjetooan.

Chrók'uitjáyanhanrá tí jię kjuasinhánrá kichuára
(Lc. 17.3)

¹⁵ Tí kichuá tí chrókjuít'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jię kjuasin ch'án. A ntá tí kjuacha nixjehé tí kichuá la í kohya kjuanínkaon.

¹⁶ A ntá tí tahya ch'án kuentá nkechrua la ntá ntáche á jnko o yaá chojni sátjikoá kixin tsinhin sín á chaxín titekakonhya ch'án.

¹⁷ A ntá tí kjónté xikaha naxa titekakuenhya ch'án sín la ntá chenka tí sín tsíkójnkotsé nkehe tí jię kjuasin ch'án la ntá tí naxa titekakuenhya ch'án tí sín tsíkójnkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjènkj.

¹⁸ 'Chaxín ntáxrjan kixin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajni tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihi chjasintajni la kjaxin ntaha nkaya nkajní tsjanjon Dios kjuachaxin.

¹⁹ 'Kjaxin ntáxrjan kixin tí tjejó yaará ntihi chjasintajni la tí jnkokoá tjejó tjenkayáxinrá chrókjuancheherá Dios ijnko nkehe tjinkáonrá la ntá jehe ch'án mé tsotjáhará ch'án.

²⁰ Kixin tí tjejó yaá o iy'á chojni tjejó jnkokoá t'ákjenxin sín niná la janhan koína tjéntaxian tí tjejó sín ntiha.

²¹ Ntá kóchjina ch'ín Pedro mé kjuanchankí ch'án ntáchro ch'án kixin:

—Inchéni, ¿nkekjaín veces chrók'uitjáyenheni tí jię kjuasin kichó ni? ¿Á yato veces ó ní? —ichro ch'án.

²² Ntá kjuátéhe ch'ín Jesús, ntáchro ch'án kixin:

—Náhí, jehya yato veces ó. Náhí, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uítjáyenhya ch'án ijié kichó ch'án

23 Tí kjuachaxin kuènte Dios la éxí yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra.

24 Ntá kjuankíxin ch'án tsítsínkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon.

25 Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetoan ch'án kíxin tí nkexro a mé tsoxi ch'án la koí tí ichjién ch'án la ko xjeen ch'án la ko kaín nkehe kuènte ch'án kíxin ntá xíkaha mé tsoxenka kaín tí síká ch'án.

26 A ntá tí nkexro ch'e xra mé kjuák'exín toch'in ch'án nkayakon tí rey la chrónóehé ch'án, ntáchro ch'án kíxin: “Jaha Ìnchéni tikonóehéni la kjónté kjaxón tsjenkahani kaín tí síkáhani”, ichro ch'án.

27 A ntá tí ch'ín rey kujkonóehé ch'án tí ch'ín a kjónté itsjé síká ch'án, ntá kuítóhe ch'án sákjuí.

28 A ntá tí sákjuí tí ch'ín a ntá xrínahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kíxin: “¡Tsjénkana tí nkehe tjasíkàna ní ǝ náhí!” ichro ch'án.

29 A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóehé ch'án ntáchro ch'án kíxin: “Tikonóehéni ijie la kjónté kjaxón tsjenkahani kaín tí nkehe síkáhani”, ichro ch'án.

30 A ntá jehe ch'án la kujkonóehya ch'án. K'uetoan ch'án kíxin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án.

31 Ntá tí í so sín ch'exón xra mé k'uíkon sín la ntá imá kóxakonhen sín la sákjuíchénka sín tí lámoé sín nkexrí kaá kónhen tí ch'ín síká.

32 A ntá tí lamo mé k'uetoan tsjik'íyehé sín tí nkexro jínahya la ntá ntáchro ch'án kíxin: “Imá jínahya jaha. Janhan mé kjuíntak'itjáyanhan tí nkehe tjasíkàna kíxin jaha chrónóana.

33 A ntá jaha mé kjaxin chrókujkonóehé tí nkexro choxian éxí janhan kujkonóaha tí jaha”, ichro tí ch'ín lamo.

34 A ntá imá kónínkaon tí lamo a la k'uetoan ch'án kíxin tsjasóte tí ch'ín a tsjixinjian tsjenka ch'án kaín tí síká ch'án.

35 A ntá tí ch'ín Jesús ntáchro ch'án kíxin:

—Mé xíkaha T'aná tjen nkaya nkajní xíkaha sit'ahará jahará tí jehya kaín asánrá ts'itjáyanhanrá tí jie chóna kichuárá —ichro ch'ín Jesús.

19

Tjako ch'ín Jesús kuènte tí sín t'itjìhi kíchó
(Mr. 10.1-12; Lc. 16.18)

¹ A ntá kjuixin nixja ch'ín Jesús kaín tíha, ntá sákjuixin ch'án estado Galilea la kjuíji ch'án estado Judea nó tóhe tí ntárido Jordán.

² Ntá nchónhya chojni kjuíjichréhe sín ch'án ntá ntiha mé kjuínchekitöhe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á síin kjuachaxin tsjákehe jnkojín chojni ichjién kjónté kohya jié jié? —mé xíkaha kjuanchankí sín.

⁴ Ntá kjuátēhe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'éna kaín chojni síin chjasintajni tí xrankíxixín, la tí nkexro mé “kjuích'éna ch'án chojni ntoa ko chojni chjin”?*

⁵ La ko ntáchro kixin: “Mé xíkaha tí chojni ntoa la tsítóhe sín it'é sín la ko ìné sín la tsakja sín ichjién sín la yóí sín la éxí ó jnko chojni xíkaha ts'óna sín.”†

⁶ Mé xíkaha la í jehya yaá chojni tí jehe sín. Náhí. Ó jnko chojni k'óna tí jehe sín la mé Dios kjuanjon kjuachaxin kixin kuákja kíchó sín, la í xitjahya ts'itjìhi kíchó sín.

⁷ Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'uoetōan kixin ts'óna ijnko xroon tsakja tí ichjién kixin tsjákeexín kíchó sín?‡ —ichro tí sín fariseo.

⁸ Ntá ntáchro ch'ín Jesús kixin:

—A ntá jahará titekákonhyará. Méxra ch'ín Moisés kjuanjon ch'án kjuachaxin kixin ts'óna tí xroon ts'itjìxín kichuára. Kjánchó tí xrankíxixín la xíkaha kónhen.

⁹ Méxra ntáxrjan kixin jnkojín sín tjákehe ichjién tí kjuasinhya jié, chóntahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xíkaha la ó jié tíha. La ko kjaxin tí ijnko chojni chjin tsíkítsinkehe ntá tsakja í jnko chojni la kjaxin jié tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xíkaha tjanjonko kíchó sín chrók'uitjìhi kíchó sín la íchá jína chrókótēehya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín.

* 19:4 19.4: Génesis 1.27; 5.2 † 19:5 Génesis 2.24 ‡ 19:7 Deuteronomio 24.1-4

¹² Siín iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kíchó sín kixin ókjé chojni kjaxin kjuich'ehe sín xikaha, la ko í so sín la takjahya kíchó sín kixin tjinkaon Dios kixin xikaha sich'ehe sín ch'án xra. Tí sín tsjacha sich'e tíha la chrókjuich'e sín xikaha.

Ch'ín Jesús mé kjuíncheyaon ch'án chánjan

(Mr. 10.13-16; Lc. 18.15-17)

¹³ Ntá ikjui chojni kjuikao sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kónínkakonhen sín tí sín kjuikao tí xjan.

¹⁴ A ntá ntáchro ch'ín Jesús kixin:

—Nté títóherá tsoxrakoa xjan tí tjén janhan la t'ínkakuènyará xjan kixin tí sín kuènte kjuachaxin nkaya nkajní la mé tóyóhe éxí tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

Ijnko ch'ín ntasoá rico mé kjuínixjehé ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá injko ch'ín ntasoá sákjuítsjehe ch'án tí ch'ín Jesús la kjuanchankíhi ch'án kixin:

—Jaha la injko Maestro jína. La ntá ¿nkehe jína chrókjuich'eni kixin chróchóntani kjuachón jnkochrín? —ichro ch'án.

¹⁷ Ntá ch'ín Jesús kjuátjehé ch'án, ntáchro ch'án kixin:

—¿Nkekuènté ntáchrua kixin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochrín la titekávan tí nkehe k'uetjan Dios —ichro ch'ín Jesús.

¹⁸ Ntá ntáchro tí ch'ín ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókjuich'iyehya nijnko chojni chjin la ko chrókueghya la ko chrókjuich'énahya kjuach'ia kuènte ókjé chojni

¹⁹ la ko chrókjuíkosáyehé it'á la ko iná la ko chrótjuèhé kíchuá éxí tjuèxian asán. § —mé xikaha ichro ch'ín Jesús.

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyán? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí ntoá sijnchexiteyá la sáttjia sijnchekjia kaín tí nkehe chonta la sijnchekitónhén tí sín nò. Ntá kaín tí

nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xíkaha ntá t'ává ch'án sákjuí ch'án kixin imá itsjé nkehe chóna ch'án.

²³ Ntá ch'ín Jesús mé nixjehē ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chóna imá itsjé nkehe na imá xrā ts'áyéhē sín tí kjuachaxin kuente nkaya nkajní.

²⁴ Kjatēe xrjanka kixin antsí xrāhya chrók'uatsínka ijnko kocamello ijnko tjar'i ntachica tjexrja. A ntá antsí xrā kixin tí sín chóna itsjé nkehe chrók'uáyéhē tí kjuachaxin kuente Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xíkaha la çxá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xíkaha sich'e. A ntá Dios mé tsjacha sich'e xíkaha —ichro ch'ín Jesús.

²⁷ Ntá ntáchro ch'ín Pedro kixin:

—Ínchéni, jeheni kaín ni la kuítóheni kaín nkehe chóntani kixin tsochréhēni tí jaha. A ntá çnkehe ts'áyéhēni? —ichro ch'án.

²⁸ Ntá kjuátēhe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochóna kjuachaxin jíe la ntá kjaxinrá jahará chréhérá tí janhan la ts'ejorá teyó trono sinchekitoexínrá ijíe kaín tí sín tsík'axrjenixin tí teyó xjeen ch'ín Israel.

²⁹ La ko kaín tí sín kuítóhe sín ntōe sín la ko kuítóhe sín tí kichó sín la ko kuítóhe sín it'é sín o ínē sín la ko kuítóhe sín ichjién sín la ko xjeen sín la ko nōntēe sín kixin tinkáchónki sín tí janhan, na ntá antsí má tsochóna sín la ko kjaxin tsochóna sín kjuachón jnkochrín.

³⁰ A ntá nchónhya tí sín t'etōan ijie, mé tsjixixín tsochréhē sín. A ntá nchónhya tí sín t'ítuenhen ijie la tí sín a mé ts'etōan sín tí niha.

20

Ch'ín Jesús kjuíncheyóexin ch'án éxí tí sín ch'e xrā

¹ Tí kjuachaxin kuente Dios la éxí yóhē ijnko chojni chóna xrā nōntēe ch'án la ntá ijnko yaon imá nchítjen sákjuíkjayá ch'án chojni tsotjéhe ch'án to uva.

² Ntá tí k'uitja ch'án tí sín sich'ehe ch'án xrā ntá ikjo ch'án sín kixin ijnko denario tsjenkehe ch'án sín tí xrā sich'e sín nōntēe ch'án tí yaon a.

3 Ntá chr'éxin como las nueve nchítjen ntá sákjuí ch'án ntasin la k'uikon ch'án í so sín tjejó ntasin chóntahya sín xṛa.

4 Ntá nixjehe ch'án sín ntáchro ch'án kixin: “Kjāxinrá sáchrókjuirá chrókjuich'erá xṛa nontēni la jina chrókjuénkahaṛá”, ichro ch'án. La ntá jehe sín sákjuí sín.

5 A ntá tí ìnché nonte la sákjuí ch'án inaá chonkixin naxa xík'itja ch'án í so sín ch'ehe ch'án xṛa la nta tí las tres kónjin la xikaha naxa xík'itja ch'án í so sín inaá.

6 A ntá las cinco kónjin sáxiki ch'án ntasin inaá la k'uitja ch'án í so chojni ntaha chóntahya sín xṛa la ntá kjuanchankíhi ch'án sín kixin: “¿Nkeuèté tjejorá ntihi ch'ehyará xṛa kuenté yaon? —ichro ch'án.

7 Ntá ntáchro sín kixin: “Kohya nkexro kjuanjon xṛa chrókjuich'eni”, ichro sín. Ntá ntáchro ch'án kixin: “Kjāxinrá sáchrókjuirá chrókjuich'erá xṛa nontēni la jina chrókjuénkahaṛá”, ichro ch'án.

8 A ntá ó kóntó ntá tí ìnché nonte mé nixjehe ch'án tí ch'ín t'etoan sítónhen xṛa nontēe ch'án la ntáchro ch'án kixin: “T'iyehé kaín tí sín kjuích'e xṛa tjenkehé sín. Tjankíxian tjenkehé tí chojni kjuixixín k'uixenhen xṛa la chr'éxin tjenkehé tí sín saoxín k'uixenhen xṛa”, ichro ch'án.

9 A ntá kóchjina kaín tí sín k'uixenhen xṛa las cinco kónjin la jnkojnko sín k'uáyéhe sín jnkojnko denario.

10 Ntá chr'éxin, tió kóchjina tí sín k'uixenhen xṛa nchítjen la ntá kjuenkayáxin sín kixin aṅsí itsjé chichaon chrókjuacha sín, ichro sín. Kjánchó kjāxin sín k'uáyéhe sín jnkojnko denario ó.

11 A ntá tí kjuachahya sín tjete ntá kjuankíxin sín kónínkakonhen sín tí ìnché nonte

12 la ntáchro sín kixin: “Tí sín ikui kjuixixín la kjuích'e sín xṛa jnkokoá hora la ntá kjāxin kjuénkehé sín jnkokón éxí kjuacha tí jeheni. La ntá jeheni kjuích'eni xṛa kjónté sóa la kuenté yaon kjuích'eni xṛa”, ichro sín.

13 A ntá kjuátehe tí ìnché nonte nixjehe ch'án ijnko tí jehe sín, ntáchro ch'án kixin: “Janhan la kjuít'ayahyará ninkehó. Ó kuítōexinni kixin ijnko denario tsjénkahaṛá tí yaon.

14 Ntá tsákjá chichakoan la sátjia. Janhan tjínkavan tsjénkaha tí sín k'uixenhen kjuixixín éxí tí kjuénkaha jaha.

15 ¿Á chontahya janhan kjuachaxin xikaha chrókjuénkaha sín kixin tíha la chichakonna? ¿Nkeuèté tóchjinoxínhan jaha kixin xikaha kjuénkaha sín?” ichro ch'án.

16 Mé xikaha iso tí sín tsjixixín chréhe sín la tí sín a senóxin ntiha la ntá itsjé tí sín senó la mé tsjixixín tsochréhe sín ntiha kixin nchónhya sín k'uíyaha kjánchó tsjéhya sín k'uitja —ichro ch'ín Jesús.

Chrónka ch'ín Jesús inaá kixin its'en ch'án

(Mr. 10.32-34; Lc. 18.31-34)

17 Ntá ch'ín Jesús sákjuí ch'án ntja nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

18 —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí siín tí sín nchat'á t'etōan la ko tí sín maestro tí tjako ley. Ntá jehe sín ts'etōan sín kixin its'en ch'án.

19 Ntá tsjikaán sín ch'án tí siín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkani sín ch'án ijnko ntacruz kjánchó yaon nixin mé tsoxechón ch'án inaá —mé xikaha chrónka ch'ín Jesús.

Tí nkehe kjuanchia tí iné ch'ín Jacobo la ko ch'ín Juan

(Mr. 10.35-45)

20 A ntá tí iné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóhe tjan ch'án.

21 Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátehe tjan ntáchro tjan kixin:

—Tió tsétōanxián tí kjuachaxián jíe la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

22 Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

Ntá kjuátehe sín, ntáchro sín kixin:

—Kja tsjachani —ichro sín.

23 Ntá ntáchro ch'ín Jesús kixin:

—Chaxín kjónté chrókjuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajní mé nohe kixin nkexro tsíkjejá ch'án ts'áyéhe tíha —ichro ch'ín Jesús.

24 Ntá kuínhin tí ite sín kixin xikaha tsíkjanhia tí sín a ntá kónínkakohen sín tí yaá a.

25 A ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'et̄oan chjasintajni la imá t'et̄uēnhen sín kaín chojni la tí sín t'et̄oan imá nchehnkehe asén sín kixin ihyé sín t'et̄oan sín.

²⁶ Kjánchó jahará la xikahya chrókjuich'erá. Náhi. Tí jnkójínrá tjinkáonrá chrókuét̄oanrá la chrókjuínk̄itsará tí í so sín.

²⁷ A ntá ti jnkójínrá tjinkáonrá chrókuét̄oanrá mé t'ichjánxin senó chrókjuákox̄inrá chrókjuich'eherá kichuárá xr̄a.

²⁸ Mé xikaha tí Xjeen Dios K'óna Chojni mé kuihya kixin chojni chrókjuich'ehe xr̄a. Náhi. Ikui ch'án kixin sich'ehe ch'án sín xr̄a la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitohe jina yaá chojni t'ikonhya

(Mr. 10.46-52; Lc. 18.35-43)

²⁹ Ntá k'uaxrjexín sín chjasin Jericó la nchónhya chojni chréhe tí ch'ín Jesús.

³⁰ Ntá ntaha chrínta nt̄ia tjejót̄jax̄in yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuank̄ixin t'íyēhe sín ch'án ntáchro sín kixin:

—Ìnchéni, jaha tsík'axrjeníxian David, t̄ikonóehéni —ichro sín.

³¹ Ntá nchónhya chojni mé ntáche sín tí sín t'ikonhya kixin:

—Tánirá tí jahará —ichro sín.

Ntá tí jehe sín ant̄sí itsén k'uèya sín, ntáchro sín kixin:

—Ìnchéni, jaha tsík'axrjeníxian David, t̄ikonóehéni —ichro sín.

³² Ntá ch'ín Jesús kjuák'echónhen ch'án ntá k'uíyēhe ch'án tí sín t'ikonhya la kjuanchank̄ihi ch'án sín ntáchro ch'án kixin:

—¿Xá nkehe tí tjinkáonrá chrókjuit'ahará? —ichro ch'án.

³³ Ntá jehe sín kjuátēhe sín ntáchro sín kixin:

—Jaha Ìnchéni, tjinkaonni chrókjuínchek'ikuanni —ichro sín.

³⁴ Ntá ch'ín Jesús mé kujikonóehē ch'án tí jehe sín la kjuínchekuákox̄in tja ch'án tí ikon tí sín t'ikonhya. Ntá tuénxín k'uikon sín la chréhe sín tí ch'ín Jesús.

21

K'uixenhen ch'ín Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jna Olivo. Ntá ch'ín Jesús k'uētuēnhen ch'án iyó tí sín k'uájiko ch'án

² ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjas̄nt̄ankehérá va ntá tsjíkuanará va ntihi.

³ **A** ntá tí jnkojín nkexro tsjanchankíhará nkekuènté tjasintankehéra va la ntá tsonáchrorá kixin “Ìnchéni t'ichjánxinhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjeherá ó kui tí ch'ín Rey kuèntará.

Ihnkehya ch'án la ijnko kolócho ó tjekjen ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetqan ch'ín Jesús.

⁷ Ntá kjuíkəo sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús.

⁸ Ntá itsjé chojni kuakitsje sín ka titsáte sín na kjuentoá sín ka tinkák'ikjínxín sín ka tí ntja ts'atsínkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntja a.

⁹ Ntá iso sín tsítaón ntja la ko í so sín chréhe iton ch'án mé kjuankixin sín itsje sín kixin:

—Tjancheheni kjuasáyé tí nkexro k'uaxrjeníxin tí rey David. Jína tí nkexro kjuixín kjuəchaxién ihnjé Ìnchéni. Tjancheheni kjuasáyé Dios —ichro sín itsje sín.

¹⁰ Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

—¿Xá nkexro tíhi? —ichro sín.

¹¹ La ntá nchónhya sín kjuátehe sín ntáchro sín kixin:

—Tíhi mé tí nkexro Jesús chrónka itén Dios kjuixín ch'án chjasin Nazaret estado Galilea —ichro sín.

Ch'ín Jesús kjuínchetjóá tí nínko

(Mr. 11.15-19; Lc. 19.45-48; Jn. 2.13-22)

¹² **A** ntá ch'ín Jesús mé k'uixenhen ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá.

¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntqna imé it'in nchia tsonixjanaxian sín.” **A** ntá jahará tí nchia í tsíkjich'énará itjueé xíchee† —mé xíkaha ichro ch'ín Jesús.

¹⁴ Ntaha nkaxenhen nínko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitqhe ch'án sín jína.

* **21:5** Isaías 62.11; Zacarías 9.9 † **21:13** Isaías 56.7; Jeremías 7.11

¹⁵ **A** ntá tí sín nchát'á tjetóan la ko tí sín maestro tjako tí ley mé k'uíkon sín kaín tí kjuaxroan kjuích'e ch'án la ko kuínhin sín kixin iso chánjan mé itsje sín nkaxenhen n̄nko ntáchro sín kixin: “Chjéheni kjuasáyé tí nkexro k'uaxrjeníxin rey David”, ichro sín. Ntá kuínhin tí sín a xíkaha ntá kónínkaon sín

¹⁶ la nixjeh̄e sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkahi chro:

Jaha kjuánjuan kjuachaxin kixin tí sín chánjan hyé la ko chánjan nax̄a tjejótakí

mé tsotsje sín‡

—mé xíkaha ichro ch'ín Jesús.

¹⁷ Ntá jehe ch'án mé kuít̄ohe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ok'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr: 11.12-14, 20-26)

¹⁸ **A** ntá tí kóyaon nchítjen ntá kjan sín chjasin Jerusalén inaá la ikui sín nt̄ia ntá ch'ín Jesús mé ik'uén ch'án kjinta.

¹⁹ Ntá k'uíkon ch'án itjen ijnko nta t'óna to higo chjino nt̄ia. La ntá sákjuítsjehe ch'án tí nta, ntá k'uíkon ch'án kixin jehó ka itsa tí nta, nax̄a k'ónahya to. **A** ntá jehe ch'án mé nixjeh̄e ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xámá.

²⁰ Ntá tí sín k'uájiko ch'ín Jesús mé k'uíkon sín kixin xíkaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkekuènté kixin tí nta t'óna to higo tuénxín xámá? —ichro sín.

²¹ Ntá kjuát̄ehe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xíkaha kónhen, la kjaxin chrónixjeh̄erá tí jn̄a i kixin: “Sátjixian ntihi sátjíkjaníkiá nt̄ayaon”, la mé xíkaha tsonhen.

²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin chóna ch'ín Jesús

(Mr: 11.27-33; Lc. 20.1-8)

²³ Ntá kjuixin ntá ch'ín Jesús mé k'uíxenhen ch'án tí n̄nko ntiha. Ntá tió tjetjako ch'án ntá kóchjina iso tí sín nchát'á

‡ 21:16 Salmo 8.2

t'etəʊan la ko tí sín táda judío t'etəʊan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátəhe ch'ín Jesús ntáchro ch'án kixin:

—Ntá kjaxian janhan tsjánchánkíhará ijnko nkehe siná tsjateherá ntá janhan tsotjonkará nkehe tí kjuachaxin chonta tjét'a tí xra i.

²⁵ ¿A ntá nkexro k'uetuənen ch'ín Juan kixin tsjkite ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehe sín itjo sín kichó sín kixin:

—A ntá tí tsontáchroni kixin Dios tsík'etuənen tí ch'ín Juan ntá tsjanchankí tí ch'ín a kixin nkekuènté kuitekakuenhyani ch'án.

²⁶ A ntá tí tsontáchroni kixin chojni ó tsík'etuənen ch'án la ntá chrakonhenni tí chojni kixin kaín sín kuitekaon sín kixin ch'ín Juan la nixja ch'án itén Dios —ichro sín.

²⁷ A ntá kjuátəhe sín ntáche sín tí ch'ín Jesús kixin:

—Náhí, noehyani —ichro sín.

Ntá ntáchro ch'án kixin:

—La ko kjaxin janhan tsəxrjankahya nkexro kjuanjon kjuachaxin kixin tjét'a tí xra —ichro ch'án.

Ch'ín Jesús mé kjuíncheyóəxin ch'án kixin éxi yaá xjan

²⁸ Ntá ntáchro ch'ín Jesús kixin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehe ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nonteeni”, ichro ch'án.

²⁹ Ntá kjuátəhe tí xjan kixin: “Náhí tjinkakonhyani”, ichro ch'án. A ntá chr'éxin ntá k'uixitoxin tí kjuenkayáxin ch'án la sákjuíkjih'e ch'án tí xra a.

³⁰ A ntá tí it'é xjan a mé kjuínixjehe ch'án tí í jnko xjan la jnkokón k'uetuənen ch'án la kjuátəhe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uetuənen it'é? —ichro ch'án.

Ntá kjuátəhe sín kixin:

—Tí xjan saə —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkí la ko tí chojni chjin ch'iyehé nchónhya chojni nto la saoxín ts'ixenhen sín tí kjuachaxin t'etəʊan Dios la ntá jahará la náhi.

³² Kixin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuitekakuenhyará tí chrónka

ch'án. A ntá tí sín nchekjènkì la ko tí chojni chjin ch'iyehé nchónhya chojni ntoa mé kuítekaon sín. A ntá jahará kjónté xíkaha k'uikónrá la kjuítóxiénhyará tí tjenkayáxinrá la ko kuítekákonhyará —ichro ch'ín Jesús.

Ch'ín Jesús kjuíncheyóexin ch'án kixin éxí chojni ch'e xrá la jínahya asén sín

(Mr. 12.1-12; Lc. 20.9-19)

³³ Ntá ch'ín Jesús ntáchro ch'án kixin:

—Tsinhínrá ijnko nkehe s̄intayóaxian. Éxí ijnko ch'ín k'ueñkaxin ch'án itsjé ntanoa t'óna to uva nontee ch'án. Ntá kjuích'éna ch'án ijnko corral. La ko ijnko tjo kjuích'éna ch'án tòye kixin ts'énya sín ìnté to uva. La ko kjuích'éna ch'án ijnko tjàt'ò noi kixin ts'jt'ótjen ch'án tsotsjehe ch'án nkuíxín. §

'A nta kjuínchekjen ch'án tí nontee ch'án iso tí sín ch'e xrá ntá kjuixin ntá sákjuí ch'án imá ikjín.

³⁴ A ntá tí kjuixraká tí yaon k'óna nkehe ntá jehe ch'án mé ichr'án ch'án iso tí chojni ch'ehe ch'án xrá kixin tsjikjanchehe sín tí sín ch'e xrá nontee ch'án kixin tsjanjon sín tí nkehe tsakja ch'án.

³⁵ A ntá tí sín t'ayakonhen tí nonte mé itsé sín tí sín kjujkanchia tí nkehe la kjuate sín iso la ko í so la k'óyán sín la í so la ixró k'uíchexín sín.

³⁶ A ntá tí ìnché nonte a xíchr'án ch'án iso chojni ch'ehe ch'án xrá ínaá, a ntá tí sín ch'e xrá la kjaxin xíkahó kjuích'ehe sín tí sín kjuíji.

³⁷ 'A ntá xíkaha tsikónhen ntá kjuenkayáxin ch'án ichr'án ch'án tí xjeen ch'án, la kjá chróchóntehe sín kjuasáyé tí xjeen ch'án, ichro ch'án.

³⁸ A ntá tí k'uíkon tí sín ch'e xrá tí xjeen ch'án la ntá jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe. Ts'óyánni ch'án kixin ntá tsitqekoni kaín tí nkehe kuènte ch'án”, ichro sín.

³⁹ Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'óyán sín ch'án —mé xíkaha kjuako ch'ín Jesús.

⁴⁰ Ntá kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí ìnché tí nonte a la, ¿nkehe sich'ehe ch'án tí sín ch'e xrá? —ichro ch'ín Jesús.

⁴¹ Ntá kjuátēhe sín kixin:

—Mé tsjiji ch'án la tsikonóghya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

42 Ntá ntáchro ch'ín Jesús kixin:

—¿Á nunca kjuínchekuáxinhyará tí xroon itén Dios tsíkjin sín ósé? Mé ntáchro xikihi:

Tí xro náxrxjónhya kuítóenta tí sín ch'éna tjat'o,

a ntá mé jie k'óna tí xro tjetooan.

Mé xikaha kjuích'e Inchéni Dios,

na ntá tíha mé ijnko nkehe kjuachrakon k'uíkonni.*

Mé xikaha ichro itén Dios.

43 Ntá ntáchro ch'ín Jesús kixin:

—Tjonkará kixin Dios tsakitsjahará tí kjuachaxin kuènte ch'án la ntá sinchek'áyéhe ch'án tí sín ch'e xra jina.

44 A ntá jnkojín nkexro tsjitsínka chrítaón tí xro i mé tsokuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

45 Ntá tí sín nchat'a tjetooan la ko tí sín fariseo mé kuínhin xikaha kjuíncheyóexin ch'ín Jesús ntá kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsonhen sín.

46 La ntá tjinkaon sín chrókjuinchekjasóte sín ch'án kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuènte Dios.

22

Ch'ín Jesús kjuíncheyóexin éxi ijnko kia kótehe sín

1 Ntá ch'ín Jesús mé kjuankixin nixja ch'án inaá la kjuíncheyóexin ch'án ntáchro ch'án kixin:

2 —Tí kjuachaxin kuènte Dios mé éxi yóhe ijnko ch'ín rey kjuasin ch'án ijnko kia kixin tsotehe xjeen ch'án.

3 K'uetuēnhen ch'án tí sín ch'ehe ch'án xra kixin tsjik'íyēhe sín tí sín kjueyá ch'án, kjánchó jehe sín mé tjinkakonhya sín tsochjina sín.

4 A ntá k'uetuēnhen ch'án inaá í so tí sín ch'ehe ch'án xra ntáchro ch'án kixin: “Chenka tí sín ó k'uíyahā kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsankā la kaín nkehe la ó síchónhen. A ntá chróxrakoa sín tí siín kia”, mé xikaha k'uetooan ch'án.

5 A ntá tí sín tsík'íyēhe ch'án mé ántosén sín. Ijnko sín la sákjuí nontē la í jnko la sákjuí ch'án í jnko xra chóna ch'án.

6 La í so tí sín a mé tsítsé sín tí sín tsík'etuēnhen tí ch'ín rey la k'óka tí sín a hasta ik'uén tí jehe sín.

7 Ntá tí ch'ín rey mé kónínkaon ch'án ntá k'uetuēnhen ch'án tí sín soldado kixin its'en tí sín kjuàya la ko tsoche tí chjasén sín.

* 21:42 Salmo 118.22-23

⁸ Ntá nixjehe ch'án tí sín ch'ehe ch'án xrā inaá ntáchro ch'án kixin: “Kaín nkehe la ó síchónhen kixin tí nkexro tsotehe la ntá tí sín k'uíyahā kuítékakonhya sín la kjuihya sín.

⁹ Méxrā sátsjirá tí esquina tí ntia jié la t'iyeherá kaín tí sín tsoxetará kixin itsji sin ti kia”, ichro ch'án.

¹⁰ Ntá tí sín ch'e xrā mé sákjuí sín la k'uíyehe sín kaín tí sín t'átsínka tí ntia ntiha, mé chojni jína la ko chojni jínahya hasta k'uixikaón chojni tí nchia ntiha.

¹¹ Ntá tí ch'ín rey mé kuitsjehe kaín tí sín tsík'íyehe ch'án la ntá k'uíkon ch'án ijnko ch'ín ntiha chóntahya ka jína kuènte tí kia a.

¹² La ntá nixjehe ch'án, ntáchro ch'án kixin: “Amigo, ¿nkexrí k'uixenhén kixin tsík'ítsahya kuènte kié chojni tsotehe?” ichro ch'án. Ntá tí ch'ín a kjuátēehya ch'án ninkehó.

¹³ A ntá tí ch'ín rey mé k'uíyehe ch'án tí sín ch'ehe ch'án xrā la ntáchro ch'án kixin: “Sínchenteto toté la ko itja tí ch'ín a la ité ntója sítie la nta ntiha a mé tsotsjánka ch'án la sinetaón ch'án neno ch'án.”

¹⁴ Ntá ntáchro ch'ín Jesús kixin:

—Nchónhya sín k'uíyahā la séhya sín k'úitja —mé xikaha kjuako ch'án Jesús.

Ch'ín Jesús ntáchro ch'án kixin ó nchoxon tsjenkehe sín gobierno

(Mr. 12.13-17; Lc. 20.20-26)

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxin sín tí ch'ín Jesús kixin ách'e ichrén jié tsjasin ch'án la ntá tsjanchia sín jié.

¹⁶ Ntá ichr'án sín iso tí sín ch'ehe sín xrā la iso tí sín ch'ehe tí ch'ín Herodes xrā kixin tsjachaxin sín tí ch'ín Jesús. Ntá tí sín a nixjehe sín ch'án ntáchro sín kixin:

—Maestro, ó noheni kixin tí nkehe ntáchrua jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxián kixin á jína sín.

¹⁷ A ntá jaha chronka nkehe tjenkayáxian. ¿Á jína chrókjuenkehēni tí gobierno romano o náhi? —ichro sín kjuanchankí sín.

¹⁸ Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxinráni?

¹⁹ Tjákonará tí chichaon tjenkehérá sín méhe —mé xikaha k'uetōan ch'ín Jesús.

Ntá kjuikohe sín ch'án tí chichaon a.

²⁰ Ntá k'uíkon ch'ín Jesús ntá kjuanchankí ch'án kixin:

—¿Nkexro tí tsík'axrjexín tjenkání tí chichaon méhe la ko nkexro ihnjé chóna? —ichro ch'án.

²¹ Ntá kjuátehe sín kixin:

—Tí ch'ín t'etōan mé tjenkání ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'etōan tí nkehe kuente ch'án la kjaxin tí nkehe kuente Dios la chróchjehérá Dios —mé xikaha chro ch'ín Jesús.

²² Ntá tí kuínhin sín xikaha la chrakon sín la komá sín ch'án ntá sákjuí sín.

Kjuanchankí sín kixin á tsoxechón chojni

(Mr. 12.18-27; Lc. 20.27-40)

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xikaha chrókjuachaxin sín ch'ín Jesús. Ntáchro sín kixin:

²⁴ —Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxí xjeen tí ch'ín saó tsík'en.

²⁵ Ntá ntihi k'uejó yato sín jnkokoá kichó sín. Ntá tí ch'ín saó kótehe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo.

²⁶ A ntá tí ch'ín yóxin ik'uén kjaxin la tí ch'ín nixin kuákja ch'án tjan la ntá xikaha kónhen inaá. La kayatoé tí sín k'uéchóna sín tjan xikaha kónhen sín kaín sín ik'uén sín.

²⁷ A ntá kjuixixín ntá kjaxin tjan ik'uén tjan.

²⁸ Ntá tió tsoxechón kaín xín chojni tsík'en, ¿ntá nkexro ts'óna xì tí jehe tjan kixin kayatoé sín kótehe tjan? —mé xikaha kjuanchankíhi sín tí ch'ín Jesús.

²⁹ Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuente Dios.

³⁰ A ntá tí chojni tsík'en tió tsoxechón la tsoteehya sín la ko tsoteehya tí xjeen sín kixin tí sín tsík'en la éxí tí sín ángel kuente Dios ts'ejó sín nkaya nkajní.

³¹ A ntá tí kaín tí sín tsík'en tsoxechón, ¿á kjuinchekuáxinhyará nkehe ntáchro Dios? Jehe ch'án xikihi chro ch'án:

³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxrā tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóhón —mé xikaha ichro ch'ín Jesús.

* 22:32 Éxodo 3.6

33 Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjetooan

(Mr. 12.28-34)

34 Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuáteehya tí sín saduceo.

35 La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

36 —Maestro, ¿nkexéhe tí nkehe imá tjetooan kuente tí ley? —ichro ch'án.

37 Ntá ntáchro ch'ín Jesús kixin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuéntará.”†

38 Mé tíha mé tí ley imá tjetooan la ko saxín k'uetooan Dios tíha.

39 A ntá tí nkehe yóxin la tóyóhe la mé ntáchro xikihi: “Chrótjuèhérá kichuára éxí tjuèxínrá asánrá.”‡

40 Tí iyó nkehe i la mé antsí tjetooan kuente tí ley tsík'etooan Moisés la ko tí nkehe kjuako tí sín k'uechrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

41 A ntá tí sín fariseo la naxa jnkokoá tjejó sín

42 la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

43 Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xikihi:

44 Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etooan sín kixin jahvá mé tsétoan.”§

Mé xikaha chro itén Dios.

45 'A ntá ¿xá nkexrí kixin Cristo chrók'óna xjeen David a ntá jehe ch'ín David kuikítexín ch'án Ìnché ch'án tí Cristo? —ichro ch'ín Jesús.

46 A ntá ninkexró xitjahya kjuátehe sín ninkehó la desde tí yaon a chrakon sín la í nínkehó kjuanchankíehya sín ch'án.

† 22:37 Deuteronomio 6.5 ‡ 22:39 Levítico 19.18 § 22:44 Salmo 110.1

23

Ch'in Jesús tjanchia jie tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'in Jesús mé nixjehe ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'in Moisés.

³ Méxra chrókjuinchexiteyéherá kaín tí nkehe t'etōan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín.

⁴ T'etūenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkitsa sín tí nkehe imá ye yamá chojni.

⁵ Ich'e sín kaín xín nkehe kixin tsotsjehe chojni. Tóxrjínhin sín tsjak'enkáni totjen sín la ko itja sín ijnko xroon kjínjin iton ts'inixín itén Dios la tjinkaon sín iké sín síxinkáni nkehe tjákini.

⁶ Tjinkaon sín tsochóna sín silla jína ts'ejókjen sín sine sín tió sátsji sín tí síin kia la ko xritjeyá sín tí silla antsí náxrjón chrók'uejōya sín nkaxenhen njnko.

⁷ La ko tjinkaon sín kixin chojni chrókjuikosáyehe sín tsoxeta sín tí ntja la ko tjinkaon sín kixin tsontáchro chojni kixin maestro tí jehe sín.

⁸ A ntá jahará la tjtōéhyará kixin tsontáchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha.

⁹ La ntá chróntáchrohyará kixin ninkexró mé it'ará ntihi chjasintajni kixin jahará la chontará jnkokoá It'ará mé itjen nkaya nkajni.

¹⁰ La ko jehe sín chróntáchrohya sín kixin jefe tí jahará kixin jehó Cristo mé jefe.

¹¹ Tí nkexro antsí tsjinkitsa iso chojni la jehe ch'án mé antsí t'etōan ch'án.

¹² Kixin tí nkexro ntáchro kixin imá ijié la mé imá tsontsí. A ntá tí nkexro nchehnkehya la antsí tsojié.

¹³ 'Nòará tí jahará maestro tjàkorá tí ley la ko tí jahará chojni fariseo. Jahará la jnkójínxónhya tjenkayáxinrá. Jahará la t'ikjéherá tí puerta ts'ixenxín chojni tí kjuachaxin kuènte Dios kixin tjtōéhyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

14 'Nòará tí jahará maestro tjàkorá tí ley la ko chojni fariseo. Jnkojínxónhya tjenkayáxinrá. Jahará takitsjeherá ntøe tí chojni tsíkók'án la ntá isé nixjehérá Dios kixin ch'iyéxinrá chojni kixin jína tí jahará. A ntá xíkaha kjuich'erá jahará la antsí tsjasótiará.

15 'Nòará tí jahará maestro tjàkorá tí ley la ko chojni fariseo. Jahará la jnkojínxónhya tjenkayáxinrá. Jahará sátjirá nonte la chrítaón ntayaon kixin tsjákohérá ijnko chojni tsinkáchónki xíkaha tí tinkachónkirá la ntá tió kjuachará kjuachroerá sín la ntá jehe sín antsí má tsjasótéxin sín tí xrohi la kánhyó jahará.

16 'Nòará tí jahará kixin tétøanrá kjánchó ntakótánrá. Ntáchrórá kixin tí jnkojín chojni tsontáchró kixin sinchexiteyá sín nkehe la t'ákjenxin sín tí nínko la ntá t'ichjánxinhya sinchexiteyá sín. A ntá tí tsontáchró sín kixin sinchexiteyá sín nkehe la t'ákjenxin sín tí chica oro siín nkaxenhen nínko la ntá t'ichjánxin sinchexiteyá sín.

17 Imá lontírá la ko ntakótánrá. ¿Á imá tjetoan tí chica oro ó á imá tjetoan tí nínko kixin tí nínko mé kótjuáxin tí chica oro?

18 Kjaxin ntáchrórá kixin: "Tí jnkojín chojni tsontáchró sín kixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. A ntá tí tsontáchró sín kixin sinchexiteyá sín nkehe la t'ákjenxin sín tí nkehe tjokehe sín Dios chrítaón tí altar la ntá t'ichjánxin sinchexiteyá sín tí nkehe tsintáchró sín."

19 Imá lontírá la ko ntakótánrá. ¿Á imá tjetoan tí nkehe tsochjehérá Dios ó á imá tjetoan tí altar kixin tí altar mé tótjuáxin tí nkehe tsjánjonrá?

20 Kixin tí nkexro tsontáchró kixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhi. Kjaxin t'ákjenxin ch'án kaín tí nkehe siín chrítaón ntiha.

21 A ntá tí nkexro tsontáchró kixin sinchexiteyá ch'án nkehe la t'ákjenxin tí nínko la jehya t'ákjenxin ch'án nínko ó. Náhi. Kjaxin t'ákjenxin ch'án tí Dios itjen ntiha.

22 A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuente Dios la ko tí nkexro tjet'etøan ntiha.

23 'Nòará jahará maestro tjàkorá ley la ko jahará chojni fariseo. Jahará jnkojínxónhya tjenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá tjetoan kuente tí ley. Mé ntoá chrókjuenkayáxinrá la ko chrókuikonóehérá kichuárá la ko chrókuinkachónkirá Dios. Tíhi la antsí tjetoan chrókuinchexiteyará la kjaxin chrókuítóéhyará chrokjuich'erá tí í so nkehe.

24 Jahará la tétóanrá kjánchó ntakótánrá. Jahará la nchek'ankihirá kjónté ijnko kochjisen intsi chóna tí nkehe its'irá, a ntá ijnko kocamello kjónté ijíé va la t'ínkará.

25 'Nòará tí jahará maestro tjàkorá ley la ko jahará fariseorá. Jahará la jnkójínxónhya tjenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsíkaón kjuachee la ko jahórá tjinkáonrá chróchontará itsjé nkehe.

26 Jahará chojni fariseorá imá ntakótán jahará. Saóxín chrókjuínchetjóará tí nkehe nkaxenhen tí vaso la ko tí plato la ntá ó chrókótjóá tí chrítaón kjaxin.

27 'Nòará jahará maestro tjàkorá tí ley la ko chojni fariseorá. Jnkójínxónhya tjenkayáxinrá. Jahará la éxí yóhe ijnko tòye tsíxravá chojni, imá náxrjón tsjehe ntója, a ntá nkaxenhen mé tsíkaón huésoé chojni tsík'en la ko kaín nkehe tjuáhya.

28 Mé xíkaha tí jahará la tsjehe éxí chojni jína xíkaha, a ntá jnkójínxónhya tjenkayáxinrá la ko jínahyará.

29 'Nòará tí jahará maestro tjàkorá ley la ko chojni fariseorá. Jahará la jnkójínxónhya tjenkayáxinrá. Jahará la kjuich'énará tjat'o náxrjón chrítaón tí tòye tsíxravá tí sín k'uekjako itén Dios ósé la ko nchek'ítsará tjat'o chrítaón tòye kuente tí sín jína asén.

30 La ntá ntáchrórá kixin tí chrók'uejorá tí k'uejó tí sín tsík'axrjeníxinrá la ntá chrókjuínkítsahyará chrók'uén tí sín kjuako itén Dios.

31 Méxra xíkaha jahórá ntáchrórá kixin chaxín tsík'axrjeníxinrá tí sín k'oyán tí sín k'uekjako itén Dios.

32 Méxra ijie la tjinkáonrá tsjixinhanrá tí xra kjuich'e tí sín tsík'axrjeníxinrá.

33 'Jahará la tsík'axrjeníxinrá konche. ¿Ntá nkexrí chrókuaará kixin itsi tí tsjasótiará?

34 Méxra janhan mé tsétuanhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen njnko la ko tsochonkíhírá sín chjasin la chjasin.

35 Méxra jahará la yamará tí jie kixin tí sín jína k'uitjixin ijníé senó. Méxra tsamará tí jie kixin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, xjeen Berequías, tí nkexro k'oyánxinrá chjino tí altar.

36 Chaxín tjonkará kixin kaín tí jie a mé yámá tí chojni siín ijie.

Tsjánka ch'ín Jesús
(Lc. 13.34-35)

37 Ntá ntáchró ch'ín Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui

chrókjuinkitsará. Nchónhya veces tjínkavan chrókójnkotsérá la chrók'uáyakonhánrá éxí ijnko cochiká mé t'ayakonhen xjeen va chrínkí kanenee va mé xíkaha tjínkavan chrók'uáyakonhánrá tí jahará. Kjánchó jahará la tjínkákonhyará xíkaha.

³⁸ Ntá jie la Dios la tsítóhe tí jahará.

³⁹ Ntáxrjan kixin í ts'ikonhyará tí janhan ínaá tsjixrakájia tí yaon tsontáchrórá kixin: “Imá jína tí nkexro kuixín kjuachaxién ihnié Ìnchéni” —mé xíkaha ichro ch'ín Jesús.

24

Chrónka ch'ín Jesús kixin ts'itjáyan tí nínko
(Mr. 13.1-2; Lc. 21.5-6)

¹ Ntá ch'ín Jesús k'uaxrjexín ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxín ch'án chrótsjehe ch'án kixin náxrjón tsík'óna tí nínko a.

² A ntá ch'ín Jesús mé kjuátehe ch'án kixin:

—Jahará ¿á tjejotsjehérá kaín tíha? Chaxín tjonkará kixin tsjixraká tí yaon ts'oya kuenté nínko. Nijnko xrō ts'ejókjenhya kichó kixin kaín tíha la tsoxíka —ichro ch'án.

Tí nkehe tsonhen tió tsjixixín
(Mr. 13.3-23; Lc. 21.7-24; 17.22-24)

³ Ntá sákjuí sín chrítaón tí jna Olivo la ch'ín Jesús kjuák'etjaxín ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsōchroñka nkesá tsonhen tíha. ¿Nkexrí tsonoexínni tió ts'inka tí jaha la ko nkexrí tsonoexínni tí itsi tí tsjixixín chjasintajni? —ichro sín.

⁴ Kjuátehe ch'ín Jesús kixin:

—Tóxakonhanrá titoéhyará kixin ninkexró chrókjuít'áyahará.

⁵ Nchónhya chojni itsi sich'iyaxín njina tsontáchró kixin: “Janhan mé tí Cristo” tsixro sín, la sich'iehe sín nchónhya chojni.

⁶ A ntá tió tsinhínrá tsontáchró chojni kixin ó siín kjuanínkaon la ko ts'ixin kjuachrakon kixin tsjanjonko kichó sín la kjónté xíkaha tsonhen la chrakonhyará. Ó jehí tsonhen tíha tí naxa ts'itjáyanhya chjasintajni.

⁷ Ijnko nación tsjanjonko í jnko nación la tsjanjonxin sín tí xrā ts'etōan sín. La ko itsjé chjasin na tsōkjinta la ko tsoníhi chojni la ko ntihi la ntaha tsinkí nonte.

⁸ Kaín tíha la ntá tsoxrankíxixón tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjejó tí síxreé kixin sinchekjasótiará sín la ntá ts'óyánrá sín. La ko kaín xín chojni

síin chjasintajni tsonínkakonhanrá sín kíxin tinkachónkirá tí janhan.

¹⁰ Ntá tí yaon a la itsjé sín la tsítóhe sín tsinkáchónkihya sín tí janhan la ko tsonínkakonhen sín kíchó sín la ko sinchekji kíchó sín.

¹¹ Ntá itsi nchónhya chojni ntoáhya tsjako la ntá sich'iyehé sín nchónhya chojni.

¹² La ts'ixin nchónhya jie jínahya la ntá ts'ixin itsjé chojni tsotjuèhya sín kíchó sín.

¹³ A ntá tí nkexro naxa tjejó tinkáchónki tí janhan hasta tí tsjixixín la mé tsaá.

¹⁴ La ko tí itán jína chrónka nkexrí tjen tí kjuachaxin kuènte Dios la t'ichjánxin tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'ítjáyán chjasintajni.

¹⁵ 'Ch'ín Daniel k'uéchrónka itén Dios mé tsíkjin ch'án kíxin tsjixraká ijnko yaon tsjak'e ijnko nkehe jínahya nkaxenhen njnko tjóá.* Ntá jahará ts'ikonrá tíha. A ntá tí nkexro nchekuáxin mé tsienxín nkehe tíha.

¹⁶ Ntá kaín tí sín tjejó estado Judea tsochrìn sín jna sátsji sín.

¹⁷ A ntá tí sín tjejó chrítaón nchia ntóé sín la í xitjahya tsakitsje sín ninkehó.

¹⁸ Ntá tí tjejóch'e sín xra nontee sín la kjá í tsokjanhya sín tsjikakja sín iké sín.

¹⁹ Ntá nòà tí chojni chjin tjejóyá sín la ko nòà tí sín nchekakí xjan tí yaon a.

²⁰ Chrókjuanchehérá Dios kíxin tí tsonhen tíha la chrókó Jehya nchakuen kin la ko chrókó Jehya tí yaon t'ok'éhe chojni.

²¹ Kíxin tíha mé ijnko kjuachrakon imá ijié la desde tí xrankíxixín chjasintajni la nunca xikahya kónhen.

²² Ntá tí chrók'uetqanhya Dios kíxin tjoka ts'atsínka tíha ntá chrókuaáhya ninkexró. Ntá ts'etqan ch'án kíxin tjoka ts'atsínka tí kjuachrakon jie kíxin jehe ch'án mé imá tjuèhe ch'án tí sín tsíkjejá ch'án.

²³ Ntá tí tsontáchro chojni kíxin: “Tsjehé ntihi itjen Cristo”, o “Tsjehé ntiha itjen ch'án”, la ntá chrókuítekákueñhyará sín.

²⁴ Kíxin ntá itsi iso sín tsontáchro sín kíxin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jie kíxin tjinkaon sín chrókjuich'iyehé sín chojni kjónté tí sín tsíkjejá Dios.

²⁵ Ó xrjanka senó nkehe tsonhen kíxin tsonohará.

²⁶ Méxra tí chróntáchro sín kíxin: “Tsjehérá tí nteje ntiha tjen ch'án”, la ntá tsjihyará nó ntiha. O tí chróntáchro sín kíxin: “Tsjehérá ntihi tí cuarto mé tjen ch'án”, la chrókuítekákonyará.

* 24:15 Daniel 9.27

27 Méxra éxí tsjonkíxín la t'ikon chojni t'inkaséyanxín tí tjitoxín yaon hasta tsjiatóxin yaon mé xíkaha ts'ikon chojni tíó itsi tí Xjeen Dios K'óna Chojni.

28 Mé éxí yóhē tí tjen ijnko cuerpo tsík'en la ntiha tsojnkotsé tí kontexjuen.

Tsokjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

29 'A ntá séhyó tí tsjixixín tí kjuachrakon jié la ntá tí yaon la tsotie a ntá tí nitjó la í ts'inkaséyanxínha. La ko tí konotsé la tsoxénjinxín nkajní la kjaxin kaín nkehe siín nkaya nkajní la tsínki.

30 La ntá ts'ikon chojni kíxin nkajní tsixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'ikon sín kíxin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsikao tí kjuachaxin jié.

31 Ntá tsochr'án Dios tí sín ángel kíxin ts'ánoa sín tí trompeta itsen kíxin tsochjina kaín tí nkexro kjueyá Dios tsjixín kanoe lado chjasintajni.

32 'Chrók'uitjará nkexrí sintayóaxian kuente ijnko nta to higo. Éxí yóhē tíó chóna ntahntē la ko ts'ixin kayoa la nta tsonoaxínra kíxin í séhya tsokjan ichrin.

33 Mé xíkaha tí ts'ikonrá ts'atsínka kaín tíha la ntá xíkaha tsonoaxínra kíxin í séhya itsi Ìnehéni.

34 Ntá tjonkará chaxín kíxin kaín tíha senó tsonhen tí naxa ts'enhya tí chojni siín jie.

35 A ntá tí nkajní la ko tí chjasintajni mé ts'itjáyán. A ntá tí nkehe ntáxrjan la nunca ts'itjáyánha tsoxiteyá tíha.

36 Á ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajní noehya sín la ko ni tí Xjeen Dios noehya. Ó jehó tí It'é mé nohe.

37 'Éxí yóhē tí nkehe kónhen tí yaon k'uékjak'e ch'ín Noé mé xíkaha tsonhen tí tsokjan tí Xjeen Dios K'óna Chojni.

38 Tí naxa titjiéhya sín ntá la kaín chojni la jína k'uéjé sín la kjóne sín la ko ik'uí sín la ko sítótehe sín kjuixrakájia tí yaon k'uixenhen ch'ín Noé ntabarco.†

39 A ntá jehe sín mé kienxínha sín hasta kuijia tí k'uániá chrin ntá ikui ntá la k'uatjóá kaín sín. Mé xíkaha tsonhen tíó itsi tí Xjeen Dios K'óna Chojni.

40 A ntá yaá chojni ntoa tjejóch'e sín xra nonte la ntá ijnko la sátsji la í jnko la tsitohē.

41 La ko yaá chojni chjin mé tjejót'o sín la ijnko la sátsji la í jnko la tsitohē.

† 24:38 Génesis 6.5-8

42 'Chrók'uejotsjehérá kixin noahyará nkehora la ko nkesá ts'inka janhan.

43 Chrókónohará tíhi: tí chrókónohe ijnko ìnché nchia nkehora tie chrókjui ijnko nkexro tseé la ntá chrókjuak'echónhen tí ìnché tí nchia ntá xitjahya ts'ixenhen tí nkexro tjinkaon chrókueé.

44 Méxra jahará la jína chrók'uejorá kixin tí Xjeen Dios K'óna Chojni me titàya itsi.

*Tí nkexro jina ch'e xra la tí nkexro ch'ehya xra jina
(Lc. 12.41-48)*

45 "Tí nkexro chaxín ch'e xra jína la ko imá nohe la ntá tí lámoe ch'án ts'etuénhen kixin ts'ayakonhen ch'án tí sín siín ntøe ch'án la ko tsjanjon ch'án nkehe sine sín chintjii tí hora a.

46 Náxrjón tjen tí nkexro ch'e xra tió itsi tí lamo la ts'ikon kixin xikaha tjenchexiteyá ch'án tí xra k'uítuenhen ch'án.

47 Chaxín tí lamo la tsjanjon ch'án kaín tí xra chóna ch'án ts'etoan tí ch'ín a.

48 A ntá ijnko chojni ch'ehya xra jína la ntá tsjenkayáxin ch'án kixin kjá tjokahya tsokjan tí lámoe ch'án

49 la ntá tsjankíxin ch'án tsjanjonko ch'án tí í so sín ch'e xra la ko tsjankíxin sineko ch'án la ko its'ikao ch'án kaín tí sín sitókoan.

50 Ntá xrinahya tsokjan ti lamo ijnko yaon la ko ijnko hora noehya tí nkexro ch'e xra.

51 La ntá jehe ch'án la sinchekjasóte tí ch'ín kuitøehehe xra kjuínchexiteyáhya la ts'etoan ch'án kixin tsjasóte tí ch'ín a éxi tí sín jnkojínxónhya tjenkayáxin. Ntá ntiha la tsotsjánka ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

¹ Ntáchro ch'ín Jesús kixin:

—Tí kjuachaxin kuente Dios mé éxi yóhe ite sín tjarisoá sátsji tí tsøtehe chojni chuénko linterna tjia aceite la sákjuíchónhen sín tí ch'ín tsikótehe.

² In'ó sín la tsíkóyaxíenhya sín la in'ó sín ó tsíkóyaxínhin sín.

³ Tí sín tsíkóyaxíenhya na kjaxin la tsíkjjiko sin linterna kjánchó tsíkjjikohya sín aceite tsíkja inaá.

⁴ A ntá tí sín tsíkóyaxínhin la sátsíkjiko sín xro tjia aceite la ko tí linterna kuente sín.

⁵ A ntá tí ch'ín tsíkótehe la tjokahya kui ch'án la ntá jehe sín mé tsikihi sín kotáchrín la tsík'ejóua sín kaín sín.

⁶ A ntá kuichjina k'áxrótjen la kuínhin sín t'èya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án.

⁷ A ntá kaín tí sín tjarisoá la k'uàya sín la kjuasiyóxin sín tí linterna kuènte sín.

⁸ A ntá tí in'ó sín tsíkóyaxíenhya la nixjehe sín tí sín in'ó tsíkóyaxínhin ntáchro sín kíxin: “Chjehéni intsí aceite kuèntará kíxin ó k'uànká aceite tjiá linternéni”, ichro sín.

⁹ A ntá tí sín tsíkóyaxínhin mé ntáchro sín kíxin: “Náhi, tí aceite tí xíkaha tsjanjonni intsí jahará la antsí jeheni la tsjachahya. Íchá jína sátjik'ènará tí sítoxín ntiha”, ichro sín.

¹⁰ Ntá tí in'ó tí sín kóyaxíenhya mé sákjuík'èna sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuíko sín ch'án tí kia tsíkótehe sín la ntá ó tuénxín k'uikjéhe tí puerta.

¹¹ Ntá chr'éxin ikui tí in'ó sín tjarisoá tsíkóyaxíenhya la t'ínka sín puerta ntáchro sín kíxin: “Ó kuini takitjehé nchia.”

¹² A nta jehe ch'an kjuátehe ch'án ntáchro ch'án kíxin: “Chaxín tí jahará la ní chonhyará”, ichro ch'an.

¹³ Ntá ntáchro ch'ín Jesús ínaá kíxin:

—Méxra xíkaha tí jahará chrók'uejótjehérá kíxin noahyará nkeyaon la nkehora itsi ti Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuènte chichaon

¹⁴ Ntá ntáchro ch'ín Jesús kíxin:

—Tí kjuachaxin kuènte Dios la yóhe ijnko chojni tjinkaon sáchrókjui ch'án í jnko nación la ntá k'uíyehé ch'án tí sín ch'ehe ch'án xra la ntá chjéhe ch'án sín tí chichaon a kíxin ts'ayakonhen sín.

¹⁵ Ijnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjón chichaon la mé kónohe ch'án nkexro tí tsjacha sich'e jnkojnko xra. Ntá jehe ch'án tió kjuixin kjuanjón ch'án la ntá sakjuí ch'án ikjín.

¹⁶ Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil.

¹⁷ Kjaxin tí nkexro k'uáyéhe iyó mil chichaon mé xíkjacha ch'án í jnko iyó mil.

¹⁸ A ntá tí nkexro k'uáyéhe ijnko mil chichaon mé sákjuí ch'án la kjuích'èna ch'án ijnko tòye kjuavá ch'án tí chichaon kuènte lámóé ch'án.

¹⁹ A ntá nchónhya nánó k'uátsínka la ntá ikjan tí lámóé sín kíxin ntá tsjentoáko sín ch'án cuenta.

²⁰ Saóxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáchro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án.

21 Ntá tí lamo mé ntáchro kíxin: “Nchoxon tí xíkaha. Jaha la ijnko chojni jína ch'e xra. La ó kjuinchexiteyá jína. Kjónté jehya xra jíé la kjuinchexiteyá jína la ntá tsotjaha ijnko xra antsí jíé la tjak'e tsochéheni.”

22 Ntá chr'éxin ikui tí nkexro k'uáyéhe iyó mil la ntáchro ch'án kíxin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án.

23 La ntá tí lamo ntáchro kíxin: “Nchoxon jaha mé ijnko nkexro jína ch'e xra la ó kjuinchexiteyá. Kjónté jehya xra jíé la kjuinchexiteyá jína la ntá tsotjaha í jnko xra antsí jíé. Tjak'e tsochéheni”, ichro ch'án.

24 A ntá ikui tí ch'ín k'uáyéhe ijnko mil la ntáchro ch'án kíxin: “Ó nóna kíxin ijnko chojni imá jiehe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya.

25 Méxra chrakonni la sákjuíkjak'emáni tí chichaon chrínkí nche. Tákjá chichakōan tjinhin”, ichro ch'án.

26 A ntá kjuátehe tí lamo kíxin: “Jaha ijnko chojni jínahya la ko séhe. Jaha la ó noha kíxin chrótjaa tí nonte k'uénkahya la chrókuákjaá tí nkehe k'uénkahya.

27 A ntá tí chichaon chróchr'an banco. Ntiha chrókuich'exín xra ntá tí ikjan janhan ntá chrók'uayáha antsí itsjé chichaon chrókuacha kichó chica”, ichro tí lamo.

28 A ntá nixjehe ch'án tí í so sín tjejó la ntáchro ch'án kíxin: “Takitsjehérá tí mil chóna ch'án la chjehérá tí nkexro chóna tí ite mil chichaon

29 kíxin tí nkexro kjónté itsjé chóna la mé ts'áyéhe antsí la ntá tí nkexro chóntahya la kjónté tí intsí chóna la ts'axrjehe.

30 A ntá tí nkexro ch'ehya xra la tsétuēnhén sátsji ch'án tí sítié ntója la ntá ntiha la tsotsjánka ch'án la ko sinetaón ch'án neno ch'án.”

Tsitōexín ijíé chojni chjasintajni

31 'A ntá tí tsi tí Xjeen Dios K'óna Chojni la tsíkao ch'án kjuachaxién jíé éxí ijnko Réy la ko tsíkao ch'án kaín xín tí sín ángel ntá ntaha tsjak'etjaxin ch'án tí trono ts'etōanxín tí kjuachaxién jíé.

32 Ntiha kaín xín tí chojni tsíkjin nkuixín nación tsochjina tí tjen ch'án la jehe ch'án tsakitsjekjan ch'án ijnko la í jnko. Éxí ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí kotèntso la ókjé ts'ixin.

33 Méxra ts'etōan ch'án kíxin tí kolélo la ts'ixin nó tja ch'án chjina, a ntá tí kotèntso la nó ti tja ch'án kjon.

34 Ntá tí Rey tsonixjehe tí sín tjejó tja ch'án chjina tsonáchro kíxin: “Xrákirá jahará tí tjen kjuachaxin kuente T'aná kíxin T'aná ó kjuíncheyaonrá ch'án. Tí naxa kjuích'énahya Dios chjasintajni la xráxín kjuenkayáxin ch'án xíkaha tsonhen.

³⁵ Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uia, la k'uájia éxí ijnko chojni kjuixín ikjín la jahará kjuánjonrá nketí k'ok'àna.

³⁶ La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjeherá ti janhan, la kjuak'échjina la ntá jahará kjuasántsjeherá tí janhan.”

³⁷ A ntá tí sín jína la tsjanchankí sín kixin: “Ìnchéni, ¿nkesá k'uíkoni kixin ik'uén kjinta ntá kjuanjonni nkehe kjónte? ¿La nkesá k'uíkoni kixin ik'uén ntá la kjuanjonni nkehe ik'uia?

³⁸ ¿La ko nkesá k'uíkoni kixin ikjín kjuixian ntá kjuanjonni nketí k'ok'áha? ¿La ko nkesá k'uíkoni kixin chontahya iká la kjuanjonni ika k'uítsa?

³⁹ ¿La nkesá k'uíkoni kixin kóniha o kjuák'echjina la ntá kjujitsjeheni tí jaha?” mé xíkaha tsjanchankíhi sín ch'án.

⁴⁰ A ntá tí Rey tsontácho kixin: “Tió kjuínkĩsará ijnko kichó ni kjónté ijnko chojni nòé la mé yóhe kixin tí janhan chrókjuínkĩsará.”

⁴¹ A ntá tí Rey t'etóan mé tsonixjehe tí sín tjejó nó tja ch'án kjon tsontácho kixin: “Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuènte ch'án.

⁴² Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uia.

⁴³ K'uájia éxí ijnko nkexro kjuixín kjín la jahará kjuánjonhyará nketí k'ók'àna la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántsjehyará tí janhan.”

⁴⁴ Ntá tí jehe sín la tsjanchankí sín kixin: “Ìnchéni, ¿nkesá k'uíkoni kixin ik'uén kjinta la ik'uén ntá la ko kjuixian kjín la ko chontahya iká la ko níha la ko kjuák'echjina? ¿Mé nkesá k'uíkoni xíkaha la ntá kjuínkĩsahyani ti jaha?” tsixro sín.

⁴⁵ La ntá tí Rey tsjatehe ch'án tsontácho ch'án kixin: “Tí xíkaha kaín tíha kjuínkĩsahyará ijnko chojni imá nòé la éxí xíkaha kjuínkĩsahyará tí janhan.”

⁴⁶ A ntá tí sín jínahya xíkaha kjuích'e la mé sátsjixin sín ntihi tsjasóte sín jnkochrín. A ntá tí sín jína la sátsji sín ts'áyéhe sín kjuachón jnkochrín —mé xíkaha chrónka ch'ín Jesús.

26

Tí sín nínkakonhen ch'ín Jesús tjenkayáxin sín kixin nkexrí ts'óyán sín ch'án

(Mr. 14.1-2; Lc. 22.1-2; Jn. 11.45-53)

¹ Ntá kjuixin chrónka ch'ín Jesús kaín tíha, ntá nixjehe ch'án tí sín k'uájiko ch'án, ntácho ch'án kixin:

² —Jahará ó nohará kixin t'itjáyan iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etoan ntá tsjak'enkani sín ch'án ijnko ntacruz —ichro ch'ín Jesús.

³ Ntá tí sín nchat'á t'etoan la ko tí sín maestro tjako tí ley la ko tí sín táda kuènte tí sín judío mé kójnkotsé sín tí ntasin kuènte tí nchia kjuák'e ch'ín Caifás tí ch'ín nchat'á t'etoan.

⁴ Ntaha tjenkayáxin sín kixin nkexrí tsotsé sín ch'ín Jesús la ts'óyán sín ch'án.

⁵ A ntá ntáchro sín kixin:

—Tí siín kia la chrótséhyani ch'án kixin imá tsonínkaon tí chojni —ichro sín.

*Ijnko tjan kjuikao aceite xraxé kuikite tjan ikja ch'ín Jesús
(Mr. 14.3-9; Jn. 12.1-8)*

⁶ Ch'ín Jesús tjen chjasin Betania ntøe ch'ín Simón tí ch'ín k'uéchónta chinlepra.

⁷ Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuíkaón aceite xraxé náxrjón la imá tjete k'uíte. A ntá tí tjene ch'ín Jesús ntá tí tjan a mé kuikite aceite ikja ch'án.

⁸ A ntá tí sín k'uájiko ch'ín Jesús mé k'uíkon sín xíkaha ntá kónínkaon sín la ntáchro sín kixin:

—¿Nkekuènté kóxénhen tí xroan a?

⁹ Íchá jína chrókóxixin itsjé chichaon tí xroan ntá tí chichaon a chrókjuinkitsa tí sín nòe a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntáchro ch'án kixin:

—¿Nkekuènté t'antaxínhínrá tí tjan i? Ó nchoxon ijnko nkehe jína kjuích'e tjan.

¹¹ Tí sín nòe la ó xráxín ts'ejókoará sín, a ntá janhan la jnkochrínhaya ts'ejóni.

¹² Tí nkehe kjuích'e tjan mé kjuíncheka tjan aceite xraxé tí cuerpo kuèntana la mé xíkaha kjuakoxin tjan kixin xíkaha tsoxravána.

¹³ Ntá chaxín tjonkará kixin kuenté chjasintajni tió tsjako sín tí tán jína tsaáxin sín ntá tsochrónka sín kixin xíkaha kjuích'e tjan ntá tsoxraxinkakonxín sín kixin nkehe tí kjuích'e tjan —ichro ch'ín Jesús.

*Ch'ín Judas kjuínchekji tí ch'ín Jesús
(Mr. 14.10-11; Lc. 22.3-6)*

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehe ch'án tí sín nchat'á t'etoan

¹⁵ la ntáchro ch'án kixin:

—¿Nkekjaín tsochjinará tsoxrjanka nketí tjen tí ch'ín Jesús? —mé xíkaha chro tí ch'ín Judas.

Ntá tí sín nchaṭ'á t'etoan kjuenkehe sín ch'án treinta chichaon plata.

¹⁶ Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

Kjuixixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankíxixín kia sine sín niotja tsíkjikohya tí xroan t'ánkíxin niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kíxin:

—¿Inchéni, nketí tjinkávan sincheyaxíxinni tí sineni tí kia pascua? —ichro sín.

¹⁸ Ntá ntáchro ch'án kíxin:

—Sátsjirá Jerusalén la tsjasánrá ntoe ijnko ch'ín la nixjehérá ch'án tsontáchorá kíxin: “Ntáchro Maestro kuènténi kíxin í séhya naxa tsjak'e ch'án la ntá ijie ntoa ntihi tsoyaxíxin kíxin sineko ch'án tí sín xriko ch'án tí kia pascua”, tsixrorá —mé xíkaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxíxin sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uéjoko tí teyó sín k'uájiko ch'án kjóne sín.

²¹ La ntá tió naxa tjejóne sín la ntáchro ch'ín Jesús kíxin:

—Chaxín tjonkará kíxin jnkojínrá tjejorá ntihi mé sinchekjirána —ichro ch'án.

²² Ntá kaín sín la kjuankíxin kóxakonhen sín k'uává sín la ntá kjuankíxin sín jnkojnko sín kjuanchankíhi sín tí ch'ín Jesús kíxin:

—Inchéni, ¿á jeheni ní? —ichro sín.

²³ Ntá kjuátehe ch'ín Jesús kíxin:

—Tí nkexro tsochr'ánkíkian niotja tí plato a mé tí nkexro a mé sinchekjina ch'án.

²⁴ Tí Xjeen Dios K'óna Chojni xíkaha tsjasóte ch'án éxí nixja xroon itén Dios, a ntá nòa tí ch'ín sinchekji ch'án. Íchá jina chrókokjéhya ch'án —mé xíkaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kíxin:

—Maestro, ¿á janhan? —ichro ch'án.

Ntá ntáchro ch'ín Jesús kíxin:

—Méxra xíkaha tsíntáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'o ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kíxin:

—Sinterá tíhi mé cuerpo kuèntana —ichro ch'án.

27 Na ntá kuákja ch'án ijnko vaso tjiá ìnté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá

28 kixin tíhi mé jnina mé chrónkaxín ijnko nkehe nixin tsonhen. Mé tí jnina ts'ítji na mé tsjacha tsjinkitsa nchónhya chojni kixin ts'íjmáxin ijíé sín.

29 Tjonkará kixin ts'íhya janhan tí ìnté to uva inaá tsjixrakájia tí yaon ts'ayàjia kjuachaxin kuente T'aná ntá xík'ini ìnté to uva inaá —mé xíkaha ichro ch'ín Jesús.

Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús

(Mr. 14.26-31; Lc. 22.31-34; Jn. 13.36-38)

30 Ntá itsje sín ijnko himno ntá kjuixin ntá sákjuí sín tí jna Olivo.

31 Ntá ntáchro ch'ín Jesús kixin:

—Jahará tsítōnaráni kaín rá ijie tie kixin ntáchro tí xroon itén Dios kixin: “Its'en tí nkexro Pastor t'ayakonhen kolélo ntá kaín tí ko mé tsjichroe va.”*

32 Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

33 Ntá kjuátehe ch'ín Pedro ntáchro ch'án kixin:

—Kjóté kaín sín tsítōha sín ntá janhan la náhi —ichro ch'án.

34 Ntá ntáchro ch'ín Jesús kixin:

—Chaxín tsoxrjanka kixin tí tie i naxa tsotsjehya kochíntōa la ó sinchemána níya —ichro ch'án.

35 Ntá ntáchro ch'ín Pedro kixin:

—Kjóté koína its'én la sintamáhya tí jaha —ichro ch'án.

La ntá kaín tí sín k'uájiko ch'án na xíkaha ichro sín kaín sín.

Ch'ín Jesús chrónóhe ch'án It'é ch'án tí tjen ch'án tí Huerto Getsemaní

(Mr. 14.32-42; Lc. 22.39-46)

36 Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemaní. Ntá jehe ch'án mé ntáchro ch'án kixin:

—Tjejorá ntiho ntá janhan sátsjia tsonixjahā T'aná —ichro ch'án.

37 Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankixin kóxakonhen ch'án la ko k'uává ch'án.

38 Ntá ntáche ch'án tí iy'á sín kixin:

—Imá t'ává asenná éxí its'én ntá ts'axrje asenná. Ntá jahará ntiho tsitōhará ts'ejotsjehekoárana —ichro ch'án.

* 26:31 Zacarías 13.7

39 Ntá sákjuí ch'án antsí kjínxin ntá kjuák'exín toch'in ch'án k'uísén ch'án hasta caxin kja ch'án nonte ntá chrónóehē ch'án It'é ch'án tjen nkaya nkajní, ntáchro ch'án kixin:

—It'éni, tí tjinkávan chrókjuinchekaáni kixin chrók'uuihyani tí nkehe tsjá tjiá tí copa i. Kjánchó jehya éxí tjinkaonni jeheni. Náhi. Éxí tjinkávan jaha —ichro ch'án.

40 Ntá ikjan ch'án tí kuítóhe sín la ó k'uíkon ch'án kixin tjejójua sín. Ntá nixjehē ch'án tí ch'ín Pedro ntáchro ch'án kixin:

—Xá xitjahya chrók'uejótsehekoarána ijnko hora.

41 Titohará tjejotsjehérá la nixjehérá Dios kixin tsjinkitsará ch'án kixin chrókjuachroehyará ch'ín Tsochren. Asánrá tóxrjínhin kjánchó tí cuerpo chontará la imá ntá —mé xikaha ichro ch'ín Jesús.

42 Ntá sákjuí ch'án yóxin ínaá chrónóehē ch'án It'é ch'án, ntáchro ch'án kixin:

—Jaha It'éni tí xitjahya tsjakjíyan tí nkehe tsjasótexínni la ntá tjinkaonni éxí jaha tjinkávan —mé xikaha ichro ch'án.

43 Ntá ikjan ch'án la k'uíkon ch'án tjejójua tí sín k'uájiko ch'án ínaá kixin tjiehya sín kotáchrin.

44 Ntá kuítóhe ch'án sín ínaá la níxin sáxíkji ch'án ntá ó xikahó xínixja ch'án ínaá.

45 Ntá kjan ch'án tí k'uéjó sín la ntáchro ch'án kixin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án.

46 Ntá ijie t'inkatjenrá sátsjini kixin ó kjui tí ch'ín sinchekjina —ichro ch'án.

Sákjuíko sín tí ch'ín Jesús tsjak'echjina ch'án ntqechiso
(Mr. 14.43-50; Lc. 22.47-53; Jn. 18.2-11)

47 Ntá naxa tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuikao ch'án nchónhya chojni kjuíjiko sín chica espada la ko inta. Na mé kjuachaxién tí sín nchat'á t'etoan la ko tí sín táda kuente tí sín judío mé kui sín.

48 Ntá ch'ín Judas, tí ch'ín kjuínchekji, mé tsíntáchro ch'án kixin:

—Tí ch'ín tsakjija tjeen ch'án na mé tsonoaxínrá kixin jehe ch'án. Ntá itserá ch'án —mé xikaha tsíntáchro ch'ín Judas.

49 Ntá kóchjinehe ch'án tí ch'ín Jesús la nixjehē ch'án ntáchro ch'án kixin:

—¿Á jína tjen, Maestro? —ichro ch'án.

Ntá kjóneko ch'án kochíto.

50 Ntá kjuátehe ch'ín Jesús, ntáchro ch'án kixin:

—Amigo, á ó k'uinka tí xra tjinkávan s'ich'e?

Ntá xikaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án tatsjon ijnko tí sín ch'ehe tí nchat'á t'et̄oan xra.

⁵² Ntá ntáchro ch'ín Jesús kixin:

—Chr'axenhén tjoë chica espada méhe. Kaínxín tí sín tjà yaxin chica espada la xikaha ts'enxín sín.

⁵³ ¿Á noahyará kixin janhan jina chrókjuáncháha T'aná la ntá tuénxín chróchr'án ch'án teyó ejército sín ángel?

⁵⁴ Kjánchó tí xikaha chrókónhen la chróxiteyáhya éxí nixja xroon itén Dios kixin itén Dios mé chrónka kixin t'ichjánxin ó jehí xikaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsots'erána éxí chróts'erá ijnko síchee xikaha. A ntá kaín yaon kjuak'é nkaxenhen ninko kjuàkua ¿na ntá nkexrí ntiha mé tsexinhyarána?

⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíkjín xroon itén Dios ósé —ichro ch'án.

Mé xikaha ntá kaín tí sín k'uájiko ch'ín Jesús na mé kuítóhe sín ch'án, ntá sákjuí sín.

Ch'ín Jesús kóchjina ch'án tí síxreé t'et̄oan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuíko sín ch'án ntōe ch'ín Caifás, tí nchat'á t'et̄oan. Ntaha mé tsíkójnkotsé kaín tí sín maestro tjako tí ley la ko tí sín t'et̄oan kuènte ninko.

⁵⁸ Ntá ch'ín Pedro ikjín tinkáchréhe ch'án ntá kjuíji ch'án tí ntāsin ntōe tí nchat'á t'et̄oan la kjaxin k'uixenhen ch'án tí ntāsin la kjuák'eko ch'án tí sín policía kuènte ninko kixin tsotsjehe ch'án nkerí tsonhen.

⁵⁹ Ntá tí sín nchat'á t'et̄oan la ko tí sín táda la ko kaín tí sín t'et̄oan mé kjueyá sín nkexrí ts'eka sín jje tí ch'ín Jesús kixin jina chrók'óyán sín ch'án.

⁶⁰ Ntá kjónté nchónhya chojni kuikjanchia sín jje kjánchó k'uitjahya sín nkerí jje t'íká ch'án. Ntá kjónté la kóchjina iyó testigo ntoáhya chrónka sín

⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí ninko kuènte Dios la ntá iní yaon koá la ó tsjaké inaá”† —mé xikaha chro sín.

⁶² Ntá tí nchat'á t'et̄oan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté tjáteéhya ninkehó? ¿Á chaxín xikaha tsintáchrúa éxí xikaha ichro sín? —ichro ch'án.

† 26:61 Juan 2.19

63 Ntá ch'ín Jesús la táníkoá ch'án nixjahya ch'án. Ntá ntáchro tí nchat'á t'etōan kixin:

—Kjuachaxiēn ihñié tí Dios tjechón t'akjénxian chonka ntoá, ¿á jaha tí Cristo Xjeen Dios? —kjuanchankí ch'án.

64 Ntá kjuátehe ch'ín Jesús ntáchro ch'án kixin:

—Éxí tí ntáchrúa jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chóna kaín xín kjuachaxin la ko ts'ikuan itjuí mé tsixin ch'án nkaya nkajní —ichro ch'ín Jesús.

65 Ntá kuínhin tí nchat'á t'etōan la ntá imá kónínkaon ch'án ntá kótséchje ch'án tí iké ch'án la ntáchro ch'án kixin:

—Tí ch'ín a k'uántaxínhin ch'án Dios kixin xikaha nixja ch'án. Méxra t'ichjánxinhya í so chojni tsochrónka. La ntá jahará la ó kuinhínra kixin nkexrí nixja ch'án.

66 ¿A ntá jahará la, ¿nkechorá? —mé ichro tí nchat'á a.

Ntá kjuátehe sín ntáchro sín kixin:

—Chóna ch'án jje la chrók'uen ch'án —ichro sín.

67 Ntá iso sín la kuikite sín ntate sín nkayakon ch'án na í so sín na kjuate sín ch'án la í so la chjehe sín ikon ch'án.

68 La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án kixin chónhya ch'án tí ch'ín Jesús (Mr. 14.66-72; Lc. 22.56-62; Jn. 18.15-18, 25-27)

69 Ntá ch'ín Pedro naxa tjetjaxin ch'án tí ntasin la ntá ikui jinjo tjan ch'e xra ntiha kóchjinehe ch'án, la ntáchro tjan kixin:

—Kjaxian xrikoa tí ch'ín Jesús tsíkjiixin estado Galilea —ichro tjan.

70 A ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrúa —ichro ch'án.

71 Ntá sákjuí ch'án kjuíji ch'án chjina tí puerta. La ntá í jnko tjan k'uíkon tí jehe ch'án la nixjehe tjan kaín sín tjejontaxín, la ntáchro tjan kixin:

—Tí ch'ín i la kjaxin k'uájiko ch'án tí ch'ín Jesús tsíkjiixin chjasin Nazaret —ichro tjan.

72 Ntá ch'ín Pedro kjuínchemá ch'án inaá, k'uákjenxin ch'án ihñié Dios, ntáchro ch'án kixin:

—Chonhya tí nkexro a —ichro ch'án.

73 Ntá antsí chr'éxin tí sín k'uejontaxín kóchjinehe sín ch'ín Pedro la ntáchro sín kixin:

—Chaxín jaha kjaxin jnkojín tí sín a kixin tjátsōanxínni tí nixja jaha —ichro sín.

74 Ntá k'uákjenxin ch'án ihñié Dios ntáchro ch'án kixin:

—Chonhya tí nkexro a —ichro ch'án.

Na ntá xrínahya itsje kochínto.

⁷⁵ Ntá ch'ín Pedro mé xraxinkaon ch'án kixin nkexrí chrónka ch'ín Jesús senó kixin: “Naxa tsotsjehya kochínto mé ó tsjixin sinchemána nía kixin chonhyana.”[‡] Ntá xikaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

27

Kjuikénhen sín ch'ín Jesús tí ch'ín Pilato
(Mr. 15.1; Lc. 23.1-2; Jn. 18.28-32)

¹ Ntá tí kóyaon k'uínkaséyan ntá kaín sín nchät'á t'etöan la ko tí sín t'etöan kuènte tí sín judío kjuenkayáxin sín nkexrí ts'óyán sín tí ch'ín Jesús.

² Ntá tjechroneteto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

Ik'uén ch'ín Judas

³ Ntá tí ch'ín Judas, tsíkjinčekji ch'ín Jesús, mé k'uíkon ch'án kixin ts'óyán sín tí ch'ín Jesús. La ntá xraxinkaon ch'án tí jie kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín nchät'á t'etöan la ko tí sín táda.

⁴ La ntá ntáchro ch'án kixin:

—Ó kjuasinni jie kixin kjuínčekjini ijnko nkexro tjóá —ichro ch'án.

A ntá jehe sín kjuátehe sín kixin:

—Ntá janhanna la nonahyana tíha. Tíha la ó jie kuènta —ichro sín.

⁵ Ntá ch'ín Judas mé sákjuík'e tí chichaon nkaxenhen njnko ntá sákjuí ch'án kjuísik'á isin ch'án nta.

⁶ Ntá tí sín nchät'á t'etöan kjuenájín sín tí chichaon la ntáchro sín kixin:

—Tí chichaon la kóxi^xin ijn^jé chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontee Tí Ch'ín Ch'éna Nchésen kixin tsochónta sín nketí tsoxravá tí chojni tsíkji^xin ikjín.

⁸ Mé xikaha kjuínček'in sín tí nonte mé Campo Kuènte Jn^j la hasta ijie la naxa xikaha nček'in sín.

⁹ Mé xikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'ín a),

¹⁰ la k'uénaxín sín tí nonte kuènte tí ch'ín ch'éna nchésen kixin xikaha kjuínčekxiteyá sín tí nkehe k'uetuanna Ìnchéni.”*

Ch'in Jesús kóchjina nkayakon tí gobernador Pilato
(Mr. 15.2-5; Lc. 23.3-5; Jn. 18.33-38)

¹¹ Na ntá ch'in Jesús sákjuíko sín ch'án nkayakon tí ch'in gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'in Jesús, ntáchro ch'án kixin:

—Éxí ntáchrua jaha —ichro ch'án.

¹² Na ntá tí sín nch'at'á t'et'oan la ko tí sín táda t'et'oan t'eka sín jie tí ch'in Jesús kjánchó la ch'in Jesús la ninkehó kjuáteheya.

¹³ A ntá ch'in Pilato kjuanchankí ch'án kixin:

—¿Á kiénhya kaín tí jie t'eka sín tí jaha? —ichro ch'án.

¹⁴ Kjánchó ch'in Jesús la ninkehó kjuáteheya ch'án. Ntá tí ch'in gobernador la chrakon ch'án.

K'uet'oan sín kixin its'en ch'in Jesús
(Mr. 15.6-20; Lc. 23.13-25; Jn. 18.38—19.16)

¹⁵ A ntá tí kié pascua mé kuènenhén tí ch'in gobernador kixin jnkójnko nánó takitsjexín ch'án nt'oechiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji.

¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás.

¹⁷ Ntá itsjé chojni kójnkotsé la ntá ch'in Pilato mé kjuanchankí ch'án kixin:

—¿Nkexro tjínkáonrá ts'atjánta, á tí ch'in Barrabás o á tí ch'in Jesús nchek'in sín Cristo? —ichro ch'án.

¹⁸ Kixin tí ch'in Pilato la ó nohe ch'án kixin kjuachjinoxínhin chóna tí sín kjuíkaán tí ch'in Jesús.

¹⁹ Ntá jehe ch'án naxa tjetjaxin ch'án tí nchekitoexixin ch'án ijíe chojni la ntá tí ichjién ch'án mé k'uetuènenhén tjan ijnko chojni tsjichénka ch'án kixin tsjiatéhya ch'án tí nkexro jína kixin kóntó náxrjónhya k'uíkonxín tjan kotáchrién tjan kixin tí jehe ch'án.

²⁰ A ntá tí sín nch'at'á t'et'oan la ko tí sín táda t'et'oan a mé nixjehe kaín tí chojni tsíkóchjina kixin chrókjuanchia sín kixin chrókuítóhe ch'án tí ch'in Barrabás sáchrókjui, a ntá ch'in Jesús mé chrók'uen.

²¹ A ntá tí ch'in gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjínkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'in Barrabás mé chrók'uatjánta ch'án —ichro sín.

²² A ntá ch'in Pilato mé kjuanchankí ch'án kixin:

—¿A ntá nkehe sít'aha tí ch'in Jesús tí ch'in nchek'inrá Cristo? —ichro ch'án.

Ntá kaín sín kjuátēhe sín kíxin:

—ǝTsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kíxin:

—ǝXá nkehe tí kjuích'e tí ch'ín i kíxin? —ichro ch'án.

Ntá ǝntsí má itsen k'uíxite sín, k'óyako sín, ntáchro sín kíxin:

—ǝTsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kíxin í kohya tsjitóxinhin sín tsjenkayáxin sín la ǝntsí má k'uíxité sín, nínkaon sín, la ntá kjuanchia ch'án xrakao sín ñnta, la nkayakon kaín tí sín tsíkójnkotsé ntaha k'ònti ch'án tja ch'án. La ntáchro ch'án kíxin:

—Janhan tsámáhya jie tí its'en tí nkexro í chóntahya jie. Jahará xíkaha tjinkáonrá tsonhen —ichro ch'án.

²⁵ Ntá kaín sín kjuátēhe sín kíxin:

—Jeheni la ko xjeenni mé yámáni tí jie tí its'en tí nkexro i —ichro sín.

²⁶ Ntá ch'ín Pilato kuítóhe ch'án kíxin sáchrókjui tí ch'ín Barrabás. Ntá tuénxín k'uetōan ch'án kíxin tsjate sín tí ch'ín Jesús la ntá kjuínchek'áyéhe ch'án tí sín tsjak'enkáni sín ch'án ntacruz.

²⁷ A ntá tí sín soldado a mé sákjuíko sín tí ch'ín Jesús tí palacio kuènte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án.

²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié.

²⁹ La kjuak'enkáya sín kja ch'án ijnko corona tsíkjich'éna sín ntach'ǝ la ko kjuanjon sín ijnko nta vara kíxin tjenkáya tja ch'án chjina. La ntá k'uejóxin toch'in sín nkayakon ch'án la kjuanoá sín ch'án, ntáchro sín kíxin:

—Jnkochrixín tsjak'é tsétuēnhén tí sín judío —ichro sín.

³⁰ La ko kǝxin ntaté sín kujkite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án.

³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxín. Ntá sákjuíko sín ch'án kíxin tsjak'enkáni sín ch'án ntacruz.

Kjuák'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuíxin sín ntiha la xéta sín ijnko ch'ín kjuíxin ch'án chjasín Cirene, mé it'in ch'án Simón. Ntá k'uetuēnhen sín ch'án kíxin tsámá ch'án tí ntacruz tsjak'enkáni ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrxjén Nta Hueso Kja Chojni Tsík'en.

³⁴ Ntá chjéhe sín ch'ín Jesús xranvino tsík'ixinkíkjanxín xroǝn tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkáni sín ch'án tí ntacruz ntá tí iké ch'án kjuích'exín sín suerte kíxin nkexro

tsakja. Mé xikaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuích'exín sín tí kaná.”†

³⁶ Ntá tí sín soldado ntaha k'uéjóntha sín t'ayakonhen sín ch'án.

³⁷ Ntá kjuak'enkani sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuñhen tí sín judío.”

³⁸ Kjaxin yaá tí síchee k'uéjónyáni sín ntacruz ijnko la nó tja chjina la í jnko la nó tja kjon.

³⁹ Ntá tí sín tinkák'atsínka mé kjuanoá sín ch'án tinkátjía kja sín

⁴⁰ la ntáchro sín kixin:

—Jaha ntáchrua kixin chrók'oxíka tí nínko a ntá iní koá yaon la ó chrókjuixin chrókjuích'éna ínaá,‡ ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxíán tí ntacruz méhe —ichro sín.

⁴¹ La ntá kjaxin tí sín nchát'á t'etōan la ko tí sín maestro tjako tí ley la ko tí sín fariseo la ko tí sín k'uetoan kuente nínko kjuanoá sín ch'án, ikjo sín kíchó sín kixin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuente Israel ntá jehó ch'án chrókjuinkajinxín ch'án asén ch'án tí ntacruz kixin ntá kjaxinni chrókuitekaonni tí jehe ch'án.

⁴³ Jehe ch'án tsintáchro ch'án kixin Dios tjinkitsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxínhin sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkixin hasta las tres kónjin mé k'uúxin tie chjasintajni.

⁴⁶ Ntá tí hora a ch'ín Jesús itsen k'uèya ch'án, ntáchro ch'án kixin:

—Elí, Elí, ¿lama sabactani? —mé tíhi t'axrjexín kixin: It'éni, It'éni, ¿nkekuenté kujtohéni?§ —mé xikaha ichro ch'án.

⁴⁷ Ntá iso sín tjejontaxín kuínhin sín ntá ntáchro sín kixin:

—Tí ch'ín a mé t'íyehé tí ch'ín profeta Elías —ichro sín.

⁴⁸ Ntá ijnko ch'ín kuínká ch'án sákjuíkakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjínjin ntá kjuínchechrin ch'án kixin chrók'ui ch'ín Jesús.

⁴⁹ Ntá í so sín ntáchro sín kixin:

—Nté t̄t̄ohé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án ínaá, ntá kjuixin ik'uén ch'án.

⁵¹ Mé ntá tuénxín k'uíchje tí ka tjenkákuènxín nkaxenhen n̄nko. Mé k'uíchje tí ka k'óna yaá tí kjuankíxixín noi hasta nonte. La ko kuínkí nonte la ko tí t̄jo la k̄j̄axin xitjeh̄e.

⁵² La ko ó xitjeh̄e tí tòȳe tsíxravá chojni la ko ó xechón itsjé tí sín k'uékinkáchónki Dios.

⁵³ Kaín tí sín a mé k'uaxrjexín sín tí tòȳe, la tió kjuixin xechón ch'ín Jesús ntá k'uíxenhen sín tí chjasin t̄jóá mé chjasin Jerusalén la ntaha itsjé chojni k'uíkon k̄ixín xíxechón tí sín a.

⁵⁴ Ntá tí ch'ín capitán la ko tí sín k'uéjoko ch'án, mé tí sín t'ayakonhen ch'ín Jesús, na ntá k'uíkon sín kuínkí nonte la kaín tí í so nkehe la ntá imá chrakon sín, la ntáchro sín k̄ixín:

—Chaxín tí nkexro a mé Xj̄een Dios.

⁵⁵ Ntá ntiha nchónhya chojni chjin ikjín tjejó sín, tjejótsjehe sín. Jehe sín k'uékinkáchréh̄e sín ch'ín Jesús tí kjuixín ch'án estado Galilea k̄ixín mé ntiha kjuankíxixín sín k'uékjink̄itsa sín ch'án.

⁵⁶ Ntaha k̄j̄axin tjen tjan María Magdalena la ko tjan María, ìné tí ch'ín Jacobo, la ko ch'ín José la ko tí ìné tí xj̄een tí ch'ín Zebedeo.

Ntá xrává ch'ín Jesús

(Mr. 15.42-47; Lc. 23.50-56; Jn. 19.38-42)

⁵⁷ Ntá tí ó ntá kóntó ikui ijnko ch'ín it'in José, mé ijnko ch'ín rico. Chjasén ch'án mé Arimatea la jehe ch'án k̄j̄axin k'uéchréh̄e ch'án tí ch'ín Jesús.

⁵⁸ Ntá tí ch'ín José sákjuítsjehe ch'án ch'ín Pilato kjuíkjanchia ch'án tí cuérp̄oé tí nkexro Jesús. Ntá ch'ín Pilato mé kjuanjon ch'án kjuachaxin.

⁵⁹ Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka t̄jóá.

⁶⁰ Na ntá kjuak'enkaya ch'án ijnko tòȳe n̄ixín kuènte ch'án k̄ixín senó tsík̄jich'èna ch'án. Ntá ijnko x̄r̄o jíé k'uík̄jèxín ch'án tí ntója tí t̄jo, ntá kjuixin ntá sákjuí ch'án.

⁶¹ Ntaha kjuák'e tí tjan María Magdalena la ko í jnko tjan María tjejótk̄j̄axin sín ntoí chok'èxin tjen tòȳe.

Tí sín soldado k'uáyakonhen tí tòȳe xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nch̄at'á t'ètoan la ko tí sín fariseo sákjuítsjehe sín tí ch'ín Pilato

⁶³ la ntá ntáchro sín k̄ixín:

—Ó xraxinkaonni kixin tió naxa kjuák'echón tí nkexro kjuích'ia la tsintáchro ch'án kixin ts'atsínka iní yaon ntá tsox-echón ch'án inaá, tsíchro ch'án.

⁶⁴ Méxra tsétuénhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhí, la kjá tie itsi tí sín k'uájiko ch'án la tsee sín tí cuerpo kuènte ch'án la ntá chr'éxin tsochénta sín chojni kixin ó xíxechón tí nkexro a, mé xikaha sich'ia sín. La ntá tí xikaha sich'e sín antsí má sich'ia sín que tí xrankíxixín —mé xikaha ichro sín.

⁶⁵ Ntá ntáchro ch'ín Pilato kixin:

—Ntihi tjejó soldado. Sátsjirá la ts'ayakonhenrá jína tí tòye éxí tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjekjèxin tí tòye la kuítóhe sín tí sín soldado ntahó kixin ts'ayakonhen sín.

28

Ó xechón ch'ín Jesús

(Mr. 16.1-8; Lc. 24.1-12; Jn. 20.1-10)

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankíxixín semana, la ntá tjan María Magdalena la ko tí í jnko tjan María sákjuítsjehe sín tí tsíkji xravá Jesús.

² Ntá xrínahya kuínkí nonte imá tjian kixin ijnko ángel kuènte Ìnchéni k'uínkajinxin nkaya nkajni la kjuíji ch'án tí tsíxravá Jesús la kjuakjin ch'án tí xro a tjekjèxin tòye la ntá chrítaón tí xro a kjuák'ekjen ch'án.

³ Tí ángel la imá tjákini tsjehe éxí ijnko xrohi la tí iké ch'án la imá tjóá tsjehe éxí chrinta.

⁴ Tí sín soldado mé k'uíkon sín xikaha la ntá síxranka sín chrakon sín la éxí tsík'en sín xikaha k'uéjó sín.

⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nõna kixin xritjéyará tí nkexro Jesús mé tí nkexro tsíkjak'enkání ntacruz.

⁶ Kjánchó í kohya ch'án ntihi ó tsíxechón ch'án inaá éxí chrónka ch'án senó. Xrákirá tsjehérá tí tsíkjak'e sín ch'án, í kohya ch'án.

⁷ Ntá sátsjirá tjoka tjíchenkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntia sátsji ch'án estado Galilea. Ntiha ts'ikonrá ch'án”, mé xikaha tsochronkará. Kaín tíha mé tjonkará —mé xikaha chrónka tí ch'ín ángel.

⁸ A ntá tí chojni chjin tjoka sákjuíxin sín tí tsíxravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús.

⁹ Ntá xrínghya titàya k'uúkuèn sìn kixin itjen tí ch'ín Jesús la nixjehé sìn ch'án. Ntá kóchjinehe sìn ch'án la kjóa sìn toté ch'án, kuítekaon sìn ch'án.

¹⁰ La ntáchro ch'án kixin;

—Chrakonhyará sátjirá tjíchenkará tí sìn kichó ni kixin sáchrókjui sìn estado Galilea la ntaha ts'ikon sìn tí janhan —mé xikaha ichro ch'ín Jesús.

Tí nkehe chrónka tí sìn soldado

¹¹ Tió sátsikji tí chojni chjin la nta iso tí sìn soldado k'uáyakonhen tí tsíxravá ch'ín Jesús mé sákjuí sìn chjasin Jerusalén la chénka sìn tí nchát'á t'etqan kaín tí nkehe tsíkónhen tí k'uéjós sìn ntiha.

¹² Ntá tí sìn nchát'a t'etqan kjuínixjehé sìn tí sìn táda la ntá jnkokoá kjuenkayáxin sìn ntá chjéhe sìn nchónhya chichaon tí sìn soldado.

¹³ La ntáchro sìn kixin;

—Chronkará kixin tí tie naxa tjejochrinrá ikui tí sìn k'uék'ajiko tí nkexro Jesús, mé kueé sìn cuerpo kuènte ch'án, ichrorá.

¹⁴ A ntá tí chrókonohe tí ch'ín gobernador tíha la ntá jeheni tsonixjeheni ch'án kixin tsonínkakuanhyará ch'án —mé xikaha ichro tí sìn nchát'á.

¹⁵ La ntá tí sìn soldado k'uáyéhe sìn tí chichaon la sákjuí sìn la xikaha kjuích'e sìn éxí k'uítuenhen sìn. La mé xikaha chrónkaxín tí sìn judío, la hasta tí yaon ijie la xikahó ichro sìn, chrónkaxín sìn.

Ch'ín Jesús k'uétuenhen ch'án tí sìn k'uék'ajiko ch'án tí xra sich'e sìn

(Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sìn k'uék'ajiko ch'ín Jesús sákjuí sìn ijnko jna estado Galilea kixin xikaha tsík'etqan ch'ín Jesús.

¹⁷ Ntá k'uíkon sìn ch'ín Jesús la ntá kuinkáchónki sìn ch'án kjónté iso sìn naxa kjuenkayáxin á chaxín jehe ch'án o náhí.

¹⁸ Ntá ch'ín Jesús kóchjinehe tí jehe sìn la ntáchro ch'án kixin;

—Dios mé chjina kaín xín kjuachaxin nkaya nkajní la ko chjasintajni.

¹⁹ Méxra sátjirá kaín xín nación la tjácohérá chojni kixin tsitekaon sìn tí janhan. Tikítexínrá sìn kjuachaxién ihnié It'éni la ko ihnié tí Xjjen la ko Nchakuèn Dios.

²⁰ Tjácohérá sìn kixin sinchexiteyá sìn kaín xín nkehe kuétuanhanrá. Ijie la ó nohará kixin tsjak'é ts'ejokoará jnkochrín hasta tsjeje chjasintajni. Mé xikaha tsonhen. Amén —ichro ch'ín Jesús.

Tí tan jína chrónka ch'ín Marcos

*Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)*

¹ Xikihi mé xrankixixín tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntácho kixin:

Janhan tsochr'an ijnko nkexro tsochrónka tan kuèntana tsitónxin ntia,

kixin tsjasiyóxin ch'án ntia kuèntá.*

³ Ntá tsinhin sín itén ijnko nkexro tsjak'e nteje ts'èya tsontácho kixin:

“Tóxakonhanrá ncheyóxinrá ntia tsixin Ìnchéni, takitjehérá ijnko ntia ntoí.”†

⁴ Tíha mé xíteyá ikui ch'ín Juan Bautista, mé xikaha kjuák'e ch'án nteje kuikite ch'án chojni. Kjuakohé ch'án chojni ntiha kixin chrókuinkí sín tí nkehe tjenkayáxin sín chrókuítóhe sín tí ijje sín ntá chrókuikite sín kixin xikaha mé chrókuuin ijje sín.

⁵ Itsjé chojni kuixin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jie yámá sín ntá ch'ín Juan mé kuikitexín sín ch'án ntarío Jordán.

⁶ Tíké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxin nteje.

⁷ Mé kjuák'ekjakohe ch'án chojni ntácho ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuàna chrókuasintanká tí correa tí tokaté ch'án.

⁸ Janhan mé ìnta ó kuikitexínrá. Ntá jehe ch'án mé tsikitexínrá ch'án tí Nchakuen Dios —ichro ch'ín Juan.

*Ch'ín Juan kuikite ch'án tí ch'ín Jesús
(Mt. 3.13-17; Lc. 3.21-22)*

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuikitexín ch'án tí ntarío Jordán.

¹⁰ Tió k'uaxrjenkixin ch'ín Jesús tí ìnta, ntá xrínahya titàya k'uúkuèn ch'án na ó xitjehe nkajní la ntá tí Nchakuen Dios éxi kontóá k'uínkajinxin ntiha ntá kjuák'e chrítaón kja ch'án.

* 1:2 Malaquías 3.1 † 1:3 Isaías 40.3

¹¹ Ntá xrínahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

Ch'ín Tsochren chrókjuachroe tí ch'ín Jesús kixin chrókjuasin ch'ánjie

(Mt. 4.1-11; Lc. 4.1-13)

¹² Ntá tí Nchakuen Dios mé sákjuiko tí ch'ín Jesús nteje.

¹³ Kjuák'e ch'án cuarenta yaon tí nteje la ko ntiha mé k'uixin ko jiehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

Ch'ín Jesús kjuankixixín kjuako ch'án estado Galilea

(Mt. 4.12-17; Lc. 4.14-15)

¹⁴ Kjuixin kjuák'echjina ch'ín Juan ntøechiso ntá ch'ín Jesús na mé sákjuí ch'án nó estado Galilea sákjuíkjakøhe ch'án tí sín ntiha tí tan jína kuènte Dios.

¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etøan ch'án. Chrókuítøherá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xikaha kjuako ch'ín Jesús.

Ch'ín Jesús k'uíyehé noó tí sín itsé koche

(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kíchó ch'án mé it'in Andrés, mé koche xritsé sín, ntá tinkák'e sin tí nchísén chrínkí ntá.

¹⁷ Ntá ntáchro tí ch'ín Jesús kixin:

—Chrèherá tí janhan, ntá tsotjahará xrā tsjéyará chojni —ichro ch'án.

¹⁸ Ntá tuénxín kuítóhe sín tí nchísén k'uétséya sín koche ntá sákjuíko sín ch'án.

¹⁹ Ntá kjínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí íjnko la mé it'in Juan. Jehe sín la ko tí it'é sín tjejóxenhen sín tí ntabárco tjejójtjonité sín tí nchísén tséya sín tí koche.

²⁰ Na ntá ch'ín Jesús mé k'uíyehé tí jehe sín kixin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'an tí ntabárco la ko tí sín tjinkítsa ch'án ch'e xrā. A ntá jehe sín sákjuíko sín ch'ín Jesús.

Ijnko chojni chóna injnko nchakuen tí jínahya

(Lc. 4.31-37)

21 Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uíxenhén ch'in Jesús tí nínko Israel. Na ntá ntaha mé kjuankíxin ch'án kjuako ch'án.

22 A ntá tí chojni síin ntiha mé chrakon sín kuínhin sín tí nkehe kjuako ch'án kixin kjuakoxin ch'án kixin chóna ch'án kjuachaxin, la jehya éxí tí sín maestro tjako tí ley, ichro sín.

23 Ntá tí nínko Israel chjasin ntiha itjen ijnko chojni chóna ijnko nchakuen tí jínahya k'uíyato ntáchro kixin:

24 —¿Nkekuènté tjiaté tí jeheni kaín ni? Jaha Jesús kjuíxian Nazaret. ¿Á k'uinka kixin sinchek'itjáyanni? Janhan mé ó kjuátsoan tí jaha, la ko nòna kixin jaha tí nkexro tjóá kuènte Dios —mé xíkaha ichro tí nchakuen tí jínahya.

25 Ntá ch'in Jesús mé k'uetuénhen tí nchakuen tí jínahya ntáchro ch'án kixin:

—Tániá, t'axrjéxian tí jehe ch'án —mé xíkaha ichro ch'in Jesús.

26 A ntá tí nchakuen tí jínahya mé kjuínchek'aniáte tí ch'in a la ko k'uíyatoxín tsen ntá k'uaxrjéxín tí ch'in a.

27 A ntá kaín sín chrakon sín ntá kjuanchankíhi sín kichó sín, ntáchro sín kixin:

—¿Xá nkexro tíha kixin tjako ch'án nkehe nixin? Jehe ch'án chóna kjuachaxin kixin t'etuénhen ch'án tí nchakuen tí jínahya la titekakonhen —mé xíkaha ichro sín.

28 A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'in Jesús a.

*Ch'in Jesús kjuínchekitohe jína tí ich'ee tí ch'in Simón Pedro
(Mt. 8.14-15; Lc. 4.38-39)*

29 Ntá tí ch'in Jesús mé k'uaxrjéxín ch'án tí nínko, a ntá tuénxín sákjuiko ch'án ch'in Jacobo la ko ch'in Juan, sákjuí sin ntoe ch'in Simón la ko ch'in Andrés.

30 Ntá tí ich'ee ch'in Simón na tjetsínka tjan, níhi tjan kixin chóna tjan sóa. Ntá chénka sín tí ch'in Jesús.

31 Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuínhin tjan tí sóa chóna tjan. Ntá kjuanjon tjan nkehe sine sín.

*Ch'in Jesús kjuínchekitohe jína nchónhya chojni níhi
(Mt. 8.16-17; Lc. 4.40-41)*

32 A ntá tí kjuíátaón yaon tíó k'uíxin tie kuíkohe sín tí ch'in Jesús kaín tí sín níhi la ko tí sín chóna nchakuen jínahya;

33 na ntá kuenté chjasin kójnkotsé sín k'uíxintankí sín ntója tí nchia a.

34 Ntá kjuínchekitohe ch'án jína kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjonhya ch'án kjuachaxin kixin tsonixja tí nchakuen tí jínahya kixin ó kjuátsoan tíha nkexro tí jehe ch'án.

*Ch'in Jesús mé kjuako ch'án estado Galilea
(Lc. 4.42-44)*

³⁵ Ntá naxa sítie k'uàya ch'in Jesús k'uaxrjexín ch'án tí ch-jasin a sákjuí ch'án nteje kixin ntiha nixjeexín ch'án It'é ch'án tjen nkaya nkajní.

³⁶ Ntá ch'in Simón la ko tí sín xriko ch'án mé sákjuíkjoyá sín ch'án.

³⁷ Ntá k'uitja sín ch'án ntá chénka sín kixin:

—Kaín sín xritjeyá sín tí jaha —ichro sín.

³⁸ Ntá ntáchro ch'in Jesús kixin:

—Sátsjini ókjé chjasin chjinaxón kixin ntaha kjaxin tsjákoḥa sín tí tan jína, kixin xíkaha mé tí k'uaxrjexiḥ chjasin ntiha.

³⁹ Ntá nkuíxín estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chóna sín.

*Ch'in Jesús kjuínchekitoḥe jína ijnko ch'in chóna chinlepra
(Mt. 8.1-4; Lc. 5.12-16)*

⁴⁰ Ntá kui ijnko ch'in chóna chinlepra kjuák'exín toch'in ch'án nkayakon ch'in Jesús ntá chrónóḥe ch'án ntáchro ch'án kixin:

—Tí tjínkávan jaha la jína chrókjuínchekitoḥéni jína —ichro ch'án.

⁴¹ Ntá ch'in Jesús na imá kuikonóḥe ch'án tí ch'in a na ntá kjuentoá tja ch'án kjuak'e tja ch'án chrítaón tí ch'in níhi a ntá ntáchro ch'án kixin:

—Méxra xíkaha tjínkávan. Ntá jie sintakitōha jína —ichro ch'án.

⁴² A ntá xíkaha ntáchro ch'án ntá tuénxín kjuìn tí chinlepra ntá kuítóḥe ch'án jína.

⁴³ Ntá k'uetuēnhen ch'in Jesús tí ch'in a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sátsjia tjákoḥé tí ch'in nchát'á kixin ó kjuínhan tí chinlepra la ko tjánjuan tí nkehe tsík'etoan ch'in Moisés‡ kixin tsoñoexín kaín xín chojni kixin ó kuítóḥa jína —ichro ch'án.

⁴⁵ A ntá tí ch'in tsíkitoḥe jína, a ntá sákjuí ch'án kjuankíxín ch'án chénka ch'án kaín xín chojni kixin nkexrí kuítóḥe ch'án jína. Méxra xitjahya ts'ixenhen ch'in Jesús noxín nijnko ch-jasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuíxín chjasin.

2

*Ch'in Jesús mé kjuínchekitoḥe jína ijnko chojni tsík'en toté
(Mt. 9.1-8; Lc. 5.17-26)*

‡ 1:44 Levítico 14.1-32

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uíxikónohe chojni kixin ijnko nchia ntiha kjuák'e ch'án.

² Ntá tuénxín nchónhya chojni kóchjina ntá kjuachahya tí nchia k'uíxixenhen sín la ko kjaxin kjuachahya tí ntója nchia chrók'uíxintankí sín. A ntá ch'ín Jesús kjuako tí tan jina kuente Dios.

³ Ntá kui noó sín tinkátsénki sín ijnko ch'ín tsík'en toté ch'án.

⁴ Kjánchó xitjahya kóchjina sín tí tjen ch'ín Jesús kixin nchónhya chojni siín. La ntá k'uit'ótjen sín tí chrítaón nchia a ntá k'óxrat'ò sín. Na ntá ijnko hno kjuak'ete sín tí kania tjenkáya tí sinníhi a ntá kjuinkajin sín ntoí tí tjen ch'ín Jesús a.

⁵ Tió k'uíkon ch'ín Jesús tí nkehe kjuích'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjehe ch'án tí sinníhi ntáche ch'án kixin:

—Xjeenni, ó kjuixin kjuìnhan tí jie chonta —mé xíkaha ichro ch'án.

⁶ Na ntá iso tí sín maestro tjako tí ley tjejótjaxin sín ntiha na ntá jehó sín mé kjo sín asén sín kixin:

⁷ “¿Nkekuènté xíkaha nixja tí ch'ín i ncheyóhe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chóna kjuachaxin tsjatsen ijie chojni”, mé xíkaha ikjo sín asén sín.

⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xíkaha tjenkayáxinrá?

⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìnhin ch'án tí jie yámá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaniee ch'án ntá sáchrókjui ch'án?

¹⁰ Méxra jie tsjákoxiān kixin tí Xjeen Dios K'óna Chojni mé ntihi chjasintajni chóna kjuachaxin tsjakjìnhin ijie chojni —ichro ch'án.

Ntá ntáche ch'án tí ch'ín xitjahya tji kixin:

¹¹ —Jaha tétuanhan t'inkatjen, tjenájían kaniāa na sátjia ntōa —ichro ch'án.

¹² A ntá tí sinníhi na tuénxín k'uíkatjen ch'án kjuák'exín toté ch'án na kjuenájín ch'án kaniee ch'án na kuámá ch'án k'uaxrjexín ch'án nchia sákuí ch'án. Na ntá kaín tí sín siín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uíkonhyéni tí nkehe i —ichro sín.

*Ch'ín Jesús k'uíyehē ch'ín Leví
(Mt. 9.9-13; Lc. 5.27-32)*

13 **A** ntá chr'éx̄in ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án.

14 Ntá k'uátsínka ch'án k'uikon ch'án tí ch'ín Leví xj̄een ch'ín Alfeo tjetj̄ax̄in ch'án tjenchekj̄enk̄i ch'án. Ntá ch'ín Jesús mé k'uíyeh̄e ch'án, ntáchro ch'án k̄ixin:

—Chr'éhé tí janhan —ichro ch'án.

Ntá ch'ín Leví mé tuénxín k'uínkatjen ch'án chr'éh̄e ch'án tí ch'ín Jesús.

15 **A** ntá ch'ín Jesús kjuák'e ch'án nt̄oe tí ch'ín Leví, la ntá kjuanjon sín nkehe sine ch'án la ko k̄j̄ax̄in k'uéj̄o nchónhya tí sín nchekj̄enk̄i la ko k̄j̄ax̄in í so chojni chón̄ta j̄īe. Mé kaín tí sín a mé tjejó̄tj̄ax̄in sín tjejó̄neko tí ch'ín Jesús la ko tí sín k'uáj̄iko ch'án, k̄ixin nchónhya chojni chr'éh̄e sín tí jehe ch'án.

16 Na ntá tí sín maestro tjako tí ley la ko tí sín fariseo k'uikon sín k̄ixin ch'ín Jesús tjejó̄neko kaín tí sín nchekj̄enk̄i la ko tí í so sín chón̄ta j̄īe, a ntá ntáche sín tí sín k'uáj̄iko ch'án k̄ixin:

—¿Nkekuènté k̄ixin tí maestro kuèntará neko ch'án la ko t'ík̄ao ch'án tí sín nchekj̄enk̄i la ko tí í so sín chón̄ta j̄īe? —ichro sín.

17 Na ntá ch'ín Jesús kuínhin ch'án nkehe tí tjo sín a. Ntá nixj̄eh̄e ch'án tí sín a ntáchro ch'án k̄ixin:

—Tí sín níehya t'ichj̄ánx̄ienhya sín nkexro sich'e x̄rōan. Náhi. Jehó tí sín níhi mé t'ichj̄ánx̄inhin sín nkexro sich'ehe sín x̄rōan. Janhan na k'uinkahya ntili k̄ixin chrók'uíȳah̄a chojni j̄ina tjejó̄ sín. Náhi. K'uinka k̄ixin ts'íȳah̄a chojni chón̄ta j̄īe —ichro ch'án.

Tjanchankíhi sín tí ch'ín Jesús k̄ixin á chrókj̄ónehya sín tíó tsonixj̄eh̄e sín Dios

(Mt. 9.14-17; Lc. 5.33-39)

18 Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé k̄j̄ónehya sín kuènté yaon k̄ixin mé x̄ikaha ts'áyéh̄e sín kjuaxróxin, ichro sín. **A** ntá kui iso chojni nixj̄eh̄e sín tí ch'ín Jesús ntáchro sín k̄ixin:

—¿Nkekuènté k̄ixin tí sín k'uék'ajiko sín tí ch'ín Juan la ko tí sín fariseo la nehya sín j̄ie, a ntá tí sín x̄rikoa la ine sín? —ichro sín.

19 Ntá kjuát̄eh̄e ch'ín Jesús ntáchro ch'án k̄ixin:

—¿Xá chrókj̄ónehya tí chojni tsík'íyeh̄e sín kóchjina ijnko kia tsot̄eh̄e chojni tí nax̄a tjejó̄ko sín tí nkexro tsot̄eh̄e? Tí nax̄a tjen tí nkexro tsot̄eh̄e la xitjahya k̄ixin chrókj̄ónehya sín.

20 **A** ntá itsi ijnko yaon itsi chojni sátsj̄iko sín tí ch'ín tsíkót̄eh̄e, ntá tí yaon la chaxín sinehya sín.

21 Ninkexró chrókjuak'eniehe ijnko ka ó ntaxin it'ò ka nixin kíxin ntá chrókjuixéhe tí ka nixin ntá antsí má chrók'uichje tí ka ntaxin a.

22 La ko kjaxin ninkexró chrókjuikja xran vino nixin ijnko tjuaxran ó ntaxin; kíxin tí xran vino nixin la chrókótséchje tí tjuaxran ntaxin ntá chrók'uitjáyan tí xran la ko tí tjoa. Méxra tí xran vino nixin chrókuikia ijnko tjuaxran nixin — mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigó ijnko yaon t'ok'éhe sín

(Mt. 12.1-8; Lc. 6.1-5)

23 Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte síin noatrigó. Na ntá tí sín k'uájiko ch'án kjuankíxin sín ik'uín sín iso noatrigó.

24 Na ntá iso tí sín fariseo kjuanchankíhi sín tí ch'ín Jesús a kíxin:

—¿Nkekuènté kíxin tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ok'éheni —ichro sín.

25 Ntá kjuátehe ch'án ntáchro ch'án kíxin:

—¿Á kjuinchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta?

26 A ntá jehe ch'án k'uixenhen ch'án ntoe Dios tió kjuák'e nchat'á Abiatar k'uetóan, a ntá kjóne ch'án tí niotja tsíkóyaon kjónté jehó tí sín nchat'á mé k'uéchónta kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

27 Kjaxin ntáchro ch'ín Jesús kíxin:

—K'óna tí yaon ts'ok'éhe chojni kíxin t'ichjánxin sín, la jehya kíxin chrókjuikosáyehe tí yaon a.

28 A ntá tí Xjeen Dios K'óna Chojni mé chóna kjuachaxin ts'etóan nkehe tsonhen tí yaon t'ok'éheni —ichro ch'án.

3

Ijnko chojni tsíxámá tja

(Mt. 12.9-14; Lc. 6.6-11)

1 Ntá ch'ín Jesús k'uixenhen ch'án ijnko njnko Israel inaá. Na mé ntiha tjen ijnko ch'ín tsíxámá ijnko tja ch'án.

2 Na ntá kóchjina iso chojni tsáyehe sín ch'ín Jesús ts'ikon sín kíxin á sinchekitohe ch'án jina tí ch'ín tsíxámá tja tí yaon t'ok'éhe sín kíxin mé jina tsjanchia sín jie, ichro sín.

3 Ntá ch'ín Jesús mé ntáche ch'án tí ch'ín tsíxámá tja a kíxin:

—T'inkatjen, tjak'e jnkosiné ntihi —ichro ch'án.

4 A ntá kjuanchankíhi ch'ín Jesús tí sín síin ntiha kíxin:

* 2:26 1 Samuel 21.1-6; Levítico 24.5-9

—¿Nkehe síin kjuachaxin tsonhen tí yaon t'ok'éheni? ¿Á chrókjuich'eni tí jína ní ọ á chrókjuich'eni tí jínahya? ¿Á chrókjuinchekitoḡheni chojni jína ní ọ á chrók'óyánni chojni? —ichro ch'án.

À ntá jehe sín la táníkoá sín.

⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóḡhe sín chojni. Na ntá k'uetuēnhen ch'án tí ch'ín a kixin:

—Tjéntoá tjá —ichro ch'án.

À ntá kjuéntoá ch'án tja ch'án la ó kuítóhe tja ch'án jína.

⁶ Na ntá tí sín fariseo a k'uaxrjéxín sín nínko sákjuí sín k'uíto sín tí sín kuènte ch'ín Herodes ntá kjuenkayáxinko kíchó sín kixin nkexrí chrók'óyán sín tí ch'ín Jesús.

Nchónhya chojni síin chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. À ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea

⁸ la ko chjasin Jerusalén la ko estado Idumea la ko ikjé sín kuixín sín nó tóhe ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jié kjuasin ch'ín Jesús ntá kuichréhe sín ch'án kixin chrók'uikon sín tíha kjaxin.

⁹ Ntá k'uetuēnhen ch'án tí sín k'uájiko ch'án a kixin ntaḡ chrókjuak'eḡchonhen sín ijnko ntabárcọ. À ntá tí imá chrók'uixitja sín ch'án ntá chrók'uixenhen ch'án tí ntabárcọ, à ntá ntiha chrókjuak'e ch'án tsochrónka ch'án.

¹⁰ Kixin itsjé chojni tsíkjinchekitoḡhe ch'án jína, na ntá kaín xín tí sín níhi k'uíxitja sín ch'án kixin tjinkaon sín chrókuákóxin sín ch'án.

¹¹ Kjaxin tí sín chónḡ nchakuen tí jínahya na mé tío k'uikon sín tí ch'ín Jesús ntá k'uéjoxin sín toch'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

¹² À ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án

(Mt. 10.1-4; Lc. 6.12-16)

¹³ À ntá chr'éxin chríin ch'ín Jesús ijnko jnà, à ntá ntiha k'uíyḡhe ch'án tí sín tjinkaon ch'án chrók'uajiko ch'án ntá kóchjinehe sín ch'án.

¹⁴ Ntá kjueyá ch'án teyó tí sín ts'ajiko ch'án kixin ts'etuēnhen ch'án sín sátsji sín tsjako sín tí tan jína.

¹⁵ Kjuanjon ch'án kjuachaxin sinchekitoḡhe sín chojni níhi jína la ko tsakitsje sín nchakuen tí jínahya chónḡ chojni.

16 **A** ntá tí sín i mé tí teyó sín tsíkjejá ch'án mé it'in sín xíkíhi: Simón na mé kjuínchek'in ch'án Pedro;

17 la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjéxín kixin Xjeen Sítjonta.

18 La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuènte tí sín cananista,

19 la ko Judas Iscariote, mé kjuínchekji tí ch'ín Jesús chr'éxín.

Ntáchro sín kixin ch'ín Jesús chóna kjuachaxin kuènte tí Jínahya (Mt. 12.22-32; Lc. 11.14-23; 12.10)

Na ntá chr'éxín ch'ín Jesús la ko tí sín k'uájiko ch'án k'uixenhen sín ijnko nchia.

20 **A** ntá ínaá kójnkotsé nchónhya chojni, a ntá xitjahya sine sín.

21 Ntá kónohe tí sín naxa kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

22 Kjaxin tí sín tjako ti ley kuixín sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuenhen kaín tí nchakuen tí jínahya ntá xíkaha tjacha ch'án takitsje ch'án nchakuen tí jínahya a —ichro sín.

23 Ntá ch'ín Jesús k'uíyehé ch'án tí sín ntá kjuíncheyóexín ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén?

24 **A** ntá tí sín t'etoan ijnko nación tjanjonko kichó la tsjachahya ts'etoan.

25 La ko kjaxin tí sín jnkokoá ntøe jnkokoáhya tjenkayáxin sín ntá xitjahya ts'ejóko kichó sín.

26 **A** ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjáyán kjuachaxin kuènte.

27 'Ninkexró tsjacha ts'ixenhen ntøe ijnko chojni jiehe kixin ts'axrjehe tí nkehe chóna ch'án. Náhi. T'ichjánxin saoxín sinchenteto ch'án tí ch'ín jiehe kixin jína tseéhe ch'án nkehe chóna tí ch'ín a.

28 'Ijnko nkehe chaxín tsotjonkará kixin tió tsoxraxinkaon ijnko chojni tí jie chóna la ko tsochronóehé Dios la ntá tsjakjínhin ch'án kaín tí jie la ko kaín tí nkehe jínahya tsíntáchro sín.

29 **A** ntá tí nkexro ts'ántaxínhin tí Nchakuen Dios na mé xitjahya tsjin tí jie na mé jnkochrixin tsochóna sín tí jie a —ichro ch'án.

30 Mé xíkaha ichro ch'án kixin tí sín a tsíntáchro sín kixin ijnko nchakuen tí jínahya mé chóna tí jehe ch'án.

Tí iné la ko kichó ch'ín Jesús (Mt. 12.46-50; Lc. 8.19-21)

³¹ A ntá kui ìné ch'ín Jesús la ko kíchó ch'án tjejó sín ntója ó na ntá k'uetuēnhen sín ijnko chojni tsjik'íyehē ch'án.

³² A ntá tí sín tjejójtjāxìn tí tjen ch'ín Jesús ntiha chénka sín ch'án kixin:

— Ìná la ko kichuá tjejó sín ntója xritjeyá sín ti jaha. —ichro sín.

³³ Ntá ntáchro ch'án kixin:

— ¿Xá nkexro tí ñana la ko nkexro tí kichiná? —ichro ch'án.

³⁴ Ntá komá ch'án tí chojni tjejójtjāxìn tí tjen ch'án ntá ntáchro ch'án kixin:

— Jahará mé ñana la ko kichiná.

³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko ñana —ichro ch'án.

4

Kjuíncheyóexin ch'án éxí ijnko chojni t'enka nonte
(Mt. 13.1-9; Lc. 8.4-8)

¹ Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabárcō tjenkátaón ntā k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójnkotsé mé kuítóhe sín chrínta ntayaon k'uéjókinhin sín.

² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuík'enka nontēe.

⁴ Mé xíkaha sákjuík'enka ch'án iso tí noatrigo a. Ntá iso noa la tsík'ánotjen ntja ntá kui koxroxē k'uìnkā va tí noa.

⁵ A ntá iso noa na mé k'uitji chrík'á xrō tí kohya itsjé nche ntá tjoka k'uayan kixin tjínhya chóna nche.

⁶ A ntá tió kjuiton yaon la ntá tí ka la chján; la ko chóntahya nuèe a ntá xámá.

⁷ A ntá í so noa kjuítsínkak'á tí síin kach'ì la ntá tí kach'ì k'uánkí la ntá tí noa í k'ónahya kixin sítja tí kach'ì.

⁸ A ntá íso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

Ch'ín Jesús chronkaxín nkexrí t'axrjexín tí nkehe ntáchro ch'án

(Mt. 13.10-17; Lc. 8.9-10)

¹⁰ A ntá chr'éxin, tió kuítóhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án

mé kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án.

¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakhya la ó kjuíntayóaxuán kaín nkehe kuínhin sín.

¹² Kixin kjónté ts'ikon sín la éxi k'uíkonhya sín, la ko kjónté tsinhin sín la tsienxínhya sín kixin ntá chrók'uixitoxínhya tí tjenkayáxin sín a la ko chrókjuínhya tí ijíé sín* —ichro ch'án.

Ch'ín Jesús chrónkaxín nkexrí t'axrjexín tí nkexro sákjuík'enka (Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiénxinyará jahará nkexrí t'axrjexín tí nkehe kjuíntayóaxian ní? ¿A ntá nkexrí chrókiénxinrá tí í so nkehe naxa sintayóaxian?

¹⁴ A ntá tí nkexro sákjuík'enka tí tje a mé yóhé ijnko nkexro sákjuíkjako itén Dios.

¹⁵ A ntá iso chojni la éxi tí tje kjuítsínka ntia; kixin kuínhin sín itén Dios, ntá chr'éxin ó kui ch'ín Tsochren kjuínchek'itjayan ch'án tí tan jína kuínhin sín.

¹⁶ A ntá í so chojni la éxi yóhé tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín.

¹⁷ Kjánchó nínkahya chóna nuèe, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios.

¹⁸ A ntá í so chojni la éxi yóhé tí tje k'uínka chrík'á kach'i na mé kuínhin sín itén Dios

¹⁹ Kjánchó tóxakonhen sín tí nkehe siín chjasintajni la ko tí nkehe tjete tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xra Dios.

²⁰ A ntá í so chojni kuínhin tí itén Dios na kuínkáchónki sín la ntá xíkaha jína ch'ehe sín Dios xra. La iso sín la éxi yóhé tí tje k'uínka tí nonte jína k'óna treinta neno noa la ko iso sín la yóhé tí tje k'óna sesenta neno noa la ko iso sín la yóhé tí tje k'óna ciento neno noa —mé xíkaha ichro ch'ín Jesús.

Ch'ín Jesús mé kjuíncheyóexin éxi ijnko xrohi tjeche (Lc. 8.16-18)

²¹ Kjaxín ntáchro ch'ín Jesús kixin:

—¿Á chrókuikaonni xrohi tjeche chrókjuak'emá chrínki nta-cajón o chrínki cama? Kjá náhi. Tí xrohi la noi chrókjuak'e ts'inkaséyanxín.

²² Mé xíkaha kaín tí nkehe tjejóma jie tsonoxín chr'éxin la ko kaín tí nkehe ninkexró noehya jie la tsonoxín chr'éxin.

* 4:12 Isaías 6.9-10

²³ **A** ntá tí nkexro tjinkaon chrókuinhin la chrókuinhin tíhi —ichro ch'án.

²⁴ **Kj**axin ntáchro ch'án kixin:

—Chrókjuenkayáxinrá jína tí nkehe tjejótinhinrá. Tí nkehe tjáchoayará jahará la Dios la **kj**axin tíha tsjáchoayá ch'án tí nkehe ts'ayéhérá jahará, **a** ntá **antsí** má ts'ayéhéra tí jahará tjejontinhinrá.

²⁵ **A** ntá tí nkexro chóna nkehe la **antsí** má ts'áyéhe sín. **A** ntá tí nkexro chónahya la **kj**ónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóexin ch'án éxí ijnko tje ts'ayan ts'ánki

²⁶ **Kj**axin ntáchro ch'ín Jesús kixin:

—Tí **kju**achaxin t'etóan Dios tóyóhe ijnko chojni sátsjik'enka nonte.

²⁷ **Ntá** sákjuík'ajua ch'án tí tie la ko k'uàya ch'án tí nchítjen. **A** ntá **xikahó** k'uátsínka iso yaon la ko iso tie, **a** ntá tí tje la k'uayan la k'uánkí. **A** ntá tí nkexro k'uenka la noehya ch'án nkexrí kónhen tíha.

²⁸ **A** ntá tí nche mé **kjuí**ch'e xra jehó. Senó k'uayan tí chaon tí ka, **a** ntá **kjuí**ntaa, **a** ntá **chr'é**xin icha tí noa tsjinjin;

²⁹ **a** ntá tió tsícha tí noa, **a** ntá tsakjinjin sín tí noa kixin ó **kjuix**raká tí yaon tsotjá sín.

Ch'ín Jesús kjuíncheyóexin ch'án éxí ijnko tje it'in mostaza (Mt. 13.31-32; Lc. 13.18-19)

³⁰ **Kj**axin ntáchro ch'ín Jesús kixin:

—¿Nkehe chrókóyóhe tí **kju**achaxin t'etóan Dios, nkehe chrókóyóexin tíha?

³¹ Mé éxí yóhe tí tje it'in mostaza tsík'inka nonte. Tíha mé ijnko tje imá ntsí, **a** ntá tí í so tje síin chjasintajni la kénhyó.

³² **A** ntá jnkonaá tsík'inka tí tje la tsík'ayan tsík'ánki imá ihyé, **a** ntá tí í so nta la kánhyó. **A** ntá **kj**axin tí chaon tí nta tsík'ánki imá ihyé, **a** ntá **kj**ónté koxroxé xritjaka la jína ts'ok'éhe va chrínki tí ts'van chaon tí nta.

*Nkehe tí xra kjuí*ch'e tí nkehe *kjuíncheyóexin ch'ín Jesús (Mt. 13.34-35)*

³³ Mé **xikaha** ch'ín Jesús **kju**akóhe ch'án tí jehe sín, **kjuí**cheyóexin ch'án nchónhya nkehe éxí tí nkehe a kixin chrókjuacha chrókienxín sín tíha.

³⁴ **Kaí**xín nkehe **kju**akóhe ch'án tí jehe sín la **kjuí**cheyóexin ch'án. **A** ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe **kjuí**cheyóexin ch'án.

*Ch'ín Jesús k'u*etuenhen *ch'án tí xrinto la ko tí ntq sí*chrica *kixin ts'ixita (Mt. 8.23-27; Lc. 8.22-25)*

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

³⁶ Ntá kuítóhe sín kaín tí chojni a ntá sákjuíko sín tí ch'ín Jesús naxa tjenkáya ch'án tí ntabárcō la ko kjaxin í so ntabárcō sákjuí koí.

³⁷ Ntá xrínahya tjiān chjéhe xríntō la ntá síchrica ntá t'ixenhen tí ntabárcō, ó mero tsōkaón ntá tí ntabárcō.

³⁸ A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárcō a tjejkjón ch'án ijnko ka. Na ntá kjuínchekjāya sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni ntá ní? —ichro sín.

³⁹ A ntá ch'ín Jesús k'uàya ch'án, k'uetuēnhen ch'án tí xríntō la ko tí ntá kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xríntō la ko tí ntá k'uíxratá.

⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuènté kixin imá chrakonrá? ¿Á naxa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kíchó sín kixin:

—¿Xá nkexro tíhi? Kjónté xríntō la ko ntayaon la mé kjuínchexiteyéhe ch'án —ichro sín.

5

Ijnko chojni chóna nchónhya nchakuen tí jínahya nonte Gadara

(Mt. 8.28-34; Lc. 8.26-39)

¹ Ntá tió k'uátōye sín tí ntayaon, a ntá kjuíji sín tí nonte Gadara.

² Ntá k'uínkajinxin ch'ín Jesús tí ntabárcō a. Ntá xrínahya xeta ch'án ijnko ch'ín kujxin nó tsíkji_xravá chojni mé chóna ch'án ijnko nchakuen tí jínahya.

³ Tí ch'ín a mé kjuák'e ch'án tí tsíkji_xravá chojni. Ninkexró tjachahya sinchenteto ch'án kjónté cadena tjachahya.

⁴ Nchónhya veces kjuínchentetoxín sín ch'án cadena toté ch'án la ko itja ch'án, la kjónté kóchrítōn ch'án kjuínchekuen ch'án tí cadena. Kohya ninkexro tjacha ts'etuēnhen tí jehe ch'án.

⁵ K'uék'aji ch'án nchakotjin la ko tie t'íyato ch'án nó jnā la ko tí tsíkji_xravá chojni la ko chjéhe asén ch'án xro.

⁶ Na ntá k'uíkon ch'án kixin kui ch'ín Jesús kjónté ikjín la kuínká ch'án kjuíji ch'án kjuák'exín toch'in ch'án nkayakon ch'ín Jesús a

⁷ k'óyako ch'án ntáchro ch'án kixin:

—¿Nkekuènté tjiaté jaha tí jeheni, jaha Jesús Xjeen Dios tjen nkaya nkajní? Dios nchenoheni kixin xrjanóaha nchek-jasótehyani —ichro ch'án.

⁸ Mé xikaha ichro ch'án kixin tsíntáchro ch'ín Jesús kixin:

—Jaha nchakuen tí jínahya, títóhé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónóehe ch'án tí ch'ín Jesús kixin tsochr'ánhya ch'án ókjé tí nchakuen tí jínahya.

¹¹ Na ntá síin nchónhya cochíno xrine va chjinaxón tí jna ntiha.

¹² A ntá chrónòà tí nchakuen tí jínahya ntáchro kixin:

—Tétuènhènni sátsjini tí síin tí cochíno, títóhé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexín tí ch'ín a sákjuí kjuík'ixenhen tí cochíno a. Na ntá kaín xín tí ko a mé chjina iyó mil va síin va xrine va. Na mé kaín xín va k'uínkajinxin va ntiha kjuítsínkayá va tsáka ntá kjuítsínkankí va ntayaoon ntá kjuínhin va ntá.

¹⁴ Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nontee chojni. Na ntá itsjé chojni mé kuitsjehe sín nkehe tí tsíkónhen ntiha.

¹⁵ Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchónta tí nchónhya nchakuen tí jínahya senó la ó jina tjen ch'án tjetjaxin ch'án tjenkáya ch'án iké ch'án, na ntá chrakon sín.

¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchónta tí nchakuen tí jínahya la ko nkexrí kónhen tí cochíno a.

¹⁷ Ntá kjuankíxin sín chrónóehe sín tí ch'ín Jesús a kixin sáchrókjuixin ch'án ntiha.

¹⁸ A ntá ó ts'it'ótjen ch'ín Jesús tí ntabáro na ntá tí ch'ín k'uéchónta nchakuen tí jínahya na mé chrónòà ch'án kixin kjaxin ch'án sáchrókjuiko sín ch'án, ichro ch'án.

¹⁹ Ntá ch'ín Jesús kjuanjonhya ch'án kjuachaxin sátsjiko sín ch'án. Náhi. K'uetqan ch'án kixin:

—Sátjia ntqá tjíchenka tí sín naxá kjéhya tí jaha kixin nkexrí kaín tí kjuaxroan jíé kjuasin Dios kjuínchekitoha jina kuíkonóaha ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankíxin chrónka ch'án kaín tí chjasin kuènte Decápolis kixin nkexrí kaín tí nkehe kjuíche

ch'ín Jesús kjuínchekitohe ch'án jína. A ntá kaín tí sín kuínhin na chrakon sín.

*Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Lc. 8.40-56)*

²¹ Ntá tió xíkjankao ch'ín Jesús tí ntabárcō tóhe tí ntayaon ínaá ntá kóchjina nchónhya chojni ntá ntahó chrínta ntá kuítóhe ch'án ínaá.

²² Na ntá ikui ijnko ch'ín t'etōan kuènte njnko mé it'in ch'án Jairo. A ntá tió k'uúkon ch'án kixin itjen ch'ín Jesús ntá kjuák'exín toch'in ch'án chrínkí toté ch'ín Jesús a

²³ imá chrónóehē ch'án kixin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'étja itjá chrítaón kja xjan ntá chrókuítóhe xjan jína —ichro ch'án.

²⁴ Ntá ch'ín Jesús sákjuiko tí ch'ín a. Na nchónhya chojni chréhe sín tinkák'ixitja sín ch'án ínaá.

²⁵ A ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni.

²⁶ Imá tjote tjan kixin nchónhya chojni kjuanjon xroan kónhen tjan na ó kjuixin kjuèhe tjan kaín xín nkehe k'uéchóna tjan. Ó jehí titoehya tjan jína la íchá ntsí tinkákótao tjan.

²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án,

²⁸ ntáchro tjan kixin kjónté iké ch'án ó chrókuakóxin tjan na ó tíhó mé chrókuítóhe tjan jína, ichro tjan.

²⁹ Ntá tuénxín tí jni na mé ó kjuixié tjan la ko kónohe tjan kixin ó kjuixin kuítóhe tjan jína tí chín k'uéchóna tjan.

³⁰ Ntá ch'ín Jesús na ó kónohe ch'án kixin kjuachaxién ch'án mé kuítóexín ijnko chojni jína ntá kuinkátjía ch'án kjuan-chankíhi ch'án tí chojni síin a kixin:

—¿Nkexro kuákóxin tí kaná? —ichro ch'án.

³¹ Ntá kjuátehe tí sín k'uajiko ch'án a ntáchro sín kixin:

—Ó noha kixin nchónhya chojni sítja, ¿ntá nkekuènté kixin naxa tjanchankiá kixin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuíxín kixin tsonohe ch'án nkexro tí kuákóxin tí ké ch'án.

³³ Ntá tí tjan a na mé chrakon tjan síxrànkā tjan ó nohe tjan kixin ó kuítóhe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan.

³⁴ Ntá ntáchro ch'ín Jesús kixin:

—Xjeenni, kaín asán kuinkachónkia tí janhan ntá kuítóha jína. Ijie la kjuaxróxin sátsjia ntoa la ó kuítóha jína a —ichro ch'án.

³⁵ Na ntá naxa tjenixja ch'án ntá ó kui chojni kuixin sín ntøe tí ch'ín t'etøan tí nínko. Ntá chénka sín ch'án kixin:

—Xjaan na ó kjuixin k'uén. ¿Nkekuènté naxa chjehé xra tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjehe ch'án tí ch'ín t'etøan tí nínko ntáchro ch'án kixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín.

³⁸ Na ntá tió kjuíji sín tí ntøe tí ch'ín t'etøan tí nínko na k'uikon sín kixin imá sítjité sín tsjánkàma sín tí xjan a.

³⁹ Ntá k'uixenhen ch'ín Jesús nchia kjuanchankí ch'án kixin:

—¿Nkekuènté ánta tjasitérá tsjánkàmará tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetoan ch'án kixin kaín sín sátsji sín ntója. Ntá kjuíko ch'án tí it'é la ko tí ìné xjan la ko tí iy'á sín xriko ch'án ntá k'uixenko sín ch'án tí tjen tí xjan a.

⁴¹ Itsé ch'án tja xjan ntá nkívēe xjan mé nixjeexín ch'án ntáchro ch'án kixin:

—Talita, cumi —mé t'axrjexín kixin: Lonchí, tétuñhan kixin t'aya.

⁴² A ntá tí xjan a ó chóna tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni siín ntiha la chrakon sín k'uikon sín xikaha.

⁴³ Ntá fuerte k'uetoan ch'ín Jesús kixin chróchenkahya sín ninkexró. La kjaxin k'uetoan ch'án kixin tsjanjon sín nkehe sine tjan.

6

Ch'ín Jesús kjuák'e ch'án chjasin Nazaret

(Mt. 13.53-58; Lc. 4.16-30)

¹ A ntá chr'éxin k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkixin ch'án.

² Na ntá tió kui tí yaon t'ok'éhe sín ntá kjuankixin ch'án kjuakoxin ch'án tí nínko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxraohe tí ch'ín i kaín tíhi? ¿Nketí kuixin tí kjuaxrexinkaon chóna ch'án la ko tí kjuaxroan tjasin ch'án?

³ ¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxra tahya sín kuentá nkerí ch'e ch'án.

⁴ Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntøe ch'án na mé tjikosáyehya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitøhe ch'án sín jína.

⁶ Ntá chrakon ch'án kixin xikaha kuítekakuenhya sín ch'án. Na ntá k'uáji ch'án tí chjasin ntsíntsí chjinaxón ntiha kjuako ch'án.

Ch'ín Jesús mé ichr'án tí teyó sín kixin sátsji sín tsjikjako sín itén Dios

(Mt. 10.5-15; Lc. 9.1-6)

⁷ Na ntá k'uíyehø ch'ín Jesús tí teyó sín k'uajiko ch'án a. Ntá kjuankixin k'uøtuønhen ch'án kixin yóyó yóyó sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jínahya chóna chojni.

⁸ La ko k'uøtoan ch'án kixin ninkehó tsjikohya sín kuente ntja. Jehó tí nta tjixín sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon.

⁹ Na ko tokatø ó tsjanka sín la ko tsjiko sín jehó tí ka tjejóya sín ó.

¹⁰ Kjaxin ntáchro ch'án kixin:

—A ntá tí ts'ixenhénra ijnko nchia a ntá ntaha tsjanjon sín kjuachaxin na ntahó chókuitøhará. A ntá tsjixinjian tí xra ntá sátsjixinrá ntiha.

¹¹ Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrjéxinrá tí chjasin a ntá ts'oxènjínra tí nche chóna totará kixin xikaha tsjákoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitøexín ijje chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakohe sín tí chojni a kixin mé chrókjuítóxinhin sín ntje sín.

¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuikite sín itsjé chojni níhi a la ntá kuitøhe sín jína.

Ik'uén ch'ín Juan Bautista

(Mt. 14.1-12; Lc. 9.7-9)

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóna tí ch'ín a —ichro ch'ín Herodes a.

¹⁵ A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etoan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanhia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kixin ts'óna ichjién ch'án.

¹⁸ A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kónínkakohen tjan tí ch'ín Juan ntá chrók'óyán tjan ch'án, kjánchó xitjahya

²⁰ kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jina la ko tjóá asén la méxra kuítóehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjinhin ch'án tí nkehe kuínhin ch'án kjuako ch'ín Juan.

²¹ A ntá tí tjan Herodías mé kjuacha tjan tí yaon kia tsíkjitoxinhin nanó tí ch'ín Herodes a kixin tsík'íyehé ch'án tí síxreé la ko tí sín k'uetuénhen tí sín soldado la ko tí sín t'etoan estado Galilea kixin itsi sín ntøe ch'án kixin siín kia.

²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjinhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanhia tjan kjónté jnkosiné tí chjasin t'etoan ch'án.

²⁴ Ntá jehe tjan na mé kuínhin tjan ntá sákjuí tjan chénka tjan iné tjan kixin tsintáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí iné tjan mé ntáchro kixin:

—Ijie la itjia tjanhia tí kja tí ch'ín Juan Bautista, ichrua —ichro tjan.

25 A ntá tí tjarisoá ikjan tjan tjoka k'uúixenhen tjan tí tjen tí ch'ín rey, ntá ntáchro tjan kíxin:

—A ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

26 Na ntá tí ch'ín rey la mé imá k'uúává ch'án kíxin xíkaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'íyehé ch'án, la ntá xitjahya tsontáchro ch'án “Náhí” tí nkehe kjuanchia tjan.

27 Na ntá tuénxín k'uuetuēnhen ch'án ijnko ch'ín soldado kíxin tsjikao ch'án tí kja ch'ín Juan a.

28 Ntá tí ch'ín soldado mé sákjuí ntōechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan iné tjan.

29 Na ntá kuínhin kaín tí sín k'uék'ajiko ch'ín Juan kíxin xíkaha tsíkónhen. Na ntá sákjuíkakja sín tí cuérpōe ch'án ntá kjuikao sín ntá sákjuíkává sín.

*Ch'ín Jesús mé kjuanjon nkehe kjóne in'ó mil chojni
(Mt. 14.13-21; Lc. 9.10-17; Jn. 6.1-14)*

30 A ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuích'e sín na ko nkexrí kjuako sín.

31 A ntá ntáchro ch'ín Jesús kíxin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xíkaha ntáchro ch'án kíxin sásítji la ko síti nchónhya chojni na ntá xrankahya ts'ejó sín sine sín.

32 Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárcō sákjuí sín ijnko nonte jehó tjan.

33 Na ntá itsjé chojni k'uúikon sín kíxin sákjuí sín la ko kjuátsoan sín kíxin ch'ín Jesús. Ntá xrákuaxín sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús.

34 Ntá k'uínkajinxín ch'án tí ntabárcō, a ntá k'uúikon ch'án kíxin nchónhya chojni siín ntiha ntá kuikonóehé ch'án tí jehe sín na mé éxí yóhē kolélo tjejó sín chóntahya va nkexro ts'ayakonhen va. Ntá kjuankíxin ch'án kjuakohe ch'án sín nchónhya nkehe a.

35 Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kíxin:

—Ntá ó kóntó la kohya ninkexró tjejó ntihi

36 na ntá jaha chrókuítōhé sín kíxin sátsji sín tí chjasin chjinaxón a tsjik'ēna sín nkehe kíxin chóntahya sín nkehe sine sín —ichro sín.

37 A ntá ch'ín Jesús kjuátēhe ch'án ntáchro ch'án kíxin:

—Chjehé sín nkehe sine sín —ichro ch'án.

Ntá kjuátehe sín ntáchro sín kixin:

—¿Á tsjik'enani iyó ciento denario nioṭja tsochjeheni sin sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kixin:

—¿Nkekjaín nioṭja chontará? Sátjitsjehérá —ichro ch'án.

Ntá sákjuitsjehe sín na ntá chrónka sín kixin:

—In'ó nioṭja la ko yaá koche mé siín —ichro sín.

³⁹ Na ntá k'ueṭoan ch'án kixin kaín xín sín chrók'uixitjaxin sín tí chrítaón tí ka yoa a.

⁴⁰ Na ntá xikaha kójnkojié sín ciento sín la ko cincuenta sín k'uixitjaxin sín.

⁴¹ Na ntá ch'ín Jesús kuákja ch'án tí in'ó nioṭja na ko tí yaá koche ntá kontá ch'án nkajní ntá kjuanchia ch'án kjuasáyé Dios. Na ntá kóchrít'o ch'án tot'o tí nioṭja a ntá chjéhe ch'án tí sín k'uájiko ch'án kixin ts'óxikayehe sín sine tí sín siín a la ko kjaxin kóchrít'o ch'án tí yaá koche ntá k'óxikayehe sín kixin sine sín kaín sín.

⁴² Ntá kaín xín sín kjóne sín kókjehe sín.

⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'o tí nioṭja la ko tí koche tsíxehe.

⁴⁴ A ntá tí sín kjóne na mé in'ó mil chojni ntoa.

Ch'ín Jesús mé tjitaón ntayaon

(Mt. 14.22-27; Jn. 6.16-21)

⁴⁵ A ntá tuénxín k'ueṭuēhen ch'ín Jesús tí sín k'uájiko ch'án kixin ts'it'ótjen sín tí ntabárcō a ts'atōye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuitōhe ch'án nixjehe ch'án kaín tí sín siín a.

⁴⁶ Kjuixin nixjehe ch'án sín na ntá jehe ch'án chríin ch'án ijnko jnā tsonixjeexín ch'án Dios.

⁴⁷ A ntá tió k'uixin tie ntá tí ntabárcō na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chrínta ntayaon.

⁴⁸ Ntá kotohe ch'án k'uikon ch'án kixin imá xra tjiko sín tí ntabárcō a kixin tí xríntō imá chjéhe. Nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjui ch'án.

⁴⁹ A ntá tí k'uikon sín kjuítaón ch'án nta, ntá kjuenkayáxin sín kixin kjuacha sín, ichro sín, ntá k'óyako sín

⁵⁰ kixin kaín sín k'uikon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'uit'ótjen ch'án tí ntabárcō tí tjejó sín, a ntá tí xrínto la ó k'uixratá. Ntá imá chrakon sín kixin xikaha kónhen

⁵² kixin kienxínhya sín tí kjuaxroan kjuích'e ch'án kuènte tí nioṭja kixin naṣa kénhya asén sín kuinkáchónki sín ch'án.

Ch'ín Jesús mé kjuínchekitoḥe jína tí chojni níhi tí nonte Genesaret

(Mt. 14.34-36)

⁵³ Ntá tió k'uátòye sín tí nṭayaon ntá kjuíji sín tí nonte Genesaret ntá kjuak'echroḗ sín tí ntabárcḡ a tí chrínta nṭa.

⁵⁴ Na ntá tió k'uínkajinxin sín tí ntabárcḡ, a ntá tí sín siín ntiha tjoka kjuátsoan sín tí ch'ín Jesús.

⁵⁵ Ntá sákjuí sín nkuíxín chjinaxón ntiha kjuankíxin sín kuikao sín tí sijníhi tinkátsénki sín kuikao sín tí tjen ch'ín Jesús.

⁵⁶ La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí sijníhi a chrínta nṭia. Na ntá chrónoḗḗ sín tí ch'ín Jesús kixin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóḥe sín jína.

7

Tí nkehe nchekjita asén chojni

(Mt. 15.1-20)

¹ A ntá iso sín fariseo la ko iso tí sín tjako tí ley kuixin sín chjasin Jerusalén ntá kóchjinehe sín tí ch'ín Jesús.

² Tí sín a, tió k'uíkon sín kixin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrjexín kixin kjuínchexiteyáhya sín tí ley, ntá kjonta tí sín a.

³ (Mé xikaha kjuích'e sín kixin tí sín fariseo la ko kaín tí sín judío mé kuinkáchónki sín éxí k'uékjich'e tí sín táda ósé kixin ná t'òntó itja sín ntá sine sín.)

⁴ Na ko tí tsokjanxin sín nṭasin ná t'ónti sín ntá sine sín. Na ko kjaxin itsjé í so nkehe tinkáchónki sín, éxí tjonemá sín tí vaso t'iyá sín nkehe la ko tí nchésen la ko tí chj chjányan nkehe ne sín la ko tí kámé sín nchetjóá sín.)

⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjé ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátḗḗ ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsintáchro ch'án kixin ntoáhya tsjenkayáxinrá tí jahará kixin xikihi tsíkjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan, a ntá tí asén sín ikjín kuítóḥe sín tí janhan

⁷ Méxra ó chónkó tóchjina sín xraxinkaon sín tí janhan,

kíxin tí nkehe tjako sín la tí nkehe tsík'et̩oan chojni ó.*

Mé xíkaha ichro itén Dios.

⁸ Ntá jahará ku̩toherá tí nkehe tsík'et̩oan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'iárá nkehe, la ko kjaxin í so nkehe yóhē tinkachónkirá —ichro ch'án.

⁹ Kjaxin ntáchro ch'án kíxin:

—Jahará chréhérá tí nkehe k'uékjich'e chojni ntá xíkaha t̩toherá ntáha tí nkehe tsík'et̩oan Dios.

¹⁰ Tsíntáchro ch'ín Moisés kíxin: “Tsochonteherá kjuasáyé it'ará la ko ñará”, la ko “A ntá tí nkexro t'ántaxính̩n it'é o ñé la chrók'óyán sín.”†

¹¹ A ntá jahará ntáchrórá kíxin ó nchoxon kíxin ijnko nkexro tsochéna it'é la ko ñé kíxin: “It'éni, ñéni, chrokjuahya tsjink̩tsani tí jaha kíxin kaín tí nkehe chóntani mé k'óna Corbán” (mé t'axrjexín kíxin kaín tí chichaon k'uáyéhē Dios).

¹² A ntá xíkaha jnkójín nkexro tsontáchro ch'án tíhi ntá jahará tsontáchrórá kíxin í t'ichjánxinhya tsjink̩tsa ch'án tí it'é ch'án la ko tí ñé ch'án.

¹³ A ntá tí xíkaha la t̩toherá tí nkehe tsík'et̩oan Dios éxi sínkíhya, a ntá ókjé nkehe ich'erá, ntá tánkíhará chojni. Mé xíkaha ich'erá nchónhya nkehe tóyóhē tíha —ichro ch'ín Jesús.

¹⁴ Na ntá k'uíyēhē ch'ín Jesús tí chojni ínaá ntáchro ch'án kíxin:

—Tinhínrá kaín rá tí nkehe ntáxrjan la ko tiénxinrá.

¹⁵ Tí nkehe ine chojni la jehya j̩ē tíha. Tí nkehe t'axrjeníxin asén chojni mé j̩ē tíha.

¹⁶ Tí tjinkáonrá chrókuinhínrá la chrókuinhínrá —ichro ch'án.

¹⁷ A ntá tío ku̩tohe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uíxenhēn sín nchia. Na ntá kjuanchankíhi sín ch'án kíxin nkexrí t'axrjexín tí nkehe kjuako ch'án a.

¹⁸ Na ntá ntáchro ch'ín Jesús kíxin:

—¿Á kjaxinrá tiénxinhyará? ¿Á noahyará kíxin tí nkehe ineni na jehya j̩ē

¹⁹ kíxin jehya asénni sátsji? Tí nkehe ineni na sátsji nkaya tseeni na ko xik'axrje ínaá —ichro ch'án.

Mé t'axrjexín kíxin tí nkehe sineni la jehya j̩ē.

²⁰ Ntá ntáchro ch'ín Jesús kíxin:

—A ntá tí nkehe t'axrjeníxin chojni na mé j̩ē táha.

²¹ Nkaya asánrá mé t'axrjeníxin tí jínahya tjenkayáxinrá, la ko tí tjachēhē kichuárá, la ko tí tjinkáonrá tsochontará chojni chjin ókjé, la ko tí t'oyán kichuárá

* 7:7 Isaías 29.13 † 7:10 Éxodo 20.12; 21.17

22 la ko tí chrókuegerá, la ko tí tjaké asánrá tí nkehe chóna ókjé sín, la ko tí jínahya ch'ehérá kíchuará, la ko tí kjuach'ia xríkoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na kó tí chontahyará kjuaxrexinkaon jína.

23 Kaín tí nkehe jínahya a mé t'axrjeníxin chojni, la mé tjasixín sín jie.

*Ijnko tjan tsíkji_xin kjín mé kuítekaon tjan tí ch'ín Jesús
(Mt. 15.21-28)*

24 Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uíxenhen ch'án injko nchia kíxin tjinkakonhya ch'án kíxin chrókónohe chojni kíxin ntaha tjen ch'án. Kjánchó xitjahya kjuák'emá ch'án ntiha.

25 Na ntá injko iné injko tjan tjarisoá chóna injko nchakuen tí jínahya mé kuínhin nkehe tí xra ch'e ch'ín Jesús kíxin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús.

26 Na mé jehe tjan tsíkji_xin kjín, na mé tsíkji_xin tjan nó nación Sirofencia. Na ntá jehe tjan a mé kui tjan chrónóehé tjan tí ch'ín Jesús kíxin chrókuakitsje ch'án tí nchakuen tí jínahya chóna xjeen tjan.

27 Ntá ntáchro ch'ín Jesús kjuátēhe ch'án kíxin:

—Títohé senó chrókjóne tí xjan. Jehya tí jína chrókuakítsjaha xjan tí niotja ntá chrótjaha konia chrókjóne va —ichro ch'án.

28 Ntá jehe tjan kjuátēhe tjan ntáchro tjan kíxin:

—Chaxín xikaha, Inchéni. Kjánchó kjónté tí konia tjejoyánki mesa ine tí tot'o niotja tóxènjín tí chánjan —ichro tjan.

29 Na ntá ntáchro ch'ín Jesús kíxin:

—Táha la chaxín ntoá ntáchrua. Sátjia kíxin tí nchakuen tí jínahya ó k'uaxrjexín tí xjaan —ichro ch'án.

30 A ntá tió kjuíji tjan ntōe tjan, na ntá k'uíkon tjan kíxin tí xjeen tjan na mé ó ntoá tjetsínkaták'á xjan tí cama kíxin ó tsík'axrje tí nchakuen tí jínahya a.

Ch'ín Jesús mé kjuínchekitohe jína injko ch'ín tienhya la ko nixjahya

31 Ntá ch'ín Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea.

32 Ntá kuikao sín injko ch'ín tienhya na ko ntoáhya nixja ch'án. Ntá chrónóehé sín tí ch'ín Jesús a kíxin tsjak'etja tja ch'án chrítaón kja tí ch'ín a kíxin tsitohe ch'án jína.

33 Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhen ch'ín Jesús tatsjon tí ch'ín tienhya. La ko

kjaxin tí dedo tja ch'án mé kuikite ch'án ntaté ch'án ntá kjuínchekákóxín ch'án nejen tí ch'ín nixjahya a.

³⁴ Ntá konta ch'án nkajní k'uáváxin ch'án na ntá nixjehe ch'án tí ch'ín tienhya a, ntáchro ch'án kixin:

—Efata —mé t'axrjexín nkívee sín kixin: ¡Tsoxitjehe!

³⁵ Na ntá tuénxín xítjehe tatsjon tí ch'ín tienhya ntá kuínhin ch'án la ko kuítóhe jína tí nejen ch'án, ntá jína nixja ch'án.

³⁶ Ntá ch'ín Jesús k'ueṭoan ch'án kixin ninkexró tsochenkahya sín. Ntá kjónté imá k'ueṭoan ch'án ntá ántosén sín kjónté íchá xrichronka sín.

³⁷ Na mé imá chrakon sín ntá ntáchro sín kixin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —íchro sín.

8

*Ch'ín Jesús mé kjuanjon nkehe kjóne noó mil chojni
(Mt. 15.32-39)*

¹ A ntá ijnko yaon nchónhya chojni k'uúxikóchjina inaá. A ntá chóntahya sín nkehe sine sín. Na ntá ch'ín Jesús mé k'uúyēhe ch'án tí sín k'uájiko ch'án, a ntá ntáchro ch'án kixin:

² —Imá tikonóahā kaín tí sín i kixin ó ní yaon tjékian sín ntihi ntá chóntahya sín nkehe sine sín.

³ Ntá chrókuétuanhya sín sáchrókjui sín ntōe sín tí naxa nehya sín kixin ntia ó chrókótiēnxin sín kixin iso sín la imá kjín tsíkijixín sín —íchro ch'ín Jesús.

⁴ Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjóne kaín tí sín a kixin kohya nchia tí tjejóni? —íchro sín.

⁵ Na ntá ntáchro ch'ín Jesús kixin:

—¿Nkekjaín niotja chontará jahará? —íchro ch'án.

Ntá jehe sín kjuátehe sín ntáchro sín kixin:

—Yato niotja chóntani —íchro sín.

⁶ Na ntá ch'ín Jesús k'ueṭuēnhen ch'án kaín xín sín kixin ts'ixitjaxín sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'ō ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayēhe sín tsakja kaín xín tí sín síin a.

⁷ Na ko iso koche ntsíntsí chónta sín. Ntá ch'ín Jesús kjuanchia ch'án kjuasáya ntá k'ueṭoan ch'án ts'óxíkayēhe sín kjaxin.

⁸ Na mé kaín xín sín kjóne sín na kókjehe sín. Ntá chr'éxin naxa kjuínchekaon sín yato ntaxra tí tot'ō tí nkehe tsíxehe.

⁹ Na mé chjina noó mil chojni kjóne sín. Ntá ch'ín Jesús mé nixjehe ch'án sín sákjuí sín

¹⁰ ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabárc̄o a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jié
(Mt. 16.1-4; Lc. 12.54-56)

¹¹ Na ntá kui iso sín fariseo kjuankíxin sín tjo sín tí ch'ín Jesús kjuanchehe sín ch'án kixin chrókjuakoxin ch'án ijnko kjuaxroan jié kuènte nkaya nkajní kixin tjinkaon sín chrókjuachaxin sín ch'án.

¹² A ntá ch'ín Jesús na mé k'uáváxin ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

¹³ Na ntá kuitohe ch'án tí sín a, ntá xík'it'ótjen ch'án tí ntabárc̄o ntá sákjuí ch'án í jnko tóhe ntayaon inaá.

Tí xroan nchek'ánkí tí niotjé tí sín fariseo
(Mt. 16.5-12)

¹⁴ Ntá k'uitjáyenhen sín tsíkjikohya sín nkehe sine sín. Jehó jnkokoá niotja chóna sín nkaxenhen tí ntabárc̄o a.

¹⁵ Ntá ch'ín Jesús k'uetuenhen ch'án tí jehe sín kixin:

—Chrókóxakonhanrá kixin tí xroan nchek'ánkí niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kichó sín kixin:

—Mé xíkaha ichro ch'án kixin tsíkjikohyani niotja.

¹⁷ Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuènté tjórá kixin chontahyará niotja? ¿Á naxa tiénxinhyará la ko naxa noahyará? ¿Á kénhya asánrá tin-kachónkirá Dios?

¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará?

¹⁹ Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'ó niotja naxa kjuenájinrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xíntáchro ch'ín Jesús inaá kixin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'ó niotja kjuenájinrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjóté xíkaha la, ¿á naxa tiénxinhyará? —ichro ch'án.

Ch'ín Jesús mé kjuínchekitohe jína ijnko ch'ín t'ikonhya tí ch-jasin Betsaida

²² **A** ntá chr'éxin kjuíji sín chjasin Betsaida, a ntá ikui iso sín kuikao ijnko ch'in t'ikonhya. Ntá chrónohe sín tí ch'in Jesús kixin chrókjuincheke tohe ch'an jina tí ch'in a.

²³ Ntá ch'in Jesús mé itsé ch'an tja tí ch'in t'ikonhya a ntá k'uaxjentako ch'an ikon tí chjasin a. Na ntá kuikitehe ch'an ntaté ch'an ikon tí ch'in t'ikonhya a la ko kjuak'etja tja ch'an ntá kjuanchankíhi ch'an kixin:

—¿Á ó t'ikuan ntsí? —ichro ch'an.

²⁴ Ntá ntáchro tí ch'in t'ikonhya kixin:

—T'ikonni chojni, kjánchó éxí nta tsjehe itji —ichro ch'an.

²⁵ Ntá ch'in Jesús mé xikjak'etja tja ch'an inaá tí kon tí ch'in t'ikonhya a. **A** ntá tí ch'in k'uikonhya kuítóhe ch'an jina la jina t'ikon ch'an kaín nkehe.

²⁶ Na ntá ch'in Jesús mé k'uetuēnhen ch'an tí ch'in k'uék'ikonhya kixin sátsji ch'an ntōe ch'an ntáchro ch'an kixin:

—Chrók'uixenhya chjasin la ko ninkexró chróchenkahya ntiha —ichro ch'an.

Ch'in Pedro chrónka ch'an kixin ch'in Jesús mé tí nkexro Cristo (Mt. 16.13-20; Lc. 9.18-21)

²⁷ **A** ntá tí ch'in Jesús la ko tí sín k'uájiko ch'an sákjuí sín tí chjasin ntsí chjino Cesarea de Filipo. **A** ntá tí ntia mé kjuanchankíhi ch'in Jesús tí sín k'uájiko ch'an kixin:

—¿Nkehe ntáchro chojni kixin nkexro tí janhan? —ichro ch'an.

²⁸ Ntá ntáchro sín kixin:

—Iso sín mé ntáchro sín kixin jaha mé ch'in Juan Bautista, ichro sín. **A** ntá í so sín na mé ntáchro sín kixin jaha mé ch'in Elías, ichro sín. **A** ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'an sín inaá kixin:

—¿**A** ntá jahará nkechorá kixin nkexro tí janhan? —ichro ch'an.

Ntá kjuátehe ch'in Pedro ntáchro ch'an kixin:

—Jaha mé tí Cristo, ichroni —mé chro ch'an.

³⁰ Ntá k'uetōan ch'in Jesús kixin tsochenkahya sín ninkexró.

Ch'in Jesús chrónka ch'an kixin ts'en ch'an (Mt. 16.21-28; Lc. 9.22-27)

³¹ Na ntá kjuankíxin kjuako ch'in Jesús kixin tí Xjeen Dios K'óna Chojni mé t'ichjánxin kixin imá tsjasóte ch'an la ko tsotjinkakonhya kaín tí sín táda kuēnte n̄inko la ko tí sín t'etōan kuēnte tí sín nchat'á la ko tí sín maestro tjako tí ley. **A** ntá tí sín a mé ts'óyán sín ch'an. Kjánchó tí nixin yaon na ó tsoxechón ch'an inaá.

³² Kaín tíha mé ntoá chrónka ch'an. **A** ntá ch'in Pedro mé kuakitsjenta ch'an tí ch'in Jesús chrókjuentuēhe ch'an.

³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxi tjenkayáxin Dios. Náhí. Jaha tjenkayáxian éxi tjenkayáxin chojni ó —ichro ch'án.

³⁴ Ntá ch'ín Jesús mé k'uíyehē ch'án tí sín k'uájiko ch'án la ko tí sín tsíkóhjinna a. Ntá ntáchro ch'án kixin:

—Tí jnkojínrá tjinkáonrá tsochréhérá tí janhan na t'ichjánxin tsjtohérá kaín tí nkehe tjaké asanrá na ntá tsamará tí ntacruz kuéntará, a ntá tsochréhérá tí janhan.

³⁵ A ntá tí nkexro tjinkaon jehó sinchekaá asén mé ts'itjayan. A ntá tí nkexro sinchek'itjayanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá.

³⁶ ¿A ntá nkehe tsonhen tí chrókjuacha ijnko chojni chróhónta kaín nkehe síin chjasintajni, a ntá kjuachón chrókjuintchek'itjayan?

³⁷ ¿Nkehe chrókjuenká chojni kixin chróhónta tí kjuachón?

³⁸ A ntá jnkojín nkexro tsosuehē kixin tinkáchónki tí janhan la ko tí tan kuéntana nkayakon tí chojni jínahya chóna jie la kjaxin tí Xjeen Dios K'óna Chojni tsosuehē ch'án tsontáchro ch'án kixin chóxin ch'án tí jehe sín tíó tsokjan ch'án tsikao ch'án tí kjuachaxin jie kuènte It'é la ko tsikao tí sín ángel.

9

¹ Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naxa ts'énhyará ts'ikonjiará itsi tí kjuachaxin ts'etqan Dios —ichro ch'án.

*Ch'ín Jesús mé k'uíxitoxin nkexrí tsjehe ch'án
(Mt. 17.1-13; Lc. 9.28-36)*

² Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuí sín jehó sín ijnko jnā noi. Ntá ntiha mé xrinahya k'uíxitoxin ókjé nkexrí tsjehe ch'án k'uíkon tí jehe sín.

³ A ntá iké ch'án tsík'óna imá tjákiní la ko imá tjóá éxi chrinta tsjehe, a ntá ntihi chjasintajni kohya ninkexró chrókjuen tí ka chrókuitqhe imá tjóá xikaha.

⁴ Na ntá titàya k'uíkuèn sín ntiha itjen tí ch'ín Elías la ko tí ch'ín Moisés tjejójtjo sín tí ch'ín Jesús.

⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jina kixin tjejóni ntihi. Chrókjuich'énani iní nchia la mé ijnko kuéntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án.

⁷ Na ntá xrínahya ikui ijnko tjuj kjuák'etja chrítaón kaín xín tí tjejó sín. Na ntá chríkjan tí tjuj kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuahā ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxín sín tí jna ntá k'uetōan ch'ín Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni.

¹⁰ Ntá ninkexró chenkahya sín tí nkehe k'uíkon sín. Na ntá jehó sín mé tjejóto sín kixin nkehe t'axrjexín tí nkehe chrónka ch'án kixin tsoxechón ch'án inaá.

¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuente kixin ntáchro tí sín tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjānxín tsjasóte la ko tsotjinkakonhya sín.

¹³ Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhin sín éxí nixja tí xroon itén Dios kixin xikaha tsonhen —mé xikaha chrónka ch'ín Jesús.

Ch'ín Jesús mé kjuínchekitohe jína ijnko xjan chóna ijnko nchakuen tí jínahya

(Mt. 17.14-21; Lc. 9.37-43)

¹⁴ A ntá tió ikjan sín tí kuitōhe tí í so sín k'uájiko ch'án ntá k'uíkon sín kixin nchónhya chojni tsík'antatjen tí jehe sín. Kjaxin ntaha síin tí sín tjako tí ley ikjo tí jehe sín.

¹⁵ A ntá tuénxín tió k'uíkon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án.

¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjóra tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan.

¹⁸ Kjónté nkerí tjen xjan la tí nchakuen tí jínahya mé tjáka xjan nonte, ntá ntalóxrjo sítixín ir'va xjan na netaón xjan neno xjan na méxra tjejhya xjan. Ntá xrjanóaha tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xrákoará ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uikon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntáloxrjo ir'va xjan.

²¹ Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xikaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsí xjan.

²² A ntá jnkoyaxón tí nchakuen tí jínahya a mé tjákáte xjan xrohi la ko tjákánkí xjan intá kixin tjinkaon chrók'óyán tí xjan a. A ntá jaha ¿á tsjácha tsjínkítsani? La tikonóehéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuénté tjanchankína kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

²⁵ Ntá k'uikon ch'ín Jesús kixin itsjé chojni kóchjina. Ntá nixjehe ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekiénhya chojni. Ijie la tétuanhan kixin t'axrjéxian tí xjan na ko tsjtohé xjan la í tsokjanhya inaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a inaá, ntá k'uaxrjexín ntiha. Na éxí tsík'en xjan xikaha tsjehe xjan. Ntá itsjé sín ntáchro sín kixin ó tsíkjixin tsík'en xjan, ichro sín.

²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uixenhen sín ijnko nchia. Ntá jehe sín kjuanchankíhi sín ch'án kixin:

—¿Nkekuénté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tíhi la t'ichjánxin kixin nchónhya tsochronóehérá T'aná la ko sintehyará —ichro ch'án.

*Yóxin chrónka ch'ín Jesús kixin its'en ch'án
(Mt. 17.22-23; Lc. 9.43-45)*

³⁰ **A** ntá tió sákjuixin sín ntiha ntá k'uátsínka sín estado Galilea. **A** ntá ch'ín Jesús tjinkakonhya ch'án kixin ninkexró ntiha tsonohé sín

³¹ kixin tinkákjakohe ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon nixin na ó tsoxechón ch'án inaá —ichro ch'án.

³² Ntá jehe sín mé kienxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrxén tíha.

¿Nkexro tí imá tjetooan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; **a** ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kichuárá tí kuini ntja? —ichro ch'án.

³⁴ Ntá jehe sín la tánikoá sín kixin tí ntja kui sín tinkákjo kichó sín kixin nkexro tí imá ts'etooan.

³⁵ Ntá ch'ín Jesús mé kjuák'etjaxin ch'án ntá k'uíyehé ch'án tí teyó sín k'uájiko ch'án, **a** ntá ntáche ch'án sín kixin:

—Tí jnkójínrá tjinkáoonrá chrókuétoanrá má ntá t'ichjánxin kixin tsjixixín tsochréhérá kaín sín, ts'ítuanhanrá la ko tsjínkĩtsará kaín xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkójín nkexro chrók'uáyéhe ijnko chánjan kixin tinkáchónki sín tí janhan la mé xikaha chrók'uáyéhe sín tí janhan la ko kjaxin éxí chrók'uáyéhe sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjinkĩtsa tí jeheni

(Lc. 9.49-50; Mt. 10.42)

³⁸ **A** ntá ch'ín Juan mé ntáchro ch'án kixin:

—Maestro, k'uíkoni ijnko chojni na mé kjuachaxin ihnjá mé takitsjexín ch'án nchakuen tí jínahya chóna chojni. Ntá k'uetuenhenni ch'án kixin xikahya chrókjuich'e ch'án kixin xrikoxyani ch'án —ichro ch'án.

³⁹ Ntá ntáchro ch'ín Jesús kixin:

—Nté tjtóhé ch'án kixin ninkexró tjasixín kjuaxroan kjuachaxin njina la tuénxín chrókjuacha chrók'uántaxína sín.

⁴⁰ Tí nkexro nínkakuenhyani la mé tjinkĩtsa tí jeheni.

⁴¹ **A** ntá jnkójín nkexro tsotjáhará kjónté ijnko vaso ñnta tsjanjonxín sín njina kixin jahará la tinkachónkirá Cristo, ntáxrjan kixin chaxín ts'áyéhe sín nkehe.

Tí chojni tjasin jię mé tsjasóte sín
(Mt. 18.6-9; Lc. 17.1-2)

42 'A ntá jnkójín nkexro chrókjuachroe ijnko xjan kixin chrókjuasin xjan jię tió tinkáchónki xjan tí janhan la íchá jína chrókjuincheteyá sín ch'án ijnko xro jié tsík'óna xrochre la chrókjuikákánkí sín ch'án ntayaon.

43 'A ntá tí itjá tjásixián jię na mé íchá chrókójína chrókochrínjian kixin kjónté jnkokoá tjá mé tsochontaxián kjuachón. 'A ntá tí yói tjá la tíha mé sáchrókjuixian tí siín xrohi xitjahya ts'anka,

44 tí siín kosinto t'enhya la ko síche xrohi ts'ankahya.

45 'A ntá kjaxin tí totá tjásixián jię na íchá jína chrókochrínjian kixin kjónté jnkokoá totá mé tsochontaxián kjuachón. 'A ntá tí yói totá la tíha sáchrókjuixian tí siín xrohi xitjahya ts'anka,

46 tí siín kosinto t'enhya la ko síche xrohi ts'ankahya.

47 'A ntá tí ikuan tjásixián jię na íchá jína chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etōan. 'A ntá tí yói kuan la tíha mé sáchrókjuixian tí síche xrohi

48 tí siín kosinto t'enhya la ko siín xrohi ts'ankahya.

49 'A ntá kaín nkexro t'ichjánxin tsjasóte. 'A ntá kaín nkehe ts'áyēhe Dios chóna xijnta.

50 Tí xijnta la jína. 'A ntá tí chrók'uankehe tí jní la ntá xitjahya chrókójní inaá. Jahará mé chrókóyohará éxi xijnta kixin kjuaxróxin chrók'uejokoará kichuára —ichro ch'án.

10

Tjako ch'ín Jesús kixin chrókjuákehya kichó sín
(Mt. 19.1-12; Lc. 16.18)

1 Na ntá ch'ín Jesús mé k'uaxrxjexín ch'án chjasin Capernaum sákuí ch'án nó estado Judea la ko nó tóhe ntarío Jordán. Ntá nchónhya chojni kójnkotsé sín tí tjen ch'án ntiha. Ntá kjuakohe ch'án tí jehe sín kixin xikaha kuèhen ch'án.

2 Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxin sín ch'án. Ntáchro sín kixin:

—¿Á siín kjuachaxin tsjákehē chojni ntoa ichjién? —ichro sín.

3 Ntá kjuátehe ch'án ntáchro ch'án kixin:

—¿Nkehe tí k'uetuñhanrá tí ch'ín Moisés? —ichro ch'án.

4 Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjéxín kichó sín —ichro sín.

5 Ntá ch'ín Jesús ntáchro ch'án kixin:

—Ntá jahará icha asánrá titekákonhyará ntá k'uetōan ch'án ts'óna tí xroon a.

6 Kjánchó tí xrankíxixín tió kjuích'éna Dios kaín xín nkehe la kjuích'éna ch'án ijnko chojni ntoa la ko ijnko chojni chjin.*

7 Méxra tí chojni ntoa tsítóhe ch'án tí it'é ch'án la ko ìné ch'án kíxin tsakja ch'án ichjién ch'án

8 ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá.†

9 Na mé xikaha tí kjuachaxin kuènte Dios kójnkojiéxin sín ntá jehe sín chrók'uitjéhya kíchó sín —ichro ch'án.

10 A ntá tjejó sín nchia ntá tí sín k'uájiko ch'án a mé kjuanchankíhi sín ch'án ínaá kíxin á xitjahya ts'itjíhi kíchó sín.

11 Na ntá ntáchro ch'ín Jesús kíxin:

—Tí jnkojín nkexro tsjákehe ichjién ntá tsakja ch'án í jnko chjin na mé xikaha tsjáchehe ch'án tí tjan tsíkótehe ch'án saoxín.

12 La ko kjaxin tí chojni chjin tsíkjákehe xì tsakja tjan í jnko chojni ntoa na mé xikaha kjaxin tjan tjasin tjan jie —ichro ch'án.

Ch'ín Jesús kjuíncheyaon ch'án xjan

(Mt. 19.13-15; Lc. 18.15-17)

13 Ntá kjuíkao sín xjan kíxin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sín kjuíkao xjan.

14 Ntá k'uíkon ch'ín Jesús ntá kónínkaon ch'án ntáchro ch'án kíxin:

—Nté títóhéra tí xjan tsoxrakoa tí tjén janhan la t'inkakuènyhá xjan kíxin tí sín kuènte kjuachaxin kuènte Dios la mé tóyóhe éxí tí xjan a.

15 Ntá chaxín ntáxrjan kíxin tí nkexro ts'ónahya éxí ijnko chánjan xitjaha ts'ejó sín tí ts'etjan Dios tí kjuachaxin kuènte ch'án —ichro ch'án.

16 Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehe ch'án tí ch'ín Jesús

(Mt. 19.16-30; Lc. 18.18-30)

17 A ntá tió sákjuí ch'ín Jesús ínaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kíxin:

—Jaha, maestro jína. ¿Nkexrí chrókjuich'eni kíxin chrók'uitjani kjuachón jnkochrín? —ichro ch'án.

18 Ntá ntáche ch'ín Jesús tí jehe ch'án kíxin:

—¿Nkekuènté ntáchrúa kíxin jína tí janhan? Jehó jnkokoá nkexro mé jína la tíha mé Dios.

19 Ntá jaha ó noha kíxin nkexrí k'uetjan Dios kíxin: “Chrókjuacheéhya kíchuá la chrók'oyánhya chojni la

* 10:6 Génesis 1.27; 5.2 † 10:8 Génesis 2.24

chrókuehya la chrókjóntahya kichuá la chrókjuich'iahya la ko chróchontehé kjuasáya it'á la ko ìná”‡ —ichro ch'án.

²⁰ A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxá t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sinchekjixián tí nkehe chonta la mé nchekitonhén tí chojni nòa, a ntá tí nkehe tjete tsochonta nkaya nkajní. A ntá tíó tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

²² Ntá tíó kuínhin ch'án xikaha ntá k'uává ch'án sákjuí ch'án, kixin imá tsjé nkehe chónta ch'án.

²³ Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xrá ijnko chojni chónta imá tsjé nkehe ts'ixenhen sín tí tjen Dios t'etōan —ichro ch'án.

²⁴ Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjekonhen tí nkehe chónta sín na imá xrá ts'ixenhen sín tí tjen Dios t'etōan.

²⁵ Antsí xrahya chrók'uaátsínka ijnko kocamello ijnko tjar'in ntachica tjexrja. A ntá antsí má xrá ijnko ch'ín chónta itsjé nkehe chrók'uixenhen ch'án tí tjen Dios t'etōan —ichro ch'án.

²⁶ Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

²⁷ Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Ìnchéni, kaín ni mé kuítóheni kaín nkehe chóntani ntá chréhēni tí jaha —ichro ch'án.

²⁹ Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkojín nkexro tsítóhe ntōe sín la o tí kichó ntoa o tí kichó chjin la o it'é o iné sín o ichjién sín o xjeen sín o nōntēe kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón

³⁰ na mé ntihi chjasintajni tsochónta sín ciento veces nchónhya ntōe sín la ko éxí kichó sín la ko éxí iné sín la ko éxí xjeen sín ts'ikon sín itsjé chojni kjé la ko éxí nōntēe sín xikaha

‡ 10:19 Éxodo 20.12-16; Deuteronomío 5.16-20

ts'ikon sín itsjé nonte. Kjónté tsjasóte sín ntihi chjasintajni ntá chr'éxín tsochónta sín tí kjuachón jnkochrín.

³¹ A ntá itsjé tí sín t'etōan ijie mé tsjixixín tsochréhe sín. A ntá itsjé tí sín t'ituenhen ijie, na mé tí sín a mé ts'etōan sín tí ntiha.

Níxin chronka ch'ín Jesús kixin its'en ch'án
(Mt. 20.17-19; Lc. 18.31-34)

³² Ntá tjejótti sín chr'ín sín tí ntia sátsji chjasin Jerusalén. Ntá ch'ín Jesús mé tjetaón ch'án ntia ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín ínaá ntá kjuankíxin ch'án chénka ch'án sín nkexrí tí nkehe tsonhen ch'án.

³³ Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchat'á t'etōan la ko tí sín tjako tí ley. Ntá ts'etōan sín kixin its'en ch'án. Ntá sinchek'áyéhe sín ch'án tí sín jehya judío.

³⁴ Ntá jehe sín la tsjanoá sín tí jehe ch'án la ko ntaté sín tsikite sín ch'án la ko tsjate sín ch'án ntá ts'óyán sín ch'án. Kjánchó tí yaon níxin mé tsoxechón ch'án ínaá —mé xíkaha ichro ch'ín Jesús.

Ch'ín Jacobo la ko ch'ín Juan tjanchia sín nkehe
(Mt. 20.20-28)

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xrā —ichro sín.

³⁶ Ntá kjuanchankí ch'ín Jesús ntáchro ch'án kixin:

—¿Nkehe tí xrā tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétoanxián tí kjuachaxián jíe na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'ín Jesús tí jehe sín kixin:

—Jahará la noahyará nkehe tí tjanchaná. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

³⁹ Ntá jehe sín kjuátēhe sín ntáchro sín kixin:

—Kjā tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan.

⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsíkónoxín —ichro ch'án.

41 **A** ntá tió kuínhin tí ite sín xíkaha tsintáchro tí sín a ntá kjuankíxin kónínkakohen sín tí ch'ín Jacobo la ko tí ch'ín Juan.

42 Ntá k'uíyehē ch'ín Jesús kaín tí jehe sín ntá ntáche ch'án sín kíxin:

—Ó nohará kíxin tí sín t'etōan chjasintajni la imá t'etuenhen sín kaín chojni la ko tí sín imá tjetōan mé imá nchehnkehe asén sín kíxin ihyé sín ts'etōan sín.

43 Kjánchó jahará la xíkahya chrókjuich'erá. Náhí. Tí jnkójnra tjinkáonra chrókuétōanra la chrókjuínkĩsará tí í so sín.

44 **A** ntá tió jnkójnra antsí chrókuétōanra mé t'ichjánxin senó chrókjuákoxinra chrókjuich'eherá kíchuára xra.

45 Kíxin tí Xjeen Dios K'óna Chojni mé kuihya ch'án kíxin chojni chrókjuich'ehe ch'án xra. Náhí. Ikui ch'án kíxin sich'ehe ch'án sín xra la ko ts'enyákonhen nchónhya chojni kíxin tsaáxin sín ch'án —ichro ch'án.

Ch'ín Bartimeo k'uék'ikonhya ch'án ntá ch'ín Jesús kjuínchekitohe ch'án jina

(Mt. 20.29-34; Lc. 18.35-43)

46 Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjaxín ch'án chrínta ntja tjanchak'á ch'án.

47 Ntá kuínhin tí ch'ín t'ikonhya kíxin ó kuichjina ch'ín Jesús, mé tí nkexro kjuixín chjasin Nazaret, ntá tí ch'ín t'ikonhya kjuankíxin t'èya ch'án ntáchro ch'án kíxin:

—Jaha Jesús, tsík'axrjeníxian ch'ín David tikonóghéni —ichro ch'án.

48 Ntá nchónhya sín k'uētuenhen sín ch'án kíxin tsotání ch'án. Ntá íchá antsí má tsen t'èya ch'án ntáchro ch'án kíxin:

—Jaha, tsík'axrjeníxian ch'ín David tikonóghéni —ichro ch'án.

49 Ntá ntahó kjuák'e ch'ín Jesús. Ntá k'uētōan ch'án kíxin:

—T'iyehérá tí ch'ín a —ichro ch'án.

Ntá k'uíyehē sín tí ch'ín t'ikonhya ntá chénka sín ch'án kíxin:

—Tócháha la t'inkatjen kíxin tjet'iyaha ch'án. —ichro sín.

50 Ntá kjuak'ē ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús.

51 Ntá ch'ín Jesús kjuanchankíhi ch'án tí ch'ín a kíxin:

—¿Xá nkehe tjinkávan chrókjuit'ahá? —ichro ch'án.

Ntá kjuátehe tí ch'ín t'ikonhya ntáchro ch'án kíxin:

—Maestro, tjinkaonni kíxin chrók'uikonni —ichro ch'án.

52 Ntá ntáche ch'ín Jesús tí ch'ín a kíxin:

—Ijie la jína sátsjia. Ó kuítóha jína kixin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

11

*Ntá ch'ín Jesús k'uíxenhén ch'án chjasin Jerusalén
(Mt. 21.1-11; Lc. 19.28-40; Jn. 12.12-19)*

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jnā Olivo ntá k'uetuēnhen ch'ín Jesús iyó tí sín k'uájiko ch'án,

² ntáchro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehéra va ntá tsjikoaná va ntihi.

³ A ntá tí jnkojín chojni tsjanchankíhará sín kixin nkekuènté xikaha ch'erá ntá tsontáchrórá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va.

⁵ Ntá iso tí chojni tjejó ntiha kjuanchankí sín kixin:

—¿Nkekuènté xikaha ch'erá tjasintankehéra tí kolócho a? —mé chro sín.

⁶ Ntá kjuátexín sín éxí k'uetōan ch'ín Jesús. Ntá kjuanjon sín kjuachaxín sátsjiko sín va.

⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús.

⁸ Ntá itsjé chojni kuakitsje sín iké sín la kjuentoá sín tinkák'ikjínxín sín ka tí ntja ts'atsínkaxín ch'án. Ntá iso sín la mé tóchrínjin sín chaon ntá itsá kayoa ntá xrákao sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankíxin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kuixín kjuachaxin ihnié Inchéni.

¹⁰ Jína tí kjuachaxién Dios itsi mé ts'etuēnhen tí nkexro k'uaxrjeníxin it'éni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uíxenhén ch'ín Jesús chjasin Jerusalén la ko kjaxin k'uíxenhén ch'án tí njnko jié tsjehe ch'án nkuíxín tí nkaxenhén. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

Ch'ín Jesús kónínkakonhen ch'án ijnko nta t'óna to higo tsík'ónahya to

(Mt. 21.18-19)

¹² A ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta.

¹³ Ntá k'uíkon ch'án kjín kixin itjen ijnko nta t'óna to higo itsá kayoa. Ntá sákjuítsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to.

¹⁴ Ntá nixjehe ch'ín Jesús tí nta t'óna to higo k'uetuēnhen ch'án tí nta kixin:

—Í ninkexró sinehya tí to ts'óna tí jaha ínaá —ichro ch'án.

A ntá tí sín k'uájiko ch'án mé kuínhin sín xikaha.

Ch'ín Jesús kjuínchetjóá ch'án nínko

(Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uíxēnhen ch'ín Jesús nkaxēnhen nínko a. Ntá kjuankixin ch'án k'uinkité ch'án tí sín nchekjixín nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá

¹⁶ la ko kjuanjonhya ch'án kjuachaxin kixin tsamá sín nkehe ts'ajixēnhen sín nínko.

¹⁷ Ntá kjuakohē ch'án sín ntáchro ch'án kixin:

—Ntáchro xroon itén Dios kixin: “Tí ntóna i mé it'in nchia tsonixjanaxín chojni nkuíxín nación”, a ntá jahará tsíkji ch'énará itjueé xíchee* —ichro ch'án.

¹⁸ Ntá tí sín nchat'á t'etōan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án.

¹⁹ Kjánchó ntá ó kóntó ntá k'uaxrjexín ch'án tí chjasin a sákjuí ch'án.

Ó tsíxámá tí nta t'óna to higo

(Mt. 21.20-22)

²⁰ A ntá tí nchítjen k'uátsínka sín tí tjen tí nta t'óna to higo ntá k'uíkon sín kixin ó tsíxámáxin nuèe tí nta.

²¹ A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakonhén jna na ó tsíxámá nta —ichro ch'án.

²² Ntá kjuátehe ch'ín Jesús ntáchro ch'án kixin:

—Tinkachónkirá Dios.

²³ Chaxín ntáxrjan kixin jnkojínrá chróntácherá tí jna i kixin: “Sátjixián ntihi tjíkjiankiá ntayaon”, a ntá tí kaín asánrá

* 11:17 Isaías 56.7; Jeremías 7.11

chrókuinkachónkirá Dios kixin chróxiteyá tí nkehe tsontáchrórá, ntá xikaha chaxín tsonhen.

²⁴ Mé xikaha ntáxrjan kixin kaín tí nkehe tsjancheherá Dios tí tsítekáonrá kixin chaxín ts'ayéhérá ntá xikaha tsonhen tsoxiteyá.

²⁵ A ntá tió tjejonixjehérá Dios ntá jnkojín nkexro naxa ninkákonhénrá, la chrók'uitjáyanhanrá tíha kixin It'ará tjen nkaya nkajní kjaxin chrókjuinçek'itjáyan ch'án tí jie chontará.

²⁶ A ntá tí sinček'itjáyanhyará tí ijíe chojni ntá It'ará tjen nkaya nkajní la kjaxin sinček'itjáyanhya ch'án tí jie chontará.

Tjanchankíhi sín tí ch'ín Jesús nkehe tí kjuachaxin chóna ch'án

(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén ínaá. Ntá xritjak'e ch'án nkaxenhen nínko ntá kóchjina tí sín nchat'á t'etōan la ko tí sín tjako tí ley la ko tí sín táda t'etōan nínko

²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xikaha ch'e? ¿Nkexro tjáha tí kjuachaxin kixin xikaha kjuich'e? —ichro sín.

²⁹ Ntá kjuátehe ch'ín Jesús ntáchrō ch'án kixin:

—Ntá kjaxin janhan tsjánchánkíhárá ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xikaha it'a.

³⁰ ¿A ntá nkexro k'uetuēnhen ch'ín Juan kixin tsíkíte ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankíxin jehó sín tjo sín kichó sín kixin:

—Tí tsontáchroni kixin Dios tsík'etuēnhen tí ch'ín Juan ntá tsjanchankí tí ch'ín a kixin nkekuènté kuítekakuenhyani ch'án.

³² ¿Á chróntáchroni kixin chojni ó tsík'etuēnhen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'ín Juan mé k'uénixja ch'án itén Dios.

³³ Ntá ntáche sín tí ch'ín Jesús kixin:

—Noehyani —ichro sín.

Ntá ntáchrō ch'ín Jesús kixin:

—La ko kjaxin janhan tsoxrjankahya nkexro kjuanjon kjuachaxin kixin xikaha t'a —ichro ch'án.

12

Ch'ín Jesús mé kjuíncheyóexin ch'án éxí chojni ch'ehya xra jína
(Mt. 21.33-46; Lc. 20.9-19)

¹ Ntá ch'ín Jesús kjuíncheyóexin ch'án ínaá ntáchrō ch'án kixin:

—Itjen ijnko ch'ín k'uenkaxin ch'án itsjé ntanòa t'óna to uva nontee ch'án la ko kjuich'èna ch'án corral la ko kjuich'èna ch'án ijnko tòye ts'énya sín to uva. A ntá kjuich'èna ch'án ijnko tjàt'ò noi kixin ts'it'ótjen ch'án tsokotohe ch'án.

¹A ntá kjuínchekjen ch'án tí nonte iso chojni ch'e xra. Ntá sákjuí ch'án kjín.

²Ntá tí kjuixraká tí yaon ts'óna to ntá k'uetuēhen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkosiné tí to tsakja ch'án.

³Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án.

⁴A ntá tí ìché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhi sín ch'án.

⁵Ntá tí ìché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìché mé xíchr'án ch'án í so nkexro ch'ehe ch'án xra sákjuitsjehe sín, kjánchó iso sín k'uékon sín la í so sín la k'óyán sín.

⁶Ntá jehe ch'án chóna ch'án jnkokoáxon xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án.

⁷A ntá tí sín ch'e xra a tjo sín kichó sín kixin: “Tí ch'ín i mé ts'áyéhe kaín nkehe siín ntihi. A ntá jie ts'óyánni ch'án, a ntá jeheni ts'áyéheni kaín tí nkehe a”, ichro sín.

⁸Ntá xikaha itsé sín ch'án k'óyán sín ch'án ntá kuakitsjexín sín ntøe ch'án tí nontee ch'án.

⁹A ntá kjuanchankí ch'ín Jesús ntáchro ch'án kixin:

—¿A ntá nkehe chrókjuich'e tí ìché tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

¹⁰'¿Á kjuínchekuáxinhyará jahará tí xroon itén Dios? Ntáchro xikihí:

Tí xro náxrjónhya kuitøenta tí sín ch'èna tjàt'ò, mé jie k'óna tí xro tjetøan.

¹¹Mé xikaha kjuich'é Ìchéni Dios,

na ntá tíha mé ijnko nkehe kjuachrakon k'uíkonni† —ichro ch'ín Jesús.

¹²Ntá chrótsé sín tí ch'ín Jesús chrókjuak'echjina sín ch'án kixin kíenxín sín kixin kaín tí ntáchro ch'án la jehe ch'án k'uántaxínhi tí jehe sín. Kjánchó chrakon sín kixin nchónhya chojni kóchjina ntá kuitøhe sín ch'án ntá sákjuí sín.

* 12:9 Isaías 5.1-7 † 12:11 Salmo 118.22-23

¿A jína chrókjuenkehe sín gobierno?

(Mt. 22.15-22; Lc. 20.20-26)

¹³ A ntá ichr'án sín iso tí sín fariseo la ko iso tí sín kuènte ch'ín Herodes kixin tsjanchankíhi sín ch'án iso nkehe kixin tí ntoáhya chrókjuatehe ch'án ntá jína chrók'ueka sín ch'án jie.

¹⁴ Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxixián kixin á jína sín, la ko ntoá tjákua ntie Dios. ¿Á jína chrókjuenkeheni tí gobierno tí chichaon tjanchia? ¿Á chrókjuenkeheni sín ní o náhi? —ichro sín.

¹⁵ Ntá ch'ín Jesús kjuátsoan ch'án kixin jehya jína tjenkayáxin sín ntáchro ch'án kixin:

—Jehya jína kixin tjáchaxinráni. Xráqará ijnko tí chichaon tjanchia sín tsotsjáha —ichro ch'án.

¹⁶ Ntá xráqao sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrjexín tjenkáni tí chichaon i la ko nkexro ihnié chóna? —ichro ch'án.

Ntá jehe sín kjuátehe sín kixin:

—Tí ch'ín t'etqan mé tjenkáni ch'án —ichro sín.

¹⁷ Ntá kjuátehe ch'ín Jesús ntáchro ch'án kixin:

—Chróchjehérá tí ch'ín gobierno t'etqan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kixin xikaha kjuátehe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

¹⁸ A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kixin:

¹⁹ —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjach'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxi xjeen tí nkexro tsík'en.‡

²⁰ Kjánchó k'uejó yato sín jnkokoá kichó sín. Ntá tí ch'ín saó mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjach'énahya sín.

²¹ Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjach'énahya sín xjan. A ntá tí ch'ín níxin kuákja ch'án tí jehe tjan ntá xikaha kónhen ínaá.

‡ 12:19 Deuteronomio 25.5

22 Ntá kayatoé sín k'uéchón^{ta} sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan.

23 Ntá tió tsoxechón kaín xín chojni la, ¿Ntá nkexro ts'óna xii tjan kíxin kayatoé sín tsikótehe tjan? —ichro sín.

24 Ntá kjuátehe ch'ín Jesús ntáchro ch'án kíxin:

—Ntoáhya tjenkayáxinrá kíxin tiénxinhyará nkehe ntáchro tí xroon itén Dios la ko chonhyará tí kjuachaxién Dios.

25 A ntá tió tsoxechón tí chojni tsík'en la tsoteehya sín la ko tsjanjonhya sín xjeen sín kíxin tsotehe sín kíxin tí sín tsík'en la éxi sín ángel ts'ejó sín nkaya nkajní.

26 A ntá tí tsoxechón tí sín tsík'en, ¿a kjuínchekuáxinhyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§

27 Méxra tí Dios i la jehya tinkáchónki tí sín tsík'en. Náhi. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kíxin xikaha ichrorá tjanchankirá —ichro ch'án.

Tí nkehe antsí imá tjetooan tsík'etooan Dios

(Mt. 22.34-40)

28 Ntá kui ijnko ch'ín tjako tí ley kjuák'ekinhin ch'án nkexrí kjuachaxín sín ch'ín Jesús. Ntá kuínhin ch'án kíxin imá jina kjuátehe ch'ín Jesús. Ntá kjuanchankí ch'án ntáchro ch'án kíxin:

—¿Nkehe tí antsí tjetooan tsík'etooan Dios? —ichro ch'án.

29 Ntá kjuátehe ch'ín Jesús ntáchro ch'án kíxin:

—Tí nkehe antsí tjetooan tsík'etooan Dios mé tíhi: “Tinhínrá kaín rá chojni Israel kíxin Ìnchéni Dios la mé jnkokoá la kohya í jnko nkexro.

30 Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”* Mé xikaha tí nkehe antsí tjetooan tsík'etooan Dios.

31 A ntá tí nkehe yóxin tsík'etooan Dios la mé tóyóhe na mé ntáchro xikihi: “Chrótjuèhérá kíchuará éxi tjuèxínrá asánrá,”† la kohya í jnko nkehe antsí má tjetooan tsík'etooan ch'án —ichro ch'ín Jesús.

32 A ntá kjuátehe tí ch'ín tjako njnko a ntáchro ch'án kíxin:

—Ntoá ntáchrúa tíha, Maestro kíxin chaxín itjen jnkokoáxón Dios la ko kohya í jnko Dios.‡

33 Noheni kíxin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxínni Dios la ko

chrótuèheni kichó ni éxí tjuèxinni asénni. § Tíha mé antsí má sínkí. A ntá kaín tí ko chrók'óyánni chrókjuanjonni chróchjánxin chrítaón altar la kánhyó tjetóan tíha —ichro ch'án.

³⁴ A ntá tió k'uikon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuènte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'ín Jesús kjuák'ekjako ch'án tí ninko jié. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David?

³⁶ A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntíhó tsétóan,

tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétóan”*

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókinhin sín kóxrjínhin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín.

³⁹ Jehe sín xritjeyá sín tí nta antsí náxrjón ts'ejóyá sín tí nkaxenhen ninko. La ko kjaxin tió sátsji sín tí sine sín xritjeyá sín tí nta antsí náxrjón ts'ejókjen sín sine sín.

⁴⁰ La ko takitsje sín ntøe chojni k'án. La ko ch'iyéxin sín chojni kixin isé nixjehe sín Dios kixin chrókuinhin chojni chróntáchro sín kixin imá jína tí jehe sín. Tí sín a mé antsí má tsjasóte sín —ichro ch'án.

Tí ofrenda kjuanjon ijnko tjan k'án

(Lc. 21.1-4)

⁴¹ A ntá jnkonaá mé ch'ín Jesús tjetjaxin ch'án nkaxenhen ninko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen

sín chichaon tí ntacajón. La ko kjaxin nchónhya tí sín rico chr'áxehen sín nchónhya chichaon tí ntacajón a.

⁴² Ntá kjaxin ntiha mé kjui ijnko tjan k'án nòà tjan ntá chr'áxehen tjan tí ntacajón yaá chichaon kánhyó tjete sínkí.

⁴³ Ntá ch'ín Jesús k'uíyehé ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòà tjan antsí tjete k'uíkon Dios tí chichaon chr'áxehen tjan tí ntacajón, a ntá tí sín í so la kánhyó

⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòà tjan la kjuanjon tjan kaín tí chichaon k'uéchónta tjan chrók'uíte nkehe chrókjóne tjan —ichro ch'án.

13

Ch'ín Jesús chrónka kixin tsoxíka nínko

(Mt. 24.1-2; Lc. 21.5-6)

¹ A ntá tió k'uaxrjexín ch'ín Jesús tí nínko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xró la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xró ts'ejókjenhya kíchó, la kaín tíha la tsoxíka —ichro ch'án.

Tí nkehe tsonhen chjina tí tsjixixín

(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jnā Olivo chók'èxin tjen tí nínko a. Ntiha kjuák'etjaxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexrí tsonoxínni nkesá tsoxiteyá kaín tíha —ichro sín.

⁵ Ntá ch'ín Jesús kjuátehe ch'án ntáchro ch'án kixin:

—Tóxakonhanrá títóéhyará kixin ninkexró chrókjuit'ayahyará.

⁶ Nchónhya chojni tsi tsontáchro sín kixin jehe sín mé Cristo. Ntá xíkaha sich'iyehe sín nchónhya chojni.

⁷ A ntá tió tsinhínrá kixin tjanjonko kíchó sín la t'óyán kíchó sín la chrakonhyará tóxakuanhyará ó jehí tsonhen tíha. Kjónté xíkaha naxá tsjejehya chjasintajni.

⁸ Ijnko nación tsjanjonko í jnko nación. La ntiha la ntaha la tsínkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankíxixón tí kjuatjoté.

⁹ Tóxakonhanrá jahará kixin mé tsjikaánrá sín nkayakon tí sín t'etōan ntá tí nkaxehen nínko ntiha mé tsjatiaxínrá

sín. Jahará t'ichjánxín tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín.

¹⁰ Tí naxa ts'itjáyanhya chjasintajni la mé t'ichjánxín tsinhin chojni kaín xín nació n tí tan jína tsaáxin sín.

¹¹ Tió sátsjikoará sín tsjikaánrá sín tí tjejó tí sín t'etóan, la tókakuanhyará nkehe tsjateherá la ko nkehe tsjenkayáxinrá. Náhi. Chronkará tí nkehe kjuanjon Dios tsontáchrórá tí hora a, kixin jahyará tsonixjará. Náhi. Nchakuen Dios mé tsonixja.

¹² Iso chojni kjónté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko iné la tsjikaán sín kixin its'en.

¹³ Kaínxín chojni chjasintajni tsonínkakonhanrá sín kixin tinkachónkirá tí janhan. A ntá tí sín tsítóehya tinkáchónki sín tí janhan hasta tsjixixín ná mé tsaá sín.

¹⁴ Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxi tsintáchró profeta Daniel* —ntá tí chojni sinchekuáxin tí xroon i mé chrókuienxín sín tíha—, a ntá tí chojni tjejó estado Judea ts'ikon sín xikaha la sátsji sín tsochrin sín jnā tsjík'ejómá sín.

¹⁵ A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín.

¹⁶ Ntá tí sín tjejó nontee sín la í chrókjanhya sín naxa chrókjuikakja sín iké sín.

¹⁷ Ntá nòa tí chojni chjin ts'ejóyá tí yaon a la ko tí sín tjejónchekakí xjeen.

¹⁸ Chrókjuancheherá Dios kixin jehya nchakuen kin chrókónhen tíha.

¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuènhya xikaha desde ti kjuankíxixín Dios kjuích'éna ch'án chjasintajni la ko kjá xikahya tsonhen chr'éxin inaá.

²⁰ A ntá tí chrókjuanjon Inchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhi la kuikonóehē ch'án tí sín tsíkjeýá ch'án ntá k'uetóan ch'án kixin tjoka ts'atsínka tí kjuachrakon a.

²¹ A ntá jnkójín nkexro tsontáchró kixin: “Tsjehé, ntihi itjen tí Cristo”, o tsontáchró sín kixin: “Tsjehé, ntiha tjen ch'án”, la títekákuènhyará sín.

²² Na mé itsi iso sín tsontáchró sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan

* 13:14 Daniel 9.27; 11.31; 12.11

jié tjinkaon sín chrókjuich'iyexín sín chojni, kjónté tí sín tsíkjejá Dios.

²³ A ntá jahará chrokóxakonhanrá kaín tíha. Tjétjonkará senó kixin tsonohará kixin xikaha tsonhen.

Itsi tí Xjeen Dios K'óna Chojni
(Mt. 24.29-35, 42-44; Lc. 21.25-36)

²⁴ 'Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi.

²⁵ A ntá tí konotsé la ts'anótjenxin nkajní la ko tí kjuachaxin siín nkaya nkajní la kjaxin tsinkí.

²⁶ Ntá ts'ikon sín tí Xjeen Dios K'óna Chojni itsi chrikjan tjuí tsikao tí kjuachaxin jié.

²⁷ Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsikjejá ch'án.

²⁸ 'Chrókiénxinrá tí nkehe sintayóaxian. Éxí yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa

²⁹ mé xikaha tió ts'ikonrá xikaha tsonhen kaín tíha ntá tsonoaxínrá kixin ó kuichjina tí tsjeje chjasintajni.

³⁰ Chaxín ntáxrjan kixin kaín tíha tsonhen tí naxa t'enhya tí chojni siín chjasintajni.

³¹ A ntá tí nkajní la ko tí chjasintajni mé ts'itjayan. A ntá tí nkehe ntáxrjan la ts'itjayanhya, tsoxiteyá tíha.

³² A ntá tí yaon la tí hora tsoxiteyá tíha la ninkebro noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'éni mé nohe.

³³ 'Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha.

³⁴ Éxí yóhe ijnko chojni sátsji kjín, a ntá tí naxa sátsjixínhya ch'án ntoe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntoe ch'án, la jnkojnko sín ts'áyéhe sín jnkojnko xra kuente sín. La ko ts'etuñhen ch'án ijnko ch'ín tsjak'e ts'ayakonhen ch'án tí ntója nchia.

³⁵ Méxra jahará chrók'uejotsjehérá kixin noahyará nkesá tsokjan tí inché tí nchia a, á ijnko tsontanonte o á ijnko k'áxrótjen o á ijnko tjetee tsje cochiká o á ijnko ts'inkaséyan.

³⁶ Ntá xrínahya tsi ch'án ts'itjaxín ch'án kixin tjejochrinrá.

³⁷ Mé xikaha tjonkará la ko xikaha ntátjan kaín chojni kixin chrók'uejósjehe sín —ichro ch'án.

14

Tjoyá sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)

¹ Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjikohya tí xroan nchek'ánki niotja.

Ntá tí sín nchat'á t'etoan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyan sín ch'án.

² Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókónínkaon sín —ichro sín.

Ijnko tjan kuikítexín aceite náxrjón xraxé ikja ch'ín Jesús
(Mt. 26.6-13; Jn. 12.1-8)

³ A ntá ch'ín Jesús kjuák'e ch'án chjasin Betania ntøe ch'ín Simón, tí ch'ín k'uéchónta chinlepra. A ntá tí tjene ch'ín Jesús ntá xrínahya ikui injko tjan kuikao tjan injko xro mé tjía tí aceite xraxé itsjo nardo, imá tjete tsík'ite. Ntá tí tjan a mé kuakitjehé tjan tí xro a ntá kuikite tjan kja ch'ín Jesús tí aceite a.

⁴ A ntá iso tí sín tjejó ntiha kónínkakonhen sín tjan ntáchro sín kixin:

—¿Nkekuènte kjuínchexénhen tjan tí aceite náxrjón xraxé?

⁵ Íchá jína chrókóxi_xin iní ciento chichaon denario tí aceite a ntá tí chichaon a mé chrókuítønhen tí chojni nòa —mé xikaha ichro sín k'uántaxínhin sín tjan.

⁶ Ntá ntáchro ch'ín Jesús kixin:

—Nté tjtøherá tjan; ¿nkekuènte t'antaxínhínrá tjan? Ó nchoxon tí nkehe kjuích'ena tjan.

⁷ A ntá tí chojni nòa la ó xráxín ts'ejókoará sín la jína tsjínkítará sín jnkojín yaon. Ntá janhan la jnkochríxínhya ts'ejóni.

⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuèntana kixin tsoxravána.

⁹ Chaxín ntáxrjan kixin ti tsjako sín tí tan jína tsaáxin chojni nkuíxín chjasintajni ntá tsochronka sín kixin xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

Ch'ín Judas kjuínchekji ch'án tí ch'ín Jesús
(Mt. 26.14-16; Lc. 22.3-6)

¹⁰ A ntá ch'ín Judas Iscariote mé injko teyóxin sín k'uájiko ch'ín Jesús a mé sákjuítsehe ch'án tí sín nchat'á t'etoan kixin tsochrónka ch'án nkexrí tsotsé sín tí ch'ín Jesús.

¹¹ A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankixin ch'án kjueyá ch'án nkexrí tsochrónka ch'án kixin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² **A** ntá kui tí yaon xrankíxín kia sine sín niotja tsíkjhokhya tí xroan nchek'ánkí nio tió ts'óyán sín tí kolélo kuènte kia pascua. **A** ntá tí sín k'uájiko ch'ín Jesús mé kjuanchankíhi sín ch'án kíxín:

—¿Nketí tjinkávan sátsjini sincheyaxíxinni kíxín sineni kuènte tí kia pascua? —ichro sín.

¹³ **N**tá k'uetuēnhen ch'án iyó tí sín k'uájiko ch'án ntáchro ch'án kíxín:

—Sátjirá chjasin Jerusalén ntá ntiha tsoxetará ijnko ch'ín yámá tóa tjiá ntá. Tí ch'ín a tsochréhérá.

¹⁴ **A** ntá tí nchia ts'ixenhen ch'án la tsjanchankíhírá tí ìnché nchia, tsontáchorá kíxín: “K'uetōan tí Maestro kíxín: ¿Nketí tjen tí cuarto sinexínko ch'án tí sín xriko ch'án tí kia pascua a?”, xíkaha mé tsixrorá.

¹⁵ **N**tá tsjakohará ch'án ijnko cuarto jíé, yóxin piso mé chóna kaín nkehe t'ichjánxín. Mé ntaha mé sincheyaxíxinrá tí nkehe sineni —ichro ch'án.

¹⁶ **N**tá jehe sín la sákjuí sín chjasin Jerusalén na ntá éxí chrónka ch'ín Jesús mé xíkaha k'uitja sín. **N**tá tí cuarto a mé kjuíncheyaxíxin sín tí nkehe sine sín kuènte tí kia pascua.

¹⁷ **A** ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha.

¹⁸ **N**tá k'uéjé sín, a ntá tió tjejóne sín ntá ntáchro ch'ín Jesús kíxín:

—Chaxín ntáxrjan kíxín ijnko tí jahará tjejóne jnkokoá ntihi mé sinchekjiráni —ichro ch'án.

¹⁹ **N**tá jehe sín mé kjuankíxín k'uává sín. **N**tá kjuankíxín sín jnkojnko kjuanchankíhi sín tí jehe ch'án kíxín:

—¿Á janhan ní? —ichro sín.

²⁰ **N**tá kjuátehe ch'ín Jesús ntáchro ch'án kíxín:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi.

²¹ **C**haxín tí Xjeen Dios K'óna Chojni mé tsonhen éxí nixja xroon itén Dios. Kjánchó nòa tí ch'ín sinchekji ch'án. Íchá jína tí ch'ín a la chrókokjéhya ch'án —mé xíkaha ichro ch'án.

²² **A** ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. **N**tá kjuixin ntá kóchrít'ō ch'án tí niotja ntá kjuanjon ch'án k'uáyéhe sín. **N**tá ntáchro ch'án kíxín:

—Interá, tíhi mé cuerpo kuèntana —ichro ch'án.

²³ **N**a ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá.

²⁴ **N**tá ntáchro ch'án kíxín:

—Tíhi mé jnina mé chrónkaxín kixin chaxín tsoxiteyá tí nkehe nixin tsonhen na mé ts'itjí kixin tsaáxin nchónhya chojni.

²⁵ Chaxín ntáxrjan kixin ts'íhya janhan tí ìnté to uva inaá tí naxa tsjixrakáhya tí yaon itsi kjuachaxin kuènte Dios, a ntá tí yaon a xik'ía ìnté to uva nixin —mé xikaha ichro ch'in Jesús.

Ntá ch'in Jesús chrónka ch'án kixin ch'in Pedro sinchemá ch'án kixin chónhya tí jehe ch'án

(Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuènte Dios ntá sákjuj sín tí jna Olivo.

²⁷ Ntá ch'in Jesús ntáchro ch'án kixin:

—Ijie tie kaín rá tsochraconrá ntá tsitonará. Ntá tsoxiteyá éxí ntáchro xroon iten Dios kixin: “Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”*

²⁸ A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáchro ch'in Pedro kixin:

—Kjonté kaín sín tsítóha sín ntá janhan la náhí —ichro ch'án.

³⁰ Ntá ntáchro ch'in Jesús kixin:

—Chaxín ntáxrjan kixin ijie tie tí naxa tsjehya kochíntoa yáya, la jaha mé sinchemána níya kixin chonhyana, tsixrua —ichro ch'án.

³¹ Ntá itsen kjuátehe ch'in Pedro ntáchro ch'án kixin:

—Kjonté koína its'én la sintamáhya tí jaha —ichro ch'án.

La ko xikaha ntáchro sín kaín sín.

Ch'in Jesús nixjeexín ch'án Dios tí Huerto Getsemaní

(Mt. 26.36-46; Lc. 22.39-46)

³² Ntá kjují sín ijnko nonte mé it'in Getsemaní. Ntá k'uetuēnhen ch'in Jesús tí sín k'uájiko ch'án kixin:

—Tjejorá ntihyó nachrohe janhan tsonixjahā Dios —ichro ch'án.

³³ Ntá sákjuíko ch'án tí ch'in Pedro la ko tí ch'in Jacobo la ko tí ch'in Juan. Ntá kjuankixin imá k'uává asén ch'án kóxakonhen ch'án.

³⁴ Ntá ntáche ch'án sín kixin:

—Imá t'ává asenná éxí chrók'uén xikaha. Ijie la ntihyó titohará tjejotsjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóēhe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a.

³⁶ A ntá ntáchro ch'án kixin:

* 14:27 Zacarías 13.7

—It'eni jaha. Jaha mé chonta kaín xín kjuachaxin na ntá chrónóahani tsjakjínhínni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhi. Éxí tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora?

³⁸ Ijie la tjejotsjehérá la ko chrónóehérá Dios kixin títoehya ch'án tí Jínahya chrókjuichroerá. Tí asánrá ntáchro kixin chrókjuinchexiteyará tí jína kjánchó tí cuérporá la tsjachahya —ichro ch'án.

³⁹ Ntá sákjuí ch'án inaá chrónóehé ch'án Dios. Ntá ó jehe xikahó xínixja ch'án.

⁴⁰ Ntá ikjan ch'án la ó tjejójua sín inaá kixin kujihí sín kotáchrin. Ntá í noehya sín nkexrí chrókjuatehe sín.

⁴¹ Ntá nixin sákíki ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án.

⁴² Ntá t'ayará sátsjini kixin ó kjui tí nkexro sinchekjina.

*Sákjuíko sín tí ch'ín Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)*

⁴³ Naxa tjenixja ch'ín Jesús ntá xrínaahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuíkao ch'án kjuíjiko sín chica espada la ko inta. Na mé kjuachaxién tí sín nchat'á t'etoan la ko tí sín maestro tjako tí ley la ko tí sín táda t'etoan nínko mé kjuixín sín.

⁴⁴ A ntá tí ch'ín Judas mé tí ch'ín sinchekji tsíntáchro ch'án kixin:

—Tí ch'ín sinekian kochíto mé jehe tíha la itserá ch'án sátjikoará ch'án —ichro ch'án.

⁴⁵ Ntá kjui sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto.

⁴⁶ A ntá tí sín kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etoan xra.

⁴⁸ Ntá ch'ín Jesús mé ntáche ch'án tí sín a kixin:

—¿Nkekuènté kixin éxí chrótsérá xíchee mé xikaha k'uinkakoará chica espada la ko inta kixin tsotseráni?

49 Kaín yaon kjuak'é nkaxenhen n̄nko kjuákohará, ¿ntá nkekuènté tseh̄yaráni? Kjánchó t'ichj̄ánx̄in x̄ikaha tsonhen k̄ixin tsoxiteyá tí nkehe nixja xroon itén Dios —ichro ch'án.

50 Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

Ijnko ch'ín ntasoá sákjuix̄in ch'án ntiha

51 A ntá ijnko ch'ín ntasoá mé kjax̄in tinkáchréhe ch'án ntiha, a ntá jehó ijnko kamantá tjetsáte ch'án, ntá kjax̄in itsé sín ch'án.

52 Kjánchó tí ké ch'án ó tsítsé sín ntá kjónté tjóchín ch'án sákjuí ch'án.

Ch'ín Jesús kóchjina ch'án tí tjejó tí sín t'et̄oan

(Mt. 26.57-68; Lc. 22.54-55, 63-71; Jn. 18.12-14, 19-24)

53 Ntá sákjuíko sín tí ch'ín Jesús tí nt̄oe tí nch̄at'á imá t'et̄oan. Ntaha mé tsíkójnkotsé kaín tí sín nch̄at'á t'et̄oan la ko tí sín táda t'et̄oan n̄nko la ko tí sín maestro tjako tí ley.

54 Ntá ch'ín Pedro la ikj̄in tjechréhe ch'án ntá kjuíji ch'án tí nt̄asin nt̄oe tí nch̄at'á imá t'et̄oan a. Ntaha síche xrohi. A ntá ntiha tjejótx̄in tí sín policía tjejóchj̄ixrohe sín, ntá kjax̄in ch'án ntahó kuítóhe ch'án tjechj̄ixrohe ch'án.

55 Ntá tí sín t'et̄uēnhen tí sín nch̄at'á la ko kaín tí sín t'et̄oan kjueyá sín chojni k̄ixin tsochrónka sín nkehe tí jiē chón̄ta ch'ín Jesús k̄ixin jina chrók'óyán sín ch'án. Kjánchó ninkexró k'uitjahya sín tsjink̄itsa tsochrónka.

56 Kjánchó itsjé sín ntáchro sín kjuach'ia ó t'eka sín ch'án jiē k̄ixin jnkokónhya tí nkehe ntáchro sín.

57 Ntá k'uínkatjen iso sín ntá chaxínhya tí jiē kjuanchia sín. Ntá ntáchro sín k̄ixin:

58 —Jeheni ó kuínhinni k̄ixin ntáchro ch'án k̄ixin ts'óxika ch'án tí n̄nko tsík̄jich'énaxín chojni tja ntá iní yaon koá la ó tsjak'e ch'án í jnko n̄nko jehya chojni sich'éna† —ichro sín.

59 Kjónté x̄ikaha la jnkokónhya tí nkehe chrónka sín.

60 Ntá tí ch'ín t'et̄uēnhen tí sín nch̄at'á k'uínkatjen ch'án tí tjejó kaín sín ntá kjuanchankihi ch'án tí ch'ín Jesús k̄ixin:

—¿Á ninkehó t̄jateh̄hya jaha? ¿Á chaxín tí jiē t'eka sín tí jaha? —ichro ch'án.

61 Ntá ch'ín Jesús tání ch'án la ninkehó t̄jateh̄hya ch'án. Ntá x̄ikjanchankí tí nch̄at'á t'et̄oan ntáchro ch'án k̄ixin:

—¿Á jaha tí Cristo Xjeen Dios imá tjóá? —ichro ch'án.

62 Ntá ntáchro ch'ín Jesús k̄ixin:

—Chaxín janhan tíha. Ntá chr'éx̄in ts'ikonrá k̄ixin tí Xjeen Dios K'óna Chojni mé tsjak'et̄jax̄in ch'án tí tja chjina kjuachaxin kuènte Dios la ko itjuí mé ts'inkaj̄inx̄in ch'án nkaya nkajní —ichro ch'án.

63 **A** ntá tí nch̄at'á t'et̄oan kótséchje ch'án tí iké ch'án kjuakox̄in ch'án kixin imá nínkaon ch'án ntáchro ch'án kixin:

—T'ichjánx̄inhyā í so chojni tsochrónka nkehe.

64 Jahará ó kuínhínrá kixin k'uántaxính̄in ch'án Dios. ¿Ntá nkehe tsixrorá? —ichro ch'án.

Ntá kaín sín kjuát̄ehe sín kixin chrók'uen ch'án.

65 Ntá ikjé sín la kjuankixin sín kuík̄ite sín ch'án ntate sín. Na iso sín na k'uík̄jehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuénte n̄inko chjéhe sín nkayakon ch'án.

Ch'ín Pedro kjuínchemá ch'án kixin chónhya ch'án tí ch'ín Jesús (Mt. 26.69-75; Lc. 22.56-62; Jn. 18.15-18, 25-27)

66 Ntá tí nt̄asin nonte itjen ch'ín Pedro. Ntá ikui ijnko tjan ch'ehe tjan x̄ra tí nch̄at'á t'et̄oan.

67 Ntá k'uíkon tjan kixin tjechj̄ixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjax̄in xrikoa tí ch'ín Jesús kjuix̄in chjasin Nazaret —ichro tjan.

68 Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrua —ichro ch'án.

Ntá k'uaxrjex̄in ch'án ntiha sákjui ch'án ntója. Ntá xrínahya itsje ijnko kochínt̄o.

69 Ntá tí tjan a mé k'uíkon tjan tí jehe ch'án ntá chénka tí sín síntaxín ntaha kixin:

—**A** ntá tí ch'ín i mé jnkojín tí sín a —ichro tjan.

70 Kjánchó kjuínchemá ch'án inaá. Ntá ant̄sí chr'éx̄in tí sín k'uéjontaxín ntáche sín tí ch'ín Pedro kixin:

—Chaxín kjax̄ian jaha tsík̄ixian estado Galilea kixin tjatsoanx̄inni kixin nixja jaha éxí nixja tí jehe sín —ichro sín.

71 Ntá ch'ín Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrorá jahará —ichro ch'án.

72 Ntá yóxin itsje kochínt̄o. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Nax̄a tsotsjehya kochínt̄o yáya mé ó tsjixin s̄inchemána níya kixin chonhyana.”‡ Ntá xraxinkaon ch'án tíha la ntá kjuankixin ch'án tsjánka ch'án kixin ntoáhya kjuích'e ch'án kjuínchemá ch'án tí ch'ín Jesús.

‡ 14:72 Marcos 14.30

15

Ch'ín Jesús nkayakon tí ch'ín Pilato

(Mt. 27.1-2, 11-14; Lc. 23.1-5; Jn. 18.28-38)

¹ **A** ntá ó k'uínkaséyan ntá tí sín nch'at'á t'et'otan kójnkotséko sín tí sín táda la ko tí sín tjako tí ley la ko kaín tí sín t'et'otan kuènte n'ínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato.

² Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús ntáchro ch'án kixin:

—Kjxian jaha ntáchrua —ichro ch'án.

³ **A** ntá tí sín nch'at'á t'et'otan mé k'ueka sín ch'án nchónhya jie.

⁴ Ntá ch'ín Pilato xíkjanckankí ch'án inaá ntáchro ch'án kixin:

—¿Jaha, nkekuènté tjateehya ninkehó? Tsjehé kixin nchónhya jie t'eka sín tí jaha —ichro ch'án.

⁵ **A** ntá ch'ín Jesús la ninkehó kjuáteehya ch'án. Ntá ch'ín Pilato la í noehya ch'án nkehe tsjenkayáxin ch'án.

K'uáyéhe ch'ín Jesús kixin sinchekjasóte sín ch'án ntá its'en ch'án

(Mt. 27.15-31; Lc. 23.13-25; Jn. 18.38—19.16)

⁶ **A** ntá ch'ín Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxí tjinkaon tsjanchia tí sín tsíkójnkotsé tí kia a.

⁷ **A** ntá ntiha tjechjina ijnko ch'ín mé it'in Barrabás, la ko í so sín kuítekakuenhya sín tí síxreé ntá k'óyán sín chojni.

⁸ Ntá kui nchónhya chojni kjuankixin sín kjuanchehe sín tí ch'ín Pilato kixin chrókjuich'e ch'án éxí kaín nánó xíkaha.

⁹ Ntá kjuátehe ch'ín Pilato kixin:

—¿Á tjinkáonrá tsitohá sátsji tí ch'ín Rey t'et'uenhen tí sín judío? —ichro ch'án.

¹⁰ Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nch'at'á t'et'otan, a ntá tsé sín tí ch'ín Jesús kjuíkénhen sín ch'án.

¹¹ **A** ntá tí sín nch'at'á t'et'otan a mé kjuínchekóninkaon sín kaín tí chojni siín, ntáche sín kixin íchá jína chrókjuanchia sín kixin chrók'uatjánta ch'án tí ch'ín Barrabás.

¹² Ntá ch'ín Pilato kjuanchankí ch'án ntáchro ch'án kixin:

—**A** ntá tí ch'ín tikítexínrá kixin ch'ín Rey t'et'uenhen tí sín judío la ¿nkehe tjinkáonrá sít'ahá ch'án? —ichro ch'án.

¹³ Ntá jehe sín kjuátehe sín k'óyako sín kjuanchia sín kixin:

—¡Tjakénkánia ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénkani ch'án ntacruz! —ichro sín.

15 Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uixité ntá kuitóhe ch'án kixin sátsji tí ch'ín Barrabás. Ntá k'uetóan ch'án kixin tsjate sín tí ch'ín Jesús. Ntá kjuixin ntá kjuanjon ch'án kjuachaxin kixin tí sín soldado sátsjiko sín ch'án tsjak'enkani sín ch'án ntacruz.

16 Ntá tí sín soldado a mé sákjuiko sín ch'án tí ntasin tí palacio. Ntaha kójnkotséxin kaín tí sín soldado.

17 Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'i.

18 Ntá kjuankixin k'uixité sín ntáchro sín kixin:

—Jnkochrín tsjak'e tsétuénhén tí sín judío —ichro sín.

19 Na ntá ntavara chjéhe sín ikja ch'án na ko ntaté sín kujkíte sín ch'án. K'uéjóxin toch'in sín nkayakon ch'án kjuích'eyáxixin sín éxí imá chrókjuikosáyehe sín ch'án.

20 Ntá tió kjuixin xíkaha kjuích'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsikjinchek'inkáya sín ch'án ntá kjuínchek'inkáya sín ch'án iké ch'án xráxín ínaá. Ntá kuakitsjexín sín ch'án ntiha sákjuiko sín ch'án kixin ntá tsjak'enkani sín ch'án ntacruz.

Ntá kjuak'enkani sín ch'ín Jesús ntacruz

(Mt. 27.32-44; Lc. 23.26-43; Jn. 19.17-27)

21 A ntá ijnko ch'ín tsíkjixin chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjixin ch'án nontee ch'án, ntá k'uátsínka ch'án ntiha. Ntá tí sín soldado a mé k'uetuénhen sín ch'án kixin tsochréhe ch'án tsamá ch'án tí ntacruz tsjak'enkani ch'ín Jesús.

22 A ntá sákjuiko sín tí ch'ín Jesús ijnko tjo it'in Gólgota, na mé nkívee sín t'axrxéxin kixin Tjo Calavera.

23 Ntá ntiha chjéhe sín ch'án xranvino tsík'ixinkíjanxín xroan mirra chrók'ui ch'án, kjánchó k'uíhya ch'án.

24 Ntá tí sín soldado kjuak'enkani sín ch'án tí ntacruz a. Kjuixin ntá kjuích'exín sín suerte tí ké ch'án kixin tsonohe sín nkexéhe tí ka sátsjiko sín jnkojnko sín.

25 A ntá ó las nueve nchítjen tí kjuak'enkani sín ch'án tí ntacruz a.

26 Ntá ikja tí ntacruz kjuak'enkani sín ijnko ntachiso ntsí tsíkjin sín nixja nkekuènte kjuínchekjasóte sín ch'án na mé ntáchro kixin: “Jehe ch'án mé Rey kuènte tí sín judío”.

27 Na ko kjaxín k'uéjóyáni sín ntacruz yaá tí síchee la ijnko la nángo chjina la í jnko la nó kjon tí tjen ch'ín Jesús.

28 Na mé xikaha xiteyá éxí nixja xroon itén Dios ntáchro kixin: “Éxí yóhe ijnko chojni kjuasin jie mé k'uíkon sín ch'án”*.

29 Ntá tí sín k'uat sínka ntiha mé kjuanoá sín ch'án la ko k'uántaxínhin sín ch'án tinkátjía kja sín ntáchro sín kixin:

—Kjá na ntáchrua kixin chrók'oxíka tí nínko, a ntá iní yaon koá la ó chrókjuixin chrókjuich'éna ínaa,† ichrua.

30 Nchekaá asán jahvá tjasinkajinxían tí ntacruz méhe —ichro sín.

31 Ntá tí sín nchat'á t'etóan la ko tí sín tjako tí ley mé kjuanoá sín ch'án ikjo sín kichó sín kixin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án.

32 A ntá chaxín jehe ch'án tí Cristo tí Rey kuente tí nación Israel ntá chrók'uikonni kixin jehó ch'án chrókjuinkajinxín ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejóyáni ntacruz mé k'uántaxínhin sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

33 A ntá tió kui chonkixin mé k'uixin tie kuenté chjasintajni, kóxrjenhen tí sítié hasta las tres kónjín

34 ntá tí hora a mé itsen k'uèya ch'ín Jesús ntáchro ch'án kixin:

—Eloi, Eloi, ¿lama sabactani? —tí nkívee sín mé t'axrxéjín kixin: It'éni, It'éni, ¿nkekuenté kujtohéni?,‡ mé xikaha ichro ch'án.

35 Ntá iso sín siín ntiha kuínhin sín, ntá ntáchro sín kixin:

—Tinhínrá kixin t'íyehé ch'án tí ch'ín Elías tí ch'ín k'uéchrónka itén Dios ósé —ichro sín.

36 Ntá ijnko tí jehe sín siín ntiha kuínka ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjínjin ntá kjuínchekjina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a kixin:

—Tsitóheni tsotsjeheni á chaxín tsi tí ch'ín Elías tsjinkajín tí jehe ch'án —ichro ch'án.

37 Ntá ch'ín Jesús itsen k'uíyato ch'án ntá kjuixin k'uén ch'án.

38 A ntá tí ka tjenkákuènxín nkaxenhen nínko mé yaá k'óna k'uichje kjuankíxixín noi la hasta nonte k'uichje.

39 Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin xikaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

⁴⁰ Kjaxin ntiha k'uejó iso chojni chjin, ikjín k'uejó sín tsehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé.

⁴¹ A ntá tí chojni chjin i mé kuinkáchréhe sín tí ch'ín Jesús ntá kjuikao sín ch'án kixin k'uekjinkitsa sín ch'án tí k'uekjak'e ch'án estado Galilea la ko kjaxin í so chojni chjin inaá chréhe sín ch'án sákjuíko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankixín tí yaon t'ok'éhe sín,

⁴³ mé kui ijnko ch'ín it'in José chjasén ch'án mé Ari-matea. Jehe ch'án mé koí ch'án t'etqan ch'án tí xra kuente tí síxreé. Kjaxin jehe ch'án tjechónhen ch'án itsi tí kjuachaxin kuente Dios. Chrakonhya ch'án sákjuí ch'án ntqe ch'ín Pilato kjuikjanchia ch'án tí cuerpo kuente ch'ín Jesús.

⁴⁴ Ntá ch'ín Pilato chrakon ch'án kixin ó tsíkjixin tsík'en ch'ín Jesús, ntá k'uíyehé ch'án tí ch'ín capitán a kjuanchankíhi ch'án kixin á chaxín xikaha kónhen.

⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xikaha ntá kjuanjon ch'án kjuachaxin kixin tsjikakja ch'ín José tí cuerpo kuente ch'ín Jesús.

⁴⁶ Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuente ch'ín Jesús, a ntá jehe tí ka a mé kjuínchek'isímá ch'án tí cuerpo kuente ch'án. Ntá kjuak'enkaya ch'án ijnko tòye tsíxrayá itjo. Ntá ijnko xro jíe mé k'uíkjàxin ch'án tí ntója tí tòye.

⁴⁷ A ntá tí tjan María Magdalena la ko tí tjan María iné ch'ín José mé k'uíkon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María iné ch'ín Jacobo la ko tí tjan Salomé mé k'uena sín xroqan xraxé sátsjiko sín sincheka sín tí cuerpo kuente ch'ín Jesús.

² Ntá imá nchítjen tí yaon xrankixín tí semana mé kjuíji sín tí tòye tsíxravá ch'án, na mé ó kjuítqon yaon.

³ A ntá jehe sín mé tinkákjo kichó sín kixin:

—¿Xá nkexro tí chrókuakjlinhinni tí xro tjejkèxin tí tòye? —ichro sín.

⁴ A ntá xrínahya k'uíkon sín kixin ó tsíkjin tsíkjin tí xro jíe tjejkèxin tí tòye kixin í tjenhya éxi k'uékjak'e senó.

⁵ Ntá kjuíji sín ikon tí tòye ntá k'uíkon sín kixin tjetjaxin ijnko ch'ín ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín.

⁶ Ntá ntáchro ch'án kixin:

—Chrakonhyará. Ó nòna kixin xritjéyará jahará tí ch'ín Jesús tsíkjin chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án.

⁷ Ntá sátjirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxi tsíchronka ch'án —mé xikaha chrónka tí ntasoá a.

⁸ Ntá tí chojni chjin a mé sákjuíxin sín tí tsíxravá tí ch'ín Jesús imá síxranka sín chrakon sín. Ntá naxa chenkahya sín ninkexró kixin chrakon sín.

*Ch'ín Jesús titàya xeta tí tjan María Magdalena
(Jn. 20.11-18)*

⁹ Tió tsíkjin tsíxechón ch'ín Jesús nchítjen tí yaon xrankixín semana ntá titàya xeta ch'án saxín tí tjan María Magdalena na mé jehe tjan tsíkakitsjéxin ch'án yato nchakuen tí jínahya.

¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín.

¹¹ A ntá tió kuínhin sín kixin tjechón tí ch'ín Jesús kixin xikaha tsík'ikon tjan la kjónté kuítekakonhya sín.

*Iyó sín k'uék'ajiko ch'ín Jesús titàya k'uíkuèn sín tí jehe ch'án
(Lc. 24.13-35)*

¹² A ntá chr'éxin ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótti sín ntja sátsji sín ijnko nonte.

¹³ A ntá jehe sín sákjuíchenka sín tí sín í so a; la kjónté xikaha la kuítekakonhya sín.*

*Ch'ín Jesús k'uetuèhen ch'án tí sín k'uék'ajiko ch'án tí xra sich'e sín
(Mt. 28.16-20; Lc. 24.36-49; Jn. 20.19-23)*

¹⁴ A ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án.

¹⁵ Ntá ntáche ch'án sín kixin:

—Sátjirá kuenté chjasintajni tjákohérá kaín xín chojni tí tan jína tsaáxin sín.

* 16:13 Lucas 24.13-35

¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte.

¹⁷ Ntá tí sín tsinkáchónki tí janhan mé tsjasin sín kjuaxroan kixin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkíva.

¹⁸ Kjonté konche chrótsé sín la kohya nkehe tsonhen sín la ko kjonté chrók'ui sín ijnko ntá chóna veneno la kohya nkehe tsonhen sín. Kjaxin ts'ejotja tja sín chojni níhi la tsitohe sín jína.

Ch'ín Jesús chrìn ch'án nkaya nkajní

(Lc. 24.50-53)

¹⁹ Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxin ch'án tí tja chjina Dios.

²⁰ A ntá jehe sín sákjuí sín nkuíxín sákjuíkjako sín tí tan jína tsaáxin chojni. A ntá jehe Ìnchéni mé kjuínkítsa ch'án tí sín a la ko kjuachaxién ch'án mé kjuasixín sín kjuaxroan kixin tíha mé tsonoexín tí sín tjejótinhin kixin chaxín nkehe kuènte Dios kjuako sín. Amén.

Tí tan jína chrónka ch'ín Lucas

Tíhi mé xrankíxixín tí xroon i

¹ Nchónhya chojni tjinkaon chrókjin sín ntoá kaín xín nkehe nkexrí kónhen k'uaátsínka Ìnchéni tí k'uéjóni.

² Éxí kjuakoheni tí sín tsík'ikonxín kon sín tí xrankíxixín nkehe k'uaátsínka ch'án la ntá k'uaáyéhe sín tí xra sákjuíchronka sín tí tan jína

³ a ntá janhan kjaxian kjuánchánkiá jína kaín nkehe k'uaátsínka tí xrankíxixín. Ntá nòna jína ikjian kaín tíha éxí tsíkónhen ntá tsochr'anhan jaha Teófilo kixin imá tjuaha

⁴ kixin ntá jaha tsonoha jína tí nkehe chaxín tsíkjakoha sín.

Ijnko ángel mé chrónka kixin tsokjíhi Juan Bautista

⁵ A ntá tí ch'ín rey Herodes k'ueṭoan ch'án tí estado Judea la ko ntiha kjuák'e injnko nchat'á mé it'in Zacarías. Jehe ch'án mé kuènte tí sín tsík'axrjeníxin tí ch'ín Abías.* A ntá ichjién ch'án mé it'in Elisabet. Jehe tjan mé tsík'axrjeníxin tjan tí nchat'á Aarón.

⁶ Yóí sín na mé jína sín kixin éxí tjinkaon Dios la mé kjuínchexiteyéhe sín kaín nkehe k'ueṭoan ch'án. Méxra ninkexró chrók'uekahya jie tí jehe sín.

⁷ A ntá jehe sín chóntahya sín xjeen sín kixin ó jehí tsíkítóenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

⁸ A ntá injnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchat'á kuènte Dios.

⁹ A ntá xikaha kuènnen tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte njnko tsjak'e ch'án chjincō chrítaón tí altar kuènte Dios.

¹⁰ Ntá kjuák'e ch'án ntiha kjuák'e ch'án tí chjincō la nachrohe kaín tí chojni k'uéjóni sín ntója nixjehe sín Dios.

¹¹ Ntá xrínahya k'uíkon ch'ín Zacarías injnko ángel kuènte Dios tjexín toté ch'án nánko chjina tí altar tjak'exín sín chjincō.

¹² A ntá tió k'uíkon ch'ín Zacarías tí ángel la imá kóxakonhen ch'án la ko imá chrakon ch'án.

¹³ A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan injnko xjan ntoa na mé sìnchek'ian xjan Juan.

¹⁴ Jaha la tsöcháha má la ko itsjé chojni tsöchéhe sín kixin tsokjíhi xjan

* 1:5 1 Crónicas 24.10

15 kixin imá tjetooan tsjak'e tí xjaan éxi tóxrjínhin Dios. Ninkehó xran vino la ko ninkehó í jnko xran ts'ihya ch'án. Tsochónta ch'án kjuachaxin kuènte Nchakuen Dios kjónté naxa tokjéhya ch'án.

16 Jehé ch'án mé tsjakóhe ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios.

17 Jehé ch'ín Juan tsítaón ch'án ntja tsixin Ìnchéni. Éxi k'uékjako ch'ín Elías ósé mé tsjako ch'án la ko tsochónta ch'án kjuachaxin éxi k'uéchónta ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehé ch'án chojni kixin ó itsi Ìnchéni la chrókuinkáchónki sín tí jehe ch'án.

18 A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

—¿Nkexrí chrókónòna kixin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

19 Ntá kjuátehe tí ch'ín ángel ntáchro ch'án kixin:

—Janhan mé Gabriel la mé t'ahá xra Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jína tsonhen.

20 A ntá jie kuítekákonhya tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xikaha tsoxiteyá kaín tíha —ichro ch'án.

21 A ntá tí í so sín ntiha k'uéjóchónhen sín ntója njnko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen njnko.

22 Ntá tió k'uaxrjexín ch'ín Zacarías tí nkaxenhen njnko la í xitjahya nixja ch'án. Ntá kónohe sín kixin ichrén kjuaxroan kuènte Dios tsík'ikon ch'án tí nkaxenhen njnko. Ntá itja ch'án ó tjakoxin ch'án tí nkehe chróntáchro ch'án kixin í xitjahya nixja ch'án.

23 A ntá tió kjuixin tí yaon kjuích'e ch'ín Zacarías xra njnko ntá sákjuí ch'án ntóe ch'án.

24 A ntá chr'éxin ntá kjuák'eyá tí ichjién ch'án Elisabet. Ntá ntóe tjan ó kuítóhe tjan in'ó nitjó kjuenkayáxin tjan kixin:

25 “Mé xikaha ijnko kjuaxroan kjuanjon Ìnchéni kixin chrók'uantaxienhyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kixin tsokjíhi Jesús

26 A ntá k'uaúsinka injon nitjó ntá Dios k'uetuénhen tí ch'ín ángel Gabriel kixin sátsji ch'án injnko chjasin estado Galilea mé it'in Nazaret,

27 sátsji nixjehé ch'án injnko tjan tjarisoá naxa kuákjahya tjan chojni ntoá mé it'in tjan María. Jehé tjan mé tsíkatehe tjan

kíxin tsotehe tjan ijnko ch'ín mé it'in José, mé tsík'axrjeníxin ch'án tí ch'ín rey David.

²⁸ A ntá tí ch'ín ángel k'uixenhen tí tjen tjan ntá ntáchro ch'án kíxin:

—K'uinka nixjaha jaha kíxin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kíxin nkekuènte xíkaha nixjeheni ch'án, ichro tjan.

³⁰ A ntá ntáchro tí ch'ín ángel kíxin:

—Chrakonhya, María. Dios la imá tjetjinkítsa tí jaha.

³¹ A ntá jie la tsjak'èyá jaha, tsochonta ijnko xjan ntoa la ko sínchek'ian xjan Jesús.

³² Imá ts'etöan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etöan ch'án éxí ijnko rey éxí k'uëtoan ch'ín David, tí nkexro ts'axrjeníxin ch'án.

³³ Jnkochrín tsjak'e ch'án ts'etuënhen ch'án tí sín nación Israel, la mé tsjejhya tí kjuachaxin ts'etöan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kíxin:

—¿Nkekuènte kíxin xíkaha chrókónhen kíxin janhan la naxa chontahya chojni ntoa? —ichro tjan.

³⁵ Ntá kjuatehe tí ch'ín ángel, ntáchro ch'án kíxin:

—Tí Nchakuen Dios mé ts'inkajin éxí ijnko tjuí la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios.

³⁶ La ko kjaxin tjan Elisabet kjéhya jaha kjónté ó nána tjan la mé tjejá tjan. Senó la k'uéchóntahya tjan xjan, a ntá jie la ó injon nitjó tjejá tjan.

³⁷ Kíxin tí kjuachaxiën Dios la tsjacha tsonhen kain xín nkehe —ichro tí ch'ín ángel.

³⁸ Ntá ntáchro tjan María kíxin:

—Janhan mé t'ahá Ìnchéni Dios xra. Ó nchoxon tí nkehe k'uëtoan ch'án sintaxiteyáha ch'án éxí chrónka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ A ntá ijnko yaon tí tjan María tjiän sákjuí tjan ijnko chjasin tjen tí jna estado Judea.

⁴⁰ Ntá kjuíji tjan tí chjasin ntiha ntá k'uixenhen tjan ntöe ch'ín Zacarías la ntá nixjehé tjan tí tjan Elisabet.

41 A ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxiэн Nchakuen Dios

42 ntá itsen nixja tjan ntáchro tjan kixin:

—Dios imá kjuintayavan la ntá tí í so chojni chjin la kénhyó la ko kjaxin kjuíncheyaon ch'án tí xjaan.

43 ¿Xá nkexro tí janhan kixin kjuínixjana iné Ìnchéni?

44 Tió kuínhan nixjana ntá tí xjan la chrika xjan nkaya tsena kixin chéhe xjan kjuilha.

45 Ntá jaha la cháha kixin kuítekávan kixin Ìnchéni Dios sinchexiteyá tí nkehe ntáchro ch'án —ichro tjan.

46 Ntá ntáchro tjan María kixin:

Asenná imá tjikosáyehe Ìnchéni Dios

47 la ko chéhe asenná kixin Dios sinchekaáni ch'án.

48 Kixin Dios ikuá kuentá ijnko tí chojni chjin nóe ch'exón xra kuente ch'án.

A ntá ijie la ko jnkochrixin tsontáchro chojni kixin náxrjón tjèn janhan, tsixro sín.

49 Kixin Dios chóna kaín kjuachaxin ntá janhan mé kjuasixinna ch'án ijnko kjuaxroan jie; imá tjóa tí ihnié ch'án.

50 Jnkochrixin tsikonóehé ch'án kaín tí sín tjikosáyehe sín ch'án.

51 Tsíkjasin ch'án itsjé kjuaxroan jie;

kuakitsjehe ch'án tí kjuachaxin chóna tí sín nchehnke.

52 Kuakitsjehe ch'án tí kjuachaxin chóna tí sín t'etóan,

A ntá tí sín nóa k'uék'etuanyha senó la mé jie chjéhe ch'án kjuachaxin ts'etóan sín.

53 A ntá tí sín t'enxin kjinta la kjuanjon ch'án kaín nkehe tsicháxinhin sín, a ntá tí sín rico xráxin jehó tja sín sákjuí sín.

54 Kjuínkítsa ch'án tí sín nación Israel kixin tjejóch'ehe sín ch'án xra;

k'uitjáyenhya ch'án tí jehe sín kuikonóehé ch'án sín,

55 éxi k'uéchenka ch'án tí sín k'uaxrjenixinni k'uéjó sín ósé,

na mé tí ch'ín Abraham la ko kaín tí sín naxa ts'axrjenixin ch'án —mé xikaha ichro tjan María.

56 A ntá tjan María kuítóeko tjan tí tjan Elisabet iní nitjó la ntá chr'éxin xikjan tjan ntoe tjan.

Kokjihi ch'ín Juan Bautista

57 Ntá xétja tí yaon sinchekokjihi tjan Elisabet tí xjeen tjan, a ntá kjuínchekokjihi tjan ijnko xjan ntoa.

58 A ntá tí sín chjinaxón ntoe la ko tí sín kjéhya tjan mé kjuijitsjehe sín kixin tsöchéheko sín tjan kixin kuínhin sín kixin Dios imá tsíkikonóehé tí jehe tjan.

59 Ntá tí yaon jníxin ikui sín sincheka sín xjan tí xroye kuènte tí sín judío. Ntá chrókjuinchek'in sín xjan Zacarías éxí it'in it'é.

60 Kjánchó ntáchro ìné xjan kixin:

—Náhí. T'ichjánxin its'in xjan Juan —ichro tjan.

61 Ntá ntáchro sín kixin:

—¿Nkekuènte kixin xikaha chrók'uin xjan? Kohya nkexro naxa kjéhya xikaha it'in —ichro sín.

62 A ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uin tí xjan.

63 A ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin: “Ihníé xjan mé Juan.” A ntá kaín tí sín tjejó sín ntiha la chrakon sín kuínhin sín xikaha kónhen.

64 A ntá xrínghya ch'in Zacarías kjuankixin ch'án nixja ch'án ínaá kjuanchehe ch'án Dios kjuasáya.

65 A ntá kaín tí sín chjinaxón ntøe sín mé chrakon sín. La ntá nkuíxín tí jnā kuènte estado Judea mé kjo sín kíchó sín chrónka sín kixin xikaha tsíkónhen.

66 A ntá kaín tí sín kuínhin mé kjuenkayáxin sín kjuanchankíhi sín kíchó sín kixin:

—¿Xá nkehe tí xra tsíkítõnhen tí xjan i? —ichro sín.

Kixin chaxín Ìnchéni Dios tsíkjincheyaon ch'án tí xjan.

Tí ch'in Zacarías itsje ch'án

67 A ntá it'é tí xjan mé ch'in Zacarías, mé antsí k'uáyéhe ch'án kjuachaxin kuènte Nchakuen Dios ntá xikaha nixja ch'án itén Dios ntáchro ch'án kixin:

68 Imá jína Ìnchéni, na mé tí Dios kuènte tí nación Israel,

kixin ikui ch'án tí tjejóni kjuínchekaá ch'án nación kuènténi.

69 La ko kjuanjon ch'án ijnko nkexro t'etõan sinchekaáni ch'án na mé ijnko nkexro k'uaxrjeníxin tí ch'in David, tí nkexro k'uékjich'ehe Dios xra.

70 Éxí k'uéchronkaxín tí sín kjueyá Dios k'uéchronka itén Dios ósé,

71 k'uéchronka Dios kixin şinchekaáni ch'án kixin ntá ts-jachahya kaín tí sín nínkakhenni,

72 tsíkonóhe ch'án tí sín k'uaxrjeníxinni ósé,

ts'itjáyenhya ch'án tí nkehe tsíchronka ch'án tsoxiteyá.

73 Tíhi mé tsíkjo Dios tí ch'in Abraham ósé kixin nkehe chaxín tsoxiteyá chr'éxin

74 kixin sinchekaáni ch'án kixin kohya nkehe sich'ehe ni tí sín nínkakhenni kixin jína sich'ehe ni ch'án xra tsochrakonhyani,

75 la ntá jína ts'ejóni sinchetjóáni ch'án kaín yaon tí naxa tjejóchónni.

76 **A** ntá jaha xjeenni mé tsonáchro Dios kixin jaha ijnko nkexro tsochrónka itén Dios tjen nkaya nkajní.

Jaha tsítónxian ntia tsixin Ìnchéni la ko jaha tsjásiyóxian ntia tsixin ch'án.

77 Jaha tsjákohé tí chojni chjasintajni nkexrí tsjin tí jie chóna sín, ntá tsaá sín.

78 **A** ntá Dios mé tjuèheni ch'án la ko kuikonóeheni ch'án, kixin nkajní kuixin ijnko xrohi nixin ts'inkaséyanxín tí yaon nixin.

79 Tíha mé tsikao tí xrohi ts'inkaséyanxín tí sín tjejó sítié la ko tí sín chrók'uitjáyan, la ko ts'ikonxínni tí ntia tsjanjon kjuaxróxin.

Na mé kaín tíhi chrónka tí ch'in Zacarías.

80 **A** ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte xjan kixin antsí tsonohe xjan nkexrí tjen Dios. **A** ntá kjuák'e xjan nteje k'uánkí xjan kjuixrakája tí yaon kjuankixin kjuakohe ch'án tí chojni nación Israel.

2

Kokjíhi ch'in Jesús

(Mt.1.18-25)

1 **A** ntá tí yaon a na mé tí ch'in imá t'etöan mé it'in Augusto César na mé k'uetöan ch'án kixin ts'ínixín ihnié kaín xín chojni síin tí chjasin t'etöan ch'án kixin tsonohe ch'án nkekjaín chojni síin.

2 Tí xrankíxixín k'uínixín ihnié sín tió Cirenio mé k'uégobrador k'uetöan estado Siria.

3 Kaínxín chojni t'ichjánxin sátsji sín chjasén sín kixin ntaha ts'ínixín ihnié sín.

4 Mé xikaha ch'in José kjaxin k'uaxrjexín ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsíkokjéxín tí ch'in rey David kixin jehe ch'in José mé tsík'axrjeníxin ch'án tí ch'in David.

5 Sákjuí ch'án chjasin Belén sákjuíko ch'án tí tjan María kixin ntiha ts'ínixínko ihnié ch'án tjan kixin jehe tjan tsíkatehe kixin tsoetehe ch'án. **A** ntá jehe tjan na mé ó tjejá tjan.

6 **A** ntá xikaha kónhen nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María.

7 **A** ntá ntiha kokjéxín tí xjeen tjan sao. Ntá kjuínchek'ísímá tjan xjan ka, **a** ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ok'èxín sín mé kjónté ntiha k'uéjó sín.

Tí sín ángel la ko tí sín k'uáyakonhen kolélo

8 Kjaxin chjinaxón tí chjasin Belén tjejó iso chojni nteje ó la ntá ntahó titöhe sín tí tie a kixin t'ayakonhen sín kolélo.

⁹ A ntá titàya k'uíkuèn sín ijnko ángel kuènte Dios la ko nkúixín tí tjejó sín la k'uínkaséyan kíxin tí kjuachaxin jié kuènte Dios kuíkao ch'án. Ntá jehe sín la imá chrakon sín.

¹⁰ A ntá tí ch'ín ángel ntáchro kíxin:

—Chrakonhyará jahará. Ijie k'uinka tsotjonkará nkehe jína nixin kíxin tsochéhe kaín xín chojni

¹¹ kíxin ijie tí chjasén ch'ín David kokjiéxin tí nkexro tsaáxinrá jahará na mé Ìnchéni Cristo tíha.

¹² Ntá tsonoaxínrá jahará kíxin tí xjan a kíxin ika tjechr'ísímá xjan la ko ijnko nta neyá iko mé tjetsínkayá xjan —mé xíkaha chrónka tí ch'ín ángel.

¹³ A ntá titàya k'uíkuèn sín kíxin nchónhya sín ángel kuixín nkaya nkajní tjejóko tí ch'in ángel tjejótsje sín tjanchehe sín Dios kjuasáya, ntáchro sín kíxin:

¹⁴ Kjuasáyé Dios tjen nkaya nkajní kíxin imá chóna ch'án kjuachaxin. Ntá chjasintajni ts'ixín kjuaxróxin tí tjejó tí sín sinchexiteyéhe ch'án. Mé xíkaha ichro sín.

¹⁵ A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kíchó sín ntáchro sín kíxin:

—Íntá sátsjini tí chjasin Belén tsjitsjeheni tí nkehe tsíkónhen kíxin Ìnchéni k'uetqan kui tí nkexro kjuínchenoheni —ichro sín.

¹⁶ Ntá tjian sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko.

¹⁷ A ntá tió k'uíkon sín xíkaha ntá chrónka sín tí nkehe tsíchrónka tí ángel kíxin nkexrí tjen tí xjan a.

¹⁸ Ntá chrakon kaín tí sín kuínhin kíxin xíkaha chrónka tí sín k'uáyakonhen kolélo.

¹⁹ Kjánchó tí tjan María la asén tjan ó xraxinkakonxín tjan kaín tíha.

²⁰ A ntá tí sín k'uáyakonhen kolélo la sákjuí sín ntja kuinkákjanchehe sín Dios kjuasáya kíxin kaín tí nkehe tsíkinhin sín la ko k'uíkon sín kíxin ó xiteyá kaín nkehe éxí tsíchrónka tí ángel.

Sákjuiko sín tí xjan Jesús tí nínko Jerusalén

²¹ A ntá tió xétja tí ijní yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxí tsíntáchro tí ch'ín ángel chénka tí tjan María tí naxa kjuák'eyáhya tjan.

²² A ntá tió kuítóhe tjan María jína éxí chrónka ley kuènte Moisés * ntá sákjuiko sín tí xjan tí chjasin Jerusalén kíxin tsochjéhe sín Dios kjuasáya.

* 2:22 Levítico 12.1-8

²³ Éxí ntáchro tí xroon ley kuènté Ìnchéni Dios kixin: “A ntá kaín xjan ntoa tsokjíhi saoxín la mé tsochjéhe sín Dios tí xjan a sich'ehe xjan xra Dios.”†

²⁴ Ntá xikaha sákjuj sín kixin ntaha tsjanjon sín iko ts'enxín ntiha tsochjéxín sín Dios kjuasáyé éxí t'etōan tí ley kuènte ch'án na mé yaá kontóá najni o yaá kontóá nteje chrókjuanjon sín.

²⁵ A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochrín xraxinkaon ch'án Dios la ko kjuák'echónhen ch'án kixin itsi tí nkexro tsaáxin tí nación Israel. Tí Nchakuen Dios tjeko tí ch'in Simeón

²⁶ tsíkjinchenohe ch'án kixin naxa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios.

²⁷ A ntá tí Nchakuen Dios kjuínchexraxinkaon tí ch'in a kixin sátsji ch'án ninko. A ntá tió kui tí ìné la ko it'é xjan Jesús k'uixenko sín xjan nkaxenhen ninko kixin sinchexiteyéhe sín tí nkehe t'etōan tí ley

²⁸ ntá ch'in Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

²⁹ Ijie jaha Ìnchéni Dios, tsjánjuan kjuachaxin kixin kjuaxróxin its'én janhan

kixin jaha ó kjuínchexiteyá tí nkehe tsintáchrúa

³⁰ kixin ó k'uikoxin kuān tí nkexro tsaáxinni,

³¹ mé xikaha kjuich'e kixin ts'ikon kaín xín chojni.

³² Jehe ch'án mé tí xrohi ts'inkaséyanxín ntje tí sín jehya kuènte Israel,

la ko jehe ch'án tsjikosáyehe ch'án tí chjasín kuèntá Israel, mé ichro ch'in Simeón.

³³ Ntá ch'in José la ko tí ìné ch'in Jesús la chrakon sín kixin xikaha kuínhin sín ntáchro ch'in Simeón kixin nkexrí tjen tí xjan.

³⁴ Ntá ch'in Simeón kjuíncheyaon ch'án sín ntá chénka ch'án tí tjan María mé tí ìné xjan Jesús kixin:

—Tí xjan i tsíkikao itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsonohe sín la ko nchónhya chojni tsotjinkakonhya tsinhin sín tí nkehe tsjako ch'án.

³⁵ Mé xikaha tsonoxín nkexrí tjenkayáxin jnkojnko asén chojni. Kjánchó kaín tíha tsoyóhe éxí ijnko chica espada chróchr'áte asán na mé tsoxakonhan la ko ts'avá má —ichro ch'án nixjehe ch'án tí tjan María.

³⁶ Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxin ch'án tí ch'in

† 2:23 Éxodo 13.2,12

Aser. Jehe tjan la ó nána tjan. Tí naxa k'uétjarisoá tjan la kótehe tjan. Ntá yatokoá nánó kjuák'eko tí xì tjan

³⁷ ntá jie ochenta y cuatro nánó tsíkók'án tjan. Kuítóehya tjan tí xrā kuènte nīnko la mé ntahó tjen tjan ch'ehe tjan Īnchéni Dios xrā nchakotjin la ko tie la jnkoyaxón nehya tjan kixin jína tsonixjehe tjan Dios.

³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí tjan tí xjan Jesús nixjehe tjan kaín tí sín tjejóchónhen kixin itsi nkexro sinchekaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuínchexiteyá sín kaín nkehe t'etōan tí ley kuènte Dios ntá kjan sín estado Galilea na mé chjasén sín chaxín Nazaret.

⁴⁰ A ntá tí xjan a mé k'uánkí xjan la ko tsankā xjan la ko imá kónohe xjan kixin Dios imá tjinkītsa tjencheyaon xjan.

Tí xjan Jesús kjuák'e xjan tí nīnko Jerusalén

⁴¹ Tí it'é la ko iné tí xjan Jesús xráxin k'uékji sín kaín nánó tí chjasin Jerusalén kixin tí kia pascua.

⁴² A ntá tió xetjehe ch'ín Jesús tí teyó nánó, ntá sákjuí sín kaín sín tí chjasin Jerusalén kixin xīkaha kuènnen sín kixin tí kia a.

⁴³ A ntá kjanxin sín ntiha sáchrókjuí sín chjasén sín tió k'uátsínka kia la tí xjan Jesús ó tsíkitohe xjan Jerusalén ntahó, kjánchó iné xjan la ko ch'ín José xraxinkakonhya sín kixin kohya tí xjan.

⁴⁴ Jehe sín mé kjuenkayáxin sín kixin ách'e tí sín kuichréhe mé kuīkaō sín xjan la ntá xīkaha chjina ijnko yaon ó tjejóyá sín ntīa tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín

⁴⁵ kjánchó k'uitjahya sín xjan. Ntá kjan sín tí chjasin Jerusalén kixin tsjeyá sín xjan ntiha.

⁴⁶ Ntá k'uátsínka iní yaon ntá k'uitja sín xjan la mé nkaxenhen nīnko ntiha tjetjāxin xjan jnkōsiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjan-chankíhi xjan tí jehe sín.

⁴⁷ Ntá kaín tí sín tjejóntaxín tjejótinhin sín mé chrakon sín kixin xīkaha imá nohe xjan la ko xīkaha tjatehe xjan kaín nkehe tjanchankíhi sín xjan.

⁴⁸ Ntá tió k'uīkon iné la ko it'é la chrakon sín. Ntá ntáchro iné kixin:

—Xjeenni, ¿nkekuènte xīkaha kjuich'e? It'á la ko janhan imá kóxakönhenni kjueyáni tí jaha —ichro tjan.

⁴⁹ Ntá ntáchro ch'ín Jesús kixin:

—¿Nkekuènte tjeyá tí jeheni? ¿Á noahya jaha kixin tóxakönhenni kixin tí xrā kuènte It'éni? —ichro ch'án.

⁵⁰ Kjánchó kíenxínhya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naxa kuítekakonhen xjan tí jehe sín. A ntá tí ìné la ntá asén tjan xráxín ó nohe kixin xikaha kónhen.

⁵² La ko naxa k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhìn nkexrí kjuínchexiteyá xjan la ko kjaxin kaín chojni kóxrjínhìn sín kixin jina tjen xjan.

3

*Ch'ín Juan Bautista kjuák'e nteje kjuako itén Dios
(Mt. 3.1-12; Mr. 1.1-8; Jn. 1.19-28)*

¹ A ntá quince nánó k'uék'etoan ch'ín Tiberio tí xra go-bierno, la ko tí ch'ín Poncio Pilato k'uégovernador tí estado Judea, la ko tí ch'ín Herodes k'uégovernador tí estado Galilea, la ko tí kichó ch'án Felipe mé k'uégovernador estado Iturea la ko estado Traconite, la ko ch'ín Lisancias k'uégovernador tí estado Abilinia.

² A ntá ch'ín Anás la ko ch'ín Caifás k'uéchónta sín xra nchat'á t'etoan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías.

³ Ch'ín Juan k'uátsínka ch'án kaín tí chjasin chjino tí ntarío Jordán kjuakohe ch'án chojni ntiha kixin chrókuinkí sín tí nkehe tjenkayáxin sín chrókuítohe sín tí ijíé sín ntá chrókuikite sín kixin xikaha mé chrókuìn ijíé sín.

⁴ Mé xikaha kónhen éxí k'uéchronka la ko tsíkjin ch'ín Isaías, mé tí nkexro k'uéchronka itén Dios ósé kixin: Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixìn Ìnchéni
Takítjehérá ijnko ntja ntoí.

⁵ Kaínxín tsaka mé tsoyóxin,
la ko kaín xín jna la ko kaín xín itjo tsitöhe yóxin,
la ko tí ntja tsíxrèya mé tsoxrentoá,
la ko kaín tí ntja yóxinhya la mé tsoyóxin;

⁶ Xikaha mé kaín xín chojni chjasintajni mé ts'ikon sín kixin
Dios mé chrókuaáxin sín.”*

⁷ A ntá tió kjuíji chojni ntiha kixin ch'ín Juan chrókuikite ch'án sín ntá ntáche ch'án tí jehe sín kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkeherá tí kjuanínkaon kuènte Dios ó tsí?

* 3:6 3.4-6 Isaías 40.3-5

⁸ T'ichjánxín kixin chrók'uejorá jnkójina chrókjuákoxinrá kixin chaxín kjuitoxinhínrá tí nkehe tjenkayáxinrá. Jahará nchehnkerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham.

⁹ Kixin tí chica hacha ó tjechónhen tsochrínjinxín tí nta. A ntá kaín xín nta t'ónahya to jina mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xíkaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátehe ch'ín Juan kixin:

—Tí nkexro chóna yaá camisa la chrókjuinchekitonhen tí nkexro chóntahya. La ko tí nkexro chóna nkehe sine chróchjéhe sín tí nkexro chóntahya nkehe sine —ichro ch'án.

¹² Kjaxin ikui iso tí sín nchekjènkí kixin chrókuikite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kixin:

—Jehó éxí tí tsík'ítuanhanrá chrókjuinchekjènkirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chichakoén sín la ko ninkexró sich'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uéjóchónhen sín tóxakonhen asén sín tjinkaon sín tsoñohe sín kixin á tí ch'ín Juan mé tí Cristo.

¹⁶ Kjánchó chénka ch'ín Juan kaín tí sín tjejó a kixin:

—Janhan mé ìnta tíkítexián chojni. A ntá tí nkexro itsi chr'éxin mé tsíkítexínrá tí Nchakuen Dios la ko xrohi. Antsí t'etōan ch'án a ntá janhan la kánhyó. Méxra chrókósuàna chrókjuasintankaha ch'án tí correa tí tokaté ch'án.

¹⁷ Jehe ch'án la ó tjexraá ch'án pala sinchetjuáxin ch'án noatrigó kixin tí ntáchjiji trigo la ókjé tsjejo ch'án a ntá tí noatrigó la tsjenájín ch'án la ts'enkachjina ch'án. A ntá tí ntáchjiji trigo la tsjakaxín ch'án ijnko xrohi ts'ankahya jnkochrín —mé xíkaha ichro ch'ín Juan.

¹⁸ Mé xíkaha chronkaxín ch'án la ko itsjé í so nkehe kjuínchexraxinkaon ch'án chojni mé xíkaha kjuakoexín ch'án sín tí tan jina.

¹⁹ Kjaxin kjuentuéhe ch'án tí ch'ín Herodes kixin chóna ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsíkjh'e ch'án.

20 Kjánchó ch'ín Herodes ántosén ch'án kjónté kuínhin ch'án la kjuínchek'ánkí ch'án tí ijíé ch'án ínaá kixin kjuak'echjina ch'án tí ch'ín Juan tí ntóechiso.

Kuikite ch'ín Jesús

(Mt. 3.13-17; Mr. 1.9-11)

21 A ntá naxa kuènhya tíha naxa kjuák'e ch'ín Juan kuikite ch'án chojni ntá kjaxin ch'ín Jesús mé kuikite ch'án. A ntá tjenixjehe ch'án Dios ntá xitjehe nkajní

22 ntá k'uínkajin Nchakuen Dios éxí ijnko kontóá tsjehe la kjuák'e chrítaón kja ch'án. Ntá xrínahya kuínhin sín itén nkexro nkaya nkajní ntáchro kixin:

—Jaha mé xjanna la tjuaha tí jaha. Imá chàna kixin nchexiteyána tí jaha.

Tí sín tsík'axrjeníxin ch'ín Jesucristo

(Mt. 1.1-17)

23 Ch'ín Jesús k'uéchónta ch'án chjino treinta nánó tió kjuankíxin kjuako ch'án. Ntá kjuenkayáxin sín kixin it'é la mé ch'ín José. Ntá it'é tí ch'ín José la mé ch'ín Elí.

24 A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José.

25 A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai,

26 a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá,

27 a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri,

28 a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er,

29 a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat,

30 a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín

José na mé ch'ín Jonán, a ntá it'é tí ch'ín Jonán na mé ch'ín Eliaquim,

³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán,

³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón,

³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá,

³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham ná mé ch'ín Taré, a ntá it'é tí ch'ín Taré na mé ch'ín Nacor,

³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala,

³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec,

³⁷ a ntá it'é tí ch'ín Lamec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán,

³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4

Ch'ín Tsochren chrókjuachroe tí ch'ín Jesús

(Mt. 4.1-11; Mr. 1.12-13)

¹ A ntá ch'ín Jesús imá chóna ch'án kjuachxién Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje.

² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xrínahya ik'uén ch'án kjinta.

³ Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”^{*} —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jnā imá noi ntá kjuako tí Jínahya kaín tí nacióon siín chjasintajni.

⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nacióon a. Janhan na k'uayáha kaín tíha la ntá jie tsotjaha tí nkexro tjínkavan tsotjaha.

⁷ Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuéntá —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuikosáyehé Ìnchéni Dios la jehó ch'án chrókjuich'ehé xra”[†] —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja nínko, a ntá ntáchro ch'án kixin:

—Tí chaxín Xjeen Dios jaha la tìtohé t'anótjenxian tí noi ntihi

¹⁰ kixin ntáchro xroon itén Dios kixin:

Dios mé ts'etuenhen tí sín ángel kuènte ch'án kixin ts'ayakonhan sín.[‡]

¹¹ Tsotsé sín itjá

kixin tsotéhya totá ts'itja xro tí ts'anótjen§

—mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjiníhya chrókjuásixián kjuaxroan kjuachaxin kuènte Ìnchéni Dios”^{*} —ichro ch'ín Jesús.

¹³ Mé xikaha tió kjuachahya tí ch'ín Tsochren kaín nkehe chrók'uetuenhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuènte ch'án estado Galilea (Mt. 4.12-17; Mr. 1.14-15)

¹⁴ Ntá ch'ín Jesús xíkjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejótjo sín nkuíxín ntiha kixin nkexro tí jehe ch'án.

¹⁵ Kjuakoxin ch'án tí nínko sín kaín chjasin la ko kaín xín chojni kjuanchia sín kjuasáya kixin kóxrjinhin sín tí kjuako ch'án.

Ch'ín Jesús kjuák'e ch'án chjasin Nazaret (Mt. 13.53-58; Mr. 6.1-6)

^{*} 4:4 Deuteronomio 8.8 † 4:8 Deuteronomio 6.13 ‡ 4:10 Salmo 91.11 § 4:11

Salmo 91.12 * 4:12 Deuteronomio 6.16

¹⁶ Ntá ch'ín Jesús sákjuí ch'án chjasin Nazaret na mé tí chjasin tsík'ánkíxin ch'án. Ntá tí yaon t'ok'éhe sín mé k'uíxenhén ch'án ijnko nínko Israel kíxin xíkaha kuènhén ch'án. Ntá kjuák'exín toté ch'án kíxin sinchekuáxin ch'án tí xroon itén Dios.

¹⁷ Chjéhe sín ch'án tí xroon kuènte tí profeta Isaías. Ntá kuakitjéhe ch'án tí xroon ntá k'uitja ch'án nketí nixja xíkíhi:

¹⁸ Tí Nchakuen It'éni Dios tjetjinkítsana má,
kíxin kjueyána ch'án kíxin tsoxrjanka tí tan jína kuènte Dios
tsjakohá tí sín nòa.

K'uetuanna ch'án kíxin sítakítòhá jína tí sín t'ává asén kíxin
chóntahya sín nkerí tsaáxin sín,

la ko tsjakohá tí sín tjejóchjina kíxin nkexrí tsaá sín,

la ko sítak'ikuán tí sín t'íkonhya,

la ko sítakaá kaín tí sín tjejótjasóte kohya nkehe tsaáxin sín,

¹⁹ la ko tsoxrjanka kíxin ó kjuixraká tí yaon kíxin tí nkexro
tsitekaon la tsaá sín.†

²⁰ A ntá ch'ín Jesús kjuixín kjuínchekuáxin ch'án tí xroon, a
ntá chjéhe ch'án tí ch'ín tjinkítsa tí xra nínko ntá kjuák'etjaxín
ch'án. Ntá kaín tí sín tsíkójnkotsé ntiha nínko naxá tjejókomá
sín tí jehe ch'án.

²¹ Ntá kjuankíxin chronkaxín ch'án ntáchro ch'án kíxin:

—Ntá ijie la ó xiteyá tí nkehe kjuíntakuáxian tí xroon itén
Dios kuínhínrá —ichro ch'án.

²² Ntá kaín sín kóxrjínhín sín tí kjuako ch'ín Jesús la ko
chakon sín kíxin náxrjón tí nkehe nixja ch'án. Ntá kjuan-
chankíhi sín kíchó sín ntáchro sín kíxin:

—¿A jehya xjeen ch'ín José tíhi? —ichro sín.

²³ Ntá kjuátéhe ch'ín Jesús ntáchro ch'án kíxin:

—Kjá tsontáchrórá kíxin janhan ijnko chojni ch'e xroan
chrókjuíntakítòhá jína asenná senó, la ko tsontáchrórá kíxin
tí nkehe kuínhínrá kjuít'a tí chjasin Capernaum xíkaha
chrókjuít'a ntihi chjasenná, tsixrorá —ichro ch'án.

²⁴ Naxá tjenixja ch'án ntáchro ch'án kíxin:

—Ijnko nkehe chaxín tsotjonkará kíxin tí sín chjasén ijnko
nkexro chrónka itén Dios la mé xráxin chóntehya sín kjuasáyé
tí nkexro a.

²⁵ Chaxín ntáxrjan kíxin k'uéjé itsjé chojni chjin tsíkók'án tí
nación Israel tió kjuák'e ch'ín Elías tí nkexro k'uéchrónka itén
Dios la ntá í k'uániáhya chrin iní nánó ko t'ò la ko imá kókjinta
nkuíxin chjasin ntiha.

²⁶ Kjánchó Dios la k'uetuenhya ch'ín Elías sáchrókjuítsjehe
ch'án nijnko chojni chjin tsíkók'án tí nación Israel. Náhí. Dios
k'uetuenhén ch'án kíxin sátsjtsjehe ch'án ijnko chojni chjin
tsíkók'án itjen chjasin Sarepta chjino chjasin Sidón.‡

† 4:19 4.18-19 Isaías 61.1-2 ‡ 4:26 4.25,26 1 Reyes 17.9;18.1

²⁷ Kjaxin nación Israel k'uéjó nchónhya chojni chóna chinlepra tió kjuák'e ch'ín Eliseo chrónka ch'án itén Dios, kjánchó nijnko sín kuítóehya sín jína la mé jehó ch'ín Naamán kjuixín ch'án nación Siria mé kuítóhe ch'án jína§ —mé xikaha ichro ch'án.

²⁸ A ntá tió kuínhin sín xikaha ntáchro ch'ín Jesús la ntá kaín tí chojni k'uéjóxehen nínko la mé imá kónínkaon sín.

²⁹ K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuinçek'anótjenxin sín ch'án tí tjo a.

³⁰ A ntá ch'ín Jesús k'uaátsínka jnkosiné tí siín tí jehe sín la sákjuí ch'án.

Ijnko chojni chóna injnko nchakuen tí jínahya

(Mr. 1.21-28)

³¹ A ntá ch'ín Jesús sákjuí ch'án tí chjasin Capernaum na mé injnko chjasin estado Galilea, na ntá ntaha kjuankíxin ch'án kjuakohé ch'án chojni tí yaon t'ok'éhe sín.

³² Chrakon sín kíxin nkexrí kjuako ch'án kíxin kjuakoxín ch'án kíxin chóna ch'án kjuachaxin.

³³ A ntá nkaxenhen nínko kjuák'e injnko ch'ín chóna injnko nchakuen tí jínahya k'óyakoxín itén tí ch'ín a, ntáchro kíxin:

³⁴ —Títóhéni; ¿nkekuénte tjiaté tí jeheni kaín ni, jaha Jesús kjuixian chjasin Nazaret? ¿Á k'uinka kíxin sinček'itjáyanni? Ó tjátsan tí jaha la ko nõna kíxin jaha mé tí nkexro tjóá kuénte Dios —ichro tí nchakuen tí jínahya.

³⁵ Ntá ch'ín Jesús jiehe k'uetuénhen tí nchakuen tí jínahya ntáchro ch'án kíxin:

—Tánía. T'axrjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí siín sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka.

³⁶ A ntá kaín sín chrakon sín itjo sín kíchó sín kíxin:

—¿Xá nkexrí kíxin xikaha nixja tí ch'ín i? Jehe ch'án chóna kjuachaxin kíxin k'uetuénhen ch'án tí nchakuen tí jínahya k'uaxrjexín tí nkexro i —ichro sín.

³⁷ A ntá nkuíxín ntiha ikjo sín kíchó sín kíxin nkerí kjuaxroan kjuích'e ch'ín Jesús.

Ch'ín Jesús kjuínčekitohé jína tí tjan ich'ee ch'ín Simón Pedro

(Mt. 8.14-15; Mr. 1.29-31)

³⁸ Ntá ch'ín Jesús k'uaxrjexín ch'án tí nínko la ntá k'uixenhen ch'án ntóe ch'ín Simón. A ntá tí tjan ich'ee ch'ín Simón mé níhi tjan chóna tjan injnko sóa jieé ntá chronóehé sín ch'án kíxin chrókjuinčekitohé ch'án tjan jína.

39 Ntá k'uísén ch'ín Jesús tí tjen tjan ntá k'uętuęnen ch'án tí sóa a ntá kjuin. Ntá tuénxín k'uàya tjan la ntá kjuanjon tjan nkehe sine sín.

Ch'ín Jesús kjuínchekitohe ch'án jına itsjé chojni níhi

(Mt. 8.16-17; Mr. 1.32-34)

40 A ntá kuétaón yaon ntá kaín tí sín chóna sín sinníhi chóna sín nchónhya clase chin mé kujkao sín tí tjen ch'ín Jesús. Ntá kjuak'etja tja ch'án jnkojnko tí jehe sín a ntá xikaha kuítóhe sín jına.

41 La ko nchónhya chojni níhi chóna nchakuen tí jínahya la mé k'uaxrje tí nchakuen tí jínahya la k'óyako la ko ntáchro kixin: —Jaha mé Xjeen Dios —mé ichro tí nchakuen tí jínahya.

Kjánchó ch'ín Jesús k'uętuęnen ch'án tí nchakuen tí jínahya la kjuanjonhya ch'án kjuachaxin kixin tsonixja kixin ó nohe tí nchakuen tí jínahya kixin jehe ch'án na mé tí nkexro Cristo.

Ch'ín Jesús kjuako ch'án tí estado Galilea

(Mr. 1.35-39)

42 A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuí ch'án nteje. A ntá kaín tí chojni kjuíkjejá sín ch'án la k'uitja sín tí tjen ch'án. Tjinkaon sín chrókjuinchexrjenhen sín ch'án kixin sáchrókjuihya ch'án ókjé.

43 Kjánchó kjuátehe ch'ín Jesús ntáchro ch'án kixin:

—T'ichjánxin kixin sátsjia kaín chjasin ókjé tsoxrjanka tí tan jına kuente Dios kixin nkexrí tí kjuachaxin t'ętoan Dios, kixin xra ó mé k'uinka —ichro ch'án.

44 A ntá xikaha k'uájikjako ch'ín Jesús kaín tí njnko Israel tí estado Galilea.

5

Kjuaxroan itsé sín koche

(Mt. 4.18-22; Mr. 1.16-20)

1 Ntá ijnko yaon kjuák'e ch'ín Jesús chrínta ntayaon Gensaret ntá kóchjina nchónhya chojni na mé k'uíxítja kichó sín kixin tjinkaon sín chrókuinhin sín itén Dios.

2 Ntá k'uíkon ch'ín Jesús kixin tjejó iyó ntabárco jehó chjino chrínta ntayaon. A ntá tí sín itsé koche mé tsík'axrjexín sín ntiha la k'uéjó sín tjentoá sín la ko tjejótnemá sín tí nchísén tséya sín koche.

3 Ntá ch'ín Jesús k'uit'ótjen ch'án ijnko tí ntabárco ntiha na mé ntabárco kuente ch'ín Simón na ntá chronóęhe ch'án tí ch'ín Simón kixin sátsjiko ch'án ntabárco ijnko chrínta nta kjínhya. Ntá ntahó kjuák'enkáya ch'ín Jesús tí nta kjuák'etjxin ch'án kjuakohe ch'án nchónhya chojni síin chrínta nta.

4 A ntá tió kjuixin nixja ch'án ntá ntáche ch'án tí ch'ín Simón kixin:

—Tjikoá ntabárcō tí tjiá ntā ninka ntá itérá tí nchísén tseyará koche —ichro ch'án.

⁵ Ntá kjuátehe ch'ín Simón ntáchro ch'án kixin:

—Maestro, kjuích'eni xra kuenté tie la tséhyani ninkehó koche. Kjánchó tí jaha xikaha kuétuēnhéni la mé tsochr'ánni tí nchísén inaá —ichro ch'án.

⁶ Na ntá xikaha kjuích'e sín la ntá nchónhya koche tsítsé tí nchísén la ntá tí nchísén kjuankixin tinkák'ichje.

⁷ Ntá k'uèyaxin sín tja sín kixin chrórxakoa tí sín ch'eko sín xra tjejóxehen tí í jnko ntabárcō kixin tsjinkitsa sín. Ntá xrákōo sín ntabárcō kuente sín ntá kjuínchekaón sín yóí tí ntabárcō ntá chrókjuachahya tí ntabárcō na tjinkaon chrók'uániánkí ntā.

⁸ Ntá xikaha k'uikon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—Tjtohéni Inchéni kixin jeheni ijnko chojni chóna jie —ichro ch'án.

⁹ Mé xikaha ichro ch'ín Simón kixin chrakon ch'án la ko kjaxin chrakon tí í so sín tjejóko ch'án kixin xikaha kónhen xrenájín nchónhya koche.

¹⁰ La ko ch'ín Jacobo la ko ch'ín Juan, xjeen ch'ín Zebedeo, na mé jnkokoá ch'eko sín xra ch'ín Simón, la kjaxin chrakon sín. Kjánchó ntáche ch'ín Jesús tí ch'ín Simón kixin:

—Chrakonhya. Senó la koche k'uétse la nta jie la náhi la mé chojni tsjéyá —ichro ch'án.

¹¹ Ntá tió kjujiko sín tí ntabárcō tí chrínta ntā la kuitohe sín kaín nkehe kuente sín ntá chréhe sín sákjuiko sín tí ch'ín Jesús.

Ch'ín Jesús kjuínchekitohe ch'án jína ijnko chojni chóna chinlepra

(Mt. 8.1-4; Mr. 1.40-45)

¹² Kjuák'e ch'ín Jesús ijnko tí chjasin, ntá kui ijnko chojni níhi chóna chinlepra. A ntá tió k'uikon ch'án tí ch'ín Jesús ntá kjuák'exín toch'in ch'án chronóehē ch'án jnkójína ntáchro ch'án kixin:

—Inchéni, tí tjinkávan jaha la jína chrókjuínchekitohéni jína —ichro ch'án.

¹³ Ntá ch'ín Jesús kjuéntoá tja ch'án ntá kjuak'etja tja ch'án chrítaón tí sinníhi ntáchro ch'án kixin:

—Méxra xikaha tjínkavan. Ntá jie sintakitoha jína —ichro ch'án.

Ntá xikaha ichro ch'án ntá tí chinlepra tuénxín kjuínhin tí sinníhi.

¹⁴ A ntá k'uétuēnhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí ncha'tá la tsjánjuan tí nkehe tsík'etōan ch'ín Moisés ts'áyéhe Dios* kixin ntá tsoñoexín kaín xín chojni kixin ó kuítōha jína —ichro ch'án.

¹⁵ Kjánchó antsí k'uixikónohe sín nkexrí tí kjuaxroan kjuasin ch'ín Jesús, ntá nchónhya chojni k'uixikóchjinehe sín ch'án kixin tsinhin sín nkehe tsjako ch'án, la ko tsitoexín sín jína tí chin chóna sín.

¹⁶ Kjánchó ch'ín Jesús la k'uaxrjenta ch'án tí kohya chojni la ntaha nixjeexín ch'án Dios.

Ch'ín Jesús kjuínchekitohe ch'án jína ijnko ch'ín tsík'en tote (Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'ín Jesús na ntá ntiha k'uéjótjaxín iso sín fariseo la ko iso tí sín tjako tí ley, tsíkjixín sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuente Dios kjuakoxín ch'án kixin sinchekitohe ch'án chojni jína.

¹⁸ Ntá kui iso chojni tinkátsénki sín ijnko ch'ín tsík'en tote tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án.

¹⁹ Kjánchó xitjahya ts'ixenhen sín kixin nchónhya chojni síxenhen nchia. Ntá k'uit'ótjen sín tí chrítaón nchia, ntá kjuakjlin sín iso teja la ko tí nta sít'ó ntá ntiha kjuinkajinxín sín tí ch'ín níhi tjenkáya kania ntoí tí tjen ch'ín Jesús.

²⁰ Na ntá tió k'uikon ch'ín Jesús kixin imá tinkáchónki sín ch'án ntá nixjehe ch'án tí ch'ín níhi, ntáchro ch'án kixin:

—Jaha, ó kjuixin kjuinhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjlin ijie kixin jehó Dios mé chóna kjuachaxin tsjatsen ijie chojni”, mé xikaha kjuenkayáxin sín.

²² Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuente kixin xikaha tjenkayáxinrá?

²³ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuinhin ch'án tí ijie yamá ch'án, o á antsí xrahya chróntátjan ch'án kixin chrók'uinkatjen ch'án sáchrókjui ch'án?

²⁴ Méxra ijie tsjákoxian kixin tí Xjeen Dios K'óna Chojni mé chóna kjuachaxin ntihi chjasintajni tsjakjlinhin ijie chojni —ichro ch'án.

Ntá k'uetuēnhen ch'án tí ch'ín tsík'en tote ntáchro ch'án kixin:

* 5:14 Levítico 14.4-8

—Jaha tétuānhan t'inkatjen tjatsíyan kaniāa la sátjia ntōa —ichro ch'án.

²⁵ Ntá tuénxín k'uínkatjen tí ch'ín tsík'en tote nkayakon kaín tí sín siín a la kuákja ch'án kaniēe ch'án k'uékjak'eták'á ch'án ntá sákjuí ch'án ntōe ch'án la kjuanchehe ch'án Dios kjuasáya.

²⁶ Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uíkonní aṅtsí má kjuaxroan jie —ichro sín.

Ch'ín Jesús k'uíyēhe ch'án tí ch'ín Leví

(Mt. 9.9-13; Mr. 2.13-17)

²⁷ Ntá chr'éxín ntá ch'ín Jesús k'uaxrjexín ch'án nchia ntá k'uíkon ch'án ijnko ch'ín nchekjènkí mé it'in ch'án Leví tjetjāxín ch'án tjech'e ch'án xrā nkaxenhen tí nchia ntsí tí xenkaxín chichaon a. Ntá ntáchro ch'án kixin:

—Chr'éhé tí janhan —ichro ch'án.

²⁸ Ntá ch'ín Leví mé tuénxín k'uínkatjen ch'án la ntá kuitōhe ch'án kaín xín nkehe ntá chr'éhe ch'án tí ch'ín Jesús.

²⁹ Ntá chr'éxín ch'ín Leví chóna ch'án ijnko kia jie ntōe ch'án kjuikosáyehe ch'án tí ch'ín Jesús. Kjāxín k'uéjót'sjé tí sín nchekjènkí la ko itsjé í so chojni chóna jie k'uéjótjāxínko sín tí ch'ín Jesús chjino tí mesa a.

³⁰ A ntá tí sín fariseo la ko tí sín maestro tjako tí ley la mé kjuankíxín sín tjonta sín tí sín k'uájiko ch'ín Jesús ntáchro sín kixin:

—¿Nkekuènte ntekoará la ko t'ikoará tí sín nchekjènkí la ko tí sín chóna jie? —ichro sín.

³¹ A ntá kjuátēhe ch'ín Jesús ntáchro ch'án kixin:

—Tí chojni níehya t'ichjānxíenhya sín nkexro sich'e xroān. Náhi. Jehó tí sín níhi mé t'ichjānxínhin sín nkexro sich'ehe sín xroān.

³² Janhan la k'uinkahya ntihi kixin chrók'uíyāhā tí sín jína tjejó. Náhi. Janhan k'uinka kixin ts'íyāhā tí sín chóna jie kixin chrókuítóhe sín tí ijje sín ntá chrókujinkí sín tí tjenkayáxín sín —ichro ch'án.

Tjanchankíhi sín tí ch'ín Jesús kixin á chrókjónehya sín tió tsonixjēhe sín Dios

(Mt. 9.14-17; Mr. 2.18-22)

³³ A ntá kjuanchankíhi sín tí ch'ín Jesús kixin:

—¿Nkekuènte kixin tí sín k'uék'ajiko ch'ín Juan jnkoyaxón nehya sín na nixjēhe sín Dios, la ko kjāxín xíkaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

³⁴ Ntá kjuátēhe ch'ín Jesús kixin:

—¿Xá chrókuachará chrókuétuēnhenrá kaín tí sín tsík'íyēhe sín tsíkóchjina tí tjejó tí sín tsíkótehe kixin chrókjónehya sín tí naxā tjejóko sín tí ch'ín tsíkótehe?

³⁵ Kjánchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

³⁶ Kjaxin kjuíncheyóexin ch'án ntáchro ch'án kixin:

—Ninkexró chrókuaté ijnko camisa nixin ntá chrókjuak'eniehe ijnko camisa ntaxin kixin xikaha chrókjuich'e sín ntá chrók'uitjayan tí camisa nixin la ko kjaxin tí t'ò ka k'uaxrjexín tí camisa nixin tsoyóehya tí camisa ntaxin.

³⁷ Kjaxin chrókuíkiyahyará xranvino nixin ijnko tjuaxran ntaxin kixin tí xikaha chrókjuich'erá la chrók'uichje tí tjuaxran ntaxin ntá chrók'uitjayan tí xran la ko chrók'uitjayan tí tjuaxran.

³⁸ A ntá tí xranvino nixin chrókuikia ijnko tjuaxran nixin kixin yóí la chrók'uitjanyhya.

³⁹ La ko kjaxin ninkexró tió tsík'i tí xran ntaxin naxa chrókóxrjinhin chrók'ui xran nixin. Náhí. Tsontáchro ch'án kixin íchá jína tí xran ntaxin, tsixro ch'án —mé xikaha ichro ch'ín Jesús.

6

Tí sín k'uájiko ch'ín Jesús mé k'uín sín iso noatrigo ijnko yaon t'ok'éhe tí sín israelita

(Mt. 12.1-8; Mr. 2.23-28)

¹ Ijnko yaon t'ok'éhe sín la ch'ín Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankixin sín nkaya tja sín ó k'óntajinyá sín tí noa ntá kjóne sín.

² Ntá iso tí sín fariseo kjuanchankí sín kixin:

—¿Nkekuènte kixin tjejoch'erá xra jie? La mé kohya kjuachaxin tsonhen xra tí yaon t'ok'éheni —ichro sín.

³ Ntá kjuátehe ch'ín Jesús kixin:

—¿Jahará á kjuínchekuáxinhyará tí xroon chrónka nkehe kjuich'e ch'ín David la ko tí sín k'uájiko ch'án tió k'uén sín kjinta?

⁴ Na mé jehe ch'án mé k'uíxenhén ch'án ntøe Dios la kjóne ch'án tí niotja tsíkóyaon, la ko kjaxin chjéhe ch'án tí niotja tí sín k'uájiko ch'án kjónté jehó siín kjuachaxin sine tí sín nchat'á* —ichro ch'ín Jesús.

⁵ Kjaxin ntáchro ch'án kixin:

—A ntá tí Xjeen Dios K'óna Chojni mé chóna kjuachaxin ts'etøan nkexrí tsonhen tí yaon t'ok'éheni —ichro ch'án.

Ch'ín Jesús kjuínchekitohe jína ijnko ch'ín tsíxámá tja
(Mt. 12.9-14; Mr. 3.1-6)

* 6:4 6.3-4 1 Samuel 21.6; Levítico 24.5-9

⁶ A ntá í jnko yaon t'ok'éhe chojni ntá k'uixenhen ch'ín Jesús ijnko nínko Israel la ntá kjuankíxin kjuako ch'án. A ntá ntaha kjuák'e ijnko ch'ín tsixámá tja ch'án chjina.

⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'uikon sín á sinchekitohe ch'án chojni jína tí yaon t'ok'éhe sín kíxin ntá chrók'ueka sín ch'án jie.

⁸ Kjánchó jehe ch'án ó nohe ch'án nkehe tjenkayáxin asén sín ntá nixjehe ch'án tí ch'ín tsixámá tja ntáchro ch'án kíxin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tote ch'án.

⁹ Ntá nixjehe ch'ín Jesús tí í so sín ntáchro ch'án kíxin:

—Tsjánchánkíhárá ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitohe chojni jína ní o á chrók'óyánni chojni? —ichro ch'án.

¹⁰ Ntá ch'ín Jesús komá ch'án kaín tí chojni siín ntiha ntá nixjehe ch'án tí ch'ín níhi ntáchro ch'án kíxin:

—Tjéntoá tjá —ichro ch'án.

A ntá tí ch'ín a xíkaha kjuích'e ch'án ntá kuítóhe tja ch'án jína.

¹¹ Kjánchó tí sín fariseo tjejó mé kónínkaon sín mé ntá kjo sín kíchó sín kíxin tjinkaon sín chrók'óyán sín tí ch'ín Jesús.

Ch'ín Jesús kjueyá ch'án tí teyó sín ts'ajiko ch'án

(Mt. 10.1-4; Mr. 3.13-19)

¹² A ntá ijnko yaon ch'ín Jesús sákjui ch'án ijnko jna kíxin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios.

¹³ A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kíxin ts'óna sín apóstol ts'ajiko sín ch'án.

¹⁴ A ntá tí sín í mé xíkíhi it'in sín. Na mé ch'ín Simón la ntá ch'ín Jesús kjuínchek'in ihnjé ch'án Pedro kjaxin; la ko kíchó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé,

¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista;

¹⁶ la ko ch'ín Judas la kíchó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

Ch'ín Jesús kjuakohe ch'an nchónhya chojni

(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxín sín tí jna ntá k'uéjé sín nonte yóxin jehe ch'án la ko tí sín kjueyá ch'án. Kjaxin k'uíxíkhjina nchónhya chojni kjuixín nkuíxín estado

Judea la ko chjasin Jerusalén la ko tí chrínta ntayaon tí síin tí chjasin Tiro la ko tí chjasin Sidón. Ó kjui sín kixin tsinhin sín tí nkehe tsjako ch'ín Jesús la ko tsitōhe sín jína.

¹⁸ **A** ntá tí sín kjuaxróxinhya k'uéjō k'uéchōnta sín nchakuen jínahya na mé kuítóhe sín jína kjaxin.

¹⁹ Kaín chojni tjinkaon chrókuákóxin sín tí ch'ín Jesús kixin kjuínchekitōhe ch'án jína kaín xín chojni kixin jehe ch'án chōnta ch'án kjuachaxin jié.

*Tí kjuachéhe la ko tí kjuaxróxinhya
(Mt. 5.1-12)*

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejorá jahará nõará kixin chontará kjuachaxíen Dios.

²¹ 'Náxrjón tjejorá jahará t'énxinrá kjinta ijie kixin chr'éxin sinterá jína.

'Náxrjón tjejorá jahará tsjankará ijie kixin chr'éxin tsjanorá.

²² 'Náxrjón tjejorá jahará nínkakonhanrá chojni la ko ts'inkitiárá sín sátsjirá ókjé, la ko t'ántaxínhanrá sín la ko t'ákjenxin sín ihñiárá éxí ijnko nkehe jínahya kixin tinkachónkirá tí Xjeen Dios K'óna Chojni.

²³ Tsocháhará má la ko imá tsochontará kjuachéhe tí yaon a kixin ts'ayéhérá nkehe kuènte nkaya nkajní. **A** ntá xikaha tí t'áchrjī tí sín jínahya ch'e la mé ósé kjuate sín tí sín k'uéchronka itén Dios.

²⁴ **A** ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

²⁵ **A** ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

'**A** ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.

²⁶ 'Kjuaxróxinhya ts'ejorá tió kaín chojni tsjikosáyahará sín kixin xikaha tí t'áchrjī sín kjuikosáyehe tí sín ntoáhya k'uéchronka itén Dios ósé.

*Tsotjuèheni tí sín nínkakohenni
(Mt. 5.38-48; 7.12)*

²⁷ '**A** ntá jahará tjejotinhínrá mé tjéxrjanka kixin chrótjuéhérá tí sín nínkakonhanrá la ko jína chrókuínkĩtsará tí sín tjinkakonhya tí jahará.

²⁸ Jína nixjehérá tí sín t'ántaxínhanrá la ko tjanchehérá Dios kixin tsjinkĩtsa ch'án tí sín chónkíhará sín.

²⁹ Tí chjéhe ijnko nkexro ijnko tuānará chrókjóka tí í jnko nánko kixin chróchjéhe sín tíha kjaxin. La ko tí síin ijnko nkexro tjinkaon sín tsakitsjaha sín tí chamara tjín t'ínkayate na mé títóhé kixin kjaxin sátsjiko sín camisá kjaxin.

³⁰ Tí jnkojín nkexro tjanchaha nkehe chonta la chjehé sín. **A** ntá tí tsakja sín nkehe kuéntá la tjanchehya sín kixin naxa ts'ókjanhan sín.

³¹ Méxra chrókjuikosáyehérá kichuárá éxí yóhē nkexri tjinkáonrá chrókjuikosáyahará tí jehe sín kjaxin.

³² Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjónté tí sín jínahya tjasin jje la xikaha ch'e sín.

³³ **A** ntá tí tjikosáyehérá jehó tí sín tjikosáyahará la kohya ninkehó tsjachahyará xikaha. Kjónté tí sín jínahya tjasin jje mé kjaxin xikaha ch'e sín.

³⁴ La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjónté tí sín jínahya tjasin jje xikaha ch'e sín nchekjen kichó sín chichaon la ko chónhen sín kixin tsokjan tí chichakoen sín inaá.

³⁵ Kjánchó jahará chrótjuèhérá tí sín nínkakonhanrá la ko jína chrókjuich'eherá sín xra la ko chrókjuincheckjenrá sín chichaon la chróchoénhyará kixin chrókjan tí chichakoenrá inaá. Mé xikaha chrókjuich'erá la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya.

³⁶ Chrókuikonóehérá kichuárá éxí yóhē It'ará nkaya nkajní tikonóehē ch'án chojni.

Chrók'uantaxienhyani kichó ni

(Mt. 7.1-5)

³⁷ 'Chrókuékahyará jje ókjé chojni kixin ntá Dios chrókuanchahya ch'án jje tí jahará. Chrókuétuanhyará kixin chrókjuasóte í jnko chojni kixin Dios kjaxin chrókjuincheckjasótiahyará ch'án tí jahará. Chrók'uitjáyahanrá ichrén jje kjuasinhanrá í jnko chojni kixin ntá Dios chrókjuincheck'itjáyahanrá ch'án tí jje kjuásinrá.

³⁸ Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsík'enka ch'án kixin tsík'ótsjéyehe ch'án tí nkehe tsíkjachroyá ch'án tjetóxin tsjanjon ch'án. Dios tsotjáhará xikaha yóhē éxí tsíchjehérá í so chojni.

³⁹ Ntá kjuíncheyóexin ch'ín Jesús ntáchro ch'án kixin:

—¿Xá á chrókójína ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanótjenyá sín ichrén tòye.

⁴⁰ Ijnko nkexro xrakohē la noehya éxí tí nkexro tjako. Kjánchó tió tsjixin tsoxrakohē ch'án ntá tsonohē ch'án éxí nohe tí nkexro kjuakohē ch'án.

41 '¿A ntá nkekuènté tsjehé tí chjínínó ntsí tjenkánkí ikon tí kíchuá, tí naxa ántosán tí nta jíé tjenkánkí ikuan?

42 ¿Mé xikaha nkexrí kixin chróntáche kíchuá kixin chrókuítøhe ch'án kixin chrókuakitsjenkíhí ch'án tí chjínínó ntsí tjenkánkí ikon ch'án tí naxa ántosán tí nta jíé tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jíé tjenkánkí ikuan kixin ntá chrók'uikuan chrókuakitsjenkiá chjínínó ntsí tjenkánkí ikon tí kíchuá.

Tí nta mé tjatsoanxínni tí to tsík'óna
(Mt. 7.17-20; 12.34-35)

43 'Kohya nta jína chrók'óna to jínahya, la ko kjaxin kohya nta jínahya chrók'óna to jína.

44 Jnkojnko tí nta mé tjatsoanxínni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva.

45 Ijnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxí tjenkayáxin asén mé xikaha nixja ir'va.

Ch'ín Jesús kjuíncheyóexin éxí yaá nkexro kjuích'éna nchia
(Mt. 7.24-27)

46 '¿Nkekuènte ntáchorá kixin janhan Ìnchárá, la ntá tahyará kuenté tí nkehe tétuñhanrá?

47 Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín.

48 Na mé jehe sín tóyóhe ijnko nkexro kjuích'éna nchia la senó k'óxraya ch'án tøyè nínka kixin ntá sich'éna ch'án nchia chrítaón tí tjo a. A ntá tió k'uánkí tí ntarío la ikui tí ntá k'uúntate tí nchia, kjónté xikaha la k'uátjoákohya la ní kuínkíhya tí nchia a kixin jína tsík'óna chrítaón tjo tjejen.

49 A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntarío la ikui tí ntá k'uúntate tí nchia la ntá k'uátjoáko ntá tí nchia la ntá kuenté tí nchia la k'uújtáyan —mé ichro ch'ín Jesús.

7

Ch'ín Jesús kjuínchekitøhe jína ijnko ch'ín ch'ehe ijnko soldado romano xra

(Mt. 8.5-13)

1 Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum.

2 Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án.

³ **A** ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjijitsjehe sín tí ch'ín Jesús tsochronóehe sín ch'án kixin chrókjuiji ch'án chrókjuinchekitohe ch'án jína tí ch'ín ch'ehe ch'án xra.

⁴ Ntá kjuiji sín kóchjinehe sín tí ch'ín Jesús kjuankixin chrónóehe sín ch'án ntáchro sín kixin:

—Imá jína tí ch'ín capitán la mé tjinkaon ch'án chrókjuinkitsa ch'án

⁵ kixin tjuèhe ch'án tí nacióon kuènteni la ko jehe ch'án kjuinkitsa ch'án la ko k'uetóan kixin ts'óna ijnko nínko kuènteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuēnhen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uixēnhén ntōe ch'án.

⁷ Mé xikaha chrókósuèhe ch'án chrókjuiji ch'án chrókjueyá ch'án tíjaha. Méxra tí kjuachaxin chrónixja ó chrókuitōexín jína tí ch'ín ch'ehe ch'án xra.

⁸ Kixin jehe ch'án kjaxin t'ítuēnhen ch'án la ko kjaxin chónta ch'án soldado t'etueñhen ch'án inaá. Tió t'etueñhen ch'án ijnko sín kixin sátsji la mé sátsji la ko tió t'etueñhen ch'án íjnko sín kixin xrákoa la mé xrákoa la ko tió t'etueñhen ch'án íjnko sín kixin sich'e ijnko xra la mé nchexiteyá ch'án —mé xikaha ichro tí sín kui.

⁹ Ntá ó kuínhin ch'ín Jesús xikaha ntá chrakon ch'án kixin xikaha tjenkayáxin tí ch'ín a, a ntá nkátjáa ch'án komá ch'án tí chojni chréhe ntáchro ch'án kixin:

—Ntáxrjan kixin naxa k'uitjahya nijnko nkexro israelita xikaha tinkáchónki éxí tí ch'ín i —ichro ch'án.

¹⁰ **A** ntá ó kjan nchia tí sín tsík'ítuēnhen la ó k'uíkon sín kixin ó tsíkitohe jína tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxín ntá sákjui ch'ín Jesús ijnko chjasin it'in Naín la ko sákjuiko ch'án tí sín k'uájiko ch'án la ko nchónhya í so chojni.

¹² Tió kjuíjichjina sín tí chjasin a la k'uíkon sín nchónhya chojni sákjuikjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuikotoxín sín tjan.

¹³ Ntá tió k'uíkon Ìnchéni tí tjan a ntá kuíkonóehe ch'án tjan ntáchro ch'án kixin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénkí tí nkexro tsík'en la kjuak'etja tja ch'án tí nkehe tinkátsénkía sín tí ch'ín

tsík'en. A ntá tí sín kuámá nta k'uéjóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuanhan t'àyá —ichro ch'án.

¹⁵ Ntá tí ch'ín tsík'en tuénxín kjuák'etjaxin ch'án la ko kjuankíxin nixja ch'án. Ntá ch'ín Jesús kjuínchek'áyéhe ch'án iné tí ch'ín ntasoá la sákjuíko.

¹⁶ A ntá tió k'uíkon sín xikaha kónhen la kaín sín imá chrakon sín la ko kjuankíxin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etōan chrónka itén Dios ts'ejókoni —ichro sín.

Kjāxin ntáchro sín kixin:

—Ó kui Dios tsjinkitsa ch'án chjasén ch'án —ichro sín.

¹⁷ A ntá nkuíxin estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyēhe ch'án iyó tí sín k'uájiko ch'án

¹⁹ k'uetuēnhen ch'án sín sátsjitsjehe sín tí ch'ín Jesús tsjikjan-chankíhi sín ch'án kixin á jehe ch'án tí nkexro tsi o á tsochónhen sín í jnko nkexro, tsixro sín.

²⁰ A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kixin:

—Ch'ín Juan Bautista k'uetōan ch'án kuini tsikjan-chankíhani kixin á jaha tí nkexro tsi ní o á tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitohe ch'án itsjé chojni jína la mé kjuatsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'íkon ch'án itsjé chojni t'íkonhya.

²² A ntá kjuátēhe ch'ín Jesús ntáchro ch'án kixin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kixin tí sín k'uíkonhya la ó t'íkon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuítóhe sín jína, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxrakōhe sín tí tan jína tsaáxin sín.

²³ Ntá náxrjón tjen tí nkexro kohya nkehe t'inkákonhen tí tinkáchónki sín tí janhan —mé ichro ch'án.

²⁴ Tió sátsíkji tí sín ichr'án ch'ín Juan ntá kjuankíxin nixjehe ch'ín Jesús tí sín k'uéjó ntiha kixin nkexrí tjen ch'ín Juan ntáchro ch'án kixin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrjntō?

25 Tí náhí, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la ko chóna kaín nkehe náxrjón la mé ntøe rey tjejó sín.

26 ¿A ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xrjanka kixin chaxín xíkaha jehe ch'án na mé antsí t'etøan ch'án la ntá tí sín k'uéchrónka itén Dios ósé la kánhyó.

27 Ch'ín Juan mé tí nkexro kui éxí chrónka tí xroon itén Dios ósé ntáchro kixin:

Janhan mé tsochr'an ijnko nkexro tsochrónka itan kuèntana tsitónxin ntja,

kixin tsjasíyóxin ch'án ntja kuèntá.*

Mé xíkaha chrónka tí xroon itén Dios.

28 Ntá ijnko nkehe chaxín tsotjonkará kixin kaín tí nkexro k'uéjó senó k'uéchrónka itén Dios la kánhyó tjetøan sín la antsí tjetøan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios nkaya nkajní la antsí tjetøan sín a ntá jehe ch'ín Juan la kánhyó —ichro ch'ín Jesús.

29 A ntá tió kuínhin sín tíhi la ntá kaín tí chojni la ko tí sín nchekjènkí tsíkikíte ch'ín Juan la ó kjuátøan sín kixin Dios la jína ch'án.

30 Kjánchó tí sín fariseo la ko tí maestro tjako tí ley tsíkikítehya ch'ín Juan la mé tjinkakonhya sín tí nkehe tjinkaon Dios chrókjuinkítsa tí jehe sín.

31 Ntá ntáchro Ìnchéni kixin:

—¿Nkexrí chrókjuintayóaxian tí chojni tjejó jie? ¿Nkehe chrókóyóhe sín?

32 Tóyóhe sín tí chánjan tjejótxaxín sín tí ntasin tsítán sín la t'íyehé kichó sín ntáchro sín kixin: “Kjuínchéntáchroni flauta la tēhyará la ko tsjeni isón kuènte chojni tsík'en la tsjankahyará.”

33 Kixin ó kui ch'ín Juan Bautista la kjónehya ch'án niotja la ko k'uíhya ch'án vino la ntá jahará ntáchrórá kixin ijnko nchakuen tí jínahya chóna ch'án.

34 A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntáchrórá kixin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkí.

35 A ntá tí xjeen Dios mé tjakoxín sín kaín tí nkehe tjinkaon Dios.

Ch'ín Jesús mé kjuák'e ch'án ntøe ijnko ch'ín fariseo it'in Simón

* 7:27 Malaquías 3.1

36 Ijnko ch'ín fariseo mé chronóehē ch'án tí ch'ín Jesús kixin tsjiji ch'án ntōe ch'án sineko sín ch'án. Ntá sákjui ch'án ntōe tí ch'ín a, a ntá ntiha kjuák'etjāxīn ch'án tí tjen mesa.

37 A ntá itjen ijnko tjan nchónhya jie chóna tjan. Itjen tjan tí chjasin ntiha la ntá kónohe tjan kixin tsíkji ch'ín Jesús ntōe tí ch'ín fariseo la ko ntaha sineko sín ch'án. Ntá kui tjan ntiha kuikāo tjan ijnko xro tjete tsíkaón aceite xraxé náxrjón.

38 Ntá tsjánka tjan kóchjina tjan toté ch'ín Jesús ntá ntakon tjan kjuátanxín toté ch'án la ko kaxīhi tjan kjuínchexámáxin tjan toté ch'án la ko kjóneko kochíto toté ch'án la ko kjuíncheka tjan toté ch'án tí aceite xraxé náxrjón.

39 A ntá tió k'uíkon tí ch'ín fariseo tsík'íyehē tí ch'ín Jesús ntá kjo ch'án asén ch'án kixin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetákóxin ch'án kixin ijnko tjan jínahya tíha”, ichro ch'án.

40 Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátehe tí ch'ín fariseo ntáchro ch'án kixin:

—Chronka, Maestro —ichro ch'án.

41 Ntá ntáchro ch'ín Jesús kixin:

—K'uéjō yáa chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí ijnko a la síká ch'án cincuenta denario.

42 A ntá kjuachahya sín k'ókjenhen sín tí chichaon tí ch'ín síkéhe sín ntá kuikonóehē ch'án sín ntá k'óxíka ch'án tí cuenta síká yóí sín. A ntá jie chronka jaha kixin nkexro tí yóí sín antsí chrótjuēhe tí nkexro kuikonóehē ch'án —ichro ch'ín Jesús.

43 Ntá kjuátehe tí ch'ín Simón ntáchro ch'án kixin:

—Janhan ntáxrjan tí nkexro kuikonóehē má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

44 Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'íkuan tí tjan a ní? Janhan na mé k'uíxanhan ntōa la ntá jaha la kjuánjonhya ntá chrók'ontia totená. Kjánchó jehe tjan ti ntakon tjan kjuínchek'óntixín tjan totená la ko kaxīhi tjan kjuínchexámáxin tjan.

45 A ntá jaha la kjóntekoahyana kochíto. Kjánchó jehe tjan naxa kuítōehya tjan neko kochíto totená.

46 Jaha la kuíkítexinhya aceite kja. A ntá jehe tjan kuíkite tjan aceite xraxé náxrjón totená.

47 Mé xíkaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuínhin tjan. A ntá ijnko nkexro kjuínhin intsíkoá jie la mé xíkaha intsíkoá tjakoxin kixin tjuana sín —ichro ch'án.

48 Ntá nixjehe ch'án tí tjan a ntáchro ch'án kixin:

—Ó kjuínhan tí jie chonta —ichro ch'án.

49 A ntá kaín tí sín tsíkóchjina sín k'uéjótjaxin sín tí tjen ch'án mé kjuankixin kjo sín kíchó sín ntáchro sín kixin:

—¿Xá nkexro tíhi kixin tjakjìnhin ch'án ijíe chojni?

50 A ntá ch'ín Jesús ntáche ch'án tí tjan a kixin:

—Ó kuaá jaha kixin kuítekávan tí janhan. A ntá jie kjuaxróxin sátsjia ntqa —ichro ch'án.

8

Iso chojni chjin kjuínkítsa tí xrq kjuích'e ch'ín Jesús

1 A ntá chr'éxin ntá ch'ín Jesús k'uáji ch'án itsje chjasin hyé la ko chjasin ntsínsí kjuako ch'án la ko chrónka ch'án tí tan jína kixin nkexrí tí kjuachaxin t'etqan Dios. A ntá tí teyó sín mé k'uájiko ch'án.

2 Kjaxin chréhe iso chojni chjin tsíkjinchekitqhe ch'án jína tsíkakitsje ch'án tí nchakuen tí jínahya k'uéchónta sín la ko tsíkjatsen ch'án tí chin k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchónta tjan,

3 la ko í jnko tjan it'in tjan Juana ne mé xì mé it'in ch'án Chuza. Jehé ch'án mé ch'ehe ch'án xrq tí ch'ín Herodes t'etqan ch'án, la ko í jnko tjan mé it'in tjan Susana, la ko itsje í so sín k'uéjó sín. A ntá kaín sín kjuanjón sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexin ch'án éxí ijnko ch'ín k'uénkq nonte (Mt. 13.1-9; Mr. 4.1-9)

4 Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntiha. A ntá ch'ín Jesús kjuíncheyóexin ch'án ntáchro ch'án kixin:

5 —Éxí ijnko ch'ín sákjuík'enkq noatrigo nontee ch'án. Mé xikaha sákjuí ch'án ik'ue ch'án tí noatrigo a. Ntá iso noa la k'uanótjen chrínta ntja ntá nkaxénjin chojni tí noa a la ko kjaxin tí koxroxé k'uènkq va.

6 A ntá í so la k'uítji chrík'á xrq ntá k'uayan la xamá kixin kánhyó síin tjo.

7 A ntá í so la kjuítsínkák'á kach'í ntá k'uánkí kach'í la ntá í xitjahya k'uánkí tí no a kixin tsíkjate tí kach'í.

8 A ntá í so la mé tsík'itjí nche jína. A ntá tió k'uánkí la k'óna jína la mé jnkojnko noatje k'óna ciento neno noa —mé xikaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:

—Tí tjínkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuènte kjuíncheyóëxin ch'án
(Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóëxin ch'án.

¹⁰ Ntá ntáchro ch'án kixin:

—Dios mé tsjinkítsa kixin tsonohará tí nkehe noehya í so chojni nkexrí t'etōan Dios. Kjánchó tí í so sín tjáqohā sín kjuíntayóāxoán kixin ntá k'uíkon sín la kjónté tsjátsoanhya sín la ko kuínhin sín na kjónté naxā tienxínhya sín.

Ch'ín Jesús chronkaxín nkexrí t'axrjexín tí ch'ín k'uenka nonte

(Mt. 13.18-23; Mr. 4.13-20)

¹¹ 'Ntá tsoxrjanka nkexrí t'axrjexín tí nkehe kjuíntayóāxoán. Tí noatje mé tí itén Dios.

¹² A ntá tí noa k'uanoátjen chrínta ntja la mé tóyóhē tí sín kuínhin tí tan a. A ntá ó kuí ch'ín Tsochren ntá kjuínchek'itjáyan ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín.

¹³ A ntá tí noa kjuítsínkak'á xro la éxí yóhē tí chojni kuínhin itén Dios la tjoka kóxrjínhin sín kuínkáchónki sín. Na ntá itsi tí kjuaxróxinhya, a ntá tsítóhe sín tí itén Dios kuínhin sín kixin naxā nínkahya chóna nuèe.

¹⁴ A ntá tí noa kjuítsínkak'á kach'í na mé éxí yóhē ijnko chojni kuínhin tí tan jína kjánchó tjitoxienhya ntje sín kixin tóxakonhen sín tí xra chóna sín la ko tjinkaon sín tsochóna sín itsjé nkehe la ko kaín tí nkehe tóxrjínhin sín mé t'ínkákonhen kixin xíkaha la xitjahya sich'ehe sín xra Dios.

¹⁵ A ntá tí noa k'uínka nonte jína na mé éxí yóhē tí chojni kuínhin tí itén Dios a ntá kaín asén sín kuítekaon sín la ntá kuítóehya sín tí tan, a ntá xíkaha la jína ch'ehe sín Dios xra.

Ch'ín Jesús mé kjuíncheyóëxin éxí ijnko xrohi tjeche

(Mr. 4.21-25)

¹⁶ 'Nijnko nkexro chrókjuínchek'ákjen xrohi chrókjuak'ema nkaxenhen chí o chrókjuak'ema chrínkí cama. Náhí. Noi chrókjuak'e xrohi kixin ntá tí sín ts'ixenhen nchia ts'ikonxín sín tí t'ínkaséyan.

¹⁷ Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxíxin ti xrohi a.

¹⁸ A ntá chrókuínhínrá jína kixin tí tjen ijnko nkexro chóna nkehe la mé ts'áyéhē ch'án má. A ntá tí nkexro chónahya nkehe la mé ts'axrjehe ch'án kjónté tí nkehe ntsí tónhen ch'án kixin chóna ch'án.

Tí iné la ko tí kichó ch'ín Jesús

(Mt. 12.46-50; Mr. 3.31-35)

19 **A** ntá kjuíji iné la ko kichó ch'ín Jesús tí tjen ch'án. Ntá xitjahya tsqchjinehe sín ch'án kixin nchónhya chojni síin.

20 **A** ntá ijnko sín ntiha tsikjichenka ch'ín Jesús kixin:

—Iná la ko kichuá tjejó sín ntója la tjinkaon sín chrók'uikon sín tí jaha —ichro sín.

21 Kjánchó kjuátehe ch'án ntáchro ch'án kixin:

—Tí sín tinhin itén Dios la ko titekaon sín na mé t'íkuan tí jehe sín éxí naná la ko kichiná —ichro ch'án.

Ch'ín Jesús k'uetuēhen tí xrinto la ko tí ntá kixin ts'ixita
(Mt. 8.23-27; Mr. 4.35-41)

22 Ntá ijnko yaon k'uixenhen ch'ín Jesús ijnko ntabárcq la koí tí sín k'uájiko ch'án. Ntá ntáchro ch'án kixin:

—Sátsjini tóhe ntayaon —ichro ch'án.

Ntá sákjuí sín.

23 Ntá nachrohe tjejó'tatòye sín a ntá ch'ín Jesús mé kjuák'ejua ch'án. **A** ntá xrínahya tjjan chjéhe xrinto chrítaón ntá ntá xrankixin sítikia ntá tí ntabárcq ntá chrakon sín kixin ts'aniankí ntá tí ntabárcq.

24 Ntá kjuínchekjayehe sín tí ch'ín Jesús, ntáchro sín kixin:

—Maestro, Maestro. Tjejó't'ianiankíni ntá —ichro sín.

Ntá ch'ín Jesús k'uàya ch'án ntá k'uetuēhen ch'án tí xrinto la ko tí ntá kixin ts'ixita, a ntá náxrjón k'uixita tí ntá la ko tí xrinto.

25 Ntá ntáche ch'án tí sín k'uájiko ch'án kixin:

—¿Á naxa tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

—¿Xá nkexro tíhi kixin t'etuēhen ch'án xrinto la ko tí ntá la titekakonhen ch'án?

Ijnko ch'ín nonte Gadara chóna nchakuen tí jínahya
(Mt. 8.28-34; Mr. 5.1-20)

26 Ntá kjuíji sín tí nonte Gadara, na mé tóhe ntayaon ntóí chók'èxin estado Galilea.

27 Ntá k'uínkajinxin ch'ín Jesús tí ntabárcq ntá kóchjina ijnko ch'ín chjasin ntiha. Ntá ó má sé chóna ch'án nchakuen tí jínahya. Na ntá ni ké ch'án t'inkáyahya ch'án, la ko jehya ntq̄e ch'án k'uékjak'e ch'án na mé tjen ch'án tí panteón.

28 Tió k'uikon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'óyako ch'án ntáchro ch'án kixin:

—¿Nkekuēnte tjiaté tí jeheni, jaha Jesús Xjeen Dios itjen nkaya nkajní? Chronóahani nchekjasótehyani —ichro ch'án.

29 Xikaha ntáchro ch'án kixin ch'ín Jesús tsík'etuēhen tí nchakuen tí jínahya kixin ts'axrjexín tí jehe ch'án. Nchónhya veces tí nchakuen tí jínahya k'uék'etuēhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsíkóntetoxín ch'án kixin

tjinkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án kixin nchakuen tí jínahya tjinkaon sáchrókjuiko ch'án nteje.

³⁰ Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xikaha kixin nchónhya nchakuen tí jínahya chóntha ch'án.

³¹ A ntá kaín tí nchakuen tí jínahya chronóehē tí ch'ín Jesús kixin chrók'uetōanhya ch'án kixin chrókjuitsínkayá tí tōye njinka.

³² A ntá ntiha tí jnā siín nchónhya cochíno xrine va. A ntá tí nchakuen tí jínahya chronóehē tí ch'ín Jesús kixin chrókjuanjon ch'án kjuachaxin chrók'uixenhen tí cochíno a. A ntá kjuanjon ch'án kjuachaxin.

³³ A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochíno a. A ntá kaín tí cochíno kuinká va sákjuí va nó nkaya tsaka k'uánótjenkí va ntā kjuínhin va ntā.

³⁴ A ntá tí sín sít'ayakonhen tí cochíno k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho.

³⁵ A ntá tí chojni k'uaxrjexín sín chjasin sákjuitsjehe sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjaxin ch'án chrínkí toté tí ch'ín Jesús, ó tsík'inkáya ch'án iké ch'án kixin ó jína tjen ch'án, a ntá chrakon sín tí k'uíkon sín xikaha.

³⁶ A ntá tí jehe sín tsík'íkon sín kixin xikaha kónhen la chrónka sín kixin nkexrí kuítóhe jína tí ch'ín k'uéchóntha tí nchakuen tí jínahya.

³⁷ A ntá kaín tí chojni chjasin Gadara kjuankíxin chronóehē sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'uit'ótjen ch'án tí ntabarco sákjuíxin ch'án ntiha.

³⁸ A ntá tí ch'ín tsík'axrjexín tí nchakuen tí jínahya chronóehē ch'án tí ch'ín Jesús kixin á chrókjuanjonhya ch'án kjuachaxin sáchrókjuí ch'án koí ch'án. Kjánchó ch'ín Jesús k'uetuēnhen ch'án kixin tsitōhe ch'án ntáchro ch'án kixin:

³⁹ —Titōha satjia ntōa la ko chrónka nkexrí tí kjuachaxin jié kuēnte Dios kuítóaxián jína jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin ijnko kjuaxroan jié kjuích'e ch'ín Jesús kjuínchekitōhe ch'án jína.

Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Mr. 5.21-43)

⁴⁰ Tió ch'ín Jesús kjan ch'án tí í jnko chrínta ntá ntá nchónhya chojni siín ntiha la chéhe sín kjuíji ch'án ntiha, kixin kaín sín tjejóchónhen sín ch'án.

⁴¹ Ntá kui ijnko ch'ín it'in Jairo na mé ijnko ch'ín t'etoan kuènte nínko. A ntá kjuák'exín toch'in ch'án tote tí ch'ín Jesús chronóhe ch'án kixin sáchrókjuí ch'ín Jesús ntóe ch'án

⁴² kixin chóna ch'án jnkokoáxón xjeen ch'án chjin chóna teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uíxitja kichó sín.

⁴³ Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóna tjan teyó nánó titóehya tjan jína. A ntá kaín nkehe k'uéchóna tjan kjuenkehe tjan tí sín ch'e xroan la ko nijnko sín kjuachahya sín kjuínchekitohe sín tjan jína.

⁴⁴ A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

⁴⁵ Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin ninkexró, ichro sín. A ntá ch'ín Pedro la ko tí sín k'uéjoko ch'án ntáchro sín kixin:

—Maestro, nchónhya chojni siín la ko tótéka sín la ntáhi ntáha, ¿ntá nkekuènte kixin naxa tjanchankiá kixin nkexro tí kuákóxian? —ichro sín.

⁴⁶ Kjánchó ntáchro ch'ín Jesús kixin:

—Jnkojín nkexro kuákóxinna kixin kónona kixin kjuachaxin kuèntaná kuítóexín ijnko chojni jína —ichro ch'án.

⁴⁷ A ntá tió k'uíkon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínki tote tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxin tjan iké ch'án la ko nkexrí kuítóexín tjan jína xikaha.

⁴⁸ Ntá ntáchro ch'án kixin:

—Jaha, xjeenni, ó kuítóha jína kixin kuítekávan tí janhan. Kjuaxróxin sátjia —ichro ch'án.

⁴⁹ Naxa tjejótjo sín ntiha ntá xrínahya ikui ijnko nkexro kjuixín ntóe tí ch'ín t'etoan kuènte nínko, a ntá chénka ch'án tí ch'ín t'etoan kixin:

—Xjaan na mé ó kjuixín k'uén. Áxri í chjeéhya xra tí maestro —ichro ch'án.

⁵⁰ A ntá tió kuínhin ch'ín Jesús la kjuátehe ch'án ntáchro ch'án kixin:

—Chrakonhya. Títekávan tí janhan la tsitóhe xjaan jína —ichro ch'án. A ntá sákjuí sín.

⁵¹ A ntá tí kjuíj'ik'ixenhen sín nchia ntá kuít'øehya ch'ín Jesús kíxin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí ìné tí xjachjin chrók'uixenhen sín tí tjen tí xjan a.

⁵² Kaín tí sín tjejó ntaha tsjánkàma sín tí xjan a. Kjánchó jehe ch'án ntáchro ch'án kíxin:

—Tsjan kahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá sín ch'án kíxin jehe sín la ó nohe sín kíxin tsík'en xjan.

⁵⁴ A ntá jehe ch'án itsé ch'án tja xjan ntá itsen k'uíyehē ch'án tí xjan ntáchro ch'án kíxin:

—Tjarisoá, t'àya —ichro ch'án.

⁵⁵ Ntá kjan asén tjan ntá tuénxín k'uínkatjen tjan. Ntá k'uētoan ch'ín Jesús kíxin tsjanjon sín nkehe sine tjan.

⁵⁶ Ntá it'é la ko ìné xjan la chrakon sín. A ntá ch'ín Jesús k'uētuēnhen ch'án sín kíxin ninkexró chróchenkahya sín kíxin xikaha kónhen.

9

*Ch'ín Jesús ichr'án ch'án tí teyó sín
(Mt. 10.5-15; Mr. 6.7-13)*

¹ Ntá ch'ín Jesús k'uētoan kíxin tsøchjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchakuen tí jínahya chóna chojni la ko sinchekitohe sín chojni jína.

² Ntá k'uētoan ch'án kíxin sátsjikjako sín nkexrí tí kjuachaxin t'ētoan Dios la ko sinchekitohe sín chojni jína.

³ La ko k'uētoan ch'án kíxin:

—Ninkehó nkehe sátsjikohyará ntja sátsjirá, ni tí nta tjíxinrá la náhí, ni bolsa la náhí, ni niotja, ni chichaon, la ko tsjikoará jehó tí ka tjejóyará ó.

⁴ A ntá tí tsjasánrá ijnko nchia tsjanjon sín kjuachaxin la ntahó tsitohará la tsjixixín tí xrā ntá sátsjixínrá ntiha.

⁵ A ntá tí tsjasánrá ijnko chjasin la ntá tsjanjonhya sín kjuachaxin tsjåkorá ntá t'axrjéxinrá tí chjasén sín ntiha tsotsénkará tí nche chóna toťará tsjåkoxinrá xikaha kíxin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsínsí sákjuíchronka sín tí tan jína tsaáxin chojni la ko kjuínchekitohe sín chojni jína kaín chjasin.

*Ik'uén ch'ín Juan Bautista
(Mt. 14.1-12; Mr. 6.14-29)*

⁷ A ntá tí ch'ín Herodes t'et̄oan kuínhin ch'án kaín tí xra tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín.

⁸ A ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. A ntá í so sín la ntáchro sín kixin jnkójín tí sín k'uéchronka itén Dios ósé la mé ó tsíxechón, ichro sín.

⁹ Kjánchó ntáchro ch'ín Herodes kixin:

—Janhan mé kuét̄oan kóchrínjin sín kja ch'ín Juan. ¿Á chrókóchaxín jehe ch'án kixin nchónhya kjuaxroan kuínhan tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni
(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuích'e sín. Ntá k'uaxrjentako sín ch'án tí kohya ninkexró chjinaxón chjasin Betsaida.

¹¹ Ntá tió k'uíxikónohe chojni kixin ntaha tjen ch'ín Jesús ntá sákjuíchréhe sín ch'án. A ntá kjuanjon ch'án kjuachaxin ts'ejó sín. Ntá kjuankixin chrónka ch'án nkexrí tjen tí kjuachaxin t'et̄oan Dios la ko kjuínchekit̄ohe ch'án chojni jina.

¹² A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuát̄ehe sín ntáchro sín kixin:

—Chóntahyani itsjé nkehe; jehó in'ó niot̄ja la ko yaá koche chóntani. ¿Á tjinkávan sátsjik'énani nkehe sine kaín tí chojni siín? —ichro sín.

¹⁴ Kixin siín chjina in'ó mil chojni ntoa. A ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkojié sín ts'ixitjaxin sín jnkoinko cincuenta sín —ichro ch'án.

¹⁵ A ntá xikaha kjuích'e sín k'uet̄oan sín, a ntá k'uíxitjaxin sín kaín sín.

¹⁶ A ntá ch'ín Jesús kuákja ch'án tí n'ó niot̄ja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin kjuanjon tí nkehe sine sín. Ntá kóchrít'ò ch'án tí niot̄ja la ko tí koche la chjéhe ch'án tí sín xriko ch'án. A ntá jehe sín k'óxikeyehe sín chjéhe sín kaín tí chojni siín.

17 A ntá kaín sín kjóne sín la kókjehe sín. A ntá chr'éxín kjuenájín sín kaín tí nkehe síxehe mé teyó ntaxra kjuínchekaón sín.

*Ch'ín Pedro mé chrónka kixin ch'ín Jesús mé tí Cristo
(Mt. 16.13-19; Mr. 8.27-29)*

18 Ntá ijnko yaon ch'ín Jesús k'uaxrjenta ch'án tjenixjehe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan? —ichro ch'án.

19 A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'ín Elías. A ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

20 A ntá kjuanchankíhi ch'in Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'ín Pedro kixin:

—Jaha tí Cristo ichr'án Dios —ichro ch'án.

*Ch'ín Jesús chrónka kixin its'en ch'án
(Mt. 16.20-28; Mr. 8.30—9.1)*

21 Ntá ch'ín Jesús k'uetuennen ch'án sín kixin ninkexró tsochenkahya sín kixin nkexro tí jehe ch'án.

22 Ntá chénka ch'án sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsonhen la ko tsitekakuenhya tí sín t'etōan kuente njnko la ko tí sín t'etōan kuente tí sín ncha't'á la ko tí sín maestro tjako tí ley. Ts'óyán sín tí jehe ch'án, kjánchó tí nixin yaon na ó tsoxechón ch'án inaá —ichro ch'án.

23 Ntá chr'éxín chénka ch'án kaín sín kixin:

—Tí chaxín tsochréhérá tí janhan na t'ichjánxin tsitohérá kaín tí nkehe tjaké asánrá, ntá tsamará tí ntacruz kuentará jnkojnko yaon, a ntá tsochréhérá tí janhan.

24 Tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la tsaá.

25 ¿A ntá nkehe tsonhen tí chrókjuacha ijnko chojni chróchónka kaín nkehe siin chjasintajni a ntá kjuachón chrókjuinçek'itjáyan ch'án?

26 A ntá jnkojín chojni chrókósuèhe kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsosuehe chróntáchro ch'án kixin chóxin ch'án tí jehe sín tió tsi ch'án éxí ijnko rey tsikao ch'án tí kjuachaxin kuente It'é ch'án la ko tí sín ángel jína.

27 Tíhi mé ntoá xrjanka kíxin iso chojni tjejó ntihi tjejótinhin sín naxa ts'enhya sín ts'ikon sín kíxin Dios ts'etoan tí kjuachaxin kuènte ch'án.

K'uíxitóxin nkexrí tsjehe ch'ín Jesús

(Mt. 17.1-8; Mr. 9.2-8)

28 A ntá k'uátsínka ijní yaon tí tsíchronka ch'án tíhi ntá sákjuiko ch'án ch'ín Pedro la ko ch'ín Juan la ko ch'ín Jacobo la chríin sín ijnko jna kíxin tsonixjehe ch'án Dios.

29 Ntá ch'ín Jesús tjenixjehe ch'án Dios ntá k'uíxitóxin nkexrí tsjehe ch'án la ko tí iké ch'án la tjóá la ko tjákini tsjehe.

30 Ntá xríñahya k'uíkon sín yaá chojni tjejóto sín tí jehe ch'án na mé jehe sín la tí ch'ín Moisés la ko tí ch'ín Elías.

31 Imá t'inkáséyan jnkontatjen tí tjejó sín tjejóto sín tí ch'ín Jesús kíxin nkexrí its'en ch'án la ko nkexrí tsjasótexín ch'án tí chjasin Jerusalén.

32 A ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjótsehe sín k'uikon sín tí kjuachaxin kuènte ch'ín Jesús la ko k'uíkon sín tí yóí chojni ntoa tjejóko sín ch'án.

33 A ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kíxin:

—Maestro, jína kíxin tjejóni ntihi. Chrókjuich'éñani iní nchia la mé ijnko kuéntá la ijnko kuènte ch'ín Moisés la ko ijnko kuènte ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchró ch'án kíxin chrakon ch'án.

34 A ntá naxa tjenixja ch'án ikui ijnko tjuj kjuák'etja tí jna tjejó sín. Ntá chrakon sín tjejó sín chrínki tí tjuj.

35 Ntá xríñahya kuínhin sín chríkjan tí tjuj itén nkexro ntáchró kíxin:

—Tíhi mé Xjanna, imá tjuaha ch'án. Tinhínrá tí nkehe tsochronka ch'án la ko tí nkehe tjako ch'án.

36 A ntá tió kjuixin kuínhin sín tí tan nixja ntá k'uíkon sín kíxin jehó ch'ín Jesús tjen. A ntá tí jehe sín la tání sín kíxin xíkaha k'uíkon sín tí yaon a la ninkexró chenkahya sín tí nkehe k'uíkon sín.

Ch'ín Jesús kjuínchekitohe jína ijnko chánjan chóna nchakuen tí jínahya

(Mt. 17.14-21; Mr. 9.14-29)

37 A ntá tí yaon chr'éxin k'uínkajinxín sín jna la ntá nchónhya chojni sákjuixinhin sín ntja ch'ín Jesús.

38 A ntá ijnko chojni tjenkákjan ch'án tí chojni kjuíji ntá itsen nixja ch'án ntáchró ch'án kíxin:

—Maestro, chrónóahani kíxin chrótsjehé tí xjeenni kíxin jnkokoaxón ó chóntani a ntá níhi xjan.

³⁹ Chónta xjan nchakuen tí jínahya la ntá nchek'íyato xjan la ko nchek'aniáte xjan nchexränká xjan kixin tjotéhe xjan la ko ntalóxrjo sítjixín ir'va xjan la ko ncheníhi xjan, na mé chrohya tsjìnhin xjan.

⁴⁰ A ntá chronóeheni tí sín xríkoa chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátehe ch'ín Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjákohará kixin nunca t'itjáhyará? Xrákoa tí xjan ntihi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan ínaá. Kjánchó ch'ín Jesús jiehe k'uētuenhen tí nchakuen tí jínahya kixin ts'axrjexín xjan. Ntá k'uaxrje tí nchakuen tí jínahya ntá kuítóhe xjan jína. A ntá ch'ín Jesús kjuínchek'áyéhe tí it'é xjan.

⁴³ A ntá kaín sín chrakon sín kixin k'uíkon sín tí kjuachaxin jíé kuènte Dios.

Ch'ín Jesús chrónka ch'án ínaá kixin its'en ch'án

(Mt. 17.22-23; Mr. 9.30-32)

Naxá chrakon sín kaín sín kixin tí kjuaxroan kjuích'e ch'ín Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etōan —ichro ch'án.

⁴⁵ Kjánchó jehe sín kienxínhya sín tí nkehe ntáchro ch'án kixin naxá kjuanjonhya Dios kjuachaxin kixin chrókuienxín sín, ntá chrakon sín na kjuanchankíehya sín ch'án kixin nkexrí t'axrjexín tí nkehe ntáchro ch'án.

Nkexro tí imá tjeoan ts'etōan

(Mt. 18.1-5; Mr. 9.33-37)

⁴⁶ A ntá tí sín k'uájiko ch'ín Jesús kjuankíxin sín itjo sín kichó sín kixin nkexro tí jehe sín antsí má tjeoan ts'etōan.

⁴⁷ Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án

⁴⁸ ntá ntáche ch'án sín kixin:

—Tí jnkojín nkexro chrók'uáyéhe tí xjan i kixin tinkáchónki sín tí janhan mé xíkaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xíkaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchehnkehya la mé antsí chrók'uáyéhe kjuachaxin chrók'uētōan.

Tí nkexro nínkakuenhya tí jeheni la mé tóxrjínhin ch'án tí xra ch'eni

(Mr. 9.38-40)

49 Ntá ntáchro ch'ín Juan kixin:

—Maestro, k'uikonna ijnko nkexro kjuachaxin ihnjá kuakit-sjexín ch'án nchakuen tí jínahya chóntha chojni. A ntá chénkani ch'án kixin xikahya chrókjuich'e ch'án kixin xrikohyani ch'án.

50 Kjánchó ch'ín Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhjn tí xrá ch'eni —ichro ch'án.

Ch'ín Jesús kjuentuéhe ch'án tí ch'ín Jacobo la ko tí ch'ín Juan

51 A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén.

52 Ich'án ch'án chojni kuitónxin ntia a ntá jehe sín sákjuj sín ijnko chjasin ntsí estado Samaria sákjuikjeyá sín nchia ts'ok'èxin sín.

53 Kjánchó tí sín samaritano kjuanjonhya sín kjuachaxin chrók'uejó sín kixin k'uikon sín kixin ó xrá ó sátsji ch'án chjasin Jerusalén.

54 A ntá tío k'uikon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

—Ínchéni, ¿á tjinkávan kixin chrókjuanchiani xrohi chrók'uinkajinxin nkaya nkajní chrókjuinçek'itjáyan tí jehe sín éxí kjuanchia tí ch'ín Elías?* —ichro sín.

55 Ntá ch'ín Jesús kuinkátjía ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará.

56 Kixin tí Xjeen Dios K'óna Chojni kuihya ch'án kixin chrókjuinçek'itjáyan ch'án chojni. Náhí. Xrá ó ikui ch'án sinchekaá ch'án chojni —ichro ch'án.

Ntá sákjuj sín í jnko chjasin ntsí.

Tí sín tjinkaon chróchréhe sín tí ch'ín Jesús

(Mt. 8.19-22)

57 A ntá jehe sín sákjuj sín ntia ínaá. Ntá xeta sín ijnko nkexro ntáche ch'án tí ch'ín Jesús kixin:

—Ínchéni, tjinkaonni chróchréheni tí jaha nketí tjinkávan sátsjia —ichro ch'án.

58 Ntá ch'ín Jesús kjuátehe ch'án ntáchro ch'án kixin:

—Tí koxrónthá chóntha va itjuéé va la ko tí koxroxé chóntha va kaké va. A ntá tí Xjeen Dios K'óna Chojni chóntahya nketí ts'ok'èxin ch'án —ichro ch'án.

59 A ntá ntáche ch'án í jnko nkexro:

—Chréhé tí janhan —ichro ch'án.

Kjánchó kjuátehe ch'án kixin:

—Ínchéni, títóhéni senó sátsjikjaváni it'éni —ichro ch'án.

60 Ntá kjuátehe ch'ín Jesús ntáchro ch'án kixin:

* 9:54 1 Reyes 18.30-40

—T̄it̄ohé k̄ixin tí chojni tsík'en la jnkokón s̄in tsík'en tsjavá kichó s̄in. A ntá jaha la sátsjikjækua nkexrí t̄jen tí kjuachaxin t'et̄oan Dios —ichro ch'án.

⁶¹ Ntá ntáchro í jnko nkexro k̄ixin:

—Ìnchéni, tjinkaonni tsochréheni tí jaha. Jehí t̄it̄ohé tsjinixjeheni tí s̄in síin nt̄oeni —ichro ch'án.

⁶² Kjánchó ntáchro ch'ín Jesús k̄ixin:

—Tí nkexro kjuank̄ixin tsotsé ch'án arado ntá chrókjan chrókotónhen nóton mé x̄ikaha xitjahya sich'ehe ch'án Dios x̄ra.

10

Ch'ín Jesús k'uetuēnhen setenta chojni sátsjikjako s̄in

¹ Ntá chr'éxin Ìnchéni kjueyá ch'án í jnko setenta chojni ntá k'uetuēnhen ch'án s̄in sátsji s̄in yóyó s̄in sátsji s̄in tsit̄ónxin s̄in nt̄ia tí kaín chjasin na ko nkuixín tjinkaon ch'án sáchrókjui ch'án.

² Ntá ntáchro ch'án k̄ixin:

—Chaxín ntáxr̄jan k̄ixin imá tsík'óna, a ntá tí chojni ch'e x̄ra mé tsjéhya. Chrókjuancheherá tí Ìnché nonte k̄ixin chróchr'án ch'án itsjé chojni chrókjuich'e x̄ra.

³ Sátjirá jahará. Xr̄áxinkáonrá k̄ixin tétuānhanrá sátsjirá éxi kolélo ts'ejóyākjanrá chríkjan tí kolobo.

⁴ Ts̄jikoahyará kabólsa la ko t̄joā t'inka chichaon la ko tokate t̄jikoahyará la ko tí nixjehérá chojni tí nt̄ia t̄it̄oéhyará k̄ixin chrókjuintaxr̄janhanrá s̄in.

⁵ A ntá tió ts'ixēnhenrá jnkójín nchia la senó nixjehérá s̄in ntáchrórá k̄ixin ts'áyéhe s̄in kjuaxróxin, tsixrorá.

⁶ A ntá tí t̄jejó s̄in kjuaxróxin ntiha la nixjehérá s̄in la ts'áyéhe s̄in kjuaxróxin. A ntá tí la náhi, a ntá tí kjuaxróxin chrók'uáyéhe s̄in na sátsjikoará inaá.

⁷ A ntá tí nchia ntiha chrókjuanjon s̄in kjuachaxin chrókuitohará, ntaha mé tsjanjon s̄in nkehe chóna s̄in sinterá la ko its'irá, k̄ixin tí nkexro ch'e x̄ra la síin kjuachaxin tsoxenkehe. Ts̄jīhyará í jnko nchia la ko í jnko nchia.

⁸ A ntá tsjasánrá ijnko chjasin tsjanjon s̄in kjuachaxin ts'ejorá ntiha ntá interá tí nkehe tsjanjon s̄in.

⁹ Nchekitohérá chojni níhi jína. Ntá chenkará s̄in k̄ixin tí kjuachaxin t'et̄oan Dios la k̄jínhya t̄jen tí t̄jejó s̄in, ichrorá.

¹⁰ A ntá tió tsjasánrá ijnko chjasin a ntá tsjanjonhya s̄in kjuachaxin la ntá t'axr̄jéxinrá nt̄oē s̄in sátsjirá tí nt̄ia chjasin ntiha ntá ntáchrórá k̄ixin

¹¹ k̄jonté tí nche tsík'ixit̄ja t̄otárá tsotsénkará k̄ixin tsjākox̄inrá k̄ixin tí kjuaxróxinhya ts'áyéhe s̄in chr'éxin.

Kjánchó chrókónohe sín kixin tí kjuachaxin t'etōan Dios la kijnhya tjen tí tjejó sín, ichrorá.

¹² Ntáxrjan kixin tí yaon tsjejexín chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya

(Mt. 11.20-24)

¹³ Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uikonrá jahará, ntá chrókójehe sín la tjoka chrókjuítóxinhin ntje sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókjuakoxin sín kixin t'ává sín.

¹⁴ A ntá tí yaon tsitōexín ijje chojni a ntá jahará antsi tsjasótiará, a ntá tí sín kuente chjasin Tiro la ko chjasin Sidón la kénhyó tsjasóte sín.

¹⁵ A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajní, ichrorá. Chaxínhya. Jahará la tsjasinkajinrá sátsjirá tí tsjasótexín tí sín tsík'en.

¹⁶ Tí nkexro tinhin tí nkehe ntáchrórá la mé xikaha tinhin tí nkehe ntáxrjan la ko tí sín titekakonhya sín tí jahará na mé xikaha titekakonnahya sín tí janhan. A ntá tí nkexro titekakonnahya sín tí janhan xikaha titekakonhya sín tí nkexro chr'ánna k'uinka.

Ó kjan tí sín setenta sátsíkji

¹⁷ A ntá ó kjan tí sín setenta sátsíkji la imá chéhe sín ntáchró sín kixin:

—Inchéni, kjónté tí nchakuen tí jínahya titekakonhenni tió t'ákjexinni ihniá —ichro sín.

¹⁸ Ntá ntáchró ch'ín Jesús kixin:

—Kja chaxín k'uikuān kixin ch'ín Tsochren k'uánótjexin nkajní éxi ijnko kjónkixin xikaha kónhen.†

¹⁹ Ó tjahará kjuachaxin kixin kjónté konche la ko konchia tsinkátjará la ko tsjachahya ninkehó tí kjuachaxin kuente tí ch'ín Tsochren kixin ninkehó tsoanhyará.

²⁰ Kjánchó jehya tíha chrókóchàxínrá kixin tí nchakuen tí jínahya kuitekakonhanrá. Náhi. Chrókóchàxínrá kixin ihniará ó ts'ínixín nkaya nkajní —ichro ch'án.

Tí Xjeen Dios nixjehe It'é ch'án

(Mt. 11.25-27; 13.16-17)

²¹ A ntá tuéxín tí Nchakuen Dios kjuínchechéhe tí ch'ín Jesús ntá ntáchró ch'án kixin:

* 10:12 Génesis 19.24–28 † 10:18 Isaías 14.12

—Tjáncháḡ kjuasáya It'eni Ìnché nkaya nkajní la ko chjasin-tajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'itja tí sín noehya. Mé xikaha It'eni, jaha kóxrjínhan kixin xikaha tsonhen.

22 T'aná mé chjina kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjejá ch'án kixin tjinkaon ch'án tsonhe sín nkexro It'é ch'án —ichro ch'án.

23 Ntá komá ch'án tí sín k'uájiko ch'án ntá ntáche ch'án tí jehó sín kixin:

—Chéhe tí sín k'uíkonxín kon sín éxí k'uíkonrá.

24 Ntáxrjan kixin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uikon sín éxí t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kienhya sín —ichro ch'án.

Ch'ín Jesús kjuíncheyóexin éxí ijnko samaritano jina

25 Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án tsonoxín ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochrín? —ichro ch'án.

26 Ntá kjuátehe ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

27 A ntá tí maestro tjako tí ley mé kjuátehe ch'án ntáchro ch'án kixin:

—Chrótjuèheni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuénténi la ko chrótjuèheni kichó ni éxí tjuèxinni asénni‡ —ichro ch'án.

28 Ntá ntáchro ch'ín Jesús kixin:

—Jina kjuátehe. A ntá tí jaha xikaha siche la tsochonta kjuachón —ichro ch'án.

29 Ntá tí maestro tjako tí ley mé tjinkaon chrókjuachaxin ch'án tí ch'ín Jesús ntá kjuanchankí ch'án inaá kixin:

—¿Xá nkexro tí kichó ni chrótjuèheni, ichrua? —ichro ch'án.

30 Ntá ch'ín Jesús kjuátehe ch'án ntáchro ch'án kixin:

—Ijnko chojni k'uínkajinxin nó ntia kjuixin chjasin Jerusalén sátsji ch'án chjasin Jericó, ntá kuátóhe ntia iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkajtsjehe sín ch'án, la tsíkajate sín ch'án, la ntá sátsíkji sín tsíkitohe sín ch'án la ó mero tjet'en ch'án.

31 Ntá xrínahya k'uátsínka ijnko nchat'á tí ntia ntiha ntá k'uíkon ch'án xikaha ntá ántosén ch'án k'uátsínké ch'án.

‡ 10:27 Deuteronomio 6.5; Levítico 19.18

³² **A** ntá kjaxin ijnko ch'ín levita k'uátsínka chjinaxón ntiha. Ntá k'uikon ch'án xikaha ntá ántosén ch'án k'uátsínké ch'án kjaxin.

³³ **A** ntá ijnko ch'ín kjuixin estado Samaria k'uátsínka tí ntia ntiha ntá k'uikon ch'án xikaha tjetsínka tí nkexro ntá kuikonóehé ch'án.

³⁴ Ntá kóchjinehe ch'án tí nkexro tsikóníhi ntá kjuíchehe ch'án xroan tí síchrit'ó chjéhe ch'án aceite la ko vino la ko kjuínchetetoxín ch'án ka. Ntá kjuixin ntá kjuínchekiták'á ch'án tí kolóchoe ch'án. Ntá sákjuíko ch'án ijnko nchia t'ok'èxín chojni ntiha la k'uáyakonhen ch'án.

³⁵ Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí ìnché tí nchia ntáchro ch'án kixin: “T'ayakonhén tí nkexro i, a ntá ántsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha,” ichro ch'án.

³⁶ **A** ntá tí iní nkexro k'uátsínka ntia la, ¿nkexro tjuèhe tí nkexro kjuíncheníhi tí síchee? —mé kjuanchankí ch'ín Jesús.

³⁷ **A** ntá kjuátéhe tí maestro tjako tí ley kixin:

—Tí nkexro kuikonóehé tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xikaha chrókjuíche —ichro ch'án.

Ch'ín Jesús sákjuí ch'án ntóe tjan Marta la ko tjan María

³⁸ **Naxa** tjetji ch'ín Jesús kjuíji ch'án ijnko chjasin ntsí. **A** ntá ntiha itjen ijnko tjan it'in Marta, a ntá kjuanjon tjan kjuachaxin kuítóhe ch'án ntóe tjan ntiha.

³⁹ **A** ntá tjan Marta chóna tjan ijnko kichó tjan it'in María. **A** ntá jehe tjan kjuák'etjaxin tjan chrínkí toté tí ch'ín Jesús tjetinhin tjan nkehe tí tjechro ch'án.

⁴⁰ **A** ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Ìnchéni, ¿á tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ **Kjánchó** ch'ín Jesús kjuátéhe ch'án ntáchro ch'án kixin:

—Marta, Marta, jaha imá tóxakonhan kixin t'ínkákonhen nchónhya xra chonta.

⁴² **Kjánchó** jnkokoá nkehe t'ichjánxin. **A** ntá tjan María kjueyá tjan tí nkehe ántsí jina la ko ninkexró tsakitsjehya tjan tíha —ichro ch'án.

11

*Ch'ín Jesús tjako ch'án nkexrí tsonixjeheni Dios
(Mt. 6.9-15; 7.7-11)*

¹ A ntá jnkonaá ch'ín Jesús tjenixjehē ch'án Dios ijnko lugar tjen. Ntá kjuixin la ijnko tí sín xriko ch'án ntáchro kíxin:

—Ínchéni, tjákehéni nkexrí tsonixjehēni Dios kixin xíkaha ch'ín Juan kjuakohē ch'án tí sín k'uájiko ch'án.

² Ntá ch'ín Jesús ntáchro ch'án kíxin:

—Tió nixjehérá Dios ntáchorá kíxin:

It'eni tjen nkaya nkajní, jaha imá tjóá.

Chrókui ti kjuachaxin kuéntá.

Chrókjuich'e tí nkehe tóxrjñhan jaha ntihi chjasintajni éxi tjech'e nkaya nkajní.

³ Ijie tsjánjuan tí niotjā t'ichjánxinhinni jnkojnko yaon.

⁴ T'óxíka tí nkehe jínahya kjuich'eni kíxin kjāxin jeheni ts'itjāyenhenni tí nkehe kjuich'e heni chojni.

Titoéhyani jeheni xrahya chrókjuasinni jie. Nchekaáni kaín tí nkehe jínahya chrókónhenni

—mé xíkaha ichro ch'ín Jesús.

⁵ Kjāxin ntáchro ch'án kíxin:

—A ntá jnkojínrá chróchontará ijnko chojni choxian, a ntá sáchrókjuia ntōe ch'án k'áxrótjen chróntáche ch'án kíxin: “Amigo, nchekjenni iy'á niotjā

⁶ kíxin nantá ó kui ijnko chojni chóxinni kujxin ch'án kjín kjuíji ch'án ntōeni ntá chóntahyani ninkehó tsochjéheni ch'án.”

⁷ A ntá tí chrókjuatehe tí nkexro choxian tjen nkaxenhen chróntáchro kíxin: “Chjeéhyani xra. Tí ntója ntōeni méhe t'ikjéhe. A ntá xjeenni tjejót'ok'èkoni xjan. Ntá xitjahya ts'àyani tsotjáhani nkehe”, ichro ch'án.

⁸ Ntáxrjan kíxin kjónté chrók'uàyahya ch'án chrótjáhya ch'án nkehe kjónté chóxian ch'án, kjá ts'àya ch'án tsotjáha ch'án kaín nkehe t'ichjánxñhan kíxin tjinkakonhya ch'án kíxin naxa chrókjuak'é chrók'uèya jaha.

⁹ Mé xíkaha ntáxrjan kíxin: Tjanchiará nkehe la Dios tsotjáhará; tjéyará nkehe la ts'itjará; t'inkará puerta la tsoxitjehē.

¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjejá nkehe la ts'itja; la ko tí nkexro t'ínka puerta la tsoxitjehē.

¹¹ '¿Xá jnkojínrá chontará xjaanrá chrókjuanchahará xjan niotjā la ¿á chrókjuánjonrá ijnko xro? Q chrókjuanchahará xjan koche la ¿a chróchjehérá ijnko konche?

¹² Q chrókjuanchahará xjan koja la ¿á chrókjuánjonrá ijnko konchja?

¹³ A ntá jahará kjónté jínahyará la ó nohará nkehe jína tsochjehérá xjaanrá, la mé antsí chrókónohará kíxin It'eni tjen nkaya nkajní tsotjáhará Nchakuen ch'án tí jnkojínrá chrókjuanchehérá ch'án —ichro ch'ín Jesús.

Tjanchia sín jië kixin ch'in Jesús ch'óna kjuachaxin tí Jínahya
(Mt. 12.22-30; Mr. 3.19-27)

¹⁴ Ntá ch'in Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsík'axrje tí nchakuen tí jínahya a ntá tí ch'in xitjahya nixja la jína nixja ch'án. Ntá kaín chojni chakon sín kixin xikaha tsíkjich'e ch'án.

¹⁵ A ntá jnkójín tí jehe sín ntáchro sín kixin:

—Tí ch'in a mé takitsje ch'án nchakuen tí jínahya kixin ch'óna ch'án kjuachaxiën tí ch'in Beelzebú mé tí ch'in Tsochren, na mé jehe ch'án mé t'etuenhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxin sín tí ch'in Jesús ntá kjuanchehe sín ch'án ijnko kjuaxroan náxrjón kuènte nkaya nkajní.

¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkójín gobierno jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá.

¹⁸ A ntá kjaxin tí ch'in Tsochren chrókjuánjonko kichó ch'án, ¿la nkexrí chróch'óna ch'án kjuachaxin naxa chrók'uetōan ch'án tí chrók'uaxrje tí jínahya? A ntá jahará ntáchrórá kixin janhan takítsjé nchakuen tí jínahya kixin tí kjuachaxiën ch'in Tsochren chonta janhan, ichrorá.

¹⁹ A ntá tí xikaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxin sín kixin jahará ntoáhya tjenkayáxinrá.

²⁰ A ntá tí kjuachaxiën Dios mé takítsjéxian tí nchakuen tí jínahya na mé chrókónoaxínrá kixin tí kjuachaxiën Dios t'etōan ch'án mé ó kui tí tjejorá.

²¹ A ntá ijnko chojni jiëhe yamá chica t'ayakonhen ch'án ntōe ch'án kixin tí nkehe ch'óna ch'án ts'itjáyanyha.

²² A ntá itsi ijnko nkexro antsí má tsehe, a ntá tsjanjonko ch'án tí inché nchia, a ntá tsjacha tsakitsjehe tí inché nchia kaín tí chica yamá ch'án kixin imá jiëxín ch'án. A ntá tí ch'in antsí tsehe mé tsakja ch'án kaín nkehe siín ntiha.

²³ Tí nkexro titekakonhya tí janhan mé nínkakonna ch'án. A ntá tí nkexro tjinkítsahya tí janhan mé t'inkákonhen tí xra t'a —ichro ch'án.

Ijnko tí nchakuen tí jínahya mé tsokjan inaá
(Mt. 12.43-45)

²⁴ A ntá ijnko nchakuen tí jínahya tsík'axrjexín ijnko chojni na mé ixri tí nonte xámá xritjeyá nketí náxrjón ts'ok'éhe. A

ntá tí k'uitjahya ntá tjenkayáxin kixin: “Áxri tsokjan ntõna k'uaxrjéxian.”

²⁵ A ntá tió kjan la éxí ijnko chojni tsík'ánjõn ntõe la náxrjõn tsjehe tí nkaxenhen nchia. A ntá k'uikõn tí jínahya xikaha tjen nchia

²⁶ a ntá sákjuikakjín yato nchakuen tí jínahya antsí má jínahya. A ntá antsí má jínahya kónhen tí ch'in a, a ntá tí senó la kénhyó. Mé xikaha tsonhen ijnko chojni kénhya asén tinkáchõnki Dios —ichro ch'án.

Tí kjuachéhe chaxín

²⁷ Ntá ch'in Jesús tjenixja ch'án chrõnka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjenixin tí jaha kjuíntak'ánkiá —ichro tjan.

²⁸ Ntá jehe ch'án kjuátéhe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjõn

(Mt. 12.38-42; Mr. 8.12)

²⁹ Ntá nchõnnya chojni sítõjnkotsé sín tí tjen ch'in Jesús ntá jehe ch'án kjuankixin nixja ch'án ntáchro ch'án kixin:

—A ntá tí chojni siín jie la jínahya sín, a ntá tjanchia sín kixin chrókjuásian ijnko kjuaxroan náxrjõn. Kjánchó tsjáqõxinhya í jnko kjuaxroan la jehó tí nkehe tsíkõnhen ch'in Jonás.

³⁰ Ntá éxí yõhe kónhen ch'in Jonás kónõexín tí sín chjasin Nínive mé xikaha tsonhen tí Xjeen Dios K'õna Chojni la ts'ikon tí chojni siín jie.

³¹ A ntá tí yaon tsitõexín ijíé chojni tjejó jie la mé tí tjan reina k'uetõan kjuixin nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjín kjuixin tjan tsinhin tjan nkexrí imá k'uénohe ch'in Salomón.* A ntá jie itjèn janhan antsí chonta kjuachaxin, a ntá ch'in Salomón la kénhyó.

³² La ko tí sin chjasin Nínive kjaxin ts'inkatjen sín tió tsitõexín ijíé chojni la tsjanchia sín jie kixin tí sín tjejó jie la ko tsontáchro sín kixin chrókjuasóte tí chojni tjejó jie kixin tió kuínhin tí sín Nínive chrõnka ch'in Jonás itén Dios la kjuitõxinhin sín ntje sín. A ntá jie itjèn janhan antsí má chonta kjuachaxin, a ntá ch'in Jonás la kénhyó.

Xrohi t'inkaséyanxín cuerpo kuènte chojni

(Mt. 5.15; 6.22-23)

³³ 'Nijnko chojni chrokjuinçek'ákjen ijnko xrohi chrókjuak'emã ch'án la ko chrókjuak'ehya ch'án chrínki

* 11:31 1 Reyes 10.1-10

ijnko ntacajón. Náhí. Noi chrókjuak'e xrohi chrókjuak'enkáya candelero kixin ts'ikonxín chojni tí t'inkaséyan.†

34 Tí ikonrá mé éxí yóhē ijnko xrohi t'inkaséyanxín tí cuerpo kuéntará. A ntá tí chontará ikonrá jína la ntá kuenté cuerpo kuéntará chóna xrohi. A ntá tí chontará ikonrá jínahya la ntá kuenté cuerpo kuéntará la sítíe tjen.

35 Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tje-jorá.

36 A ntá tí kuenté tí cuerpo kuéntará chróchóna xrohi la ko nit'ó chrók'uixitiéhya la ntá kuenté la chrók'uikonrá jína la éxí ijnko lámpara kuenté ch'e xra jína.

Ch'ín Jesús chrónka kixin ntoáhya tjako tí sín fariseo la ko tí sín tjako ley

(Mt. 23.1-36; Mr. 12.38-40; Lc. 20.45-47)

37 A ntá tíó kjuixin nixja ch'ín Jesús ntá ijnko ch'ín fariseo chrónóhē ch'án tí ch'ín Jesús kixin sátsjiko ch'án ntóe ch'án sineko ch'án. Ntá tíó kjuíji sín ntiha la k'uixenhen sín nchia ntá kjuák'etjaxín ch'ín Jesús chjino tjen tí mesa a.

38 A ntá tí ch'ín fariseo chrakon ch'án k'uíkon ch'án kixin ch'ín Jesús k'óntihya ch'án tja ch'án senó tí sine ch'án éxí tinkáchónki tí jehe sín.

39 Kjánchó Inchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachee la ko kjuachjinoxínhin.

40 Jahará lontirá. ¿A noahyará kixin tí nkexro kjuích'éna tí ntója la koí tí nkaxenhen kjuích'éna ch'án?

41 Tí chrókjuinchekitonhénrá chojni nòa kaín asánrá tí nkehe chontará la ntá chrókóxakuanhyará tí chrók'ónti chojni ó náhí.

42 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuentá tí nkehe ntoá la ko nkexrí chrótjuèhérá Dios la ko nkexrí chrótjuèhérá kichuárá. Jína chróchjehérá Dios nkehe la ko chrók'uitjáyanhyará tí chrókjuínkítsará kichuárá.

43 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen nínko la ko tjinkáonrá kixin jnkojína tsonixjahará sín tíó tsoxétará sín ntsin.

44 'Nòará jahará maestro tjàkorá tí ley la ko jahará fariseorá. Ntoáhya tjenkayáxinrá ch'iará. Jahará éxí yóhē tòyē tsíxravá chojni tsík'en t'ikonhya chojni la t'atsínka sín nátaón la noehya sín kixin tsíxravá chojni ntiha.

45 A ntá kjuátehe ijnko tí maestro tjako tí ley ntáchro ch'án kixin:

† 11:33 Lucas 8.16

—Maestro, xikaha ntáchrua la, zá kjaxinhya jeheni kaín ni t'ántaxínhínni ní? —ichro sín.

⁴⁶ A ntá ntáchro ch'ín Jesús kixin:

—Kjaxin nòará tí jahará tjàkorá tí ley. Tétuēnhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará nijnko dedo tjára chrókjuinkĩtsará tí nkehe imá ye yámá sín.

⁴⁷ 'Nòará tí jahará. Ch'énará tjat'oe tí sín k'uéchrónka itén Dios ósé tsík'óyán tí sín k'uaxrjeníxinrá.

⁴⁸ Xikaha jahará tjákoxinrá kixin ó nchoxon tí nkehe kjuích'e tí sín k'uaxrjeníxinrá ósé kixin jehe sín k'óyán sín tí nkexro k'uéchrónka itén Dios ósé. A ntá jahará ch'énará tjat'oe tí tsíxravá sín.

⁴⁹ 'Mé xikaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkojín tí jehe sín la ko tsochónkíhi tí í so sín, ichro ch'án.

⁵⁰ A ntá Dios mé tsjanchia jie tí chojni síin jie kixin k'úitji ijnié kaín tí sín k'uéchrónka itén ch'án ósé desde tí xrankíxin k'óna chjasintajni

⁵¹ la mé xrankíxín k'úitji ijnié ch'ín Abel la mé kjuixíxín k'óyán sín ch'ín Zacarías k'óyáxin sín ch'án jnkosiné tí tjen tí altar la ko tí njnko. Ntá Dios sinchekjasóte ch'án tí sín síin jie kixin xikaha ik'uén kaín tí sín a.

⁵² 'Nòará jahará maestro tjàkorá tí ley. Jahará tjinkákonhyará kixin í so chojni tsohe sín tí nkehe chaxín la ni jahará tjinkákonhyará sinchexiteyará la ko titoéhyará kixin í so chojni chrókjuinchexiteyá sín —ichro ch'án.

⁵³ A ntá kjuixin nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakonhen sín ch'án ntá kjuankíxin sín kjuanchankíhi sín ch'án nchónhya nkehe

⁵⁴ chrókjuachaxín sín ch'án kixin ách'e ntoáhya chrókjuatehe ch'án ntá chrókjuanchia sín jie tí jehe ch'án.

12

Ch'ín Jesús chrónka kixin ntoáhya ch'e tí sín fariseo

¹ A ntá nchónhya míl chojni kójnkotsé sín ntá tinkák'íntate kichó sín. Ntá ch'ín Jesús saoxín kjuankíxin chénka ch'án tí sín k'uájiko ch'án ntáchro ch'án kixin:

—Chrókuítekákonhyará tí nkehe ntoáhya tjenkayáxin tí sín fariseo ch'ia sín, na mé éxí yóhe tí xroan nchek'ánkí niotja tí nkehe tjako sín.

² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin.

³ A ntá kaín nkehe ntáchrórá tí sítié la chr'éx̄in tsinhin chojni tí nch̄akotjin; la ko kaín nkehe mó ntáchrórá k'uikjéhérá nchia la chr'éx̄in ts'èya sín chrítaón nchia tsinhin kaín x̄in chojni.

Nkexro tí chróchrak̄onhenni
(Mt. 10.26-31)

⁴ 'Jahará chojni chóx̄in kichó ni mé tjonkará k̄ixin chróchrakuenhyará tí chojni t'óyán tí cuerpo, a ntá chr'éx̄in la kohya nkehe tsjacha sín chrókjuich'e sín.

⁵ Kjánchó tjonkará k̄ixin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chón̄ta kjuachaxin tsochr'án chojni tí síin xrohi tsjasótexin sín. Tí nkexro a mé chróchrakonhénrá ch'án má.

⁶ '¿Á chrókóxīx̄inhya in'ó koxroxe yaá chichaon ntsíntsí? Kjánchó Dios la ts'itjáyenhya ch'án nijnko tí jehe va.

⁷ Kjónté tí kax̄ih̄i chón̄ta ikjárá la nohe ch'án nkekjaín ka chontará. Méxra chrakonhyará tí jahará k̄ixin antsí má tjete sínkí tí jahará. A ntá kjónté nchónhya koxroxe la kánhyó sínkí tíha.

Chróchrónkani k̄ixin tinkáchónkini Ìnchéni Jesucristo nkayakon chojni

(Mt. 10.32-33; 12.32; 10.19-20)

⁸ 'Ntáxrjan kaín tíhi k̄ixin tí nkexro tsochrónka k̄ixin tinkáchónkina sín nkayakon chojni la kjaxin tí Xjeen Dios K'óna Chojni tsochrónka k̄ixin chóx̄in ch'án tí jehe sín nkayakon tí sín ángel kuènte Dios.

⁹ A ntá tí sín sinchemá sín k̄ixin chónhyana sín nkayakon chojni la ntá kjaxian janhan sj̄ntamá k̄ixin chonhya tí jehe sín nkayakon tí sín ángel kuènte Dios.

¹⁰ 'A ntá jnkójin nkexro ts'ántaxín̄hin sín tí Xjeen Dios K'óna Chojni naxa jina ts'itjáyan tí jie k'uántaxín̄hin sín. A ntá tí nkexro ts'ántaxín̄hin tí Nch̄akuen Dios la xitjahya tsjin tí jie tí xikaha tsixro sín.

¹¹ 'Tió tsjikoará sín nkaxenhen nj̄nko Israel la ko tí tjejó tí sín t'et̄oan la ko tí tjejó tí síxreé la tókakuanhyará nkehe tsjateherá la ko tókakuanhyará nkehe tsixrorá

¹² k̄ixin tió tsonixjará la tí Nch̄akuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochón̄ta chojni itsjé nkehe

¹³ Ijnko nkexro tjenkákjan tí sin tsíkójnkotsé ntáche ch'án tí ch'ín Jesús k̄ixin:

—Maestro, ntáche tí kichó ni a k̄ixin tsjanjon ch'án tí nkehe tónhenni tocar tsíkitohe it'éni tsakjani —ichro ch'án.

¹⁴ Ntá kjuátēhe ch'ín Jesús ntáchro ch'án k̄ixin:

—Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

¹⁵ Kjaxin ntáchro ch'án kixin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kixin:

—Kjuák'e ijnko chojni rico, a ntá tí nontee ch'án na mé imá k'óna.

¹⁷ A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án.

¹⁸ Ntá kjuenkayáxin ch'án ntáchro ch'án kixin: “Ó nòna nkehe sít'a jie. Ts'oxíka tí t'ínkachjinayá noa chonta ntá sít'ána ijnko antsí jie ts'ínkachjinayá kaín nkehe k'ónana jie chonta.

¹⁹ Ntá tsontátjan asenná kixin: Asenni, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la inte la its'ia la tócháha,” ichro ch'án.

²⁰ Kjánchó ntáche Dios tí jehe ch'án kixin: “Lontia xíkaha ichrúa la, kixin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án.

²¹ Mé xíkaha tsonhen tí nkexro chóna nchónhya nkehe chjasintajni ntihi, a ntá naxa kjueyáhya ch'án nkehe kuènte nkaya nkajní —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uitsará.

²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuéntará, a ntá kánhyó sínkí tí ka chrók'uitsará.

²⁴ Xráxinkáonrá nkexrí siín tí kontálo. T'enkahya va la ko tjáhya va la ko chóntahya va nketí ts'ínkachjinayá va tí noa. Kjánchó Dios la tjanjon nkehe sine va. A ntá jahará la antsí tjetooan, a ntá tí ko xritjaka la kénhyó.

²⁵ ¿Á tjejó jnkojínrá tjenkayáxinrá kixin tí chrókóxakonhanrá má ntá naxa chrók'uankirá it'ó metro ntetoxinrá inaá?

²⁶ A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe siín?

²⁷ Xráxinkáonrá nkexrí sít'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uék'ínkáya ch'án naxa kjuíncheyóehya ch'án kixin antsí náxrjón tí tsjo a.

28 A ntá xikaha Dios mé nchek'itsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chrok'uítsará jahará. ¿Ntá nkekuènte kíxin naxa titekákonhyará ch'án?

29 ¿Ntá nkekuènte ixrírá tóxakonhanrá xritjéyará nkehe sinterá la ko nkehe its'irá?

30 A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kíxin t'ichjánxínhanrá kaín tí nkehe a.

31 Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxínhanrá.

Tí nkehe tjete síin nkaya nkajní

(Mt. 6.19-21)

32 Chrakonhyará jahará kolélo kuèntana. Kjónté tsjéhyará la It'ará tóxrjínhín ch'án tsotjáhará ch'án tí kjuachaxin kuènte ch'án.

33 Nchekjírá kaín nkehe chontará la ntá chjehérá tí chichaon tí sín chóntahya. A ntá xikaha sích'erá la tí tjoa t'inka chichaqoanrá tsontaxinhya kíxin tí nkehe tjete síin nkaya nkajní tsjejehya la ko ntaha kohya xíchee la ko ts'ínhya kué la ko ts'itjáyanhya.

34 A ntá tí nkaya nkajní tsochontará nkehe tjete la ntá tí nkehe tjenkayáxinrá la kjáxin ntaha tjen.

T'ichjánxín listo chrók'uejóchónhenni

35 T'ichjánxín listo ts'ejochonhénrá la ko tsjak'ekoará xrohi tjeche.

36 Listo chrók'uejorá éxí chojni ch'e xra tjejóchónhen sín tsokjanxín tí lámoe sín tí tsikótehe chojni kíxin tió tsi ch'án la ts'èya ch'án, la ntá tsakitjehe sín tí puerta tjoka.

37 Náxrjón tí nkexro ch'e xra tió chrókjan tí lámoe sín chrók'uikon ch'án kíxin naxa tjejótsjehe sín. Ntá chaxín ntáxrjan kíxin tí ch'ín lamo ts'etoan ch'án kíxin ts'ejótjaxín sín tí tjen mesa ntiha ntá tsjanjon ch'án nkehe sine sín.

38 Kjónté chrókui ch'án k'áxrótjen o chrókui ch'án nantóye mé xikaha chrók'uikon ch'án kíxin tjejótsjehe sín la náxrjón tí sín ch'ehe ch'án xra.

39 Chrókónohará tíhi kíxin tí chrókónohe tí ìnché nchia nke hora chrókui tí xíchee ntá chrókjuak'etsjehe ch'án chrókuítóehya ch'án chrók'uixenhen xíchee tí ntoe ch'án chrókueé.

40 Ntá jahará kjáxinrá xikaha chrók'uejotsjehérá kíxin titàya tsi tí Xjeen Dios K'óna Chojni.

Tí nkexro jína ch'e xra la ko tí ch'ín ch'ehya xra jína

(Mt. 24.45-51)

41 A ntá ch'ín Pedro kjuanchankí ch'án kíxin:

— Ìnchéni, ¿á jehóni kaín ni kjuíncheyóéxian nkehe ntáchrua o kaín chojni? — ichro ch'án.

42 Ntá ntáchro Ìnchéni kixin:

— ¿Nkexro tí t'etóan tí xrá jína, a ntá tí lámøe ts'etuenhen kixin ts'ayakonhen ch'án tí chojni síin tí nchia ntiha kixin tsjanjon ch'án nkehe sine sín xintii tí hora a?

43 Náxrxjón tjen tí nkexro a tió tsi tí lámøe ts'ikon ch'án kixin naxa tjech'e tí xrá.

44 Tíhi mé chaxín tsontáxrjan kixin tí ch'ín lamo tsochjéhe ch'án kaín xrá chóna ch'án ts'etóan tí ch'ín a.

45 A ntá tí ch'ín t'etóan sítónhen xrá tsjenkayáxin kixin tjokahya tsokjan tí lámøe ch'án, a ntá tsjankíxin ch'án tsonínkakonhen ch'án tsjanjonko ch'án tí í so chojni ch'é xrá, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokóan ch'án.

46 A ntá tí lamo tsokjan tí yaon tjenkayáxinhya tí ch'ín ch'e xrá, na mé ijnko hora noehya ch'án. A ntá imá sinchekjasóte ch'án tí ch'ín kuítóhehe xrá la ntá tsjasóteko ch'án tí sín titekakonhya.

47 'A ntá tí nkexro nohe ch'án nkehe tí xrá tjinkaon tí lámøe ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án.

48 A ntá tí nkexro noehya nkehe tí xrá tjinkaon tí lámøe ch'án ntá ch'e ch'án nkehe chrókjuasótexín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xrá ts'áyéhe ch'án sich'e ch'án; la ko antsí tsjé xrá tsoxranchehe tí nkexro k'uáyéhe itsjé nkehe.

*Jnkokoáhya tsjenkayáxin chojni kixin ó kui Ìnchéni Jesús
(Mt. 10.34-36)*

49 'Janhan k'uinka kixin sintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá naxa náhi.

50 T'ichjánxin nchónhya tsona tsjasótena. Tóxakonna tsoxiteyája kaín tíha.

51 ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xikaha.

52 Kixin ijie xrankíxixín in'ó chojni naxa kjéhya jnkokoáhya tsjenkayáxin sín. Tí iní tsonínkakonhen tí yaá. Tí yaá tsonínkakonhen tí iní.

53 A ntá tí it'é tsonínkakonhen tí xjeen ntoa, la ko tí xjeen ntoa tsonínkakonhen tí it'é. A ntá tí iné tsonínkakonhen tí xjeen chjin, la ko tí xjeen chjin tsonínkakonhen tí iné. Tí ich'ee tsonínkakonhen tí tikíntee la ko tí tikíntee tsonínkakonhen tí ich'ee tjan.

Tí nkehe chronkaxín nkehe tsonhen
(Mt. 16.1-4; Mr. 8.11-13)

⁵⁴ Ch'ín Jesús kjaxin ntáche ch'án tí chojni síin kixin:

—A ntá ts'ikonrá ts'aya tjuj tí tjiatóxin yaon, a ntá ntáchrórá kixin ts'aniá chrin, a ntá xikaha chaxín tsonhen ts'aniá chrin.

⁵⁵ A ntá tí chjéhe xrinto nó sur ntá ntáchrórá kixin tsosóa, a ntá xikaha chaxín tsosóa.

⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajní la ko chjasintajni. ¿Ntá nkexrí naxa tiénxinhyará nkehe sítónhen tí tjejorá jie?

Chrókóxakohenni kjuaxróxin chrók'uejókoni tí sín níinkakohenni
(Mt. 5.25-26)

⁵⁷ ¿Nkekuènte tjéyáhyará jahará nkehe tí jína?

⁵⁸ Tí jnkojín nkexro tsjanchia jie sátjikoará ch'án nkayakon tí sín t'etoan na tí ntia ó chrónkakjórá ch'án kixin tsoyóxin ts'ixinhya kjuanínkaon kixin sátsjikoahyará nkayakon tí ch'ín juez, kixin tí ch'ín juez chrók'ueṭoan ch'án kixin sátsjikoará tí sín comandante. A ntá tí ch'ín comandante chróchr'áxanhanrá ch'án ntóechiso.

⁵⁹ Ntáxrjan kjá ni chrók'uaxrjéxinhyará ntiha tsjenkajiará kaín xín chichaon chonta.

13

T'ichjánxin chrókjuinkí chojni tí nkehe tjenkayáxin sín

¹ A ntá tí yaon k'uejó iso sín chénka sín tí ch'ín Jesús kixin nkexrí kjuích'e ch'ín Pilato k'ueṭoan its'en iso chojni tsikjixin estado Galilea k'uitji ijnié sín kójnkojiéko tí ijnié tí ko k'óyán sín kjuanchexín sín kjuasáyé Dios.

² A ntá kjuátehe ch'ín Jesús ntáchro ch'án kixin:

—¿Á tjenkayáxinrá kixin xikaha kónhen tí sín tsíkjixin estado Galilea kixin antsí jie jie chóna sín, a ntá tí í so sín chjasén sín la á náhi ní?

³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin.

⁴ ¿Á tjenkayáxinrá kixin antsí má k'uéchóna jie tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhi ní?

⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha ts'itjayanrá kjaxin.

Ch'ín Jesús kjuíncheyóexin ch'án éxí ijnko nta to higo t'ónahya to

⁶ A ntá ch'ín Jesús kjuíncheyóexin ch'án ntáchro ch'án kixin:

—Ijnko chojni chóna ijnko nta to higo nóntee ch'án. Ntá sákjuítseje ch'án á k'óna to. A ntá náhi k'uitjahya ch'án ninkehó to.

⁷ Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjaha tí nta la k'uitjáhya ninkehó to higo. T'ochrínjian tí nta kixin tsoxéhe tí nonte a.”

⁸ A ntá tí ch'ín t'ayakonhen nonte kjuátēhe ch'án ntácho ch'án kixin: “Áxri, tītōhé ijie nánó kixin sintantá nche la ko tsjiko nchekātjehe.

⁹ A ntá tí xikaha ách'e ts'óna to. A ntá tí náhi na ntá ts'ochrínjian chr'éxin.”

Ch'ín Jesús kjuínchekitōhe jína ijnko tjan níhi tí yaon t'ok'éhe chojni

¹⁰ Ch'ín Jesús kjuák'e ch'án ijnko nínko kjuakoxin ch'án ijnko yaon t'ok'éhe chojni.

¹¹ Ntiha tjan ijnko chojni chjin chóna dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan.

¹² A ntá ch'ín Jesús k'uíkon ch'án kixin xikaha tjan tjan ntá k'uíyēhe ch'án tjan ntácho ch'án kixin:

—Naná, ó kjuínhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxin xrentoá tjan ntá chjéhe tjan kjuasáyé Dios.

¹⁴ A ntá tí ch'ín t'etōan kuènte nínko kónínkaon ch'án kixin ch'ín Jesús kjuínchekitōhe jína ijnko chojni ijnko yaon t'ok'éhe sín, ntá ntáche ch'án tí chojni a kixin:

—Síin injon yaon mé chrókónhen xra chrók'uinkará chrókuitōhará jína na jehya tí yaon t'ok'éheni chrókónhen tíha —ichro ch'án.

¹⁵ A ntá Inchéni kjuátēhe ch'án ntácho ch'án kixin:

—Ntoáhya tjenkayáxinrá jahará. ¿Á chrókjuasintānkeehyará tí koxintāará la o tí kolóchoará chrókjuíkoará va ntā tí yaon t'ok'éheni ní?

¹⁶ A ntá tí tjan mé tsík'axrjeníxin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintānka tí nkehe tsíkóntetoxín tjan tí yaon t'ok'éheni? —ichro ch'án.

¹⁷ Ntá xikaha ichro ch'ín Jesús la ntá kaín tí sín kónínkakonhen ch'án la kósuēhe sín. A ntá kaín tí chojni síin ntaha chéhe sín k'uíkon sín kaín tí kjuaxroan jié kjuakoxin tí jehe ch'án.

Kjuíncheyóexin ch'ín Jesús éxí ijnko tje ntsí kuènte nta mostaza (Mt. 13.31-32; Mr. 4.30-32)

¹⁸ Ntá ntácho ch'ín Jesús kixin:

—¿Nkehe tóyóexin tí t'etōan Dios tí kjuachaxin kuènte ch'án la ko nkehe jína chrókjuíntayóaxian?

¹⁹ Éxí yóhe ijnko tje kuènte nta mostaza k'uenka ijnko chojni nontee ch'án. A ntá tió k'uánkí kóyóhe éxí ijnko nta jíé. A ntá tí koxroxé xritjaká mé kui va kjuích'éna va kaké va chrík'á tí chaon tí nta.

Ch'ín Jesús kjuíncheyóexin éxí tí xroan t'ánkíxin niotja
(Mt. 13.33)

²⁰ Ntá ntáchro ch'ín Jesús ínaá kíxin:

—¿Nkehe chrokjuíntayóaxian tí t'etōan Dios tí kjuachaxin kuènte ch'án?

²¹ Éxí yóhe tí xroan nchek'ánkí niotja kjuinkíkjanxin ijnko chojni chjin iní medida harina. A ntá tí ch'o la k'uánkí.

Tí puerta tekahya
(Mt. 7.13-14, 21-23)

²² K'uátsínka ch'ín Jesús kaín chjasin hyé la ko kaín chjasin ntsíntsí nkákjako ch'án tí tan jína kíxin jehe ch'án ó sátsji ch'án chjasin Jerusalén.

²³ A ntá ijnko nkexro kjuanchankí ch'án kíxin:

—Ínchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kíxin:

²⁴ —Tóxakonhanrá t'ixēenxínrá tí puerta tekahya kíxin nchónhya sín tjínkaon sín chrók'uixenhen sín, kjánchó tjachahya sín.

²⁵ A ntá tí inché nchia ts'ikjéhe ch'án tí puerta. A ntá chr'éxin jahará ts'ejorá ntója ts'eyará ts'inkará tí puerta tsontáchrórá kíxin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchró ch'án kíxin: “Nonahya nketí k'uinkaxínrá jahará”, tsixro ch'án.

²⁶ A ntá tsjankíxinrá tsontáchrórá kíxin: “Kjóneni la ko k'uíni jnkokoá la ko jaha kjuákoxian tí ntasjinni”, tsixrorá.

²⁷ A ntá jehe ch'án tsjatehe ch'án tsontáchró ch'án kíxin: “Ó ntáxrjan janhan kíxin chonhya tí jahará. Tjítōhérá tí janhan sájtirá ókjé kaín tí jahará jínahya kjuích'erá.”

²⁸ Ntaha tsotsjankará la ko sintetaónrá nénorá tió ts'ikonrá kíxin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etōan ch'án, a ntá jahará la ts'axrjéxinrá ntója ntiha.

²⁹ Tsjixín chojni nó tjitoxín yaon la ko nó tjiátóxin yaon la ko nó norte la ko nó sur ntá ts'ejótjaxín sín tí tjen Dios t'etōan ch'án la sine sín.

³⁰ A ntá iso tí sín k'uítuenhen senó la mé ts'etōan sín, la ko iso tí sín k'uék'etōan senó la mé ts'ítuenhen sín.

T'ává ch'ín Jesús
(Mt. 23.37-39)

³¹ A ntá tí yaon a ikui iso sín fariseo ntáche sín tí ch'ín Jesús kixin:

—Sátjixian ntihi kixin ch'ín Herodes tjinkaon chrók'óyán ch'án tí jaha —ichro sín.

³² A ntá jehe ch'án kjuátehe ch'án ntáchro ch'án kixin:

—Sátjirá chenkará tí ch'ín jínahya ch'ia kixin: “Ijie la ko ntóye tsakítsje nchakuen tí jínahya la ko sintakitoḥa chojni níhi jína la ntá tí nixin yaon a ntá tsjixinna tí xra kuèntana,” tsixrorá.

³³ Kjánchó t'ichjánxin kixin naxa sátjya tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uenxín ch'án chjasin Jerusalén.

³⁴ Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítsará. Imá itsjé veces tjínkavan chrókójnkotsérá la chrók'uáyakonhanrá éxi ijnko cochíká mé t'ayakonhen xjeen va chrínkí kanenee va mé xikaha tjínkavan chrók'uáyakonhanrá tí jahará. Kjánchó jahará la tjínkákonhyará xikaha.

³⁵ Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakájia tí yaon tsontáchrórá kixin: “Jína tí nkexro kjuixín kjuachaxin ihnié Ìnchéni Dios.”

14

Ch'ín Jesús kjuínchekitohe jína ijnko nkexro tsík'atjoyé kuenté

¹ A ntá tí yaon t'ok'éhe sín sákjuí ch'ín Jesús ntóe ijnko ch'ín fariseo t'etoan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án.

² A ntá ntiha ntoí chók'èxin tí tjen ch'án itjen ijnko chojni tsík'atjoyé kuenté.

³ A ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿A siín kjuachaxin sinchekitoḥeni jína ijnko chojni níhi tí yaon t'ok'éheni o náhi? —ichro ch'án.

⁴ A ntá jehe sín la tání sín. A ntá ch'ín Jesús sákjuíko ch'án tí ch'ín níhi la kjuínchekitohe ch'án jína la k'uetuēnhen ch'án kixin sátsji ch'án.

⁵ A ntá ntáche ch'án tí sín fariseo kixin:

—Jnkojín tí jahará chontará kolóchōarā o koxintaarā chrókjuítsínkáya va tòye ¿á senóhya chrókuakítsjetaónrá va tòye kjónté yaon t'ok'éheni ní? —ichro ch'án.

⁶ A ntá jehe sín ninkehó kjuáteheya sín kixin xikaha ichro ch'án.

Tí sín tsík'iyehe sín sátsji sín kia tsíkótehe chojni

⁷ Ntá k'uíkon ch'ín Jesús kixin tí sín tsíkóchjina tí kia a kjueya sín silla náxrjón ts'ejóya sín tí tjen mesa ntá kjuíncheyóexin ch'án ntáchro ch'án kixin:

⁸ —Tió jnkojín nkexro ts'iyaha sín kixin tsjasán ijnko kia tsotehe chojni la tjéyáhya tí nta silla kuente tí sín t'etōan kixin ách'e tsi jnkojín nkexro antsí t'etōan

⁹ a ntá tí nkexro k'uíyahará yóirá itsi ch'án tsjanchará ch'án kixin t'inkátjénxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuhá sátsjia tsjak'etjāxian tí silla kjuixixín.

¹⁰ Íchá jina tió t'iyaha sín chrókjuak'etjāxian tí silla tjetuanhya, kixin ntá chrókui tí ch'ín tsík'iyaha tsontáchro ch'án kixin: “Jina tjoni la t'atsínka tjak'etjāxian tí silla antsí náxrjón”, kixin ntaha tsjikosáyaha sín nkayakon kaín tí sín ts'ejótjāxínkoa sín ntaha.

¹¹ Kixin tí nkexro sinchehnkehe asén kixin imá chrók'uetōan ch'án la mé chr'éxin Dios tsjanjonhya kjuachaxin kixin ts'etōan ch'án. A ntá tí nkexro k'uék'etōanhya la mé chr'éxin Dios tsjanjon kjuachaxin kixin antsí ts'etōan ch'án.

¹² Kjāxin ntáche ch'án tí nkexro tsík'iyehē ch'án kixin:

—Tió tsjāsian kia it'ō yaon la o tsonjin la t'iyēéhya tí sín choxian la ko tí sín kichuá la ko tí sín naxa kjéhya la ko tí sín rico chjino ntōa, kixin jehe sín la chr'éxin ts'iyaha sín inaá la xikahó la ó kjuixin kjan tí k'uíyehé sín.

¹³ Íchá jina chrók'uíyehé tí sín nòa la ko tí sín tsixénká toté sín la ko tí sín xitjahya tji la ko tí sín t'ikonhya.

¹⁴ Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jina la mé Dios mé tsjenkaha kixin kjuínkítsa tí jehe sín.

Ch'ín Jesús kjuíncheyóexin ch'án éxí ijnko kia jié

¹⁵ A ntá kuínhin ijnko tí sín tjejótjāxín sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niotja tí tjen Dios t'etōan ch'án —ichro ch'án.

¹⁶ Ntá ntáchro ch'ín Jesús kixin:

—Ijnko chojni kjuasin ijnko kia jié ijnko kónjín la k'uíyehē ch'án nchónhya chojni tsi sín tí kia a.

¹⁷ A ntá ó kuichjina tí hora sine sín ntá k'uetuēnhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyehē ch'án kixin chrókóchjina sín kixin ó tjejóchónhen kaín nkehe sine sín.

¹⁸ Ntá kaín sín kjuankixin sín chrónòa sín kixin xitjahya tsjiji sín sine sín. A ntá tí ch'ín saoxín kjuitsjehe ch'án ntáchro ch'án kixin: “Na ntá k'ueñani ijnko nontēeni la t'ichjānxin

tsjitsjeheni la xitjahya tsjijini tí t'iyeheni ch'án, ntá chénka ch'án kixin chrókóninkakuenhyani ch'án", ichro ch'án.

19 A ntá í jnko ch'ín ntáchro ch'án kixin: "Na ntá k'uenani in'ó yunta koxinta, a ntá t'ichjánxin tsotsjeheni á jína ch'e va xra, ntá chénka ch'án kixin chrókóninkakuenhyani ch'án", ichro ch'án.

20 A ntá í jnko ch'ín ntáchro kixin: "Na ntá kóteheni, méxra xitjahya tsjijini", ichro ch'án.

21 Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintáchro sín. A ntá tí ch'ín lámo kuínhin ch'án xikaha la ntá kóninkaon ch'án ntá ntáche ch'án tí ch'ín ch'ehe ch'án xra kixin: "Tjoka sátjia kaín ntja chjasin i la tsjiko ntihi tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya", ichro ch'án.

22 A ntá chr'éxin ntá kjan tí ch'ín ch'e xra chénka ch'án tí lámo kixin: "Ó kjuínchexiteyáni xikaha kuétuenhénni la kjónté naxa xranka chrókui chojni", ichro ch'án.

23 A ntá tí ch'ín lámo ntáche ch'án tí ch'ín ch'ehe ch'án xra kixin: "Sátjia kaín ntja jié la ko kaín ntja ntsi la tétuenhén chojni síin chrókui sín chrók'uiixenhen nchia ntona naxa xranka.

24 Kixin ntáxrjan kixin nijnko tí sín k'uiyahá senó chrókui sín chrókjone sín tí nkehe chrótjahá sín", ichro ch'án.

Ixra tsochréheni Cristo

25 Nchónhya chojni nkáchréhe sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kixin:

26 —A ntá jnkojín chojni tsotjinkaon tsochréhe tí janhan la antsí má tjetoan chrótjuana sín la kjónté kénhyó chrótjuèhe it'é sín la ko iné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuèhe asén sín. A ntá náhi la xitjahya ts'óna discípulo kuéntana jehe sín.

27 Tí nkexro tsamáhya tí ntacruz kuènte sín tsochrèhya sín tí janhan la xitjahya ts'óna discípulo kuéntana.

28 A ntá jnkojín tí jahará chrókjuich'énará ijnko tjat'ò nteto, zá senóhya chrókjuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchoxon chrókjuixixín chrók'ónaxín tí tjat'ò a?

29 A ntá tió tsjankixinrá sich'énará tí tjat'ò ntá chr'éxin xitjahya tsjixin sich'énará, ntá kaín chojni ts'ikon sín tsjanoará sín

30 tsontáchro sín kixin jaha kjuankíxian kjuich'éna, a ntá jie xitjahya sinchekjixian ts'óna, tsixro sín.

31 A ntá jnkojín tí ch'ín rey t'etöan tsjanjonko í jnko rey t'etöan kjaxin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuachaxín ch'án tí kán mil soldado chóna tí í jnko ch'ín t'etöan.

32 **A** ntá ti chrókjuachahya ch'án chrókjuanjonko ch'án tí í jnko ch'ín rey, ntá naxá ikjín tjen ch'án la íchá jína chróchr'án ch'án ijnko nkexro tsochronóhe ch'án kixin chrók'uixinhya kjuanínkaon.

33 Mé xikaha jnkojín tí jahará tí tsítóéhyará kaín nkehe ntoáhya tjenkayáxinrá xitjahya ts'óna discípulo kuéntana.

Tí xijnta tsík'ánkéhé tí jní

(Mt. 5.13; Mr. 9.50)

34 **A** ntá jína tí xijnta, kjánchó tí chrók'uánkéhé tí jní la ntá xitjahya chrókójní inaá.

35 Ntá tí xikaha la ni tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

15

Kjuíncheyóexin ch'ín Jesús éxí ijnko kolélo tsik'itjáyán

(Mt. 18.10-14)

1 Kaín tí sín nchekjènkj la ko tí sín chóna nchónhya jie kóchjinehe sín tí ch'ín Jesús kixin tjinkaon sín chrókuinhin sín tí nkehe tjechronka ch'án.

2 **A** ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'ín i la kjónté tí sín chóna nchónhya jie la t'ito ch'án la ko neko ch'án —ichro sín.

3 Ntá ch'ín Jesús kjuíncheyóexin ch'án ntáchro ch'án kixin:

4 —**A** ntá jnkojín tí jahará, tí chontará ijnko ciento kolélo ntá chrók'uitjáyán ijnko va, ¿á chrók'uitoéhyará tí noventa y nueve va tí nteje ó, a ntá á chrók'juikjéyáhyará tí ko tsík'itjáyán hasta chrók'uitjájíará va ní?

5 **A** ntá tí ts'itjára va ntá tsamára va tsocháhará.

6 Ntá tió tsokjanrá ntóará ntá ts'iyehérá kaín tí sín choxinrá tjórá jína la ko tí sín chjinaxón ntóará ntá tsontácherá sín kixin: “Tsochéheni ts'ejóni jie kixin ó k'uitjá tí kolélo tsík'itjáyán.”

7 Na mé kjaxin xikaha tsotjonkará kixin antsí tsochéhe kaín tí sín siín nkaya nkajní tió ijnko chojni tsítóhe kaín tí jie tsíkjenkayáxin ch'án. Ntá kánhyó tsochéxin tí sín nkaya nkajní kixin tí noventa y nueve chojni jína t'ichjánxienhya chrókjuinkí sín tí nkehe tjenkayáxin sín.

Kjuíncheyóexin ch'án éxí chichaon k'uitjáyán

8 **A** ntá ijnko chojni chjin chóna ite chichaon, a ntá tí chrókjuinck'itjáyán tjan ijnko tí chichaon a la, ¿á chrókjuinck'ákjenhya tjan xrohi kixin chrókjuéyáxin tjan la ko chrok'uánjón tjan tí nchia kixin chrótsjehe tjan jína hasta chrók'uitjajia tjan?

⁹ A ntá tió chrók'uitja tjan la ts'iyehē tjan kaín tí chojni chjin jína tjo tjan la ko tí sín chjinaxón ntōe tjan la ntá tsontáche tjan sín kixin: “Tsochéheni ts'ejóni kixin ó k'uitjani tí chichaon kjuínchek'itjáyanni.”

¹⁰ Ntá kjaxin xikaha tsotjonkará kixin imá tsochéhe kaín tí sín ángel kuènte Dios tió ijnko chojni tsitōhe kaín tí jie tsíkjenkayáxin ch'án.

Ch'ín Jesús kjuíncheyóexin ch'án éxí ijnko ch'ín kuicháxinhin chichaon

¹¹ Kjaxin ntáchro ch'ín Jesús kixin:

—Ijnko nkexro chóna yaá xjeen ch'án.

¹² A ntá tí ch'ín tsoyo ntáche ch'án tí it'é ch'án kixin: “It'eni, chjehéni kaín nkehe chróchjehéni.” A ntá tí it'é sín k'óchrít'ōhe ch'án tí nkehe chóna ch'án. A ntá tí ch'ín tsoyo k'uáyéhe tí nkehe kuènte ch'án.

¹³ A ntá kánhyó tsjé yaon chr'éxin tí xjeen ch'án tsoyo kjuínchekji ch'án kaín nkehe tsík'áyéhe ch'án, ntá sákjuíko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kaín chichaon chóna ch'án kixin jehya tí jína kjuích'e ch'án.

¹⁴ A ntá tió kjuixin kjuèhe ch'án tí chichaon kuicháxinhin ch'án ntá xrínahya kókjinta tí chjasin ntiha ntá kohya nkehe sine kaín sín. A ntá jehe ch'án kjuankixin ch'án t'énxín ch'án kjinta.

¹⁵ Ntá jehe ch'án sákjuíkjejá ch'án xrá sich'e ch'án. Ntá chjasin ntaha tjen ijnko ch'ín kjuanchehe ch'án xrá. Ntá tí ch'ín a kjuanjon ch'án xrá ntá k'uetōan ch'án kixin sátsji ch'án nontēe ch'án kixin ntiha ts'ayakonhen ch'án cochíno.

¹⁶ A ntá jehe ch'án t'énxín ch'án kjinta ntá tjinkaon ch'án chrókjóne ch'án tí nkehe ine tí cochíno kixin ninkexró tí ntiha chrohya tsjanjon nkehe sine ch'án.

¹⁷ Ntá jehe ch'án kjuák'e ch'án kjuenkayáxin ch'án kixin: “Nchónhya chojni siín ntōe t'aná ch'e sín xrá la chóna sín nkehe sine sín. Ntá janhan tjét'énxian kjinta ntihi.

¹⁸ Ntá jie tsokjan tí tjen t'aná la ntá tsontáxrjan kixin: It'eni, kjuasinni jie kuítekakuenhya It'eni nkaya nkajní la ko kjuasinhanni jie kuítekakuanhyani tí jaha.

¹⁹ Tósuèheni tsontáchrúa kixin xjaan tí jeheni. Ch'énani éxí ijnko chojni t'aha xrá”, mé xikaha kjuenkayáxin ch'án tsontáchro ch'án.

²⁰ Ntá kuákja ch'án ntja xrakoa ch'án tí ntōe it'é ch'án.

'A ntá kjónté naxa kjín kui ch'án a ntá tí it'é ch'án la ó tsík'ikon ntá kuíkonóehē ch'án tí xjeen ch'án. Ntá kuinká ch'án la kjuíxinhin ch'án ntja la kjóa ch'án la ko kjóneko ch'án kochíto.

21 Na ntá ntáchro tí xjeen kixin: “It'éni kjuasinni jie kuítekakuenhyani Dios la ko kjuasinhanni jie kuítekakuanhyani tí jaha. Tósuèheni tsontáchrua kixin xjaan tí jeheni”, ichro ch'án.

22 A ntá tí it'é ch'án k'uíyehē ch'án tí sín ch'ehe ch'án xra ntáchro ch'án kixin: “Xrákoará tí ka antsí jina nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án totjoa.

23 La ko tjicakjínrá koxintáxjan tsanká la t'oyánrá va kixin sinekoni ch'án tsjasinhinni ch'án kia.

24 Kixin tí xjanna i la éxí ó tsík'en ch'án xikaha ntá jie la éxí ó xechón ch'án la tsík'itjáyan ch'án la ntá jie la ó kónoxín ch'án ínaá”, ichro ch'án. Ntá kjuankixin sín kjuasin sín kia.

25 'A ntá tí xjeen ch'án sao la nonte tjech'e ch'án xra. A ntá tió kjan ch'án kui ch'án chjinaxón nchia ntá kuínhin ch'án síin són la ko ité sín.

26 Ntá k'uíyehē ch'án ijnko ch'ín ch'e xra ntá kjuanchankíhi ch'án kixin nkekuènte xikaha sitónhen.

27 A ntá tí ch'ín a ntáchro ch'án kixin: “Kíchuá la ó tsíkjan. A ntá it'á la k'uetoan k'uén koxintáxjan tsanká kixin jina xíkjan ch'án”, ichro ch'án.

28 A ntá tí ch'ín sao la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóehē ch'án kixin chrók'uixenhen nchia.

29 Kjánchó jehe ch'án kjuátēhe ch'án ntáche ch'án it'é ch'án kixin: “Nchónhya nánó t'ahani xra, la xráxín kuítekakonhanni kaín nkehe kuétoan la kjuánjonhya nijnko kotèntso chrókjónekoni tí sín chóxinni.

30 A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naxá t'oyán koxintáxjan tsanká”, ichro ch'án.

31 A ntá ntáchro tí it'é ch'án kixin: “Xjeenni jaha, xráxín tjejóko kichó ni ntihi. Kaínxín nkehe kuéntana la kuénta jaha kjaxin. ¿Nkekuènte ninkávan?

32 A ntá jie la t'ichjánxin tsjasinhinni kíchuá kia tsochéheni kixin éxí tsík'en ch'án la ntá jie la ó tsíxechón, la tsík'itjáyan ch'án xikaha la ntá jie la kónoxín ch'án ínaá.”

16

Ch'ín Jesús kjuíncheyóexin ch'án éxí tí ch'ín k'uáyéhē xra la ntá kjuích'ehya xra jina

1 Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etoan tsonhen xra. Ntá

kui ijnko nkexro chénka tí lamó kixin: “Tí nkexro t'etōan nchexénhen ch'án tí nkehe chonta”, ichro ch'án.

² A ntá tí ch'ín lamó k'uíyēhē ch'án tí ch'ín ch'ehe ch'án xra ntáche ch'án kixin: “¿Á chaxín xikaha ch'e kixin xikaha ichro sín? A ntá jie tsjánjuan jaha kuentá tí xra kjuich'e kixin ijie í sich'ehya xra tsétoan ntihi”, ichro ch'án.

³ A ntá tí ch'ín t'etōan tónhen xra kjuenkayáxin ch'án kixin: “¿Nkehe chrókjuít'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nontēe chojni la ko tósuàna kixin chrók'uájia chrókjuánchák'á nkehe.

⁴ Ó nòna nkehe sít'a kixin ntá tsochonta nkexro tsjanjon kjuachaxin tsjak'é ntōe sín tí í tsochontahya xra sít'a”, ichro tí ch'ín t'etōan.

⁵ Ntá k'uíyēhē ch'án jnkojnko jnkojnko tí sín síkéhe tí lámōe ch'án. A ntá tí ch'ín saō kui ntá tí ch'ín t'etōan mé kjuanchankíhi ch'án kixin: “¿Nkekjaín tjasikéhé lámōéni?” ichro ch'án.

⁶ A ntá jehe ch'án kjuátehe ch'án ntáchro ch'án kixin: “Síkáni ijnko ciento ntabarril aceite”, ichro ch'án. A ntá tí ch'ín t'etōan ntáchro ch'án kixin: “Ntihi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án.

⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjásiká?” ichro ch'án. Ntá ntáchro ch'án kixin: “Ijnko ciento medida noatriga síkani”, ichro ch'án. A ntá ntáchro tí ch'ín t'etōan kixin: “Tí xikaha la ntihi tjen tí xroon tsjénkaxian. A ntá jie la ch'éna ochenta ó”, ichro ch'án.

⁸ A ntá tí ch'ín lamó kjuátsoan ch'án kixin kjónté jehya xra jína kjuich'e tí ch'ín t'etōan kjuich'ehe ch'án xra la kjánchó tí kjuich'ia ch'án la antsí nohe ch'án kjuich'ia ch'án. Méxra tí sín chjasintajni antsí nohe sín ch'iyehē kichó sín, a ntá tí sín ixri tí t'inkaséyan la xikahya chrókjuenkayáxin sín chrókjuich'ia sín, chrókjuenkayáxin sín tí jína.

⁹ Janhan la tétuanhanrá kixin chrókuicháxinhanrá tí chichaon siín chjasintajni kjónté tjuáhya kixin tsjínkítará chojni kixin ntá itsjórá sín jína. A ntá tió tsjeje kaín chichaon ntá jehe sín ts'ejóchónhen sín nkaya nkajní ts'áyáhará sín jnkochríxín.

¹⁰ Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án.

¹¹ Mé xikaha tí xitjahya t'ayakonhénra tí chichaon kuènte chjasintajni ntiho la, ¿ntá nkexrí chrók'uayéhérá nkehe tjete chaxín kuènte nkaya nkajní?

12 Mé xikaha tí kjuachahyará k'uáyakonhénrá tí chichaon kuènte ókjé nkexro, ¿ntá nkexro chrótjáhará jahará tí nkehe chaxín tjete chrók'uáyakonhénrá?

13 'Nijnko nkexro xitjahya sich'ehe yaá lamó xṛa kixin ijnko la tsonínkakohen ch'án la ko tí íjnko tsotjuèhe ch'án, o ijnko la tsitekakohen ch'án, la tí íjnko la tsitekakuenhya ch'án. Xitjahya chrókjuich'ehe chojni xṛa Dios tí tjinkaon sín tsochónta sín itsjé chichaon —ichro ch'án.

14 A ntá tí sín fariseo imá kóxrjínhín sín chichaon, ntá kuínhín sín kaín tíha nkerí ichro ch'ín Jesús, ntá kjuanoá sín ch'án.

15 Na ntá ch'ín Jesús ntáche ch'án sín kixin:

—A ntá jahará tjinkáonrá chrók'uejóxínrá jína nkayakon chojni. A ntá Dios la chóxin ch'án asánrá. A ntá tí nkehe imá tóxrjínhín ch'e chojni la Dios la tóxrjienhya ch'án.

Tí ley la ko tí t'etōan Dios tí kjuachaxin kuènte ch'án

16 'Naxa kjuakohya ch'ín Juan la k'uékjako sín tí ley kuènte ch'ín Moisés la ko tí nkehe k'uékjin tí sín k'uéchronka itén Dios ósé. A ntá kui ch'ín Juan la chrónka ch'án tí tan jína nkexrí ts'etōan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etōan ch'án.

17 'Antsí xrahya chrók'uitjáyan tí nkehe síin nkajní la ko chjasintajni. A ntá xitjahya kixin chróxiteyáhya kjónté ijnko nkehe ntsí t'etōan tí ley.

*Ch'ín Jesús tjako ch'án kixin chrókjuákēhya kichó chojni
(Mt. 19.1-12; Mr. 10.1-12)*

18 A ntá ijnko chojni tsjakehe ichjién la ntá tsakja ch'án íjnko chojni chjin la ijje tíha. A ntá tí ch'ín tsakja ijnko tjan tsíkítsinkehe la kjaxin ijje tíha.

Tí ch'ín rico la ko tí ch'ín Lázaro

19 'Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia.

20 A ntá ntója ntōe ch'án kjuák'etjaxin ijnko ch'ín nòà mé it'in ch'án Lázaro tjanchak'á ch'án la ko níhi ch'án tsíchr'enka kuenté ntōe ch'án.

21 A ntá tí ch'ín nòà la imá kjuak'e asén ch'án chrókjone ch'án la ko chrókókjexín ch'án tí nkehe tot'o tsjixènjinkixin mesa kuènte tí ch'ín rico. A ntá tí konja la kjuamá va tí tosóa chóna ch'án.

22 A ntá ijnko yaon mé ik'uén tí ch'ín nòà. A ntá tí sín ángel mé sákjuiko ch'án tí náxrjón tjen ch'ín Abraham. La ko kjaxin ik'uén tí ch'ín k'uéríko la sákjuíkjavá sín ch'án.

23 Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uikon ch'án kixin ikjín náxrjón tjen ch'ín Abraham tjeko ch'án tí ch'ín Lázaro.

²⁴ Ntá k'uèya tí ch'ín k'uéchónta tsjé nkehe ntáchro ch'án kixin: “It'eni Abraham, tikonóana tétuēnhén tí ch'ín Lázaro kixin sinchekjataxín ch'án kóhe dedo tja ch'án ìntà ntá tsi ch'án tsjak'eták'á ch'án nejen kixin tsoxruehe kixin tjinahya sóa tí xrohi síin ntihi”, ichro ch'án.

²⁵ Kjánchó ntáchro ch'ín Abraham kixin: “Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uáyéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe.

²⁶ A ntá kjaxin jnkosiné tjen tsaka imá jié xitjahya ts'átòye tí sín síin ntihi tsjihya sín tí tjen jaha la ko kjaxin tí sín síin méhe xitjahya ts'átòye sín itsji sín ntihi”, mé ichro ch'ín Abraham.

²⁷ A ntá tí ch'ín k'uéríko mé ntáchro ch'án kixin: “Ntá xrjanóaha jaha It'eni Abraham kixin tétuēnhén tí ch'ín Lázaro sátsji ch'án ntøe t'aná

²⁸ kixin ntaha kuítóhe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhya ntihi”, mé ichro ch'án.

²⁹ Kjánchó kjuátehe ch'ín Abraham ntáchro ch'án kixin: “Ó chóna sín tí nkehe tsíkjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsíntáchro tí sín a”, ichro ch'án.

³⁰ Ntá ntáchro tí ch'ín a ínaá kixin: “Náhi, It'eni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókuítóhe sín ijíé sín”, ichro ch'án.

³¹ Ntá ntáchro ch'ín Abraham kixin: “Tí tsitekakonhya sín tí nkehe tsíntáchro ch'ín Moisés la ko tí nkehe tsíntáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka ínaá”, ichro ch'án.

17

*Tí kjuaxikaon naxa tjasin chojni jie
(Mt. 18.6-7, 21-22; Mr. 9.42)*

¹ Ch'ín Jesús ntáche ch'án tí sín k'uájiko ch'án kixin:

—Xrácín síin nkehe tsjasixín chojni jie. Kjánchó nòà tí nkexro tjasin tí nkehe tsjasixín chojni jie.

² Íchá jina chrókjuincheteyá sín ch'án ijnko xro tsík'óna xrochre chrókjuikákánki sín ntayaon kixin tjasin ch'án tí nkehe tsjasixín jie ijnko chánjan naxa noehya.

³ Tóxakonhanrá kixin xikahya chrókjuásinrá nkehe.

'A ntá tí kichuárá chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jina tí xikaha kjuít'ahará ch'án. A ntá tí chrókuitekaon

ch'án chrókjuitoxinhin ch'án tí tjenkayáxin ch'án, ntá chrók'uitjáyanhanrá tí nkehe kjuít'ahará ch'án.

⁴ Kjonté chrókjuasinhánrá ch'án jie yato veces jnkokoá yaon la ko yato veces chróntáchro ch'án kixin í xikahya tsjasin ch'án jie inaá, la t'ichjánxin ts'itjáyanhanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kixin tinkáchónkini Cristo

⁵ Ijnko yaon tí sín k'uájiko Ìnchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

⁶ A ntá Ìnchéni ntáchro ch'án kixin:

—Kjonté intsí chrókuinkáchónkirá tí janhan éxi jiéxin ijnko tje ntsi kuènte nta mostaza la jína chrókuétuènhénrá tí nta sicómoro kixin chrók'uaxrjenkixin tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókjuinchexiteyá tí xikaha chróntáchrorá.

Nkexrí chrókjuinchexiteyá tí nkexro ch'e xra

⁷ Jnkójín tí jahará tí chróchontará ijnko nkexro t'ahará xra, a ntá tí chrókjanxin ch'án nontaará kjuínchentá ch'án nche o k'uàyakonhen ch'án tí ko kuèntará, ¿á chróntácherá ch'án kixin senó chrókjuak'e ch'án chrókjóne ch'án?

⁸ Kjá náhi. Kjá chrókuétuènhénrá ch'án kixin senó chrókjuinchehján ch'án tí nkehe sinte la ko chrókóyaxínhin ch'án kixin tsjanjon ch'án nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'án sine ch'án la ko its'i ch'án.

⁹ ¿Á chrókjuancheherá ch'án kjuasáya kixin kjuínchexiteyá ch'án tí nkehe kuétuènhénrá ch'án? Kjá náhi.

¹⁰ Mé kjaxin xikaha tí jahará tió chrókjuixin kaín tí xra k'uètuəhanranrá Dios chróntáchrohyará kixin jína kjuich'erá xra kixin ó jehó tí nkehe k'uítuanhanrá kjuínchexiteyará, tsixrorá.

Ch'ín Jesús kjuínchekitohe ch'án jína ite chojni chóna chinlepra

¹¹ Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea.

¹² Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín

¹³ ntá itsen k'uíyehé sín ch'án ntáchro sín kixin:

—Jesús, Maestro, tikonóehéni kaín ni —ichro sín.

¹⁴ Ntá k'uíkon ch'ín Jesús tí jehe sín ikjín tjejó sín ntáche ch'án sín kixin:

—Sátsjirá tjákohérá tí sín nchat'á kixin ó kuítóhará jína, ichrorá.

Nachrohe sákjuí sín tinkákitohe sín jína.

15 Ntá ijnko tí jehe sín tió kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án.

16 Kjuák'exín toch'ín ch'án chrínkí toté ch'ín Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'ín a mé tsíkixín ch'án estado Samaria.

17 A ntá ch'ín Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina?

18 ¿Á jehó tí ch'ín i kjónté ikjín tsíkixín ch'án ikjan ch'án kjuanchehe ch'án kjuasáyé Dios ní? —ichro ch'án.

19 A ntá ntáche ch'án tí ch'ín a kixin:

—T'ínkatjen sátjia. Kixin tí kuítekávan Dios la kuítóha jína —ichro ch'án.

Itsi tí kjuachaxiэн Dios

(Mt. 24.23-28, 36-41)

20 A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuènte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuènte Dios la me tíha ijnko nkehe xitjahya ts'ikon chojni.

21 Xitjahya tsontáchrora kixin: “Ntihi tjen,” o “Ntiha tjen”; kixin tí kjuachaxin kuènte Dios itjen jnkosiné tí tjejorá —ichro ch'án.

22 Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkojín yaon chrók'uikonrá tí Xjeen Dios K'óna Chojni, ntá í ts'ikonhyará ch'án.

23 Tsontáchró sín kixin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín.

24 Kixin éxí ts'ikonrá tsjonkixin ts'inkaséyanxín kuenté nkajní mé xikaha tsõnhen tió itsi tí Xjeen Dios K'óna Chojni.

25 T'ichjánxin senó tsjasóte ch'án nchónhya la ko tí sín siín jie tsitekakuenhya sín ch'án.

26 Éxí kónhen tí yaon kjuák'e ch'ín Noé mé xikaha tsõnhen tió tsokjan tí Xjeen Dios K'óna Chojni.

27 K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uixenhen ch'ín Noé tí ntabarco ntá k'uániá chrin, a ntá tí sín kuítóhe ntója la kaín sín k'uitjayan sín.*

28 Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enka sín nõntee sín la ko k'uékjich'ena sín nchia.

* 17:27 17.26–27 Génesis 6.5–7.24

29 **A** ntá tí yaon k'uaxrjexín ch'ín Lot tí chjasin Sodoma, na mé nkajní kuixín xrohi la ko azufre, na mé tíha k'uensexín kaín xín tí sín ntiha.†

30 Mé xikaha tsonhen tí yaon itsi tí Xjeen Dios K'óna Chojni.

31 '**A** ntá tí yaon i tí tjejó jnkójín nkexro chrítaón nchia tjejó't'ok'éhe sín, a ntá ichrén nkehe chóna sín kuítóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjui sín ókjé. Kjaxin xikaha jnkójín chojni tjejó sín nontee sín la í chrókjanhya sín ntøe sín.

32 Xráxinkáonrá nkehe kónhen ichjién ch'ín Lot.‡

33 Tí nkexro tjinkaon kixin kohya nkehe chrókónhen na mé ts'itjáyán. **A** ntá tí nkexro chrókjuinchek'itjáyánxín asén kixin chróchronka itén Dios la mé tsaá.

34 **A** ntá tsontáxrjan kixin tí tie a jnkokoá ts'ejójua yaá chojni la ijnko la sátsji la ko tí í jnko la tsitøhe.

35 Yaá chojni chjin its'o sín jnkokoá, la ijnko la sátsji la ko ijnko la tsitøhe.

36 Yaá chojni ts'ejóch'e sín xra nonte, la ijnko la sátsji a ntá ijnko la tsitøhe —ichro ch'án.

37 Ntá kuínhin sín tíha ntá kjuanchankíhi sín ch'án kixin:

—¿Xá nketí tsonhen tíha, Ìnchéni? —ichro sín.

A ntá jehe ch'án kjuátehe ch'án ntáchro ch'án kixin:

—Tí tjen tí cuerpo kuente chojni tsík'en la mé ntiha tsojnkotsé tí kontexjuen —ichro ch'án.

18

Ch'ín Jesús kjuíncheyóexin ch'án éxí ijnko tjan k'án la ko ijnko ch'ín juez

1 **A** ntá ch'ín Jesús kjuíncheyóexin ch'án kjuakoxin ch'án kixin jnkochrín chrónixjehe chojni Dios la ko chrókóxrjéhya sín.

2 Ntá ntáche ch'án sín kixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró.

3 Kjaxin chjasin ntiha kjuák'e ijnko tjan k'án, jnkoyaxón sákjuítsjehe tjan tí ch'ín juez kjuanchia tjan jie ntáchro tjan kixin chrókuitøexín kixin ijnko chojni nínkakonhen tjan ntiha.

4 Nchónhya veces tjitsjehe tjan tí ch'ín juez la chrohya ch'án chrókjuinchekitøexín ch'án. Ntá chr'éxin kjuenkayáxin ch'án ntáchro ch'án kixin: “Kjonté í tsjikosáyàhya Dios la ko ninkexró tsjikosáyàhya

5 a ntá tí tjan k'án jnkoyaxón tjanchia tjan jie, la tsjínkítsa tjan tsitøexín tí jie tjanchia tjan kixin í jnkoyaxónhya itsi tjan tsochronòa tjan kixin ó kjuixin kónínkavan jie”, ichro ch'án.

6 Ntá ntáchro Ìnchéni kixin:

—Mé xikaha ichro tí ch'ín juez jínahya.

⁷ ¿Xá chrókjuinkĩtsahya Dios tí sín kjueyá ch'án tí chróchronóehē sín ch'án nchakotjin la ko tie? ¿Á tjokahya chrókjuatehe chrókjuinkĩtsa sín ch'án?

⁸ Ntáxrjan kixin kjá tjoka chrókjuinkĩtsa sín ch'án. A ntá tió itsi tí Xjeen Dios K'óna Chojni, ¿á naxa chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxí ijnko ch'ín fariseo la ko ijnko ch'ín nchekjènkĩ

⁹ Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín kixin imá jína sín a ntá tí í so sín la náhí, ichro sín. Ntá ntáchro ch'án kixin:

¹⁰ —Iyó sín ntoa sákjuĩ nkaxenhen nĩnko kixin tsonixjehe sín Dios. Ijnko la fariseo la ko ijnko la ch'ín nchekjènkĩ.

¹¹ A ntá tí ch'ín fariseo tjexín ch'án toté ch'án nixjehe ch'án Dios ntáchro ch'án kixin: “It'eni Dios, kjuasáya tjahá kixin jeheni la chóntahyani jje éxí tí sín í so kixin teé sín la ko ch'iehe kichó sín la ko ch'iehe sín chojni chjin. Kjaxin jeheni la jehya éxí tí ch'ín nchekjènkĩ tjinhin.

¹² Jeheni la nehyaní iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án.

¹³ A ntá tí ch'ín nchekjènkĩ la imá kjín kuítóhe ch'án kóxakonhen ch'án chrókonta ch'án nkajní la mé chjéhe ch'án ntakuin ch'án ntáchro ch'án kixin: “It'eni Dios tikonóehéni tí jeheni kixin nchónhya jje chóntani”, ichro ch'án.

¹⁴ Tjonkará kixin tí ch'ín nchekjènkĩ tió kjan ch'án ntōe ch'án la Dios kuikonóehē tí jehe ch'án la kjuínhin ch'án tí jje chóna ch'án, a ntá tí ch'ín fariseo la náhí. Kixin kaín chojni nchehnkehe asén kixin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

*Ch'ín Jesús kjuíncheyaon ch'án chánjan
(Mt. 19.13-15; Mr. 10.13-16)*

¹⁵ Kjaxin kjuikao sín chánjan ntsíntsí tí tjen ch'ín Jesús kixin chrókjuincheyaon ch'án xjan. Kjánchó tió k'uíkón tí sín k'uájiko ch'án la í kjuanjonha sín kjuachaxin kixin tsochjinako sín xjan.

¹⁶ A ntá ch'ín Jesús k'uíyehē ch'án sín ntáchro ch'án kixin:

—Tjtoherá chánjan méhe xrakoa tí tjèn janhan la t'ínka kuènhyará xjan kixin tí sín kuènte kjuachaxin kuènte Dios la mé tóyóhe tí jehe xjan.

¹⁷ Ntá chaxín ntáxrjan kixin tí nkexro ts'ónahya éxí ijnko chánjan xitjahya ts'ejó sín tí ts'etōan Dios tí kjuachaxin kuènte ch'án.

*Ijnko ch'ín ntasoá ríco kjuínixjehē ch'án tí ch'ín Jesús
(Mt. 19.16-30; Mr. 10.17-31)*

¹⁸ Ijnko ch'ín t'etōan kuēnte nínko kjuanchankíhi ch'án tí ch'ín Jesús kíxin:

—Jaha la ijnko maestro jína la, ¿nkehe naxa t'itjayan chrókjuich'eni kíxin chróchóntani kjuachón jnkochrín? —ichro ch'án.

¹⁹ Ntá kjuátehe ch'ín Jesús ntáchro ch'án kíxin:

—¿Nkekuēnte ntáchrua kíxin jína tí janhan? Jnkokoá nkexro la mé jína la tíha mé Dios.

²⁰ Jaha la ó noha nkehe tí k'uētōan Dios kíxin chrókjuacheéhya kíchuará, la ko chrók'oyánhya chojni, la ko chrókueehya, la ko chróntáchrohya ninkehó nkehe chaxínhya kuēnte ókjé chojni, la ko chrókjuíkosáyehé it'á la ko iná —ichro ch'án.

²¹ A ntá jehe ch'án kjuátehe ch'án ntáchro ch'án kíxin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kíxin:

—A ntá jnkokoá nkehe naxa t'itjayan chrókjuich'e, chrókjuinchekjia kaín nkehe chonta la chróchjehé tí chichaon tí sín nò. A ntá tí nkehe tjete la tsochonta nkaya nkajní. A ntá tíó tsjixin sìnchekìtonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xíkaha la kóxakonhen ch'án kíxin imá itsjé nkehe chónta ch'án.

²⁴ Tíó k'uíkon ch'ín Jesús kíxin kóxakonhen tí ch'ín a la ntá ntáchro ch'án kíxin:

—Imá xra kíxin tí chojni chónta itsjé nkehe chrók'uixenhen sín tí tjen Dios t'etōan.

²⁵ Antsí xrahya chrók'uatsínka ijnko kocamello ijnko tjar'i ntachica tjexrja, a ntá antsí má xra kíxin ijnko chojni chónta itsjé nkehe chrókjuak'e tí t'etōan Dios —ichro ch'án.

²⁶ A ntá kuínhin sín kíxin xíkaha ntáchro ch'án ntá ntáchro sín kíxin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kíxin:

—Tí nkehe tsjachahya chojni chrókjuinchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kíxin:

—Inchéni, jeheni la ó kuítōheni kaín nkehe chóntani kíxin tsochréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kíxin:

—Ntá chaxín tsotjonkará kíxin jnkójínra chrókuiṭohérá ntōa, la o chrókuiṭohérá it'á la ko iná, la o chrókuiṭohérá kíchuará,

la ɔ chrókujitohérá ichjiánrá, la ɔ chrókujitohérá xjaanrá kixin chrókjuich'erá xra kuente Dios

³⁰ la antsí nkehe ts'ayéhérá ntihi chjasintajni la ko tí chr'éxin la ts'ayéhérá kjuachón jnkochrín —ichro ch'án.

Ch'ín Jesús chrónka ch'án inaá kixin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uíyehé ch'án jehó tí teyó sín k'uájiko ch'án ntá chrónka ch'án kixin:

—Ijie sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni.

³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhin sín ch'án la ko ntate sín tsíkite sín ch'án.

³³ Tsjate sín ch'án, a ntá chr'éxin la ts'óyán sín ch'án. A ntá nixin yaon tsoxechón ch'án —ichro ch'án.

³⁴ A ntá jehe sín la ninkehó kienxínhya sín tí nkehe nixja ch'án kixin tíha ijnko nkehe naxa tsjachahya sín chrókiénxín sín.

Ch'ín Jesús kjuínchekitohe ch'án jina ijnko chojni t'ikonhya chjasin Jericó

(Mt. 20.29-34; Mr. 10.46-52)

³⁵ A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntia tjetjaxin ijnko ch'ín t'ikonhya tjanchak'á ch'án.

³⁶ Ntá xrínahya kuínhin tí ch'ín t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

³⁷ Ntá chénka sín ch'án kixin ch'ín Jesús tsíkjin chjasin Nazaret ts'atsínka ch'án ntiha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'ín David, tikonóehéni —ichro ch'án.

³⁹ A ntá tí sín tsítaón ntia la k'uètuenhen sín ch'án kixin tsotání ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'ín David, tikonóehéni —ichro ch'án.

⁴⁰ A ntá ch'ín Jesús ntá ntahó kjuák'echónhen ch'án ntá k'uetoan ch'án kixin tsjikakjín sín tí ch'ín a. Ntá tió kuikao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Ìnchéni, tjinkaonni chrókjuínchek'ikuanni —ichro ch'án.

42 Ntá ntáchro ch'ín Jesús kixin:

—Ó ts'ikuan. Ó kuítóha jína kixin kuítekávan tí janhan—ichro ch'án.

43 Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xíkaha kónhen kjuanchehe sín kjuasáyé Dios.

19

Ch'ín Jesús la ko ch'ín Zaqueo

1 A ntá ch'ín Jesús k'uixenhen ch'án chjasin Jericó la ntá k'uátsínka ch'án tí chjasin a.

2 A ntá ntiha tjen ijnko chojni ríco it'in ch'án Zaqueo, t'etuēnhen ch'án tí sín nchekjènkí.

3 Tjinkaon ch'án chrókjuatsōan ch'án nkexro tí ch'ín Jesús, kjánchó nchónhya chojni síin la xitjahya t'ikon ch'án kixin intsi ch'án.

4 Ntá kuinká ch'án kuítaón ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús.

5 A ntá tió k'uatsínka ch'ín Jesús ntiha konta ch'án tí nta ntáchro ch'án kixin:

—Zaqueo, tjoka tjasinkajián kixin ntōa ntahó tsitōna jie—ichro ch'án.

6 Ntá ch'ín Zaqueo la tjoka k'uínkajin ch'án kóchéhe ch'án.

7 Ntá kaín sín k'uíkon sín xíkaha ntá kjuankixin sín tjonta sín tí ch'ín Jesús, ntáchro sín kixin ntōe ijnko chojni chóna nchónhya jie tsitōhe ch'án.

8 Ntá ch'ín Zaqueo kjuák'exín toté ch'án ntáche ch'án Ìnchéni kixin:

—Jaha Ìnchéni, chrókónoha kixin tsjánjuan jnkosiné tí nkehe chonta sintakitōnhan tí sín nò. A ntá tí jnkojín nkexro kjujt'áyaha kuaáha la noó veces ts'okjanhan sín tí chichaon jie—ichro ch'án.

9 A ntá ntáchro ch'ín Jesús kixin:

—A ntá jie la tsaá chojni tí nchia i kixin tí ch'ín a mé k'uaxrjenixin ch'ín Abraham.

10 A ntá tí Xjeen Dios K'óna Chojni mé kuikjeyá la ko sinchekaá tí chojni chóna jie.

Ch'ín Jesús kjuíncheyóexin ch'án éxí ite chichaon imá tjete sínkí

11 A ntá tí chojni síin ntiha nachrohe tjejótinhin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuènte Dios la ách'e ó tuénxín tsi, ichro sín.

12 A ntá ntáchro ch'án kixin:

—Itjen ijnko nkexro tsík'axrjeníxin ijnko nkexro imá k'uék'etōan. Ntá sákjuí ch'án ókjé naciōn kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án ínaá.

13 A ntá tió chjina sátsji ch'án ntá k'uíyēhe ch'án ite tí sín ch'ehe ch'án xrā ntá chjéhe ch'án jnkojnko tí jehe sín jnkojnko chichaon imá tjete sínkí. Ntá k'uētōan ch'án kixin: “Tsjankíxinrá ch'ekoará xrā tí chichaon hasta tí tsokjanjian”, ichro ch'án.

14 A ntá tí sín chjasén ch'án ntiha imá kónínkakonhen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín siín ntiha kixin tjinkakonhya sín tí nkexro a ts'óna rey ts'etuenhen sín.

15 Kjonté xíkaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uētōan ch'án xrakoa tí sín ch'ehe ch'án xrā, na mé tí sín tsík'áyéhe tí chichaon, kixin tsoñohe ch'án nkehe tí xrā kjuích'eko sín tí chichaon k'uáyéhe sín.

16 A ntá tí ch'ín xrankíxixín kóchjina la ntáchro ch'án kixin: “Tí chichākoan la kjuachani ite chichaon ínaá”, ichro ch'án.

17 A ntá kjuátēhe tí ch'ín rey kixin: “Ó nchoxon tí xíkaha jaha la ijnko chojni jína ch'e xrā. Jína kjuích'e xrā kjonté jehya xrā jié ntá tsjánjuan kjuachaxin tsétōan ite chjasin”, ichro ch'án.

18 A ntá kóchjina tí ch'ín í jnko a ínaá ntáchro ch'án kixin: “Tí chichākoan la kjuachani in'ó chichaon ínaá”, ichro ch'án.

19 A ntá xíkaha ínaá kjuátēhe tí ch'ín rey kixin: “Tsjánjuan kjuachaxin tsétōan in'ó chjasin”, ichro ch'án.

20 A ntá kóchjina tí ch'ín níxin ntáchro ch'án kixin: “Tí chichākoan la tjínhin. K'uánkíntani panítóeni

21 kixin chrakonhanni kixin jaha la jiāha la tjinkávan tsákjá tí nkehe jehya jaha kjuaké la ko tsotjā tí nkehe jehya jaha kuènkaxian”, ichro ch'án.

22 A ntá tí rey ntáchro ch'án kixin: “Jehya chojni jína ch'e xrā jaha. Tí nkehe ntáchrúa tsjánchaxian jiē. Jaha la ó noha kixin jiēna janhan tsákjaá tí nkehe kjuakéhya, ichrúa, la ko tsotjā tí nkehe kuènkahya.

23 ¿Ntá nkekuènte kixin chr'anhya tí chichaon ijnko banco chrókjuich'exín xrā? A ntá tió kjan ntōna la antsí tsjé chichaon chrók'uayáha tí chrókjuacha kichó chica”, ichro ch'án.

24 A ntá ntáche ch'án tí sín siín ntiha kixin: “Takítsjehérá ch'án tí chichaon tsík'áyéhe ch'án la ntá chjehérá tí ch'ín chóna ite chichaon”, ichro ch'án.

25 A ntá jehe sín ntáchro sín kixin: “¿Nkekuènte chrók'uáyéhe ch'án kixin ó chóna ch'án ite chichaon?” ichro sín.

²⁶ **A** ntá tí ch'ín rey kjuátehe ch'án ntáchro ch'án kixin: “Kjonté jnkójín nkexro itsjé chóna la ts'áyéhe má. **A** ntá tí nkexro chónahya la kjonté tí ntsí chóna ch'án la ts'axrjehe ch'án.

²⁷ **A** ntá tí sín nínkakonna sín tjinkakonhya sín kixin ts'ónana rey la xrákoará sín ntihi ts'íkoxín kuān ts'ochrínjinrá kja sín.”

Ch'ín Jesús k'uúxnen ch'án chjasin Jerusalén

(Mt. 21.1-11; Mr. 11.1-11; Jn. 12.12-19)

²⁸ Tió kjuixin ntáchro ch'ín Jesús tíhi ntá chr'in ch'án sátsji ch'án chjasin Jerusalén.

²⁹ **A** ntá ó kjuíji chjinaxón tí chjasin Betfagé la ko chjasin Betania chjinaxón tí jnā nchek'in sín Olivo, ntá k'ueuēnhen ch'án iyó tí sín k'uájiko ch'án

³⁰ ntáche ch'án sín kixin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxa ninkexró tjiták'áhya va. Tjasintānkehérá va la tsjíkuanará va ntihi.

³¹ **A** ntá tí jnkójín nkexro tsjanchankíhará nkekuēnte tjasintānkehérá va la ntácherá sín kixin: “Inchéni ts'ichjānxin hin va”, tsixrorá.

³² **A** ntá tí sín k'uítuenhen sákjuí sín k'uitja sín éxí ntáchro ch'án.

³³ **A** ntá tió tjejójtjasintānkehe sín va la ntá tí sín inché va kjuanchankíhi sín kixin:

—¿Nkekuēnte tjasintānkehérá tí kolócho? —ichro sín.

³⁴ **A** ntá jehe sín kjuátehe sín kixin:

—Inchéni ts'ichjānxin hin va —ichro sín.

³⁵ Ntá sákjuíkohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a.

³⁶ **A** ntá tinkákji tí kolócho tjejen ch'án la tinkák'ikjínxin sín tí iké sín ntia kixin nátaón tí ka ts'atsínka tí kolocho tjejen ch'án.

³⁷ Ntá tió kjuíjichjina sín tí chjinaxón tí t'inkajinxin chojni tí jnā Olivo, a ntá kaín tí sín kuítekaon tí jehe ch'án chréhe sín kjuankixin sín itsen nixja sín chéhe sín kjuanchehe sín kjuasáyé Dios kixin kaín tí kjuaxroan k'uíkoxín kon sín.

³⁸ Ntá ntáchro sín kixin:

—Jina tí nkexro Rey kjuixin kjuachaxin ihnié Dios. Tsjak'e kjuaxróxin nkaya nkajni la ko kjuasáyé Dios tjen nkaya nkajni —ichro sín.

³⁹ **A** ntá iso tí sín fariseo tjejóyákan sín í so chojni tjejóchexroan sín ntiha ntáchro sín kixin:

—Maestro, tétuēnhén tí sín chréhe tí jaha kixin tsotáni sín —ichro sín.

⁴⁰ **A** ntá ch'ín Jesús kjuátehe ch'án ntáche ch'án sín kixin:

—**A** ntá tí sín i tsotáni sín la ixro tsotsje —ichro ch'án.

41 **A** ntá tió kjuíjichjina ch'án chjasin Jerusalén ntá k'uíkon ch'án tí chjasin la ntá tsjánka ch'án kixin kuítekakonhyá sín

42 ntáchro ch'án kixin:

—Chrókuiénxinrá la ko chrókónohará nkexrí chrók'uayéxinrá tí kjuaxróxin, kjánchó jahará kuítekákonhyará. **A** ntá ó kjuixin k'uátsínka tí kjuaxróxin chrók'uikonrá la xitjahya ts'ikonrá jie.

43 **A** ntá tsi iso yaon jínahya itsi tí sín nínkakonhanrá la sich'éna sín ijnko tját'ó ts'ántatjen tí chjasin tjejorá ntihi ts'inkákonhen kixin xitjahya ts'axrjéxinrá chjasin ntihi kixin nkuíxn ts'ejó sín ts'inkákonhanrá sín

44 ntá ts'óxíka sín kaín tí tját'ó siín ntihi la ko ts'óyán sín kaín tí chojni siín la ko tsítóehya sín kixin ninkehó xro naxa ts'ejókjen kíchó, kixin jahará kjuátsqanhyará kixin kuitsjehe Dios tí chjasin tjejorá ntihi.

Ch'ín Jesús kjuínchetjóá ch'án nkaxenhen nínko

(Mt. 21.12-17; Mr. 11.15-19; Jn. 2.13-22)

45 **A** ntá ch'ín Jesús k'uíxenhen ch'án tí nínko jie, a ntá kjuankíxin ch'án kuakitsje ch'án tí sín nchekji nkehe la ko tí sín t'ena nkehe ntiha.

46 Ntá ntáchro ch'án kixin:

—**A** ntá ntáchro xroon itén Dios chrónka kixin: “Tí ntóna i mé it'in nchia tsonixjanaxián chojni”,* ichro. **A** ntá jahará tí nchia i tsíkjich'énará itjuéé xíchee —ichro ch'án.

47 **A** ntá tí nínko ntiha kjuák'e ch'ín Jesús kjuako ch'án kaín yaon. **A** ntá tí sín nchat'á t'etóan la ko tí maestro tjako tí ley la ko kjaxin tí sín t'etóan tí chjasin ntiha kjueyá sín nkexrí chrók'óyán sín ch'án.

48 Kjánchó k'uitjahya sín nkexrí chrók'óyán sín ch'án kixin kaín chojni tjejótinhin tí nkehe tjechronka ch'án.

20

Tí kjuachaxin chónka ch'ín Jesús

(Mt. 21.23-27; Mr. 11.27-33)

1 **A** ntá ijnko yaon kjuák'e ch'ín Jesús tí nínko ntiha kjuakohe ch'án chojni tí tan jína tsaáxin sín. **A** ntá kjuí tí sín nchat'á t'etóan la ko tí sín maestro tjako tí ley la ko kjaxin tí sín t'etóan kuénte nínko.

2 Ntá kjuanchankíhi sín ch'án kixin:

—Chronka nkehe tí kjuachaxin chonta kixin xíkaha ch'e. ¿Nkexro kjuanjon tí kjuachaxin a? —ichro sín.

3 Ntá kjuátéhe ch'ín Jesús ntáchro ch'án kixin:

—Kjaxin janhan tsjánchánkíhará ijnko nkehe siná nkexrí tsjateherá.

* 19:46 Isaías 56.7

4 ¿A ntá nkexro k'uetuēnhen tí ch'ín Juan kixin tsíkite ch'án chojni? ¿Á Dios ní o chojni ó? —ichro ch'án.

5 Ntá kjuankíxin sín tjo sín kichó sín ntáchro sín kixin:

—¿Nkehe chrókjuateheni? A ntá tí tsontáchroni kixin Dios tsíchr'án tí ch'ín Juan la ntá tsjanchankí ch'án kixin nkekuēnte kuítekakuenhyani ch'án.

6 A ntá tí tsontáchroni kixin chojni ó k'uetuēnhen sín ch'án la ntá kaín chojni tsonínkaon sín la ixro ts'óyánxinni sín kixin tjenkayáxin sín kixin ch'ín Juan chaxín k'uékjako ch'án itén Dios —mé xikaha ikjo sín.

7 Ntá kjuátehe sín kixin noehya sín nkexro tsíchr'án tí ch'ín Juan.

8 Ntá ntáchro ch'ín Jesús kixin:

—Kjāxin janhan tsoxrjankahya nkexro kjuanjon kjuachaxin tjét'a tíhi —ichro ch'án.

*Ch'ín Jesús kjuíncheyóexin ch'án éxí tí sín ch'e'ehya xra jína
(Mt. 21.33-44; Mr. 12.1-11)*

9 Ntá tuénxín kjuankíxin ch'ín Jesús nixjehe ch'án chojni kjuíncheyóexin ch'án ntáchro ch'án kixin:

—Kjuák'e ijnko chojni k'uēnkāxin ch'án nta to uva tí nontee ch'án, a ntá chr'éxin kjuínchekjen ch'án tí iso tí sín ch'e xra. A ntá kjuixin ntá sákjuí ch'án imá sé.

10 A ntá kui tí yaon tsakjinjin sín to uva. Ntá k'uetuēnhen ch'án ijnko nkexro ch'ehe ch'án xra kixin tsjikjanchehe ch'án tí sín ch'e xra nontee ch'án kixin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkíté sín ch'án la ninkehó tsíchjéhya sín ch'án.

11 A ntá tí ch'ín nontee ichr'án ch'án í jnko nkexro ch'ehe ch'án xra. A ntá kjāxin k'uántaxínhín sín ch'án la ko kjuate sín ch'án la ko kjāxin ninkehó tsíchjéhya sín ch'án inaá.

12 A ntá tí ch'ín nontee ichr'án ch'án í jnko nkexro. A ntá tí sín ch'e xra kjāxin xikahó tsíkjich'ehe sín inaá, tsík'inkíté sín ch'án.

13 Ntá tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjanna imá tjuahā. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án.

14 A ntá kjónté kui ch'án la k'uíkon tí sín ch'e xra ntá chénka sín kichó sín kixin: “Tí ch'ín i mé ts'áyéhe ch'án kaín nkehe kuēnte it'é ch'án. Ts'óyánni ch'án kixin jeheni tsitōekoni kaín tí nkehe a,” ichro sín.

15 A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—A ntá tí inché nonte la, ¿nkehe chrókjuich'e ch'án kixin xikaha kónhen tí xjeen ch'án?

16 Chrókui ch'án chrókjuinçek'itjáyan ch'án tí sín ch'e xra kixin xikaha kjuich'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

17 A ntá ch'in Jesús komá ch'án tí jehe sín ntáchro ch'án kixin:

—¿A ntá nkehe t'axrjexín tí nkehe ntáchro xroon itén Dios ntáchro xikihi?:

Tí xro náxrxónhya kuítóenta tí sín ch'éna tjat'o, a ntá mé jie k'óna tí xro tjetóan.*

18 A ntá jnkojín chojni tsjitsínka chrítaón tí xro i tsokuen ch'án. A ntá ts'ánótjen tí xro i tsoxratja ijnko chojni la tsokuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

19 A ntá tí nchat'á t'etóan la ko tí maestro tjako tí ley tjinkaon sín chrótsé sín tí ch'in Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni siín.

20 Ntá k'uetuēhen sín chojni tsotsáyehe sín ch'án, éxí chojni chóna kjuasáyé ch'án chrókjo sín ch'án jnkojína kixin ách'e ichrén nkehe ntoáhya tsonixja ch'án. A ntá jína tsjanxaxín sín jie tsjikaán sín ch'án tí tjen tí ch'in gobernador.

21 Mé xikaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrua la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios.

22 A ntá jie la chronka, ¿á jína chrókjuēnkeheni tí gobierno romano o náhi? —ichro sín.

23 A ntá ch'in Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuēnte chrokuachaxinráni?

24 Tjákonará ijnko tí chichaon méhe. ¿Nkexro tí tsík'axrjexín tjenkáni tí chichaon i la ko nkexro ihnié chóna méhe? —ichro ch'án.

Ntá kjuátēhe sín kixin:

—Tí ch'in t'etóan mé tjenkáni ch'án —ichro sín.

25 Ntá ntáchro ch'án kixin:

—Chróchjehérá tí ch'in gobierno t'etóan tí nkehe kuēnte ch'án; a ntá tí nkehe kuēnte Dios chróchjehérá Dios —ichro ch'án.

26 A ntá ninkehó kjuachahya sín kjuachaxin sín ch'án tí nkehe ntáchro ch'án nkayakon chojni chjasin ntiha. A ntá

* 20:17 Salmo 118.22

chracon sín kuínhin sín kaín nkehe kjuátehe ch'án la ntá tí sín kjuanchankí la táni sín kohya nkehe ichro sín.

Kjuanchankí sín kixin á tsoxechón chojni
(Mt.22.23-33; Mr.12.18-27)

²⁷ **A** ntá chr'èxin iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

²⁸ —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitöhe ichjién, tí chóntahya sín xjeen, la t'ichjánxin kixin kichó tí ch'ín tsík'en tsötöhe tí tjan k'án kixin tsochónta sín xjeen sín éxi xjeen tí ch'ín sao tsík'en ts'ikon sín.†

²⁹ **A** ntá k'uéjó sín yato sín jnkokoá kichó sín. **A** ntá tí ch'ín sao la kótehe ch'án. Ntá k'uén ch'án la chóntahya ch'án ninkehó xjeen ch'án.

³⁰ **A** ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chóntahya sín xjeen sín.

³¹ **A** ntá tí ch'ín níxin xíkótehe jehe tjan ínaá. Kjaxin xíkaha kayatoé sín. Kaín sín k'uén sín ninkehó xjeen sín chóntahya sín.

³² **A** ntá kjuixixín kjaxin jehe tjan ik'uén tjan.

³³ **A** ntá tió tsoxechón chojni tsík'en, ¿ntá nkexro tí jehe sin ts'óna ichjién tí jehe tjan kixin yato tí jehe sín kótehe tjan? —ichro sín.

³⁴ Ntá ch'ín Jesús kjuátehe ch'án ntáchro ch'án kixin:

—Ntihi chjasintajni tí chojni ntoa la ko ti chojni chjin tótehe sín takja kichó sín.

³⁵ **A** ntá tí sín kuítekaon sín tí janhan ntá tsjacha sín tsoxechón sín ínaá la í tsötöehya sín la koí tsötöehya tí xjeen sín.

³⁶ Kixin tí sín a la xitjahya ts'en kixin éxi tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín.

³⁷ Kjaxin ch'ín Moisés tió chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnehéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡

³⁸ Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóhón, la Dios la t'ikon ch'án kixin kaín chojni la síhón —ichro ch'án.

³⁹ **A** ntá iso tí sín tjako tí ley la ntáchro sín kixin:

—Jína kjuàkua la ko jína ntáchrúa, Maestro— ichro sín.

⁴⁰ **A** ntá chracon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

⁴¹ Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjeníxin tí ch'ín David?

⁴² A ntá ch'ín David ikjin ch'án tí libro Salmos la ntáchro ch'án kixin:

Ìnchéni Dios ntáche tí Ìnchéni kixin:
“Tjak'e tjaná chjina ntihó tsétoan

⁴³ tsjixinjian kaín xín tí sín nínkakonhan la tsjachahya sin ts'etoan sín kixin jahvá mé tsétoan.”[§]

⁴⁴ ¿Xá nkexrí kixin Cristo chrók'óna it'é David, kixin jehe David kuikjtexín ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jie tí sín tjako tí ley

(Mt. 23.1-36; Mr. 12.38-40; Lc.11.37-54)

⁴⁵ Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án kixin:

⁴⁶ —Chrókóxakonhanrá chrókuankíehyará tí sín maestro tjako tí ley. Tóxrjnhin sín chrók'uinkáya sín ka kjinjin la ko tjinkaon sín kixin kaín chojni chrókjuikosáyehe sín tsoxeta sín ntasin la ko tjejá sín silla antsí náxrjón chrók'uejóyá sín nkaxenhen nínko la ko tjejá sín kixin jina chrók'uejó sín tí sátsji sín kia,

⁴⁷ la ko kjaxin takitsjehe sín ntøe tí chojni chjin k'án. A ntá kjuixin kjuích'iyehé sín chojni ntá náxrjón nixjehe sín Dios. A ntá jehe sín antsí má sinchekjasóte sín Dios kixin xikaha kjuích'ia sín.

21

Tí chichaon kjuanjon ijnko tjan k'án nò

(Mr. 12.41-44)

¹ A ntá tí nkaxenhen nínko ch'ín Jesús k'uíkon ch'án kixin tí sín ricó kjuikao sín chichaon chr'áxehen sín tí ntacajón tjetóxroyéya chichaon.

² A ntá kjaxin k'uíkon ch'án ikjui ijnko tjan k'án nò la ntá jehe tjan chr'áxehen tjan yaá chichaon ntsíntsí.

³ Ntá ntáchro ch'ín Jesús kixin:

—La chaxín ntáxrjan kixin tí tjan k'án i nò tjan kjánchó antsí tje te sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhí.

⁴ Kixin kaín tí chichaon kjuanjon sín la chichaon síxèhe sín. A ntá jehe tjan kjónté nò tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án kixin tí nínko ts'itjáyan

(Mt. 24.1-2; Mr. 13.1-2)

⁵ Iso sín tjejóto sín kixin nkexrí tsjehe nínko tsík'óna xro náxrjón la ko í so nkehe tsíkjanjon chojni éxí ijnko nkehe chjéhe sín Dios. A ntá ch'ín Jesús ntáchro ch'án kixin:

6 —A ntá tsi ijnko yaon tí n̄nko tjejokomará ntihi la tsoxíka. A ntá tsōkohya ninkehó x̄r̄o ts'ejókjen kichó ínaá —ichro ch'án.

Tí nkehe tsonhen tí naxa ts'itjáyanyha chjasintajni
(Mt. 24.3-28; Mr. 13.3-23)

7 Ntá kjuanchankíhi sín ch'án kixin:

—Maestro, ¿nkesá tsonhen tíha? ¿Nkexrí tsonhen tí tsonoexínni tí nkehe tsonhen? —ichro sín.

8 Ntá ntáchro ch'ín Jesús kixin:

—Chrókóxakonhanrá t̄itoéhyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Íjie mé tsoxiteyá tsonhen.” Kjonté x̄ikaha tsontáchro sín la chrókuítekákuenhyará tí jehe sín.

9 A ntá tió tsinhínrá tsontáchro chojni kixin ó síin kjuanínkaon tjanjonko kichó sín, kjonté x̄ikaha naxa chróchrakonhyará kixin kaín tíha t'ichjánx̄in ts'atsínka senó tí naxa tsjixixínhya ts'itjáyan chjasintajni —ichro ch'án.

10 Naxa tjechrónka ch'án ntáchro ch'án kixin:

—Íjnko nación la tsjanjonko í jnko nación la ko ijnko chjasin tsjanjonko í jnko chjasin.

11 Kjaxin imá t̄jan tsínkí nonte la ko tsokjinta la ko tsoníhi chojni nchónhya chjasin, a ntá nkajní nchónhya kjuachrakon jie ts'ixin ts'ikon chojni.

12 'Naxa ts'atsínkahya tíha la tsonínkakonhanrá sín tsotsérá sín sátsjikoará sín tí n̄nko tsjanchia sín jie la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador kixin tinkachónkirá n̄ina.

13 A ntá tí yaon x̄ikaha tsonhen la ts'ixin kjuachaxin kixin tsochronkará nkexro tinkachónkirá.

14 Tóxakuanhyará senó nkexrí tsjateherá tí nkehe tsjan-chankíhará sín

15 kixin janhan la tsjánjuan kjuaxrexinkaon jína tsonixjará kixin nijnko tí sín nínkakonhanrá xitjahya tsontáchro sín kixin ntoáhya tí nkehe tsjateherá.

16 Kixin kjonté it'ará la ko kíchuará la ko tí sín kjéhyará la ko tí sín tjórá jína mé sintakjirá sín. Jehe sín ts'óyán sín jnkojínrá.

17 Kaín chojni chjasintajni tsonínkakonhanrá sín kixin tinkachónkirá n̄ina.

18 Kjánchó x̄ikaha la nijnko kax̄ih̄i chóntha kjará ts'itjáyanyha.

19 Tí ts̄itoéhyará tinkachónkirá tí janhan la tsochontará kjuachón jnkochríxín.

20 'A ntá tió ts'ikonrá kixin kuenté chjasin Jerusalén tsík'ántatjen sín soldado ntá tsonoaxínrá kixin í séhya ts'itjáyan tí chjasin a.

21 A ntá tí sín tjejó sín Judea la t'ichjánx̄in sátsjixín sín ntiha sátsji sín jn̄a. A ntá tí sín síin chjasin Jerusalén kjaxin

t'ichjánxín sátsjixín sín ntiha la ko ti sin tjejó sín nontēe sín la í xitjahya tsokjan sín chjasin.

²² Kíxin tí yaon ts'ixin tsjasóte chojni tsoxiteyá tsonhen kaín nkehe nixja xroon itén Dios.

²³ Nõa tí chojni chjin tjejóyá tí yaon a la ko tí sín chóna xjanhte naxa nchekakí sín. Kíxin tí yaon a la ts'ixin kjuatjoté tí chjasin la Dios tsjanjon kjuachaxin kíxin imá tsjasóte chojni ntiha.

²⁴ Jnkojínrá ts'énxinrá tí siín kjuanínkaon ntiha la ko jnkojínrá tsotsérá sín sátsjikoará sín sinchekjasótiará kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kíxin Dios mé tsjanjon kjuachaxin iso yaon xikaha tsonhen. A ntá chr'éxín tsontáchro ch'án kíxin: “La í kohya nkehe tsonhen.”

*A ntá tió itsi tí Xjeen Dios K'óna Chojni
(Mt. 24.29-35, 42-44; Mr. 13.24-37)*

²⁵ 'A ntá tsonoaxínrá nkexrí tsonhen tí yaon la ko nkexrí tsonhen nitjó la ko nkexrí tsonhen konotsé. A ntá chjasintajni tsokohya kjuaxróxin kaín nación la ko tsochrakon chojni kíxin imá tsojñá ntayaon.

²⁶ A ntá chojni la tsotinhin sín kíxin tsochrakon sín tsjenkayáxin sín nkehe tsonhen chjasintajni kíxin kaín tí nkehe sínkáni nkajní la tsinkí.

²⁷ Ntá xikaha ts'ikon chojni kíxin itsi tí Xjeen Dios K'óna Chojni itsi ch'án chríkjan ijnko tjuí tsíkao ch'án tí kjuachaxin jíé kuènte nkaya nkajní.

²⁸ A ntá tió tsoxrankíxin tsonhen kaín tíha chrókócháhará chrókuaya kjará ntá chróntáchorá kíxin kjínhya tjen tí nkexro tsaáxinrá —íchro ch'án.

²⁹ Kjaxin kjuíncheyóexin ch'án í jnko nkehe ntáchro ch'án kíxin:

—Tjenkayáxinrá nkexrí siín tí nta t'óna to higo la ko kaín tí í so ntá.

³⁰ Tió ts'ikonrá kíxin tinkák'ayan kahnte tí nta, ntá tsonoaxínrá kíxin í séhya ts'ixenhen nchakuen chrin.

³¹ Mé kjaxin xikaha tió ts'ikonrá kíxin kaín tí nkehe sítónhen, ntá tsonoaxínrá kíxin tí kjuachaxin kuènte Dios la ó chjino tjen.

³² 'Mé chaxín ntáxrjan kíxin kaín tíhi tsonhen senó naxa t'enhya chojni tjejó jie.

³³ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³⁴ 'Chrókóxakonhanrá chrókuitoéhyará kíxin chrókuichròerá kíxin tí imá chrókjónterá la ko tí chrókókoanrá. Kíxin tí xikaha la ntá titàya tsi tí yaon la chrók'uejochoénhyará.

³⁵ Na mé éxí ijnko trampa xrínahya ts'ikjehe mé xikaha itsi tí yaon a, la ko xikaha tsonhen kaín chojni sín chjasintajni tí ts'ejóchóenhya sín.

³⁶ Méxra listo chrók'uejora la ko chrónixjehéra Dios kaín yaon chronóehéra ch'án kixin tió tsi kaín tí kjuaxikaon xikaha la ntá tsjinkitsará ch'án tsaára kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'ín Jesús kjuák'ekjakoxin ch'án tí nínko ntiha jnkojnko yaon, a ntá tie la sákjuí ch'án tí jnā nchek'in sín Olivo, la ntaha kuitōhe ch'án.

³⁸ A ntá kaín chojni kóchjina sín tí nínko jnkojnko nchítjen kixin tsinhin sín tí nkehe tsochronka ch'án.

22

*Imó kjuenkayáxin sín nkexrí tsotsé sín tí ch'ín Jesús
(Mt. 26.1-5, 14-16; Mr. 14.1-2, 10-11; Jn. 11.45-53)*

¹ Ntá kuichjina tí yaon kia sine sín tí niotja tjikohya tí xroan t'ánkixin niotja na mé tí kia nchek'in sín pascua.

² Ntá tí nchat'á t'etōan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús kixin chrakōnhen sín tí chojni chjasin ntiha.

³ A ntá ch'ín Tsochren k'uixenhen asén ch'ín Judas, mé kjaxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús.

⁴ Tí ch'ín a mé sákjuítsjehe tí sín nchat'á t'etōan la ko tí sín t'etōan kuente nínko, ikjo kichó sín kixin nkexrí tsjikaán sín tí ch'ín Jesús.

⁵ Ntá jehe sín kóchéhe sín la ko ntáchro sín kixin tsjenkehe sín tí ch'ín Judas.

⁶ Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

*Kjuixixín kjoneko sín tí ch'ín Jesús
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

⁷ Ntá ó kui yaon kia sine sín niotja tjikohya tí xroan t'ánkixin niotja, a ntá t'ichjánxin ts'óyán sín tí kolélo sine sín kuente tí kia pascua.

⁸ A ntá ch'ín Jesús k'uetuēnhen ch'án tí ch'ín Pedro la ko tí ch'ín Juan kixin sátsji sín sincheyaxín sín tí nkehe sine sín kuente tí kia pascua.

⁹ Ntá jehe sín kjuanchankíhi sín ch'án kixin:

—¿Nketí tjinkávan sincheyaxínni? —ichro sín.

¹⁰ Ntá kjuátehe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko tóa tjia ntā. Chréhéra ch'án sátsjirá tí nchia ts'ixenhen ch'án.

¹¹ Tsontácherá tí ìnché tí nchia ḱixin: “Ntáchro Maestro ḱixin: ¿Nketí tjen tí cuarto tsjánjuan kjuachaxin tsoyax́ixin sineko ch'án tí sín teyó xriko ch'án tí yaon pascua?” tsixrorá.

¹² A ntá jehe ch'án tsjakohará ch'án ijnko cuarto jíé tí yóxin piso la ntiha síin nkehe t'ichjánxín, la ntaha sìncheyax́ixinrá tí sineni tsonjín —ichro ch'án.

¹³ A ntá jehe sín sákjuí sín k'uitja sín kaín nkehe éxí tsíchronka ch'ín Jesús. Ntá ntiha kjuíncheyax́ixin sín sine sín kuènte pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uejótjaxín sín tí tjen tí mesa.

¹⁵ Ntá ntáchro ch'ín Jesús ḱixin:

—Imá tjínkavan ḱixin tsjasinni kia sinekianrá tí yaon pascua naxa ts'énhya janhan.

¹⁶ Ntáxrjan ḱixin sinehya janhan xíkaha ínaá tí naxa tsoxiteyáhya tíha tió tsi kjuachaxin kuènte Dios —ichro ch'án.

¹⁷ Ntá kuákja ch'án tí nkehe tjía ìnté to uva ntá chjéhe ch'án kjuasáya Dios ntá ntáchro ch'án ḱixin:

—Tákjára tíhi la its'irá kaín rá

¹⁸ ḱixin ntáxrjan ḱixin xík'ikianhyará tí ìnté to uva tí naxa tíhya tí kjuachaxin kuènte Dios —ichro ch'án.

¹⁹ A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ò ch'án chjéhe ch'án tí jehe sín ntáchro ch'án ḱixin:

—Tíhi mé cuerpo kuèntana ḱixin ts'ényákonhanrá. Mé xíkaha tsoxráxinkákonxínrá tí janhan —ichro ch'án.

²⁰ Kjaxin xíkaha kjuanjon ch'án tí nkehe tjía ìnté to uva tió kjuixin kjóne sín la ntáchro ch'án ḱixin:

—Tí nkehe tjía tí vaso chronkaxín tí nkehe nixin tsonhen tsoxiteyá ḱixin tí jnina ts'itjí tsotjuáxin tí ijjárá.

²¹ Tí nkexro sinchekjina mé tjekjian tí tjen mesa ntihi.

²² Méxra tí Xjeen Dios K'óna Chojni its'en éxí k'uítuenhen; kjánchó nòa tí ch'ín sinchekji ch'án ḱixin tsjasóte ch'án —ichro ch'án.

²³ A ntá jehe sín kjuanḱixin sín tjanchankíhi kíchó sín:

—¿Xá nkexro sinchekji ch'án? —ichro sín.

Ikjo sín ḱixin nkexro tí imá ts'etoan

²⁴ A ntá jehe sín mé tjo sín ḱixin nkexro antsí ts'etoan.

²⁵ A ntá ntáchro ch'ín Jesús ḱixin:

—Tí sín reyes kuènte tí naciones imá t'etoan sín. A ntá tí chojni mé ntáchro sín ḱixin tí sín t'etoan la mé chojni ch'e xra jíina.

²⁶ A ntá jahará xíkahya chrókjuich'erá. Íchá jíina tí nkexro imá t'etoan chrók'óna éxí tí nkexro antsí ntasoá chróchóxin

chrók'uítuenhen, na mé tí nkexro t'et̄oan chrók'óna éxí ijnko nkexro ch'exón xra.

²⁷ ¿A ntá nkexro tí antsí t'et̄oan, á tí nkexro lám̄o tjetjaxin tí tjen mesa ntá sine ch'án, o á antsí t'et̄oan tí nkexro kuik̄ao tí nkehe sine ch'án? Náhí. Tí nkexro tjetjaxin tí tjen mesa mé antsí t'et̄oan ch'án. Mé xikaha janhan tjénk̄akjánrá éxí ijnko nkexro ch'exón xra tí janhan.

²⁸ 'Jahará xráxín k'uéjontaxínrá k'uíkonrá kaín nkehe náxrjónhya kónna.

²⁹ Méxra janhan tsjánjuan kjuachaxin tsét̄oanrá éxí chjina T'aná tí tét̄oan janhan

³⁰ kixín sinterá la ko its'irá tí tsjak'e mesa kuènt̄ana tí tsét̄oan janhan nkaya nkajní la ko tsét̄oanrá sinchekit̄oexínrá tí ijje kaín tí sín k'uaxrjeníxin tí teyó xjeen ch'ín Israel.

Ch'ín Jesús chrónka ch'án kixín ch'ín Pedro sinchemá kixín chónhya tí jehe ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ìnchéni kixín:

—Simón, Simón, chrókónoha jaha kixín ch'ín Tsochren kjuanchia ch'án tí jahará chrók'ótsjéyehe ch'án tí jahará éxí noatrigó.

³² Kjánchó janhan xrjanóaha T'aná kixín jaha chrókuit̄oéhya tí tinkachónkia tí janhan. A ntá jaha kjónté tsjásian jie, a ntá tsokjan inaá ts'itjányanhya tinkachónkia tí janhan ntá sinchechéhé kichuárá —ichro ch'án.

³³ A ntá ntáchro ch'ín Simón kixín:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ A ntá kjuát̄ehe ch'ín Jesús ntáchro ch'án kixín:

—Pedro, ntáxrjan kixín ijje jaí naxa tsjehya kochínt̄o sinchemána iníya kixín chonhya tí janhan, tsixrua —ichro ch'án.

Ntá ó kuichjina tí hora xikaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kixín:

—Tió kuét̄uanhanrá sákjuirá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tok̄ate na, ¿á naxa t'itjányan ichrén nkehe ní? —ichro ch'án.

Ntá kjuát̄ehe tí jehe sín ntáchro sín kixín:

—Náhí. Ninkehó nkehe t'itjányanhya —ichro sín.

³⁶ Ntá ntáchro ch'án kixín:

—A ntá jie tí nkexro chóna kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chóntahya chica espada chrókjuinckji ch'án tí ka t'inkáya ch'án kixín chrók'uènxín ch'án ijnko chica.

37 Ntáxrjān kixin t'ichjānxin tsoxiteyá tsona éxí nixja xroon itén Dios ntáchro kixin: “Éxí yóhē ijnko chojni kjuasin jīē mé xīkaha ts'ikon sín ch'án.”* Mé xīkaha kaín nkehe chrónka xroon itén Dios kixin tsona mé t'ichjānxin tsoxiteyá —ichro ch'án.

38 A ntá jehe sín ntáchro sín kixin:

— Ìnchéni, ntihi tjejó yaá chica espada —ichro sín.

Ntá kjuátehe ch'án kixin:

— Kjónté ó táhó la ó nchoxon —ichro ch'án.

Ch'in Jesús nixjeexín ch'án Dios tí Huerto Getsemaní

(Mt. 26.36-46; Mr. 14.32-42)

39 Ntá ch'in Jesús sákjuixin ch'án chjasin Jerusalén sákjuí ch'án ijna Olivo kixin xīkaha kuènnen ch'án k'uékjich'e ch'án la koí tí sín k'uájiko ch'án tinkáchréhe sín.

40 Ntá kjuíji sín ntiha ntá ntáchro ch'án kixin:

— Nixjehérá Dios kixin tsjinkĩtsa ch'án tí jahará kixin tsjásinhyará jīē —ichro ch'án.

41 Ntá ch'in Jesús k'uaxrjenta ch'án tí jehe sín sákjuí ch'án ijnko kjínxin éxí chrók'ue chojni xro. Ntá kjuák'exín toch'in ch'án kixin tsonixjehe ch'án Dios.

42 Ntá ntáchro ch'án kixin:

— It'eni, tí tjinkávan chrókjuinchekaáni kaín nkehe náxrjónhya chrók'uatsínkani. Kjánchó jehya éxí tjinkaonni jeheni chrókónhenni. Náhí. Éxí tjinkávan jaha —ichro ch'án.

43 Ntá xrínahya k'uíkon ch'án itjen ijnko ángel tsíkixin nkaya nkajní kixin tsjinkĩtsa ch'án.

44 A ntá imá tóxakonhen ch'án, a ntá antsí fuerte nixjehe ch'án Dios, ntá k'uíxin ch'án ntáchjin éxí yóhē jni xīkaha k'uítji k'uánótjen nonte.

45 Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín.

46 A ntá ntáchro ch'án kixin:

— ¿Nkekuènte tjejochrinrá? T'àyará. Nixjehérá Dios kixin tsjinkĩtsará ch'án kixin tsjachroehyará ch'in Tsochren —ichro ch'án.

Itsé sín tí ch'in Jesús

(Mt. 26.47-56; Mr. 14.43-50; Jn. 18.2-11)

47 A ntá ch'in Jesús naxa tjenixja ch'án ntá xrínahya kui nchónhya chojni yámá chica. Tí ch'in it'in Judas, ijnko tí teyo sín k'uájiko ch'in Jesús, kuítaón ch'án ntia, ntá kóchjinehe ch'án tí ch'in Jesús kixin sineko ch'án kochíto.

48 A ntá ntáchro ch'in Jesús kixin:

—Judas, ¿á ijnko kochíto ó sìnchekjìxian tí Xjēen Dios K'óna Chojni? —ichro ch'án.

⁴⁹ A ntá tí sìn tjejóko ch'ín Jesús tió k'uíkon sìn kixin xíkaha kónhen ntá kjuanchankíhi sìn ch'án kixin:

—Ìnchéni, ¿á chrókuatéxinni sìn chica espada? —ichro sìn.

⁵⁰ A ntá ijnko tí jehe sìn kjuíncheníhi ch'án ijnko ch'ín ch'ehe xra nchat'á t'etōan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kixin:

—Táhó, tìtōhé, ó tjen —ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekitōhe ch'án jina.

⁵² Ntá tuénxín ch'ín Jesús ntáche ch'án tí sìn nchat'á t'etōan la ko tí sìn t'etōan kuènte nìnko la ko tí sìn táda t'etōan mé tí sìn tsíki sátsjiko sìn ch'án ntáchro ch'án kixin:

—¿Nkekuènte k'uinkakoará chica espada la ko inta éxí chrótserá ijnko xíche?

⁵³ A ntá kaín yaon kjuak'é janhan k'uejóni kjuákoáxinrá tí nìnko ntiha la ninkehó tsehyará tí janhan. A ntá jie mé tí hora kuèntará ntá kjuacha tí kjuachaxin kuènte sítié —ichro ch'án.

Ch'ín Pedro kjuínchemá ch'án kixin chónhya ch'án tí ch'ín Jesús (Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ntá itsé sìn tí ch'ín Jesús kjuínchenteto sìn ch'án sákjuíko sìn ch'án ntōe nchat'á t'etōan. A ntá ch'ín Pedro ikjín tinkáchréhe ch'án.

⁵⁵ A ntá tí ntasin ntiha kjuaka sìn xrohi síxrohe sìn. A ntá ch'ín Pedro kjaxin kjuák'entaxín ch'án tí tjejó sìn ntiha.

⁵⁶ A ntá ijnko tjachjin ch'e xra tió k'uíkon tjan kixin koí ch'ín Pedro tjechjìxrohe ch'án ntiha ntá komá tjan tí jehe ch'án ntá ntáchro tjan kixin:

—Kjaxin tí ch'ín i xriko tí ch'ín Jesús —ichro tjan.

⁵⁷ Ntá ch'ín Pedro kjuínchemá ch'án ntáchro ch'án kixin:

—¿Nkekuènte xíkaha ichrúa jaha? Ni chonhya tí nkexro a —ichro ch'án.

⁵⁸ A ntá auntsíkoá chr'éxìn ikui í jnko chojni k'uíkon tí jehe ch'án ntá ntáchro kixin:

—Kjaxin jaha xríkoa tí nkexro a —ichro.

Ntá ch'ín Pedro ntáchro ch'án kixin:

—Náhí, janhya —ichro ch'án.

⁵⁹ Ntá éxí ijnko hora chr'éxìn ntá nixja í jnko ch'ín chénka tí í so sìn kixin:

—Tí ch'ín i chaxín xriko tí ch'ín Jesús kixin kjaxin tsíkjìxìn ch'án estado Galilea —ichro ch'án.

⁶⁰ Ntá ntáchro ch'ín Pedro kixin:

—Nonahya janhan nkehe tí ntáchrúa —ichro ch'án.

Ntá tuénxín naxa tjenixja ch'án ntá xrínahya ó tsje kochíntoá.

⁶¹ Ntá Ìnchéni kuinkátjía ch'án komá ch'án tí ch'ín Pedro. Ntá ch'ín Pedro xraxinkaon ch'án kixin xikaha tsíchronka Ìnchéni kixin: “Naxa tsotsjehya kochíntoá sìnchemána iníya.”†

⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús

(Mt. 26.67-68; Mr. 14.65)

⁶³ Tí sín sákjuíko ch'ín Jesús kjuanoá sín ch'án la ko kjuate sín ch'án.

⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáchro sín k'uántaxínhín sín ch'án.

Ntá sákjuíko sín tí ch'ín Jesús nkayakon tí sín t'etoan

(Mt. 26.59-66; Mr. 14.55-64; Jn. 18.19-24)

⁶⁶ A ntá kóyaon nchakotjin la kójnkotsé kaín tí sín táda t'etuenhen tí sín judío, la ko tí nchát'á t'etoan, la ko tí sín maestro tjako tí ley la sákjuíko sín tí ch'ín Jesús nkayakon tí sín imá t'etoan. Ntá ntiha kjuanchankíexín sín ch'án kixin:

⁶⁷ —Ijie la chronka, ¿á jaha tí Cristo? —ichro sín.

Ntá jehe ch'án kjuátehe ch'án kixin:

—Tí tsontáxrjan kixin chaxín janhan na tsitekákonhyará.

⁶⁸ A ntá tí chrókjuánchánkíhará ichrén nkehe la chrókjuátehehyará la ko chrók'uatjántahyarána.

⁶⁹ A ntá jie tí Xjeen Dios K'óna Chojni mé tsjak'etjaxín tí tja chjina kuénte Dios chóna kaín xín kjuachaxín —ichro ch'án.

⁷⁰ A ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáchro ch'án kixin:

—Chaxín janhan xikaha ntáchrórá tí jahará —ichro ch'án.

⁷¹ Ntá kjo sín kíchó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

23

Sákjuíko sín tí ch'ín Jesús nkayakon tí ch'ín Pilato

(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uínkatjen sín ntá sákjuíko sín tí ch'ín Jesús nkayakon tí ch'ín Pilato.

² A ntá ntiha kjuankíxin sín t'eka sín jie tí jehe ch'án ntáchro sín kixin:

† 22:61 Lucas 22.34

—K'uitjani tí nkexro i tjachroe ch'án chojni nació n kuènténi ntáchro ch'án kíxin chrókjuenkeehyani tí gobierno romano, la ko kjaxin ntáchro ch'án kíxin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kíxin:

—¿Á jaha tí Rey t'etueñhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kíxin:

—Chaxín xikaha ntáchrua jaha —ichro ch'án.

⁴ A ntá ch'ín Pilato ntáche ch'an tí sín nchat'á t'etöan la ko tí chojni tsíkikao sín kíxin:

—T'itjáhya nijnko jie chóna tí nkexro i —ichro ch'án.

⁵ A ntá jehe sín antsí itsen nixja sín ntáchro sín kíxin:

—Tjachroe ch'án kaín xín chojni estado Judea kíxin tí nkehe tjako ch'án. Kjuankíxin ch'án kjuako ch'án estado Galilea, a ntá jie ó kui ch'án ntihi la xikaha tjako ch'án —ichro sín.

Sákuúko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsíkijxin ch'án.

⁷ A ntá kjuátehe sín kíxin ntaha tsíkijxin ch'án, ntá k'uetöan ch'ín Pilato kíxin sátsjiko sín ch'án tí tjen ch'ín Herodes kíxin jehe ch'án mé gobernador tí estado Galilea kíxin kjaxin ch'án tjen ch'án chjasin Jerusalén tí yaon a.

⁸ A ntá ch'ín Herodes k'uikon ch'án kjuíji tí ch'ín Jesús ntá imá kóchéhe ch'án kíxin isé tjinkaon ch'án chrók'uikon ch'án tí ch'ín Jesús kíxin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxin ch'ín Jesús.

⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteheya ch'án.

¹⁰ Kjaxin ntiha k'uejó tí sín nchat'á t'etöan la ko tí sín maestro tjako tí ley la ntá nchónhya jie k'ueka sín ch'án kíxin nínkakonhen sín ch'án.

¹¹ A ntá ch'ín Herodes la ko tí sín soldado kuènte ch'án kjuankíxin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrjón éxí t'inkáya tí sín rey. A ntá tuénxín ch'ín Herodes k'uetöan ch'án kíxin sátsji ch'án inaá tí tjen ch'ín Pilato.

¹² A ntá tí yaon a ch'ín Pilato la ko ch'ín Herodes kjuankíxin sín tjuèhe kichó sín kíxin tí senó la k'uéninkakonhen kichó sín.

K'uetöan sín kíxin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uíyehé ch'án tí nchat'á t'etöan la ko tí sín gobernador la ko kaín chojni chjasin ntiha kíxin tsojnkotsé sín

14 ntá ntáche ch'án sín kixin:

—Jahará kjuíkuáaná tǐ nkexro i ntáchrorá kixin ntoáhya tjakohē ch'án chojni kixin chrókónínkakohen sín tǐ gobierno. Kjánchó janhan kjuánchánkíhǎ ch'án itsjé nkehe kuínhínrá ntá k'uíkonrá kixin k'uitjahya ninkehó tǐ jiē tékará ch'án.

15 La ko kǐaxin ch'ín Herodes k'uitjahya ch'án tǐ jiē tékará tǐ ch'ín Jesús ntá chr'án ch'án ínaá ntihi. Ó k'uíkonrá kixin ninkehó jiē chóntahya ch'án chrók'uenxín ch'án.

16 Sǐntakjasóte ch'án ntá chr'éxin tsjánjuan kjuachaxin sátsji ch'án —ichro ch'án.

17 A ntá tǐ yaon kia a la t'ichjánxin kixin ch'ín Pilato tsjanjon kjuachaxin sátsji ijnko chojni tjechjina kixin xíkaha kuènnen sín ósé.

18 Ntá kaín sín kjuankixin sín k'óyako sín ntáchro sín kixin:

—ǐTǐ nkexro la náhí! ǐCh'ín Barrabás mé t'atǐánta! —ichro sín.

19 A ntá ch'ín Barrabás tsík'ikjéhe sín ch'án kixin jehe ch'án la ko í so chojni kónínkakohen sín tǐ chjasin ntiha la ko tsík'óyán ch'án chojni.

20 A ntá ch'ín Pilato tjinkaon ch'án chrókjuanjon ch'án kjuachaxin sáchrókjui ch'ín Jesús. A ntá xíkjanchánkíhi ch'án tǐ chojni síin ntiha ínaá.

21 Kjánchó jehe sín antsí má tsen k'óyako sín ntáchro sín kixin:

—ǐTjakékanirá ch'án ntacruz! ǐTjakénkanirá ch'án ntacruz! —ichro sín.

22 Níxin xíkjanchánkí ch'ín Pilato ntáchro ch'án kixin:

—ǐXá nkehe ntoáhya kjuích'e ch'án? Janhan la k'uitjahya ninkehó jiē chóna ch'án chrók'uenxín ch'án. Sǐntakjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

23 Kjánchó jehe sín antsí tsen kjuanchia sín ntáchro sín kixin chrókjuak'enkáni ch'án ntacruz. A ntá k'óyako sín la ko k'óyako tǐ sín nchǎt'á t'etoan ntá kjuacha sín kjuanchia sín tǐ nkehe tsonhen.

24 A ntá ch'ín Pilato kjuanjon ch'án kjuachaxin xíkaha tsonhen tǐ nkehe kjuanchia sín.

25 A ntá kjuanjon ch'ín Pilato kjuachaxin sátsji tǐ ch'ín Barrabás éxi kjuanchia sín, na mé tǐ ch'ín k'uikjéhe sín kixin k'uékje ch'án kjuánínkaon la ko k'uék'óyán ch'án chojni. A ntá ch'ín Pilato kjuanjon ch'án kjuachaxin kixin sátsjiko sín tǐ ch'ín Jesús sinchekjasóte sín ch'án éxi tjinkaon sín.

Kjuak'enkáni sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

26 A ntá tió sákjuíko sín ch'ín Jesús tsjak'enkáni sín ch'án ntacruz, ntá itsé sín ijnko ch'ín tsíkǐxin chjasin Cirene it'in ch'án Simón, mé kjuixín ch'án nontēe ch'án, ntá kjuínchekamá

sín ch'án tí ntacruz tsjak'enkáni ch'ín Jesús la tinkáchréhe ch'án.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjánkama sin ch'án.

²⁸ Kjánchó ch'ín Jesús nkátjá ch'án komá ch'án tí jehe sín kixin tsjánka sín ntácho ch'án kixin:

—Jahará chojni chjin chjasin Jerusalén, chrótsjankamahyará tí janhan. Chrótsjankará kixin tí nkehe tsonhanrá jahará la ko xjanrá.

²⁹ Kixin itsi yaon tsontáchorá kixin náxrjón tí sín chóntahya xjan la ko tí sín kjuínchekokjéhya xjan la ko tí sín kjuínchekakíhya ninkehó xjan.

³⁰ Ntá tsjankixin chojni tsontáche sín tí jna kixin tsoxrátja sín la ko tsontáche sín tjo kixin tsjavá sín.

³¹ Kjónté tí nta yoa la ó sitónhen kaín tíhi la íchá tió chróxamá tí nta la nkehe tí kaá chrókónhen tí nta tsíxamá? —ichro ch'án.

³² Kjaxin sákjuiko sín iyó sín tsíkjasin jie kixin ts'óyángo sín ch'ín Jesús.

³³ Ntá tió kjuíji sín tí jna tikítexín sín tí jna Nta Hueso Kja Chojni, na mé ntiha kjuak'enkáni sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la í jnko la tja ch'án kjon tjejóyáni sín ntacruz kjaxin.

³⁴ Ntá tió kjuixin kjuak'enkáni sín tí ch'ín Jesús tí ntacruz ntá nixjehe ch'án tí It'é ch'án Dios ntácho ch'án kixin:

—It'éni, tónínkakuènhya sín kixin tí nkehe kjuích'eheni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikayehe sín iké ch'án ch'exín sín suerte kixin tsonoexín sín nkexro tsakja tí ka a.

³⁵ Kaín chojni chjasin ntiha tjejótsjehe sín kixin xikaha sitónhen la ko kjaxin tí sín t'etqan tjanoá sín tí jehe ch'án ntácho sín kixin:

—Kjuínchekaá ch'án ókjé chojni, a ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjejá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kuikao sín xranvino náxrjónhya chjéhe sín ch'án chrók'ui ch'án,

³⁷ ntáche sín ch'án kixin:

—Tí jaha chaxín rey kuènte tí sín judío ntá jahvá chrókjuínchekaá asán —ichro sín.

³⁸ Kjaxin ntiha ikja tí ntacruz kjuak'enkáni sín ijnko ntachiso ntsí tsíkjin sín nkíva griego la ko nkíva latín la ko nkíva hebreo ntácho kixin: “Tíha mé Rey kuènte tí sín judío”, ichro.

³⁹ Ijnko tí sín chóna jie tjenkáni ntacruz k'uántaxínhin ch'án tí ch'ín Jesús ntácho ch'án kixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

40 A ntá tí ch'ín jnko a k'uɛtuɛnhen tí í jnko ch'ín a kixin tsotání ch'án, ntáchro ch'án kixin:

—Ntáchrohya xikaha. ¿Á chrakuenhya Dios kixin xikaha ichrúa kixin kjaxin jeheni na ó tjejójtjasóteni?

41 Yóini na nchoxon tjejójtjasóteni tjejójtjenkani tí jie kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

42 Ntá ntáchro ch'án kixin:

—Jesús, xráxinkávan tí janhan tió ts'ayéhé kjuachaxin tsétōan jaha —ichro ch'án.

43 Ntá kjuátehe ch'ín Jesús ntáchro ch'án kixin:

—Chaxín ntáxrjan kixin ijie jaí ts'ejóko kichó ni nkaya nkajní —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

44 Ntá ó chjina chonkixin. A ntá k'uíxin tie kuenté chjasintani hasta las tres kónjín.

45 Ik'uén yaon, la ko tí ka t'inkákuènxín nkaxenhen njnko k'uichje jnkōsiné.

46 Ntá ch'ín Jesús k'uèya ch'án itsen ntáchro ch'án kixin:

—It'èni tjen nkaya nkajní, jaha ts'ayéhé asénni —ichro ch'án.

Xikaha ichro ch'án ntá k'uén ch'án.

47 A ntá k'uíkon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kixin:

—Chaxín tí nkexro la jína la ninkehó jie chóntahya —ichro ch'án.

48 A ntá kaín tí chojni tsíkójnkotsé ntiha k'uíkon sín xikaha kónhen ntá sákjuíxin sín ntiha chakon sín tjate sín ntakuin sín kixin xikaha kónhen.

49 A ntá kaín tí sín chóxin ch'ín Jesús la ko kjaxin tí chojni chjin k'uékinkáchónki sín ch'án tsíkjixín sín estado Galilea ikjín tjejó sín tjejótsjehe sín nkerí sítónhen.

Sákjuíkjavá sín tí ch'ín Jesús

(Mt. 27.57-61; Mr. 15.42-47; Jn. 19.38-42)

50 A ntá ntiha tjen ijnko ch'ín it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etōan kuènte tí sín judío, jehe ch'án mé ijnko nkexro jína.

51 Jehe ch'án kjuák'echónhen ch'án itsi tí kjuachaxin kuènte Dios. Méxra kóxrjienhya ch'án nkexrí kjuích'e tí sín í so t'etōan.

52 Méxra sákjuítsjehe ch'án tí ch'ín Pilato kjuíkjanchia ch'án tí cuerpo kuènte ch'ín Jesús. A ntá ch'ín Pilato kjuanjon ch'án kjuachaxin.

⁵³ Ntá sákjuí sín tsjinkajinxin sín ch'án ntacruz. Ntá kjuixin kjuinkajin sín ch'án ntá kjuínchek'ísímá sín ch'án ijnko ka jié, ntá sákjuíko sín tsoxravá ch'án ijnko tòye xráxín tsíkjich'éna ch'ín José jehó tjo la ko naxa ninkexró tsíxraváhya ntiha.

⁵⁴ Kaín tíha kónhen tí yaon viernes kónjín. Tí yaon mé tjejóyaxinhin sín kixin í séhya tsoxrankixin tí yaon t'ok'éhe sín sábado kixin kohya kjuachaxin sich'e sín ninkehó xra.

⁵⁵ A ntá tí chojni chjin nkáchréhe kjuíkoxín ch'ín Jesús estado Galilea kjaxin sákjuíko sín sákjuítsjehe sín tí tòye tsoxravá ch'án la ko k'uíkon sín jína nkexrí kjuak'e sín tí cuerpo kuènte ch'án.

⁵⁶ A ntá tío kjan sín tí nchia tjejó sín k'óyaxinhin sín kjueyá sín xroan xraxé náxrjón itsa ntoé ch'án kixin xikaha k'uékinkáchónki tí sín judío. A ntá k'ok'éhe sín tí yaon sábado éxí t'etoan tí ley.

24

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

¹ Tí yaon domingo, mé tí yaon xrankíxixín semana tí chojni chjin na xíkjan sín inaá tí tsíxravá ch'ín Jesús sákjuíko sín xroan xraxé tsík'ena sín. La ko í so chojni chjin sákjuíkotoxin sín.

² Ntá ó kjuíji sín ntiha k'uíkon sín tí xro tsíkjèxín tí tòye la í xikahya tjen tí sákjuí sín.

³ Ntá k'uixenhen sín tòye ntá k'uitjahya sín cuerpo kuènte Ìnchéni Jesús.

⁴ Ntá chrakon sín ntá noehya sín nkehe sich'e sín. Ntá xrínahya k'uíkon sín iyó chojni ntoa tjejóxin toté chjinaxón tí tjejó sín, la iké sín la tjákini tsjehe.

⁵ A ntá tí chojni chjin kjuínchek'isén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuènte xritjéyará tí nkexro tjechón tí siín tí sín tsík'en?

⁶ Tjenhya ch'án ntiha la ó xechón ch'án. Xráxinkáonrá nkehe ntáchro ch'án tí kjuák'e ch'án estado Galilea

⁷ ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chóna jié tsjak'enkanı sín ch'án ntacruz la ko tí nixin yaon tsoxechón ch'án inaá —ichro sín.

⁸ A ntá tí síchjin xráxinkaon sín kixin nkexrí tsíchronka ch'ín Jesús,

⁹ a ntá tío kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín.

¹⁰ A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María ìné ch'ín Jacobo la ko tí í so chojni chjin.

11 A ntá tí sín apóstol kuínhin sín éxí ijnko nkehe chaxínhya tí nkehe chrónka tí jehe sín ntá kuítekakonhya sín.

12 Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkijxravá ch'ín Jesús. Ntá kjuíji ch'án k'uíkon ch'án tí nkaxenhen tòyē k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xíkaha tsíkónhen.

Tí ntia Emaús sákjuí sín la kjuíjichréhe Ìnchéni
(Mr. 16.12-13)

13 A ntá tí yaon a iyó sín sákjuí sín ijnko chjasin ntsí it'in Emaús, mé kjínxin tejnko kilómetro tí chjasin Jerusalén.

14 Tinkákjo sín kichó sín kixin kaín tí nkehe tsíkónhen tí chjasin Jerusalén.

15 A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án.

16 Kjónté k'uíkon sín ch'án la kjuanjonhya Dios kjuachaxin kixin chrókjuatsōan sín tí jehe ch'án.

17 A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntia? ¿Nkekuènte kixin t'avará? —ichro ch'án.

18 A ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

19 A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkijxin ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxin ch'án kjuachaxin kuènte nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xíkaha k'uíkon Dios la ko k'uíkon tí chojni.

20 A ntá tí nchat'á t'etōan la ko tí sín gobierno kjuínchek'áyéhe sín ch'án kixin its'en ch'án la tsjak'enkanı sín ch'án ntacruz.

21 A ntá jeheni k'uejóchónhenni kixin jehe ch'án chrókjuinchekaá ch'án tí sín Israel. A ntá jie ó chóna iní yaon xíkaha kónhen.

22 A ntá iso chojni chjin kjaxin k'uékinkáchónki sín ch'án kjuínchechrakon sín tí jeheni kixin jehe sín tsíkijtsjehe sín tí tsíxravá ch'án imá nchítjén

23 la mé tsík'itjahya sín tí cuerpo kuènte ch'án, ntá kjan sín chrónka sín kixin tsík'íkon sín iyó sín ángel chrónka sín kixin ch'ín Jesús la tjechón ch'án, ichro sín.

24 Ntá tuénxín iyó tí sín k'uájikoni kjaxin sákjuitsjehe sín tí tsíxravá ch'án la kuik'itja sín éxí chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

25 Ntá kjuátēhe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uéjé ósé.

26 ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'uetōan ch'án? —ichro ch'án.

27 Ntá kjuankíxin ch'án chronkaxín ch'án nkexrí t'axrjexín kaín tí nkehe nixja xroon itén Dios kixin nkehe tsonhen tí jehe ch'án la mé kjuankíxixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

28 Ntá kjuíji sín tí chjasin ntsí a, a ntá ch'ín Jesús tsjehe ch'án éxí naxá sáchrókjui ch'án kjin.

29 A ntá jehe sín mé chronóēhe sín ch'án kixin ntahó chrókuitōhe ch'án, ntáchro sín kixin:

—Titōha ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uíxenhén ch'án nchia kixin tsitōeko sín ch'án.

30 A ntá tjejótjaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'ō ch'án kuákja tí jehe sín.

31 Ntá tuénxín xraxinkaon sín ntá kjuátsōan sín tí jehe ch'án. Ntá tuénxín k'uitjáyankoá ch'án.

32 Ntá jehe sín itjo sín kichó sín ntáchro sín kixin:

—¿Á chaxínhya chéhe asénni tí kuikaoni ch'án ntia kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

33 Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín.

34 A ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

35 Ntá jehe sín kjaxin chrónka sín nkehe tsíkónhen tí ntia sákjuí sín kixin nkexrí kjuátsōanxín sín tí ch'ín Jesús tí kóchrít'ō ch'án niotja kjuanjon ch'án.

*Titàya k'uíkuèn sín ikui ch'ín Jesús
(Mt. 28.16-20; Mr. 16.14-18; Jn. 20.19-23)*

36 **A** ntá jehe sín naxa tjejójtjo sín kaín tí nkehe tsíkónhen, a ntá xrínahya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

37 **A** ntá jehe sín la imá chrakon sín kjuenkayáxin sín kixin k'uíkon sín ijnko xrintoe chojni.

—Ách'e kjuachani —ichro sín.

38 **A** ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xikaha tjenkayáxin asánrá?

39 Tsjehérá tjaná la ko totená kixin chaxín janhan. Itserána la ko komárána, kixin ijnko xrintoe chojni chóntahya nto la ko chóntahya hueso éxí t'ikonrá kixin chonta janhan —ichro ch'án.

40 **A** ntá xikaha ichro ch'án ntá kjuako ch'án itja ch'án la ko toté ch'án.

41 Ntá kjónté xikaha k'uíkon sín la naxa kuítekakonhya sín kixin chéhe sín la ko chrakon sín. **A** ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

42 Ntá chjéhe sín ch'án it'o koche tsíchjántaón xrohi la ko ijnko t'o katjé kotsjenta tjiá tsjen.

43 **A** ntá jehe ch'án kuákja ch'án kjóne ch'án k'uíkonxín kon sín.

44 Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

45 Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé.

46 Ntá chénka ch'án sín kixin:

—Mé xikaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án.

47 **A** ntá t'ichjánxin tsjakoxin sín ihnjé ch'án tsjankíxixín sín chjasin Jerusalén la ko chrókuinhin chojni kuenté chjasintajni kixin chrókuítóhe sín ijje sín chrókuitekaon sín tí jehe ch'án kixin jehe ch'án mé chrókjuincheyaon tí ijje sín.

48 **A** ntá jahará mé tsochronkaxínrá kixin xikaha k'uíkonrá kaín tíha.

49 Ntá tsochr'an janhan tí Nchakuen T'aná éxí tsíntáchro ch'án. Kjánchó chjasin Jerusalén ntahó titohará tsoxiteyája ts'ayéhérá kjuachaxin tsixin nkaya nkajni.

Ch'ín Jesús sákjuí ch'án nkaya nkajní

(Mr. 16.19-20)

⁵⁰ A ntá ch'ín Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín.

⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní.

⁵² A ntá jehe sín k'uíkon sín xíkaha, a ntá xraxinkaon sín ch'án, ntá kjan sín chjasin Jerusalén chéhe sín.

⁵³ A ntá kaín yaon tjejó sín nkaxenhen nínko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naxa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha.

² Tí xrankíxixín na mé tí nkexro xráxín kjuák'eko Dios

³ la ko kjuachaxin kuènte ch'án na mé k'ónaxín kaín xín nkehe siín jie. A ntá kohya ninkehó nkehe k'ónakoá, na mé kaín xín nkehe siín na mé k'ónaxín tí kjuachaxin kuènte ch'án.

⁴ Jehé ch'án na mé kjuanjon kjuachaxin kaín nkehe síchón siín chjasintajni la ko jehe ch'án mé xrohi t'inkaséyanxínhin jnkojnko ntje chojni chjasintajni.

⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

⁶ Ntá kjuák'e ijnko chojni k'uetuēnhen Dios kui mé it'in ch'án Juan.

⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kíxin kaín xín chojni chrókuitekaon sín tí tjechrónka ch'án a.

⁸ A ntá tí ch'ín Juan la jehya tí xrohi a. Ó k'uítuēnhón ch'án kui ch'án kíxin tsochrónka ch'án nkerí kuènte tí xrohi a.

⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkjich'énaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naxa kjuátsəanhyá sín ch'án.

¹¹ Ikui ch'án tí tjejó tí sín judío k'uaxrjeníxin ch'án, kjánchó kuítekakuenhya sín ch'án.

¹² A ntá tí sín kuítekaon sín ch'án mé k'uáyéhe sín kjuachaxin kíxin ts'óna sín xjeen Dios.

¹³ Ntá yóehya ts'axrjeníxin sín it'é sín chjasintajni ntihyó la ko yóehya ijnko it'é chrókjuenkayáxin ch'án chrókjuich'éna ch'án ijnko xjan. Náhí. Dios mé kjueyá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uetjuèhé ch'án chojni chjasintajni la ko imá ntoá chrónka ch'án. Kuayeni k'uíkonní kíxin imá t'ətoan ch'án kíxin jehe ch'án mé tí jnkokoáxón Xjeen It'eni tjen nkaya nkajní na mé xikaha imá t'ətoan ch'án.

15 Ch'ín Juan mé chrónka ch'án nkexrí tjen tí nkexro a. Ntáchro ch'án kixin:

—Senó k'uékjákohará kixin chr'éxín tsi tí nkexro a, na mé antsí má t'etəan ch'án, a ntá janhan la náhí kixin tí janhan naxa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

16 Kaínni ó k'uáyéheni tí kjuachaxin jié tjetjanjon ch'án la ko antsí má tjencheyaonni ch'án la ko tjencheyaonni ch'án.

17 Dios mé tsík'etuənhen ch'ín Moisés kixin tsokjin ch'án tí ley. A ntá Inchéni Jesucristo mé kjuəkoxín ch'án kixin nkexrí imá tjuéhé Dios tí chojni chjasintajni. A ntá kaín nkehe chrónka ch'án mé antsí ntoá.

18 Kohya ninkexró chjasintajni k'uúkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajni.

*Ch'ín Juan mé chrónka ch'án nkexrí tjen ch'ín Jesús
(Mt. 3.11-12; Mr. 1.7-8; Lc. 3.15-17)*

19 Iso tí sín judío k'uéjó sín chjasin Jerusalén na ntá ichr'án sín iso chojni nchət'á la ko iso tí sín levita, ikui sín kuinixjehe sín tí ch'ín Juan kjuanchankíhi sín ch'án kixin:

—¿Nkexro tí jaha? —ichro sín.

20 Ntá kjuínchemáhya ch'án, ntáchro ch'án kixin:

—Náhí. Jehya janhan tí Cristo —ichro ch'án.

21 Ntá xíkjančankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkjatəhe ch'án ntáchro ch'án kixin:

—Náhí. Jehya janhan Elías —ichro ch'án.

Ntá xíkjančankíhi sín ch'án inaá kixin:

—¿Á jaha tí nkexro tjejóčónhenni itsi tsochrónka itén Dios? —ichro sín.

Na ntá ntáchro ch'ín Juan inaá kixin:

—Náhí. Janhya —ichro ch'án.

22 Ntá kjuanchankíhi sín ch'án inaá kixin:

—¿Ntá nkexro jaha? T'ichjánxín tsoñohehi tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

23 Ntá kjuátəhe ch'ín Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Takitjehérá ijnko ntia ntoí tsixín Inchéni” —mé xíkaha ichro ch'án kjuátəxín ch'án itén ch'ín Isaías k'uéchrónka xroon itén Dios ósé.*

24 A ntá tí sín fariseo mé tsíchr'án tí jehe sín kuikjančankíhi sín tí ch'ín Juan.

* 1:23 Isaías 40.3

25 A ntá kjuanchankíhi sín ch'án kixin:

—Ó ntáchrua kixin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uéchrónka itén Dios ósé. ¿A ntá nkekuènté tíkite chojni tí xikaha? —mé ichro sín.

26 Ntá ntáchro ch'ín Juan kixin:

—Janhan na mé ìntà ó tíkítexián chojni. Ó ntihi tjenkákjan ijnko nkexro naxa jtásoanhyará.

27 Jehe ch'án mé tsi ch'án nóton tí janhan. A ntá antsí má t'etóan ch'án, a ntá janhan na kénhyó. A ntá tósuàna chrókjuasíntanká tí correa tokaté ch'án —ichro ch'án.

28 Kaín tíha mé tsíkónhen tí chjasin it'in Betábara tí nó tjitoxin yaon tóhe tí ntario Jordán tí kjuák'e ch'ín Juan kuikite chojni.

Ch'ín Jesús na mé éxí yóhé ijnko kolélo kuènte Dios

29 A ntá tí yaon chr'éxin mé k'uíkon ch'ín Juan kixin ó tjekui ch'ín Jesús. Ntá nixjehé ch'án tí sín tsíkóchjina ntáchro ch'án kixin:

—Tsjehérá tí nkexro tjekui mé tí Kolélo kuènte Dios jehe ch'án. Tíha mé tsjìnxín ijíe chojni chjasintajni.

30 Janhan mé k'uéxrjanka kixin tí iton tí janhan mé tsichréhe ijnko nkexro antsí t'etóan, a ntá janhan la kénhyó tétóan kixin naxa kohyana na jehe ch'án la ó xráxín tjen ch'án.

31 Kjaxin janhan naxa chonhya nkexro tíha. A ntá xra ó k'uinka kjuak'é kuikítexián chojni ìntà kixin tí chojni naciòn Israel mé chrókjuátsoanxín sín ch'án —ichro ch'ín Juan

32 Kjuintaxín ntáchro ch'ín Juan kixin:

—Ó k'uíquàn kixin tí Nchakuen Dios mé k'uínkajinxin nkaya nkajní na éxí yóhé ijnko kontóá k'uínkajin la ko kjuák'e va ntoí tí tjen ch'án.

33 A ntá janhan kjaxin naxa chonhya nkexro tíha. A ntá tí nkexro k'uetuanna kixin tsjak'é tsíkítexián chojni ìntà mé tsíchronka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsóanxián janhan kixin tí nkexro a mé tsíkítexín ch'án Nchakuen Dios chojni.

34 A ntá janhan jie mé ó k'uíkonxín kuàn kixin xikaha kónhen tí jehe ch'án, a ntá xrjankaxián kixin táha mé Xjeen Dios tíha —mé xikaha chrónka ch'án.

Tí sín saxín kjueyá ch'ín Jesús

35 Tí yaon chr'éxin kjuák'e ch'ín Juan la ko iyó tí sín k'uájiko ch'án,

36 a ntá xrínahya k'uíkon ch'án k'uátsínka ch'ín Jesús. Ntá ntáchro ch'ín Juan kixin:

—Tsjehérá tí nkexro i mé tí Kolélo kuènte Dios —ichro ch'án.

37 Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús.

38 Ntá kuinkátjía ch'ín Jesús k'uikon ch'án kixin tinkáchréhe sín ntá kjuanchankíhi ch'án sín kixin:

—¿Xá nkehe xritjéyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

39 Ntá kjuátehe ch'án ntáchro ch'án kixin:

—Íntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uikon sín nketí nchia kjuák'e ch'án ntá k'uéjoko sín ch'án kuenté tí kónjín kixin kjuíji sín ntiha como las cuatro kónjín.

40 A ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chónka ch'án ijnko savé mé it'in Simón Pedro.

41 Na ntá tuénxín tí ch'ín Andrés sákjuíkjejá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexín kixin Cristo.

42 A ntá ch'ín Andrés mé kujkao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sintak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrjexín kixin ixro tíha.

Ch'ín Jesús mé kjejá ch'án tí ch'ín Felipe la ko tí ch'ín Natanael

43 A ntá tí yaon chr'éxín mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kixin:

—Chr'éhé tí janhan —ichro ch'án.

44 A ntá tí ch'ín Felipe mé chjasén ch'án mé it'in Betsaida tí chjasén ch'ín Andrés la ko ch'ín Pedro.

45 Ntá tí ch'ín Felipe mé sákjuíkjejá ch'án tí ch'ín Natanael na ntá chénka ch'án kixin:

—Ó k'uitjani tí nkexro tsi éxí k'uéchrónka tí ch'ín Moisés tí tsíkjin ch'án tí xroon chrónka tí nkehe k'uetoan Dios. Kjaxin tí sín k'uéchrónka tí itén Dios chr'éxín mé k'uéchrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

46 A ntá ntáchro ch'ín Natanael kixin:

—¿Xá kjuánchí má chrókójína tí nkehe chrók'uaxrjexín tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kixin:

—Xrákiá ts'íkuan —ichro ch'án.

⁴⁷ Na ntá k'uíkon ch'ín Jesús kíxin ó kui tinkákóchjina ch'ín Natanael, na ntáchro ch'án kíxin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankíhi ch'án tí ch'ín Jesús kíxin:

—¿Nkexrí kíxin tjátsɔanna? —ichro ch'án.

Ntá kjuátehe ch'ín Jesús ntáchro ch'án kíxin:

—Naxa nixjaahya tí ch'ín Felipe mé k'uíkuan tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kíxin:

—Maestro, jaha la chaxín tí Xjeen Dios tjen nkaya nkajní tsétuɛnhén tí nacióon Israel —ichro ch'án.

⁵⁰ Ntá kjuátehe ch'ín Jesús ntáchro ch'án kíxin:

—Jehya tí nkehe ntáxrjan k'uíkuan tjenkankiá nta t'óna to higo, jehya táhó tsítekákonxian. Náhi. Chr'éxin xiki í jnko kjuaxroan antsí má jié ts'íkuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kíxin:

—Ijnko nkehe ntoá tsoxrjanka kíxin tsoxitjehe tí nkajní ts'ikonrá itsi itsjé tí sín ángel kuente Dios mé ts'it'ótjen la ko ts'inkajin tí tjén janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí ìné ch'ín Jesús tsík'íyehé sín tjan la ntiha tjen tjan koí.

² Kjaxin tsík'íyehé sín tí ch'ín Jesús la ko tí sín k'uájiko ch'án kíxin sátsji sín tí tsíkótehe sín ntiha.

³ Ntá ó tsík'ankehé sín tí xranvino ik'uí sín na ntá tí ìné ch'ín Jesús mé ntáche tjan tí jehe ch'án kíxin:

—Ó tsík'ànkə xranvino its'i sín —ichro tjan.

⁴ Ntá ntáchro ch'ín Jesús kíxin:

—Naná, ¿nkehe tsonhen chronka? Naxa kjuixrakáhya tí yaon tsjásian kjuaxroan —ichro ch'án.

⁵ A ntá tí ìné ch'án na mé ntáche tjan tí sín ch'e xra kíxin:

—Tí chrén nkehe chrók'uetuanhanrá ch'án chrókjuinchexiteyará —ichro tjan.

⁶ A ntá síin ntiha injon ch'í tsík'óna xro na mé tíha tjiá ntá t'ònti sín kíxin xikaha mé ts'axrjehe tí jié chóna sín koí, mé xikaha kuinkáchónki tí sín judío. Na mé jnkojnko ch'í mé tjacha tikia ochenta litro la o ciento litro ntá.

⁷ Ntá k'uetuɛnhen ch'ín Jesús tí sín ch'e xra kíxin:

—Tíkjará ntá kaín tí ch̄i a tsokaón —ichro ch'án.

Ntá kjuínchexiteyá sín kjuínchekaón sín ntá jnkojnko tí ch̄i a.

⁸ A ntá ntáche ch'ín Jesús tí jehe sín inaá kixin:

—Tákjá intsí ntá tjiá ch̄i tjikuehé tí ch'ín t'etoan tí kia a —ichro ch'án.

Ntá xikaha kjuích'e sín kjuínchexiteyá sín.

⁹ A ntá tí ch'ín t'etoan tí kia a mé tsjexín ch'án tí ntá tsík'óna xranvino kjónté noehya ch'án nketí kuixín tí xran a. Jehó tí sín ch'e xra kuikao sín mé nohe sín kixin jehe sín mé tsíkakitsje sín ntá. Ntá tí ch'ín t'etoan mé k'uíyehē ch'án tí ch'ín tsíkótehe.

¹⁰ Ntáche ch'án kixin:

—Xrácín tí sín tjasin kia la senó tí xranvino náxrjón tjanjon sín na tió chrók'uihya tí sín tsíkóchjina na ntá tjanjon sín tí xranvino náxrjónhya. A ntá jaha la náhi. Senó kjuakéchjina tí xranvino antsí má náxrjón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuích'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxin ch'án nkexri imá jie tí kjuachaxin kuente ch'án, a ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uátsínka kia, a ntá sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí nínko jie

(Mt. 21.12-13; Mr. 11.15-18; Lc. 19.45-46)

¹³ A ntá ó kuichjina tí yaon kia kuente pascua kuente tí sín judío. Ntá ch'ín Jesús sákjuí ch'án chjasin Jerusalén.

¹⁴ Ntá nkaxenhen tí nínko jie ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjejótjaxin tí sín tjinkíxixín chichaon.

¹⁵ Ntá ch'ín Jesús mé kuákja ch'án ihno tsíxehe sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen nínko kaín xín sín la ko tí kolélo la ko tí koxinta. Na ntá tí ntamesa tjinkítóxixín sín tí chichaon mé kótéka ch'án tsíkjaminkí xènjín tí chichaon a.

¹⁶ Ntá k'uetuēnhen ch'án tí sín nchekji tí kontóá a kixin:

—Takítsjerá kaín tí nkehe a. Ch'énahyará ijnko ntasin tí ntōe T'aná ntihi —ichro ch'án.

¹⁷ Ntá xrácínkaon tí sín k'uájiko ch'án ti nkehe tsíkjin sín ósé kixin: “Éxí xrohi k'uákjen asenná nínkavan kixin tí ntōa tjikosáyehya sín.” *

¹⁸ Ntá tí sín judío mé kjuanchankíhi sín ch'án kixin:

—¿Xá nkerí kjuaxroan tsjásixián tsjákoxian nketí kjuachaxin chonta kixin xikaha kjuích'e tíhi? —ichro sín.

* 2:17 Salmo 69.9

19 Ntá kjuátēhe ch'ín Jesús kíxin:

—Tí ts'oxíkará tí n̄nko i ntá iníkoá yaon la ó s̄it'ána n̄ixin tsjak'e inaá —ichro ch'án.

20 Na ntá ntáchro tí sín judío a kíxin:

—Cuarenta y seis nánó k'uéjó sín kjuích'éna sín tí n̄nko i, a ntá jaha ntáchrua kíxin iní yaon koá s̄ich'éna inaá, ichrua —ichro sín.

21 Kjánchó kienxínhya sín kíxin tí n̄nko ntáchro ch'ín Jesús la tí cuerpo kuente ch'án.

22 Ntá tió kjuixin xechón ch'án ntá xráxinkaon tí sín k'uájiko ch'án kíxin x̄ikaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

23 Tió kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kíxin ó k'uíkon sín tí kjuaxroan kjuasin ch'án.

24 Kjánchó ch'ín Jesús la kuítekakuenhya ch'án tí jehe sín kíxin jehe ch'án la ó nohe ch'án jína nkexrí tónhen asén jnkojnko chojni

25 a ntá t'ichjánx̄ienhya ch'án kíxin ninkexró chróchenka ch'án nkexrí tjenkayáxin chojni kíxin ó kónohe ch'án kaín nkehe tónhen asén kaín xín chojni.

3

Ch'ín Nicodemo kuinixjehē ch'án tí ch'ín Jesús

1 Kjuák'e ijnko ch'án kuente tí sín fariseo a mé it'in ch'án Nicodemo. Jehe ch'án mé ijnko nkexro imá tjetoan kuente tí sín Israel.

2 A ntá ijnko tie kjuíchréhe ch'án tí ch'ín Jesús a nixjehē ch'án ntáchro ch'án kíxin:

—Maestro, kónoheni kíxin It'éni tjen nkaya nkajní mé tsíchr'án k'uinka tsjákohéni kíxin tí jehya Dios chrókjuak'ekoa la xitjahya chrókjuásian kjuaxroan jíé —ichro ch'án.

3 Ntá kjuátēhe ch'ín Jesús ntáchro ch'án kíxin:

—A ntá tsotjonka ijnko nkehe imá tjetoan. Tí nkexro tsokjéhya n̄ixien mé xitjahya ts'ikon tí kjuachaxin ts'et̄oan Dios —ichro ch'án.

4 A ntá ch'ín Nicodemo kjuanchankí ch'án ntáchro ch'án kíxin:

—Ó tádana, ¿nkexrí chrókokjína n̄ixien? ¿Á chrók'uix̄anhan tsee naná inaá ntá chrókokjína n̄ixien ní? —ichro ch'án.

5 Ntá kjuátēhe ch'ín Jesús ntáchro kíxin:

—Ntá tsotjonka ijnko nkehe imá tjetoan. Jehó tí sín tsíkokjéxín ntá la ko k̄j̄axin tsíkokjéxín Nch̄akuen Dios mé ts'áyehē sín tí kjuachaxin kuente Dios.

⁶ Tió ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsokjéxín nìxien ijnko chojni na ntá ts'áyéhe sín tí Nchakuen Dios a.

⁷ Chrakonhya tí nkehe xrjanka kíxin “Kaín chojni t'ichjánxin tsokjíhi nìxien.”

⁸ Éxí yóhe tí tinhín tí chjéhe xrínto ntá noahya nketí kuixín tí xrínto la ko noahya nketí sátsji na mé kjaxin xikaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xíkjanchankí ch'ín Nicodemo ínaá kíxin:

—¿Nkekuènté kíxin xikaha chrókónhen? —ichro ch'án.

¹⁰ Ntá kjuátēhe ch'ín Jesús ntáchro ch'án kíxin:

—¿Jaha ijnko maestro imá t'etōan tí naciōn Israel ntá naxa tiénxinhya tí nkehe ní?

¹¹ Chaxín tjétjonka tí nkehe nōna la ko tí nkehe k'uíquān ntá titekákonnahya jaha.

¹² Tí nkehe tjétjonka la kuènte chjasintajni ó ntá kjónté la titekákonnahya jaha. ¿Ntá nkexrí chrókuítekávān tí chrótjonka nkehe kuènte nkaya nkajní?

¹³ Kohya íjnko nkexro k'uit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixín ch'án.

¹⁴ Éxí yóhe ch'ín Moisés tió k'uíxin sín tí nteje, a ntá Dios mé k'uetōan kíxin sinchekjangoya ch'án ijnko konche tsjak'enkani ch'án ijnko nta, ntá xikaha kjuích'e ch'án kjuak'enkani ch'án tí konche tí nta a komá sín tí konche ntá kuaá sín k'uénhya sín, * mé xikaha tsonhen tí Xjeen Dios K'óna Chojni mé t'ichjánxin kíxin tsjak'enkani ch'án ijnko ntacruz

¹⁵ kíxin mé xikaha kaín nkexro tsinkáchónki tí jehe ch'án mé tsaá sín tsochónta sín kjuachón jnkochrín.

Dios imá tjuèhe ch'án tí chojni chjasintajni

¹⁶ 'Kíxin Dios mé imá tjuèhe ch'án chojni chjasintajni ntá kjuanjon ch'án jnkokoáxón Xjeen ch'án, kíxin ntá jnko-jnko chojni tsinkáchónki tí Xjeen ch'án mé ts'itjāyanhya sín tsochónta sín kjuachón jnkochrín.

¹⁷ Chr'ánhya Dios tí Xjeen ch'án chjasintajni kíxin sinchekjasóte chojni kíxin tí jie kjuasin sín. Náhi. Ó jehí ichr'án ch'án tí Xjeen ch'án chjasintajni kíxin sinchekaá chojni.

¹⁸ Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitōexín Dios tí ijje sín tsjasóte sín kíxin titekakuenhya sín tí jnkokoáxón Xjeen Dios.

¹⁹ Na mé xikaha Dios sinchekjasóte sín jnkochrín kíxin ó kui tí nkexro t'inkaséyanxín chjasintajni na kjónté ntá antsi

* 3:14 Números 21.9

má tóxrjínhjn sín tí sítié a. **A** ntá tí t'inkaséyan la náhí kixin naxa tóxrjínhjn sín tí nkehe jínahya tjejóch'e sín.

²⁰ Kaín tí sín tjejóch'e nkehe jínahya na mé tóxrjienhya sín t'inkaséyan chrókóchjinehya sín kixin tsonoxínhya tí nkehe jínahya tjejóch'e sín.

²¹ **A** ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuènte Dios kixin tsonoxín tí nkehe ch'e sín kixin ntá kaín xín chojni mé tsjatsqan sín kixin tjejóch'e sín tí nkehe tóxrjínhjn Dios.

Ch'in Juan Bautista chrónka inaá kuènte ch'in Jesús

²² Na ntá chr'éxin ch'in Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuikite ch'án chojni.

²³ Kjaxin ch'in Juan kjuák'e ch'án chjasin Enón chjino tí chjasin Salim na mé ntiha kjuák'e kuikite ch'án chojni kixin ntiha mé yeé ntá síín. Na ntá nkáki sín kuikite sín.

²⁴ Mé xikaha kónhen naxa kjuák'echjinahya ch'in Juan.

²⁵ Ntá tí sín k'uájiko ch'in Juan la ko tí sín judío mé kjuachaxin kichó sín kixin nkexrí íchá jína chrókótjuáxin chojni, ichro sín.

²⁶ **A** ntá tí sín k'uájiko ch'in Juan sákjuítsjehe sín ch'án chénka sín ch'án kixin:

—Maestro, tí ch'in kjuák'ekoa tóhe ntario Jordán, na mé tí nkexro tsíchronka kuènte ch'án, la mé itjen ch'án tikite ch'án chojni la ko kaín xín chojni mé tjichréhe sín ch'án —ichro sín.

²⁷ Na ntá ntáchro ch'in Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni.

²⁸ Ó kuínhínra ntoá k'uéxrjanka senó kixin janhya tí Cristo. Náhi. Janhan ó kuítuannuá kuítónxián ntia tsoxrjanka kixin ó tsi ch'án.

²⁹ Éxí yóhe ijnko ch'in tsotehe na mé jehe ch'án mé ts'áyéhe ch'án tí ichjién ch'án. **A** ntá tí ch'in chóxin ch'án mé chéhe asén ch'án tjetinhin ch'án tjenixja tí ch'in ts'áyéhe ichjién a. Mé xikaha janhan imá chàna kixin xikaha sítónhen kixin itsjé chojni sítóchjinehe sín tí ch'in Jesús tsínhin sín nkehe tí tjenixja ch'án.

³⁰ **A** ntá jehe ch'án t'ichjánxin antsí ts'etqan ch'án. **A** ntá janhan la kénhyó —mé chro ch'in Juan.

Tí nkexro kuixin nkaya nkajní

³¹ Tí nkexro kuixin nkaya nkajní mé kaín nkehe t'etuénhen ch'án. **A** ntá ijnko chojni kuènte chjasintajni ó mé chrónka kuènte chjasintajni ó. **A** ntá tí nkexro kuixin nkaya nkajní mé kaín nkehe t'etuénhen ch'án.

³² Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án.

³³ A ntá jnkójín nkexro titekaon sín tí nkehe chrónka ch'án na mé xíkaha tjakoxin ch'án jie kixin chaxín ntoá chrónka Dios

³⁴ kixin tí nkexro ich'án Dios mé nixja itén Dios kixin jehya intsíkoá tí Nchakuen Dios k'uáyéhe ch'án. Náhí.

³⁵ It'eni Dios mé tjuèhe ch'án tí Xjeen ch'án na mé xíkaha ó tsíchjéhe ch'án kjuachaxin kixin kaín xín nkehe ts'etuēhen ch'án.

³⁶ A ntá tí nkexro tsitekaon tí Xjeen Dios mé xíkaha tsochónta sín tí kjuachón jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xíkaha. Tí sín a mé Dios sinchekjasóte sín jnkochrín.

4

Ch'in Jesús ikjo ch'án ijnko tjan samaritana

¹ A ntá tí sín fariseo mé kónohe sín kixin antsí tsjé chojni chréhe sín tí ch'in Jesús kuikite ch'án sín na ntá tí chojni chréhe sín tí ch'in Juan la kánhyó tsjé sín.

² Kjánchó jehya ch'in Jesús kuikite ch'án chojni. Méxra tí sín k'uájiko ch'án mé kuikite sín chojni.

³ A ntá tió kónohe ch'in Jesús kixin xíkaha tsíkinhin tí sín fariseo ntá k'uaxrjexín ch'án tí estado Judea xíkjan ch'án estado Galilea inaá.

⁴ Ntá t'ichjánxin ts'átsínka ch'án estado Samaria.

⁵ A ntá kjuíji ch'án ijnko chjasin mé it'in Sicar kuēnte estado Samaria, mé chjino tí nonte tsíkjinchekitonhen ch'in Jacob tí xjeen ch'án José.

⁶ La ó chjino tjen tí tòye takitsje chojni inta mé it'in Ìnté Jacob. Na ntá ó chonkixin kjuí sín ntiha. Méxra tí ch'in Jesús la imá kóxrjé ch'án kixin imá kjín tí ntja kjuixin ch'án ntá kjuák'etjaxin ch'án chrínta tí tòye takitsje sín inta.

⁷⁻⁸ Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuik'ena sín nkehe sineko sín ch'án. Ntá séhyó ikui ijnko tjan kuēnte estado Samaria ikui tjan tsakitsje tjan inta. Ntá ntáchro tí ch'in Jesús kixin:

—Chjina intsí ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'in Jesús kixin:

—¿Nkekuènté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xíkaha kjuanchankí tjan kixin tí sín judío mé ninkehó t'ikonhya tí sín samaritano.)

10 Na ntá ntáchro ch'ín Jesús kixin:

—Chrókónoha tí nkehe tjanjon Dios la ko chrókjuatsōan jaha nkexro tí tjetjanchaha ntā ntá chrókjuanchana ntā, ntá chrótjaha tí ntā tjechón chaxín —ichro ch'ín Jesús.

11 Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntā kixin tí tòye i la imá ninka? ¿Ntá nkexrí tsochjina tí ntā tjechón tjemé?

12 Tí nkexro k'uaxrjeníxinni mé Jacob mé kuítóeheni tí tòye tjiá ntā ntihi la ko kjaxin ik'uí ch'án tí ntā la ko kjaxin ik'uí tí xjeen ch'án la ko tí iko kuènte ch'án. ¿A ntá xá jaha la xá antsí má tjetōan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

13 Na ntá kjuátēhe ch'ín Jesús ntáchro ch'án kixin:

—Tí sín it'i sín tí ntā ntihi tí tòye i nántaxón its'en sín ntā inaá.

14 A ntá tí sín its'i sín tí ntā sintakitonhan sín mé í ts'enhya sín ntā inaá. Tí ntā sintakitonhan sín mé ts'óna éxí yóhe ijnko ntā ts'axrje nkaya asén sín mé tsinkákjanjon tí kjuachón tsochónta sín jnkochrín —ichro ch'án.

15 Ntá ntáchro tí tjan a inaá kixin:

—Chjina tí ntā, a ntá ts'énhyana ntā inaá la ko ts'inkahya ntihi tsakítsje ntā —ichro tjan.

16 Ntá k'ueṭōan ch'ín Jesús kixin:

—Sátjia tjík'iyehé xiá ntá ts'inkará ntihi inaá —ichro ch'án.

17 Ntá ntáchro tjan kixin:

—Chontahya xíná —ichro tjan.

Ntá ntáchro ch'ín Jesús kixin:

—Chaxín ntáchrua kixin chontahya jaha xiá.

18 K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrua kixin chontahya xiá chaxín —ichro ch'án.

19 Na ntá kuínhin tjan tíha ntá ntáchro tjan kixin:

—T'íkuan kixin jaha ijnko nkexro chrónka itén Dios.

20 A ntá tí sín k'uaxrjeníxinni k'uixin ósé mé k'uéxraxinkakonxín sín Dios tí jnā ntihi. Kjánchó jahará chojni judío mé ntáchrorá kixin tí njnko jie chjasin Jerusalén kaín ni chróxraxinkakonxínni Dios —ichro tjan.

21 Ntá ch'ín Jesús ntáche ch'án tjan kixin:

—Títekáván kixin tjetsi tí hora a tsoxráxinkákonxínhyará It'éni Dios tí jnā ntihi la ko tsoxráxinkákonxínhyará ch'án chjasin Jerusalén kjaxin.

22 Jahará chojni samaritano chonhyará tí nkexro xráxinkáonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjihin chojni tí jie yámá sín mé ts'axrjeníxin tí sín judío.

23 Ntá tjetsi tí hora a na mé tí jie ó kui tí hora a na tí sín chaxín tjinkaon sín chrórxaxinkaon sín It'eni la mé asén sín ó tsoxraxinkakonxín sín It'eni Dios. Dios mé tóxrjínhín ch'án kixin chojni xikaha chrókjuich'e sín chrórxaxinkakonxín sín ch'án.

24 Jehé Dios na mé nchakuen ó, a ntá tí sín chrórxaxinkaon sín ch'án na mé t'ichjánxín kixin asén sín ó tsoxraxinkakonxín sín ch'án —mé xikaha chrónka ch'ín Jesús.

25 A ntá ntáchro tí tjan a kixin:

—Ó nòna kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

26 Ntá ntáchro ch'ín Jesús kixin:

—Tí nkexro a la mé janhan tjétjuá jie —ichro ch'án.

27 Na ntá tí sín k'uájiko ch'án mé kjanxín sín tí chjasin a, ntá chrakon sín k'uúikon sín kixin tjenixjehé ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjinkaon ch'án na nkekuèté nixjehé ch'án tí tjan a.

28 A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kixin:

29 —Íntará sátsjitsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókó Jehya tí nkexro i Cristo? —ichro tjan.

30 Na ntá tí chojni a mé xrákuaxín sín tí chjasin a ntá kuitsjehe sín tí ch'ín Jesús.

31 Naxa tihya sín nachrohe tí sín k'uájiko ch'án mé chrónóehé sín ch'án ntáchro sín kixin:

—Maestro, kjaxian chrókjónte nkehe —ichro sín.

32 Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

33 A ntá tí sín k'uájiko ch'án mé kjuanchankíhi sín kíchó sín kixin:

—¿Xá jnkójín sín tsíkikao sín nkehe kjóne ch'án? —ichro sín.

34 Kjánchó ntáchro ch'ín Jesús kixin:

—Éxí yóhe chrókjoné nkehe mé tí sít'a tí xra la ko tsjixinna tí xra kuènte tí nkexro chr'ánna k'uinka.

35 Ntáchrorá kixin: “Noó nitjó naxa t'itjáyan tsochónhenni ntá tsotjáni noatrigo”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxámá kixin ó jína chrótjáni.

36 Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyehé kjuachón jnkochrín. Ntá tí sín k'uenká sín nonte la ko tí sín tjá sín jnkokón tsochéhe sín.

37 Mé xikaha tsoxiteyá tí nkehe ntáchro sín kixin: “Ijnko nkexro mé t'enka noa, a ntá ókjé sín tsotjá sín tí noa a”, ichro sín.

38 **A** ntá janhan ichr'an tí jahará tsotjará ijnko nonte tsík'énkahyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

39 **A** ntá itsjé tí sín samaritano kuènte tí chjasin ntiha mé kjuankíxin kuinkáchónki sín tí jehe ch'án kíxin xíkaha chrónka tjan kíxin jehe ch'án ó chrónka ch'án kaín xín nkehe kjuích'e tjan tí senó a.

40 **A** ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóehé sín ch'án kíxin tsitōhe ch'án ntiha. Ntá kuítóhe ch'án ntiha iyó yaon.

41 Ntá itsjé sín kjaxin kuinkáchónki sín ch'án kíxin tí nkehe kuínhin sín nixja ch'án.

42 Ntá ntáche sín tí tjan a kíxin:

—Ntá jie jehya jehó tí nkehe chrónka kuítekaonni. Náhí. Tí jie ó kuínhini nixja ch'án ntá kónoheni kíxin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitōhe jína ijnko xjeen ijnko ch'ín ch'ehe xra gobierno

43 **A** ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea.

44 **A** ntá jehe ch'án tsintáchro ch'án kíxin tí nkexro chrónka itén Dios la tí chjasén sín mé tjikosáyehya sín ch'án.

45 Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehe sín ch'án jína kíxin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntiha.

46 Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjaminca ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. **A** ntá níhi tí xjeen ch'án ntoa itjen chjasin Capernaum.

47 Ntá kuínhin tí ch'ín ch'ehe xra gobierno kíxin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóehé ch'án tí ch'ín Jesús kíxin sáchrókjui ch'ín Jesús ntōe ch'án sinchekitōhe jína tí xjeen ch'án ó tjet'en xjan.

48 Ntá ntáchro ch'ín Jesús kíxin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

49 Ntá chrónòa tí ch'ín ch'ehe xra gobierno ntáchro ch'án kíxin:

—¿Á chrókójínahya sáchrókjuini ntōna jaí kíxin xjanna ó tjet'en? —ichro tí ch'ín a.

50 Ntá kjuátehe ch'ín Jesús ntáchro ch'án kíxin:

—Ikjan sátjia ntōa kíxin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án.

⁵¹ A ntá kjuíji ch'án chjino ntøe ch'án ntá xrínahya tí sín ch'ehe sín ch'án xrā kjuíxinhin sín ntia chrónka sín kixin:

—Xjaan la ó jina tjen —ichro sín.

⁵² Ntá kjuanchankíhi ch'án sín kixin nkehora kjuankíxin kuítóhe xjan jina, na ntá chrónka sín kixin:

—Ijna la una kónjin mé kjuin tí sóa —ichro sín.

⁵³ Ntá kónohe tí it'é xjan kixin xikaha tí hora tsintáchro ch'ín Jesús kixin tí xjeen ch'án na ó jina tjen. A ntá jehe ch'án la ko kaín tí sín siín ntøe ch'án mé kuinkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tíó kuixin ch'án estado Judea ikjan ch'án estado Galilea.

5

Ch'ín Jesús kjuínchekitohe jina ijnko ch'ín tsík'en tøte chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xikjan ch'án chjasin Jerusalén inaá.

² A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntā mé nkiva hebreo tí ntā mé it'in Betesda. A ntá chrínta tí pila siín in'ó cuarto ntsínsí.

³ Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en tøté. Tjejóchónhen sín kixin nkehora tsínki ntā

⁴ kixin nántaxón k'uínkajin ijnko ángel kjuiánkí ntā kjuínchekínki ntā. A ntá tí nkexro senó tsjiánkí ntā mé tsitøhe jina kjónté cualquiera chin chóna.

⁵ A ntá ntaha kjuák'e ijnko ch'ín na mé chóna ch'án treinta y ocho nánó níhi ch'án.

⁶ A ntá tíó k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsitøha jina? —ichro ch'án.

⁷ Ntá ntáchro tí sijníhi kixin:

—Chóntahyani nínkexró tsjinkitsani tsjiánkíni ntā. A ntá tí tjinkaonni chrókjuiánkíni ntā la ntá ókjé nkexro tjítaón ntia tjíánkí ntā senó —mé chro tí sijníhi.

⁸ A ntá k'uetøan ch'ín Jesús kixin:

—Ijie la t'inkatjen, tjatsíyan kaniāa, itjia —ichro ch'án.

⁹ Ntá tuénxín kuítóhe ch'án jina, ntá kjuatsen ch'án kaniēe ch'án kjuankíxin itji ch'án. Kjánchó yaon sábadó tíha mé tí yaon t'ok'éhe sín.

¹⁰ Mé xikaha tí sín judío ntáche sín tí ch'ín kuítóhe jina kixin:

—Ijie tí yaon t'ok'éheni ntá kohya kjuachaxin tsamá kaniāa —ichro sín.

¹¹ A ntá ntáchro tí ch'ín a kixin:

—Tí nkexro kjuínchekitoṅa jína mé k'uętuanna kíxin tsjatsíyan kaṅiana la ko sátsjia —ichro ch'án.

¹² Ntá kjuanchankíhi sín ch'án kíxin:

—¿Nkexéhe tí nkexro k'uętuannhan kíxin tsjatsíyan kaṅiaa la ko sátsjia? —ichro sín.

¹³ A ntá tí ch'ín tsíkitohe jína na í kjuátsoanhya ch'án tí nkexro kjuínchekitohe ch'án jína kíxin ntaha la siín nchónhya chojni, a ntá ntahó k'uitjáyanxín ch'ín Jesús.

¹⁴ A ntá chr'éxin ch'ín Jesús xeta ch'án tí ch'ín a nkaxenhen tí ninko jié ntá ntáchro ch'án kíxin:

—Tsjehe kíxin ijie la ó jína tjen jaha la í tjásinhya jje inaá. A ntá tí tsjásian jje inaá a ntá antsí má jínahya tsonhan —ichro ch'án.

¹⁵ A ntá sákjuí tí ch'ín a ntá chénka ch'án tí sín judío kíxin jehe ch'ín Jesús mé kjuínchekitohe ch'án jína.

¹⁶ Mé xikaha tí sín judío kjuankíxin sín chónkíhi sín tí ch'ín Jesús la ko chrók'óyán sín ch'án kíxin kjuínchekitohe ch'án chojni jína tí yaon t'ok'éhe sín.

¹⁷ Kjánchó ch'ín Jesús ntáche ch'án tí jehe sín kíxin:

—Méxra T'aná naxa tjech'e ch'án xra. A ntá janhan kjaxin tjét'a xra —ichro ch'án.

¹⁸ Méxra xikaha tí sín judío antsí tjinkaon sín chrók'óyán sín ch'án kíxin kuítekakuenhya ch'án tí ley kuente tí yaon t'ok'éhe sín la ko kjaxin ntáchro ch'án kíxin tí It'é ch'án la mé Dios, mé xikaha ncheyóhe ch'án asén ch'án Dios.

Tí kjuachaxin chóna tí Xjeen Dios

¹⁹ Ntá ntáche ch'ín Jesús tí jehe sín kíxin:

—Ijnko nkehe tjetoan tsoṭjonkará kíxin tí Xjeen Dios nkaya nkajní tí jehó kjuachaxin kuente ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xikaha ch'e ch'án.

²⁰ A ntá tí It'é mé tjuèhe tí Xjeen ch'án, la ko tjakohe ch'án kaín xín xra ch'e ch'án, la ko antsí tjetoan tí xra naxa tsjakohe ch'án kíxin ntá tsochakonrá kíxin ts'ikonrá tí xra sich'e ch'án.

²¹ Tí It'é mé chóna kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'án.

²² A ntá It'é la í sinchekitoexínhya ch'án ijié ninkexró. Kaín tí kjuachaxin kuente ch'án chjéhe ch'án tí Xjeen kíxin sinchekitoexín ch'án ijié chojni chjasintajni

²³ kíxin ntá kaín chojni tsjikosáyehe sín tí Xjeen éxi yóhe tjikosáyehe sín tí It'é ch'án. Tí sín tjikosáyeheya tí Xjeen xikaha kjaxin tjikosáyeheya sín tí It'é kíxin jehe ch'án mé tsíchr'án tí Xjeen.

24 'Ijnko nkehe tjetoan tsotjonkará kixin tí jnkojínra tjeot-inhíra tí nkehe tjákua la ko tinkachónkirá tí T'aná, mé tí nkexro ichr'ánna, na mé xikaha ó chontará tí kjuachón la ko tsjasótiahyará, na mé kuítóhéra tí ntia chrók'uénxinra, la ntá jie kjuankixinra tsochontará tí kjuachón jnkochríxin.

25 Ijnko nkehe tjetoan tsotjonkará kixin ó tsi tí yaon, na mé jie tíha, mé xikaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóchón sín.

26 Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón

27 la ko kjaxin chjéhe ch'án kjuachaxin tí Xjeen ch'án sinchekitoexín tí ijíé chojni chjasintajni kixin jehe mé tí Xjeen Dios K'óna Chojni.

28 Chrakonhyará tjetjonkará xikaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án.

29 A ntá ts'axrjexín sín tí tòye la tí sín kjuích'e sín xra jina mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'in Jesús

30 Tí jehó kjuachaxin kuéntana xitjahya sít'a ninkehó xra. A ntá jie ntakitóaxián tí ijíé éxí k'uetuanna T'aná. A ntá tí nkehe ntakitóaxián la jina ntoá kixin tjínkakhonhya sít'a éxí tjínkavan. Náhi. Éxí tjínkaon T'aná, tí nkexro ichr'ánna, mé xikaha tjet'a.

31 A ntá tí chróxrjanka kixin nkexrí imá jina janhan la tíha la ninkehó kjuachaxin chróchóntahya.

32 Itjen í jnko nkexro tjechrónka nkexrí tjén janhan a ntá ó nóna kixin tí nkehe chrónka ch'án la sínkí.

33 Jahará tsíkétuénhénra chojni kjuíkjanchankíhi sín tí ch'in Juan kixin nkexrínchi tjén janhan. A ntá tí nkehe tsíkjetéhe ch'án la chaxín ntoá tíha.

34 Kjánchó chontiaxinhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kixin jahará jina chrókuaará.

35 Tí ch'in Juan kjuák'e éxí yóhe ijnko xrohi kjuák'eche k'uínkaséyanxín la ko jahará kócháhará xikaha, kjánchó séhya kóxrjínhanra tí xrohi a.

36 Kjánchó siín nkehe antsí tjetoan tjáqoxin nkexrí tjén janhan, a ntá kánhyó tjetoan tí nkehe tsíchrónka tí ch'in Juan. Tí xra tjet'a, mé tí xra kjuanjon T'aná sít'a tsjixinna tí xra, na mé tíha mé tjáqoxin kixin chaxín T'aná tsíchr'án k'uinka.

37 Kjaxin jehe T'aná, tí nkexro ichr'ánna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uikonhyará ch'án

38 la ko kjaxin itén ch'án kuitoehya nkaya kjará kixin tjinkákonhyará tsitékáonrá tí Xjeen Dios tsíchr'án tsíki.

39 Jahará nchekuáxinrá jína tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochrín. A ntá tí nkehe tsíkjin sín ósé mé chrónka kuènte janhan.

40 Kjánchó jahará tjinkákonhyará tsochjinará tí tjén janhan kixin chrók'uayéhérá tí kjuachón a.

41 Janhan na tjéyáhya kixin chojni chrókjuikosáyana sín.

42 A ntá janhan ó nòna kixin jahará la tjuèhyará Dios.

43 Mé k'uinkaxian janhan tí kjuachaxin kuènte T'aná. Kjánchó jahará la títékákonnahyará. A ntá tí chrókui í jnko nkexro kjuachaxin chrókuakitsjeníxin asén ó, a ntá tíha mé tjinkáonrá chrókuítekákónhénrá.

44 ¿Nkexrí chrókuítekákónrá jahará kixin tjéyará kixin tí chojni chjasintajni chrókjuikosáyahará sín, a ntá tjéyáhyará tí kjuachaxin chrókjuanjon jnkokóá Dios?

45 Tsontáchróhyará kixin janhan tsjánchíá jie tí jahará nkayakon T'aná. Náhi. Ch'ín Moisés mé tsjanchia ch'án jie tí jahará kixin tsontáchrórá kixin jehe ch'án kuinkachónkirá.

46 Kja tí jahará chrókuítekákónrá nkehe tsintáchró ch'ín Moisés ntá chrókuítekákónrá tí janhan kixin tí xroon tsíkjin ch'án mé chrónka kuènte tí janhan.

47 A ntá tí títékákonhyará tí nkehe tsíkjin ch'án, ¿ntá nkexrí chrókuítekákónnará nkehe ntáxrjan janhan? —ichro ch'án.

6

Ch'ín Jesús kjuanjon ch'án nkehe kjóne in'ó mil chojni
(Mt. 14.13-21; Mr. 6.30-44; Lc. 9.10-17)

1 A ntá chr'éxin ntá sákjuí ch'ín Jesús k'uátòye ch'án tí ntayaon Galilea na mé tí ntayaon Tiberias tíha.

2 A ntá nchónhya chojni tinkáchréhe sín kixin k'uikon sín tí kjuaxroan jie kjuasin ch'án kjuínchekitohe ch'án jína tí sinníhi.

3 A ntá jehe tí ch'ín Jesús chrìn ch'án ijnko jna na ntá ntaha kjuák'etjaxin ch'án la koí tí sín k'uájiko ch'án a.

4 A ntá í séhya ts'ixin tí kia pascua a mé kié tí sín judío a.

5 A ntá tí ch'ín Jesús k'uikon ch'án kixin nchónhya chojni chrìn sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'uènanani nkehe sine kaín tí chojni a? —ichro ch'án.

⁶ Mé xikaha ntáchro ch'án kixin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án.

⁷ Ntá kjuátehe ch'ín Felipe ntáchro ch'án kixin:

—Kjonté doscientos chichaon denario chróchóntani chrók'uináxin tí niotja la naxa chrókjuachahya chrók'uáyéhe jnkojnko sín tot'o tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchro ch'án kixin:

⁹ —Ntíhi tjen ijnko xjan ntoá chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni síin? —ichro ch'án.

¹⁰ A ntá ntáchro ch'ín Jesús kixin:

—Tétuēnhén tí sín síin a kixin ts'ixitjaxin sín —ichro ch'án.

A ntá nchónhya ika yoa síin na ntá ntaha k'uixitjaxin sín na mé éxí in'ó mil chojni k'uixin sín.

¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikeyehe sín chjéhe sín kaín tí sín sitjaxin a. Xikaha kjaxin k'óxikeyehe sín tí koche. A ntá kaín sín kjóne sín éxí tjinkaon sín.

¹² Kjuixin kjóne sín ntá k'uetuēnhen ch'ín Jesús tí sín k'uájiko ch'án ntáchro ch'án kixin:

—Tjénájínrá tí nkehe tot'o síxèhe sín kixin ts'itjáyanyha ninkehó —ichro ch'án.

¹³ Ntá xikaha jehe sín kjuenájín sín kjuínchekaón sín teyó ntaxra tí tot'o tí in'ó niotja tsík'óna noa cebada síxèhe sín tí kjuixin tsíkjine sín.

¹⁴ A ntá tí sín kjóne tí niotja k'uikon sín tí kjuaxroan jíe kjuasin ch'ín Jesús ntáchro sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni tsjakoheni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxenhén sín ch'án tí xra rey kixin chrók'uetōan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntiha.

Éxí ijnko ntia xikaha kjuítaón ch'ín Jesús tí ntayaon

(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'ín Jesús k'uínkajinxin sín jnā sákjuí sín chrínta ntayaon

¹⁷ k'uit'ótjen sin ijnko ntabárcō kjuankíxin sín ts'atòye sín ntayaon sátsji sín chjasin Capernaum. Na ó k'uixin tie na naxa kjanhya ch'ín Jesús.

¹⁸ Ntá kjuankíxin chjéhe xrintō tsankā ntá kjuankíxin tinkákjaminkí ntā.

¹⁹ *A* ntá tió kjuacha sín á in'ó o injon kilómetro ntá xrínahya k'uikon sín tí ch'ín Jesús tinkákóchjinehe ch'án tí ntabárcø, éxí ijnko ntia tjetjitaón ch'án tí nta, ntá k'uikon sín ntá imá chrakon sín.

²⁰ Kjánchó ntáchro ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcø. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² *A* ntá tí yaon chr'éxín na mé tí sín kuitøhe tóhe ntayaon na mé ó nohe sín kixin jnkokøáxón ntabárcø k'uékjak'e ntiha la ko ó nohe sín kixin ch'ín Jesús kjá ni sátsíkjikohya sín ch'án na mé k'uikon sín kixin jehó tí sín k'uájiko ch'án sátsíki sín.

²³ Kjánchó siín ntabárcø tixín chjasin Tiberias tinkákóchjinehe tí nó kjónexín sín tí niotja kjuanchaxín ch'ín Jesús kjuasáyé Dios.

²⁴ *A* ntá tió k'uikon sín kixin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabárcø ntá sákjuí sín chjasin Capernaum sákjuíkjeyá sín tí ch'ín Jesús.

Ínchéni Jesús mé éxí niotja tjanjon kjuachón

²⁵ *A* ntá tóhe ntayaon xéta sín tí ch'ín Jesús ntá kjuanchankíhi sín ch'án kixin:

—Maestro, ¿nkesá k'uinka ntihi? —ichro sín.

²⁶ Ntá kjuátøhe ch'ín Jesús ntáchro ch'án kixin:

—Ó nòna kixin jahará tjéyará tí janhan kixin kjónterá niotja kókjahará, la jehya kixin kiénxinrá tí kjuaxroan kjuásian.

²⁷ Chrókjuich'ehyará tí xrø chrók'uite tí nkehe chrókjónterá tjoka tsjeje ó. Náhi. Chrókjuéyará tí nkehe chrókjuejehya chrókjónterá chrók'uayéxínrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjakoxín ch'án kixin tí Xjeen ch'án mé chóna kjuachaxién tí jehe ch'án —ichro ch'ín Jesús.

²⁸ *A* ntá kjuanchankíhi sín ch'án kixin:

—¿Nkexrí chrókjuich'eni chrokjuinchexiteyáni nkexrí tjinkaon Dios? —ichro sín.

²⁹ *A* ntá kjuátøhe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuákøéxianni chrók'uikonni kixin ntá chrókuitekaonni tí jaha? ¿Nkehe tí xrø ch'e jaha?

³¹ Tí sín tsík'axrjeníxinni k'uéjó sín ósé mé kjóne sín maná k'óna niotja tió k'uixin sín nteje mé xíkaha tí xroon kuénte Dios

tsíkjin ijnko nkexro ósé ntáchro kíxin: “Kjuanjon ch'án tí nkehe kjóne sín mé niotja tsíkixin nkaya nkajní”^{*} —ichro sín.

³² A ntá kjuátehe ch'ín Jesús ntáchro ch'án kíxin:

—Ijnko nkehe tjetoan tjonkará kíxin jehya ch'ín Moisés kjuanjon tí maná k'óna niotja k'uínkajinxin nkaya nkajní. Náhí. T'aná mé tjetjanjon tí niotja chaxín jína k'uínkajinxin nkaya nkajní.

³³ Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kíxin:

—Jaha Ìnchéni, jnkochrín chjehéni tí niotja a —ichro sín.

³⁵ A ntá ntáchro ch'ín Jesús kíxin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá.

³⁶ Kjánchó éxi k'uétjonkará senó na ó k'uíkonrá tí janhan na kjónté naxa titekákonhyará.

³⁷ A ntá kaín tí sín chjina T'aná la tsóchjina sín tí janhan.

A ntá kaín tí sín tjejótóchjinehe sín tí janhan la tsétuanyha sín kíxin sátsji sín.

³⁸ Janhan k'uinkaxian nkaya nkajní jehya tí xra tóxrjina chrókjuít'a. Náhí. K'uinka kíxin chrókjuít'a tí xra tóxrjinhin tí nkexro tsíchr'ánna.

³⁹ A ntá T'aná mé tí nkexro tsíchr'ánna mé tjinkaon ch'án kíxin sjintak'itjáyanhya ninkexró tí sín chjina ch'án na mé tjinkaon ch'án kíxin janhan mé sjintaxechón kaín sín tí yaon tsjixín.

⁴⁰ Mé xíkaha tjinkaon tí nkexro tsíchr'ánna kíxin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. A ntá janhan sjintaxechón sín tí yaon tsjixín —ichro ch'án.

⁴¹ A ntá tí sín judío kjuankíxin sín kjonta sín tí ch'ín Jesús kíxin tsíntáchro ch'án kíxin jehe ch'án mé tí niotja k'uínkajinxin nkaya nkajní.

⁴² Mé ntáchro sín kíxin:

—¿Á jehya tí Jesús, it'é mé it'ín José, na mé chóxinni tí it'é la ko tí iné ch'án? ¿Ntá nkekuèté ntáchro ch'án kíxin nkajní k'uínkajinxin ch'án? —ichro sín.

⁴³ Ntá kjuátehe ch'ín Jesús ntáchro ch'án kíxin:

—Títóhérá tjóntahyará tí janhan.

⁴⁴ Kohya nkexro chrókóchjina tí tjén janhan tí chrókjuínkítsahya T'aná. A ntá tí sín tóchjina na mé sjintaxechón sín tí yaon tsjixín.

* 6:31 Salmo 78.24

45 Na mé tí sín k'uéchrónka itén Dios ósé mé tsíkjin sín xroon ntáchro kíxin: “Dios mé tsjakohē ch'án kaín chojni.”† **A** ntá kaín tí sín tsíkinhin tí nixja T'aná la ko kjuakohē ch'án sín mé sítóchjina sín tí tjén janhan.

46 Jehya kíxin itjen ijnko chojni tsík'ikon T'aná. Náhí. Jehó tí nkexro kujxin tí tjen Dios mé tsík'ikon ch'án Dios.

47 Chaxín tí nkehe tjéxrjanka kíxin tí sín titekaon sín tí janhan mé ó tsochóna sín kjuachón jnkochrín.

48 Janhan na mé tí niotja tjanjon kjuachón.

49 Tí sín k'uaxrjeníxinrá k'uéjó ósé kjóne sín tí maná k'óna niotja tió k'uéjó sín nteje, a ntá kjónté ik'uén sín k'uitjayan sín.

50 Tí nkehe xrxjanka mé tí niotja k'uínkajinxin nkaya nkajní, a ntá tí sín sine tí niotja a mé ts'enhya sín.

51 Janhan mé tí niotja tjechón k'uínkajinxin nkaya nkajní. **A** ntá tí sín sine tí niotja a mé ts'ejóchón sín jnkochrín. Tí niotja tsjánjuan ts'ejóchónxin chojni chjasintajni mé ntóna tíha —ichro ch'ín Jesús.

52 **A** ntá tí sín judío mé sítjité sín itjo sín kíchó sín ntáchro sín kíxin:

—¿Nkexrí chrókjuanjon ch'án ntōe ch'án chrókjóneni? —ichro sín.

53 **A** ntá kjuátehe ch'ín Jesús ntáchro ch'án kíxin:

—Ntá tsotjonkará kíxin tí sintehyará ntōe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará.

54 Tí sinterá ntóna la ko it'irá jñina ntá tsochontará kjuachón jnkochrín la ko janhan mé sintaxechónrá tí yaon tsjixixín.

55 Kíxin ntóna na mé chaxín nkehe ine chojni la ko jñina na mé chaxín nkehe it'i chojni.

56 Tí sín ine ntóna la ko it'i sín jñina mé jnkokoá tjenkayáxinkian sín la ko janhan mé xríkian sín.

57 T'aná tsíchr'án ch'án tí janhan mé chóna kjuachaxin, a ntá janhan mé tjéchonxian tí jehe ch'án. Ntá tí sín sine tí ntóna mé ts'ejóchónxin sín tí janhan.

58 **A** ntá tjénixja kuènte tí niotja k'uínkajinxin nkaya nkajní na mé yóehya tí maná tsík'óna niotja kjóne tí sín tsík'axrjeníxinrá ósé kíxin jehe sín na kjóne sín na kjónté k'uén sín. **A** ntá tí sinterá tí niotja k'uínkajinxin nkaya nkajní ntá ts'ejochónrá jnkochrín —mé chro ch'ín Jesús.

59 Kaín tíha mé kjuakohē ch'án tí sín tsíkójnkotséxin tí nínko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrín

⁶⁰ A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

⁶¹ A ntá kónohe ch'ín Jesús kixin xikaha tóxakonhen sín kíenxínhya sín tí nkehe tsintáchro ch'án ntá kjuanchankíhi ch'án sín kixin:

—¿Á kjaxinrá tjinkákonhyará tsinhínrá tíhi?

⁶² ¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixín ch'án tí tsíkjak'e ch'án ósé?

⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjonkará na mé kuente tí Nchakuen Dios na mé tjejóchónxin chojni.

⁶⁴ Kjánchó isorá naxa titekákonnahyará —ichro ch'án.

Mé xikaha ichro ch'án kixin tí xrankixín ó kónohe ch'án kixin nkexro tí sín tsitekakuenhya sín ch'án la ko kónohe ch'án kixin nkexro sinchekji ch'án.

⁶⁵ A ntá ntáchro ch'án kixin:

—Méxra xikaha k'uetjonkará kixin ninkexró tsochjina tí tjén janhan tí tsjinkĩsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'ín Jesús ntá xrínahya kuítóhe sín, í chrèhya sín ch'án.

⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxinrá tjinkáonrá xikaha sáchrókjuirá? —ichro ch'án.

⁶⁸ Ntá kjuátehe ch'ín Simón Pedro kixin:

—Jaha Inchéni, ¿nkekuèté tjanchankíhíni á sáchrókjuiini ókjé? Jaha tí tan chrónka a mé tsochóntaxínni kjuachón jnkochrín

⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kixin:

—Janhan kjuéyá tí kaín rá teyórá la ko jnkójínra ntihi mé ts'ónará ijnko jínahya —ichro ch'án.

⁷¹ Tíha mé t'axrjexín tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'ín Jesús.

7

Tí sín jnkokoá kichó ch'ín Jesús mé kuítekakuenhya sín ch'án

¹ Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án.

² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia.*

³ A ntá tí sín kichó ch'ín Jesús ntáche sín ch'án kixin:

—Chrókuitoahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian.

⁴ Kixin tió tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kaín xín chojni sín chjasintajni —mé chro sín.

⁵ Xikaha ntácho tí sín kichó ch'án kixin kjaxin jehe sín titekakuenhya sín tí jehe ch'án.

⁶ A ntá kjuátehe ch'ín Jesús ntácho ch'án kixin:

—Naxa kjuixrakáhya tí hora kuéntana tsjásian kjuaxroan. Ntá jahará la cualquier hora tjinkáonrá jina chrók'uikonrá kjuaxroan.

⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jina tí nkehe tjejóch'e sín.

⁸ Jahará la sátjirá tí kia a. A ntá janhan la tjíhya kixin naxa kjuixrakáhya tí hora kuéntana —ichro ch'án.

⁹ Mé xikaha ntácho ch'án ntá kuítóhe ch'án estado Galilea.

Itjen ch'ín Jesús tí kia a

¹⁰ A ntá ó kjuixin sátsíkji tí sín jnkokoá kichó ch'ín Jesús ntá jehe ch'án la kjaxin sákjuj ch'án tí kia a kjánchó noxínhya xritjak'e ch'án.

¹¹ A ntá tí sín judío mé xriteyá sín ch'án tí kia a la ntácho sín kixin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntácho sín kixin: “Jina ch'án”; kjánchó í so sín ntácho sín kixin: “Jehya chojni jina ch'án, méxra imá ch'iyehé ch'án chojni”, ichro sín.

¹³ Kjánchó noxínhya kjo sín xikaha kixin chrakonhen sín tí sín judío a.

¹⁴ A ntá ó kjuíji jnkosiné tí kia a ntá k'uixenhen ch'ín Jesús tí njnko jié ntá kjuankixin ch'án kjuako ch'án.

¹⁵ A ntá tí sín judío chrakon sín komá sín ch'án ntácho sín kixin:

—¿Xá nkexrí nohe tí ch'ín i nchónhya tí nkehe kixin tsíxrakoehya ch'án? —ichro sín.

¹⁶ Ntá kjuátehe ch'ín Jesús ntácho ch'án kixin:

—Tí nkehe tjákua la jehya kuéntana na mé tí xra kuènte tí nkexro tsíchr'ánna k'uinka.

* 7:2 Levítico 23.34

17 Tí jnkojinrá tjinkáonrá chrókjuinchexiteyéhérá éxí tóxrjnhin Dios la tsonohará á chaxín kuènte Dios tí nkehe tjàkua o á kuèntana tíha.

18 A ntá tí nkexro tjako tí nkehe t'axrjeníxin kja sín ó mé xikaha ch'e kixin tjinkaon sín kixin tí chojni ó mé chróchóntehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

19 ¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekákuenhyará tí nkehe tsíkjin ch'án. ¿Méxra nkekuènté tjinkáonrá chrók'oyánrá tí janhan? —ichro ch'án.

20 Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'oyán tí jaha? —ichro sín.

21 Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá.†

22 A ntá ch'ín Moisés tsík'etoan kixin xjaanrá ntoa itsa xjan xroye, (kjánchó jehya ch'ín Moisés kjuankíxin ch'án kjuako ch'án tíha, na mé tí sín tsík'axrjeníxinrá kjuankíxin sín kjuako sín tíha). Mé xikaha nchekará xjan tí xroye a kjónté yaon t'ok'éheni.

23 A ntá xikaha nchekará xjan xroye tí yaon t'ok'éheni kixin xikaha chrókjuinchek'itjáyankíhyará ninkehó tí nkehe k'uetóan ch'ín Moisés, ¿ntá nkekuènté kixin ninkákonará tí janhan kixin kjuíntakítóha jína ijnko chojni tí yaon t'ok'éheni?

24 Chrókjuanchahyará jie kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjnhin Dios —mé chro ch'ín Jesús.

Ch'ín Jesús chrónka kixin nketí k'uaxrjeníxin ch'án

25 A ntá iso sín chjasin Jerusalén kjuankíxin sín kjo sín kíchó sín kjuanchankí sín kixin:

—¿Á jehya tí ch'ín a xritjeyá sín chrók'oyán sín?

26 Ntá jie noxín tjen ch'án nixja ch'án kohya ninkexró nínkakonhen ch'án. Kjá tí síxreé titekaon sín kixin tí nkexro a chaxín Cristo tíha.

27 Kjánchó ó noheni nketí tsíkjin ch'án. A ntá tió tsi tí nkexro Cristo ntá ninkexró tsonoehya nketí tsixin ch'án —ichro sín.

28 A ntá ch'ín Jesús kjuák'ekjako ch'án tí nínko jie ntá kuínhin ch'án kixin xikaha kjo sín, ntá itsen nixja ch'án ntáchro ch'án kixin:

† 7:21 Juan 5.2-9

—Chaxín choxinrá tí janhan la ko nohará nketí chjasin tsíkjixian. Kjánchó jehya kixin k'uinka s̄intaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxa chonhyará tí nkexro a.

²⁹ Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

³⁰ Ntá chrótsé sín ch'án chrókjuak'echjina sín ch'án ntá kjónté ninkexró tséhya sín ch'án kixin naxa kjuanjonhya Dios kjuachaxin chrótsé sín ch'án.

³¹ Kjánchó itsjé chojni kuítekaon sín tí jehe ch'án. A ntá ntáchro sín kixin:

—A ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

³² A ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín nchat'á t'etoan k'uetuenhen sín iso sín policia kuénte n̄inko tsotsé sín ch'án tsjak'echjina sín ch'án.

³³ A ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjija tí tjen tí nkexro ichr'ánna.

³⁴ A ntá jahará tsjéyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

³⁵ A ntá tí sín judío kjuankixin sín kjuanchankíhi sín kíchó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkíva griego kixin ntá tsjakohé ch'án tí sín griego?

³⁶ ¿Nkexrí t'axrjexín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntarío tjechón

³⁷ A ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kja tí jnkójnra ik'uénra ntá xrákirá its'irá ntá.

³⁸ A ntá éxí ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje intá tjechón —ichro ch'án.

³⁹ Mé xikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxa tihya tí Nchakuen Dios kixin ch'ín Jesús naxa sátsjihya ch'án nkaya nkajní.

Jnkokoáhya kjuenkayáxin tí chojni

40 **A** ntá iso sín tió kuínhin sín tí nkehe ntáchro ch'ín Jesús ntá ntáchro sín kixin:

—Kja chaxín tí ch'ín i mé tí profeta ó tsíkji —ichro sín.

41 Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuèté chrókjuixin Galilea tí nkexro Cristo?

42 Tí xroon tsíkjin sín ósé mé chrónka kixin tí nkexro Cristo mé ts'axrjenixin tí sín k'uaxrjenixin tí ch'ín rey David la ko tsjixin ch'án chjasin Belén mé tí chjasin k'uékjak'e ch'ín David —ichro sín.

43 Mé xikaha jnkokoáhya kjuenkayáxin sín kaín sín kixin nkexro tí ch'ín Jesús.

44 Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuích'ehya xikaha.

Tí síxregé kuítekakonhya sín tí ch'ín Jesús

45 **A** ntá tí sín policia kuènte ninko mé kjan sín tí tjejó tí sín fariseo la ko tí sín nchat'á t'etoan. Ntá tí sín a mé kjuanchankíhi sín tí sín policia kixin:

—¿Nkekuèté kjuíkoahyará ch'án? —ichro sín.

46 Ntá kjuátehe tí sín policia kixin:

—Kohya ninkexró nixja éxi xikaha nixja tí ch'ín a —ichro sín.

47 Ntá ntáche tí sín fariseo tí sín policia kixin:

—¿Á kjaxinrá kuítóhéra kjuít'ayahará ch'án?

48 ¿Á kuítekaon tí jehe ch'án jnkojín tí sín t'etoan kuénténi o tí sín fariseo?

49 **A** ntá tí sín a mé chónhya sín tí ley na mé tsjasóte sín —ichro sín.

50 **A** ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

51 —Tí ley kuénténi la kohya kjuachaxin sinchekjasóteni ijnko chojni tí naxa kienhyani nkehe nixja ch'án la ko kienhyani tí jie kjuasin ch'án —ichro ch'án.

52 Ntá kjuátehe sín ntáchro sín kixin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsonoha kixin nijnko tí sín k'uéchrónka itén Dios tsíkjiixinhyá sín tí estado Galilea —ichro sín.

Ijnko tjan kjuasin jie chóna ókjé chojni ntoa

53 Ntá jnkojnko tí sín xíka sín sákjuí sín ntøe sín.

8

1 Ntá ch'ín Jesús mé sákjuí ch'án tí jna Olivo.

² Ntá tí kóyaon nchítjen ikjan ch'án k'uíxenhen ch'án tí nínko jíe a la ko kaín xín tí chojni mé kóchjinehe sín ch'án. Ntá kjuák'etjaxín ch'án kjuankíxin ch'án kjuako ch'án.

³ Ntá tí sín tjako tí ley la ko tí sín fariseo mé kjuikao sín ijnko tjachjin kónoxíxin kíxin chóna tjan ókjé chojni ntoa. Ntá kjuak'e sín tjan jnkosiné tí sín tjejó ntiha.

⁴ Ntá ntáche sín tí ch'ín Jesús kíxin:

—Maestro, tí tjan i kónoxíxin kíxin kjuasin tjan jíe chóna tjan ókjé chojni ntoa.

⁵ A ntá tí ley tsíkjin ch'ín Moisés mé t'etōan kíxin ixro chrók'óyánxinni tí chojni chjin xíkaha ch'e. ¿A ntá jaha, nkechrua? —ichro sín.

⁶ Mé xíkaha ichro sín kíxin tjinkaon sín kíxin ách'e ntoáhya chrókjuatehe ch'ín Jesús ntá chrókjuanchia sín jíe. Ntá ch'ín Jesús mé k'uísén ch'án kjinxín ch'án dedo tja ch'án nonte a.

⁷ Ntá naxa tinkákjanchankíhi sín ch'án. Ntá k'uínkatjen ch'án k'uetōan ch'án kíxin:

—Xá nkexro tí tjejórá ntihi chónahya ninkehó jíe mé saoxín chróchjéhe sín tjan xro —ichro ch'án.

⁸ Ntá xík'isén ch'án ínaá ikjin ch'án tí nche ínaá.

⁹ Ntá tí sín a mé kuínhin sín tí nkehe k'uetōan ch'ín Jesús ntá kósuèhe sín kíxin koí sín chóna sín jíe, ntá jnkójnko jnkójnko sín, sásítji sín na mé saoxín tí ch'ín antsí má táda ch'án sákjuí ch'án, ntá kaín tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítóhe sín ntiha.

¹⁰ Ntá xrentoá ch'án la kjuanchankíhi ch'án tjan kíxin:

—¿Nkekjá tí sín kjuanchia jíe? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kíxin:

—Náhí, Ínchéni, ninkexró —ichro tjan.

Ntá ntáchro ch'ín Jesús kíxin:

—Kjaxin janhan sintakjasótiahya. Sátjia la í tjásinhya jíe ínaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjéhe ch'án tí sín tsíκόchjina ínaá ntáchro ch'án kíxin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítié a —ichro ch'án.

¹³ Ntá tí sín fariseo ntáchro sín kíxin:

—Jahvá tjechronka nkexrí tjen jaha na mé chaxínhya tíha kíxin jahvá tjechronka —ichro sín.

¹⁴ Ntá kjuátehe ch'ín Jesús ntáchro ch'án kíxin:

—Janhván tjétjonkará nkexrí tjén na kjónté chaxín xrjanka kíxin ó nõna nketí nó k'uinkaxian la ko nõna nketí sátsjiyá. A

ntá jahará noahyará nketí k'uinkaxian la ko noahyará nketí sátsjiyá.

¹⁵ Jahará la éxí chojni chjasintajni ó tékará jie. A ntá janhan la tékahya jie ninkexró.

¹⁶ Kjánchó ntoá chrókjuintakitoaxián ijíé chojni kixin jehya janhván t'a tíha, T'aná tjékian, na mé tí nkexro k'uetuanna k'uinka ntihi na mé jehe ch'án mé tjékian ch'án ntihi ntakitoaxínkian ijíé chojni.

¹⁷ A ntá tí ley tsíkjin ch'in Moisés mé ntáchro kixin tí tsonoxín iyó sín tsochrónka á chaxín xíkaha tsíkónhen ntá chrókuitekaon chojni.

¹⁸ Ntá janhan na mé tjéxrjanka nkexrí tjén janhan la ko kjaxin T'aná mé tí nkexro k'uetuanna k'uinka mé jehe ch'án kjaxin chrónka ch'án nkexrí tjén janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'ín Jesús ntáchro ch'án kixin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'án.

²⁰ Mé xíkaha chro ch'ín Jesús tí kjuák'ekjakoxin ch'án tí njnko jie chjino ntacajón tjetóxyéya chichaon tjanjon sín. Kjánchó ninkexró tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijiará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xíkaha ntáchro ch'án kixin xitjahya tsjijini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntihi k'uaxrjénixinrá. A ntá janhan la nkaya nkajní k'uaxrjénixian. Jahará la kuènte chjasintajni ntihi. A ntá janhan la janhya kuènte chjasintajni.

²⁴ Mé xíkaha tjonkará kixin tió ts'énrá naxa tsochontará ijiará kixin tí tsitékónhyará tí janhan, mé tí nkexro xráxín tjen,* ntá kjónté ts'énrá naxa tsochontará tí ijiará —ichro ch'án.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

* 8:24 Éxodo 3.14

—Tí xrankíxixín kjuankíxian tjonkará kixin nkexro tí janhan.

²⁶ Itsjé nkehe chonta chróntáxrjan kixin chrókujintakitogaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuinhān chrónka ch'án mé tjákoḥa tí sín chjasintajni —ichro ch'án.

²⁷ Kjánchó jehe sín mé kienxínhya sín kixin nixja ch'án kuente It'é ch'án tjen nkaya nkajní.

²⁸ A ntá ntáchro ch'án kixin:

—Tió s̄inçek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxín tjen.† Ntá tsonohará kixin jehya janhan tétōan tí xra tjet'a. Náhí. Jehó tí nkehe kjuakona T'aná mé tjetjākua.

²⁹ Tjékian tí nkexro k'uetuanna k'uinka kixin jehí xráxín T'aná la kuitonahya janhvān kixin xráxín ntaxiteyáḥa tí nkehe tóxrjínḥin ch'án —ichro ch'án.

³⁰ Mé xikaha ntáchro ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsitōhe sín ijíé sín

³¹ Ntá nixjehe ch'ín Jesús tí sín judío kuinkáchónki sín ch'án ntáchro ch'án kixin:

—Tí tsitōéhyará tí tan kjuákohará ntá jahará chaxín discípulo kuéntana

³² la ko tsjátsoanrá tí nkehe chaxín, la ko tí nkehe chaxín mé tsojtáhará kjuachaxin tsaáxinrá, a ntá tsokohya nkehe ts'inkákonḥen —ichro ch'án.

³³ Ntá kjuáteḥe sín ntáchro sín kixin:

—Jeheni mé tsík'axrjeníxinni ch'ín Abraham na í xráxín kohya nkexro k'uena tí jeheni. ¿Nkekuèté ntáchrúa jaha kixin ts'áyéḥeni kjuachaxin tsaáxinni? —ichro sín.

³⁴ Ntá ntáchro ch'ín Jesús kixin:

—Tjetoan tí nkehe tjetjonkará kixin tí sín tjasin jie mé éxi chojni k'uíná chrokjuahya tsitōhe sín ijíé sín.

³⁵ A ntá ijnko chojni k'uíná la jnkochrínhya tsjak'e ch'án tí ntōe tí nkexro a. A ntá tí xjeen tí nkexro na mé jnkochrín tsitōhe ntiha.

³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonḥen.

³⁷ Ó nòna kixin jahará tsík'axrjeníxinrá ch'ín Abraham. Kjánchó tjinkáonrá chrók'oyánrá tí janhan kixin títekákonhyará tí nkehe tjéxrjanka.

† 8:28 Éxodo 3.14

38 Janhan xrjanka tí nkehe k'uíkuān kixin nkexrí tjen T'aná. A ntá jahará tjejonchexiteyéhérá tí nkehe kuínhínrá chrónka it'ará —ichro ch'án.

39 A ntá jehe sín kjuátehe sín ntáchro sín kixin:

—It'éni mé ch'ín Abraham —ichro sín.

Kjánchó ntáchro ch'ín Jesús kixin:

—A ntá tí jahará chrókóchaxín xjeen ch'ín Abraham ntá chrókjuich'erá éxí kjuích'e ch'án.

40 A ntá tjétjonkará tí tan chaxín kuínhan chrónka Dios na kjónté chrók'oyánrá tí janhan. A ntá ch'ín Abraham xikahya kjuích'e ch'án.

41 Jahará tjejoch'erá éxí kjuích'e it'ará —ichro ch'án.

Ntá ntáchro sín kixin:

—Jehya k'ónamá tí jeheni. Náhí. Chóntani jnkokoá It'éni mé Dios —ichro sín.

42 Ntá ntáche ch'ín Jesús tí jehe sín kixin:

—Tí chrókóchaxín kixin Dios mé It'ará la ntá chrótjuanará kixin janhan kjaxin k'uaxrjeníxinna Dios k'uinkaxian tí tjen ch'án. Jehya kixin janhván k'uinka. Náhí. Dios mé ichr'ánna k'uinka.

43 ¿Nkekuènté kixin tiénxinhyará tí nkehe tjonkará? Jehí tjinkákonhyará chrókuinhínrá tí nkehe xrjanka.

44 Jahará mé xjeen Tsochren la ko jahará tsík'axrjeníxinrá ch'án la ko tjinkáonrá sinchexiteyará tí nkehe tjinkaon ch'án. Tsochren mé xrankíxixín kjuaya ch'án. Nunca k'uénixja ch'án ntoá. Xrácín ch'ia ch'án kixin xikahó tjenkayáxin ch'án. Jehe ch'án mé it'é kaín tí kjuach'ia.

45 A ntá janhan tjétjonkará nkehe ntoá ntá títekákonnahyará.

46 ¿Á tjejorá jnkojínrá nohará nkerí jie kjuásian janhan? A ntá tí ntáxrjan tí nkehe ntoá, ¿ntá nkekuènté títekákonnahyará?

47 Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonhyará chrókuinhínrá itén ch'án —ichro ch'ín Jesús.

Cristo la ó xrácín tjen ntá chr'éxin kjuák'e ch'ín Abraham

48 A ntá tí sín judío ntáche sín tí ch'ín Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

49 Ntá kjuátehe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan.

50 Janhan na tjéyáhya nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuítekakonyha.

⁵¹ Imá tjetaoan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'án.

⁵² Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrua kixin tí tsitekaonni tí nkehe tjákua jaha ntá í ts'enhyani, ichrua.

⁵³ ¿Xá imá tétōan jaha la ntá kánhyó t'etōan it'eni Abraham? Jehé ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'ín Jesús ntáchro ch'án kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosàyana ch'án na ntá jahará ntáchrorá kixin jehé ch'án mé Dios kuèntará.

⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyōna tí jahará chrókjuít'ayahará. Kjánchó janhan na choxian ch'án la ko ntaxiteyáha tí nkehe t'etōan ch'án.

⁵⁶ Ch'ín Abraham tí nkexro tsík'axrjeníxinrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uíkon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuènté ntáchrua kixin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kixin:

—Imá tjetaoan tí nkehe tjétjonkará kixin naxa kohya ch'ín Abraham mé xráxín itjén janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án nínko ntá chr'éxin k'uaxrjexín ch'án ntiha. K'uátsínka ch'án jnkosiné tí tjejó sín sákjuí ch'án.

9

Ch'ín Jesús kjuínchekitōhe jína ijnko ch'ín tsíkokjéxín t'ikonhya ch'án

¹ K'uátsínka sín ijnko ntja ntá k'uíkon ch'ín Jesús ntiha tjen ijnko ch'ín tsíkokjéxín t'ikonhya ch'án.

² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuènté tsíkokjéxín ch'án t'ikonhya ch'án? ¿Á ijie it'é ó ìné ch'án ó á ijie ch'án? —ichro sín.

³ Ntá kjuátehe ch'ín Jesús ntáchro ch'án kixin:

—Jehya ijie ch'án la ko jehya ijie it'é la ko ìné ch'an. Náhí. Jehí xíkaha tsíkónhen ch'án kixin tí kjuachaxién Dios tsjakoxin kixin tsitoexín ch'án jína.

⁴ Naxa nchakotjin t'ichjánxin sít'a tí xra tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e xra.

⁵ Naxa itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuikite ch'án ntaten ch'án intsí nche k'óna nchet'õ ntá kuátematóxin ch'án ikon tí ch'ín t'ikonhya.

⁷ Ntá k'uetuēnhen ch'án tí ch'ín t'ikonhya kixin:

—Sátjia tí pila tjia ntá it'in Siloé t'ontia kuan —ichro ch'án.
(A ntá tí ihnié Siloé mé t'axrjexín nkívee sín kixin K'uítuenhen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uíkon ch'án.

⁸ Ntá tí sín ntõe chjinaxón ntõe ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'ín i k'uékjak'etjaxín ch'án k'uékjanchak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátēhe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

¹¹ Ntá kjuátēhe ch'án ntáchro ch'án kixin:

—Ijko ch'ín mé it'in Jesús mé kjuích'éna ch'án nchet'õ kuátematóxin ch'án kuān la ntá k'uetuanna ch'án kixin satsjia tí pila tjia ntá nchek'in sín Siloé ts'ontia kuān, ichro ch'án. Ntá sákjuia k'ontia, ntá xrinahya ó k'uíkuān —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátēhe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'ín k'uék'ikonhya kuítóhe jína

¹³ Ntá tí sín a sákjuíko sín tí ch'ín k'uék'ikonhya sákjuíchréhe sín tí sín fariseo a.

¹⁴ A ntá tí yaon t'ok'éhe sín mé tsíkjich'éna ch'ín Jesús tí nchet'õ kjuínchekitõexín jína tí ch'ín k'uék'ikonhya.

¹⁵ A ntá tí sín fariseo xíkjanchankíhi sín ch'án inaá kixin nkexrí kuítóhe ch'án jína t'ikon ch'án jie. Ntá kjuátēhe ch'án ntáchro ch'án kixin:

—Kuátematóxin ch'án nchet'õ kuān, ntá k'ontia kuān ntá jie t'íkuān —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuente Dios kixin chóntahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jié tí chóna ch'án jje? —ichro sín.

Mé xikaha jnkokónhya kjuenkayáxin tí jehe sín.

¹⁷ Ntá xíkjanckankíhi sín tí ch'ín k'uék'ikonhya ínaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

¹⁸ Kjánchó tí sín judío kuítekakónhya sín kixin chaxín k'uék'ikonhya ch'án ntá jie t'ikon ch'án. Ntá k'uíyehé sín tí it'é la ko tí ìné tí ch'ín tsíkitohe jína.

¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrora kixin tí tsíkokjéxin ch'án t'ikonhya ch'án? ¿Ntá nkexrí jie t'ikon ch'án? —ichro sín.

²⁰ Ntá kjuátehe tí it'é la ko tí ìné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxin ch'án t'ikonhya ch'án.

²¹ Kjánchó noehyani nkexrí kixin t'ikon ch'án jie la ko noehyani nkexro kjuínckekitohe ch'án jína. Tjanckankíhírá ch'án, ó nteto ch'án, ntá jehe ch'án tsochrónka ch'án kixin nkexrí kuítohe ch'án jína —ichro sín.

²² Mé xikaha kjuátehe tí it'é la ko tí ìné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen njnko tí sín titekaon kixin ch'ín Jesús mé tí nkexro Cristo.

²³ Mé xikaha ntáchro tí it'é la ko tí ìné ch'án kixin chrókjuanchankíhi sín ch'án, ó nteto ch'án, ichro sín.

²⁴ Ntá yóxin xík'íyehé tí sín judío tí ch'ín k'uék'ikonhya ntá k'uetuenhen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na chóna ch'an jje —ichro sín.

²⁵ Ntá tí ch'ín k'uék'ikonhya kjuátehe ch'án kixin:

—Nonahya á chóna ch'án jje o á chónahya ch'án jje. Jnkokoá nkehe nõna kixin senó k'uék'íkónhya ntá jie t'ikuan —ichro ch'án.

²⁶ Ntá xíkjanckankíhi sín ch'án ínaá kixin:

—¿Nkexrí kjuíck'e ch'án kixin kjuíntak'ikuan ch'án? —ichro sín.

²⁷ Ntá kjuátehe ch'án ntáchro ch'án kixin:

—Ó kjuixin tjonkará kjánchó títekákonhyará. ¿Nkekuènté tjinkáonrá kixin tsotjonkará ínaá? ¿Á kjaxinrá tjinkáonrá tsochréhérá ch'án? —ichro ch'án.

²⁸ Ntá kónínckakonhen sín ch'án la k'uántaxínjin sín ch'án la ko kjuátehe sín kixin:

—Jaha la chréhé tí chojni a. A ntá jeheni na chréhēni tí nkehe k'uetōan ch'ín Moisés.

²⁹ Ó noheni kixin Dios k'uénixjēhē ch'ín Moisés. A ntá tí ch'ín a la noehyani nketí tsíkji_xin ch'án —ichro sín.

³⁰ Ntá kjuátehe tí ch'ín ntáchro kixin:

—Imá ókjé tíha. Tí ch'ín a mé kjuínchek'ikonna. A ntá jahará ntáchrórá kixin noahyará nketí tsíkji_xin ch'án.

³¹ Ó noheni kixin tienhya Dios tí nkehe tjanchia tí chojni chóna jīē. Jehó tinhin ch'án tí nkehe tjanchia tí sín titekaon Dios la kō nchexiteyéhe sín tí nkehe tjinkaon ch'án.

³² Nunca kienhyéni kixin ijnko nkexro chrókjuinchek'ikon ijnko chojni tsíkokjī_xin t'ikonhya.

³³ A ntá tí nkexro a tí chrókju_xinhya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuátehe tí sín fariseo ntáchro sín kixin:

—Jaha la nchónhya jīē chonta tió kokjīha. A ntá jie ¿á tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjē_xin ch'án tí njnko a sátsji ch'án.

Ntakótán nchakuen sín

³⁵ Ntá kuínhin ch'ín Jesús kixin xīkaha k'uetuēnhen tí sín judío kixin ts'axrjē_xin njnko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjēen Dios K'óna Chojni? —ichro ch'án.

³⁶ Ntá kjuátehe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

³⁷ Ntá kjuátehe ch'ín Jesús ntáchro ch'án kixin:

—Ó k'uíkuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítekavan tí jaha Ìnchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sjntakito_xián ijīé chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uéjōntaxín kuínhin sín kixin xīkaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

⁴¹ Ntá kjuátehe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahyará jīē. Kjánchó ntáchrórá kixin t'ikonrá. Méxra chontará jīē —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjetōan tí nkehe tjetjōnkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé.

² A ntá tí nkexro t'ixenxín tí puerta na mé nkexro t'ayakonhen tí kolélo a.

³ La ko tí ch'ín tjet'ayakonhen tí puerta a mé tsakitjehe ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsōan va itén ch'án. Ntá t'íyexín ch'án jnkojnko ihnié jnkojnko tí kolélo kuènte ch'án ntá ts'axrjexín va ntōe va.

⁴ Ntá t'ikon ch'án kixin k'uaxrje kaín va ntá kuítōnhen ch'án va ntia ntá tinkáchréhe va kixin tjatsōan va itén ch'án.

⁵ Chrohya va tjichréhe va ijnko chojni ókjé na mé tsinkéhe va tí chojni a kixin tjatsōanhya va itén ókjé chojni —ichro ch'án.

⁶ Mé xikaha ntáchro ch'ín Jesús kjuíncheyóexín ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jina

⁷ Ntá chrónka ch'ín Jesús inaá ntáchro ch'án kixin:

—Ijnko nkehe tjetōan tsotjōnkará kixin janhan la éxí tí puerta t'ixenxín tí kolélo tí t'inkachjina va.

⁸ Kaín tí sín kuitónxin ntia kui senó mé xíchee la ko chrókueé. La ntá tí kolélo la ántōsén va tí nkehe ntáchro tí jehe sín.

⁹ Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo siín kjuachaxin ts'axrjexín va tí kòrré va sátsjikjine va la ko siín kjuachaxin ts'ixenhen va tí ts'inkachjina va inaá.

¹⁰ A ntá xíchee mé jehó chrókueé la ko tjinkaon chrók'óyán la ko chrókjuinchek'itjáyan kaín nkehe. A ntá janhan k'uinka kixin tsochontaxinrá kjuachón na mé kjuachón jnkochrín.

¹¹ Janhan mé ijnko pastor jina a ntá tí pastor jina mé ts'enyákonhen tí kolélo a.

¹² A ntá tí nkexro ch'e xra tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsinká va la sátsjichroe va.

¹³ Mé xikaha tí chojni tjinkaon chrókjuacha tí xra chrókjuich'e ó la mé sátsji. A ntá tí kolélo la ántōsén ch'án kuáhya ch'án kuenté tí jehe va.

14-15 'A ntá janhan mé ijnko pastor jína. Mé xíkaha T'aná chóxin ch'án tí janhan la ko kjaxin janhan choxian tí jehe ch'án mé xíkaha choxian janhan tí sín éxí kolélo kuèntana la ko jehe sín mé chóxin sín tí janhan. Ntá ts'ényákonhan tí sín éxí kolélo kuèntana.

16 Kjaxin chonta kolélo naxa jehya kòrré va ntihi mé kjaxin t'ichjánxin sátsjicakjián va. A ntá tí tsitekakonna va ntá ts'óna jnkokoá kòrré va la ko jnkokoá nkexro ts'ayakonhen va.

17 'Tjuana T'aná kixin kjónté its'én la tsoxechónna ínaá.

18 Kohya nkexro tsakitsjena tí kjuachón chonta janhan tí chrókuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna ínaá. Tíhi mé k'uetuanna T'aná —ichro ch'ín Jesús.

19 Tió kuínhin tí sín judío tí nkehe ntáchro ch'ín Jesús ntá kjuankixin jnkokoáhya kjuenkayáxin sín.

20 Nchónhya tí jehe sín ntáchro sín kixin:

—¿Nkekuènté tinhínrá tí nkehe ntáchro ch'án? Jehe ch'án mé chónta ch'án nchakuen tí jínahya la ko lóco ch'án —ichro sín.

21 Ntá ikjé sín ntáchro sín kixin:

—Xíkahya chrónixja ijnko chojni chónta nchakuen tí jínahya. ¿Á ijnko nchakuen tí jínahya la á jína chrókuinçek'ikon ijnko chojni t'ikonhya? —ichro sín.

Tí sín judío kuítekakuenhya sín tí ch'ín Jesús

22 A ntá tí nchakuen kin tí chjasin Jerusalén k'uúxin kia xraxinkakonxín sín tí yaon tsíkjixin tsík'óna nínko.

23 Ntá ch'ín Jesús itjen ch'án tí nínko tí ntasin kuènte Salomón.

24 Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chrónka ntoá kixin á chaxín jaha tí Cristo —ichro sín.

25 Ntá kjuátehe ch'ín Jesús kixin:

—Ó tjonkará ntá naxa títekákonhyará. Kaín tí xrá tjét'a janhan tí kjuachaxin kuènte T'aná mé tjákoxin nkexro tí janhan.

26 Kjánchó jahará títekákonhyará kixin jahará la jehya kolélo kuèntana éxí tjonkará senó.

27 Tí kolélo kuèntana mé tjatsoan va tí tanná la ko kjaxin janhan tjátsoan tí jehe va la ko jehe va mé chréhe va tí janhan.

28 Janhan mé tjahá va tí kjuachón jnkochrín la í ts'itjáyanhya va la ko ninkexró tsjachahya tsakitsjexín va tjaná.

29 Ó kjuanjon T'aná, mé tí nkexro tjetóxin t'etsoan, na ninkexró tsjacha tsakitsjexín va tí tja ch'án.

³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xro chróchjéhe sín ch'án inaá.

³² Ntá kjuátehe ch'ín Jesús ntáchro ch'án kixin:

—Nchónhya nkehe jína k'uikonrá kjuákoxian kjuachaxin kuènte T'aná. ¿Ntá nkekuèté chróchjínará xro? —mé chro ch'án.

³³ Ntá kjuátehe tí sín judío kixin:

—Jehya tí kjuaxroan jína tjásian chrótjiáxiánni xro. Náhí. Jaha ijnko chojni ó ntá kjuincheyóhé asán Dios na mé tsotjiáxiánni xro —ichro sín.

³⁴ Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjixinrá éxí Dios tí jahará.”*

³⁵ Ntá ó noheni nkehe ntáchro xroon itén Dios na ntá xit-jahya tsitekakonhyani tíha. Mé xikaha ntáchro Dios kixin éxí Dios jnkojnko nkexro k'uáyéhe itén ch'án.

³⁶ A ntá kjueyána Dios ichr'ánna ch'án chjasintajni, ¿ntá nkekuèté ntáchrórá kixin k'uántaxínhan Dios kixin janhan ntáxrjan kixin Xjeen Dios tí janhan?

³⁷ Kja tí chrókujt'ahya tí xra ich'e T'aná la chrókuitekákonhyará.

³⁸ A ntá kjónté tjét'a tí xra a kjónté títekákonhyará tí janhan na mé chrókuitekáonrá tí xra tjét'a chrókónoaxínrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

³⁹ Mé xikaha chrótsé sín tí ch'ín Jesús inaá chrók'uikjéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xikjan ch'án tí í jnko lado ntario Jordán inaá tí k'uékjak'e ch'ín Juan k'uékikítexín ch'án chojni senó.

⁴¹ Ntá nchónhya chojni sákjuíchréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jié la kjónté ntoá tí nkehe chrónka ch'án kuènte tí ch'ín í —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

¹ Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta.

² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuíkítexín aceite xraxé toté Ìnchéni la ko kjuínchexámáxin tjan kaxihi tjan toté ch'án.*

* 10:34 Salmo 82.6 * 11:2 Juan 12.3

³ A ntá yóí tí kichó ch'án chjin ichr'án sín ijnko nkexro tsochénta tí ch'ín Jesús kixin:

—Inchéni jaha, tí nkexro choxian tjuèhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

—Tí chin chóna ch'án jehya kixin ónaá chrók'uitjáyanxón ch'án tí ts'en ch'án. Náhi. Tíha mé tsjakoxin tí kjuachaxin jié kuènte tí Xjeen Dios —ichro ch'án.

⁵ A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro.

⁶ Na ntá tió kuínhin ch'án kixin níhi ch'ín Lázaro na kjónté kuítóhe ch'án iyó yaon inaá tí nó kjuák'e ch'án.

⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea inaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha inaá? —ichro sín.

⁹ Ntá ntáchro ch'ín Jesús kixin:

—Jnkojnko yaon mé chóna teyó hora. Tió ixri chojni nchakotjin tsóténkixinhya sín ninkehó kixin t'inkaséyanxín xrohi chjasintajni a.

¹⁰ Tí sín ixri tie mé tsóténkixin sín nkehe kixin chóntahya sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayaḥa ch'án —ichro ch'án.

¹² Ntá ntáchro tí sín k'uájiko ch'án kixin:

—Inchéni, tí k'uájua ch'án la mé chrókuitóhe ch'án jina —ichro sín.

¹³ Kjánchó tí nkehe ntáchro ch'ín Jesús mé t'axrjexín kixin ó tsíkjixin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjejua ch'ín Lázaro.

¹⁴ Ntá ntoá chrónka ch'ín Jesús kixin:

—Ó tsík'en ch'ín Lázaro.

¹⁵ Ntá chána kixin kohyana ntiha kixin mé xikaha tsítekákonxínra. A ntá jie ìntará sátsjitsjeheni ch'án —ichro ch'án.

¹⁶ Ntá ch'ín Tomás, kjaxin tikitexín sín ch'án ch'ín Nóhé, mé ntáche ch'án tí í so sín kixin:

—Sátsjini koíni kaín ni ts'enkaoni Inchéni —ichro ch'án.

Ch'ín Jesús ntáchro ch'án kixin sinchexechón ch'án chojni inaá

¹⁷ Ntá kjuíji ch'ín Jesús kuínhin ch'án kixin ch'ín Lázaro la ó chóna noó yaon tsíkixravá ch'án.

18 **A** ntá tí chjasin Betania mé chjinaxón tí chjasin Jerusalén, chóna iyó kilómetro ko t'ò kjínxín.

19 **A** ntá itsjé tí sín judío sátsíkjitsjehe sín tí tjan Marta la ko tí tjan María tjejónixjehe sín kixin kánhyó ts'ává sín kixin tsík'én tí kichó sín a.

20 Ntá kuínhin tjan Marta kixin ó kui ch'ín Jesús ntá k'uaxrjexín tjan nchia tsjixinhin ntia. **A** ntá tí tjan María kuítóhe tjan nchia.

21 Ntá tí tjan Marta ntáche tí ch'ín Jesús kixin:

— Ìnchéni jaha. Chrókjuak'e ntihi ntá chrók'uenhya kichó ni.

22 Kjánchó ó nòna kixin Dios tsotjáha kaín nkehe tsjanchehé ch'án —ichro tjan.

23 Ntá ntáchro ch'ín Jesús kixin:

— Tsoxechón kichuá inaá —ichro ch'án.

24 Ntá ntáchro tjan Marta kixin:

— Ó nòna kixin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

25 Ntá ntáchro ch'ín Jesús kixin:

— Janhan mé ntáxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sjntaxechón sín inaá.

26 La ko kaín xín tí sín naxa tjejóchón sín la tsitekaon sín tí janhan na ts'enhya sín. ¿Á titekávan xikaha ní? —ichro ch'án.

27 Ntá ntáchro tjan kixin:

— Chaxín Ìnchéni titekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkjixravá nkexro Lázaro

28 Ó kjuixin ntáchro tjan Marta xikaha ntá sákjuík'iyjehe tjan kichó tjan María ntá imó chénka tjan kixin:

— Ntiha tjen Maestro t'iyahá ch'án —ichro tjan.

29 Ntá kuínhin tjan María ntá tuénxín k'uínkatjen tjan sákjuítsjehe tjan tí ch'ín Jesús.

30 Naxa tsík'ixenhya ch'án chjasin naxa tjen ch'án tí xéta ch'án tjan Marta.

31 Ntá tí sín judío tjejónixjehe tjan María kixin kánhyó ts'ává tjan, mé k'uíkon sín kixin tjoka k'uaxrjexín tjan nchia, ntá kjuíchréhe sín tjan kjuenkayáxin sín kixin sátsji tjan tí tsíkjixravá kichó tjan, ntaha tsjitsjánkama tjan ch'án, ichro sín.

32 Ntá tí tjan María mé kjuíji tjan tí tjen ch'ín Jesús ntá kjuák'exín toch'in tjan toté ch'án ntáchro tjan kixin:

— Ìnchéni jaha, chrókjuak'e jaha ntihi ntá chrók'uenhya kichiná —ichro tjan.

33 Ntá k'uíkon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án.

34 Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Inchéni, ¿á sátsjitsjehé? —ichro sín.

35 Ntá tsjánka ch'ín Jesús.

36 Ntá ntáchro tí sín judío kixin:

—Tsjehérá kixin imá tjuèhe ch'án tí ch'ín tsík'en —ichro sín.

37 Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

38 Ntá imá t'avá asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro.

39 Ntá k'uetqan ch'ín Jesús kixin:

—Tjakjíyan tí xro a —ichro ch'án.

A ntá tí tjan Marta mé kichó tí nkexro k'uén mé ntáchro tjan kixin:

—Inchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

40 Ntá kjuátehe ch'ín Jesús ntáchro ch'án kixin:

—Ó tjonka kixin tsítekávan ntá ts'ikuan tí kjuachaxin jie kuènte Dios —ichro ch'án.

41 Ntá kjuakjìin sín tí xro a. Ntá ch'ín Jesús konta ch'án nkajní ntáchro ch'án kixin:

—It'éni, tjáncháha kjuasáya kixin ó kuínhín tí nkehe ntáxrjan.

42 Janhan na ó nòna kixin xráxín tjetinhín tí nkehe ntáxrjan ntá xikaha ntáxrjan jie kixin tsinhín tí sín tjejóntaxín ntihi ntá tsitekaon sín kixin jaha mé kuétqan k'uinka —mé ichro ch'ín Jesús.

43 Ntá kjuixin nixja ch'án tíha ntá itsen k'uèya ch'án kixin:

—¡Lázaro, t'axrjéxian méhe! —ichro ch'án.

44 Ntá tí ch'ín tsík'en k'uaxrjexín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkèxin ijnko ka. Ntá k'uetqan ch'ín Jesús kixin:

—Tjasintankará tí ka chróntetoxín ch'án kixin jína tsji ch'án —ichro ch'án.

*Imó kjuenkayáxin sín kixin nkexrí ts'óyan sín tí ch'ín Jesús
(Mt. 26.1-5; Mr. 14.1-2; Lc. 22.1-2)*

45 Ntá itsjé tí sín judío sákjuikotoxin sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án.

46 Kjánchó iso tí jehe sín sákjuítsjehe sín tí sín fariseo kjuíchénka sín tí kjuaxroan tsíkjasin ch'ín Jesús.

47 Ntá tí sín fariseo la ko tí sín nchaṭ'á t'et̄oan jnkokoá kójnkotséko sín tí sín ant̄si t'et̄oan, la ntáchro sín kíxin:

—¿Xá nkexrí chrókjuich'eheni tí ch'ín a kíxin jehe ch'án mé tjasin ch'án kjuaxroan jié?

48 A ntá tí chrókuit̄oheni ch'án x̄ikahó ntá kaín xín chojni chrókuitekaon sín tí jehe ch'án, ntá tsi tí sín romano t'et̄oan sinchek'it̄jayan sín tí n̄nkoéni la ko tí x̄ra chóntani la ko tí nación kuènténi —ichro sín.

49 Ntá ch'ín Caifás mé tí nkexro t'et̄uēnhen tí sín nchaṭ'á tí nánó a ntáche ch'án tí jehe sín kíxin:

—Jahará la noahyará ninkehó tíha

50 la ko kjá ní tjenkayáxinhyará kíxin íchá jína kíxin jnkokoá chojni chrók'uenyákonhen chjaséni kíxin ntá chrók'uit̄janyhya kuenté tí nación kuènténi —ichro ch'án.

51 Kjánchó ch'ín Caifás la jehya jehó ch'án chrókjuenkayáxin ch'án tíha. Náhi. Jehe ch'án mé k'uet̄uēnhen tí sín nchaṭ'á tí nánó, a ntá tí Nchakuen Dios kjuínchekónohe ch'án kíxin ch'ín Jesús mé ts'enyákonhen tí nación judía.

52 A ntá jehya tí nación kuènte sín ó chrók'uenyákonhen ch'án. Náhi. Kjaxin kíxin sinchekaá ch'án kaín tí sín ts'óna xjeen Dios tjejó sín kuenté chjasintajni.

53 A ntá tí yaon a tí sín t'et̄uēnhen tí sín judío mé kjuankíxin sín kjuenkayáxin sín kíxin chrók'óyán sín tí ch'ín Jesús.

54 A ntá ch'ín Jesús la í noxínhya k'uáji tí k'uéjé tí sín judío, na mé k'uaxrjexín ch'án tí estado Judea, sákjuí ch'án chjinaxón nteje, tí tjen ijnko chjasin it'ín Efraín. Ntaha kuít̄oeko ch'án tí sín k'uájiko ch'án.

55 Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjexín sín chjasén sín sákjuí sín chjasin Jerusalén kíxin ntaha tsoyaxínhin sín kíxin tsotjóa sín kjónté nax̄a xrankíxinhya ts'ixin tí kia pascua.

56 Ntaha k'uájikjeyá sín tí ch'ín Jesús k'uéjóxenhen sín tí n̄nko jié ntá kjuanchankíhi sín kíchó sín kíxin:

—¿Jahará nkechrórá? ¿Á chrókjuí ch'án tí kia ní o náhi? —ichro sín.

57 A ntá tí sín fariseo la ko tí sín t'et̄uēnhen tí sín nchaṭ'á na ó k'uet̄oan sín kíxin tí siín ijnko nkexro nohe nketí tjen ch'ín Jesús chróchrónka sín kíxin ntá jína chrókjuitsé sín ch'án chrókjuinchenteto sín ch'án la ko chrókjuak'echjina sín ch'án.

12

Ijnko tjan kjuíncheká tjan aceite xraxé náxrxjón toté tí ch'ín Jesús

(Mt. 26.6-13; Mr. 14.3-9)

¹ Naxa t'itjáyan injon yaon ntá ts'ixin tí kia pascua. A ntá ch'ín Jesús sákjuí ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án.

² Ntá ntiha kjóne sín injko kónjín kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uéjéjó sín kjóneko sín tí ch'ín Jesús.

³ Ntá tjan María kuikao tjan it'o litro aceite tsík'óna xroan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxihi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan.

⁴ Ntá ch'ín Judas Iscariote, it'é ch'án mé it'in Simón, jehe ch'án mé injko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kixin:

⁵ —¿Nkekuèté kóxihiya tí xroan xraxé, chrókóxiin iní ciento chichaon denario kixin chrókjuinkitsa tí sín nòà? —ichro ch'án.

⁶ Kjánchó ch'ín Judas la jehya ntáchro ch'án xikaha kixin chrókjuikonóehé ch'án tí sín nòà. Náhí. Ntáchro ch'án tíhi kixin xráxín chee ch'án kixin jehe ch'án t'ayakonhen ch'án tí nkehe tjinká chichaon ntá xráxín teé ch'án tí chichaon tsixrenájín ntiha.

⁷ Ntá ntáchro ch'ín Jesús kixin:

—Nté t̄toherá tjan. Tsíkjak'echjina tjan tí xroan a kixin tí yaon tsoxrávána.

⁸ Tí sín nòà jnkochrín sín ts'ejokoará sín. A ntá janhan jnkochrínnya ts'ejóni —ichro ch'án.

Tí sín judío itjo sín nkexrí chrók'óyán sín tí ch'ín Lázaro

⁹ A ntá itsjé tí sín judío k'uíxikónohe sín kixin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'ín Jesús ó. Náhí. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús.

¹⁰ Ntá tí sín ncha't'á t'et̄oan mé kójnkotsé sín kjuenkayáxin sín chrók'óyán sín tí ch'ín Lázaro kjaxin

¹¹ kixin itsjé tí sín judío kuítekaon sín tí ch'ín Jesús kixin xikaha kjuínchexechón ch'án tí ch'ín Lázaro ntá k'uaxrjekjanxín sín tí sín ncha't'á.

K'uíxenhen ch'ín Jesús chjasin Jerusalén

(Mt. 21.1-11; Mr. 11.1-11; Lc. 19.28-40)

12 Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uixikónohe sín kixin tsjiji ch'ín Jesús tí chjasin ntiha.

13 Ntá kóchrínjin sín chaan ntakajni kjuíxinhin sín ntia itsji ch'ín Jesús, itsje sín, ntáchro sín kixin:

—Tjancheheni Dios kjuasáya. Imá jína tí nkexro kuixin tí kjuachaxién It'eni tjen nkaya nkajni. Imá jína tí ch'ín Rey ts'etuenhen tí nación Israel —ichro sín itsje sín.

14 Ntá tsík'itja ch'ín Jesús ijnko kolócho la ntá kjuák'ekjen ch'án, éxí nixja itén Dios kixin:

15 Chrakonhyará jahará tjejórá chjasin Jerusalén, tsjehérá ó tjekui tí ch'ín Rey kuéntará, tjekjen ch'án ijnko kolócho.*

16 A ntá tió kónhen tíha kíenxínhya tí sín k'uájiko ch'ín Jesús kixin nkekuénté xikaha kónhen. A ntá chr'éxin tió kjuixin sákjujia ch'án nkaya nkajni ntá xraxinkaon sín kixin xikaha tsíkjin tí sín k'uéchrónka itén Dios ósé nkexrí tsonhen ch'án, na ntá xikaha chaxín xiteyá tí chrónka sín senó kixin xikaha tsonhen ch'án.

17 Mé xikaha kaín tí sín tsíkójnkotsé tí kjuák'e ch'ín Jesús tió k'uíyehé ch'án tí ch'ín Lázaro kixin ts'axrjexín ch'án tí tòyē tsíkjixravá ch'án ntá xechón ch'án mé tí sín a mé chrónka sín tí nkehe k'uikon sín.

18 Mé xikaha sákjuíxinhin sín tí ntia tsjixin ch'ín Jesús, k'uixikónohe sín kixin xikaha tsíkjasin ch'ín Jesús tí kjuaxroan jíé.

19 Mé xikaha ntáchro tí sín fariseo itjo sín kichó sín kixin:
—Tsjehérá kaín rá, ninkehó tsjachahyani sich'eni kixin kaín xín chojni sákjuíchréhe tí jehe ch'án —ichro sín.

Iso sín nkivee griego tjejá sín tí ch'ín Jesús

20 Iso sín nixja griego k'uéjójákjan tí sín sákjuj sín tí kia chjasin Jerusalén tsoxraxinkakonxín sín Dios.

21 Ntá kóchjinehe sín tí ch'ín Felipe, chjasén ch'án mé Bet-saida, estado Galilea, chrónóehé sín ch'án kixin:

—Tjinkaonni chrók'uikonni tí ch'ín Jesús —ichro sín.

22 Ntá ch'ín Felipe sákjuíchenka ch'án tí ch'ín Andrés. Na ntá yóí sín sákjuíchenka sín tí ch'ín Jesús.

23 Ntá ntáchro ch'ín Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyehé ch'án tí kjuachaxin kuènte It'é.

24 A ntá tsotjonkará ijnko nkehe chaxín kixin tí chrókuítsínkahya ijnko noatrigo tí nche chrók'uenhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kixin chrótjá sín.

* 12:15 Zacarías 9.9

25 A ntá tí nkexro imá tjuèhë asén kixin kohya nkehe chrók'uat sínka na mé tsochóntahya ch'án kjuachón jnkochrín. A ntá tí nkexro tje kuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochónta ch'án kjuachón jnkochrín.

26 A ntá tí jnkójín nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkójín sín sich'ena sín xra xikaha na mé T'aná mé tsjikosáyehe tí jehe sín.

Ch'ín Jesús chrónka ch'án kixin its'en ch'án

27 'Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kixin sinchekaána ch'án tí nkehe tsona jie o náhí? Kjánchó xra ó k'uinka xikaha tsona.

28 Jaha It'eni, tjáko_xian tí kjuachaxin kuènte ihniá —ichro ch'án.

Ntá kuínhin sín nixja ijnko nkexro nkajní ntáchro kixin:

—Ó kjuixin kjuáko_xian tí kjuachaxin la ko xikaha xikjáko_xian inaá.

29 A ntá tí sín tjejóntaxín tsíkinhin sín mé ntáchro sín kixin kjónta, la ko í so sín ntáchro sín kixin:

—Ijnko ch'ín ángel nixjehe ch'án —ichro sín.

30 Kjánchó ntáchro ch'ín Jesús kixin:

—Náhí. Jehya kixin janhan tí jie chrókuinhan tí nixja ch'án. Náhí. Nixja ch'án kixin tsinhínrá jahará.

31 Ntá jie tsitoxín tí ijje chojni chjasintajni na mé tí nkexro t'etoan chjasintajni mé ts'axrjehe ch'án tí xra t'etoan ch'án.

32 A ntá tió tsjak'énkania ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

33 Mé xikaha chrónkaxín ch'án kixin nkexrí ts'enxín ch'án.

34 A ntá kjuátehe tí sín ntiha ntáchro sín kixin:

—Kuínhinni nchekuáxin sín tí xroon tsíkjin sín ósé chrónka kixin Cristo la jnkochrín tsjak'e ch'án. ¿Ntá nkekuènté ntáchrúa kixin tí Xjeen Dios K'óna Chojni t'ichjánxin tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

35 Ntá ntáchro ch'ín Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen ti xrohi t'inkaséyanxín ntia. A ntá náhí la ó ts'ixin tie. A ntá tí sín ixri tí sítié a mé noehya sín nketí sátsji sín.

36 Títekáonrá tí xrohi tí naxa tjen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'ín Jesús

37 K'uékjasin ch'ín Jesús nchónhya kjuaxroan jié k'uíkonxín kon sín ntá kjónté kuítekakuenhya sín ch'án

38 kixin mé xikaha tsoxiteyá tí nkehe tsintáchro ch'ín Isaías tsíkjin ch'án ósé kixin:

Ínchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuènte ch'án.†

39 Méxra kuítekakuenhya sín tí ch'ín Jesús éxí tsíkjin ch'ín Isaías kjaxin kixin:

40 Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókienxínhya sín,

kixin ntá chrókóchjinehya sín tí janhan kixin chrókujintakitoha sín jina.‡

41 Xikaha k'uéchrónka ch'ín Isaías imá ósé kixin k'uék'ikon ch'án tí kjuachaxin jié kuènte Jesús ntá k'uéchrónka ch'án nkexrí tsjak'e tí ch'ín Jesús.

42 Kjánchó itsjé tí sín judío t'etoan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonhya sín kjuachaxin chrók'uixenhen sín tí ninkoe sín judío.

43 Mé xikaha imá kóxrjínhin sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'ín Jesús mé tsitoexixin ijíé chojni

44 Ntá itsen nixja ch'ín Jesús ntáchro ch'án kixin:

—Tí titekáonrá tí janhan na mé jehya janhván titekáonrá na mé kjaxin titekáonrá T'aná, mé tí nkexro k'uetuanna k'uinka.

45 Éxí tí t'ikonrá tí janhan mé xikaha t'ikonrá tí nkexro k'uetuanna k'uinka.

46 A ntá janhan mé xrohi k'uinka chjasintajni kixin tí sín titekaon sín tí janhan ts'ejóhya sín tí sítié a.

47 A ntá tí jnkójínrá tinhínrá tí nkehe xrjanka ntá titekákonnahyará la jehya janhan sintakjasótíar á kixin jehya kixin k'uinka sintakjasóte chojni chjasintajni. Náhí. K'uinka kixin sintakaá chojni.

48 A ntá tí titekákonhyará tí janhan la ko titekákonhyará tí tan kuèntana la ó síin nkexrí tsitoexixin ijíará, na mé éxí tí tan xrjanka mé Dios sinchekitōexín ijíará tí yaon tsjixixín chjasintajni.

† 12:38 Isaías 53.1 ‡ 12:40 Isaías 6.10

49 Jehya tí nkehe kuèntana tjéxrjanka. Náhi. T'aná na mé tí nkexro k'uetuanna k'uinka mé k'uetuanna nkehe tsoxrjanka la ko nkehe tsjàkua.

50 A ntá nòna kixin tí nkehe k'uetuan T'aná mé xranjonxín tí kjuachón jnkochrixin. Mé xikaha tí nkehe ntáxrjan mé tjéxrjanka kixin T'aná mé k'uetuanna.

13

Ch'ín Jesús kjuínchek'ònti ch'án toté tí sín k'uájiko ch'án

1 A ntá tí yaon xika tí ntóye tsjasin sín tí kia pascua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xrácín tjuèhé ch'án tí sín kuènte ch'án chjasintajni, a ntá jie tsjakoxin ch'án kixin imá tjuèhe ch'án tí jehe sín.

2 A ntá tí ch'ín Tsochren tsík'etuèhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús.

3 Ntá ch'ín Jesús la ó nohe ch'án kixin tsíkixin ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsíkjanjon kjuachaxin ts'etuèhen ch'án kaín xín nkehe.

4 Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xamáxin chojni t'ónti k'uínkat'óxin ch'án.

5 Ntá kuikja ch'án ijnko nkehe ntá, ntá kjuankixin ch'án kjuínchek'ònti ch'án toté jnkoinko tí sín k'uájiko ch'án la ko kjuínchexamáxin ch'án tí ka k'uínkat'óxin ch'án.

6 Na ntá tió kjujixraká tí tjen ch'ín Pedro, a ntá ntáchro ch'ín Pedro kixin:

—Jaha Ìnchéni la, ¿nkekuèté chrókjuínchek'óntia toténi? —ichro ch'án.

7 Ntá kjuátehe ch'ín Jesús ntáchro ch'án kixin:

—Jaha la naxa tiénxinhya tí nkehe tjét'a janhan. Chr'éxin ntá tsiénxian nkekuèté tjét'a tíha —ichro ch'án.

8 Ntá ntáchro ch'ín Pedro kixin:

—Jaha la sinchek'óntihya toténi —ichro ch'án.

Ntá ntáchro ch'ín Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'án.

9 Ntá kjuátehe ch'ín Simón Pedro ntáchro ch'án kixin:

—Náhi, Ìnchéni. Jehya tí toténi ó chrókjuínchek'óntia. Kjaxin itjani la ko ikjani chrókjuínchek'óntia —ichro ch'án.

10 Ntá ntáchro ch'ín Jesús inaá kixin:

—Tí sín tsíkixin tsík'ónti la t'ichjánxinhya kuenté sín ts'ónti sín inaá. Náhi. Jehó toté sín ó mé t'ichjánxin naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

11 Mé xikaha ntáchro ch'ín Jesús kixin kénhya sín tjóá sín kixin ó nohe ch'án nkexro sinchekji ch'án.

12 Ntá tió kjuixin kjuínchek'ónti ch'án toté sín kaín sín ntá xík'inkáya ch'án inaá tí ka kuítsáte ch'án ntá kjuák'etjaxin ch'án tí k'uínkatjēnxin ch'án. Ntá ntáchro ch'án kixin:

—¿Á kiénxinrá tí nkehe kjuít'a?

13 Jahará la ntáchrórá kixin janhan Maestro kuèntará la ko Ìnchárá. Chaxín ntoá ntáchrórá kixin janhan tíha.

14 Janhan tí Maestro kuèntará la ko ìnchárá kjuíntak'óntia totará. A ntá jahará kjaxin xikaha chrókjuínchek'óntirá toté kichuárá.

15 Janhan mé kjuákoxiā kixin xikaha chrókjuích'erá éxi kjuít'a janhan.

16 Ijnko nkehe chaxín tsotjōnkará kixin tí sín ch'exón xra mé t'etōanhya sín éxi t'etōan tí lámōe sín, la ko tí sín k'uáyéhe sín ijnko xra t'etōanhya sín éxi t'etōan tí sín kjuanjōn tí xra a.

17 Tí chrókiénxinrá nkehe tíha la ko chrókjuínchexiteyará la chrókócháhará má.

18 Jehya kaín rá xikaha ntáxrjan. Ó nòna kixin nkexro kjuéyá janhan. Kjánchó t'ichjánxin tsoxiteyá tí nkehe tsíkjin sín óse ntáchro kixin: “Ijnko nkexro tjénekian mé tsjanjōnkian.”*

19 Mé xikaha tjétjōnkará senó kixin tió ts'atsínka tíha ntá tsítékāonrá kixin janhan mé tí nkexro xráxín tjen.

20 Ijnko nkehe tjetoan tjétjōnkará kixin tí tsjánjōnrá kjuachaxin tsitōhe tí chojni ichr'an janhan, mé éxi yóhe chrókjuánjōnrá kjuachaxin chrókuitōhe tí janhan, a ntá tí tsjánjōnrá kjuachaxin tsitōna janhan mé éxi yóhe chrókjuánjōnrá kjuachaxin chrókuitōhe tí nkexro k'uetuāna k'uinka —ichro ch'ín Jesús.

Ch'ín Jesús chrónka kixin ch'ín Judas sinchekji ch'án

(Mt. 26.20-25; Mr. 14.17-21; Lc. 22.21-23)

21 Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án kixin:

—Ijnko nkehe tjetoan tsotjōnkará kixin jnkojínrá tjejorá ntihi mé sīnchekjiráni —ichro ch'án.

22 Ntá tí sín k'uájiko ch'án kjuanjixin komáxin la ko í komáxin kichó sín kixin noehya sín nkexro tí ntáchro ch'án.

23 A ntá ijnko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín.

24 Ntá ch'ín Simón Pedro kjuákoexín seña k'uetuēnhen ch'án tí í jnko ch'ín a kixin:

—Tjanchankíhí ch'án nkexro tíha —ichro ch'án.

25 A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kixin:

* 13:18 Salmo 41.9

— Ìnchéni, ¿nkexro tíha? — ichro ch'án.

²⁶ A ntá kjuátēhe ch'ín Jesús ntáche ch'án tí ch'ín a kixin:

— S̄intakjata it'ò niotja, a ntá tí nkexro tsotjaha tí t'ò niotja a mé tí nkexro a — ichro ch'án.

A ntá mé xikaha kjuínchekjata ch'ín Jesús it'ò niotja ntá chjéhe ch'án tí ch'ín Judas Iscariote, it'é ch'án mé it'in Simón.

²⁷ Ntá k'uáyéhe ch'án tí niotja ntá tuénxín k'uíxenhén asén ch'án tí ch'ín Tsochren. Ntá ntáche ch'ín Jesús tí jehe ch'án kixin:

— Tí xra tjinkávan s̄ich'e la jaí tóxakonhan — ichro ch'án.

²⁸ Kjánchó nijnko tí sín tjejóne ntiha kienxínhya sín nkekuénté xikaha ntáchro ch'án.

²⁹ Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kixin ách'e ch'ín Jesús mé k'uetuēnhen ch'án tí ch'ín Judas kixin ichrén nkehe sátsjik'ēna ch'án kuēnte tí kia a, o ách'e ichrén nkehe sinchekj̄tonhen ch'án tí sín nòa a.

³⁰ Ntá k'uáyéhe ch'ín Judas tí niotja, a ntá k'uaxrjexín ch'án ntiha. A ntá ó k'uíxin tie.

Ijnko nkehe n̄ixin k'uetōan ch'ín Jesús

³¹ A ntá ó kjuixin sátsíkji ch'ín Judas, ntá ntáchro ch'ín Jesús kixin:

— A ntá jie t̄onoxín tí kjuachaxin jíe kuēnte tí Xjeen Dios K'óna Chojni la ko tsjakox̄in ch'án tí kjuachaxin jíe kuēnte Dios.

³² Na mé xikaha tí Xjeen Dios K'óna Chojni mé tsjakox̄in tí kjuachaxin jíe kuēnte Dios. A ntá Dios mé tsjakox̄in ch'án tí kjuachaxin kuēnte Xjeen ch'án la tjoka tsoxiteyá.

³³ Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjeyará tí janhan. Ntá éxí yóhe k'uetjanka tí sín judío mé tjonkará kjaxinrá kixin: Ninkexró xitjahya tsjiji sín tí sátsjiyá janhan.†

³⁴ Ijnko nkehe n̄ixin tétuānhanrá ijie kixin chrótjuèhérá kichuárá éxí yóhe tjuahará mé xikaha chrótjuèhérá kichuárá.

³⁵ Tí tsotjuèhérá kichuárá ntá t̄onoexín kaín xín chojni síin chjasintajni kixin tinkachónkirá tí janhan — ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án

(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

— Ìnchéni, ¿nketí sátsjia? — ichro ch'án.

Ntá kjuátēhe ch'ín Jesús ntáchro ch'án kixin:

— Tí nó sátsjiyá xitjahya tsochréhérá jaí. Ntá chr'éx̄in tsjasánchréhérá ntiha — ichro ch'án.

† 13:33 Juan 7.33

³⁷ **A** ntá ntáchro ch'ín Pedro kixin:

—¿Nkekuènté xitjahya tsochráha tí jaha jaí? Kjónté chrók'uenýakonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákonna jaha? Ijnko nkehe chaxín tsotjonka kixin naxa tsotsjehya tí kochíntoa la ó tsjixin sìnchemána nía kixin chonhyana, tsixrua.

14

Jesús mé ntia sátsjixinni tí tjen It'eni tjen nkaya nkajní

¹ Tóxakuanhyará jahará. Títekáonrá Dios la ko kjaxin títekáonrá tí janhan.

² Ntoe T'aná nchónhya nchia siín ts'ejóni. **A** ntá tí xikahya chrók'uixin la xikahya chrótjonkará. Méxra sátsjiyá sjintayóxian tí chrók'uejóni.

³ **A** ntá tí sátsjiyá sjintayóxian, ntá tió tsjixin ntá ts'inka ínaá, ntá sátsjini kixin jahará kjaxin chrók'uejorá ntiha tí tsjak'é janhan.

⁴ Jahará la ó nohará nketí sátsjiyá la ko ó nohará tí ntia a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Ìnchéni, noehyani nketí sátsjia jaha. ¿**A** ntá nkexrí chrókónoheni tí ntia a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí ntia la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jina tsjiji tí tjen T'aná.

⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxínrá ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

—Ìnchéni, tìtohéni kixin tsochóxinni It'á. Táhó mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

—Felipe, ósé tjejóni, ¿a ntá naxa tjátsoanhya tí janhan ní? **A** ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuènté tjanchàna kixin chrókuítóha chrók'uikonrá tí T'aná?

¹⁰ ¿Á títekáonhya jaha kixin janhan jnkokoá tjékian T'aná, la ko T'aná tjen tí tjén janhan? Tí nkehe níjja janhan la jehya kuèntana. Náhí. T'aná tjékian janhan mé tjech'e ch'án tí xra kuènte ch'án.

¹¹ Títekáonrá kixin jnkokoá tjékian T'aná, a ntá T'aná itjen tí tjén janhan. Kjónté kuítekáonhyará xikaha la chrókuítekáonrá kixin tí kjuaxroan jie kjuákoxian k'uikonrá.

12 Ijnko nkehe chaxín tjonkará kixin tí chaxín tsítekáonrá tí janhan ntá kjaxinrá tsjachará sich'erá xra yóhe tjet'a la ko kjaxin ixra antsí jié tsjachará sich'erá kixin janhan la ó sátsjiyá tí tjen T'aná.

13 Kaín nkehe tsjanchatóxixínrá tí nina na mé tsjánjuan kixin xikaha tsjákoxian tí kjuachaxin kuènte T'aná.

14 Tí chrén nkehe tsjanchatóxixínrá nina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

15 Tí chaxín tjuèhéra tí janhan ntá chrókjuinchexiteyéhéra tí nkehe kuétuñhanrá.

16 Ntá tsoxrjannóahá T'aná kixin tsochr'án ch'án Nchakuen ch'án kixin tsjinkitsa tí jahará la ko sinchechéhe asánrá la mé ts'ejokoará jnkochrín.

17 Jehe ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin tjejokoará ch'án la ko ts'ejokoará ch'án jnkochrín.

18 Janhan na tsitoáhyará nðerá jahóra, na mé tsokjan ínaá kixin ts'ejóni.

19 A ntá séhya ntá tí sín chjasintajni ts'ikonhya sín tí janhan ínaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjéchuñ.

20 A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá tjejóni.

21 Tí nkexro nohe tí nkehe tétuñ la ko sinchexiteyéhe sín mé xikaha tsjákoxín sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehe sín la ko kjaxin janhan tsotjuahá sín la ko tsjákoxian nkexrí tjeñ janhan —ichro ch'ín Jesús.

22 A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Ínchéni, ¿nkekuèté jehóni tjákoxian, a ntá tjákoéxinhya tí chojni chjasintajni? —ichro ch'án.

23 Ntá kjuátehe ch'ín Jesús ntáchro ch'án kixin:

—Tí nkexro tjuèhe tí janhan mé sinchexiteyéhe tí nkehe tétuñ. La ko T'aná mé tsotjuèhe tí jehe sín la ntá T'aná la ko janhan ts'ejókoni sín.

24 A ntá tí sín tjuèhya tí janhan la mé nchexiteyèhya sín tí nkehe tjákua. A ntá tí nkehe tjákua tjejotinhínrá la jehya kuèntana. Náhi. Kuènte T'aná tí nkexro k'uetuñna k'uinka.

25 Naxa tjejóni la tjetjonkará kaín tíhi.

²⁶ **A** ntá Nchakuen T'aná tsochr'án ch'án kjuachaxin nina mé tsjinkitsa tí jahará la ko sinchechéhe asánrá la ko tsjakohará kaín nkehe la ko sinchexraxinkaonrá kaín nkehe xrjanka.

²⁷ 'Kjuaxróxin tsjtoha la ko kjuaxróxin kuéntana tsotjahará. Jehya éxí tí kjuaxróxin chrókjuanjon tí sín chjasintajni. Náhi. Chrókóxakuenhya asánrá la ko chróchrakonhyará.

²⁸ Ó kuínhínrá ntáxrjan kixin sátsjiyá la ko tsokjan janhan ts'ejóni inaá. Tí chaxín tjuèhérá tí janhan ntá chrókócháhará tí kuínhínrá kixin sátsjiyá tí tjen T'aná kixin antsí t'etōan ch'án la kánhyó tētoan janhan.

²⁹ Senó tjétjonkará tíhi kixin tió tsonhen tíha la ts'ikonrá ntá tsítekáonrá jahará.

³⁰ 'Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuenhen tí sín chjasintajni. **A** ntá jehe ch'án la ninkehó t'etuannahya tí janhan.

³¹ Kjánchó t'ichjánxin kixin xikaha tsonhen ntá tí sín chjasintajni mé tsonohe sín kixin tjuaha T'aná la ko nchexiteyáha tí nkehe k'uetuanna ch'án. Ntá jie t'inkatjenrá sátsjixínni ntihi.

15

Tí nta t'óna to uva la ko tí chaan nta

¹ 'Janhan mé éxí yóhe ijnko ntanòa tjechón itsa to uva la ko T'aná mé éxí yóhe tí nkexro t'ayakonhen tí nta a.

² Tsochrínjin ch'án tí chaan nta t'ónahya to. **A** ntá tí chaan nta t'óna to mé nchetjuák'á ch'án kixin ntá ts'óna antsí má tsjé to.

³ **A** ntá jahará la kótjuáxinrá tí tanná k'uetjonkará senó.

⁴ Tí tsjtoéhyará tí janhan ntá kjaxin janhan tsjtoahya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahórá tsjachahyará sich'erá tí xra kuéntana tí tsjtohérá tí janhan.

⁵ 'Janhan na mé yóhe tí ntanòa, a ntá jahará la tí chaan tí ntanòa tsík'ayanta. Tí nkexro jnkokoá tjenkayáxinkian mé tsjacha ts'óna nchónhya to. **A** ntá tí tsinkáchónkihya sín tí janhan la ninkehó xra tsjachahya sín sich'e sín.

⁶ **A** ntá tí nkexro jnkokoáhya tjenkayáxinkian na mé éxí yóhe tí nta ch'ehya xra tsíkóchrínjin sín tsík'itjí sín chrínta tí nonte a tsoxámá ntá tsoxrejo ntá tsoche.

⁷ 'Ntá tí chaxín tsjtoéhyará tsinkachónkirá tí janhan la ko ts'itjyanhyará tí nkehe kjuákohará ntá tsjanchiará ichrén nkehe tjinkáonrá la ts'ayéhérá.

⁸ **A** ntá T'aná la tsochéhe ch'án tí ts'ónará itsjé to. Mé xikaha tsjakoxinrá kixin tinkachónkirá tí janhan.

⁹ Janhan tjuahará tí jahará éxí tjuana T'aná. Chrókónohará kixin tjuahará.

¹⁰ Tí tsitekáonrá tí nkehe kuétuñhanrá ntá tsonohará kixin tjuahará éxí yóhē kjaxin janhan ntaxiteyá tí nkehe k'uetuanna T'aná ntá kónona janhan kixin tjuana ch'án.

¹¹ 'Mé xikaha tjonkará kaín tíha kixin ntá éxí chàna mé xikaha tsjintaxín tsochéhē asánrá.

¹² Tí nkehe kuétuñhanrá la mé tíhi kixin chrótjuèhérá kichuára éxí tjuahará xikaha.

¹³ Ninkexró chrókóyóhē éxí tí nkexro imá tjuèhe tí sín chóxin ch'án ntá ts'enyákonhen ch'án tí jehe sín.

¹⁴ Jahará la chojni choxian tí tsitekáonrá tí nkehe tétuñhanrá.

¹⁵ Ntáxrjanhya janhan kixin jahará chojni ch'exón xra kixin tí chojni xikaha ch'exón xra mé noehya sín nkehe tí xra ch'e tí lámoe sín a. Náhí. A ntá jahará la chojni choxian kixin kaín xín nkehe kjuakona T'aná mé kjuáohará.

¹⁶ Jehya kixin jahará kjuéyará tí janhan. Náhí. Janhan mé kjuéyá tí jahará kixin tsotjahára xra, a ntá éxí yóhē to xé mé chrók'uaxrje jina tí xra sich'enará kixin chrók'uitjányahya. A ntá T'aná mé tsotjáhará ch'án kaín xín nkehe tsjanchexínrá njina.

¹⁷ Mé xikaha tétuñhanrá kixin tsotjuèhérá kichuára.

Tí sín chjasintajni nínkakonhen sín tí ch'in Jesús la ko tí sín tinkáchónki ch'án

¹⁸ Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín.

¹⁹ Tí chrókókuèntará chjasintajni ntá tí sín chjasintajni chrótjuahára sín kixin naxa kjéhyará sín. Kjánchó janhan kjuéyá tí jahará kixin chrók'uaxrjékanxínrá tí sín siín chjasintajni. A ntá tí sín chjasintajni nínkakonhanrá sín kixin jahará jahará kuèntará chjasintajni.

²⁰ Xráxinkáonrá tí nkehe tsítjonkará kixin tí sín ch'ehe lámoe sín xra tjetóxinhya ts'etoan sín.* Éxí yóhē chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuáohā sín ntá kjaxin tsitekaon sín tí nkehe naxa tsjáohérá sín.

²¹ Mé xikaha sit'ahará sín kixin jahará tinkachónkirá tí janhan la ko jehe sín chónhya sín tí nkexro ichr'ánna k'uinka ntihi.

²² Tí chrók'uinkahya janhan ntihi chrónixjahya sín ntá chrókuamáhya sín jiē. Ntá jié kohya nkerí tsaáxin sín kixin tí jiē tinkákjasin sín.

²³ Tí sín nínkakonna mé xikaha nínkakonhen sín T'aná.

* 15:20 Juan 13.16

24 Chróchóntahya sín jie tí chrók'uejókianhya sín ntihi chrókuásinhya janhan kjuaxroan jie éxí tsíkjasinhya ninkexró senó. Ntá jie ó k'uikon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin.

25 Mé xikaha tsonhen kaín tíha kixin ntá tsoxiteyá tí nkehe ntáchro tí ley kuènte sín kixin: “Kohya jie kjuásian janhan ntá kjónté kónínkakonna sín.”†

26 A ntá tsi tí nkexro tsjinkitsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuènte T'aná. A ntá jehe ch'án mé tsochrónka nkexrí tjén janhan

27 la ko jahará kjaxinrá tsochrónkará nkexrí tjén janhan kixin tí xrankixín la k'uéjóni jnkokoá.

16

1 'Kaín tíhi tjétjonkará kixin chrókuítóéhyará tí nkehe kjuákohará.

2 Tí sín judío tsjanjonhya sín kjuachaxin ts'ixenhenrá nínkóé sín la ko tsjixraká tí yaon kixin tí sín ts'óyán sín tí jahará tsonáchro sín kixin xikaha mé tjejóch'e sín xra kuènte Dios, tsixro sín.

3 Mé xikaha sich'e sín kixin chónhya sín T'aná la ko chónhyana sín.

4 A ntá tjonkará kaín tíhi kixin tió tsjixraká tí yaon xikaha tsonhen ntá tsoxráxinkáonrá kixin ó k'uétjonkará senó a.

Tí xra ch'e Nchakuen Dios

'Tí xrankixín k'uétjonkahyará tíhi kixin jnkokoá k'uék'ejóni.

5 Ntá jie sátsjiyá tí tjen tí nkexro ichr'ánna k'uinka. Kjánchó nijnkorá tjanchankíhyará nketí sátsjiyá.

6 Ntá kjuixin tjonkará tíha ntá imá t'avará kixin kuínhínrá xikaha xrjanka.

7 A ntá chaxín tí nkehe tjétjonkará kixin íchá jína sátsjiyá kixin jahará jína chrók'uejorá. A ntá tí sáchrókjuíhya ntá chrókuihya tí nkexro tsjinkitsará. A ntá tí sátsjiyá janhan ntá tsétoan kixin itsi ch'án ntihi.

8 A ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jie, la ko itjen ijnko ntia ntoá chrókuakja sín la ko Dios mé sinchekitoexín tí jie kjuasin sín.

9 Xikaha chóna sín jie kixin tinkáchónkihya sín tí janhan.

10 A ntá tsonohe sín kixin itjen tí ntia ntoá kixin sátsjiyá tí tjen T'aná ntá ts'ikonhyará tí janhan ínaá,

† 15:25 Salmo 35.19; 69.4

11 la ko tsonohe sín kixin Dios sinchekitoexín ijie kixin ó kjuixin kuítóexín ijie tí nkexro t'etōan chjasintajni kixin tsjasóte.

12 'Naxa chonta janhan itsje nkehe chrótjonkará, kjánchó chrókjuachahará chrókiénxinrá jie.

13 A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjakohará ch'án kaín xín nkehe ntoá. Méxra jehya tí nkehe kuente ch'án tsochrónka ch'án na mé tí nkehe tsinhin ch'án mé tsochrónka ch'án tsjakohará ch'án tí nkehe tsonhen chr'éxin.

14 Jehe ch'án mé tsjikosàyana ch'án kixin ts'áyehē ch'án tí nkehe kuëntana ntá tsjakohará ch'án nkehe tíha.

15 Kaínxín nkehe chóna T'aná na mé kuëntana. Mé xikaha ntáxrjan kixin tí Nchakuen Dios chaxín ntoá mé ts'áyehē ch'án tí nkehe kuëntana ntá tsjakohará ch'án nkehe tíha.

Senó ts'avá sín ntá chr'éxin tsochéhe sín

16 'Ntá í séhya la í ts'ikonhyará tí janhan. La ko kjaxin séhya xik'ikonrá tí janhan inaá kixin sátsjijá tí tjen T'aná —ichro ch'án.

17 Ntá iso tí sín k'uájiko ch'án mé kjuanchankíhi sín kichó sín kixin:

—¿Nkexrí t'axrjexín tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án inaá kixin sátsji ch'án tí tjen It'é ch'án?

18 ¿Nkexrí t'axrjexín tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

19 Ntá kónohe ch'in Jesús tí nkehe chrókjuanchankíhi sín ch'án ntá ntáche ch'án sín kixin:

—Xikaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan inaá. ¿Á tíha mé tjeotjan-chankíhírá kichuárá ní?

20 Tjéjtjonkará ijnko nkehe chaxín kixin imá tsotsjankará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sñtaníhará kjónté chr'éxin tsocháhará má.

21 Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni.

22 Mé xikaha jahará ijie t'avará. Ntá xik'ikuān tí jahará inaá ntá imá tsochéhe asánrá la ko tsokohya ninkexró tsakitsajahará tí kjuachéhe tsochontará.

23 "Tió tsi tí yaon a ntá tsjanchankínahará ninkehó. Chaxín tí nkehe tjéjtjonkará kixin T'aná tsotjáhará ch'án kaín nkehe tsjanchatóxixínrá ñina.

24 *Naxa* kjuánchatóxixínhyará ninkehó tí *nina*. Ntá jie tjanchiará la ts'ayéherá, a ntá tsjintaxín tsocháhará.

Ìnchéni Jesucristo mé kjuacha ch'án k'uetōan ch'án, ntá chjasintajni la náhi

25 Tí nkehe tjétjonkará mé kjuintayóaxián ó. Ntá tsjixraká tí yaon la í ninkehó s̄intayóaxián na mé ntoá tsotjonkará nkexrí tjen T'aná.

26 *A* ntá tí yaon a mé tsjanchaxínrá nkehe *nina*. Ntá ntáxrjanhya tíhi kíxin tsonixjayákonhanrá tí tjen T'aná

27 kíxin jehe T'aná mé tjuahará jahará. Na mé tjuahará ch'án kíxin jahará tjuanará tí janhan la ko kíxin kuítekáonrá kíxin janhan k'uinkaxian tí tjen Dios.

28 K'uaxrjéxian tí tjen T'aná k'uinka chjasintajni. Ntá jie la ó tsitōhā chjasintajni ntá sátsjiyá ínaá tí tjen T'aná —ichro ch'án.

29 Ntá ntáchro tí sín k'uájiko ch'án a kíxin:

—Ntá jie ntoá tjéchronka ninkehó ncheyoéxinhya.

30 Ntá jie tienxínni kíxin jaha mé noha kaín xín nkehe la ko t'ichjánxinhya kíxin jnkojín nkexro chrókjuanchankíha sín ichrén nkehe. Méxra xíkaha titekaonni kíxin jaha mé k'uinkaxian tí tjen Dios —ichro sín.

31 Ntá kjuátehe ch'ín Jesús ntáchro ch'án kíxin:

—¿Á jie kuítekáonrá ní?

32 Ntá tsi tí yaon na mé jie tíha na ntá tsochrakonrá jnkojkorá tsoxíkará sátsjirá ntá tsitonará janhván tsjak'é. Kjánchó jehya janhván tjén. T'aná mé tjékian.

33 Tjétjonkará kaín tíhi kíxin ntá kjuaxróxin ts'ejó asánrá tinkachónkirá tí janhan. *A* ntá ntihi chjasintajni kjónté kjuaxróxinhya tjejorá tjeotjasóterá kjánchó chrakonhyará kíxin janhan mé ó kjuixin kjuacha tsétōan. A ntá tí chjasintajni la kjuachahya ts'etōan —ichro ch'án.

17

Ch'ín Jesús chrónóehē ch'án It'é ch'án kíxin chrók'uayakonhen tí sín k'uájiko ch'án

1 Ntá ó kjuixin chrónka ch'ín Jesús kaín tíha ntá konta ch'án nkajní ntáchro ch'án kíxin:

—Jaha It'éni, ó kjuixraká tí yaon a. *A* ntá jie chróchjehé tí Xjaan antsí má kjuachaxin kíxin kjaxin tí Xjaan chrókjuikosáyehe tí jaha.

2 Jaha tsíchjehé kjuachaxin tí Xjaan kíxin ts'etuenhen ch'án kaín xín chojni na ntá jehe ch'án tsochjéhe kjuachón jnkochrínín kaín tí sín tsíchjehé ch'án.

3 Tí kjuachón jnkochrínín mé t'axrjexín kíxin tsochóxian sín tí jaha tí jnkokoá Dios chaxín tjechón la ko kjaxin tsochóxin

sín Jesucristo la mé jaha kuétuēnhén ch'án kui ch'án ntihi chjasintajni.

4 'Ó kjuixin kjuíkosáyaha tí jaha ntihi chjasintajni kjuixinna tí xr̄a chjina sít'a.

5 A ntá jie It'eni, chjina jaha tí kjuachaxin jié k'uéchonta janhan tí k'uéjóni jnkokoá naxa k'ónahya chjasintajni.

6 'Ó kjuixin kjuákoha tí sín chjina chjasintajni kixin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuákoha sín itán la ntá ijie la ó kuítekaon sín.

7 Ntá jie ó kjuátsqan sín kixin kaín tí kjuachaxin chonta janhan la jaha tsíkjánjuan.

8 Kixin ó kjuixin kjuákoha sín tí tán chjina jaha, ntá kuítekaon sín, ntá kuíenxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

9 'Janhan mé xrjanóaha kixin chrók'uayakönhén tí jehe sín. Jehya kixin xrjannóaha kixin chrók'uayakönhén kaín tí chojni siín chjasintajni. Náhí. Jehó xrjanóaha kixin chrók'uayakönhén tí sín chjina kixin kuéntá sín.

10 A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jié kuéntana mé ts'inkaséyanxín tí jehe sín.

11 'A ntá jie tsitonahya janhan ntihi chjasintajni. Kjánchó jehe sín naxa tsitohe sín chjasintajni. A ntá jie tsjasán tí tjen jaha. Jaha It'eni imá jina jaha, t'ayakuenxián sín tí kjuachaxin tí ihniá kixin ntá jnkokoá chrókjuenkayáxin sín éxí tí jaha la ko janhan jnkokoá tjenkayáxinni.

12 A ntá tí naxa k'uéjókian tí jehe sín ntihi chjasintajni la k'uàyakuànxián sín tí kjuachaxin tí ihniá chjina. Nijnko tí jehe sín k'uitjáyanyha sín. A ntá jnkokoá nkexro mé k'uitjayan mé tí ch'ín xráxin ts'itjayan kixin xíkaha tsoxiteyá éxí nixja tí xroon tsíkin sín.

13 'Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kixin ntá tsöchéhe sín éxí yóhe imá chàna.

14 Janhan mé kjuákoha sín itán jaha, a ntá jie tí sín chjasintajni mé nínkakonhen tí jehe sín kixin jehe sín la jehya kuènte chjasintajni éxí kjaxin janhan na janhya kuéntana chjasintajni.

15 Tjáncháhya kixin chrókuakítsjehé sín chjasintajni. Náhí. Tjáncháhá kixin chrók'uayakönhén sín kixin chrókjuich'iyehya sín tí Jínahya.

16 Jehe sín la jehya kuènte chjasintajni éxí yóhe janhan kjaxin janhya kuènte chjasintajni.

17 Nchetjuáxian sín tí kjuachaxin kuéntá kixin itán jaha mé tí tan chaxín ntoá.

18 Éxí yóhē jaha kuétuanna k'uinka chjasintajni mé xikaha janhan tétuannahán sín kixin chrók'uejójákan sín tí sín chjasintajni.

19 Jehó tí xrá kuéntá chrókjuít'a kixin chrókjuinkitsa tí jehe sín, a ntá jehe sín kjaxin chrókjuich'e sín tí xrá kuéntá kixin kuínhin sín itán chaxín ntoá.

20 Kjánchó jehya kixin xrjanóaha kixin chrókjuínkitsa tí jehó sín. Náhí. Kjaxin xrjanóaha kixin chrókjuínkitsa kaín tí sín tsitekaon sín chr'éxin tsinhin sín tí nkehe tsochrónka tí sín a.

21 Mé xikaha xrjanóaha kixin kaín tí jehe sín jnkokoá chrókjuenkayáxin sín éxí jaha It'éni la ko janhan jnkokoá tjenkayáxinni mé xikaha xrjanóaha kixin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín kixin jaha tsíkétuanna k'uinka ntihi.

22 A ntá tí kjuachaxin jié chjina na mé tjahá tí jehe sín kixin ntá kaín sín jnkokoá chrókjuenkayáxin sín éxí yóhē jaha la ko janhan jnkokoá tjenkayáxinni.

23 Janhan la ko jehe sín jnkokoá chrókjuenkayáxinni éxí jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuèhé tí jehe sín éxí yóhē tjuana tí jaha.

24 Jaha It'éni, tí sín kjuánjuan la tjínkavan kixin tí jehe sín chrók'uejókian sín tí tsjak'é janhan kixin chrók'uikon sín tí kjuachaxin jié chjina; kixin xráxín naxa k'ónahya chjasintajni k'uétjuana jaha.

25 It'éni jaha, imá jina jaha. Kjónté tí sín chjasintajni naxa chónhya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe sín kixin jaha kuétuanna k'uinka.

26 Ó kjuákoḥá sín kixin nkexro tí jaha la ko xikaha naxa tsjákoḥá sín, kixin éxí tjuana jaha mé xikaha chrótjuèhe sín kichó sín la ko janhan chrók'uejókian tí jehe sín —mé xikaha chrónoḥē ch'ín Jesús tí It'é ch'án.

18

Ch'ín Jesús sákjuíko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)

1 Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrjexín sín ntiha k'uatòye sín tí tsaka Cedrón. Ntaha tjen ijnko nonte siín nchónhya nta k'uixenhen ch'ín Jesús la ko tí sín k'uájiko ch'án.

2 Kjaxin ch'ín Judas tí ch'ín sinchekji tí ch'ín Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'ín Jesús tí sín k'uájiko ch'án a.

³ **A** ntá ch'ín Judas ó kjuikao ch'án nchónhya sín soldado la ko iso sín policía kuènte n̄nko tsík'etueñhen tí sín nchat'á t'etōan la ko tí sin fariseo. Ntá kjui sín kaín sín xraá sín chica la ko kjuikao sín xrohi t'inkaséyanxín tí kjuix̄in sín.

⁴ **A** ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kíxin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kíxin:

—Tjeyáni tí ch'ín Jesús tsíkjix̄in chjasin Nazaret —ichro sín.

Ntá kjuátehe ch'ín Jesús ntáchro ch'án kíxin:

—Janhan tíha —ichro ch'án.

A ntá ch'ín Judas tí ch'ín tsíkjinchekji tí ch'ín Jesús mé koí tjenkákjan ch'án tí jehe sín ntiha.

⁶ **A** ntá tió kjuátehe ch'ín Jesús kíxin jehe ch'án tíha, ntá jehe sín xráchonka sín kjuítsínka sín nonte.

⁷ Ntá xíkjanchankí ch'ín Jesús ínaá ntáchro ch'án kíxin:

—¿Nkexro xritjéyará? —ichro ch'án.

Ntá xíntáchro sín kíxin:

—Tjeyáni tí ch'ín Jesús tsíkjix̄in chjasin Nazaret —ichro sín.

⁸ Ntá ntáchro ch'ín Jesús kíxin:

—Ó kjuixin tjonkará kíxin janhan tíha. Tí xritjéyará tí janhan ntá t̄tohéra sátsji tí í so sín xrikjan —ichro ch'án.

⁹ Mé xíkaha ntáchro ch'ín Jesús kíxin ntá tsoxiteyá tí nkehe tsíntáchro ch'án kíxin: “Tí sín kjuanjon T'aná la ninkexró kjuintak'itjáyanhya.”*

¹⁰ Ntá ch'ín Simón Pedro kuakitsje ch'án tí chica espada chrinkatox̄in ch'án kóchrínjin ch'án tatsjon chjina ijnko ch'ín it'in Malco, mé ijnko ch'ín ch'ehe nchat'á t'etōan xra.

¹¹ Kjánchó ch'ín Jesús ntáche ch'án tí ch'ín Pedro kíxin:

—Chr'axenhén t̄joe chica espada méhe. Kjá ntáchrúa kíxin tsjasótehyana, kjá ichrua. Kjánchó T'aná kjuanjon kjuachaxin kíxin nchónhya tsjasótena —ichro ch'án.

Ch'ín Jesús kjuák'e nkayakon tí ch'ín t'etueñhen tí sín nchat'á (Mt. 26.57-58; Mr. 14.53-54; Lc. 22.54)

¹² **A** ntá tí sín soldado la ko tí ch'ín comandante t'etueñhen sín la ko tí sín policía judío kuènte n̄nko mé itsé sín tí ch'ín Jesús kjuínchenteto sín ch'án.

¹³ **A** ntá sákjuíko sín ch'án nt̄joe ch'ín Anás ich'ee tí ch'ín Caifás mé tí nkexro tsík'áyéhe xra nchat'á t'etōan tí nánó a.

¹⁴ **A** ntá tí ch'ín Caifás, jehe ch'án na mé tí nkexro tsíntáche tí sín judío kíxin íchá jína kíxin jnkokoá chojni chrók'uenyákonhen kaín tí sín chjasén ch'án.†

* 18:9 Juan 17.12 † 18:14 Juan 11.49-50

*Ch'in Pedro kjuínchemá ch'án kixin chóxin ch'án tí ch'in Jesús
(Mt. 26.69-70; Mr. 14.66-68; Lc. 22.55-57)*

¹⁵ Ch'in Simón Pedro la ko í jnko ch'in k'uék'ajiko ch'in Jesús mé kuinkáchréhe sín ch'án. Tí ch'in ijnko a mé chóxin ch'án tí nchat'á t'etoan. Ntá k'uixenko ch'án tí ch'in Jesús tí ntasin ntoe tí nchat'á t'etoan.

¹⁶ Kjánchó ch'in Pedro kuítóhe ch'án ntója ntasin ó. Ntá tí ch'in ijnko a chóxin tí nchat'á t'etoan mé k'uaxrje ch'án ntasin nixjehe ch'án tí tjan t'ayakonhen tí ntója ntasin chrónóehe ch'án tjan ntá xranjon kjuachaxin ntá k'uixenhen ch'in Pedro kjaxin.

¹⁷ Na ntá tí tjan t'ayakonhen tí ntója ntasin kjuanchankíhi tjan tí ch'in Pedro kixin:

—¿Á jahya kjaxin xríkoa tí ch'in a? —ichro tjan.

Ntá kjuátehe ch'in Pedro kixin:

—Náhí, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policia kjuaka sín xrohi ntaha tjejóxin toté sín tjejóchjixrohe sín. La ko koi ch'in Pedro tjechjixrohe ch'án ntiha.

*Tí nchat'á t'etoan mé kjuanchankíhi ch'án tí ch'in Jesús
(Mt. 26.59-66; Mr. 14.55-64; Lc. 22.66-71)*

¹⁹ Ntá tí nchat'á t'etoan kjuankixin kjuanchankíhi ch'án tí ch'in Jesús kixin nkexro tí sín k'uájiko ch'án la ko nkehe tí kjuakohe ch'án sín.

²⁰ Ntá kjuátehe ch'in Jesús ntáchro ch'án kixin:

—Noxín kjuak'é kjuakua, la ntá kaín xín chojni kuínhin sín. Xraxín k'uék'jákoxián kaín xín tí nínko ntsí la ko tí nínko jíe tójkotséxin kaín xín sín judío. Ninkehó nkehe kjuákohya imó.

²¹ ¿Nkekuénté tjanchankina tí janhan xikaha? Chrókjuanchankíhi tí sín kuínhin kixin nkexrí kjuákoha sín. Jehe sín mé nohe sín nkehe kjuákoha sín —ichro ch'án.

²² Kjuixin ntáchro ch'in Jesús tíhi ntá ijnko ch'in policia kuénte nínko mé tjentaxín ch'án ntiha chjéhe ch'án nkayakon tí ch'in Jesús ntáchro ch'án kixin:

—¿Á xikaha jiehe tsjátéhé tí nchat'á t'etoan ní? —ichro ch'án.

²³ Ntá kjuátehe ch'in Jesús ntáchro ch'án kixin:

—Tí ntoáhya tí nkehe xrjanka ntá chonka nkehe tí ntoáhya. A ntá tí ntoá tí nkehe xrjanka, ¿ntá nkekuénté kixin tjatena? —ichro ch'án.

²⁴ Ntá k'ueoan ch'in Anás kixin tjechróntetoxinhín ch'in Jesús sátsji ch'án tí tjan ch'in Caifás tí nchat'á t'etoan.

Ch'in Pedro xíkjinchemá ch'án inaá kixin chóxin ch'án tí ch'in Jesús

(Mt. 26.71-75; Mr. 14.69-72; Lc. 22.58-62)

25 Ntá ch'ín Simón Pedro mé naxa tјexín toté ch'án tјechјixrohe ch'án. Ntá kjuanchankíhi sín ch'án kixin:

—¿Á kјaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhí, janhya —ichro ch'án.

26 A ntá iјnko ch'ín ch'ehe tí nchat'á t'etōan xra, na mé tí ch'ín a mé naxa kјéhya ch'án tí ch'ín tsíkóchrínјin ch'ín Pedro ntatsјon, na mé kjuanchankí ch'án kixin:

—¿Á jehya jaha tí k'uíkuan tјekoa ch'án tí huerto ní? —ichro ch'án.

27 Ntá ch'ín Pedro xíkјinchemá ch'án inaá kixin jehya ch'án, ichro ch'án. Ntá xrinahya tuénxín itsje iјnko kochíntōa.

Ch'ín Jesús kjuák'e nkayakon tí ch'ín Pilato

(Mt. 27.1-2, 11-14; Mr. 15.1-5; Lc. 23.1-5)

28 Ntá k'uaxrјexín sín ntōe ch'ín Caifás, sákjuiko sín ch'ín Jesús tí palacio t'etōanxín tí ch'ín gobernador. Ntá ó kjuankixin k'uínkaséyan kjuíјi sín ntiha. A ntá tí sín judío la mé í k'uixenhya sín tí palacio kixin tí xíkaha chrók'uixenhen sín tí nchia a la chrókuamá sín tí jіe síin ntiha la í xitjahya sine sín tí kia pascua, ichro sín.

29 A ntá ch'ín Pilato k'uaxrјexín ch'án tí nchia t'etōanxín ch'án kjuanchankíhi ch'án sín kixin:

—¿Nkehe tí jіe chóna tí nkexro i? —ichro ch'án.

30 Ntá kjuátēhe sín ntáchro sín kixin:

—Tí chróchóntahya ch'án jіe jіe la chrókjuikoahyani ch'án —ichro sín.

31 Ntá k'uețōan ch'ín Pilato kixin:

—Sátјikoará ch'án nchekitōexínrá nkerí jіe chóna ch'án kixin exí ntáchro tí ley kuentará —ichro ch'án.

Ntá kjuátēhe tí sín judío ntáchro sín kixin:

—Jeheni choјni judíoni la chóntahyani kjuachaxin ts'óyánni ninkexró —ichro sín.

32 Mé xíkaha tsoxiteyá tí nkehe tsíntachro ch'ín Jesús kixin nkexrí ts'enxín ch'án.

33 Ntá ch'ín Pilato xík'ixenhen ch'án tí nchia t'etōanxín ch'án ntá k'uíyēhe ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etuenhen tí sín judío ní? —ichro ch'án.

34 Ntá ntáchro ch'ín Jesús kjuanchankí ch'án kixin:

—Tí nkehe tјanchankíná, ¿á jahyá kjuenkayáxian xíkaha, ó á í јnko nkexro kjuanchia jіe kixin tí janhan? —ichro ch'án.

35 Ntá kjuátēhe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chјasán la ko tí sín nchat'á t'etōan mé kjuikaán sín tí jaha. ¿Xá nkehe kjuich'e kixin? —ichro ch'án.

³⁶ Ntá kjuátehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétoan. Náhi. Tí chrókuétoan chjasintajni ntá tí sín xríkian chrókjuanjonko sín tí sín judío kixin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétoan —ichro ch'án.

³⁷ Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kixin:

—Janhan tí rey éxí ntáchrua jaha. Tí xra ó kokjina la ko tí xra ó k'uinka chjasintajni kixin tsóxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

³⁸ Ntá ntáchro ch'ín Pilato kixin:

—¿Xá nkehe tí nkehe chaxín ntoá, ichrua? —ichro ch'án.

*Ch'ín Pilato kjuanjon kjuachaxin kixin its'en ch'ín Jesús
(Mt. 27.15-31; Mr. 15.6-20; Lc. 23.13-25)*

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sin judío nixjehe ch'án sín ntáchro ch'án kixin:

—K'uitjáhya ninkehó jie chóna tí nkexro i.

³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjinkáonrá kixin ts'atjánta tí ch'ín Rey t'etueñhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhi. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetóan ch'án kixin tsjate sín tí ch'ín Jesús.

² Ntá tí sín soldado kjuíchéna sín ntach'ij ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kixin jehe sín tsjikosáyehe sín ch'án éxí ijnko rey, kjánchó chaxínhya tíha.

³ Ntá kóchjinehe sín tí tjen ch'án ntáchro sín kixin:

—Isé tsjak'e tsétueñhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etóanxín ch'án inaá nixjehe ch'án tí sín tsíkójnkotsé ntáchro ch'án kixin:

—Tsjeherá tsakítsjexián ch'án ntihi kixin tsonohará kixin k'uitjáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'í la ko tjenkáya ch'án tí ka kjátse tié. Ntá ntáchro ch'ín Pilato kixin:

—Tsjehérá, ntihi tjen ch'án —ichro ch'án.

⁶ A ntá tió k'uikon tí sín nchát'á t'etōan la ko tí sín policia kuènte nínko ntá kjuankíxin sín t'óyako sín ntáchro sín kixin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'ín Pilato kixin:

—Jahará tjikoará ch'án tjaké nkanirá ch'án ntacruz kixin janhan k'uítjáhya ninkehó jie chóna tí jehe ch'án —ichro ch'án.

⁷ Ntá kjuátēhe tí sín judío kixin:

—Jeheni chojni judío mé chóntani ijnko ley t'etōan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án

⁹ ntá xík'ixenhen ch'án tí nchia t'etōanxín ch'án inaá kjuanchankíhi ch'án tí ch'ín Jesús kixin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuátēehya ch'án.

¹⁰ Ntá ntáchro ch'ín Pilato kixin:

—¿Jaha nkekuènté tjátēehya nkehe tjánchánkíha? ¿Á noahya jaha kixin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kixin sátsjia kohya nkehe tsonhan? —ichro ch'án.

¹¹ Ntá kjuátēhe ch'ín Jesús ntáchro ch'án kixin:

—Ninkehó kjuachaxin chróchontahya jaha chrókuétōan chrók'uén o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jie jie chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankíxin ch'án kjueyá ch'án nkexrí chrók'uetoan ch'án kixin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kixin:

—Kja tí tsitohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'etuenhen tí nación kuènténi. Tí nkexro ch'éna asén ch'án éxí ijnko rey mé nínkakonhen ch'án tí ch'ín t'etuenhenni —ichro sín.

¹³ Ntá kuínhin ch'ín Pilato tíhi ntá k'uetoan ch'án kixin tsakit-sje sín tí ch'ín Jesús ntója ntá ch'ín Pilato kjuák'etjaxin ch'án tí silla nchekitoexín ch'án jie, mé nkíva hebreo mé it'in Gabata, mé t'axrjexín kixin tjat'o noi jehó xro tsík'óna.

¹⁴ Na mé ó chjina chonkíxin ntá tí tsonjin la mé ó tsjasin sín tí kia pascua. Ntá ch'ín Pilato ntáche ch'án tí sín judío kixin:

—Ntihi itjen tí ch'ín rey kuèntará —ichro ch'án.

15 Kjánchó jehe sín k'óyako sín ntáchro sín kixin:

—¡Its'en ch'án! ¡Its'en ch'án! ¡Tsjak'enkáni ch'án ntacruz!
—ichro sín.

Ntá ntáchro ch'ín Pilato kixin:

—¿Á tjinkáonrá kixin janhan chrókjuakénkãnia ijnko ntacruz
tí ch'ín rey kuëntará ní? —ichro ch'án.

Kjánchó tí sín nchãt'á t'etõan mé kjuátẽhe sín kixin:

—Náhi. Chóntahyani í jnko rey, jehó tí ch'ín César —ichro sín.

16 Ntá ch'ín Pilato kjuanjon ch'án kjuachaxin sãtsjiko sín tí
ch'ín Jesús tsjak'enkãni sín ch'án ntacruz. Ntá sãkjuiko sín
ch'án.

Kjuák'enkãni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

17 Ntá sãkjuiko sín tí ch'ín Jesús kuámá ch'án tí ntacruz
tsjak'enkãni ch'án. Ntá kjuíjiko sín ch'án ijnko tjo tikítexín sín
Hueso Kja Chojni. A ntá nkiva hebreo mé tikítexín sín Gólgota.

18 Ntaha mé kjuak'enkãni sín ch'án tí ntacruz. Ntá kjaxin
yaá sín nánãko k'uéjõ jnkojnko sín ntá jnkõsiné kjuák'e ch'ín
Jesús.

19 Ntá k'uẽtõan ch'ín Pilato kixin tsokjin sín ijnko ntachiso
tsjak'enkãni sín ikja tí ntacruz ntáchro kixin: “Ch'ín Jesús
kjuixín ch'án chjasin Nazaret, mé tí ch'ín Rey kuẽnte tí sín
judío”, tsixro.

20 A ntá itsjé tí sín judío mé kjuínchekuáxin sín tí letra tsík'óna
kixin chjino tí chjasin Jerusalén tsíkjak'enkãni sín ch'ín Jesús
ntacruz la ko iní nkiva tsíkjin sín, na mé ijnko nkiva la hebreo,
la ijnko nkiva la griego, la ijnko nkiva la latín.

21 Ntá tí sín nchãt'á t'etõan kuẽnte tí sín judío mé ntáche sín
tí ch'ín Pilato kixin:

—Chrókjinhya jaha xikaha kixin jehe ch'án mé tí “Ch'ín Rey
kuẽnte tí sín judío.” Náhi. Íchá jina chrókjian jaha kixin “Jehe
ch'án ntáchro ch'án kixin jehe ch'án mé tí ch'ín Rey kuẽnte tí
sín judío” —ichro sín.

22 Kjánchó kjuátẽhe ch'ín Pilato kixin:

—Tí letra kuẽtõan k'óna la ó k'óna, kjónté xikahó tsitõhe
—ichro ch'án.

23 Ntá tí sín soldado tió tsíkjin tsíkjak'enkãni sín tí ch'ín
Jesús tí ntacruz ntá kuákja sín tí ké ch'án la k'óxikayẽhe sín
jnkojnko ka kuákja sín kanoé sín. La ko kjaxin kuákja sín tí
ka kjínjin k'uék'inkãya ch'án. Tí ka mé tsixronhya ka la me
jnkokõá ka tíha.

24 Ntá tí sín soldado kjo sín kichó sín ntáchro sín kixin:

—Tsótséchjehyani tí ké ch'án. Íchá jina sich'exínni suerte ntá
tsotsjeheni siná nkexro ts'áyẽhe tí ka.

Mé xikaha xiteyá éxí ntáchro xroon itén Dios tsíkjin sín ósé ntáchro kixin: “Kjuích'exín sín suerte ntá k'óxikayehé sín kaná.”* Mé xikaha kjuích'e tí sín soldado.

²⁵ A ntá chjino tí ntacruz kjuák'enkáni ch'ín Jesús mé kjuák'e tí iné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena.

²⁶ A ntá tió k'uikon ch'ín Jesús kixin itjen tí iné ch'án la ko chjino tjen tí ch'ín antsí tjuèhé ch'án k'uék'ajiko ch'án, ntá nixjehé ch'án tí iné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjehé ch'ín Jesús tí ch'ín a ntáchro ch'án kixin:

—Tsjehe kixin ntaha itjen iná —ichro ch'án.

A ntá tí ch'ín a mé k'uáyéhe ch'án tí tjan a sákjuiko ch'án tjan ntøe ch'án k'óna éxí iné ch'án xikaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjin sín ósé ntá xikaha ntáchro ch'án kixin:

—Ik'uén ntá.

²⁹ Ntá ntiha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kjinjin, ntá kjuínchechrìn sín tí tjen ir'va ch'án.

³⁰ Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

³¹ A ntá xikaha yaon ntøye mé tí yaon kia pascua ntá tí sín judío tjinkakonhya sín kixin tí cuerpo kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jié, ichro sín. Mé xikaha kjuanchehe sín tí ch'ín Pilato kixin ts'etøan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en.

³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús.

³³ Ntá kjuíji sín tí tjen ch'ín Jesús ntá k'uikon sín kixin ó tsíkjin tsík'en ch'án, ntá í k'óchjenjinhya sín toté ch'án.

³⁴ A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko inta.

* 19:24 Salmo 22.18

³⁵ A ntá janhan mé tjékjian tí xroon i mé kjuak'é ntiha k'uíkuañ kixin xikaha kónhen ntá ntoá tjéxrjanka kixin jahará kjaxinrá chrókuítekáonrá.

³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin: “K'óchjenjinhya sín ninkehó huésqe ch'án.”†

³⁷ Kjaxin itjen í jnko nketí nixja tí xroon itén Dios tsíkjin sín ósé ntáchro kixin: “Tsokomá sín tí nkexro tsíchr'áte sín chica.”‡

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé ijnko ch'ín kjuixin chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxin ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jehe ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuíko ch'ín José tí cuerpo kuènte ch'ín Jesús.

³⁹ Kjaxin ch'ín Nicodemo, tí ch'ín kjuínixjehē tí ch'ín Jesús ijnko tie a mé kjui ch'án kjuikao ch'án treinta kilo xroaṇ xraxé tjiko xroaṇ mirra la ko xroaṇ áloes.

⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjínjin tsíka tí xroaṇ xraxé a kixin xikaha k'uékinkáchónki tí sín judío k'uékjavá sín chojni tsík'en.

⁴¹ Tí kjuák'enkáni ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxráváhya ntiha.

⁴² Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankixin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankíxixín semana ntá tí tjan María Magdalena naxa sítié sákjuí tjan tí tjen tí tòye, ntá k'uíkon tjan kixin ó tsíkjin tí xro tsík'ikjèxin tí tòye a.

² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuèhe ch'ín Jesús, ntá ntáchro tjan kixin:

—Ó tsíkakitsjéxin sín tòye tí cuerpo kuènte Inchéni ntá noehyani nketí tsíkjak'e sín —íchro tjan.

³ Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a.

⁴ Ntá yóí sín kuinká sín sákjuiko kichó sín. Kjánchó tí ch'ín í jnko antsí tjiān kuinká ch'án ntá kánhyó tjiān kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòyē a.

⁵ K'uísén ch'án tsjehe ch'án nkaxenhen tí tòyē a. A tí ka tsík'isímá ch'ín Jesús mé naxā tjejó k'uíkon ch'án, kjánchó jehe ch'án k'uixenhya ch'án tí tòyē a.

⁶ Ntá kjónté chr'éxin kjuíji ch'ín Simón Pedro ntá k'uixenhen ch'án tí tòyē a. Ntá kjaxin k'uíkon ch'án kixin tjejó tí ka tsík'isímá ch'ín Jesús

⁷ la ko k'uíkon ch'án tí ka tsík'isímá ikja ch'án na mé tí ka tsíxrèya ka la ókjé tjen ka, a ntá tí í so ka na mé ókjé tjejó ka kjaxin.

⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsíkijji senó na kjaxin k'uixenhen ch'án tí tòyē ntá k'uíkon ch'án tí nkehe tsíkónhen ntá kuítekaon ch'án.

⁹ Kixin naxā k'uékienxínhya sín tí nkehe k'uéchronka xroon itén Dios kixin t'ichjánxin tsoxechón tí ch'ín Jesús.

¹⁰ A ntá tí sín sátsíkjitsjehe tòyē la xíkjan sín ntōe sín.

*Titàya k'uíkuèn tjan María Magdalena tí ch'ín Jesús
(Mr. 16.9-11)*

¹¹ Ntá tjan María mé ntaó kuítóhe tjan ntója tí tòyē tsjanka tjan. Naxā tsjanka tjan k'uísén tjan tsjehe tjan nkaxenhen tí tòyē

¹² ntá xrínahya k'uíkon tjan yaá sín ángel tjejóyá sín ka tjóá tjejótjāxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án.

¹³ A ntá tí sín ángel mé kjuanchankí sín kixin:

—Naná, ¿kuènte tsjanka? —ichro sín.

Ntá kjuátehe tjan ntáchro tjan kixin:

—Sátsíkji sín Inchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátsōanhya tjan kixin jehe ch'án.

¹⁵ Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuèté tsjanka? ¿Nkexro tjéyá? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kjā tí jaha sákjuíkoa ch'án ntá jie chronka nketí sákjuíkoa ch'án kixin janhan sátsjikjan ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxin tjan nkiva hebreo ntáchro tjan kixin:

—¡Raboni! —ichro tjan. Tíha mé t'axrjexín kixin Maestro.

17 Ntá ntáchro ch'ín Jesús kixin:

—Tatjántana kixin naxa sájtíhya janhan tí tjen T'aná. Sátjia tjítsjehé tí sín kichiná chénka sín kixin sátsjyá tí tjen T'aná na mé kjaxin It'ará tí jahará na mé Dios kuéntana la ko kjaxin Dios kuéntará —ichro ch'án.

18 Ntá tí tjan María Magdalena sákuíchéncia tjan tí sín k'uék'ajiko ch'ín Jesús chrónka tjan kixin xikaha tsík'ikon tjan Ìnchéni. La ko kjaxin chrónka tjan kixin xikaha tsíntáchro ch'án.

Tí sín k'uék'ajiko ch'ín Jesús titàya k'uíkuèn sín ch'án

(Mt. 28.16-20; Mr. 16.14-18; Lc. 24.36-49)

19 A ntá ó kónjín tí yaon a mé tí yaon xrankixín semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jina kixin chrakonhen sín tí sín judío. Ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án kjuajna tí sín k'uék'ajiko ch'án ntáchro ch'án kixin:

—Jina tjejorá —ichro ch'án.

20 Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uíkon sín Ìnchéni.

21 Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uetuanna k'uinka, a ntá jie la janhan tétuñhan tí jahará —ichro ch'án.

22 Ntá k'uánote ch'án tí jehe sín ntáchro ch'án kixin:

—T'ayéhérá Nchakuen Dios.

23 Tí ts'itjayanhanrá tí jie kjuasin jnkójín chojni ntá xikaha tsjini tí ijie sín. Ntá tí ts'itjayanhyará tí jie kjuasin jnkójín chojni ntá naxa kjuinhyá tí ijie sín —ichro ch'án.

Ch'ín Tomás k'uíkon ch'án kixin tsíxechón Ìnchéni

24 A ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikítexín sín ch'ín Nohé mé kohya ch'án tí kui ch'ín Jesús.

25 Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uíkonni Ìnchéni —ichro sín.

Kjánchó ntáchro ch'ín Tomás kixin:

—Tí ts'íkónhya janhan tí tsíkjiatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuítekavan? —ichro ch'án.

26 A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás.

Tsík'íkjehe sín ntója nchia jína ntá xrínahya titàya kónohe sín k'uíkon sín kíxin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kíxin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kíxin:

—Chr'axénhén dedo tjá tí tsíkjiatexín chica clavo tjaná la ko xrákoa tjá chr'axénhén chjiana. Chróntáchrohya kíxin chaxínhya. Tsítekávan kíxin chaxín —ichro ch'án.

²⁸ Ntá kjuátehe ch'ín Tomás ntáchro ch'án kíxin:

—İnchéni jaha la ko Dios kuèntana! —ichro ch'án.

²⁹ Ntá ntáche ch'ín Jesús tí ch'ín Tomás kíxin:

—Jaha Tomás k'uíkonjian ntá kuítekávan. Ntá antsí náxrjón tjejó tí sín kjónté k'uíkonhya la titekaon sín —ichro ch'án.

Tíhi mé chrónka nkekuènte tsíkjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uíkon tí sín k'uájiko ch'án kjónté chrónkahya tí xroon i kíxin xikaha kónhen.

³¹ Tí nkehe chrónka tí xroon i ikjian janhan kíxin chrókuítekáonrá jahará kíxin Jesús mé tí Cristo, mé tí Xjeen Dios kíxin ntá kaín ni chróchóntani kjuachón jnkochrín kíxin chrókuítekaonni ch'án.

21

Yato tí sín k'uék'ajiko ch'ín Jesús xrínahya titàya k'uíkon sín ch'án

¹ A ntá chr'éxin tí sín k'uék'ajiko ch'ín Jesús titàya xík'íkon sín tí jehe ch'án inaá chrínta ntayaon Tiberias. Mé xikaha kónhen

² kíxin jnkokoá k'uéjó sín ch'ín Simón Pedro la ko ch'ín Tomás, me tí ch'ín tikítexín sín ch'ín Nóhé, la ko ch'ín Natanael kuixín ch'án chjasín Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús.

³ Ntá ntáchro ch'ín Simón Pedro kíxin:

—Sátsjitsé koche —ichro ch'án.

Ntá kjuátehe sín kíxin:

—Koíni sátsjikoani —ichro sín.

Ntá sákjuí sín k'uit'ótjen sín ijnko ntabarco. Kjánchó ninkehó koche tséhya sín kuenté tie.

⁴ A ntá ó chjina ts'inkaséyan ntá xrínahya titàya k'uíkon sín itjen ch'ín Jesús chrínta ntayaon, kjánchó kjuátsqanhya tí sín k'uék'ajiko ch'án kíxin jehe ch'án.

⁵ Ntá kjuanchankíhi ch'án sín kíxin:

—Jahará ntasoá, ¿á naxa ninkehó koche tsehyará? —ichro ch'án.

Ntá kjuátehe sín ntáchro sín kíxin:

—Naxa ninkehó ko tséhyan —ichro sín.

⁶ Ntá ch'ín Jesús ntáche ch'án sín kixin:

—Itérá tí nchísén tí nánko chjia chjina tí ntabárc̄o la tsots̄erá va —ichro ch'án.

Ntá x̄ikaha kjuích'e sín k'ue sín nchísén ntá í tjachahya sín tsakitsjenkixin sín nt̄a tí nchísén kixin nchónhya koche tjinká.

⁷ A ntá tí ch'ín ant̄sí tjuèhe ch'ín Jesús mé ntáche ch'án tí ch'ín Pedro kixin:

—İnchéni tí méhe! —ichro ch'án.

Ntá kuínhin ch'ín Simón Pedro kixin İnchéni tíha ntá k'uinkáya ch'án iké ch'án inaá (kixin tsíkakitsje ch'án iké ch'án) ntá kjuíankí ch'án nt̄a.

⁸ Tí í so sín k'uék'ajiko ch'ín Jesús mé kjuíji sín tí chrínta ntayaon kjuík̄ao sín tí ntabárc̄o tinkánkákjentóxin tí nchísén tjinká koche chrítaón nt̄a kixin ijnko ciento metro k̄jinx̄in tí chrínta nt̄a k'uéj̄o sín.

⁹ Ntá kjuíji sín chrínta nt̄a ntá k'uínkajinx̄in sín tí ntabárc̄o ntá k'uikon sín tjeche xrohi síxènk̄i xrínta ntá chrítaón tí xrínta tjejen ijnko koche la ko nánko síin niot̄ja.

¹⁰ Ntá kjuanchia ch'ín Jesús ntáchro ch'an kixin:

—Xrákoará iso koche tsítserá nant̄a —ichro ch'án.

¹¹ Ntá ch'ín Simón Pedro k'uit'ótjen ch'án tí ntabárc̄o kuákja ch'án tí nchísén kuinkánkákjen ch'án xrák̄ao ch'án tí nchísén tjinká koche iye na mé ijnko ciento cincuenta y tres va. Ntá k̄jonté nchónhya va la k'uichjehya tí nchísén a.

¹² Ntá ntáchro ch'ín Jesús kixin:

—Xrákirá, interá —ichro ch'án.

A ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuát̄soan sín kixin İnchéni tíha.

¹³ Ntá kóchjina ch'ín Jesús kuákja ch'án tí niot̄ja chjéhe ch'án tí jehe sín la ko x̄ikaha x̄ikjanjon ch'án tí koche.

¹⁴ Tíhi mé níxin k'uikon tí sín k'uék'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin k̄jone sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, x̄jeen Jonás, ¿á ant̄sí tjuana jaha, a ntá tí í so la kánhyó? —ichro ch'án.

Ntá kjuát̄ehe ch'ín Pedro ntáchro ch'án kixin:

—Jeén, İnchéni, ó noha kixin tjínk̄avan tí jaha —ichro ch'án.

Ntá ntáchro ch'ín Jesús kixin:

—Ntá x̄ikaha la t'ayakonhén tí kolélo kuènt̄ana —ichro ch'án.

¹⁶ Ntá yóxin kjuanchankí ch'ín Jesús inaá kixin:

* 21:14 Juan 20.19,26

—Jaha Simón, xjeen Jonás, ¿á tjuḡana jaha? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuèntana —ichro ch'án.

¹⁷ Ntá nixin kjuanchankí ch'ín Jesús kixin:

—Jaha Simón, xjeen Jonás, ¿á tjínkavan tí janhan? —ichro ch'án.

A ntá k'uává ch'ín Pedro kixin nixin kjuanchankí ch'ín Jesús kixin á tjínkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha kaín xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha t'ayakonhén tí kolélo kuèntana.

¹⁸ Ntá ijnko nkehe chaxín tjétjonka kixin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. A ntá tió tsotáda jaha ntá tsjéntoá tjá ntá í jnko nkexro sintak'inkáya ka la ko sátsjikoa sín tí tóxrjíanhya sáchrókjua —ichro ch'án.

¹⁹ A ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uíkon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanchankíhi ch'án tí ch'ín Jesús kixin nkexro sinchekji ch'án.†

²¹ Ntá ch'ín Pedro k'uíkon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Ìnchéni, ¿a ntá tí ch'ín i la nkehe tsonhen ch'án a? —ichro ch'án.

²² Ntá kjuátehe ch'ín Jesús kixin:

—Tí tjínkavan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhi. Ó jehí ntáchro ch'án kixin tí tjínkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

† 21:20 Juan 13.25

²⁴ Antá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjín ch'án la chaxín ntoá tíha.

²⁵ Naxa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka kaín tí xroon chrók'óna xikaha. Amén. Ó tjen.

Tí xrā kjuích'e tí sín kjueyá ch'ín Jesús

Itsi Nchakuen Dios

¹ Tjuahā jaha Teófilo na tí libro saoxín mé kjān kaín nkehe kjuako ch'ín Jesús la ko tí xrā kjuích'e ch'án tí xrankíxín

² hasta tí yaon sákjuí ch'án nkaya nkajní. Ā ntā ti naxā sákjuíhya ch'án nkajní la kjueyá ch'an tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehe ch'án sín la k'uetuēnhen ch'án sín kíxín tsonohē sín nkehe tí xrā chrókjuich'e sín.

³ Tió kjuixin k'uén ch'án ntá kónoxín kíxín tjechón ch'án, k'uíkon tí jehe sín la ko cuarenta yaon mé k'uíkon sín ch'án jnkoyaxón. Itsjé nkehe kjuakoxín ch'án kíxín tsonoxín sín kíxín chaxín tjechón ch'án la ko kjuako ch'án nkexrí tí kjuachaxin kuēte Dios.

⁴ Ti naxā kójnkotséko ch'án tí sín k'uájiko ch'án la jehe ch'án mé k'uetuēnhen ch'án sín kíxín naxā sátsjixinhya sín tí chjasin Jerusalén. Chrónka ch'án kíxín:

—Chróchonhénrá ntihó chrók'uayéhérá tí nkehe tsjanjon T'aná, me tí nkehe kuinhínrá xrjanka janhan.

⁵ Ā ntá chaxín ch'ín Juan ìntā ó kuíkítexín ch'án chojni. Ā ntá ijie kánhyó itsjé yaon ntá jahará la Nchakuen Dios la tsikitiaxínrá.

Sákjuí ch'ín Jesús nkaya nkajní

⁶ Ntá ti naxā kójnkotséko sín ch'ín Jesús, kjuanchankíhi sín ch'án kíxín:

—Jaha Ìnchéni, ¿á tsjánjonhya kjuachaxin jaí ts'etōanni chjasénni Israel ínaá? —ichro sín.

⁷ Ntá kjuátehe ch'ín Jesús kíxín:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etōan tíha.

⁸ Ntá itsi tí Nchakuen Dios ntá ts'ayéhérá kjuachaxin sátsjichronkará nkehe tí xrā kjuít'a, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin nixja ch'ín Jesús ntá xrínahya tinkák'it'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijnko tjuí. Ntá í t'ikonhya sín nkerí kjuíji ch'án.

¹⁰ Ntá naxā tjejókonta sín tí sákjuí ch'ín Jesús nkajní, ā ntá xrínahya titàya k'uíkuèn sín yaá chojni ntoa tjejóyá sín ka tjóá tjejó sín chjínaxón tí tjejó tí jehe sín.

¹¹ Ntá tí sín a mé ntáchro sín kíxín:

—Jahará chojni kjuíxinrá estado Galilea, ¿nkehe tsonhen naḡa kontará nkajní? Xikaha tjejokontará sákjuí Jesús la ko mé xikaha xiki ch'án inaá —ichro sín.

Xreyá ch'ín Matías tsjiqtéhe lùké ch'ín Judas

¹² Na ntá kjanxin sín tí jna it'in Olivo na ikjan sín chjasin Jerusalén. Tíha a mé kínhyó tjen kixin ó xikahó k'ueṭoan tí ley sátsji sín tí yaon t'ok'éhe sín.

¹³ Na ntá kjuíji sín tí chjasin ntiha ntá k'uit'ótjen sín tí yóxin piso tí nchia tsíkjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuènte tí partido cananista, la ko kjaxin ch'ín Judas, savé ch'án mé it'in Jacobo.

¹⁴ Kaín sín kójnkotsé sín ntiha tsonixjehe sín Dios la ko k'uejóko sín tí kichó tí ch'ín Jesús la ko tí tjan María, ñé ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsíkójnkotsé ntiha. Ntá ntáchro ch'án kixin:

¹⁶ —Kichóni, t'ichjánxin tsoxiteyá éxí nixja xroon itén Dios éxí tsínixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjuikao ch'án tí sín tsotsé ch'ín Jesús.

¹⁷ Jehe ch'án mé kjaxin k'uék'ajikoni la jnkokón xra k'uaýèkoni ch'án.

¹⁸ A ntá jehe ch'án mé sákjuík'enaxín ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uanótjen ch'án la ikja ch'án k'uitja nonte la xitjehe tsee ch'án k'uaxrje kaín sñtanòé ch'án.

¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrjexín kixin ijnko nonte siín ijni.

²⁰ Tí xroon Salmo mé nixja xikihí:

Tsitohe ntoé ch'án a,
la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyéhe tí xra kuènte ch'án.*

Mé xikaha tsíkjin ch'ín David.

²¹ Tí tjejóni ntihi la siín chojni ó k'uaájikoni xráxín tí k'uék'ajikoni Ìnchéni Jesús

²² desde k'uíkoni nkexrí kujkíte ch'ín Juan tí jehe ch'án la ko hasta k'uíkoni sákjuí ch'án nkaya nkajní. Ntá ije

* 1:20 Salmos 69.25; 109.8

t'ichjánxìn tsoxreyá jnkojín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xíkaha chrónka ch'ín Pedro.

²³ Ntá kjuenkayáxin sín tsonoxín yaá chojni mé tí ch'ín José, t'ikõn ch'án Barsabás la ko Justo, la ko kjaxin í jnko ch'án it'in Matías.

²⁴ Ntá nixjehe sín Dios la ntáchro sín kixin:

—Ìnchéni jaha mé choxian asén kaín chojni. Tjákohéni nkexro tsonhen tocar xɾá tí yaá tí nkexro í kónoxín

²⁵ tsjiatéhe xɾá apóstol kuènte ch'ín Judas. A ntá tí ch'ín Judas mé kuítóhe ch'án tí xɾá kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuích'e sín suerte ntá xrínghya kónhen tocar tí ch'ín Matías, ntá tuénxín tí hora a kuákja ch'án xɾá k'uéjoko ch'án tí tejnko tí sín kjueyá Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín.

² Xrínghya kuínhin sín ijnko tóvéntó kuixin nkajní. Tí tóvéntó mé éxí ijnko xrinto fuerte chjéhe. Kuenté tí nchia tjejóxehen sín mé kóvéntó kjaxin.

³ Ntá xrínghya k'uikon sín nkehe éxí xrohi nene tsjehe. Ntá tíha xíkayéhe la k'uéjókjen jnkojnko kja tí jehe sín.

⁴ Na ntá kaín sín k'uáyéhe sín tí Nchakuen Dios ntá kjuankixin sín nixja sín í jnko nkiva kixin Nchakuen Dios kjuínkítsa sín nixja sín.

⁵ A nta tí yaon a la tí chjasin Jerusalén k'uéjó chojni judío tjinkaon sín sinchexiteyéhe sín tí nkehe tinkáchónki sín, mé tsíkjixín sín nkuixín chjasintajni.

⁶ A ntá jehe sín mé tsíkinhin sín tí tóvéntó ntá tsíkóchjina nchónghya chojni. Ntá í noehya sín nkehe chrókjuenkayáxin sín kixin jnkojnko tí jehe sín mé kuínhin sín kixin nixja tí sín a jnkojnko nkívee sín.

⁷ Ntá síxránkə sín, chrakon sín ntá jehe sín mé tjo sín kichó sín kixin:

—¿Á jehya kaín tí sín tjejónixja mé tsíkjixín sín estado Galilea?

⁸ La ¿nkekuèté tjejótinhinni kixin nixja sín jnkojnko nkíveeni?

⁹ Kixin ntihi mé siín chojni tsíkjixín chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia,

¹⁰ la ko Frigia, la ko Panfilia, la ko Egipto la ko nkuíxín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkokjéxín judío, la í so la tinkáchónki sín Dios éxí tí sín judío xíkaha.

¹¹ La kjaxin síin chojni tsíkjixín Creta, la ko Arabia. Mé xíkaha kaín ni tsíkjixínni tí chjasín a mé tsíkinhinni tjejónixja tí sín a tí kjuaxroan kuènte Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chrakon sín ntá kjuanchankíhi kíchó sín kixin:

—¿Nkehe t'axrjexín kaín tíha? —ichro sín.

¹³ A ntá iso sín kjuanoá sín ntáchro sín kixin:

—Tsékoan tí sín a —ichro sín.

A ntá ch'in Pedro chénka tí sín síin

¹⁴ Ntá jehe ch'in Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'in Pedro mé itsen nixja ch'án. Ntáchro ch'án kixin:

—Jahará chojni judío la ko jahará tjejórá chjasin Jerusalén. Kaínrá tjejórá tinhínrá tí nkehe tsoxrjanka.

¹⁵ Tí sín tjejó ntihi la jehya tsékoan sín éxí ntáchrórá, kixin na ntá las nueve nchítjen la kohya nkexro tsékoan.

¹⁶ Tíhi mé tsíchrónka ch'in profeta Joel:

¹⁷ Ntáchro Dios kixin: Itsi ijnko yaon tsjixixín ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuèntana.

La ko tí sín ntasoá mé titàya ts'íkuèn sín tí nkehe tsjáqoha sín.

La ko tí sín ó tada la kotáchrién sín ts'íkonxín sín kixin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xra la ko tí síchjin kjaxin la tsochrónka sín tanná.

¹⁹ Ntá janhan mé tsjáqoxian ijnko kjuachrakon nkajní.

A ntá chjasintajni tsjáqoxian kjuaxroan:

mé ts'ixín ijní la ko xrohi la ko itjuí tsík'óna ihnchi.

²⁰ Mé tí yaon la ts'inkaséyanxínhya, ts'óna ts'ixín tie.

A ntá tí nitjó mé ts'óna ijní.

Xíkaha senó tsonhen ntá itsi Ìnchéni.

Tíhi mé ijnko yaon imá jíé la imá náxrjón.

²¹ A ntá kaín tí nkexro tsjanchehe ihníé Ìnchéni kixin tsjinkítsa sín mé tsaá sín.*

Mé xíkaha tsíchrónka ch'in Joel.

²² 'Jahará chojni israelita tinhínrá tí nkehe tsoxrjanka. Tí ch'in Jesús tsíkjixín chjasin Nazaret mé Dios kjuakoxin

* 2:21 2.17-21 Joel 2.28-32

ch'án kixin tsíchr'án ch'án kixin kjuasin ch'án itsjé kjuaxroan jié k'uikonrá la ko kjuako ch'án kixin Dios tsíchjéhe ch'án kjuachaxin kixin tjinkaon ch'án chrók'uikonrá. Jahará ó jina nohará kaín tíha.

²³ Kjonté xikaha k'uikonrá la jahará itserá ch'án éxi tsíkjenkayáxin Dios ósé. A ntá jahará kjuinchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuak'enkani sín ch'án ijnko ntacruz.

²⁴ Kjánchó Dios la kjuínchexechón ch'án inaá la kjuatsen ch'án tí kjuatjoté kuènte kjuach'én kixin ntá tí kjuach'én xitjahya ts'etuenhen tí jehe ch'án.

²⁵ A ntá ósé tí ch'ín rey David tsíchrónka ch'án kuènte Jesús ntáchro ch'án kixin: Jaha Ìnchéni t'ikuān kixin jnkochrínxín tjétaón ntia tí xritjak'é janhan.

Jaha mé itjen tjaná chjina kixin chrókohya jié chrókuásian.

²⁶ Méxra imá chéhe asenná. Ir'vā tsjexian tí nkehe náxrjón. Ó nòna kixin kohya nkehe ts'atsínka kjonté its'én.

²⁷ Ó nòna kixin tí jaha tsitòehya asenná chríkjan tí siín chojni tsík'en.

Tsjánjonhya kjuachaxin kixin tsoxíka ntōna kixin janhan mé ijnko nkexro t'aha xra jina tjuèhe.

²⁸ Jaha mé kjuákōna tí ntia tsjanjon kjuachón. Jaha mé nchechàna kixin t'ayakonna.†

Mé xikaha tsíkjin ch'ín David.

²⁹ Kíchóni tìtoherá tsontáxrjan kixin ch'ín David, tí nkexro k'uaxrjenixinni mé tsík'én ch'án la ko tsíkixravá ch'án. Ntá naxa noheni nketí tsíxravá ch'án.

³⁰ A ntá ch'ín David mé ijnko nkexro tsíchrónka itén Dios la ó nohe ch'án kixin chaxín Dios chrónka kixin ijnko nkexro ts'axrjenixin ch'án mé ts'óna rey mé ts'etōan éxi jehe ch'án k'uetōan ch'án.

³¹ Mé xikaha ch'ín David la ósé ó nohe ch'án nkehe tsonhen la mé chrónka ch'án kixin tsoxechón Cristo la ko ntáchro ch'án kixin tí asén ch'án tsitòehya tí siín tí sín tsík'en la ts'itjāyanhya tí cuerpo kuènte ch'án.

³² Méxra Dios kjuínchexechón tí ch'ín Jesús, mé k'uikonni kaín ni la mé chrónkani kixin chaxín tíha.

³³ Ntá ijie Jesús mé sákjuiko ch'án Dios la nānko itja chjina Dios mé tjen ch'án. Ntá tsintáchro It'é ch'án Dios kixin tsochr'án ch'án tí Nchakuen ch'án. Ntá jie ó kui la ó k'uikonrá la ko kuínhínrá nkehe kónhen.

³⁴ Tí ch'ín David la jehya jehe ch'án sákjuí nkaya nkajní, kixin jehe David ntáchro ch'án kixin:

Ìnchéni Dios mé ntáche tí Ìnchéni kixin:

† 2:28 2.25–28 Salmo 16.8–11

“Tjak'e tjaná chjina ntihó tsétōan,

³⁵ tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétōan.”‡

Mé xikaha tsíkjín ch'ín David.

³⁶ 'Ntá kaín rá chojni israelita chrókónohará chaxín kixin jehe tí ch'ín Jesús ó kjuakénkanirá tí ntacruz la Dios mé kjuich'ena Ìnchára ijie, mé tí Cristo —mé xikaha chrónka ch'ín Pedro.

³⁷ Ntá ti kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáchro sín kixin:

—Kíchóni, a ntá jie la ¿nkexrí chrókjuich'eni?

³⁸ Ntá kjuátēhe ch'ín Pedro ntáchro ch'án kixin:

—Chrókujitōhéra tí ijiára la chrórxáinkáonrá Dios. Ntá chrókuikitiaxínrá ihnié Jesucristo ntá Dios mé tsjakjìnhanrá tí ijiára ntá jehe ch'án tsjanjon ch'án Nchakuen ch'án ts'ayéhéra.

³⁹ Dios mé sinchekitonhanrá ch'án tí Nchakuen ch'án ts'ayéhéra jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkoinko tí nkexro tsjeyá ch'án.

⁴⁰ Mé xikaha ntáchro ch'ín Pedro la ko í so nkehe ntáchro ch'án. Nta nixjehe ch'án sín inaá, ntáchro ch'án kixin:

—Chrókujitōhéra tí jínahya tjenkayáxin tí chojni siín chjasintajni kixin jahará me jína chrókuaára.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankíxin tinkáchónki Ìnchéni Jesús la k'uíto tí sín ó xráxin siín.

⁴² Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueyá Jesús la kjuínkítsa sín kjuanjon sín tí nkehe chrókjóné tí í so sín la ko chjéhe sín Dios kjuasáya la ko kójnkotsé sín kixin sine sín niotja xraxinkakonxín sín kixin ik'uén Ìnchéni.

Mé xikaha k'uéjé tí sín xrankíxixín tinkáchónki Ìnchéni

⁴³ La ntá kaín tí í so sín mé chrakon sín kixin tí sín tsíkjejá Jesús kjuasin sín itsjé kjuaxroan.

⁴⁴ La kaín tí sín tinkáchónki Jesús mé jnkokóá k'uéjé sín la jnkokóá chóna sín tí nkehe sine sín.

⁴⁵ Kjuínchekji sín tí nkehe chóna sín ntá k'óxikayēhe sín tí chichaon la chjéhe sín tí sín chóntahya.

⁴⁶ Jnkoinko yaon kójnkotsé sín tí nínko la ntá jnkoinko ntōe sín kjóneko kichó sín. La ko kjóné sín niotja kixin xraxinkakonxín sín kixin ik'uén Ìnchéni la ko kjuaxróxin k'uéjé sín la kohya nkexro kjuínchehnke.

47 Kjuanchehe sín kjuasáyé Dios. Ntá kaín chojni k'uéchóntehe sín kjuasáya. A ntá jnkojnko yaon Ìnchéni mé kjueyá iso chojni kixin tsotsjé tí sín tsaá.

3

Kuítohe jína ijnko nkexro xitjahya tji

1 Ijnko yaon tí ch'ín Pedro la ko ch'ín Juan mé chrìn sín sákjuj sín tí tjen tí nínko. Mé kjuíji sín las tres kónjín, tí hora mé nixjehe sín Dios.

2 Kaín yaon kjuák'e ntiha ijnko ch'ín tsíkókjéxín xitjahya tji. Satsíkjiko sín ch'án tí nínko la tsíkjak'etjaxín sín ch'án tí ntója puerta mé it'in Ntója Náxrjón. Ntaha tjetjanchak'éhe ch'án chichaon tí sín sít'ixenhen ntiha.

3 Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín nínko, a ntá kjuanchak'éhe ch'án sín chichaon.

4 Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin:

—Tsjehe ntihi.

5 A ntá tí ch'ín a tjetsjehe ch'án jína kixin ách'e ichrén nkehe tsjanjon tí sín a, ichro ch'án.

6 A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihñié Jesucristo, tí nkexro tsíkjaxín chjasin Nazaret, la t'inkatjen itjia —mé xíkaha ichro ch'ín Pedro.

7 Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án.

8 Ntá tí ch'ín xitjahya tji la chrika ch'án la kjuák'exín toté ch'án ntá kjuankixin ch'án itji ch'án. Ntá k'uixenko sín ch'án nkaxenhen nínko. Tjetji ch'án la ko chrika ch'án la chjéhe ch'án kjuasáya Dios.

9 Na ntá kaín tí chojni síin tí chjasin ntiha la k'uíkon sín kixin ó tji ch'án la ko chjéhe ch'án kjuasáya Dios.

10 Ntá chrakon sín kixin xíkaha tsíkónhen kixin tsíkjatsōan sín kixin jehe tí nkexro kjuák'etjaxín kjuanchak'á ch'án chichaon ntója nínko it'in Ntója Náxrjón.

Nixjehe ch'ín Pedro tí chojni síin tí ntāsin Salomón

11 Na tí ch'ín xitjahya tji la mé títoehya ch'án tí ch'ín Pedro la ko ch'ín Juan. Ntá kaín xín tí sín síin ntiha chrakon sín kuinká sín sákjuítsjehe sín tí ntāsin kuente nínko it'in ntāsin Salomón kixin ntaha tjejó tí sín a.

12 Ntá tí k'uíkon ch'ín Pedro xíkaha la ntáche ch'án sín kixin:

—Jahará chojni israelita, ¿nkekuènte chrakonrá jahará la ko nkekuènte komaráni? ¿Á tjenkayáxinrá kixin jehóni kjuínchekitohe ni jína tí ch'ín i kixin jehóni chóntani kjuachaxin la ko kixin imá tinkáchónkini Dios?

¹³ Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkjikēhenrá ch'án tí sín t'etōan. Ntá tí ch'ín Pilato mé tjinkaon ch'án chrók'uátjánta ch'án tí ch'ín Jesús kjánchó jahará la tjinkákonhyará xíkaha.

¹⁴ A ntá jahará chrókjuanchiará chrókuítóhe sáchrókjui tí nkexro tjóá jína asén. A ntá náhí. A ntá jahará mé tjinkáonrá sátsji ijnko chojni chóna nchónhya jje.

¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xíkaha k'uíkonní la chrónkani.

¹⁶ Tí kjuachaxién ihnié Jesús mé tinkáchónkini la ntá tíha mé kuítóexín jína tí nkexro k'uíkonrá la ko choxinrá. Tí ch'ín a mé kuítekaon ch'án ntá kuítóhe ch'án jína. Mé xíkaha ó k'uíkonrá kaín rá.

¹⁷ Kíchóni ó nòna kixin tió jahará la ko tí sín t'etōan k'oyánrá Jesús la ni kónoahyará nkehe kjuich'erá.

¹⁸ Ntá ó xiteyá tí nkehe tsíntáchro Dios tsínixjajin tí sín tsíchrónka itén ch'án kixin tí Cristo t'ichjánxin tsjasóte ch'án.

¹⁹ Méxra tsitōhérá ijjará ntá xráxinkáonrá Dios ntá jehe ch'án mé ts'óxíka ijjará ntá Inchéni mé sinchekitōhará ch'án jína.

²⁰ Ntá jehe ch'án mé tsochr'án Jesucristo ínaá la xra ó tsi kixin tsaáxinrá.

²¹ Na ntá ijje la Jesucristo la nkaya nkajní ntahó tsitōhe ch'án hasta tsjasiyóxinjian Dios kaín nkehe éxí tsíntáchro ch'án tsínixjajin ch'án tí sín tsíchrónka itén ch'án ósé.

²² A ntá senó tí ch'ín Moisés tsíchénka tí sín tsík'axrjeníxinni kixin: “Inchéni Dios mé tsochr'án ijnko nkexro ts'axrjeníxinrá tsochrónka itén ch'án éxí tsíchr'án ch'án tí janhan. T'ichjánxin tinhínrá kaín tí nkehe tsontáchro ch'án.

²³ A ntá tí chojni titekakonhya tí nixja tí nkexro a la ts'itjáyan sín la tsitōhe sín tí nación Israel,”* mé xíkaha tsíchrónka ch'ín Moisés.

²⁴ Kaínxin tí sín tsíchrónka itén Dios kjuankíxixín ch'ín Samuel la ko kaín tí sín kui chr'éxin mé chrónka sín kixin kaín tíha tsonhen xíkaha tí yaon i.

²⁵ Mé tí nkehe tsíntáchro Dios tsínixjajin ch'án tí sín tsíchrónka itén ch'án kixin xíkaha chrók'uayéhérá jahará tí nkehe chrókjuanjon ch'án kixin chrók'uejorá jína. Dios tsíkjich'éna ch'án ijnko pacto mé nixjehe ch'án tí sín tsík'axjeníxinrá mé tsíntáche ch'án tí ch'ín Abraham kixin:

* 3:23 3.22–23 Deuteronomio 18.15,19

“Kaínxín chojni chjasintajni mé tsoyaonxín sín kixin ijnko nkexro ts'axrjeníxin tí jaha.”†

²⁶ Dios kjuínchexechón ch'án tí Xjeen ch'án la saoxín ichr'án ch'án tí tjejorá jahará israelitará kixin chrókjuintayaonrá ch'án kixin jnkojnko tí jahará chrókjuítóhéra tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etoan

¹ Ch'ín Pedro la ko ch'ín Juan la naxa tjeónixjehe sín tí sín tsikójnkotsé ntá xrínahya ikui tí sín nchat'á la ko tí ch'ín t'etuenhen tí sín soldado kuènte tí nínko la ko tí sín saduceo.

² Imá kónínkaon sín kixin ch'ín Pedro la ko ch'ín Juan kjuakohe sín tí sín tsikójnkotsé nkexrí tsoxechón chojni tsík'en kixin xíkaha xechón ch'ín Jesús.

³ Ntá kuínhin sín xíkaha ntá itsé sín tí sín a ntá sákjuíko sín, chr'áxehen sín ntqechiso. Ntahó k'uéjó sín hasta kóyaon kixin ó ntá kóntó.

⁴ A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

⁵ A ntá tí yaon chr'éxin kójnkotsé tí chjasin Jerusalén tí sín t'etoan kuènte tí sín judío la ko tí sín tjako tí ley.

⁶ Mé kjaxin ntaha tjen ch'ín Anás, mé jehe ch'an mé tí nchat'á imá t'etoan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchat'á t'etoan.

⁷ Ntá k'uejtoan sín kixin síxrakoa ch'ín Pedro la ko ch'ín Juan. Ntá k'uéjó sín jnkosiné la ntá kjuanchankíhi sín ntáchro sín kixin:

—¿Nkexro kjuanjon kjuachaxin o nkexro kjuachaxin ihnié kixin xíkaha ich'erá tí nkehe?

⁸ Ntá ch'ín Pedro imá chóna ch'án kjuachaxin kuènte Nchakuen Dios ntá kjuátehe ch'án ntáchro ch'án kixin:

—Jahará chojni t'etoan kuènte chjasin la ko jahará sín tada kuènte chjasin Israel,

⁹ jahará mé tjanchankirá kixin nkexrí kuítóhe ijnko chojni níhi jína kixin tjínkáonrá tsonohará.

¹⁰ Ntá tinhínra jína tí nkehe tsochrónkaxínni kixin kaín rá chojni chjasin Israel tsonohará kixin tí ch'ín i itjen ntihi mé kuítóhe ch'án jína kjuachaxién ihnié Jesucristo, tí nkexro tsíkjixín chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá.

¹¹ Tí ch'ín Jesús i mé tí xro náxrjónhya kuítóéntará tió kjuich'énará tjat'ó ntá mé jie k'óna tí xro tjetoan.*

† 3:25 Génesis 22.18 * 4:11 Salmo 118.22

12 Kohya í jnko nkexro chón̄ta kjuachaxin chrókuaáxinni ḱixin kohya í jnko ihnié chojni ntihi chjasintajni chrókuinkáchónkini chrókuaáni —mé xíkaha ichro ch'ín Pedro.

13 Tí síxreé mé k'uikón sín ḱixin ch'ín Pedro la ko ch'ín Juan mé nixja sín kaín asén sín la ntá kónohe sín ḱixin tí sín a mé noehya sín xroon la tjetuanhya sín. Ntá chrakon tí sín t'etōan ntá kjuátsōan sín ḱixin tí sín a mé tsík'ajiko ch'ín Jesús.

14 A ntá tí ch'ín tsíkitohe jína mé ntiha tjejóko sín ch'án. Méxra xitjahya tsjanchia sín jię tsjasóte tí sín a.

15 Ntá tí síxreé a mé k'uetōan sín ḱixin tí sín a ts'axrje sín ntója ntá jehó sín k'uéjóxenhen sín nchia ikjo sín kíchó sín.

16 Ntá ntáchro sín ḱixin:

—¿Nkehe chrókjuich'eheni tí sín a? Kaínxín tí chojni ntihi chjasin Jerusalén mé ó k'uikón sín ḱixin kjuínkítsa Dios tí sín a ntá kjuasin sín ijnko kjuaxroan jié ntá xitjahya tsontáchroni ḱixin chaxínhya tíha.

17 Í tjinkakonhyani ḱixin naxa tsochrónka sín tíha ḱixin naxa tsinhin chojni. Méxra ts'etōanni ḱixin í tsochénkahya sín ninkexró tí ihnié Jesús.

18 Na ntá k'uíyehē sín tí sín a inaá ntá k'uetuēnhen sín ḱixin ninkehó chrónixja sín la ko chrókjuako sín ihnié Jesús, ichro sín.

19 A ntá ch'ín Pedro la ko ch'ín Juan kjuátehe sín ntáchro sín ḱixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará o chrókjuinchexiteyéhēni tí jehe ch'an?

20 A ntá jeheni la xitjahya tsítóheni tsochrónkani tí nkehe ó k'uíkōni la ko tí nkehe kuínhinni —ichro sín.

21 A ntá kjónté xíkaha kuínhin tí síxreé la jięhe k'uetōan sín ntá kjuanjon sín kjuachaxin ḱixin sátsji tí sín a ḱixin k'uitjahya sín nkexrí sinchekjasóte sín tí sín a ḱixin kaín tí sín chjasin ntiha chjéhe sín Dios kjuasáya ḱixin tí kjuaxroan kjuích'e sín.

22 Na mé tí ch'ín kuítóhe jína ḱixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín ḱixin tsochrakonhya sín

23 Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetōan tí sín nchāt'á t'etōan la ko tí sín táda.

24 Ntá kjuixin kuínhin tí sín tsíkójnkotsé na ntá kaín sín nixjehē sín Dios la ntáchro sín ḱixin:

—İnchéni, jaha mé kjuich'ēna nkajní la ko chjasintajni la ko tí ntayaon la ko kaín xín tí nkehe síin.

25 Jaha mé kjuachaxiēn Nchakuan nixjaxian ch'ín David tí nkexro kjuít'aha xra. Ntáchro ch'án ḱixin:

¿Nkekuènte kíxin kónínkaon kaín tí chojni naciòn ókjé?

A ntá tí chojni israelita mé tjenkayáxin nkehe ninkehó sínkíhya.

26 Tí sín rey síin chjasintajni la ko kaín tí sín tí chjasin kójnkotsé síin

nínkakonhen sín Ìnchéni la ko Cristo.†

Mé xíkaha tsíkjin ch'ín David ósé.

27 Mé xíkaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsíkójnkotsé sín tí chjasin ntihi kíxin kónínkakonhen sín tí Xjaan Jesús chóntahya jie, mé tí nkexro tsíkjéyá jaha sit'aha xra.

28 Mé xíkaha kjuínchexiteyá sín tí nkehe ósé tsíkjenkayáxian kíxin t'ichjánxin xíkaha tsonhen.

29 A ntá Ìnchéni, tsjehé kíxin imá jiehe k'uetōan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán.

30 La ko tí kjuachaxián sìnchekitoexín jína tí chojni níhi la ko tsjákoxian kjuaxroan kjuachaxián ihnié tí nkexro Jesús t'aha xra —mé xíkaha nixjehe sín Dios nkaya nkajní.

31 A ntá tí kjuixin nixjehe sín Dios a ntá tí tjejó sín mé kuínki nonte. La ntá kaín sín antsí k'uáyéhe sín Nchakuen Dios ntá kaín asén sín kjuankíxin sín chrónka sín itén Dios.

Tí kaín nkehe síin la kaín sín mé kuènte sín

32 La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntáchro kíxin jehó kuènte tí nkehe síin. Náhi. Kaín sín mé kuènte sín.

33 Tí sín tsíkjeýá Jesús mé kaín asén sín chrónkaxín sín kíxin nkexrí xechón Ìnchéni Jesús. Ntá Dios antsí kjuíncheyaon kaín sín.

34 Kohya ninkexró nóaxinhya tjejó ntiha kíxin kaín tí sín chóna nontee sín o ntoe sín kjuínchekji sín. Na ntá tsíkjikao sín tí chichaon

35 chjéhe sín tí sín kjueyá Jesús. A ntá tí sín k'óxikayehe sín tí chichaon, kuákja tí sín nòa.

36 Mé xíkaha kjuích'e ijnko ch'ín levita it'in José. Jehé ch'án la tsíkjin ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axrjexín kíxin tí ch'ín nchechéhe asén chojni.

37 Jehé ch'án a mé kjuínchekji ch'án ijnko nontee ch'án ntá kjuikao ch'án tí chichaon kjuínchek'áyéhe ch'án tí sín kjueyá Jesús.

5

Ijie kjuasin ch'ín Ananías la ko tjan Safira

† 4:26 4.25–26 Salmo 2.1–2

¹ A ntá í jnko ch'án mé it'in Ananías, a ntá ichjién ch'án mé it'in Safira, mé jehe sín mé kjuínchekji sín ijnko nontee sín.

² A ntá tí ch'ín a kjuenkayáxinko ichjién ch'án ntá kuakitsjen-tehe sín iso tí chichaon. Ntá í so mé sákjuíko ch'án la chjéhe ch'án tí sín kjueya Jesús la kjuanjon ch'án éxí kaín.

³ Ntá ntáchro ch'ín Pedro kixin:

—Ananías, ¿kuènté chjehé kjuachaxin tí Tsochren kixin k'uetuenhen asán? Ntá kjuich'iyehé tí Nchakuen Dios kixin kjuínchemá iso chichaon kjuínchekjixián nontaa.

⁴ ¿Á jehya nontaa tíha? Ntá tió kjuínchekjia la, tí chichaon la, ¿á jehya kuèntá? ¿Kuènte kjuenkayáxian sich'e tíha? Kjuich'iyehé Dios, jehya chojni kjuich'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín.

⁶ Na ntá ikjuí iso sín ntasoá la ntá kjuínchek'ísímá sín ika tí cuerpo kuènte ch'án la ntá sákjuíko sín, sákjuíjavá sín.

⁷ Ntá k'uátsínka iní hora ntá kjuíji ichjién ch'ín Ananías k'uixenhen tjan tí nchia ntaha a. La noehya tjan nkehe tsíkónhen tí ntiha.

⁸ Ntá ch'ín Pedro mé kjuanchankíhi tí tjan a, ntáchro ch'án kixin:

—Chronka, ¿á chaxín xikahó kóxixín tí nonte ó kjuínchekjirá? —ichro ch'án.

Ntá kjuátehe tjan kixin:

—Chaxín xikahó kóxixín.

⁹ Ntá ntáchro ch'ín Pedro kixin:

—¿Nkekuènte jnkokoá kjuenkayáxinrá kjuich'iyehérá Nchakuen Inchéni? Kjá ntáchrórá kohya nkehe chrókónhanrá. Ntihi ó kui tí sín ntasoá sákjuíjavá sín xia na ntá jaí sátsjiko sín tí jaha —mé xikaha ichro ch'ín Pedro.

¹⁰ Ntá tuénxín kjuítsínka tjan Safira toté tí itjen ch'ín Pedro ntá ik'uén tjan. Ntá k'uixenhen tí sín ntasoá tí nchia a ntá k'uíkon sín kixin tsíkixín tsík'en tjan. La ntá sákjuíko sín tí cuerpo kuènte tjan la kjuavá sín tjan tí chjinaxón tsíxrává tí xì tjan.

¹¹ Na kaín tí sín kuènte nínko la ko tí í so sín kuínhin tí xikaha tsíkónhen, mé imá chrakon sín.

Itsje kjuaxroan kjuakoxín sín

¹² A ntá tí sín kjueya Jesús mé kjuakoxín sín nchónhya kjuaxroan tí síin chojni ntiha la ko kaín sín mé kójnkotsé sín tí ntasin it'in Salomón.

¹³ Chrakon iso sín k'uítóhya tí jehe sín la kjónté la kaín chojni tjikosáyehe tí jehe sín.

¹⁴ La ntá xrínahya nchónhya chojni ntoa la ko chojni chjin kjuankixin tinkáchónki sín Inchéni.

15 Ntá itsjé chojni mé kuakitsje sín tí chojni níhi k'uejo sín ntja. Tjejóták'á sín chrítaón cama la ko kania kixin ts'atsínka ch'ín Pedro ntá kjónté its'uēen ch'án ó ts'atsínka tí tjejó sín mé chrókuitōexín sín jína.

16 Kjaxin tí chjasin chjino mé kjuixin nchónhya chojni ikjui sín chjasin Jerusalén la kjuikao sín tí chojni níhi la ko tí chojni chóna nchakuen tí jínahya. La kaín sín a mé kuítōhe sín jína.

Ch'ín Pedro la ko ch'ín Juan mé chónkíhi sín

17 Na ntá tí sín nchat'á t'etōan la ko tí sín kuēnte tí sín saduceo mé imá kóchjinoxínhin sín.

18 Na ntá itsé sín tí sín kjueyá Jesús la chr'áxēnhen sín ntōechiso.

19 A ntá ijnko ángel kuēnte Ìnchéni ikui tí tie a kuakitjēhe ch'án ntója ntōechiso ntá kuakitsje ch'án tí sín a. La ntá k'uetuēnhen ch'án sín kixin:

20 —Sátjirá n̄nko la tsjákohérá kaín tí sín ntiha tí tan n̄xin tsjanjon kjuachón.

21 Kjuixin kuínhin sín ntá sákjuí sín ntá tí k'uínkaséyan k'uixēnhen sín tí n̄nko kjuako sín.

A ntá tí nchat'á t'etōan la ko tí sín k'uejóko ch'án mé k'uíyēhe sín tsojnkotsé kaín tí síxreé, mé tí sín t'etōan kuēnte Israel. Na ntá k'uetōan sín kixin tsoxrakoa tí sín tjejóchjina tsíkjeýá Ìnchéni.

22 A ntá kjuíji tí sín policía tí ntōechiso a ntá k'uitjahya sín tí sín a. La ntá ikjan sín la

23 ntáchro sín kixin:

—Kjuíjini ntiha la k'uíkōnni tsíkjehe jína ntōechiso a la k'uejó tí sín soldado a ntója. Ntá kuakitjēheni ntōechiso la k'uitjahyani ninkexró tí nkaxēnhen —ichro sín.

24 Ntá kaín tí nchat'á t'etōan la ko tí ch'ín k'uetuēnhen tí policía kuēnte n̄nko la ko i so tí sín nchat'á t'etōan mé kuínhin sín ntá ntáchro sín kixin xá nkexrí chrókónhen chrók'uitjāyan tí xra kuēnte tí sín a.

25 Na ntá tuénxín kjuíji ijnko nkexro ntáchro kixin:

—Tí sín k'uejochjinaará jahará mé ó nkaxēnhen n̄nko ntaha tjejó sín tjejótjākōhe sín chojni —ichro ch'án.

26 La ntá tí ch'ín k'uetuēnhen tí sín policía mé sákjuíko ch'án tí sín policía la kjuikakjín tí sín tjako. Ninkehó kjuích'ehya tí sín policía tí sín tjako kixin chrakon sín kixin ách'e tí sín siín ntiha mé tsjak'e sín xro, ichro sín.

27 Na ntá tió kjuikao sín tí sín a la k'uejó sín nkayakon tí sín t'etōan ntá tí nchat'á t'etōan ntáchro ch'án kixin:

28 —Jeheni kjuanjonhyani kjuachaxin kixin tsjákorá ihnié tí nkexro a. ¿A ntá nkehe kjuích'erá jahará? Kuenté chjasin

Jerusalén tsíkjákórá. La tjinkáonrá tsékaráni jie kixin jeheni tsík'óyánni tí ch'ín a —ichro ch'án.

29 A ntá ch'ín Pedro la ko tí iso sín kjueyá Jesús ntáchro sín kixin:

—A ntá jeheni t'ichjánxin sinchexiteyéheni Dios senó. A ntá chr'éxin sinchexiteyéheni chojni.

30 Tí Dios tsíkinkáchónki tí sín tsík'axjeníxinni ósé mé kjuínchexechón Jesús, ti nkexro a mé kjuakénkanirá tí ntacruz tsík'oyánrá.

31 Ntá ijie tjeko ch'án Dios nkaya nkajní la nángo itja chjina Dios mé tjen ch'án la Dios kjuích'éna ch'án ijnko nkexro t'etōan kixin sinchekaá ch'án chojni kixin tí nación Israel chrókjan chrókuinkáchónki sín Dios ntá chrók'uitjáyan tí jie chóna sín.

32 La ko kjaxin jeheni chrónkani kaín tí nkehe k'uíkonní kjuachaxién Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

33 La ntá tí sín t'etōan a mé kuínhin sín tíha ntá kónínkaon sín la ko tjinkaon sín chrók'óyán sín tí sín a.

34 Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uētōan ch'án kixin tí sín tsíkjeyá Ìnchéni mé ts'axrje sín ntója intsí, ichro ch'án.

35 Na ntá nixjehe ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuich'eherá tí sín a.

36 Xráxinkáonrá kixin senó kjuák'e ijnko ch'ín it'in Teudas la tónhen asén ch'án kixin imá t'etōan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuèxín tí xrā k'uékjich'e sín.

37 Ntá chr'éxin tió xrenájín kaín ihníé chojni k'uéjó na ntá ikjuí í jnko ch'ín mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xíka sín sákjuí sín inaá.

38 Méxrā tītōhérá tjiatéhyará tí jehe sín a. A ntá tí tjejóch'e sín xrā kuénte chojni ó la kjaxin ts'itjáyan.

39 A ntá tí chaxín tjako sín kjuachaxién Dios ntá ts-jachahyará sinchek'itjáyanrá tíha. Méxrā tītōhérá sín kixin tsjánjonkohyará Dios.

40 Na ntá kaín tí síxreé mé kuítekaon sín la ntá k'uíyehé sín tí sín kjueyá Jesús. La ntá kjuate sín la xík'etueñhen sín kixin í tsonixjahya sín ihníé Jesús la ntá kjuanjon sín kjuachaxin kixin sátsji sín.

⁴¹ Ntá tí sín kjueyá Jesús mé k'uaxrjexín sín tí tjejó tí sín t'et̄oan kjónté x̄ikaha kónhen sín la chéhe sín kixin Dios kjuanjon kjuachaxin kjuasóte sín kixin tí kjuako sín ihnié Jesús.

⁴² Kuít̄ohya sín tsjako sín kuènte Jesucristo kaín yaon tí nkaxenhen n̄inko la ko tí jnkojnko nt̄e chojni.

6

Kjueyá sín yato chojni tsjink̄itsa

¹ Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nk̄iva griego mé kónínkakonhen sín tí sín nixja nk̄iva hebreo. Ntáchro sín kixin tí sín chjin k'án kuènte sín la kánhyó jina k'uáyéhe tí nkehe síxikaȳehe sine sín jnkojnko yaon, ichro sín.

² Na ntá tí teyó tí sín tsíkjeýá Jesús mé k'uíȳehe sín kaín tí sín tinkáchónki Ìnchéni. Ntá nixjehe sín, ntáchro sín kixin:

—Jeheni la jehya jina tsítóheni tí xr̄a tjakoni itén Dios, kixin ntá sit'aharáni xr̄a ts'óxikaȳeheni tí nkehe sine tí sín k'án.

³ Méxra jahará kichó ni tsjéýará yato chojni ntoa tí tjejorá, tí chojni jina choxinrá la ko nohe sín la ko ant̄sí chóna sín Nchakuen Dios mé tí sín a sinchek'áyéheni tí xr̄a a.

⁴ A ntá jeheni la tsonixjehe ni Dios la ko tsinkákjakoni itén ch'án —mé x̄ikaha ichro sín.

⁵ La ntá kaín sín mé kuínhin sín x̄ikaha ntá jnkokoá kjuenkaȳaxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko ant̄sí chóna ch'án tí Nchakuen Dios. La kjaxin kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehé ch'án mé tsíkjin sín ch'án chjasin Antioquía la ósé mé tsíkinkáchónki ch'án ti nkehe tinkáchónki tí sín judío.

⁶ Ntá kjuixin kjueyá sín tí sín a ntá kjuik̄ao sín ti tjejó tí sín tsíkjeýá Ìnchéni. La ntá tí sín a mé nixjehe sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nch̄at'á judío kjuank̄ixin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyaon ch'án la nchónhya kjuaxroan kjuakoxin ch'án tí sín chojni.

⁹ A ntá iso sín tsíkjin sín tí n̄inko judío kuènte tí sín senó k'uejó esclavo sín tsíkjin sín chjasin Cirene, la ko Alejandría, la ko Cilicia, la ko estado Asia, mé kjuank̄ixin sín ikjo sín ch'ín Esteban.

¹⁰ Kjónté xíkaha la kjuachahya sín kixin Nchakuen Dios mé kjuínkítsa tí ch'ín Esteban nixja ch'án.

¹¹ Na ntá jehe sín mé kjuenkehe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín.

¹² Mé xíkaha k'uíxité kaín chojni la ko tí sín t'etoan kuènte nínko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí síin tí síxreé a.

¹³ Kjaxin kjueyá sín chojni tsochrónka kixin ntoáhya kjuako ch'ín Esteban la ntáchro tí sín a kixin:

—Tí ch'ín a mé títoehya ch'án t'ántaxínhin ch'án tí nínko kuènténi la ko tí ley.

¹⁴ Ó kuínhinni kixin chrónka ch'án kixin tí ch'ín Jesús, tí ch'ín tsíkixín chjasin Nazaret, mé sinchek'itjáyan ch'án tí nínkoeni ntihi la ko tsjitóxinhin ch'án tí nkehe tinkáchónkini mé tí nkehe tsík'etoan ch'ín Moisés —mé xíkaha ichro sín.

¹⁵ Ntá tí síxreé la ko kaín tí sín sítjaxín ntiha la komá sín tí ch'ín Esteban la mé k'uíkon sín kixin tí kàrè ch'án mé éxí ijnko ángel mé xíkaha tsjehe tí jehe ch'án.

7

Tí nkehe kjuátehe ch'ín Esteban

¹ A ntá tí sín nchat'á t'etoan kjuanchankíhi sín tí ch'ín Esteban kixin:

—¿Á chaxín kaín tíhi tsintáchrúa?

² Na ntá jehe ch'án kjuátehe ch'án ntáchro ch'án kixin:

—Kaínrá kichó ni Israel la ko sín táda tinhínrá tí nkehe tsontáxrjan. Dios kuènteni chóna kjuachaxin mé kjuakohe ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxa sátjihya ch'án tsjak'e ch'án nonte Harán.

³ Dios tsintáchró kixin: “Títóhé chjasán la ko kaín tí nkexro kjéhya. Na ntá sátjia tí nonte tsjákohá jaha.”*

⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjejorá ijie.

⁵ Kjánchó ch'ín Abraham la kuákjahya ch'án nít'o nonte hasta ni tí tsjak'e toté ch'án la chónahya ch'án. A ntá chrónka Dios kixin chaxín chr'éxín tió tsjixin ts'en ch'ín Abraham la tí sín ts'axrjeníxin ch'án mé ts'áyéhe sín tíha. Kjónté naxa kohya nijnko xjeen ch'án la mé xíkaha ntáchro Ìnchéni.

* 7:3 Génesis 12.1

⁶ Kjaxin tsintácho Dios kixin tí sín ts'axrjeníxin ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó.

⁷ La kjaxin xintácho Dios inaá kixin: “Ntá chr'éxin janhan sintakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xikaha ichro Dios.

⁸ Na ntá Dios mé tsíkjo ch'ín Abraham kixin kaín tí chojni ntoa ts'axrjeníxin ch'án mé itsa sín xroye. Na ntá xikaha tió kokjíhi xjeen ch'an Isaac ntá ch'ín Abraham mé chjéhe ch'án xjan xroye tió xétjehe xjan ijní yaon. Ntá kjaxin xikaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xikaha kjuích'e ch'án inaá. Ntá tí sín a mé k'óna it'é tí teyó tribu tsík'axrjeníxin tí sín Israel.

⁹ Tí xjeen ch'ín Jacob mé tí sín k'uaxrjeníxinni ósé la jehe sín k'uéchjinoxínhin sín tí kichó sín José ntá kjuínchekji sín ch'án la tí sín k'uena la sákjuíko sín ch'án nó nación Egipto, kjánchó Dios mé kjuínkítsa tí jehe ch'án.

¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsonohe ch'án. Na ntá k'uíkon ch'ín Faraón tí rey kuente nación Egipto a xikaha tí xra jína kjuích'e ch'ín José ntá kjuanjon ch'án kjuachaxin kixin ts'etqan ch'ín José tí nación Egipto la ko tí ntqex ch'án.

¹¹ Na ntá kókjinta xrinahya la náxrjónhya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín.

¹² A ntá tsíkinhin ch'ín Jacob kixin tí nación Egipto mé sitóxi noa trigo ntá k'uetuénhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín.

¹³ Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuakohé ch'án tí ch'ín Faraón tí sín naxa kjéhya ch'án.

¹⁴ La ntá k'uetqan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án.

¹⁵ Mé xikaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha.

¹⁶ Ntá chr'éxin kuakitsjexín sín tòye tí huésqé tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

17 'La ntá ó kuichjina tsoxiteyá tí nkehe tsíntáchro Dios tsíkjo ch'ín Abraham ntá tí sín Israel imá kótsjé sín nación Egipto.

18 A ntá xrínahya í jnko ch'ín rey kjuankíxin k'uetōan nación Egipto la k'uéchónhya ch'án tí ch'ín José.

19 La ntá tí ch'ín rey kjuích'iyehē ch'án tí sín naxa kjéhyani la ko kjuínchekjasóte ch'án sín. La tsík'etōan ch'án kíxin tí xjan ntoa na ntá kokjíhi mé tsjik'itjí sín xjan kíxin its'en xjan.

20 Na ntá tí yaon a tsíkokjíhi ch'ín Moisés ntá imá kóxrjínhin Dios tí xjan a. It'é la ko ìné xjan mé k'uéchónhta sín xjan iní nitjó koá ntōe sín.

21 Ntá chrokjuahya tsjak'emā sín xjan la ntá kjuíkjáka sín xjan. La ntá xjeen tí ch'ín rey kuènte Egipto mé kjuíkakja tjan xjan la sákjuíko tjan ntōe tjan la kjuínchek'ánkí tjan xjan éxí xjeen tjan xikaha.

22 La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetōan tí nkehe k'uéntáchro ch'án la ko tí nkehe k'uékjich'e ch'án.

23 'La ntá tió chónhta tí ch'ín Moisés cuarenta nánó ntá tjinkaon ch'án tsjitsjehe ch'án tí sín israelita naxa kjéhya ch'án.

24 Ntaha mé k'uíkon ch'án kíxin ijnko chojni Egipto kjuate ijnko chojni naxa kjéhya tí jehe ch'án. Ntá chrókjuinkitsa ch'án tí sín naxa kjéhya ch'án ntá k'oyán ch'án tí ch'ín Egipto a.

25 Kjuenkayáxin ch'án kíxin tí sín naxa kjéhya ch'án, mé tí sín israelita, mé tsonoexín sín kíxin Dios mé tsíchr'án tí jehe ch'án sinchekaá sín ch'án. Kjánchó tí sín a kjuátsoanhya sín.

26 La ntá í jnko yaon tí ch'ín Moisés k'uíkon ch'án kíxin yaá sín israelita tjanjonko kíchó sín. La ntá tjinkaon ch'án chrókjuít'oxin ch'án kíxin chrokjuanjōnhya sín. La ntáchro ch'án kíxin: "Jahará jnkokoá kíchuará la, ¿nkekuènté tjánjonrá?"

27 A ntá tí nkexro chónhta tí jie mé kónínkaon ch'án la kótéka ch'án tí ch'ín Moisés. Ntá ntáchro ch'án kíxin: "¿Nkexro kjuanjōn kjuachaxin kíxin jaha k'óna juez kuènténi?"

28 ¿Á tjinkávan ts'oyánni kjaxinni éxí k'oyán tí ch'ín Egipto ijna ní?"

29 A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxí ijnko chojni tsíkjixín ókjé. Ntá ntaha tsíkótehe ch'án la ko kjuích'éna ch'án yaá xjan ntoa.

30 'Na ntá k'uátsínka cuarenta nánó ntá tí nteje chjino jnā it'in Sinaí mé xrínahya k'uíkon ch'án ijnko ángel tjenkákjan tí xrohi chríkjan tí ntayoa tjeche.

31 Ntá tí ch'ín Moisés la chrakon ch'án kíxin xikaha k'uíkon ch'án la ntá kóchjinehe ch'án kíxin chrótsjehe ch'án la ntá kuínhin ch'án itén Inchéni ntáchro kíxin:

32 “Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob,” mé xíkaha ichro Dios. Ntá tí ch'ín Moisés la kjuankíxin chrakon ch'án la síxranka ch'án ntá í tjinkakonhya ch'án tsotsjehe ch'án.

33 Na ntá ntáchro Ìnchéni kíxin: “Takítsje tokatá kíxin tí nonte tinkatja la nonte tjóá chóntahya jie.

34 Ó k'uíkuan kíxin tí sín kuèntana mé imá tjejtjasóte sín nación Egipto. La ó kuñhan kíxin t'èya sín. La ntá ijie ó k'uinka kíxin tsjínkítsa sín. Méxra xrakíá jaha tsétuanhan jaha sátsjia nación Egipto,”† ichro Dios.

35 “Tí sín israelita mé kjuanoá sín tí ch'ín Moisés. Tsíntáchro sín kíxin: “¿Nkexro kjuanjon kjuachaxin kíxin jaha k'óna juez?” ichro sín. Kjánchó Dios ichr'án ch'án tí ch'ín Moisés kíxin ts'etōan ch'án la ko sinchekaá ch'án tí sín israelita kjuachaxin tí ángel k'uíkon ch'án chríkjan tí nta.

36 Ntá tí ch'ín Moisés kuakitsjexín ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí nación Egipto, la ko tí Ntayaon Kjátse, la ko tí nteje k'uáji sín cuarenta nánó.

37 Jehe tí ch'ín Moisés a mé chénka tí sín israelita kíxin: “Dios mé tsochr'án ijnko chojni tsoníxja itén Dios ts'axrjeníxin tí sín kíchuará éxí ichr'án ch'án tí janhan. Títekákonhénrá tí jehe ch'án.”‡

38 Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehe ch'án tí jna Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijie.

39 A ntá tí sín k'uaxrjeníxinni ósé mé tjinkakonhya sín kíxin chrókuitekaon sín la kjuanoá sín tí ch'ín Moisés la ko tjinkaon inaá chrókjan sín nación Egipto.

40 A ntá ntáche sín ch'ín Aarón kíxin: “Tjinkaonni sích'éna ijnko dios kíxin tsinkáchónkini kíxin í noehyani nkehe kónhen tí ch'ín Moisés, tí nkexro kjuínkítsa k'uaxrjexínni nación Egipto.”§

41 Ntá kjuínchekjanoya sín ijnko koxintáxjan la ntá k'óyán sín iko kjokehe tí nkehe tsíkjanoya a la imá kóchéhe sín k'uíkon sín tí nkehe tsík'ónaxín tja chojni.

42 A ntá Dios mé kuítōhe tí jehe sín kíxin tsinkáchónki sín tí konotsé siín nkajní. Tíhi mé tsíkjin ijnko nkexro k'uéchrónka itén Dios ntáchro xíkíhi:

Jahará chojni Israel, ¿á k'oyánrá tí iko kjókānará tí janhan tí cuarenta nánó k'uejorá nteje ní?

† 7:34 7.30–34 Éxodo 3.1–10

‡ 7:37 Deuteronomio 18.15,18

§ 7:40 Éxodo 32.1

43 Kja náhí, jehó tí nkehe kjuich'énará mé kjókehérá tí ko a.
Kjuikoará tí ninkoé tí dios Moloc

la ko kjaxin kjuikoará tí konotsé kuènte dios Renfán.

A ntá tí nkehe tsíkjich'énará jahará mé xráxinkákonxínrá éxí
Dios kuèntará.

Méxra janhan tsakítsjexínrá tí tjejorá la tsétuānhánrá sátsjirá
chjasin Babilonia.*

Mé xikaha ntáchro Dios ósé.

44 'Naxa k'uéjéó tí sín k'uaxrjeníxinni tí nteje la chóna sín
ijnko ninko kamantá chóna tí ley tsík'etoan Dios. Tíhi
kjuich'éna sín éxí tsík'etuēhen Dios tí ch'ín Moisés kixin
sich'éna ch'án kaín nkehe k'uíkon ch'án.

45 Ntá tí sín tsík'axrjeníxinni mé k'uáyéhe sín tí ninko
kuiōnhen sín. Ntá tí sín kjuikao ch'ín Josué mé kjuikao sín
tí ninko tió kjuacha sín k'uáyéhe sín í jnko nonte kuènte í so
chojni kuakitsje Dios, kixin ts'áyéhe tí jehe sín. Mé xikaha
kónhen hasta tí yaon kjuankíxin k'uētoan ch'ín David.

46 Imá kjuíncheyaon Dios tí ch'ín rey David la ntá tí ch'ín
David mé tjinkaon ch'án sich'éna ch'án ijnko ninko kuènte
Dios mé tí Dios k'uékinkáchónki ch'ín Jacob.

47 Kjánchó jehe ch'án kjuich'énahya ch'án tí ninko a. Tí ch'ín
Salomón mé kjuich'éna.

48 Kjánchó Dios nkaya nkajni chrohya tsjak'exenhen ijnko
nchia tsíkjich'énaxín chojni itja. Ntáchro ijnko ch'ín nixja itén
Dios kixin:

49 Janhan Dios nkaya nkajni itjén tétōanxián ntá chjasintajni
tjekjen tōtená.

¿Xá nkexéhe tí nchia chrókjuich'énará?

¿Xá nketí chrókjuak'é chrók'ok'ánaxián?

50 ¿Xá jehya tjaná kjuít'ánaxián kaín tí nkehe ní?†

Mé xikaha ichro Dios.

51 'A ntá jahará la icha asánrá xráxín títekákonhyará. Ja-
hará tinhínrá kjánchó ich'erá éxí chojni chónhya Dios. Xráxín
tjánjonkoará Nchakuen Dios. Jahará mé tóyóhara tí sín
tsík'axrjeníxinrá ósé.

52 Tí sín tsík'axrjeníxinrá kjuínchekjasóte kaín tí sín tsíchronka
itén Dios. K'óyán sín tí sín k'uéchronka kixin itsi tí nkexro
chóntahya jje. A ntá ó kui tí nkexro a ntá jahará kjuínchekjirá
ch'án ntá k'óyán sín ch'án.

53 Jahará k'uayéhérá tí nkehe k'uētoan Dios senó, mé
tí nkehe chrónka tí ángel, la kjónté xikaha kuítekákonhyará
—ichro ch'ín Esteban.

Ik'uén ch'ín Esteban

* 7:43 7.42-43 Amós 5.25-27 † 7:50 7.49-50 Isaías 66.1-2

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kíxin nínkakonhen sín ch'án.

⁵⁵ A ntá ch'ín Esteban antsí chóna ch'án Nchakuen Dios la konta ch'án nkajní k'uíkon ch'án kjuachaxiéni Dios la ko k'uíkon ch'án kíxin ch'ín Jesús tjexín toté ch'án nánko tja chjina Dios.

⁵⁶ Ntá ntáchro ch'ín Esteban kíxin:

—Tsjeherá kíxin k'uíkuən kíxin xitjehe nkajní la ntaha itjen tí Xjeen Dios K'óna Chojní nánko tja chjina Dios.

⁵⁷ A ntá jehe sín la k'uikjehe sín ntatsjon sín la itsen k'uíxité sín ntá sákjuí sín k'uíxítja sín ch'án

⁵⁸ sákjuíko sín ch'án ikon chjasin ntá ixro chjéhe sín ch'án. La tí sín tjanchia jie mé kuakitsje sín iké sín la k'uejo sín toté ijnko ch'ín ntasoá it'in Saulo kíxin ts'ayakonhen ch'án tí ka a.

⁵⁹ La it'e sín xro ntá ch'ín Esteban mé chrónóehe ch'án Ìnchéni la ntáchro ch'án kíxin:

—Ìnchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kíxin:

—Ìnchéni jaha mé tahya kuentá tí jie kjuasin sín.

Mé xikaha ichro ch'án ntá ik'uén ch'án.

8

Ch'ín Saulo chrók'óyán ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xíkayehe sín sákjuí sín nkuíxín estado Judea la ko estado Samaria. A ntá jehó tí sín tsíkjejá Jesús mé kuítóhe sín ntiha.

² Na iso sín imá tinkáchónki Dios mé kjuavá sín ch'ín Esteban la ko tsjánkama sín ch'án la ko t'avéhe sín ch'án.

³ A ntá tí ch'ín Saulo la kjuankíxin kónínkakonhen ch'án tí sín tinkáchónki Cristo. K'uíxenhén ch'án jnkojnko jnkojnko ntøe sín la itsé ch'án tí sín ntoa la ko tí chojni chjin. La ntá kuinkánkákjen ch'án sín sákjuíko ch'án sín kíxin ts'ejóchjina sín.

Kjuako sín itan jína tí estado Samaria

⁴ A ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuíxín tí sákjuí sín.

⁵ La ijnko ch'ín it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuente Cristo.

⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kíxin ó k'uíkon sín tí kjuaxroan kjuakoxin ch'án.

⁷ Itsjé chojni chóntha nchakuen tí jínahya mé kuítóhe sín jína la tí nchakuen tí jínahya k'óyako k'uaxrjexín tí jehe sín. La nchónhya tí sín chóntha chin xitjahya itji la ko tí sín sixénká toté mé kuítóhe sín jína.

⁸ A ntá imá kóchéhe kaín tí sín siín chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinchexroan ch'án. K'uékjich'iyehé ch'án tí sín estado Samaria ntáchro ch'án kíxin ijnko chojni imá tjetoan tí jehe ch'án.

¹⁰ La kaín tí sín ntiha k'uejó sín kuínhin sín jína, mé tí chánjan ntsínsi hasta tí chojni imá táda la k'uéntáchro sín kíxin:

—Tí ch'ín i imá chóntha ch'án tí kjuachaxin kuente Dios —ichro sín.

¹¹ K'uékitekakonhen sín ch'án kíxin k'uékjinchexroan ch'án k'uékjich'iyexín ch'án sín itsjé nánó.

¹² Ntá tió kuítekaon sín tí tan jína kjuako ch'ín Felipe kuente tí kjuachaxin kuente Dios la ko Jesucristo la ntá chojni ntoa la ko chojni chjin mé kuíkite sín.

¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankíxin k'uájiko ch'án tí ch'ín Felipe la imá chrakon ch'án kíxin k'uíkon ch'án tí kjuaxroan jíé kjuasin tí ch'ín Felipe.

¹⁴ A ntá tí sín apóstol, mé tí sín tsíkítóhe chjasin Jerusalén, kuínhin sín kíxin itsjé tí sín estado Samaria ó kuítekaon sín itén Dios. Ntá k'uetuēnhen sín ch'ín Pedro la ko ch'ín Juan sátsji sín ntiha.

¹⁵ Ntá tió kjuíji sín ntá kjuanchehe sín Dios kíxin tí sín ntiha tinkáchónki Cristo chrók'uáyéhe sín Nchakuen Dios

¹⁶ kíxin nijnko tí jehe sín ntiha naxa tsík'áyèhya sín Nchakuen Dios. Jehó tsíkikitexín sín ihnié Ìnchéni Jesús.

¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uíkon ch'án kíxin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon

¹⁹ la ntáchro ch'án kíxin:

—Chjehéni jeheni tí kjuachaxin kíxin kjaxin jeheni chrókjuak'etja itjani chrítaón ikja jnkójín chojni ntá chrók'uáyéhe sín Nchakuen Dios —ichro ch'án.

²⁰ Ntá ntáchro ch'ín Pedro kíxin:

—Jaha la ko tí chichakoán ts'itjáyankoa kíxin tjenkayáxian kíxin chrók'uèna tí kjuachaxin kuente Dios.

²¹ Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán.

²² Méxra tsitohé tí ijiá la chrónohé Dios kixin ách'e tsjakjìnhan ch'án tí jie tjenkayáxian.

²³ Ó t'íkuañ kixin imá chjìnoxìnhin asán la ko nchónhya jie chonta —ichro ch'ín Pedro.

²⁴ La ntá ch'ín Simón kjuátehe ch'án ntáchro ch'án kixin:

—Nixjehérá Ìnchéni kixin tí janhan kixin chrókónnahya tí janhan éxí tí ntáchrórá —ichro ch'án.

²⁵ Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya tí chjasin ntsíntsí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkjiixìn naciòn Etiopía

²⁶ A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sátjia nó sur tsoxeta tí ntia t'inkajìnxìn chjasin Jerusalén hasta chjasin Gaza —ichro tí ch'ín ángel.

Na ntá tí ntia a mé ijnko ntia t'atsínka nó nteje.

²⁷ Na ntá tí ch'ín Felipe k'uínkatjen sákjuí tí ntia. La ntiha xrínahya xeta ch'án ijnko chojni tsíkjiixìn nó naciòn Etiopía. Jehe ch'án mé ijnko chojni eunuco mé tja ch'án síin chìchakøen tí tjan reina Candace t'etueñhen tí naciòn Etiopía. Jehe ch'án sátsíkji ch'án chjasin Jerusalén xraxinkakonxìn ch'án Dios.

²⁸ A ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios.

²⁹ La ntá tí Nchakuen Dios mé k'uètuèñhen tí ch'ín Felipe ntáchro kixin:

—Sátjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin ti ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuiánxian kixin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjaxìn chjinaxón ti tjen ch'án.

³² Na tí xroon itén Dios tjenchekuáxin ch'án mé tíhi: Jehe ch'án mé sákjuiko sín éxí ijnko kolélo kjuiko sín ts'óyán sín. La éxí ijnko kolélo tsjánkahya tió kjínhin sín kaxree va mé xíkaha jehe ch'án ninkehó xítjeehya ir'va ch'án.

33 K'uikón sín ch'án éxí ijnko chojni chóna jię la ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín chrók'uaxrjeníxin ch'án

kíxin jehe ch'án la k'uénxín ch'án chjasintajni.*

Mé xikaha chrónka tí xroon itén Dios.

34 A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kíxin:

—Tsotsenkávan chrónka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xikaha kjuanchankí ch'án.

35 La ntá tí ch'ín Felipe kjuankíxin chrónka ch'án kuènte tí nkehe tjenchekuáxin tí ch'ín a la chrónka ch'án tí tan jína kuènte Jesús.

36 A ntá xrínahya kjuíji sín tí tjiá ntá, ntá ntáchro tí ch'ín eunuco kíxin:

—Tsjuhé tjiá ntá. ¿Á xitjahya chrókuíkítina? —ichro ch'án.

37 Na ntá ntáchro tí ch'ín Felipe kíxin:

—Ti kuítekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kíxin:

—Títekávan kíxin tí Jesucristo la Xjeen Dios —ichro ch'án.

38 La ntá tí ch'ín tsíkjixín Etiopía a k'uetóan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjixín Etiopía mé k'uínkajin sín ntá kjuíánkí sín ntá la tí ch'ín Felipe kuíkíte ch'án tí ch'ín a.

39 La ntá kjuixín k'uaxrjenkí sín ntá la ntá tí Nchakuen Ìnchéni sátsíkjiko tí ch'ín Felipe ókjé. A ntá k'uíkonhya kichó sín ínaá. Ntá kjónté xikaha la tí ch'ín eunuco sákjuí ch'án la antsí chéhe asén ch'án.

40 A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Ìnchéni kíxin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo
(Hch. 22.6-16; 26.12-18)

1 A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Ìnchéni Jesús. Méxra sákjuítsjehe ch'án tí ch'ín nchat'á t'etóan.

2 Ntá kjuanchia ch'án ijnko xroon kíxin ts'áyéhe ch'án kjuachaxin kíxin sátsji ch'án tí nínko chjasin Damasco tsjeyá ch'án tí sín kuákja ntía nixin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén.

* 8:33 8.32-33 Isaías 53.7-8

³ La ntá kjuíji ch'án chjinaxón chjasin Damasco, a ntá xrinahya titàya ikui ijnko xrohi t'inkaséyan kuixin nkaya nkajni k'uantatjen ch'án a.

⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kixin:

—Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuátēhe, ntáchro kixin:

—Janhan mé Jesús, mé tí nkexro xritjéyá jaha.

⁶ T'aya sátjia. T'ixenhén tí chjasin Damasco, ntá ntiha mé tsinhín nkehe sich'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró.

⁸ La ntá tuénxín k'uàya ch'ín Saulo ntá kuakitjenki ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuíko sín ch'án chjasin Damasco.

⁹ A ntá ntiha kjuák'e ch'án la iní yaon k'uíkonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uíkuèn ch'án Ìnchéni ntáchro kixin:

—Ananías.

A ntá ch'ín Ananías mé kjuátēhe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sátjia tí ntja it'in Ntja Ntoí. Ntá tíó tsjasán ntōe ch'ín Judas tjanchankíhí sín á ntahya itjen ijnko ch'ín tsíkjixin chjasin Tarso me it'in ch'án Saulo. Jehe ch'án mé tjechrónóana ch'án.

¹² A ntá titàya k'uíkuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kixin xik'ikon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhí, tsjihyani kixin ó kuínhinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jina kjuích'ehe ch'án tí sín kuítekaon tí jaha chjasin Jerusalén.

¹⁴ A ntá jie la ó kjuí ch'án ntihi kixin tsík'áyéhe ch'án kjuachaxin kuènte nchat'á t'etōan kixin tsotsé ch'án kain tí sín tinkáchónki ihniá.

¹⁵ Kjánchó Ìnchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakōhe ch'án tí sín ókjé nación la ko tí sín rey la ko kjaxin tí sín israelita.

¹⁶ Janhan tsjákoḥa ch'án kixin nchónhya tsjasóte ch'án kixin tsinkáchónkina ch'án.

17 **A** ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uíkuan tí ntia k'uinkaxian, mé k'uetuanna kjuíha kixin sintak'ikuan inaá la ko ts'ayéhé Nchakuen ch'án —ichro tí ch'ín Ananías a.

18 Ntá tuénxín k'uanotjénxín ikon ch'ín Saulo ijnko nkehe éxí kjoé koche xíkaha. Ntá xík'ikon ch'án inaá. La ntá k'uínkatjen ch'án la ko kuíkite ch'án.

19 La ntá chr'éxín ntá kjóne ch'án la ntá ikjan asén ch'án inaá. Ntá kuítóhe ch'án iso yaon k'uéjoko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

20 Na ntá kjuankixin ch'ín Saulo kjuakoxín ch'án iso njnko Israel kixin Jesús mé Xjeen Dios.

21 La kaín tí sín tjejótinhin imá chrakon sín la ntáchro sín kixin:

—¿Á jehya tí ch'ín i tjinkaon sinchek'itjáyán ch'án kaín tí chojni tinkáchónki Jesús chjasin Jerusalén? ¿Á jehya tí xra a kjuixín ch'án ntihi kixin tsotsé ch'án sín la sátsjiko ch'án sín tí tjejó tí sín nchat'á t'etjan? —ichro sín.

22 Kjánchó antsí má fuerte kjuako ch'ín Saulo kixin chaxín tí ch'ín Jesús mé tí Cristo. La tí sín judío k'uéjó chjasin Damasco kjuachahya kjuachaxín sín ch'án.

Kjuachahya tí sín judio chrótsé sín tí ch'ín Saulo

23 Na ntá ó k'uátsínka nchónhya yaon ntá tí sín judío kjuenkayáxin sín nkexri chrók'óyán sín tí ch'ín Saulo.

24 **A** ntá ó kuínhin ch'án nkehe kjuenkayáxin sín. **A** ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrjexín ch'án chjasin.

25 **A** ntá tí sín tinkáchónki Ìnchéni mé kjuak'enkaya sín tí ch'ín Saulo ijnko ntaxra jié ijnko tie. Ntá kjuinkajinxín sín tí ntaxra tjenkáya tí ch'ín Saulo nóton tí tjat'o tsík'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

26 Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kixin kuítékakonhya sín kixin á chrókóchaxín kjaxín ch'án tinkáchónki ch'án Ìnchéni.

27 **A** ntá ch'ín Bernabé mé sákjuíko ch'án tí ch'ín Saulo tí tjejó tí sín apóstol la ntá chrónka ch'án kixin ch'ín Saulo mé tsík'ikon ch'án Ìnchéni tí ntia sákjuí ch'án ntá Ìnchéni mé

nixjehe ch'án. Méxra chjasin Damasco k'uékjako ch'án ihnié Ìnchéni la chrakonhya ch'án.

28 Méxra ch'ín Saulo kuitohe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxién ihnié Ìnchéni Jesús.

29 La ikjo ch'án tí sín judío nixja nkiva griego. A ntá jehe sín la tjinkaon sín chrók'óyán sín tí jehe ch'án.

30 A ntá tí sín kíchó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uetuēnhen sín ch'án sátsji ch'án chjasin Tarso.

31 Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjó sín la antsí má tinkáchónki sín Ìnchéni. K'uéchóna sín kjuasáyé Ìnchéni la ko tí Nchakuen Dios kjuínkĩtsa sín la ntá antsí má sítinkákótsjé sín.

Ch'ín Eneas kuitohe ch'án jína

32 Na ntá tí ch'ín Pedro xritsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kíchó ni tjejó chjasin Lida.

33 Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án.

34 Na ntá ntáchro ch'ín Pedro kixin:

—Eneas, Jesucristo mé sintakitoha jína ijie. T'inkatjen tjatsìyan camá —ichro ch'án.

Na ntá ch'ín Eneas tuénxín k'uínkatjen ch'án.

35 La kaín tí sín siín chjasin Lida la ko chjasin Sarón k'uíkon sín kixin kuitohe ch'án jína la ntá kjaxin sín kuinkáchónki sín Ìnchéni.

Ó xechón tjan Dorcas

36 A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkiva griego la mé t'axrjexín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkĩtsa tjan tí chojni nòa.

37 Ntá ijnko yaon imá kóníhi tjan ntá ik'uén tjan. La ntá kjuínchek'ónti sín cuérpóé tjan la ntá tí yóxin piso noi kjuák'e sín tjan.

38 Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tsonátche sín ch'án kixin tjoka itsji ch'án í sinchexrjenhya ch'án, tsixro sín.

39 Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjen tí cuérpóé tí tjan tsík'en. La

ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan.

⁴⁰ A ntá k'uetōan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehe ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'aya.

Ntá kuakitjenki tjan ikon tjan ntá k'uixon tjan kixin ntaha itjen ch'ín Pedro ntá k'uàya tjan, kjuák'etjajin tjan.

⁴¹ A ntá itsé ch'án itja tjan la k'uínkatjen tjan. La ntá k'uíyehē ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan.

⁴² Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni.

⁴³ A ntá ch'ín Pedro kuítóhe ch'án itsjé yaon tí chjasin a la kjuák'e ch'án ntōe ch'ín Simón, ijnko ch'ín nchentá tjoé iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetuēnhen tí sín soldado italiano.

² Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjinkitsa tí sín judío la ko xráxin nixjehe ch'án Dios.

³ La ntá ijnko yaon las tres kónjin titàya k'uíquēn ch'án ijnko ángel kuēnte Dios k'uixenhen tí tjen ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhin kixin tí nixjehé ch'án la ko tí jína ch'e tjínkitsa tí sín nòa.

⁵ Ntá jaha tētūēnhén jnkojín chojni sátsji chjasin Jope kixin tsjikakjín sín ch'ín Simón kjaxin it'in ch'án Pedro.

⁶ Itjen ch'án ntōe ijnko ch'ín kjaxin it'in Simón. Tí ch'ín a mé nchentá tjoé iko. Mé tjen ntōe ch'án chjinaxón tí ntayaon a.

⁷ Ntá tió sákjui tí ángel nixjehe ch'ín Cornelio la ntá jehe ch'an k'uíyehē ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chónthehe sín kjuasáya kíchó sín.

⁸ Ntá kjuixin chénka ch'án kaín sín tí nkehe k'uíkon ch'án ntá k'uetuēnhen ch'án sín sátsji sín chjasin Jope.

9 Íjnko yaon chr'éxin chjina chonkíxin tjejóyá sín ntia chjino chjasin Jope ntá ch'ín Pedro mé k'uít'ótjen ch'án chrítaón nchia kíxin ntaha nixjeexín ch'án Dios.

10 Ntá imá k'uén ch'án kjinta la tjinkaon ch'án chrókjóné ch'án. Nachrohe tsochján tí nkehe sine ch'án la ntá titàya k'uíkuèn ch'án nkehe

11 mé k'uíkon ch'án kíxin xitjehe nkaya nkajní ntá ntiha k'uínkajinxín ijnko ka jié. Kanoé punté tí ka tjejóte.

12 Tí nkaxenhen tí ka a tjinká ko noó toté la ko konche la ko kaín ko xritjaká.

13 Ntá kuínhin ch'án nixja ijnko nkexro ntáchro ch'án kíxin:

—Pedro, t'àya, t'oyán tí ko a ntá inte.

14 Ntá ch'ín Pedro kjuátehe ch'án kíxin:

—Náhí, Ìnchéni. Nunca nehyani tí nkehe tjuáhya.

15 Ntá kjuátehe tí tan inaá ntáchro kíxin:

—Tí nkehe ó kjuínchetjóá Dios. La ntáchrohya kíxin tjuáhya —ichro ch'án.

16 Xíkaha kónhen iní veces ntá tuénxín sákjuí tí ka nkaya nkajní.

17 Ntá ch'ín Pedro naxa tjenkayáxin ch'án nkehe t'axrjexín tí k'uíkon ch'án la xríñahya ó kui tí sín ichr'án ch'ín Cornelio ntója nchia. Ó tsíkjanckhankí sín nketí tjen ntøe ch'ín Simón.

18 Ntá kjuanchankí sín itsen kíxin:

—¿Á ntihi tjen ch'ín Simón kjaxin it'in ch'án Pedro?

19 Naxa tjenkayáxin tí ch'ín Pedro tí nkehe k'uíkon ch'án ntá Nchakuen Dios chrónka kíxin:

—Tsjehe ó kui iní sín xritjeyá tí jaha.

20 T'àya t'inkajián sáttjikoá tí sín a. Tóxakuanhya jaha, janhan mé kuétuanhan sín ikui sín —ichro Nchakuen Dios.

21 Ntá k'uínkajin tí ch'ín Pedro tí tjejó tí sín a ntá ntáchro ch'án kíxin:

—Janhan tí nkexro xritjeyará. ¿Nkehe tí tsonhen tjinkáonrá?

22 Ntá kjuátehe sín ntáchro sín kíxin:

—K'uetōan tí ch'ín capitán Cornelio ikuini ntihi. Jehe ch'án me ijnko chojni imá jina la ko xraxinkaon ch'án Dios. Kaín tí sín judío tjikosáyehe ch'án la ko tjuèhe sín ch'án. Ijnko ángel kuénte Dios mé nixjehe ch'án chénka ch'án kíxin chrók'uíyehé ch'án tí jaha kíxin chrókjuia ntøe ch'án la ntá chrókuinhin ch'án tí nkehe tsontáchrúa —mé xíkaha chrónka sín.

23 Na ntá tí ch'ín Pedro kjuanjōn kjuachaxin kíxin ntahó chrók'ok'éhe sín ti tie a. Ntá kóyaon ntá sákjuíko ch'án sín. Kjaxin iso sín tinkáchónki Ìnchéni tjejó chjasin Jope mé sákjuíkotoxín sín.

24 Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la

ko tí sín chóxin ch'án. K'uíyēhe ch'án tí jehe sín kixin tsinhin sín.

²⁵ Ntá tió kjuíji tí ch'ín Pedro ntōe tí ch'ín Cornelio ntá k'uaxrjexín ch'án nchia nixjēhe kichó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án.

²⁶ A ntá tí ch'ín Pedro kjuínchek'inkatjen ch'án tí ch'ín a la ntáchro ch'án kixin:

—T'inkatjen. Tjak'exián totá. Janhan mé ijnko chojni éxí tí jaha.

²⁷ A ntá kjuixin ikjo sín la ntá k'uíxenhén sín ntōe ch'án la ntá k'uíkon tí ch'ín Pedro kixin nchónhya chojni tsikójnksé ntiha.

²⁸ Ntá ntáchro ch'án kixin:

—Jahará nohará kixin tí jeheni judíoni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntōe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni.

²⁹ Méxra tió k'uíyanará la tjoka k'uinka. Tjínkavan chrókónna kixin nkekuènte k'uíyanará.

³⁰ Ntá kjuátehe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntōeni kjónehyani la nixjēhēni Dios. Ntá xrínahya k'uíkonni ijnko chojni chóna iké tjákini.

³¹ La ntáchro ch'án kixin: “Cornelio, ó kuínhin Dios tí nkehe nixjēhé ch'án la ó nohe ch'án kixin imá tjinkjtsa jaha tí chojni nða.

³² Méxra tétuēnhén chojni sátsji chjasin Jope kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntōe ijnko ch'ín mé kjaxin it'in Simón nchentá ch'án tjoé iko. Chjino tí ntayaon a itjen ntōe ch'án,” ichro tí ángel.

³³ Méxra xikaha tjoka ichr'ánni sín tsíkjejá sín tí jaha. Jína k'uinka ntōeni. Ntá ijie ó nohe Dios kixin kaín ni tjinkaonni tsinhinni nkehe tí k'uētuanhan Ìnchéni tsochronka tsinhinni.

Ch'ín Pedro kjuakōhe ch'ín Cornelio ntōe ch'án

³⁴ Ntá ntáchro ch'ín Pedro kixin:

—Ijie ó t'íkuan kixin jnkokón t'íkon Dios kaín xín chojni.

³⁵ Tí nkexro kaín nació n titekaon la chónthehe kjuasáyé Dios la mé tóxrjnhin ch'án.

³⁶ Dios mé nixjēhe ch'án tí sín k'uaxrjeníxin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehe ch'án mé Ìnché ch'án kaín nkehe.

³⁷ Jahará ó nohará jína kaín tí nkehe tsikónhen nkuíxín tí tjejó tí sín judío mé kjuankíxin estado Galilea tió kjuixin kjuako ch'ín Juan kixin t'ichjánxin tsikite chojni.

³⁸ Jahará ó nohará kixin Dios kjuanjon kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkjin chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jina kjuich'e ch'án kixin kjuínchekitohe ch'án jina kaín chojni tjasótexín kaín tí kjuachaxién tí jínahya. Mé xikaha jina kjuich'e ch'án kixin Dios tjeko tí jehe ch'án.

³⁹ A ntá jeheni mé chaxín k'uíkoni kaín tí nkehe kjuich'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkani sín ch'án ijnko ntacruz la k'óyán sín ch'án.

⁴⁰ A ntá Dios kjuínchexechón ch'án tí nixin yaon la kjuanjon ch'án kjuachaxin kixin k'uíkoni ch'án inaá.

⁴¹ Jehya kixin kaín chojni chrók'uikon sín ch'án. Náhi. Jehó tí sín tsíkjeýá Dios kixin ts'ikon chaxín xechón ch'án. Jeheni kjonekoni ch'án la ko k'uíkoni ch'án tió xíxechón ch'án inaá.

⁴² K'uetōan ch'án kixin jeheni tsjakōheni chojni la tsochrónkani kixin jehe ch'án mé tí nkexro juez sinchekitoexín ijié tí sín tjejóchón la ko tí sín ó tsík'en.

⁴³ Kaín tí sín k'uéchrónka itén Dios mé chrónka sín kixin jnkojnko tí sín tinkáchónki Jesús mé ts'ókika ch'án ijié sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios.

⁴⁵ Ntá tí sín judío kjuikotoxin ch'ín Pedro la chrakon sín kixin Dios mé kjuanjon Nchakuen ch'án, kjaxin k'uáyéhe tí sín jehya judío.

⁴⁶ Méxra kuínhin sín nixja sín jnkojnko nkiva ókjé la ko kuínhin sín tjanchehe sín Dios kjuasáya.

⁴⁷ Ntá ntáchro ch'ín Pedro kixin:
—Jehe sín ó k'uáyéhe sín tí Nchakuen Dios xikaha jeheni. Ntá chrókjuanjonni kjuachaxin kixin tsikite sín —ichro ch'án.

⁴⁸ La ntá k'uetōan ch'ín Pedro kixin tsikite kaín sín kjuachaxién ihnié Jesucristo. Ntá tí sín kuíkite mé kjuanchia sín kixin chrókuitohe tí ch'ín Pedro ntiha iso yaon.

11

Nixjehe ch'ín Pedro tí sín tinkáchónki Cristo chjasin Jerusalén

¹ Na ntá tí sín tsíkjeýá Ìnchéni la ko kaín tí sín tinkáchónki Ìnchéni k'uéjó estado Judea mé kuínhin sín kixin tí sín jehya judío ó tinkáchónki sín itén Dios.

² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án.

³ Kjuanchankíhi sín ch'án ntáchro sín kixin:

—¿Nkekuènté kjuítsjehé tí sín jehya judío, la ko kjóntekoa tí jehé sín? —mé xíkaha kjuanchankí sín.

4 Ntá tí ch'ín Pedro kjuankíxin ch'án chrónka ch'án desde tí xrankixíxin kaín nkehe tsíkónhen ch'án. Ntáchro ch'án kíxin:

5 —Janhan mé kjuak'é chjasin Jope kjuak'énixjahá Dios. La ntá titàya k'uíkuèn ijnko ka jié k'uínkajínxin nkaya nkajní. Kanoé punté tí ka tjejóte la kjuák'e chjino tí tjén.

6 Ntá tsjahá jína tí nkehe la k'uíkuan kíxin tí nkaxenhen tí ka tjinká ko noó toté la ko iko nteje la ko konche la ko iko xritjaká.

7 La kjaxin kuínhan itén ijnko nkexro nixjana ntáchro ch'án kíxin: “Pedro, t'àya t'oyán tí ko a ntá inte.”

8 A ntá kjuátahá kíxin: “Náhí, Ìnchéni. Nunca nehyani tí nkehe tjuáhya.”

9 A ntá kjuátēhe tí tan kuixín nkaya nkajní a ínaá chrónka kíxin: “Tí nkehe a mé ó kjuínchetjóá Dios. La ntáchrohya kíxin tjuáhya,” ichro ch'án.

10 Xíkaha kónhen iní veces. Ntá sákjuj kaín tí nkehe a nkaya nkajní ínaá.

11 Ntá xrínahya tuénxín kjuíji iní chojni ntoá tí nchia tjejóni. Tsíkixín sín chjasin Cesarea xritjeyá sín tí janhan.

12 Tí Nchakuen Dios mé k'uetōan kíxin sáchrókjuikian sín la chrókóxonahya. Kjaxin sákjuikian injon tí sín kíchó ni tjejó i. Kaínni k'uíxenhenni ntōe tí ch'ín a.

13 A ntá tí ch'ín ntōe ntiha mé chrónka ch'án kíxin k'uíkon ch'án ijnko ángel tjexín toté la nixja ntáchro kíxin: “Tétuēnhén chojni sátsji chjasin Jope kíxin tsjikakjín sín ijnko ch'ín it'in Simón la ko kjaxin it'in ch'án Pedro.

14 Jehé ch'án mé tsonixjahá ch'án tsochrónka ch'án nkexrí tsaá jaha la ko kaín tí sín kjéhya.”

15 Ntá kjuankíxian nixjahá sín na ntá ó kui tí Nchakuen Dios k'uáyéhe sín éxí k'uáyéheni tí senó a.

16 Na ntá xraxinkaonni tí nkehe k'uénixja Ìnchéni. K'uéntáchro ch'án kíxin: “A ntá chaxín ch'ín Juan intá ó kuíkítexín ch'án chojni, a ntá ijie jahará tsikitaxínrá tí Nchakuen Dios.”

17 Éxí xíkaha jeheni tió kjuankíxin kuínkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xíkaha ijie la kjuanjon Dios tí Nchakuen ch'án k'uáyéhe tí jehé sín kjaxin. ¿Xá nkexro tí janhan kíxin chrókjuánjonkian Dios? —ichro ch'ín Pedro.

18 A ntá tí sín kíchó ni tjejó chjasin Jerusalén kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kíxin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrixin —mé xikaha ichro sín.

Tí nínko chjasin Antioquía

19 Ti kjuixin k'uen ch'in Esteban ntá kjuankixin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakohe sín tí sín judío nkexrí tjen tí tan jína. A ntá tí sín jehya judío la náhi.

20 A ntá í so sín tinkáchónki Ìnchéni tsíkjixin chjasin Chipre la ko tsíkjixin sín Cirene sákjuí sín chjasin Antioquía. Tió kjuíji sín ntiha mé kjuakohe sín tí sín jehya judío nkexrí tjen tí tan jína kuènte Ìnchéni Jesucristo.

21 Tí kjuachaxin kuènte Ìnchéni mé chónka tí jehe sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

22 Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'an sín ch'in Bernabé sákjuí ch'an ntiha.

23 Ntá tió kjuíji ch'an ntiha ntá k'uíkon ch'an kixin Dios imá kjuinkitsa tí sín ntiha kjaxin. Ntá imá kóchéhe asén ch'an. Ntá nixjehe ch'an sín kixin kaín asén sín ts'ejó sín tsinkáchónki sín Ìnchéni.

24 Ch'in Bernabé la ijnko chojni imá jína asén la antsí chónka ch'an Nchakuen Dios la jína tinkáchónki ch'an; méxra kóchjina nchónhya sín kuinkáchónki sín Ìnchéni.

25 Kjuixin tíha a ntá ch'in Bernabé sákjuí ch'an chjasin Tarso sákjuíkjeýa ch'an tí ch'in Saulo.

26 Ntá tió k'uitja ch'an ntá sákjuíko ch'an chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakohe sín itsjé chojni. Ntiha chjasin Antioquía kjuankixin sín kuíkítexín sín tí sín tinkáchónki Cristo mé ihnié cristiano.

27 A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía.

28 Ijnko ch'in it'in Agabo k'uínkatjen ch'an kjuák'exín toté ch'an tí tsíkójnkotsé tí sín tinkáchónki Jesús la kjuachaxién Nchakuen Dios chrónka ch'an kixin tsokjinta nkuíxin ntiha. Tí nkehe chrónka ch'an mé chaxín kónhen tió kjuák'e ch'in Claudio k'ueqoan ch'an.

29 A ntá tí sín tinkáchónki Ìnchéni chjasin Antioquía kjuenkayáxin sín kixin jehe sín tsjinkitsa sín tí sín kichó sín tinkáchónki Ìnchéni estado Judea. La jnkoinko sín kjuanjon sín tí nkehe chónka sín.

³⁰ Mé xikaha kjuenájín sín chichaon sákjuiko ch'ín Bernabé la ko ch'ín Saulo chjéhe sín tí sín t'ayakonhen nínko estado Judea.

12

Ik'uén ch'ín Jacobo la ko kjuák'echjina ch'ín Pedro

¹ A ntá tí yaon a tí ch'ín rey Herodes mé ntá kjuankíxin ch'án kónínkakonhen ch'án tí sín tinkáchónki Jesús.

² La k'uetoan ch'án kixin tí ch'ín Jacobo ts'énxín ijnko chica espada tjate. Jehe ch'án mé kichó ch'án tí ch'ín Juan a.

³ Ntá k'uíkon ch'ín Herodes kixin imá kóchéhe tí sín judío kixin xikaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín niotja chóntahya tí xroan nchek'ánkí niotja.

⁴ Kjuixin itsé ch'ín Herodes tí ch'ín Pedro ntá chr'áxenhén ch'án ntóechiso. Ntá ntiha mé tjejónta noó grupo soldado la mé noó soldado jnkojnko grupo. Kjuenkayáxin ch'ín Herodes kixin tsjixin ts'átsínka tí kia pascua ntá sátsjiko ch'án tí ch'ín Pedro tí siín tí sín israelita kixin ts'ikon kuenté chjasin ntiha kixin nkexrí its'en ch'án.

⁵ Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehe sín Dios kaín asén sín kixin tsjinkítsa Dios tí ch'ín Pedro.

Dios kjuínkítsa ch'ín Pedro k'uaxrjexín ch'án ntóechiso

⁶ Tí tie a mé kjuenkayáxin ch'ín Herodes kixin tsoyaon ntá tsakitsje ch'án ch'ín Pedro sátsjiko ch'án tí siín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntóechiso.

⁷ A ntá xrínghya tuénxín ikui ijnko ángel kuènte Ìnchéni, a ntá tí nkaxenhén ntóechiso imá k'uínkaséyan ijnkòyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'uetoan tí ángel ntáchro kixin:

—Tjoka t'àya.

La ntá tí chica cadena tjejóchróntetoxín itja ch'ín Pedro mé k'uánótjen.

⁸ Ntá xík'etoan tí ángel ntáchro kixin:

—T'inkaya iká la tjanka tokatá.

Ntá kuítekaon ch'ín Pedro la kjatée xík'etoan tí ángel ntáchro kixin:

—T'ítsate iká ntá chréhe sátsjini —ichro ch'án.

⁹ Ntá ch'ín Pedro chréhe ch'án iton tí ángel a ntá noehya ch'án á chaxín xikaha kónhen tí nkehe kjuích'e tí ángel o náhi. Ntáchro ch'án kixin ách'e ijnko nkehe k'uíkonxón ch'án.

¹⁰ Ntá kjuixin k'uátsínka sín tí tjejó tí soldado saoxín la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta chica ijié chjinaxón ntia. La ntá tí puerta chica la jehó xitjehe. Ntá k'uaxrje sín tjejótji sín ijnko ntia la ntá xrinahya tí ángel ó sákjuí la ntá jehó ch'ín Pedro kuítóhe ch'án.

¹¹ A ntá tí ch'ín Pedro kónohe ch'án kixin chaxín kónhen tíha. Ntá ntáchro ch'án kixin:

—Ntá ó noheni kixin chaxín Inchéni tsíchr'án tí ángel kuente ch'án kixin sinchekaáni kixin ts'óyánhyani ch'ín Herodes la ko tsoenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntøe ijnko tjan María, ìné ch'ín Juan kjaxin tikítexín sín Marcos. Ntaha tsíkójnkotsé itsjé sín tinkáchónki Inchéni tjejónixjehe sín Dios.

¹³ La ntá t'ínka ch'án tí puerta chjinaxón ntia la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha.

¹⁴ A ntá tió kjuátsoan tjan itén ch'ín Pedro ntá k'uitjáyenhen tjan kuakitjeehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'ín Pedro.

¹⁵ Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xintáchro sín kixin:

—Jehya jehe ch'án. Kjá tí xrintøe ch'án.

¹⁶ A ntá ch'ín Pedro naxa t'ínka ch'án tí ntója puerta la ntá tió kuakitjehe sín la k'uíkon sín ch'án ntá chrakon sín.

¹⁷ A ntá kjuakoxín ch'ín Pedro itja ch'án kixin tsotání sín ntá chrónka ch'án kixin Inchéni mé kuakitsjexín ch'án ntøechiso. Ntá k'uetoan ch'án ntáchro ch'án kixin:

—Chenkará ch'ín Jacobo la ko kaín kichó ni nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóygon a imá kóxakonhen tí sín soldado a kixin noehya sín nketí sátsíkji ch'ín Pedro.

¹⁹ La ntá k'uetoan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetoan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjexín ch'án estado Judea ntá sákjuí ch'án chjasin Cesarea la ntiha kjuák'e ch'án.

Ik'uén ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uàyakonhen ch'án ntøe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etoan.

Kjuanchia sín kixin chrókónínkakuenhya sín ch'ín Herodes kixin naḡa tsochr'án ch'án tí nkehe sine sín kixin chjasén ch'án sítxin tí nkehe ine sín.

²¹ Ntá ch'ín Herodes k'uíyehē ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrjón kuènte chojni t'etōan la kjuák'enkáya ch'án ijnko silla kuènte chojni t'etōan. La ntá kjuankixin ch'án nixjehē ch'án tí sín tsíkójnksé.

²² A ntá tí sín a kjuankixin k'uèya sín, ntáchro sín kixin: —Jehya chojni tjenixja. Dios tjenixja —ichro sín.

²³ A ntá tuénxín ijnko ángel kuènte Ìnchéni kjuíncheníhi ch'ín Herodes kixin kjuíncheyóhē ch'án asén ch'án Dios. La ntá kosintō kjóne nkaya tsee ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixra kuènte sín chjasin Jerusalén la ntá sáxíkji sín chjasin Antioquía la sákjuíko sín ch'ín Juan mé kjaxin tik̄itexín sín ch'án Marcos.

13

Ch'ín Saulo la ko ch'ín Bernabé sákjuíkjako sín

¹ A ntá tí njnko chjasin Antioquía la síin iso sín nixja sín itén Dios la kjuakohē sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etōan estado Galilea, la ko ch'ín Saulo.

² Ijnko yaon la tzejótójnksé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xra sich'e sín.

³ Ntá nixjehē sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkojnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uixenhen sín ijnko ntabárcō sákjuí sín ijnko nonte it'in Chipre.

⁵ Ntá kjuíji sín ijnko puerto it'in Salamina. Ntaha kjuakoxin sín itén Dios tí njnko kuènte tí sín judío. Kjaxin kjuíjiko sín ch'ín Juan kixin tsjinkitsa ch'án.

⁶ La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kixin kjaxin ch'án nixja ch'án itén Dios.

⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehē ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhin ch'án itén Dios.

⁸ A ntá tí ch'ín nchexroan, nkìva griego mé tikìtexín sín ch'án Elimas, mé nínkakonhen ch'án tí sín tjako a kixin tjinkakonhya ch'án kixin tí ch'ín t'etōan chrókuitekaon ch'án Ìnchéni.

⁹ A ntá tí ch'ín Saulo, kjaxin tikìtexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan.

¹⁰ Ntáchro ch'án kixin:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuente kixin ch'éna jínahya tí ntja ntoá kuente Ìnchéni?

¹¹ A ntá ijie la Ìnchéni sintakjasótia. Tsitōha ntakótán iso yaon la ts'ikonhya tí xrohi kuente yaon —ichro ch'ín Pablo.

Ntá tuénxín tí ch'ín Elimas la k'uixitie tjen ch'án. La ntá kjueyá ch'án ijnko nkexro tsinkátséhe tja ch'án sátsjiko ch'án kixin t'ikonhya ch'án.

¹² A ntá xikaha mé k'uíkon tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uíkon ch'án tí kjuachaxin kuente Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuíxin sín chjasin Pafos. K'uixenhen sín ntabároç sákjuí sín kjuíji sín chjasin Perge estado Panfilia. Ntá ntaha ch'ín Juan* kuítóhe tí jehe sín ntá kjan ch'án chjasin Jerusalén.

¹⁴ Ntá sákjuíxin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uixenhen sín tí nínko Israel na ntaha k'uéjótjaxin sín.

¹⁵ Ntá kjuixin kjuínchekuáxin sín tí xroon kuente ley la ko tí nkehe tsíkjin tí sín k'uéchrónka itén Dios ntá tí sín t'etōan kuente nínko mé k'uíyehē sín tí sín a ntá ntáchro sín kixin:

—Kíchóni tí chonta nkehe tsochronka kixin antsí má tsochéheni la chronka jie tsinhinni —ichro sín.

¹⁶ Ntá ch'ín Pablo k'uínkatjen ntá kjuakoxin itja ch'án kixin tsotání sín. Ntá ntáchro ch'án kixin:

—Chrókuinhínrá jahará chojni israelita la ko kjaxin chrókuinhínrá jahará tsíkjixinrá chjasin ókjé tí chaxín tjinkáonrá nchexiteyéherá Dios.

* 13:13 Hechos 12.25

17 Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxín Dios kjuanjón kjuachaxin kíxin chrókótsjé tí jehe sín tí naxa k'uéjé sín chjasin Egipto. Éxí chojni tsíkjixín ókjé k'uéjé sín a ntá chr'éxín ntá kjuachaxién Dios kjuínkítsa sín k'uaxrjexín sín tí nonte ntiha ínaá.

18 Dios kjuínkítsa sín tí cuarenta nánó k'uéjé sín tí nteje.

19 Ntá chr'éxín kjuínchek'itjáyan ch'án yato nación k'uék'ejó nonte Canaán, kíxin tí sín tsík'axrjeníxinni chrók'uáyéhe tí nonte a.

20 Ntá kaín sín k'uéjé sín ntiha ijnko cuatrocientos cincuenta nánó. K'uék'etōan tí sín juez hasta ikjui tí ch'ín Samuel ijnko ch'ín k'uéchrónka itén Dios.

21 Ntá kjuanchia tí sín israelita ijnko ch'ín rey ts'etuenhen sín. Ntá kjueyá Dios tí ch'ín Saúl la k'uētoan ch'án cuarenta nánó. Jehe ch'án it'é ch'án mé ch'ín Cis la k'uaxrjeníxin ch'án ch'ín Benjamín.

22 Ntá chr'éxín Dios kuakitsjehe ch'ín Saul tí xra kjuák'e ch'án ntá k'uáyéhe ch'ín David tí xra rey. Ntá ntácho Dios kíxin: “Ó k'uitjá ch'ín David, it'é ch'án mé Isaí. Jehe ch'án mé ijnko chojni nchechàna mé sinchexiteyàna ch'án kaín nkehe tjínkavan”.

23 Ijnko tí chojni k'uaxrjeníxin tí ch'ín David mé Jesús. Tíha la Dios tsíchr'án ch'án kíxin sinchekaá tí sín israelita. Mé xíkaha tsíntácho ch'án.

24 Naxa tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntácho ch'án kíxin chrókjan sín chrórxaxinkaon sín Dios ntá chrokuikite sín.

25 Ntá chjina its'en ch'ín Juan ntá ntácho ch'án kíxin: “Janhan na jehya tí nkexro tjenkayáxinrá. Náhi. Chr'éxín na itsi í jnko nkexro la chrókósuàna chrókjuasintāka tí correa tokaté ch'án kíxin antsí mé t'etōan tí jehe ch'án la kánhyó t'etōan tí janhan,” mé xíkaha tsíntácho ch'ín Juan.

26 'Jahará kíchó ni tsík'axrjeníxinrá ch'ín Abraham tinhínrá la ko kaín rá chojni tsíkjixín ikjín nchexiteyéhérá Dios, tinhínrá tí tán tsaáxinrá.

27 Méxra tí sín k'uék'ejó sín chjasin Jerusalén la ko tí sín t'etōan ntiha mé kónoehya sín nkexro tí ch'ín Jesús la ko kuienxínhya sín tí nkehe tsíkjin tí sín k'uéchrónka itén Dios senó tió kjuínchekuáxin sín tí xroon tí nkaxenhen nínko jnkojnko tí yaon t'ok'éhe sín. Mé xíkaha jehe sín tió kjuínchekjasóte sín tí ch'ín Jesús la kjuínchexiteyá sín éxí nixja tí xroon a.

28 Ntá k'uitjahya sín ninkehó jie kíxin chrók'uen ch'án ntá kjónté kjuanchehe sín tí ch'ín Pilato kíxin ts'etōan ch'án kíxin its'en ch'án.

29 A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajinxín sín tí cuerpo kuènte

ch'án tí ntacruz ntá kjuavá sín ch'án.

³⁰ A ntá Dios kjuínchexechón tí jehe ch'án ínaá.

³¹ A ntá nchónhya yaon k'uíkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjejónixja sín nkexrí kjuako ch'ín Jesús, tjakohe sín kaín chojni.

³² A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjeníxinni ósé.

³³ Mé xíkaha xiteyá k'uáyéheni tí jeheni tsík'axrjeníxinni tí sín a. A ntá Dios kuente tí sín a mé kjuínchexechón tí ch'ín Jesús éxí nixja tí xroon yóxin Salmo, ntáchro kíxin: “Jaha mé xjanna. Janhan mé tjahá kjuachón jie.”†

³⁴ Ntá tsíntáchro Dios kíxin sinchexechón ch'án tí ch'ín Jesús kíxin tsoxíkahya cuérpóé ch'án. Mé xíkaha chrónka tí xroon itén Dios. Ntáchro kíxin: “Janhan mé sîntaxiteyá tí nkehe chaxín tjanka ch'ín David.”‡

³⁵ La ko í jnko Salmo mé ntáchro xíkahi: “Jaha tsjánjonhya kjuachaxin kíxin tsoxíka tí cuérpóé tí nkexro tjóá kjuít'aha xra.”§

³⁶ A ntá ch'ín David kjuínchexiteyá ch'án éxí tsík'etōan Dios tí kjuák'e ch'án ntá kjónté chr'éxin ik'uén ch'án ntá xravá ch'án xíkaha k'uéxravá tí sín tsík'axrjeníxinni la ntá kjónté la xíka ntōe ch'án.

³⁷ A ntá tí cuérpóé tí nkexro kjuínchexechón Dios la kótjehya.

³⁸ Méxra kichó ni t'ichjánxin tsonohará kíxin nkexrí tsjin ijjárá kíxin Jesús mé k'uenyákonhánrá.

³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetoan ch'ín Moisés kjuachahya kótjuáxin tí jie.

⁴⁰ Chróóxakonhanrá kíxin chrókuànhyará xíkaha éxí tsíkjin tí sín ósé xíkahi:

⁴¹ Tsjehérá jahara chojni titekakonhya. Ijie la tsochrakonrá kíxin nkehe tsonhen

kíxin janhan Dios tsjákoxiān ijnko nkehe jie ijnko yaon kjánchó tsítekákonhyará kjónté ókjé nkexro chróchrónka.*

⁴² A ntá ch'ín Pablo la ko tí nkexro k'uájiko ch'án k'uaxrjéxín sín nkaxenhen tí nínko, a ntá chróna tí sín jehya sín judío tsíkókjéxín, kjuanchia sín kíxin í jnko semana tí yaon t'ok'éhe sín la ínaá tsochrónka ch'án éxí tí kjuako ch'án.

⁴³ Ntá tí kjuixin xíkaxin sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxí tí sín judío la xraxinkaon sín Dios, la mé imá kóxrjínhin sín tí nkehe kjuako ch'ín Pablo la ko ch'ín

† 13:33 Salmo 2.7 ‡ 13:34 Isaías 55.3 § 13:35 Salmo 16.10 * 13:41 Habacuc 1.5

Bernabé la ntá sákjuíchréhe sín. A ntá jehe sín mé k'uetōan sín kixin antsí jína chrókuinkáchónki sín tí Dios tjuèhe kaín chojni.

44 A ntá í jnko semana kjuèxin, tí yaon t'ok'éhe sín la kójnkotsé kaín tí sín síin tí chjasin ntiha kixin tjinkaon sín tsinhin sín itén Dios.

45 A ntá k'uikon tí sín judío a kixin nchónhya chojni tsíkójnkotsé, ntá imá kóchjinoxínhin sín, ntá kjuankixin sín k'uántaxínhin sín tí ch'ín Pablo.

46 A ntá ch'ín Pablo la ko ch'ín Bernabé la íchá antsí má chrakonhya sín nixja sín ntáchro sín kixin:

—T'ichjánxin senó jahará judíora chrókuinhínra itén Dios. Kjánchó tjinkákonhyará tsinhínra tí nkehe jína tsjanjon kjuachón jnkochrín. A ntá ijie la tsitohára tí jahara judíora la ntá jeheni la sátsjini tsjakoheni tí sín jehya judío

47 xikaha tsík'etōan Ìnchéni. Ntáchro ch'án kixin: Janhan ichr'an tí jahará éxí xrohi ts'inkaséyanxín kaín nación kixin sátsjikoará tí tan tsjanjon kjuachón tsaáxin chojni hasta tí antsí má kjín kjuèxin chjasintajni.†

Mé xikaha k'uetōan Dios.

48 A ntá kuínhin tí sín jehya sín judío tíha la kjuankixin kóchéhe sín la ntáchro sín kixin tí tan kuènte Ìnchéni la nkehe jína, ichro sín.

La ntá kjuankixin kuinkáchónki kaín tí sín tsíkitoenxín sín kixin tsochónta sín kjuachón jnkochrín.

49 Ntá xikaha xrankixin xrako tí itén Ìnchéni nkuíxín tí chjasin ntiha.

50 A ntá tí sín judío nixjehe sín iso chojni chjin jína tje-toan la ko tí chojni ntoa t'etōan tí chjasin ntiha la ntá kjuínchekónínkaon tí sín a la ntá kjuankixin sín chrók'óyán sín tí ch'ín Pablo la ko tí ch'ín Bernabé ntá sákjuíxin sín chjasin ntiha.

51 A ntá jehe sín la kótsjénka sín tokaté sín kixin tsoxénjin tí nche chóna toté sín. Tíha mé kjuakoxín sín kixin ntoáhya kjuenkayáxin tí sín a. A ntá sákjuí tí jehe sín chjasin Iconio.

52 Ntá tí sín tinkáchónki Ìnchéni la imá chéhe sín kixin antsí chóna sín Nchakuen Dios.

14

Ch'ín Pablo la ko ch'ín Bernabé tjejó chjasin Iconio

1 Ntá kjuíji ch'ín Pablo la ko ch'ín Bernabé tí chjasin Iconio. Ntá k'uixenhen sín njnkoé tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín.

† 13:47 Isaías 42.6; 49.6

² A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kíxin tsonínkakonhen sín tí sín tjako.

³ A ntá tí sín tjako la isé kuítóhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjínhin ch'án tí nkehe nixja sín kíxin nkexrí tjuèheni Dios la kjuanjon ch'án kjuachaxin tsjasin sín kjuaxroan.

⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjejá Ìnchéni.

⁵ A ntá tí sín judío la ko tí sín jehya judío mé kjuenkayáxinko sín tí sín t'etōan kíxin sinchechrakon sín tí sín tsíkjejá Ìnchéni la ko tsochjéhe sín xro.

⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuíxin ntiha.

⁷ La kjaxin ntaha kjuako sín tí tan jína kuènte Ìnchéni.

Chjéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kíxin tsíkokjéxin ch'án xitjahya itji ch'án.

⁹ Méxra ó tjetjaxinkoá ch'án ntá kuínhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kíxin tí ch'ín antsí tinkáchónki ch'án Ìnchéni kíxin tsitóhe ch'án jína.

¹⁰ Ntá jehe ch'án itsen ntáche ch'án tí ch'ín a kíxin:

—T'inkatjen, ntoá tjak'exián totá —ichro ch'án.

Ntá tuénxin k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án.

¹¹ Ntá kaín tí sín chjasin ntiha k'uíkon sín nkehe kjuích'e ch'ín Pablo, ntá kaín sín k'uíyexin sín nkívee sín Licaonia ntáchro sín kíxin:

—Dios tsík'óna chojni mé tsíkixin nkajní tjejókoni ntihi —ichro sín.

¹² La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kíxin imá nixja ch'án.

¹³ Ntá tí ch'ín nch'at'á kuènte tí dios Júpiter mé chóna ch'án njnko tí t'ixenxinni ikon chjasin ntá kjuíkao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kíxin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a.

¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankíxin sín kótséchje sín iké sín la sákjuíkjiakjan sín tí chojni siín ntiha la t'óyako sín ntáchro sín kíxin:

15 —¿Kuènté kixin tjejoch'erá xikaha? Jeheni chojni éxi tí jahará. Tí xra ó kuini kixin tsochrónkani itén Dios kixin tsjtohéra kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehé ch'án mé kjuích'éna ch'án nkajní la ko chjasintajni la ko tí ntayaon la ko kaín tí nkehe síin.

16 Ntá ósé mé kuítóhe Dios chojni kixin jehó ts'aji sín ntje sín.

17 Kjóté la Dios tjakoxin ch'án kixin jehé ch'án t'etōan ch'án kixin kjuích'éna ch'án kaín nkehe. Jehé ch'án mé t'etōan kixin ts'aniá chrin ntá ts'enkani la jina ts'óneheni, la jehé ch'án tjanjon ch'án nkehe kixin jnkochrín ts'ixin nkehe sineni, la ko jehé ch'án mé nchechéhēni ch'án —mé xikaha ichro ch'ín Pablo.

18 Kjóté xikaha ichro tí sín tjako la naxa tjinkaon tí chojni chrokjuikosáyehe sín chrók'óyán sín koxinta chrókjokehe sín tí sín tjako.

19 A ntá ikui iso tí sín judío kjuixin sín chjasin Antioquía la ko chjasin Iconio. Nixjehē sín tí sín ntiha kixin tsítóhe sín tí nkehe jehya jina tjako tí sín a ntá kónínkaon sín ntá kjuankíxin chjéhe sín xro tí ch'ín Pablo. La ntá ách'e ó kjuixin tsík'en ch'án ntá kuinkánkákjen sín ch'án sákjuiko sín ch'án ikon chjasin.

20 Ntá tí sín tinkáchónki Ìnchéni mé kójnkotsé sín k'uāntatjen sín tí ch'ín Pablo ntá k'uàya ch'án xíkjan ch'án tí chjasin ntiha inaá. Ntá tí yaon chr'éxin ntá sákjuiko ch'án tí ch'ín Bernabé chjasin Derbe.

21 A ntá ó kjuixin chrónka sín tí tan jina la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía.

22 Nkuíxin tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uetōan sín kixin naxa jina chrókuinkáchónki sín Ìnchéni la ntá chro sín kixin tí ts'ixenhenni tí kjuachaxin kuènte Dios t'ichjánxin tsjasóteni.

23 A ntá ntiha kjueyá sín chojni jnkojnko nínko kixin ts'etuenhen sín tí sín tinkáchónki Jesús kixin jina ts'ejó sín. Ntá nixjehē sín Dios tí naxa kjónehya sín la ntá ntáche sín Ìnchéni kixin ts'ayakonhen ch'án tí sín ó kuinkáchónki tí jehé ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

24 Ntá chr'éxin k'uátsínka sín estado Pisidia la ntá kjuíji sín estado Panfilia.

25 Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia.

26 Ntá ntiha k'uíxenxín sín ntabárcō ntá sákjuí sín chjasin Antioquía tí chjasin k'uénixjehē chojni Dios k'uékjanchia sín

kíxin Dios tsjinkĩtsa tí sín a sich'e sín tí xra. La ntá ó kjuixin xiteyá.

²⁷ Ntá tíó kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuankíxin chrónka ch'ín Pablo nkexrí kjuínkĩtsa Dios tí jehe sín la ko nkexrí kjuanjon Dios kjuachaxin tsjakohē sín tí chojni jehya judío kíxin kjaxin sín tsitekaon sín Ìnchéni.

²⁸ A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

¹ A ntá iso chojni tsíkixin sín estado Judea ntá kjuíji sín chjasin Antioquía. Ntá kjuankíxin sín kjuakohē sín tí sín kíchó ni kíxin xitjahya tsaáxin sín tí chóntahya sín tí xroye tsík'etōan ch'ín Moisés.

² Ntá tí ch'ín Pablo la ko tí ch'ín Bernabé la ko tí sín judío kjuankíxin kjuanjonkoxín sín kíchó sín. Ntá áxri ntá kónoxín kíxin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsonixjehe sín tí sín apóstol la ko tí sín t'etōan nĩnko kíxin nkexrí tsonhen tí xroye tsík'etōan ch'ín Moisés.

³ Tí sín tinkáchónki Ìnchéni chjasin Antioquía mé ichr'án sín tí sín a ntá k'uátsínka sín estado Fenicia la ko estado Samaria la tinkáchrónka sín kíxin nkexrí tí sín ókjé jehya sín judío kjuitoxinhin tí k'uékjenkayáxin sín ntá kuákja sín ntje Dios. Ntá kaín tí sín kíchó ni imá kóchéhe sín tí kuínhin sín xikaha.

⁴ La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etōan kuènte nĩnko mé kjuanjon sín kjuachaxin ts'ejó tí sín a. Ntá chrónka sín kíxin Dios imá kjuínkĩtsa tí jehe sín.

⁵ Ntá iso tí sín fariseo ó tsíkitekaon Ìnchéni mé k'uínkatjen sín ntá ntáchro sín kíxin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyéhe sín kaín tí ley —ichro sín.

⁶ Na ntá kaín tí sín apóstol la ko tí sín t'etōan nĩnko mé kójnkotsé sín kjuenkayáxin sín nkexrí tsonhen kíxin xikaha ichro tí sín judío.

⁷ Ntá imá nixjehe kíchó sín ntá k'uínkatjen ch'ín Pedro ntáchro ch'án kíxin:

—Jahará kíchó ni ó nohará nkexrí kíxin senó Dios tsíkjejá tí jeheni kíxin tsjakohēni kaín tí sín jehya judío kíxin tsinhin sín tí tán jina kuènte Cristo kíxin kjaxin jehe sín tsitekaon sín.

⁸ Dios mé ó nohe ch'án nkexéhe kaín asén chojni. Kjuakoxin ch'án kixin k'uáyéhe ch'án tí sín jehya judío kixin chjéhe ch'án sín Nchakuen ch'án éxí tí xikaha k'uáyéheni tí jeheni.

⁹ Dios la t'ikon kaín chojni jnkokón éxí tí jeheni. Ntá kjuínchetjóá ch'án asén sín kixin ó tinkáchónki sín Inchéni.

¹⁰ Méxra ¿nkekuènté titekákonhyará tí nkehe kjuích'e Dios la ntá tétuènhénrá chojni sinchexiteyá sín kaín tí nkehe ixra tsitekaon sín? Ni jeheni la ko ni tí sín tsík'axrjeníxinni kjuachahya sín kjuínchexiteyá sín tíha.

¹¹ Náhí. Ó noheni kixin kjuasáyé Inchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro.

¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan k'uíkon tí sín jehya sín judío.

¹³ Kjuixin nixja ch'ín Pablo la ko ch'ín Bernabé ntá kjuankixin nixja ch'ín Jacobo, ntáchro ch'án kixin:

—Kíchóni, tinhínrá tí nkehe tsoxrjanka.

¹⁴ Ch'ín Simón Pedro chrónka nkexrí kjuakoxin Dios kixin tjuéhe ch'án tí chojni jehya judío la nkexrí kjueyá Dios iso tí sín kixin tsinkáchónki sín tí jehe ch'án.

¹⁵ Mé xikaha chaxín chrónka tí xroon tsíkjin tí sín k'uéchrónka itén Dios kixin:

¹⁶ Janhan mé tsokjan chr'éxin.

Tió ts'inka ntá sít'ána nixin tí nchia tsík'oya kuènte David la janhan la tsjínkítsa sín ts'etoan sín.

¹⁷ Kixin kjaxin kaín xín chojni mé tsjeyá sín Inchéni la ko kjaxin kaín xín tí sín ókjé nación mé tí sín kótjuáxin nina mé tsinkáchónkina sín.

¹⁸ Inchéni mé kjuakoxin kaín tíha tí ósé la tsíkjanjon ch'án tí tan kuènte ch'án.*

Mé xikaha ichro itén Dios

¹⁹ Méxra ntáxrjan kixin tí sín jehya judío la t'ichjánxinhya sinchexiteyá sín kuenté tí ley kixin ó kuítóhe sín tí nkehe kuinkáchónki sín senó kixin jina chrókjueyá sín Dios.

²⁰ Méxra tsochr'énhenni sín ijnko xroon la jehó ts'etuènhenni sín kixin chrókjónehya sín tí nto tsíkjokehe chojni tí nkehe tsíkjanoya la ko chróchóntahya sín chojni chjin ókjé la ko chrókjónehya sín tí nto kuènte ko tsíchrínjinhya ikja va la ko chrókjónehya sín ijnié va.

²¹ A ntá jnkojnko chjasin siín nkexro chrónkaxín tí ley kuènte ch'ín Moisés nchekuáxin sín tí nkaxenhen ninko jnkojnko tí yaon t'ok'éhe sín —ichro ch'ín Jacobo.

* 15:18 15.16-18 Amós 9.11-12

22 Ntá kaín tí sín tsíkjejá Ìnchéni la ko tí sín t'etōan kuènte n̄nko la ko kaín tí í so sín tinkáchónki Ìnchéni kjueyá sín iso chojni tsochr'án sín chjasin Antioquía, mé kjueyá sín ch'ín Judas, tik̄itexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetōan ntiha.

23 Ntá ichr'án sín tí xroon sákjuíko tí sín a ntáchro kíxin:

“Jeheni chojni tsíkjejá Ìnchéni la ko chojni t'etōan kuènte n̄nko ntihi la nixjahaaráni tí jahará, kíchó ni jehya judío, tjejorá chjasin Antioquía la ko estado Siria la ko estado Cilicia.

24 Ó noheni kíxin iso chojni tsíkix̄in chjaséni kjónté k'uéchóntahya sín kjuachaxin la kjuínchexakonhanrá sín kíxin ntáchro sín kíxin t'ichjánx̄in itsará tí xroye tsík'etōan ch'ín Moisés.

25 Ntá jnkokoá kjuenkayáxinni tsjeyáni nkexro tjejó ntihi kíxin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kíxin imá tjuèheni sín.

26 Tí sín a mé ántōsen sín kjónté chrók'uénx̄in sín kíxin tí tinkáchónki sín Ìnchéni Jesucristo.

27 Méxra tsochr'ánni ch'ín Judas la ko ch'ín Silas tsjiji sín kíxin jehe sín mé tsonixjahaará sín tsochrónkaxín sín kaín tíha.

28 Jína kíxin Nchakuen Dios mé kjuínk̄itsani kjuenkayáxinni kíxin jehya chrók'uetuānhanráni ijnko nkehe imá x̄ra. Náhi. Jehó tí nkehe kánhyó x̄ra t'ichjánx̄in sinchexiteyará mé t'etōanni:

29 chrókjóntehyará tí iko tsíkjokeh̄e chojni tí nkehe tsíkjanoya la ko kjaxin chrókjóntehyará ijnié tí ko a la ko chrókjóntehyará tí nto kuènte tí ko tsíchr̄injinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyará kaín tí nkehe t'etōanni la jína ts'ejorá.” Mé x̄ikaha nixja tí xroon.

30 Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá kójnkotsé tí sín tinkáchónki Jesús ntá kjuanjon sín tí xroon a.

31 Ntá tió kjuínchekuáxin tí sín kíchó ni tí xroon a ntá imá kóchéh̄e sín kíxin x̄ikaha chrónka tí xroon a.

32 Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchekh̄e sín tí sín kíchó ni kíxin tí nkehe nixja sín.

33 Ntá ntahó k'uéjós sín iso yaon, ntá tió sátsji sín ntá kaín tí sín tinkáchónki Ìnchéni nixjeh̄e sín jína ntá ó x̄íkjan sín inaá tí tsíkjix̄in sín tí tjejó tí sín tsíchr'án sín.

34 Kjánchó ch'ín Silas kjuenkayáxin ch'án kíxin ntahó chrókuitōhe ch'án.

35 A ntá ch'ín Pablo la ko ch'ín Bernabé kuitōhe sín chjasin Antioquía. Jehé sín la ko í so chojni mé kjuako sín la ko

chrónkaxín sín itén Ìnchéni.

Ch'ín Pablo kjuankíxin tí yóxin viaje

³⁶ A ntá chr'éxin ch'ín Pablo nixjehe ch'án ch'ín Bernabé. Ntáchro ch'án kixin:

—Sátsjitsjeheni tí sín kíchó ni kaín tí chjasin kjuakoxinni itén Ìnchéni ósé. Tsjitsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tikítexín sín ch'án Marcos.

³⁸ A ntá ch'ín Pablo kóxrjienhya sátsjiko sín tí ch'ín Marcos a kixin jehe ch'án kuitohe ch'án sín estado Panflia la kjuinkitsahya ch'án kixin naxa tsonhen tí xra.†

³⁹ Méxra jnkokoáhya kjuenkayáxin sín la ntá xikayehe sín la ókjé sákjuí sín. Ch'ín Bernabé sákjuiko ch'án tí ch'ín Marcos la k'uixenhen sín ijnko ntabarco sákjuí sín nonte Chipre.

⁴⁰ A ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxin sákjuí sín. Tí sín kíchó ni ntiha kjuanchehe sín Dios kixin jina ts'ayakonhen sín ch'án la ntá sákjuí sín.

⁴¹ Ntá k'uátsínka sín estado Siria la ko estado Cilicia la kjuínchehéhe sín asén tí sín tinkáchónki Ìnchéni njnko ntiha.

16

Ch'ín Timoteo sákjuiko ch'án ch'ín Pablo la ko ch'ín Silas

¹ Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehe ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego.

² Ntá tí sín kíchó ni tjejó chjasin Listra la ko chjasin Iconio mé nixja sín kixin jina tí ch'ín Timoteo.

³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetōan ch'án chrókua tí ch'ín Timoteo a tí xroye kixin tsonínkakahya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego.

⁴ Ntá sákjuí sín la kaín tí chjasin k'uátsínka sín la nixjehe sín tí sín kíchó ni la chrónkaxín sín tí nkehe tsík'etōan tí sín apóstol la ko tí sín t'etōan kuente njnko chjasin Jerusalén.

⁵ Ntá tí chojni tinkáchónki Ìnchéni mé antsí má ntoá k'uéjé sín la ko jnkojnko yaon sítinkákótsjé sín.

Xrínahya titàya k'uikuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia.

† 15:38 Hechos 13.13

7 Ntá tió kjuíji sín estado Misia ntá kjuenkayáxin sín sáchrókjui sín nó estado Bitinia. Ntá Nchakuen Jesús kjuanjonha kjuachaxin kixin sátsji sín nó ntiha.

8 Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon.

9 Ntá ijnko tie xrínahya titàya k'uíkuèn ch'ín Pablo ijnko ch'ín estado Macedonia kjuák'exín toté ch'án chrónòda ch'án kixin: "T'átsínka Macedonia tsjínkítsani," ichro ch'án.

10 Méxra tíha tsík'íkon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxínni kíchó ni ntiha.]

Ch'ín Pablo la ko ch'ín Silas, k'uéjó sín chjasin Filipos

11 Ntá ntaha chjasin Troas k'uixenxínni ijnko ntabárcq ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxín kjuíjini chjasin Neápolis.

12 Ntá ntiha sákjuíxinni la kjuíjini chjasin Filipos. Tí chjasin a mé k'uéchónta tí sín romano ósé ntá ijnko chjasin antsí má tjetoan tí it'ò tí estado Macedonia. Ntaha mé k'uéjóni iso yaon.

13 Ntá tí yaon t'ok'éhe sín ntá k'uaxrjexínni tí chjasin Filipos ntá sákjuíni ijnko chrínta ntarío mé ntiha kuèhen sín tsojnkotsé sín tsonixjehe sín Dios. Mé ntaha k'uéjótjaxínni la kjuankíxinni kjuakoheni iso chojni chjin tsíkójnkotsé ntiha.

14 Ntá ijnko tí jehe sín mé ijnko tjan it'in tjan Lidia la tsíkjixín tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Ìnchéni mé kjuínkítsa asén tjan kixin tsinhin tjan jína tí nkehe kjuako ch'ín Pablo.

15 Ntá jehe tjan la ko kaín tí sín tjejó ntq̄e tjan mé kuíkite sín. Ntá chrónóehē tjan tí ch'ín Pablo ntáchro tjan kixin:

—Tí chaxín tjátsoan kixin chaxín tinkáchónkini Ìnchéni la jína chrókuitq̄ha ntq̄eni ntihi —ichro tjan.

Ntá kjónté kuítóheni ntiha.

16 Ntá ijnko yaon sákjuíni tí nó kuèhen sín nixjeexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí ìnché tjan kixin xíkaha tónohe tjan.

17 A ntá tí tjan tjarisoá a kjuankíxin tjan tinkáchréhe tjan tí ch'ín Pablo la ko tí jeheni ntá t'èya tjan ntáchro tjan kixin:

—Tí sín i ch'ehe sín xra Dios nkaya nkajni la tjako sín ijnko ntia jína tsaáxin chojni.

18 Mé xíkaha kjuích'e tjan itsjé yaon. Ntá kóchjinhin ch'ín Pablo la nkátjía ch'án nixjehe ch'án tí nchakuen tí jínahya chóna tí jehe tjan, ntáchro ch'án kixin:

—Kjuachaxiën ihnié Jesucristo tétuanhán kixin ts'axrjéxian tí jehe tjan —ichro ch'án.

Ntá tuénxín ó k'uaxrjéxín tí nchakuen tí jínahya tí jehe tjan.

19 Na ntá tí ìnché tí tjan a mé k'uíkon sín nkehe kónhen tjan la ó nohe sín kixin í tsjachahya sín chichaon kuènte tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuíko sín tí tjejó tí síxreé ntasin tjeoan.

20 Ntá kjuíkaán sín ntaha tí tjejó tí sín juez la ntáchro sín kixin: —Tí sín i mé sín judío la imá sítjité sín chjasénni.

21 Tjako sín tí nkehe kuènhyani tsonoheni la tóxrjienhyani sich'eni kixin jeheni mé chojni romanoni.

22 Kaín tí sín ntiha kónínkakohen sín tí jehe sín. Ntá tí sín juez mé k'uetoan ts'axrjehe sín iké sín ntá ts'ekonxín sín nta sé.

23 Ntá tió kjuixin k'uékon sín nchónhya ntá chr'áxenhén tí sín a ntøechiso ntá k'uøtuènhén sín tí ch'ín t'ayakonhen ntøechiso kixin jína chrók'uayakonhen sín tí sín a.

24 Ntá tí ch'ín t'ayakonhen ntøechiso mé k'uáyéhe ch'án kjuachaxin ntá chr'áxenhén ch'án tí sín a ijnko cuarto chríka ntøechiso kixin ts'axrjehya sín. Ntá chr'áxenhén ch'án toté sín tí nta tjejóxrja la ko chica ye.

25 A ntá tió k'áxrótjen la ch'ín Pablo la ko ch'ín Silas mé nixjehé sín Dios la ko itsje sín himno kuènte Dios. La tí sín í so tjejóchjina mé tjejótinhin sín kixin xíkaha tjejóch'e sín tjejótsje sín.

26 Ntá xrínahya tjan kuínkí nonte la kjuínchekinkí kuenté tí xrankíxixín ntøechiso ntá tuénxín kaín tí ntója puerta mé xítjehé la ko k'uánótjen tí chica cadena tsíchróntetoxín kaín tí sín tjejóchjina.

27 Ntá tí ch'ín t'ayakonhen ntøechiso mé k'uàya ch'án. Ntá k'uíkon ch'án kixin síxítjehé tí ntója puerta ntøechiso a. Ntá kuakitsje ch'án chica espada ntá chrók'óyán ch'án asén ch'án kixin kjuenkayáxin ch'án kixin ó kjuixin tsíkinká kaín tí sín síchjina, ichro ch'án.

28 Ntá ch'ín Pablo k'uèya ch'án itsen ntáchro ch'án kixin:

—Náhí kohya nkehe ch'ehé asán kixin kaín ni naxa tjejóni ntihyó —ichro ch'án.

29 Ntá tí ch'ín t'ayakonhen ntøechiso kjuanchia kixin ts'ákjen xrohi ntá k'uíxenhén ch'án kuinká ch'án la síxrànká ch'án chragon ch'án ntá kjuítsínka ch'án toté tí ch'ín Pablo la ko tí ch'ín Silas.

30 Ntá tuénxín kuakitsjéxín ch'án sín ntiha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

31 Ntá kjuátehe sín ntáchro sín kixin:

—Títekáván Ìnchéni Jesucristo la tsaá jaha la ko tí sín tjejó ntøa.

³² Ntá kjuakohē sín tí jehe ch'án a la ko kaín tí sín tjejó ntōe ch'án tí tan kuēnte Ìnchéni.

³³ Na kjónté sítié la tí hora a sákjuíko ch'án sín kjuínchek'íjma ch'án tí tsíchrit'ō sín. Ntá tuénxín jehe ch'án la ko kaín xín sín tjejó ntōe ch'án mé kuíkite sín.

³⁴ Na ntá chr'éxin tí jehe ch'án sákjuíko sín ntōe ch'án. Ntá ntiha kjuanjon ch'án nkehe sine sín. Imá chéhe ch'án la ko kaín tí sín ntōe ch'án kíxin ó kuítekaon sín Dios.

³⁵ Ntá kóyaon nchítjen ntá tí sín juez k'uetuēnhen sín tí sín policía sátsjitsjehe sín tí ch'ín t'ayakonhen ntōechiso kíxin chrókjuanjon ch'án kjuachaxin ts'axrje ch'ín Pablo la ko ch'ín Sílas.

³⁶ Ntá tí ch'ín t'ayakonhen ntōechiso mé chénka ch'án tí ch'ín Pablo tí nkehe chrónka sín ntáchro ch'án kíxin:

—Tí sín juez a mé tsík'etōan sín kíxin tsjánjuan kjuachaxin kíxin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policía kíxin:

—A ntá jeheni kjónté chojni romanoni mé kjuatēni sín nkayakon nchónhya chojni. Jehya kíxin chrókjuanchia sín nke jje chóntani. Náhí. Kjónté la chr'áxenhenni sín ntōechiso. A ntá ijje la zá imó chrókuakitsjeni sín ní? Náhí. Tsjjia ti jehe sín tsakitsjeni sín —ichro ch'án.

³⁸ Ntá tí sín policía mé sákjuíchéнка sín tí sín juez nkehe ntáchro tí sín tjejóchjina. Ntá imá chrakon sín kíxin kuínhin sín kíxin tí sín a mé chojni romano.

³⁹ A ntá sákjuí tí sín juez ntá chrónòehē sín tí ch'ín Pablo la ko ch'ín Sílas kíxin tsonínkakonhya sín kíxin xíkaha kónhen sín ntá k'uaxrjexín sín ntiha ntá chrónòa tí sín a sátxixin sín tí chjasin ntiha.

⁴⁰ Ntá ch'ín Pablo la ko ch'ín Sílas tió k'uaxrjexín sín tí ntōechiso ntá kjuíji sín ntōe tí tjan Lidia. Ntá tió kjuixin sákjuítsjehe sín tí sín kíchó ní la kjuínchechéhe sín ntá sákjuíxin sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Sílas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío.

² A ntá ch'ín Pablo sákjuí ch'an nínko éxí kuēnhen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios.

³ Kjuako ch'án kíxin tí nkexro Cristo mé t'ichjánxin its'en la ko chr'éxin tsoxechón ch'án inaá. Ntáchro ch'án kíxin:

—Tí ch'ín Jesús a mé jeheni chrónkaxínni kixin tsinhínrá jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxinkaon Dios a la ko kjaxin nchónhya chojni chjin tjetoan kuítekaon.

⁵ A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uíxité sín la kjuínchexakonhen sín tí sín siín chjasén sín. Ntá itsjé sín k'uíxenhén sín ntøe ijnko ch'ín it'in Jasón kjueyá sín ch'ín Pablo la ko ch'ín Silas kixin tjinkaon sín sáchrókjuíkohe sín tí sín a tí sín t'etøan.

⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuinkánkákjen sín sákjuíko sín tí siín tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín i mé kjuínchexakonhen chojni kuenté chjasintajni. La ntá ó kjuí sín chjasénni ntihi kjaxin.

⁷ La ntá tí ch'ín Jasón a mé kjuanjon ch'án kjuachaxin kixin tí sín a mé ts'ejó sín ntøe ch'án. Kaín sín titekakonhya sín tí ley kuènte tí ch'ín romano t'etøan. Ntáchro sín kixin itjen í jnko nkexro antsí má t'etøan, ntá tíha mé Jesús —ichro sín.

⁸ Ntá tió kuínhin kaín tí sín tsíkójnkotsé la ko tí síxreé ntá k'uíxité sín kónínkaon sín.

⁹ Ntá ch'ín Jasón la ko tí sín tjejóko ch'án kjuenkə sín ntá tí síxreé kuítóhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kichó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uíxenhén sín tí nínkoé tí sín judío.

¹¹ A ntá tí sín judío ntiha la antsí má jína asén sín, ntá tí sín chjasin Tesalónica la náhi. Antsí má kóxrjínhin sín tsinhin sín tí itén Dios la jnkojnko yaon kjuínchekuáxin sín tí xroon chóna itén Dios kixin tsonøhe sín á chaxín ntoá xikaha tí ntáchro tí sín a.

¹² Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetoan mé kuítekaon la ko kjaxin tí chojni ntoa.

¹³ A ntá tí sín judío chjasin Tesalónica kónøhe sín kixin ch'ín Pablo mé kjuakoxin itén Dios chjasin Berea ínaá. Ntá sákjuí sín ntiha a ntá kjuínchekóninkaon tí sín a.

¹⁴ A ntá tí sín kichó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxə kuítóhe sín tí chjasin Berea.

15 Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uətoan ch'ín Pablo kixin tsochrónka sín kixin tjoka chrókóxakonhen tí ch'ín Silas la ko tí ch'ín Timoteo tsjiji sín ntiha tsoxéta sín ch'án.

Ch'ín Pablo itjen chjasin Atenas

16 Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kixin k'uíkon ch'án kixin tí chjasin ntiha siín nchónhya tí nkehe tsíkjanoya.

17 Ntá tí nínko ntiha kjuakohē ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakoxín ch'án tí chojni siín ntiha.

18 La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankíxin nixjehē sín tí ch'ín Pablo. Iso sín ntáchro sín kixin:

—¿Nkekuènté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'án kuènte í jnko dios.

Mé xíkaha ichro sín kixin kjuako ch'ín Pablo tí tán jína kuènte Jesús la ko kjuako ch'án kixin Jesús kjónté k'uén ntá xechón.

19 Ntá sákjuíko sín ch'ín Pablo ijnko tjo it'in Areópago. Ntiha mé kuènnen sín tójnkotsé sín kixin tjenkayáxixín sín. Ntá nixjehē sín tí ch'ín Pablo, ntáchro sín kixin:

—Tjinkaonni tsochrónka tí nkehe nixin kjuíkoa.

20 Itsjé tí nkehe ókjé tjetjækua la tjinkaonni tsonoheni nkehe t'axrjexín kaín tíha —ichro sín.

21 Ntá kaín tí sín chjasin Atenas la ko tí sín tsíkjixín ókjé tjejó ntiha mé tóxrjénhya sín í jnko xra, jehí tóxrjínhin sín chrókuinhin sín la ko chrónixja sín ijnko nkehe nixin.

22 Ntá ch'ín Pablo k'uínkatjen ch'án kjuák'exín toté ch'án tí siín tí jehe sín chrítaón tí Tjo Areópago. Ntá ntáchro ch'án kixin:

—Jahará tjejorá chjasin Atenas tinhínrá. Janhan ó k'uíkuan kixin jahará la itsjé dios tinkachónkirá.

23 Ntá tí kjuak'é ntiha k'uájia la k'uíkuan itsjé tí nketí tjásixínrá culto ntá k'uitja ijnko altar ts'ínixín kixin: “Ntihi xraxinkakonxínni ijnko Dios naxa chónhyani”. Méxra tí Dios xráxinkáonrá kjónté naxa chonhyará mé tí Dios a mé tjákoHará.

24 Tí Dios mé kjuích'éna ch'án chjasintajni la ko kaín nkehe siín chjasintajni. Jehe ch'án mé ñché nkajní la ko chjasintajni. La tjexenhya ch'án ijnko nínko tsíkjich'énaxín chojni tja.

25 La t'ichjánxienhya ch'án kixin chojni chrókjuinkítsa tí jehe ch'án kixin jehe ch'án mé chjéhe kjuachón kaín chojni la ko tjanjon ch'án xrinto la ko kaín nkehe siín.

26 'Kaín tí naci^on k'uaxrjeníxin jnkokoá chojni kíxin chrók'uej^o sín nkuíxin chjasintajni. Kjaxin chrónka Dios nkesá la ko nketí ts'ej^o chojni.

27 Méxra jeheni t'ichjánxin tsjeyáni Dios kíxin ntá tsienxínni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án.

28 Jehe ch'án tjejóchónxinni ch'án la ko nchekinkíni ch'án la jehe ch'án t'ayakonhenni ch'án. Mé xíkaha tsintáchro jnko ch'ín chjasánrá ósé kíxin: "Jeheni mé naxa kjéhya Dios."

29 Jeheni mé naxa kjéhyaní Dios méxra xitjahya tsjenkayáxinni kíxin sich'énani Dios chica oro o chica plata o xro kíxin éxí tsíkjenkayáxin chojni kíxin sich'éna sín dios kuénte sín.

30 Senó Dios kónínkakonhya ch'án kíxin ó nohe ch'án kíxin naxa chónhya sín ch'án. Ntá ijie t'etuehen Dios kaín xín chojni síin chjasintajni tsokjan sín la tsínkáchónki sín tí jehe ch'án.

31 Dios tsíkjejá ijnko yaon sinchekitoexín ijíe chojni chjasintajni. Tsíkjejá ch'án ijnko chojni la kjuakoxin kaín kjuachaxin kíxin tí nkexro kjónté tsík'en la xechón ínaá —ichro ch'ín Pablo.

32 Na ntá tió kuínhin sín kíxin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kíxin:

—Chr'éxin tsinhinni ínaá tí nkehe ntáchrúa —ichro sín.

33 Ntá ch'ín Pablo kuítóhe ch'án tí jehe sín.

34 Na ntá iso sín kjuíchréhe sín ch'ín Pablo la kjuankíxin tinkáchónki sín Ìnchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitoexín ijíe chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankíxin sín tinkáchónki sín Ìnchéni.

18

Sákuí ch'ín Pablo chjasin Corinto

1 Ntá kjuixin tíha ntá ch'ín Pablo sákuíxin ch'án chjasin Atenas la sákuí ch'án chjasin Corinto.

2 Ntiha mé xéta ch'án ijnko ch'ín judío it'in Aquila. Jehe ch'án mé tsíkjixin ch'án estado Ponto la séhya jehe ch'án la ko ichjién ch'án Priscila mé kjuixin sín naci^on Italia kíxin t'ichjánxin ts'axrjexín sín ntiha kíxin tí ch'ín t'et^oan mé it'in Claudio k'uet^oan ch'án kíxin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín.

3 Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuítóeko kichó sín kíxin jnkokoá sich'e sín tí xra a.

⁴ Ntá jnkojnko tí yaon t'ok'éhe sín sákjuí ch'ín Pablo tí n̄nko nixjehe ch'án tí sín judío la ko tí sín jehya judío kixin tjinkaon ch'án kixin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuix̄in sín estado Macedonia ntá ch'ín Pablo kjuák'e x̄ra ó kjuako ch'án itén Dios kixin tsonohe tí sín judío kixin Jesús mé tí nkexro Cristo.

⁶ Ntá tí sín judío mé kjuankixin kóninkakonhen sín tí ch'ín Pablo la imá k'uántaxín̄h̄in sín ch'án. Ntá jehe ch'án k'ótsjēnka ch'án iké ch'án kixin kjuakox̄in ch'án kixin x̄ikaha tsjasóte sín. Ntá ntáchro ch'án kixin:

—A ntá ijie la jahará kjuéyará tí jie ts'itjáyanxínrá. A ntá janhan la í chontahya jie kixin ó kjuákohará tí tán jína, a ntá kuítékákonhyará. A ntá ijie la íchá jína sátsjia tsjákoḥa tí sín jehya judío —ichro ch'án.

⁷ Ntá k'uaxrjexín ch'án n̄nko ntá sákjuí ch'án ntōe ijnko chojni mé it'in Justo mé jehe ch'án xraxinkaon ch'án Dios. Ntōe ch'án mé chjinaxón n̄nko.

⁸ Ntá ch'ín Crispo, ijnko nkexro t'etōan kuēnte n̄nko, la ko kaín tí sín tjejó ntōe ch'án, mé kjuankixin sín kuítekaon sín Ìnchéni. Kjaxin itsjé tí sín tjejó chjasin Corinto mé kuín̄hin sín tí tan la ntá kjuankixin sín kuítekaon sín Ìnchéni la kuíkite sín.

⁹ Ntá ijnko tie titàya k'uíkuèn ch'ín Pablo Ìnchéni nixjehe ch'án ntáchro kixin:

—Chrakonhya tjákua itan kuèntana. Tjtoéhya tsochronka

¹⁰ kixin janhan tjejóko kichó ni kixin ninkexró kohya nkehe sit'aha. Kixin janhan la chonta itsjé chojni tí chjasin ntihi tinkáchónki tí janhan.

¹¹ Méxra ch'ín Pablo mé kuítóhe ch'án ijnko nánó ko t'ō ntiha chjasin Corinto, kjuakoḥe ch'án sín itén Dios.

¹² A ntá tí yaon k'uetōan ch'ín Galión estado Acaya, ntá itsjé tí sín judío kóninkakonhen sín tí ch'ín Pablo. Ntá itsé sín ch'án sákjuíko sín ch'án tí tjejó tí sín t'etōan.

¹³ A ntá ntáche sín tí ch'ín t'etōan kixin:

—A ntá tí nkexro i ixri ch'án tjachroe ch'án chojni kixin ókjé nkexrí chrókuinkáchónki sín Dios la ko tsitekakonhya sín tí nkehe t'etōan tí ley.

¹⁴ Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kixin:

—Tí chaxín ijnko jie jie kjuasin tí ch'ín i ntá kjónté chrókuin̄han tí nkehe ntáchrorá jahará judiorá.

¹⁵ A ntá jehí tjanjonxinrá tí nkehe nixjará la ko ihnié chojni la ko tí ley tinkachónkirá. Méxra jahorá chrókuin̄chekitōexínrá tíha kixin janhan tjínkakonhya ts'óna juez sintakitōaxian kuēnte tí nkehe a —ichro ch'án.

¹⁶ Ntá k'uetōan ch'án kixin sátsjixín sín ntiha.

17 Ntá tí sín griego la kónínkaon sín la itsé sín tí ch'ín Sóstenes tí ch'ín t'etōan kuènte tí n̄nko judío, la ntaḥó kjuatexín sín ch'án. Jehe ch'ín Galión a la mé kjónté k'uíkōn ch'án la ántōsén ch'án.

Ch'ín Pablo xíkjan ch'án chjasin Antioquia ntá sákjuí ch'án n̄xin viaje

18 A ntá ch'ín Pablo kuítóhe ch'án chjasin Corinto itsjé yaon ntá nixjehe ch'án tí sín kichó ni ntiha ntá k'uixenhen ch'án ntabárcō sákjuí ch'án nó estado Siria a sákjuiko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxa k'uixenhya ch'án ntabárcō inaá la ikjín ch'án mòloé kixin xíkaha kjuakoxin ch'án kixin kjuínchexiteyá ch'án tí nkehe chrónka ch'án.

19 Ntá tió kjuíji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko n̄nko la ikjo ch'án tí sín judío tsíkójnkotsé ntiha.

20 Ntá jehe sín chrónòa sín kixin chrókuitōhe ch'án isé ntiha, kjánchó jehe ch'án la chrohya ch'án.

21 Ntá tuénxín nixjehe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjahá tí jahará tí naxa tjinkaon Dios —ichro ch'án.

Ntá kuítóhe ch'án sín ntá k'uixenhen ch'án ntabárcō sákjuíxin ch'án chjasin Éfeso.

22 Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Ìnchéni ntiha. Ntá tuénxín xíkjan ch'án chjasin Antioquia.

23 Ntá kuítóhe ch'án ntiha itsjé yaon ntá xíkji ch'án inaá ntá xík'atsínka ch'án itsjé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

24 Ntá tí yaon a mé ijnko ch'ín judío it'in Apolos ikui chjasin Éfeso mé tsíkjiixin ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios.

25 Jehe ch'án ó xrakohe ch'án ntje Ìnchéni ntá imá tóxrjnhin ch'án nixja ch'án la ko tsjako jína kuènte ch'ín Jesús. Kjánchó jehó nohe ch'án nkexrí kujkíte chojni ch'ín Juan.

26 A ntá ch'ín Apolos kjuák'e ch'án kjuako ch'án tí n̄nko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naxa noehya ch'án kuènte ntje Dios.

27 Ntá tjinkaon ch'ín Apolos sátsji ch'án estado Acaya. Ntá tí sín kichó ni kjuínkítsa sín ch'án la ikjin sín ijnko xroon

chr'énhen sín tí sín tinkáchónki Ìnchéni tjejó ntiha kíxin jína ts-janjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohē ch'án tí sín tsíkinkítsa Dios tsíkitekaon sín ch'án.

²⁸ Ntá kjuakohē sín ch'án kaín chojni kíxin ntoáhya ch'e tí sín judío, la xitjahya tsontácho sín náhí. Kjuakohē ch'án sín kíxin tí xroon itén Dios chrónka kíxin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxá itjen ch'ín Apolos tí chjasin Corinto ntá ch'ín Pablo k'uatsínka ch'án nchónhya chjasin chrík'á jnā la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios.

² Ntá kjuanchankíhi ch'án sín kíxin:

—¿Á k'uayéhérá Nchakuen Dios tió kuinkachónkirá Ìnchéni? —ichro ch'án.

Ntá kjuátēhe sín kíxin:

—Náhí, kíenhyani á tjen Nchakuen Dios —ichro sín.

³ Ntá kjuanchankí ch'ín Pablo kíxin:

—¿Nkexro kjuachaxién kuíkítará? —ichro ch'án.

Ntá kjuátēhe sín kíxin:

—Éxí kjuako ch'ín Juan kuíkiteni —ichro sín.

⁴ Ntá ntácho ch'ín Pablo kíxin:

—Ch'ín Juan mé kuíkíte ch'án chojni kíxin chrókjan sín chrókuinkáchónki sín Dios la ko kjuako ch'án kíxin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhin sín xíkaha ntá kuíkíte sín kjuachaxién ihnié Ìnchéni Jesús.

⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uáyéhe sín ntá kjuankíxin sín nixja sín itsjé nkíva ókjé la ko kjuankíxin sín kjuako sín tí nkehe kjuanjon Dios.

⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án njnko la kjuako ch'án kaín asén ch'án. Nixjehē ch'án chojni la chrónka ch'án nkexrí tjen tí kjuachaxin kuènte Dios.

⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jína kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoxin ch'án kaín yaon.

10 Mé xikaha kjuák'e ch'án kjuako ch'án iyó nánó, ntá kaín tí sín k'uéjó ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío.

11 Ntá Dios antsí má kjuakoxin kjuaxroan jié kixin tí nixja ch'ín Pablo.

12 Ntá itsjé chojni kjuikao sín pañitoé sín la ko iké sín kuákoxin ch'ín Pablo ntá sákjuiko sín kjuínchekakoxin sín tí sín níhi ntá kuítóhe sín jína la ko kjaxin nchakuen tí jínahya k'uaxrjexín tí jehe sín.

13 A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iehe sín chojni mé tjinkaon sín tí kjuachaxién ihnié Jesús. La ntá ntáche sín tí nchakuen tí jínahya kixin:

—Kjuachaxién ihnié tí Jesús tjako tí ch'ín Pablo t'etoxinni kixin jaha nchakuen jínahya sátjixian ntihi —ichro sín.

14 Mé xikaha k'uékjich'e tí yato xjeen ijnko ch'ín judío it'in Esceva mé ijnko nchat'á t'etoxan.

15 Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntáchro kixin:

—Chóxinni nkexro ch'ín Jesús la ko ó noheni nkexro ch'ín Pablo. A ntá jahará, ¿la nkexro tí jahará? —ichro tí nchakuen tí jínahya.

16 Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuíncheníhi ch'án kaín sín la imá kjeté sín. Ntá k'uaxrjexín sín ntøe sín tjóchin sín la ko síchrít'o cuérpøé sín.

17 Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsikónhen la imá chrakon sín. Imá jié tí kjuachaxin ihnié Ìnchéni Jesús, ichro sín.

18 Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya.

19 Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xra ntá kjuaka sín tí libro a la k'uikon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín.

20 Ntá tí itén Ìnchéni sítinkák'ánkí la tjakoxin kixin chaxín chóna kjuachaxin.

21 Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma.

22 Ntá ichr'án ch'án iyó tí sín tjinkĩtsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuítóhe ch'án estado Asia iso yaon.

Kónínkaon k'uixité chojni chjasin Éfeso

23 Ntá itsjé chojni chjasin Éfeso kónínkaon sín la k'uixité sín kixin kórxjienhya sín tí itén Ìnchéni.

24 Kixin ntiha mé itjen ijnko ch'ín it'in ch'án Demetrio. Kjuích'éna ch'án nkehe chica plata tsjehe éxí nĩnko kuènte tí dios Diana la nchónhya chichaon kjuacha ch'án la ko tí sín kjuích'eko ch'án xra.

25 Ntá kójnkotséko sín í so sín jnkokón tí xra ch'e sín. Ntá ntáchro ch'án kixin:

—Jahará nohará kixin tí xra ch'eni la tjachani jina la náxrjón tjejóni.

26 Kjánchó ó k'uikonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsíkjanoya mé jehya Dios. Kjánchó jehya chjasin Éfeso ó. Náhi, nkuixín estado Asia kuítekaon chojni.

27 Imá tóxakonhenni kixin tí xra ch'eni ts'itjáyan la kjaxin tóxakonhenni tsontáchro sín kixin chónkó tí nĩnkoje tí dios Diana imá jié la ko ts'itjáyan tí kjuachaxin kuènte tjan. Ntá í tsitekakonhya sín tí kjuachaxin kuènte tjan nkuixín estado Asia la ko kuenté chjasintajni —ichro ch'ín Demetrio.

28 Ntá tí kuínhin sín xikaha la imá kónínkaon sín ntá k'uèya sín ntáchro sín kixin:

—Ts'itjáyanhya tí dios Diana kuènte sín Éfeso.

29 Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'ín Gayo la ko tí ch'ín Aristarco mé iyó sín tsíkixxin sín Macedonia. Ntá kuinkánkákjen sín kuikao sín tí nchia jié tójnkotséxin sín xráxín.

30 Ntá ch'ín Pablo tjinkaon ch'án chrók'uixenhen ch'án tí nchia kixin tsonixjehe ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a.

31 Kjaxin iso tí síxreé kuènte tí estado Asia mé chóxin sín ch'ín Pablo, ntá k'ueṭoan sín kixin tsochénka chojni tí ch'ín Pablo kixin chrókjuiatéhya ch'án tí siín sín ntiha.

32 A ntá iso tí sín tsíkójnkotsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xra tsíkójnkotséxin sín kixin nínkaon sín.

33 La iso sín judío chénka sín ijnko ch'ín it'in Alejandro nkeri xra kjuixin sín kixin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kixin tsotámí sín ntá tsonixjaxin ch'án tí sín judío tsinhin kaín chojni.

³⁴ Ntá tió kjuáts_oan tí sín tsíkójkotsé kixin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyanhya tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uet_oan ch'án tsotáni sín. Ntá ntáchro ch'án kixin:

—Chojni chjasén Éfeso tinhínrá. Kuenté chjasintajni nohe sín kixin tí sín chjasin ntihi mé t'ayakonhen sín tí n_inko kuènte tí dios Diana. Tí retrato kuènte tjan mé tsíkixin nkaya nkajní.

³⁶ Kohya nkexro tsontáchro kixin chaxínhya tíha. Méxra tánírá. Tjenkayáxinrá jína nkehe chrókjuich'erá.

³⁷ Jahará kjuíkoará tí sín a ntihi la kjánchó k'uántaxíenhya sín tí n_inkoeni la ko k'uántaxíenhya sín tí tjan santo kuènténi.

³⁸ Méxra ch'ín Demetrio la ko tí sín ch'eko ch'án xra la tí tjanchia sín jie jnkojín nkexro la siín juez sinchekitoexín. Méxra tsochrónka sín tí tjen tí ch'ín juez kixin jnkojnko sín la chrókuitoexín tí jie chóna sín.

³⁹ Ntá tí siín ijnko nkehe tsjanchiará ntá t'ichjánxin tsojnkotsérá la ntoá chrókuitoexín.

⁴⁰ Tóxakonhenni kixin kjá tí sín t'et_oan ts'ekani sín jie kixin jehya jína k'uíxiténi kónínkaonni. Noehyani nkehe tsjateheni kixin tí tsjanchankí sín nkekuènte k'uíxiténi, tsixro sín.

⁴¹ La ntá k'uet_oan ch'án kixin sátsji sín kixin ó kjuixin tí kójkotsé sín.

20

Sátsji ch'ín Pablo estado Macedonia la ko estado Grecia

¹ Ntá ti kjuixin k'uíxité sín, a ntá ch'ín Pablo k'uíyehé kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjehé kichó sín ntá sáxíkji ch'án nó estado Macedonia.

² Ntá nkuíxín k'uatsínka ch'án la kjuínchechéhe ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuíji ch'án estado Grecia.

³ Ntiha kuítóhe ch'án iní nitjó ntá chrók'uixenhen ch'án ijnko ntabárc_o ntá sáchrókjuí ch'án estado Siria. Ntá kónohe ch'án kixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia.

⁴ Ntá tí sín sákjuíko ch'ín Pablo mé tí ch'ín Sópater mé jehe ch'án tsíkixin ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkixin sín chjasin Tesalónica, la ko ch'ín Gayo tsíkixin ch'án chjasin Derbe, la ko kjaxin

sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkjixín sín estado Asia.

⁵ Ntá tí sín kichó ni a mé kuítónxin sín ntja ntá tjejóchónhen sín tí Jeheni chjasin Troas.

⁶ Kjuixin k'uátsínka tí kia tió kjóne sín niotja chóntahya tí xroan t'ánkixin niotja, ntá k'uixenhenni ijnko ntabarco k'uaxrjexinni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuítónxin sín ntja. A ntá ntiha kuítoheni yato yaon.

Ch'ín Pablo sákjuí chjasin Troas

⁷ Ntá tí yaon xrankixín semana ntá kójnkotséni kixin tsochrít'ó niotja tsoxraxinkakonxinni Inchéni. Ntá ch'ín Pablo nixjehe ch'án kaín tí sín tinkáchónki Inchéni la tjinkaon ch'án sátsjixin ch'án ntiha tí yaon chr'éxin, ntá antsí má sé tí nkehe chrónka ch'án la naxa tjenixja ch'án k'áxrótjen.

⁸ Tí tsíkójnkotsé sín a mé ijnko piso noi la ntiha mé síche nchónhya xrohi.

⁹ Ntá ntiha itjen ijnko ch'ín ntasoá it'in ch'án Eutico mé tjetjaxín ch'án chrítaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkíhi ch'án kotáchrin. A ntá xrínahya tsík'ajua ch'án ntá tsík'anótjexín ch'án tí ventana tí nixin piso ntiha ntá sákjuíkjatsen sín ch'án la ó tsíkjixin tsík'en ch'án.

¹⁰ Ntá ch'ín Pablo k'uínkajin ch'án ntá kjuítsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kichó ni kixin:

—Chrakonhyará tsík'enhya ch'án, tjechón ch'án —ichro ch'an.

¹¹ Ntá ch'ín Pablo k'uit'ótjen ch'án inaá tí k'uínkajinxín ch'án kixin ntiha ts'óxikayehe ch'án niotja sine sín tsoxraxinkakonxín sín Inchéni. Ntá naxa tjenixja ch'án hasta k'uínkaséyan a ntá sákjuí ch'án.

¹² Ntá tí ch'ín ntasoá tsík'anótjen sákjuiko sín la tjechón ch'án kohya nkehe xéhe ch'án ntá kaín sín imá kóchéhe sín.

Sákjuixin ch'ín Pablo chjasin Troas kjuíjini ch'án chjasin Mileto

¹³ Jeheni mé kuítónxinni ntja saoxín la k'uixenhenni ijnko ntabarco sákjuíni nó chjasin Asón kixin ntiha tsoxetani ch'ín Pablo éxi tsintáchro ch'án kixin tjinkaon ch'án sátsjixin ch'án toté ch'án ntiha.

¹⁴ Ntá ó xetani tí jehe ch'án chjasin Asón ntá k'uixenhen ch'án tí ntabarco kjaxin ch'án ntá sákjuíkoni ch'án nó chjasin Mitilene.

¹⁵ Ntá tí sákjuixinni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjuíjini chjasin Samos. Ntá inaá k'uixenhenni tí ntabarco ntá sákjuíni chjasin Trogilio ntá

ntiha k'ok'éheni. Ntá xík'ixenhenni ntabárcō inaá ntá tí yaon chr'éxín kjuújini chjasin Mileto.

¹⁶ Mé xíkaha kjuúch'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuuji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

Nixjehē ch'ín Pablo tí sín t'etuenhen nínko chjasin Éfeso

¹⁷ Tí itjen ch'ín Pablo tí chjasin Mileto k'uíyehē ch'án tí sín t'etuenhen tí nínko chjasin Éfeso.

¹⁸ Ntá tió kui sín ntá ntáchro ch'án kixin:

—Tí jahará la ó nohará nkexrí kjuak'é la ko kjuàkua desde tí yaon xrankíxixín k'uinka estado Asia.

¹⁹ Ó nohará kixin kaín tí yaon k'uéjóni la kaín asenná kjuít'ahā xrā Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyánna sín.

²⁰ Janhan la kuítóahya kjuàkua kaín tí nkehe jína t'ichjánxín tsonohará. Mé xíkaha kjuàkua tió kójnkotsérá la ko xíkaha kjuíkjàkuaxian jnkojnko ntōará.

²¹ Kjuákōhā kaín chojni judío la ko kaín chojni jehya judío kixin t'ichjánxín tsítóhe sín tí jie tjasin sín la ko tsitekaon sín Dios la ko Ìnchéni Jesucristo.

²² Ntá ijie sátsjiyá chjasin Jerusalén kixin Nchākuen Dios k'uetuāna la í nonahya nkehe tsonna ntiha.

²³ Ntá jehó nòna kixin kaín chjasin ts'atsínka la chrónka Nchākuen Dios kixin tsjak'echjinana la ko tsjasótena.

²⁴ Kaín tíha la tókakonahya. Kjónté chrókjuasótexián la ninkehó sínkíhyana la janhan la chàñā kixin tí xrā chonta la chrókjuintaxín la chrókjuintaxiteyá tí xrā chjina Ìnchéni Jesús kixin tsjàkua tí tan jína nkexrí tjuēhe Dios chojni.

²⁵ 'Ntá jie ó nòna kixin tí jahará kjuákoohará kjuachaxin kuènte Dios la nijnkorá ts'ikonhyará tí janhan inaá.

²⁶ Méxrā tinhínrá ijie kixin í jehya jiēna kixin jnkojínrá chrók'uitjāyanrá.

²⁷ Kixin ó kjuàkua kaín tí nkehe tjinkaon Dios kixin tsonohará la í t'itjāyanhya ninkehó.

²⁸ Méxrā xráxinkáonrá ts'ejorá jnkojína la ts'ayakonhénrá kaín tí sín tinkáchónki Ìnchéni kixin Nchākuen Dios mé tjáhará tí xrā pastor kixin ts'ayakonhénrá tí sín kuènte tí nínkōe ch'án k'ueñaxín ch'án tí ijnié ch'án.

²⁹ Ó nòna tió sátsjia ntá itsji í so chojni éxí kolóbo jiehe tsotjinkaon sinchek'itjāyan tí sín tinkáchónki Ìnchéni.

³⁰ La ntá kjónté jahará la isorá tjejorá ntihi tsjankíxinrá tsjàkorá kjuach'ia chrínkí chrókjuákohérá kíchuará tí nkehe chaxín. A ntá tí sín tinkáchónki tsjichréhe sín tí nkehe ntoáhya.

³¹ Méxra chróxráxinkáonrá kíxin chjina iní nánó kjuak'é kjuákohará nchakotjin la ko tie la kuítóahya kjuintaxraxinkávan hasta kjuíncheníhi asenná nixjahará jnkojnko tí jahará.

³² 'A nta jie la jahará kíchó ni tjetjáncháha Dios kíxin t'ayakuanxínrá ch'án tí itén ch'án kíxin tjuahará ch'án. Jehe ch'án imá chóna kjuachaxin tsjinkítsará ntá ts'ayéhérá kaín tí nkehe tjinkaon ch'án tsochjéhe ch'án kaín tí chojni tsikótjóá.

³³ Janhan mé kjuakéhya asenná chichakoen chojni o iké jnkójín chojni.

³⁴ Náhi. Jahará ó nohará jína kíxin janhan na mé tjaná kjuít'axián xra kjuácha k'uénaxín tí nkehe t'ichjánxínna la ko kjaxin tí nkehe t'ichjánxínhin tí chojni k'uejókian.

³⁵ Méxra kjuàkuaxínrá xíkaha sich'erá xra kíxin jína tsjínkítsará tí chojni chóntahya. Xráxinkáonrá kíxin tsíntáchro Ìnchéni Jesús kíxin: “Antsí tsochéhēni kíxin tí nkehe chrókjuanjoni, a ntá kánhyó tsochéhēni kíxin tí nkehe chrók'uáyéhēni.”

³⁶ Ntá kjuixin ntáchro ch'ín Pablo xíkaha ntá jehe ch'an la ko kaín sín k'uéjoxin toch'in sín ntá nixjēhe sín Dios.

³⁷ Ntá kaín sín tsjánka sín la ko kjóa sín ch'án la ko tséhe sín tja ch'an.

³⁸ Imá k'uává sín kíxin chrónka ch'án kíxin í ts'ikonhya sín ch'án inaá. Ntá sákjuíkotoxin sín ch'án nó tí tjen tí ntabárco sátsjiko ch'án.

21

Sákjuí tí ch'ín Pablo nó chjasin Jerusalén

¹ A ntá tió kuítóhēni tí sín kíchó ni ntá k'uíxenhēni ntabárco la ntá tuénxín sákjuíni estado Cos. Ntá tí yaon chr'éxín sákjuíni chjasin Rodas, ntá ntiha sákjuíni chjasin Pátara.

² Tí chjasin Pátara la mé ntiha k'uitjani ijnko ntabárco sátsji nó estado Fenicia. Ntá k'uíxenhēni tí ntabárco a ntá sákjuíni.

³ Ntá tió k'uátsínkani la k'uíkōni tí nonte Chipre itjani ikjon kuítóhe ntá k'uatsínkani estado Siria. Ntá tí ntabárco la ts'atsínka tsítóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a.

⁴ Ntá ntiha k'uitjani tí sín tinkáchónki Ìnchéni a ntá ntiha kuítóhekoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'ín Pablo kíxin sáchrókjuihya ch'án chjasin Jerusalén.

⁵ Ntá kjuixin k'uaátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíkotoxínni tí k'uaxrjentani ikon chjasin ntá sákjuíni chrínta ntayaon. K'uéjóxinni toch'inni nixjeheni Dios

⁶ ntá tuénxín nixjeheni sín jnkojína ntá tséhe tja kíchó ni. Ntá k'uíxenhenni tí ntabárcɔ, a ntá jehe sín ikjan sín ntɔe sín.

⁷ Ntahó chjasin Tiro kjuixixín tí k'uíxenhenni tí ntabárcɔ ntá kjuíjini chjasin Tolemaida. Ntiha kjuínixjeheni tí sín kíchó ni tinkáchónki Ìnchéni. Ntá ntiha k'uéjókoni sín ijnko yaon.

⁸ Ntá tí yaon chr'éxín sákjuíxinni ntiha ntá kjuíjini chjasin Cesarea. Ntá ntiha sákjuíni ntɔe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yatoxín tjinkítsa tí sín kjueyá Ìnchéni. A ntá jeheni mé kuítóheni ntiha.

⁹ Tí ch'ín Felipe a mé chónka ch'án noó xjeen ch'án chjin naxa tótéehya sín. Tí xjeen ch'án a mé chrónkaxín sín tí itén Dios.

¹⁰ Ntá ntaha k'uéjókoni sín itsjé yaon ntá ikjui ijnko ch'ín nixja itén Dios it'in Agabo, tsíkjjixín ch'án estado Judea.

¹¹ Ikjui ch'án kjuinixjehé ch'án tí jeheni la ntá kuákja ch'án tí tjoa t'ínkat'óxin ch'ín Pablo na ntá kjuínchentetoxín toté ch'án la ko itja ch'án ntá ntáchro ch'án kixin:

—Tí Nchakuen Dios mé ntáchro kixin mé xíkaha chjasin Jerusalén tí sín judío sinchenteto sín ìnché tí tjoa sinchek'áyéhe sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónóeheni tí ch'ín Pablo kixin sáchrókjuihya ch'án tí chjasin Jerusalén.

¹³ Ntá kjuátehe ch'ín Pablo kixin:

—¿Nkekuènté tsjankará la ko nkekuènté nchek'ávaráni? Janhan na chrakonhya kjónté jehya tí sinchentetona sín ó. Náhi. Kjónté kjaxin chrók'uénxiā chjasin Jerusalén tí tinkachónkia Ìnchéni —ichro ch'án.

¹⁴ Ntá kjuachahyani nixjeheni ch'án ntá kuítóheni ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén.

¹⁶ Ntá sákjuíkoni iso tí sín tinkáchónki Ìnchéni tsíkjjixín chjasin Cesarea. Sákjuíkoni sín ntɔe ijnko ch'ín tsíkjjixín Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kuítóheni.

Ch'ín Pablo sákjuítsjehé tí ch'ín Jacobo

¹⁷ Tió kjuíjini chjasin Jerusalén ntá tí sín kíchó ni tinkáchónki Ìnchéni mé kjuanjon sín kjuachaxin k'uéjóni la chéhe sín.

18 Ntá tí yaon chr'éxín ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etōan kuènte nínko.

19 Ntá ch'ín Pablo kjuixin nixjehe ch'án sín ntá tuénxín chrónka ch'án kaín tí xra kjuích'e Dios tió kjuakohe ch'án tí sín jehya sín judío.

20 Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kíchóni, jaha k'uikuān kixin síin itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxín tsítōehyani tí ley.

21 Ntá tsíkinhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhé sín tí nkehe k'uetōan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya ita sín tí xroye la ko t'ichjánxienhya tinkáchónki sín éxí k'uékinkáchónkini ósé.

22 ¿Ntá nkehe chrókjuich'eni? Kixin tió tsinhin sín kixin kjuihá la tsōjnkotsé nchónhya sín.

23 Méxra íchá jina jaha sinchexiteyá tíhi. Ntihi tjejó noó sín t'ichjánxín sinchexiteyá sín tí nkehe chénka sín Dios.

24 Jaha sáchrókjuíkoa sín la chrókótjóá jaha la ko jehe sín. La ko kjaxin chrókjuénka tsokjín sín ntá tsonoxín tí sín judío kixin chaxínhya tí nkehe tsíkinhin sín la ko tsonoxín sín kixin kjaxian jaha nchexiteyéhé tí ley.

25 A ntá tí sín jehya judío tsíkitekaon Ìnchéni la ikjinni ijnko xroon ó chr'énhenni sín. K'uetuēnhenni sín kixin sinehya sín tí nto tsíkjokehé chojni tí nkehe tsíkjanōya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí nínko

26 Ntá ch'ín Pablo sákjuíko ch'án tí noó sín la ntá tí yaon chr'éxín kjuínchetjóá asén sín. Ntá kjuixin ntá k'uixenhen ch'án tí nínko kixin tsochrónka ch'án kixin ó kjuixin kjuínchexiteyá ch'an tí nkehe k'uítuenhen ch'án. Tíhi mé t'axrjexín kixin jnkojnko sín tsjikao sín nkehe tsjanjon sín.

27 Ó chjina chróxétja tí yato yaon ntá iso tí sín judío tsíkjin estado Asia mé tsík'ikon sín ch'ín Pablo nkaxenhen tí nínko. Ntá kjuínchekónínkaon sín kaín chojni chjasin ntiha ntá itsé sín tí ch'ín Pablo.

28 Ntá k'uèya sín ntáchro sín kixin:

—Kaínrá chojni chjasin Israel tsjínkītsaráni kixin tsotséni tí ch'ín i. Jehe ch'án mé ixri nkuíxín xritjakohe ch'án chojni nkehe jehya jina kuènte chjaséni, la ko titekakonhya ch'án tí ley kuènte Moisés, la ko titekakonhya ch'án nínkoeni. A

ntá ijie la tsík'ixenko ch'án iso sín griego la kjuínchekjita sín nkaxenhen tí n̄nko tjóá —ichro sín.

²⁹ Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkjix̄in chjasín Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen n̄nko.

³⁰ Ntá kuenté tí chjasin a kónínkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkákjenxín sín ch'án nkaxenhen n̄nko la kuakitsje sín ch'án ntója ntá tuénxín k'uíkjehe sín tí puerta n̄nko.

³¹ Ntá tjinkaon sín chrók'óyán sín ch'án ntá ijnko ch'ín comandante k'uetuēnhen itsjé tí sín soldado romano kuínhin ch'án kixin kuenté tí chjasin Jerusalén k'uixité nínkaon sín.

³² Ntá tí ch'ín comandante sákjuíko ch'án iso sín soldado la ko tí sín k'uetuēnhen tí soldado a la kuinká sín sákjuí sín tí siín tí chojni. Ntá tió k'uíkon tí sín a kixin ó kjuíji tí ch'ín comandante la ko tí sín soldado a ntá kuítōhe sín, í kjuatehya sín ch'ín Pablo.

³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetōan ch'án kixin tí sín soldado sinchen-tetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án.

³⁴ A ntá tí chojni tsíkójnkotsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuēnte xikaha kjuích'e sín kixin k'uixité sín. Ntá k'uetōan ch'án kixin tí sín soldado sátsjiko sín tí ch'ín Pablo tí cuartel siín tí sín soldado.

³⁵ La ntá tió kjuíjiko sín ch'án tí t'it'ótjenx̄in sín tí nchia a ntá t'ichjānx̄in kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín.

³⁶ Kaín tí chojni chréhe nóton t'èya sín ntáchro sín kixin:

—Chrók'uen ch'án —ichro sín.

Ch'ín Pablo chrónka nkayakon chojni kixin chóntahya ch'án jie

³⁷ Ntá tió sáchrókjuíko sín ch'ín Pablo tí nkaxenhen tí cuartel kuēnte tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jina tsonixjahani jaha intsí? —ichro ch'án.

Ntá kjuátēhe tí ch'ín comandante ntáchro ch'án kixin:

—¿Jaha la á noha nixja griego?

³⁸ Méxrā ¿á jehya jaha tí chojni tsíkjix̄in Egipto kjuínchenínkaon chojni la ko sákjuíko nteje tí noó mil chojni tsíkjàya? —ichro ch'án.

³⁹ Ntá kjuátēhe ch'ín Pablo ntáchro ch'án kixin:

—Náhí, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkjix̄in ijnko

chjasin imá tjetaoan. **A** ntá ijie xrjannóaha kixin tsjánjuan kjuachaxin tsonixjahā tí chojni —ichro ch'án.

⁴⁰ Ntá tí ch'ín comandante kjuanjon kjuachaxin ntá ch'ín Pablo kjuák'exín toté ch'án tí tjen escalera ntá tja ch'án ó kjuakoxin ch'án kixin tsotání sín. Ntá tání sín ntá kjuankíxin nixjāxin ch'án nkiva hebreo. Ntáchro ch'án kixin:

22

¹ —Jahará kichó ni la ko chojni it'é xjan tinhínra nkehe tí tsoxrjanka kixin chontahya jie —ichro ch'án.

² Ntá kuínhin sín kixin nixjāxin ch'án nkiva hebreo ntá antsí má tání sín. Ntá ntáchro ch'ín Pablo inaá kixin:

³ —Janhan mé ijnko chojni judío tsíkokjínaxián chjasin Tarso estado Cilicia. K'uankíxian ntihi chjasin Jerusalén la kjuintakuáxian tí nkehe kjuako tí ch'ín Gamaliel la titekavan tí ley tsíkinkáchónkí tí sín tsík'axrjeníxinni ósé. Tjínkavan chrókjuít'ahā Dios xrā kaín asenná éxí tjinkáonrá jahará ch'erá tí yaon ijie.

⁴ Ti senó k'uénínkakonhan chrók'oyán tí sín tinkáchónki Ìnchéni kjuintanteto chojni ntoa la ko chojni chjin kixin chrók'uejóchjina sín.

⁵ **A** ntá tí sín nchat'á t'etoan la ko kaín tí sín táda t'ayakonhen njnko la mé nohe sín kaín tíha kixin jehe sín mé kjuanjon sín xroon ts'áyéhe tí sín kichó ni judío tjejó chjasin Damasco. Ntá sákjuia nó ntiha kixin chrókjuíkjéyá tí sín tinkáchónki Ìnchéni kixin chrótse sín ntá chrókjuíkian sín ntihi Jerusalén chrokjuasóte sín.

Ch'ín Pablo chrónka nkexrí kjuankíxin tinkáchónkí ch'án Ìnchéni

(Hch. 9.1—9; 26.12—18)

⁶ **A** ntá tió kjuasán chjina chjasin Damasco chjina chonkíxin ntá xrínahya k'uinkáséyan jnkontatjén tí tjen ijnko xrohi imá t'inkaséyan kuixin nkajní.

⁷ Ntá kjuachr'ítsinka nonte ntá tuénxín kuinhan itén ijnko nkexro nixjana ntáchro kixin: “Saulo, Saulo, ¿nkekuénté ninkákonna xritjéyá tí janhan?”

⁸ Ntá kjuánchánkiá kixin: “¿Xá nkexro jaha?” Ntá kjuátehe ch'án ntáchro ch'án kixin: “Janhan mé tí nkexro Jesús tsíkjixin chjasin Nazaret, mé tí nkexro xritjéyá.”

⁹ La ntá tí sín k'uájikjan mé k'uíkon sín tí xrohi la chrakon sín kjánchó kuénhya sín itén tí nkexro nixjana.

¹⁰ Ntá kjuánchánkiá kixin: “¿Xá nkehe tsonhen tjinkávan sít'aha jaha?” Ntá kjuátehe ch'án ntáchro kixin: “T'aya sátjia t'ixenhén chjasin Damasco ntá ntiha tsochrónka sín kaín nkehe sích'e.”

11 Ntá tí xrohi a mé k'uixenka ikuḁn ntá í xitjahya t'íkuḁn. Ntá tí sín chríkjan mé kuinkátséna sín sákjuíkian sín chjasin Damasco.

12 Ntá ntaha kjuák'e ijnko ch'ín it'in Ananías ijnko chojni jína kjuínchexiteyéhe ch'án tí ley kuènte ch'ín Moisés. Kaín tí sín judío siín chjasin Damasco tjikosáyehe sín tí jehe ch'án.

13 Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kixin: “Kíchóni Saulo, ijie la ts'ayéhe kjuachaxin ts'ikuan ínaá.” Ntá ó jína t'íkuḁn.

14 Ntá tuénxín ntáchro ch'án ínaá kixin: “Tí Dios kuinkáchónki tí sín tsík'axrjeníxinni la ó tsíkjejá ch'án tí jaha kixin tsonoha nkehe tjinkaon ch'án la ko kixin ts'ikuan tí nkexro jína la ko tsinhín tan k'uaxrxén ir'va ch'án.

15 Jaha mé tsochronka tí nkehe k'uíkuan la ko tí nkehe kuínhín tsinhin kaín tí chojni chjasintajni.

16 A ntá jie la í choénhya má. T'aya la tsikitiaxián ihnié Ìnchéni kixin mé ts'ímáxin ijiá,” ichro ch'ín Ananías.

Pablo chrónka kixin Dios ichr'án ch'án tsjakohé tí sín jehya sín judío

17 'Na ntá tió xíkjan chjasin Jerusalén ntá sákjuia nínko tsonixjahá Dios ntá titàya k'uikuèn

18 Ìnchéni ntáchro ch'án kixin: “Tjoka ts'axrjéxian chjasin Jerusalén kixin tsitekakuenhya sín tí nkehe tjàkua mé tí tan kuèntana.”

19 Ntá janhan ntátjan ch'án kixin: “Ìnchéni, jehe sín ó nohe sín kixin senó k'uék'atsínka kaín tí nínko la k'uétse tí sín tinkáchónki tí jaha la sákjuíkian sín ntöechiso k'uékon sín.

20 Tió k'óyán sín tí ch'ín Esteban tí nkexro k'uékjit'aha xḁ, k'uénixja tí tan kuènta ntá janhan kjaxin tjéntaxián ntiha la janhan ntáxrjan kixin ó nchoxon its'en ch'án la k'uáyakonhan tí iké tí sín kjuàya.”

21 Ntá Ìnchéni xínixja ínaá, ntáchro ch'án kixin: “Tétuanhan jaha kixin sátsjia chjasin kjín kixin tsjakohé tí chojni jehya judío.”

Ntá tí ch'ín comandante k'uáyéhe tí ch'ín Pablo kixin tsjasóte ch'án

22 Ntá tí sín tsíkójnkotsé mé kuínhin sín kaín tíha ntá kjuankíxin k'uèya sín ntáchro sín kixin:

—Its'en ch'án, í tsjak'echónhya ch'án —ichro sín.

23 Naxḁ t'ixratáhya sín t'óyako sín ntá tótsjénka sín iké sín la ko kuákja sín nche it'e sín.

24 Ntá tí ch'ín comandante mé k'uètuènhen ch'án tí sín soldado a kixin sátsjiko sín ch'ín Pablo nkaxenhen tí cuartel kuènte sín. Ntá ntiha k'uètoan ch'án kixin tsjatexín sín ch'án

chikoté ntá tsonoexín tí ch'ín comandante nkekuènte imá t'óyako sín nínkakonhen sín tí jehe ch'án.

²⁵ Ntá kjuixin kjuínchenteto sín ch'án kíxin tsjate sín ch'án ntá nixjehe ch'ín Pablo ijnko ch'ín capitán itjen ntiha ntáchro ch'án kíxin:

—¿Á chontará kjuachaxin tsjaterá ijnko chojni romano, kíxin naxa kjuéyáhyará nkerí jie chonta? —ichro ch'án.

²⁶ Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kíxin:

—¿Nkehe s̄ich'e jaha kíxin tí nkeexo i mé ijnko chojni romano?

²⁷ Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kíxin:

—¿Á jaha chaxín chojni romano? —ichro ch'án.

Ntá kjuátehe ch'ín Pablo kíxin chaxín jehe ch'án.

²⁸ Ntá ntáchro tí ch'ín comandante kíxin:

—¿A ntá nkexrí kíxin janhan nchónhya chichaon kjuènka kíxin ts'ónana chojni romano?

A ntá ntáchro ch'ín Pablo kíxin:

—Janhan na chojni ntiha tsíkokjínaxián.

²⁹ Na ntá tí sín soldado chrókjuate ch'ín Pablo mé kuínhin sín kíxin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án kíxin tí ch'ín Pablo a mé ijnko chojni romano ch'án chaxín. Ntá chrakon ch'án kíxin tsíkjinchenteto ch'án.

Ch'ín Pablo nixjehe ch'án tí sín t'etoan kuènte tí sín judío

³⁰ A ntá tí kóyaon ntá tí ch'ín comandante a mé tjinkaon ch'án tsonohe ch'án nkehe tí jie chrók'ueka tí sín judío tí ch'ín Pablo. Ntá kjuasintanká ch'án chica cadena tsíchróntetoxín tja tí ch'ín Pablo ntá k'uetōan ch'án kíxin tsojnkotsé kaín tí nchat'á t'etoan la ko tí sín t'etoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí siín tí jehe sín.

23

¹ Ntá ch'ín Pablo komá tí sín t'etoan kuènte sín judío ntá ntáchro ch'án kíxin:

—Kíchóni, tí k'uéjak'é hasta ijie la Dios tjetsjehe kíxin ijnko kjuaxrexinkaon jína chonta —ichro ch'án.

² Ntá tí ch'ín Ananías tí ch'ín nchat'á t'etoan mé k'uetuēnhen ch'án tí sín chjino tjejó tí tjen ch'ín Pablo tsochjéhe sín ir'va ch'án.

³ Ntá kjuátehe ch'ín Pablo kíxin:

—Dios mé sinchekjasóte ti jaha kíxin ntoáhya kjuich'e. Tjetjaxian méhe kíxin tsjéyá nkehe tí jie chonta éxí nixja tí

ley. A ntá ɔnkekuènte kuítekákonhya tí ley, la kuétɔan kíxin ts'ékonna? —ichro ch'án.

⁴ A ntá tí sín siín ntiha ntáchro sín kíxin:

—ɔÁ xíkaha ts'antaxínhín tí nchət'á t'etɔan kuènte Dios?

⁵ Ntá kjuátɛhe ch'ín Pablo ntáchro ch'án kíxin:

—Kíchóni, kjuatsoanhya janhan kíxin jehe ch'án mé tí nchət'á t'etɔan. Ntáchro tí xroon itén Dios kíxin: “Chrók'uantaxiénhya tí chojni t'etɔenhen chjasán”^{*} —ichro ch'án.

⁶ Ntá ch'ín Pablo mé kónohe ch'án kíxin iso chojni siín ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kíxin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jje chonta kíxin janhan mé tinkachónkia kíxin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankíxin sín ikjo kíchó sín ntá xíkaha jnkokónhya kjuenkayáxin tí sín tsíkójnkotsé ntiha.

⁸ Kíxin tí sín saduceo a mé ntáchro sín kíxin tsoxechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín kaín tí nkehe a.

⁹ Ntá kaín sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kíxin:

—Tí ch'ín i, kohya ninkehó nkehe jínahya kjuích'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kíxin chrókjuinchekuen sín tí ch'ín Pablo ntá k'uɛtɔenhen ch'án tí sín soldado a kíxin sátsjikakjín sín ch'án la tsíkəo sín ch'án inaá tí cuartel kuènte tí sín soldado.

¹¹ A ntá tí tie a na ntá xrínahya titəya k'uíkuèn ch'ín Pablo Ìnchéni nixja ch'án, ntáchro kíxin:

—Chrakonhya Pablo kíxin éxí chronka tanná chjasin Jerusalén la mé xíkaha tsochronka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin a ntá iso tí sín judío a mé kjuenkayáxin sín kíxin ts'óyán sín tí ch'ín Pablo. Ntá k'uákjenxin sín ihnié Dios chaxín tsoxiteyá la sinehya sín la ko ts'ihya sín ninkehó tí naxa ts'óyánhya sín ch'án.

¹³ Chjina cuarenta sín kjuenkayáxin sín kíxin xíkaha sich'e sín.

¹⁴ Ntá sákjuíchenka sín tí sín nchət'á t'etɔan la ko tí sín t'etɔenhen kuènte tí sín judío la ntáche sín kíxin:

^{*} 23:5 Éxodo 22.28

—K'uákjenxinni ihnié Dios kixin chaxín tsoxiteyá kixin í sinehyani ninkehó tí naxá ts'óyanhyani tí ch'ín Pablo.

¹⁵ Méxra ntá jahará la ko í so ti sín t'etueñhen tí sín judío tsontácherá tí ch'ín comandante a kixin tsjikao sín tí ch'ín Pablo ntihi tí tjejorá ntóye nchítjen kixin antsí má tsjan-chankíhírá ch'án nkehe siná á chaxín tí jie t'íká ch'án. A ntá jeheni senó ts'ejóchónhenni tí tsjixín ch'án ntá ts'óyánni ch'án kixin í tsjihya ch'án ntihi —ichro sín.

¹⁶ Ntá tí xjeen tí kjave tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uixenhen ch'án cuartel kuènte tí sín soldado kixin tsochrónka ch'án nkehe tí tjo sín kuínhin ch'án.

¹⁷ La ntá ch'ín Pablo mé k'uíyehē ch'án ijnko tí sín capitán la ntáchro ch'án kixin:

—Sátsjioa tí ch'ín ntasoá ti tjen tí ch'ín comandante kixin tjinkaon ch'án tsochrónka ch'án nkehe —ichro ch'án.

¹⁸ Ntá tí ch'ín capitán a mé sákjuíko ch'án ti tjen tí ch'ín comandante ntá ntáchro tí ch'ín capitán a kixin:

—A ntá tí ch'ín Pablo tjechjina mé k'uíyehēni ch'án kixin tsjikao ni tí ch'ín ntasoá ntihi kixin tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochrónka? —ichro ch'án.

²⁰ Ntá ntáchro tí ch'ín ntasoá a kixin:

—Iso tí sín judío mé kjuenkayáxin sín kixin tsjanchaha sín kixin ntóye nchítjen sátsjioa ch'ín Pablo tí tsojnkotsé tí sín judío t'etōan. Sit'ayaha sín tsontáchro sín kixin tjinkaon sín tsjanchankíhi sín ch'ín Pablo tí nkehe antsí má xra.

²¹ A ntá jaha la chrókuítekákonhya kixin chjina cuarenta chojni tjejóchónhen sín imó la k'uákjenxín sín ihnié Dios kixin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsoñohe sín nkehe tsixrua jaha —ichro ch'án.

²² A ntá tí ch'ín comandante a mé nixjehē ch'án tí tí ch'ín ntasoá la k'uetōan ch'án kixin:

—Tsochenkahya ninkexró kixin xíkaha kjuíchronka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uíyehē ch'án yaá tí sín capitán a ntá k'uetōan ch'án kixin tsoyaxínhin sín sátsjiko sín iyó ciento sín soldado sátsjixín toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án.

24 La ko k'uítuenhen sín sinchekamá sín kokate tsjiták'á ch'ín Pablo la ts'ayakonhen sín ch'án jína kixin kohya nkehe tsonhen kixin tsjiji ch'án tí tjen ch'ín Félix, tí ch'ín gobernador.

25 Ntá tí ch'ín comandante ikjin ch'án ijnko xroon a, ntáchro kixin:

26 “Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jína, nixjaha.

27 Tí sín judío a mé itsé sín tí ch'ín i kixin chrók'óyán sín ch'án. Ntá tió kónona kixin ijnko chojni romano tí jehe ch'án la ntá sákjuikian sín soldado kjujntakaá ch'án.

28 Tjínkavan tsonona nkekuente kixin nínkakonhen sín ch'án. Ntá sákjuikian ch'án tí tsikójnkotsé tí sín judío.

29 Ntá kónoxín kixin nínkakuenxín sín ch'án kixin tí ley kuente sín kjuínchexiteyáhya ch'án, ichro sín. Jehya jie jie tsíkjasin ch'án kixin chrók'óyán sín ch'án o chrókjuak'echjina sín ch'án.

30 Ntá ó kuinhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kixin chrókjuiji sín tí tjen jaha chrókjuá sín kixin nkekuente nínkakonhen sín ch'án. Kjuasáyá. Ó tjen.”

31 Ntá tí sín soldado a mé kjuínchexiteyá sín éxi k'uítuenhen sín a ntá sákjuiko sín tí ch'ín Pablo tí tie a chjasin Antípatris.

32 Ntá tí yaon chr'éxin tí sín soldado xrixín toté ó a mé xíkjan sín tí cuartel kuente sín. Ntá tí sín k'uéjókjen kokate a mé naxa sákjuiko sín tí ch'ín Pablo.

33 Ntá tió kjuiji sín tí chjasin Cesarea ntá tí sín soldado a mé kjuanjon sín tí xroon a chjehe sín tí ch'ín gobernador la ko kjaxin kjuínchek'áyéhe sín ch'án tí ch'ín Pablo.

34 Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkjin sín tí ch'ín a.

35 Ntá ntáchro ch'án kixin:

—Ntá tsinhan nkehe tsixro tí sín itsji ts'eka jie.

Ntá k'uetuenhen ch'án tí sín soldado a kixin ts'áyakonhen sín tí ch'ín Pablo tí nchia kuente ch'ín Herodes.

24

Ch'ín Pablo nixjehē ch'án ch'ín Félix chrónka ch'án kixin kjuasinhya ch'án jie

1 Ntá k'uátsínka in'ó yaon, ntá ch'ín Ananías, tí nchat'á imá t'etoan, kjuíji ch'án chjasin Cesarea. Kjaxin kuikao ch'án iso tí sín t'etoan kuente njnko a la ko ijnko ch'ín abogado it'in Tértulo. Tí ch'ín a mé tsonixjehē tí ch'ín gobernador kixin tsjanchia sín jie kuente ch'ín Pablo.

² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankíxin ch'án nixjehe ch'án tí ch'ín Félix ntáchro ch'án kíxin:

—Kjuasáyá jaha gobernador kíxin imá kjuínkítsa kíxin kjuaxróxin tjejóni la kjuasáyá kíxin imá noha kjuíncheyóxian tí nació kuènteni.

³ Kjuasáyá jaha Félix. Imá jína jaha kíxin k'uáyéheni kaín tíha.

⁴ Tjínkakhonhya sintak'itjáyanhan nchónhya tiempo la xrjanóaha kíxin chrókuak'é chrókuinhín intsikoá tí nkehe tsoxrjanka.

⁵ A ntá ijie ó k'uitjani kíxin tí ch'ín i mé éxí ijnko chin t'óxíka kuenté chjasintajni kíxin ch'iyehé ch'án tí sín judío ntá xíka sín. Jehé ch'án mé t'etóan ch'án tí sín tinkáchónki tí ch'ín tsíkjin chjasin Nazaret.

⁶ Jehé ch'án mé kjaxin chrókuinçekjita ch'án tí nínko. A ntá itséni ch'án ntá chrókuinçekitóexínni tí ijie ch'án éxí t'etóan tí ley kuènteni.

⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakitsje sín tí ch'ín Pablo.

⁸ Ntá k'uetóan ch'án kíxin tí sín tjanchia jie chrókuitsjehe sín tí jaha kíxin jaha chrókuanchankíhí ch'án kíxin chrókónoha jína nkexéhe tí jie chrókuinçekjasótéxin sín ch'án —ichro tí ch'ín Tértulo.

⁹ Ntá ntáchro kaín tí sín judío síin ntiha kíxin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxin tja ch'án kíxin tsonixja tí ch'ín Pablo a. Ntá ntáchro ch'ín Pablo kíxin:

—Chéheni kíxin tsonixjahani tsochrónkani kíxin kohya jie kjuasinni kíxin ó noheni kíxin jaha la juez kuènte tí nació ntihi la nchónhya nánó tétóan.

¹¹ Jaha la kjaxin ó chrókónoha kíxin na ntá teyó yaon kjujini chjasin Jerusalén kíxin ntaha tsoxráxinkakhonxínni Dios.

¹² Kónoxínhya kíxin nijnko nkexro chrókuachaxínni, la ko kjuínchexakuenhyani ninkexró nínko la ko ni tí nínko ntsí la ko ninketé chjasin.

¹³ Tí sín i la xitjahya tsontáchro sín kíxin xíkaha tí jie kjuasinni.

¹⁴ Janhan chaxín xrjanka kíxin t'aha xra tí Dios k'uékinkáchónki tí sín tsík'axrjeníxinni mé yóhe tí ntia nixin. A ntá jehé sín ntáchro sín kíxin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín tí xroon kuènte ley la ko tinkáchónkia kaín tí nkehe k'uénixja tí sín k'uéchrónka itén Dios.

15 Kjaxín tinkachónkia tí Dios tinkáchónki tí jehe sín kixin tjéçonhã kixin Dios sinchexechón kaín chojni jína la ko kaín chojni jínahya kjaxin.

16 Méxra tóxakonna kixin tjóá chrókjuak'é kixin chrókjuanchahya Dios jie la ko kjaxin chojni chrókjuanchahya jie.

17 'Nta kjuixin k'uatsínka iso nánó ixrini ókjé ntá kjujini chjasénni kixin tsjanjonni chichaon la ko kjaxin tsochjéheni Dios nkehe.

18 Méxra mé xikaha tjenni nkaxenhen nínko nta iso sín judío tsíkjixín estado Asia ó xetani ntiha. Ntá kjuínchetjóáni asénni la tsjéhya chojni k'uíkon la kohya chojni kjuánjonkoni.

19 A ntá tí sín a mé t'ichjánxin chrókui sín ntihi kixin chrókjuanchia sín jie tí nínkakonna sín.

20 A ntá tí náhi la tí sín tjejó ntihi chróçrónka sín kixin nkehe tí jie k'uitjaxín sín tió kjuák'eni tí tjejó tí sín t'etõan kuente tí sín judío.

21 Kjá tí tsontáçro sín kixin náxrjónhya ijnko nkehe it-sen k'uèya ntáxrjan kixin: “Ijie sinchekitoexinrá jiëna kixin sinchekjasótenará kixin janhan tinkachónkia kixin tsoxechón chojni tsik'en” —ichro ch'án.

22 Ntá kjuixin kuínhin tí ch'ín Félix, la jehe ch'án jína kónohe ch'án kixin nkexrí tí ntja nixin. Ntá kjuínchekitoexínhya ch'án ijje ch'ín Pablo. Ntáçro ch'án kixin:

—Tsijjia tí ch'ín comandante Lisias ntá tsoçrónka ch'án nkekuente tí jie tjanchiará ntá tsonõna —ichro ch'án.

23 Ntá k'uetuëhen ch'án ijnko ch'ín capitán kixin ts'ayakonhen ch'án ch'ín Pablo kjánçhó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjtsjehe sín ch'án.

24 Ntá iso yaon chr'éxin ntá kjujiko ch'ín Félix tjan Drusila ichjién ch'án, mé ijnko tjan judía. Ntá k'uetõan ch'án kixin tsjik'íyehë sín tí ch'ín Pablo kixin tsoçrónka ch'án nkexrí tinkáchónki chojni Jesucristo.

25 A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etuëhen chojni asén sín kixin ch'ehya sín tí jínahya la ko nkexrí Dios sinchekitoexín ijje chojni tí tsjixixín. Ntá ch'ín Félix kuínhin ch'án xikaha ntá çrakon ch'án, ntáçro ch'án kixin:

—A ntá jie la sátjia. Ntá ts'iyaha tió chonta tiempo —ichro ch'án.

26 A nta ch'ín Félix tjeçónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehë ch'án tí ch'ín Pablo kixin tsonixjehë ch'án.

27 Ntá xikahó kónhen hasta k'uátsínka iyó nánó ntá tí ch'ín Félix kuítóhe ch'án tí xrā gobernador la ntá í jnko ch'ín it'in Porcio Festo mé k'uíxenhen ch'án tí xrā a ínaá. A ntá ch'ín Félix mé kuítóhe ch'án tí ch'ín Pablo tjechjina ch'án kixin tjinkaon ch'án chrókjuinchexiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

1 Ntá tí ch'ín Festo kjuíji ch'án ntiha kixin ts'ixenhen ch'án tí xrā gobernador. Ntá iní yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén.

2 Ntiha tí sín nchát'á t'etōan la ko tí sín judío imá tjetōan mé kjuanchia sín kixin tsjasóte ch'ín Pablo.

3 Kjuanchia sín kixin xrā ó chrók'uetoan ch'án kixin chrókjuí ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntja ts'óyán sín tí ch'ín Pablo.

4 Kjánchó ch'ín Festo kjuátehe ch'án ntáchro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxrā tí ch'ín Pablo la tjechjina ch'án chjasin Cesarea la xitjahya ts'etōan ch'án kixin tsjixrakoa.

5 Ntá ntáchro ch'án kixin:

—Tí chojni tjetōan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jina tsjanchia sín jie —ichro tí ch'ín Festo.

6 Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea ínaa. Ntá tí yaon chr'éxin a kjuák'etjaxin ch'án tí tjet'etōanxín ch'án ntá k'uetoan ch'án kixin tsjikakjín sín tí ch'ín Pablo.

7 Ntá tió k'uíxenhen ch'ín Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie.

8 A ntá tí ch'ín Pablo a chrónka ch'án kixin kjuasinhya ch'án jie. Ntáchro ch'án kixin:

—Ninkehó jie kjuasinhvani mé ninkexró kjuánjonkohyani la ko kjaxin jehya chrókuitekakonhyani tí ley kuènte tí sín judío la ko jehya chrókuitekakonhyani tí nínko la ko jehya chrókuitekakonhyani tí ch'ín gobernador romano.

9 A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntáchro ch'án kixin:

—¿Á tjinkávan sátsjia chjasin Jerusalén kixin ntaha janhan chrókjuintakitoaxián nkehe tí jie chonta jaha? —ichro ch'án.

10 Ntá kjuátehe ch'ín Pablo kixin:

—Náhi, jeheni ó ntihi tjenni tí t'etōanxín tí sín gobierno romano la jína chrókjuinchekitōexián ijiéni kíxin jaha la ó noha kíxin ninkehó ije kjuíuch'ehyani tí sín judío.

¹¹ Kja tí chaxín kjuásian ichrén jie jie chrók'uénxian la chrakonhyana kjónté chrók'uén. A ntá ti chaxínhya xíkaha t'ekana sín jie la ninkexró chóntahya kjuachaxin chrók'uetoan sáchrókjuikoni tí jehe sín. A ntá tjánchiá kíxin jehe tí ch'ín imá t'etōan mé sinchekitōexín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkítsa ch'án ntá ntáchro ch'án kíxin:

—Jaha mé tjanchia kíxin tí ch'ín imá t'etōan sinchekitōexín ch'án ijiá. Méxra tétuānhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uátsínka iso yaon ntá tí ch'ín rey Agripa la ko tjan Berenice kjuíji sín chjasin Cesarea kíxin tsonixjehe sín tí ch'ín Festo.

¹⁴ Ntá ntiha mé kuítóhe sín itsjé yaon ntá ch'ín Festo a mé chénka ch'án tí ch'ín rey nkehe kuènte tí ch'ín Pablo. Ntáchro ch'án kíxin:

—Ntihi itjen ijnko ch'ín tjechjina tsíkítóhe ch'ín Félix.

¹⁵ A ntá tió kjuak'é chjasin Jerusalén ntá tí sín nchat'á t'etōan la ko tí sín t'etuenhen tí sín judío a mé kjuíjitsjehe sín tí janhan ntá kjuanchia sín jie kuènte ch'ín Pablo. Kjuanchia sín kíxin chrók'óyánni tí jehe ch'án.

¹⁶ Ntá janhan kjuátaha kíxin: Jeheni chojni t'etōan kuènte sín romano mé kuènhyani ts'etōanni its'en ninkexró tí naxa tsöchjinahya tí ch'ín kjuasin jie kíxin tsontáchro ch'án á chaxín tí jie tjanchia sín o náhi.

¹⁷ Ntá ti sín judío kui ntihi ntá chuānhya má. Kjónté tí yaon chr'éxin kjuak'étxaxian tí ntákitōexián ijié chojni la kuétoan kíxin síxrakoa tí ch'ín Pablo.

¹⁸ A ntá tí sín kóchjina kohya ninkehó ichro sín kuènte ti jehe ch'án éxi kjuenkayáxian janhan chróntáchro sín.

¹⁹ Jehó nínkakuenxín sín ch'án kíxin tí nkehe tinkáchónki ch'án la ko nínkakuenxín sín ch'án kíxin tí nkexro it'in Jesús mé ik'uén ch'án ntá jie ntáchro ch'ín Pablo kíxin tjechón ch'án inaá.

²⁰ Janhan la nonahya nkexrí tsitōexín tí ijié ch'án ntá kjuánchánkíha tí ch'ín Pablo á tjinkaon ch'án sátsji ch'án chjasin Jerusalén kíxin ntaha tsitōexin tí jie ch'án.

²¹ A ntá jehe ch'án tsíkjanchia ch'án kíxin tí ch'ín imá t'etōan mé chrókjuinchekitōexín ch'án ijié ch'án. Ntá kuétoan janhan kíxin naxa ntihyó tsjak'echjina ch'án tsononajia janhan nkesá tsétuānhan ch'án sátsji ch'án ntiha —ichro ch'án.

²² A ntá ch'ín Agripa ntáche ch'an tí ch'ín Festo kíxin:

—Kjāxian janhan tjínkavan tsínhan tí nkehe tsochrónka tí ch'ín a.

Ntá kjuátehe ch'ín Festo ntáchro ch'án kixin:

—Ntóye tsinhín nkehe tsochrónka ch'án.

²³ Ntá tí yaon chr'éxin tí ch'ín Agripa la ko tí tjan Berenice kjuji sín la k'uixenhen sín la ko tí sín soldado t'etōan tsíkjikao sín, la ko k'uixenko sín iso chojni tjetōan kuente chjasin ntiha. Ntá k'uetōan ch'ín Festo kixin tsjixrakoa tí ch'ín Pablo.

²⁴ Ntá ntáchro ch'ín Festo kixin:

—Jaha ch'ín rey Agripa tinhín la ko tinhínrá kaín rá tsíkójnkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjāxin chjasin Cesarea ntihi la kuítōehya sín, tjanhana sín kixin chrók'uen ch'án.

²⁵ A ntá tónhenni kixin kohya jie jie kjuasin ch'án kixin chrók'uen ch'án. Kjánchó jehe ch'án mé tsíkjanhia ch'án kixin tí ch'ín imá t'etōan chrókjuinchekitōexín ijie ch'án. Ntá kjuenkayāxian kixin tsétuanhan ch'án sátsji ch'án ntiha.

²⁶ Nonahya nkehe chaxín tsokjian ts'áyéhe tí ch'ín t'etōan. Ntá jie kuétōan kjuikakjín sín ch'án kjuikao sín ch'án tí tjejóni ntihi kixin tjetōan kixin jaha ch'ín Agripa la ko kaín rá tjejórá ntihi tsjanchankíhírá ch'án kixin mé tsonòna janhan nkehe tsokjian.

²⁷ Méxra náxrjónhya chróchr'an ijnko tí chojni tjechjina naxa nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochronka —ichro ch'án.

Ntá tí ch'ín Pablo mé kjuaya tja ch'án ntá kjuankixin nixja ch'án, ntáchro ch'án xikihi:

² —Chàna kixin tsonixja nkayakuan tí jaha rey Agripa tsoxrjanka kaín tí jie t'ekana tí sín judío.

³ Ó noheni kixin jaha la ó noha jina kuente tí ley la ko tí nkehe tinkáchónki tí sín judío, la ko jaha noha nkehe tí kjuachaxin sín kichó sín. Méxra xrjannóaha kixin tjak'etinhín jina.

Chrónka ch'ín Pablo nkexrí kjuák'e ch'án tí óse

⁴ Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána.

⁵ Kjāxin jehe sín la ó nohe sín la kjá jina chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuinchexiteyéhe sín tí ley kuente tí nkehe tinkáchónkini.

⁶ Ntá ijie sinchekitoexián jiēna kíxin nínkaon tí sín judío a kíxin tjéchoṅḅaṅ kíxin Dios mé sinchexechón chojni ínaa xíkaha tsíchénka ch'án tí sín tsík'axrjeníxinni.

⁷ Tí teyó tribu tsík'axrjeníxin ch'ín Israel mé tjejóchónhen sín kíxin ts'ikon sín tsoxiteyá tí nkehe tsíchronka Dios. Méxra xraxinkaon sín Dios nchaḅotjin la ko tie. Méxra mé xíkaha tjéchoṅḅaṅ, jaha rey Agripa, la mé xíkaha nínkakonna tí sín judío ijie.

⁸ ¿Á títekákonhyará jahará kíxin Dios sinchexechón chojni tsík'en?

Ch'ín Pablo k'uénínkakonhen ch'án tí chojni tinkáchónki Ìnchéni

⁹ 'Janhan mé kjaxin k'uékjenkayáxian nchónhya nkehe k'uénínkakonḅaṅ tí sín tinkáchónki Jesús tí nkexro tsíkjin chjasin Nazaret.

¹⁰ Mé xíkaha kjaxin k'uékjit'a chjasin Jerusalén. Tí sín nchaḅ'á t'etoan mé kjuanjon sín kjuachaxin kíxin janhan tsochr'áxaṅḅaṅ ntōechiso nchónhya tí sín tinkáchónki Ìnchéni. Ntá tíó k'óyán sín tí sín a mé janhan la ntáxrjan kíxin ó nchoxon xíkaha kónhen.

¹¹ Nchónhya veces kjuintakjasóte tí sín tinkáchónki Ìnchéni kíxin chrókuítóhe sín tí nkehe tinkáchónki sín. Mé xíkaha k'uékjit'a kaín xín nínko kíxin imá k'uénínkakonḅaṅ tí jehe sín la xíkaha k'uájichráḅa sín kjónté sátsíkji sín chjasin ókjé.

*Chrónka ch'ín Pablo nkexrí kuinkáchónki ch'án Ìnchéni
(Hch. 9.1—19; 22.6—16)*

¹² 'Méxra xra ó sákjuia janhan chjasin Damasco. Tí sín nchaḅ'á t'etoan mé ó kjuanjon sín kjuachaxin kíxin xíkaha t'ahá sín xra.

¹³ A ntá tí ntja a jaha rey chrókónoha kíxin chonkíxin k'uíkuan éxí ijnko xrohi t'inkaséyan kujxin nkaya nkajní antsí má fuerte la kánhyó fuerte tí xrohi kuènte yaon la tí t'inkaséyan mé k'uantatjen tí janhan la ko tí sín xríkian.

¹⁴ Ntá kaín ni kjuítsínkani nonte ntá xrínaḅhya kuinḅaṅ nixja ijnko nkexro mé nkíva hebreo nixjaxin ch'án. Ntáchro tí nkexro a kíxin: “Saulo, Saulo, ¿nkekuènte nínkakonna xrítyéyá tí janhan? Jahvá nchekjasóte asán kíxin tjanjonkoa tí janhan. Éxí yóḅe ijnko koxinta kónínkaon va tí chriáte sín va chica yo mé xíkaha jaha.”

¹⁵ Ntá kjuánchánkiá kíxin: “¿Xá nkexro jaha?” Ntá tí nkexro me kjuáteḅe kíxin: “Janhan mé Jesús mé tí nkexro chréhé jaha.

¹⁶ Ijie t'àya jaha, tjak'exián totá. Janhan kjuánjuan kjuachaxin kíxin k'uíkuan tí janhan ijie kíxin jaha sích'ena xra. Janhan kjuéyá tí jaha kíxin tsochénta chojni kíxin k'uíkuan tí

janhan la ko tsochronka tí nkehe tsjákohá ínaá tí xik'íkuan tí janhan ínaá.

¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tétōan satsjia.

¹⁸ Méxra tétōan satsjia tí tjejó tí jehe sín kixin takítjenkia ikon sín kixin í ts'ajihya sín ntja sitié la ts'aji sín ntja t'inkaséyan la ko tsochóntahya tí jínahya kjuachaxién ts'etuenhen tí jehe sín. Jehe sín mé tsinkáchónki sín tí janhan. Ntá janhan ts'áyáha sín la tsjin ijíé sín la ko tsitonhen sín tí nkehe ts'áyéhe kaín tí sín tsíkjinchetjóá Dios," ichro Ìnchéni.

Ch'ín Pablo kuítekaon ch'án tí nkehe tsík'íkon ch'án

¹⁹ Mé xíkaha jaha rey Agripa kjuintaxiteyáha tí nkehe k'uíkuan kujxin nkaya nkajni.

²⁰ Saoxín kjuákoḥa tí sín siín chjasin Damasco, la ntá chr'éxin chjasin Jerusalén, la ko kuenté tí estado Judea ntá kjaxin kjuákoḥa tí sín jehya judío. Kjuákoḥa sín kixin chrókuítóhe sín ijíé sín, la chrókjan sín chrókuinkáchónki sín Dios, la ko chrókjuákoxin sín xra jina kixin chaxín ó kjuitóxinhin sín tí nkehe tinkáchónki sín.

²¹ Mé xíkaha tí xra tséxinna tí sín judío a nkaxenhen njnko la tjinkaon sín chrók'óyánna sín.

²² Ntá kjuasáyé Dios kjuínkítsana la ntoá itjén ijie tjákoḥa kaín chojni ntsíntsí la ko chojni ihyé la ninkehó k'uantaxíanhya kuente tí nkehe tsíchrónka tí sín tsíchrónka itén Dios la ko tí nkehe tsíchrónka ch'ín Moisés tsonhen,

²³ kixin t'ichjánxin its'en Cristo la ko tsoxechón ch'án ínaá. Tí itén ch'án éxi ijnko xrohi ts'inkaséyanxín tí sín siín ntihi la ko tí sín siín í so nación kixin tsaáxin sín.

Ch'ín Pablo nixjehe ch'án ch'ín Agripa kixin chrókuinkáchónki ch'án Ìnchéni

²⁴ Mé xíkaha ichro ch'ín Pablo kixin kohya jie kjuasin ch'án ntá tí ch'ín Festo mé itsen k'uèya ch'án kixin:

—Pablo jaha la kjá tsík'ixikján. Imá tsíkjinchekuáxian mé xíkaha tsíkólókoxián —ichro ch'án.

²⁵ Ntá kjuátehe ch'ín Pablo kixin:

—Jehya tsík'ixikjánna. Jaha Festo imá tjuaha. A ntá tí nkehe ntáxrjan la ijnko nkehe jina la ijnko nkehe chaxín.

²⁶ Ntihi itjen tí ch'ín rey Agripa. Jehe ch'án mé jina nohe ch'án kaín tí nkehe a. Méxra tjenixjahā ch'án jnkojina kixin ó nòna kixin jehe ch'án ó nohe ch'an kaín nkehe kónhen kixin jehya ijnko nkehe imó kónhen tíha.

²⁷ Jaha, rey Agripa, ¿á titekávan tí nkehe tsíkjako tí sín tsíchrónka itén Dios ósé? Janhan la ó nòna kixin titekávan jaha.

²⁸ Ntá kjuátehe ch'ín Agripa ntáchro ch'án kixin:

—Ó āntsíkoá chrōkjuacha chrókjuachròena kíxin chrók'ónana cristiano —ichro ch'án.

²⁹ Ntá ntáchro ch'ín Pablo kíxin:

—Ntáxrjan kíxin á isé tsòxrjanka o á séhya la Dios mé tjinkaon kíxin jehya jahvá chrókuinkachónkia ch'an. Náhi. Kjaxin tjinkaon ch'án kíxin kaín nkexro tjejótinhin chrók'óna sín éxi tí janhan kjánchó xikahya chróchónta sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxaxin ntiha.

³¹ Ntá kaín sín k'uaxrjenta sín la ikjo sín kichó sín. Ntáchro sín kíxin:

—Kohya jie tsíkjasin tí ch'ín a kíxin chrók'uenxín ch'án la ko chrókjuak'echjinaxín ch'án ntqechiso.

³² Ntá tí ch'ín Agripa ntáche ch'án tí ch'ín Festo kíxin:

—Ó nchòxon chrókjuánjuan kjuachaxin sáchrókjui tí ch'ín a tí jehe ch'án chrókjuanchahya ch'án kíxin tí ch'ín imá t'etqan sinchekitoexín ijíé ch'án —mé xikaha ichro tí ch'ín Agripa.

27

Ch'ín Pablo sákjuí ch'án chjasin Roma

¹ Ntá k'uetqan sín sátsjini nación Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'in Julio. Jehe ch'án me ijnko policía kuènte tí ch'ín t'etqan Augusto César.

² Ntá k'uíxenhenni ijnko ntabárcq tsíkjiixin nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjiixin chjasin Tesalónica nó estado Macedonia.

³ A ntá tí yaon chr'éxin mé kjuíjini ti puerto chjasin Sidón. Ntá ch'ín Julio mé ikjo jnkójina ch'ín Pablo ntá chjéhe ch'án kjuachaxin kíxin sátsjitsjehe ch'án tí chojni chóxin ch'án ntiha kíxin tsjinkítsa sín ch'án.

⁴ Ntá chr'éxin sákjuíxinni chjasin Sidón. Ntá kjuíjini ijnko isla it'in Chipre la nó tja kjonni kuítóhe tíha la imá chjéhe xríntq.

⁵ Ntá k'uatòyeni tí ntayaon chjinaxón chjasin Cilicia la ko Panfilia la ntá kjuíjini chjasin Mira estado Licia.

⁶ A ntá ntiha tí ch'ín capitán, tí ch'ín k'uetuñhen tí sín soldado a, mé k'uitja ch'án í jnko ntabárcq tsíkjiixin nó chjasin Alejandría sátsji nó nación Italia. Ntá ntáchro ch'án kíxin tíha sátsjikoni kíxin tsijjini ntiha.

⁷ Nchónhya yaon kjuíjixinni kíxin imá iyó la imá xra kjuíjini chjino chjasin Gnido. Ntá naxa chjéhe xríntq tsanka ntá k'uátsínkani chjinaxón Salmón ntá kuinkátjíaxinni chjino tí isla Creta.

⁸ Ntá xikahó imá xra k'uátsínkani chjinó chrínta ntá kjuíjini ijnko chjasin it'in Puertos Jína chjino chjasin Lasea.

⁹ Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárcō chrítaón ntayaon kixin ó kóchjina tí nchakuen kin. Méxra ch'ín Pablo nixjehe tí sín a.

¹⁰ Ntáchro ch'án kixin:

—Tinhínrá tí nkehe tsoxrjanka. T'íkuān kixin nchónhya kjuachrakon tsonhen. Sinchek'itjáyanni tí ntabárcō a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuènte tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárcō la ko tí nkehe chrónka tí ìnché tí ntabárcō a ntá tí nkehe ntáchro ch'ín Pablo la náhí.

¹² Jehya jína kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jína sátsjixínni ntiha kixin ákué xitjahya chrókjuijini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatsínkajia tí nchakuen kin.

Tí xrintō chjéhe chrítaón ntayaon

¹³ Ntá kjuankíxin chjehe xrintō kjuixin nó sur kjánchó kánhyó fuerte ntá kjuenkayáxin sín kixin kjá jína sátsjini.

Ntá sákjuixínni ntiha kjánchó kjónté naxa sákjuíni chjinaxón tí chrínta tí isla Creta a.

¹⁴ A ntá chr'éxin ikjui ijnko xrintō kjuixin noroeste k'uíntaté tí ntabárcō.

¹⁵ La kjuankíxin xrintō sákjuíko tí ntabárcō kixin tsjachahyani sátsjini tí sítjixin tí xrintō a. Ntá t'ichjánxin kuitōheni sákjuíko xrintō tí ntabárcō tjejóxenhenni.

¹⁶ Ntá k'uátsínkani chjino ijnko isla ntsí it'in Claudia kixin ntiha mé kánhyó tjian chjéhe xrintō. Ntá imá xra k'uitjáianni tí ntabárcō ntsí t'etenixín nóton ntabárcō jíé.

¹⁷ Ntá kjuixin kjuínchek'it'ótjen sín tí ntabárcō ntsí ntá imá chrakon sín ntá kjuínchenteto sín tí ntabárcō jíé kixin kohya nkehe tsonhen. Kjaxin tóxakonhen sín chrakon sín tsíkjine nchesen tí ntabárcō tí tsjiji sín tí it'in Sirte. Ntá kuakjinjin sín tí ka chóna ntabárcō ntá kuitōhe sín sátsjiko xrintō.

¹⁸ Ntá tí yaon chr'éxin ntá naxa imá tjian chjéhe xrintō. Ntá ik'ue sín tí nkehe sítjinká tí ntabárcō a chrínta ntayaon kixin kánhyó tsoye.

¹⁹ A ntá tí yaon níxin a mé itjani ó kuakitsjexínni tí nkehe kuènte tí ntabárcō.

²⁰ Isé k'uíkonhyani yaon la k'uíkonhyani konotsé kixin imá tjian chjéhe xrintō la ko kjaxin ó k'uitjáyenheni kaín tí tjenkayáxinni kixin naxa chrókuaáni.

21 Ntá ó k'uatsínka itsjé yaon kjónehyani ntá k'uínkatjen ch'ín Pablo nixjehe ch'án kaín tí sín tjejóxehen ntabárc̄o a ntáchro ch'án kixin:

—Chrókuítekáonrá tí nkehe xrjanka kixin chrókuítóheni tí estado Creta ntá chrók'uitjáyenhyani tí nkehe tjinká tí ntabárc̄o a.

22 A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárc̄o la ts'itjáyan.

23 Ntá tí tie a mé k'uikuān ijnko ángel tsíchr'án Dios tinkachónkia la ko t'ah̄a xra.

24 A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'et̄oan la kjaxin Dios la tsjinkĩtsa jaha la ko tí sín tjejókoa kixin ts'enhya sín.”

25 Méxra chróchrakonhyará jahará kixin tí Dios tinkachónkia la chaxín nchexiteyá tíha, éxí tsíntáchro tí ángel.

26 Kjónté ó jehí t'ichjánxin sátsjikoni xr̄intō ijnko nonte jnkosiné ntayaon —ichro ch'án.

27 Kjuixin k'uátsínka iyó semana ntá ijnko tie ntá kjujini ijnko ntayaon it'in Adria ntá sákjuíko tí ntabárc̄o ijnko lado la í jnko lado ti xr̄intō. Ntá chjino k'áxrótjen ntá tí sín tjiko ntabárc̄o mé ó kónohe sín kixin ó chjina kjuixraká sin ijnko nonte xámá.

28 Ntá kjuáchroa sín tí nkekjaín n̄inkaxín tí ntá mé chóna treinta y seis metro n̄inkaxín. Ntá sákjuíni kjínhya la ó xíkjachroa sín la veintisiete metro ó n̄inkaxín.

29 Imá chrakon sín kixin ts'itjat̄on tí ntabárc̄o it̄o ntá kjuinkajin sín noó chica gancho tí nóton tí ntabárc̄o a kixin ntahó tsochónhen tí ntabárc̄o hasta chrók'uinkaséyan.

30 Ntá tí sín tjiko ntabárc̄o kjuenkayáxin sín sáchrókjui sín ntá kjuankixin kjuinkajin sín tí ntabárc̄o ntsí chrítaón ntá éxí tjinkaon sín chrókjuinkajin sín tí gancho chóna tí kja ntabárc̄o.

31 A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsit̄oehya tí sín i ntihi nkaxenhen ntabárc̄o ntá xitjahya tsaará —ichro ch'án.

32 Ntá tí sín soldado a mé kóchr̄inj̄int'̄o sín tí hnō kuènte ntabárc̄o ntsí tsit̄ohe sín tsjiankí ntá.

33 Ntá chjina t'inkaséyan a ntá ch'ín Pablo nixjehe ch'án kaín tí sín siín ntiha ntáchro ch'an kixin chrókjóne sín ichrén nkehe. Ntáchro ch'án kixin:

—Ó k'uátsínka iyó semana k'uejóchrinhyará la ko kjóntehyará.

34 Tinhínrá t'ichjánxin chrókjónterá ichrén nkehe tí tjinkáonrá tsaará kixin ntihi la kohya nkexro ts'itjáyan la nijnko tí kax̄ih̄i chóna kjará ts'itjáyan.

³⁵ Ntá xikaha ichro ch'ín Pablo ntá kuákja ch'án ijnko niotja a la ntiha tí tjejó kaín sín ntá kjuanchia ch'án kjuasáyé Dios ntá kóchrít'ò ch'án ntá kjuankíxin kjóne ch'án.

³⁶ Ntá kóchéhe sín kaín sín kjuankíxin kjóne sín kjáxin.

³⁷ Kaínni tsik'ixenhenni ntabárc̄o mé iyó ciento setenta y seis chojni.

³⁸ Ntá kjuixin kjóne sín la kókjehe sín ntá ik'ue sín tí noa trigo a tjinká tí ntabárc̄o a chrínkí tí ntayaon a kíxin kánhyó tsoye tí ntabárc̄o a.

Tí ntabárc̄o kjuixin k'uániánkí ntá

³⁹ A ntá ó k'uínkaséyan, a ntá tí sín tjiko ntabárc̄o la kjuátsoanhya sín tí nonte ntá k'uíkon sín ijnko chrínta ntá. Ntáchro sín kíxin ákué tsjachahya sín sátsjiko sín tí ntabárc̄o ntiha.

⁴⁰ Ntá kóchrínjint'ò sín tí hno síchroéxin tí gancho kíxin ntahó tsitöhe chrínkí ntayaon. Ntá kjuínchentá sín tí nkehe tjikoxín sín tí ntabárc̄o a. Ntá kjuínchek'ít'ótjen sín tí ka tjiko nkayakon tí ntabárc̄o. A ntá tí ntabárc̄o kjuankíxin sákjuí chrínta ntá.

⁴¹ Xrínahya kjuíji ntabárc̄o tí iyó kójnkojiéxin ntayaon ntá ntiha kjuíkjiat'ó tí kja tí ntabárc̄o tí nchesen síin ntiha. Ntá í xitjahya nchekinkí ninkehó, a ntá nóton tí ntabárc̄o kjuankíxin síxíka kíxin imá sítji chjéhe ntá a.

⁴² Ntá tí sín soldado a mé tjinkaon sín chrók'óyán sín tí sín tjejóchjina kíxin tjinkakonhya sín kíxin ninkexró sáchrókjuí ókjé.

⁴³ A ntá tí ch'ín t'etueñhen tí sín soldado a mé tjinkakonhya ch'án kíxin its'en ch'ín Pablo ntá kjuanjonhya ch'án kjuachaxin. Íchá k'ueñoan ch'án kíxin tí sín jína tjitaón ntá la senó sátsji sín kíxin tsjiji nonte xámá

⁴⁴ la ko tí sín noehya tsjitaón ntá a mé sátsjiko sín ti ntatabla o it'ò tí ntabárc̄o. Ntá xikaha kaín ni kjuíjini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kíxin tí isla la mé nchek'in sín Malta.

² A ntá tí sín chjasin ntiha mé imá jína kjuínkítsa sín kaín ni la kjuaka sín ijnko xrohi jíé kíxin imá kin kíxin sít'aniá chrin. Ntá k'uèya sín kíxin tsochjinani kaín ni tsochjixroheni.

³ A ntá ch'ín Pablo mé sákjuíakja ch'án í so njo tsixámá ntá kjuasinkáte ch'án tí xrohi a. Ntá xrínahya k'uaxrjenkíxin ijnko konche tí xrohi a kíxin imá sóa ntá xrínahya k'uísímá itja ch'ín Pablo.

4 Ntá tí sín chjasin ntiha mé k'uúikon sín tí konche kjtjñkítjen itja ch'án ntá ikjo sín kíchó sín. Ntáchro sín kixin:

—Kjá tí ch'ín a la ijnko chojni tsíkjàya a kixin kjónté kuaá ch'án k'uénxinhya ch'án ntayaon la Dios la í tjinkakonhya kixin naxa tsjak'echón ch'án.

5 A ntá jehe ch'án kótsjénka ch'án itja ch'án chrítaón tí xrohi kixin ntiha ts'anótjen tí konche, ntá jehe ch'an la kohya nkehe kónhen ch'án.

6 Ntá kaín sín tjejóchónhen sín kixin ách'e ts'atjoyé itja ch'án o ách'e its'en ch'án. Ntá kjuixin k'uéjóchónhen sín isé la k'uúikon sín kixin kohya nkehe kónhen ch'án ntá kjuitóxin sín tí nkehe kjuenkayáxin sín la ntáchro sín kixin jehe ch'án mé ijnko dios tíha, ichro sín.

7 Ntá chjino tí k'uéjóni a mé itjen nontee ijnko ch'ín t'etoan kuente isla me it'in Publio. Mé jína kjuanjon ch'án kjuachaxin k'uejóni ntøe ch'án la kjuanjon ch'an nkehe kjóneni iní yaon.

8 Ntá it'é tí ch'ín Publio a mé tjetsínka ch'án kixin níhi ch'án chóna ch'án sóa la ko chinjní. Ntá ch'ín Pablo sákjuítsjehe ch'án la kjuixin nixjehe ch'án Dios, ntá kjuák'etja itja ch'án tí ch'ín a ntá kuítóhe ch'án jína.

9 Mé xíkaha kjaxin kóchjina í so tí sín níhi síin tí isla ntá kaín sín kuítóhe sín jína.

10 Na ntá imá kjuikosáyehe sín ch'án. A ntá chr'éxin tió kjuixin k'uúixenhenni ntabárco inaá ntá kjuanjon sín kaín nkehe t'ichjánxinhinni sátsjikoni.

Kjuíji ch'ín Pablo chjasin Roma

11 Ntá k'uátsínka iní nitjó tjejóni tí isla ntá k'uúixenhenni ijnko ntabárco mé ntahó tsíkitohe k'uátsinkajia tí nchakuen kin. Tí ntabárco a mé tsíkjixin chjasin Alejandría la ko mé chóna nkehe tsíkjanøya chóna ihníé dios Cástor la ko Pólux.

12 Ntá sákjuíni ntá kjuíjini puerto chjasin Siracusa la ntaha kuítóheni iní yaon.

13 Ntá xík'ixenhenni tí ntabárco la k'uatsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjéhe xrinto kjuixin nó sur, ntá yaon yóxin ntá kjuíjini chjasin Puteoli.

14 Ntá ntiha xetani iso kíchó ni, a ntá tjinkaon sín ts'ejókoni sín ntiha. Ntá k'uéjókoni sín ijnko semana ntá chr'éxin sákjuíni chjasin Roma.

15 Ntá tí sín kíchó ni chjasin Roma la ó nohe sín kixin tsjijini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uúikon tí jehe sín a kjuanchia ch'án kjuasáya Dios la imá kóchéhe ch'án.

16 Ntá tió kjuji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuítóhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

17 Ntá k'uátsínka iní yaon ntá tí ch'ín Pablo a mé k'uíyehé ch'án kaín tí sín judío tjeotan kuènte chjasin Roma. Ntá tió kjuixin kójnkotsé kaín sín ntá ntáchro ch'án kixin:

—Kíchóni, kohya ninkehó jie kjuásian kixin chrókónínkakonna tí sín judío la jehya kixin ninkakonxian tí nkehe k'uékinkáchónki tí sín tsík'axrjeníxinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a.

18 Ntá k'uitjahya sín ninkehó jie chonta. Ntá tjinkaon sín chrók'uatjántana sín kixin k'uitjahya sín ninkehó jie chrók'uénxian.

19 A ntá tí sín judío a mé imá kónínkaon sín tjanchia sín jie. Ntá t'ichjánxin tsjanchiani kixin tí ch'ín César mé chrókjuinchekitoxín ch'án nkehe tí jie chóntani, kjónté chóntahyani ninkehó jie ts'eka tí sín tí nacióon kuénténi.

20 Méxra k'uíyahará kixin tjinkaonni ts'íkuon tí jahará la ko tsonixjaharáni kixin tinkáchónkini tí nkexro tjejóchónhen kaín tí sín israelita mé xikaha t'íkonrá kixin tjechrontetoxíni cadena ntihi.

21 Ntá ntáchro sín kixin:

—K'uáyèhyani ninkehó xroon chrókjuixin Judea kuènte tí jaha la ko kuihya nijnko tí sín kíchó ní judío chróntáchro sín ichrén nkehe jínahya tsík'ich'e.

22 Tjinkaonni chrókuinhinni nkexrí tjenkayáxian kixin ó noheni kixin itsjé chjasin t'ántaxínhin sín tí nkehe nixin tjákua —mé xikaha ichro sín.

23 Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuènte Dios. Nixjehé ch'án sín kixin chrókuitekaon sín tí nkehe kjuako ch'ín Jesús, la chrónkaxín ch'án kixin nkexrí nixja tí ley kuènte ch'ín Moisés la ko tí tsíkjin tí sín profeta ósé.

24 Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekakonhya sín.

25 Ntá jnkokoáhya kjuenkayáxin tí jehe sín la iso sín tjinkaon sín kixin sáchrókjui sín, ntá ch'ín Pablo mé ntáchro ch'án kixin:

—Ntoá nixja tí nkehe chénka Nchakuen Dios tí sín tsík'axrjeníxinni ósé chrónkaxín ch'ín profeta Isaías ntáchro kixin:

26 Sátjia nixjehé tí chojni a

kixin jehe sín kjónté tjejótinhin sín la tienxínhya sín,

la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha
la ntatsjon sín la tsík'ikjehe

la ikon sín la tsíchr'áto

kíxin t'ikonxínhya sín

kíxin tinhín sín la tjinkakonhya sín chrókuienxín sín,

la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan

kíxin ntá janhan chrókjuintakitohá sín jína.*

Mé xíkaha tsíkjin ch'ín Isaías.

²⁸ Méxra chrókónohará jahará kíxin ijie tí sín jehya judío me
ts'áyéhe sín tí nkehe tsjanjon Dios tsaáxin sín kíxin jehe sín mé
tsinhin sín.

²⁹ Ntá xíkaha ichro ch'ín Pablo ntá tí sín judío sákjuí sín la
tinkákjo sín kíchó sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó
nánó. La kjuanjon ch'án kjuachaxin k'uéjéjé tí sín kjuíjitsjehe
ch'án.

³¹ La kjuako ch'án tí kjuachaxin kuènte Dios la ko
kjuako ch'án kuènte Ìnchéni Jesucristo. La kohya ninkexró
k'uínkákonhen tió kjuako ch'án. Ó tjen.

* 28:27 28.26-27 Isaías 6.9-10

Tí xroon ikjin ch'ín Pablo chr'énnen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'ahá xrá Jesucristo mé kjian tí xroon i. Kjueyána Dios kixin sít'ahá ch'án xrá tsjàkua tí tan jína tsaáxinni.

² Tíha mé tsintáchro Dios senó kixin tsoxiteyá éxí nixja tí xroon nixjaxin tí sín tsíchronka itén ch'án ósé.

³ Tí tan a mé chrónka nkexrí tjen Ìnchéni Jesucristo Xjeen Dios. Jehe ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David.

⁴ Tí kjuachaxin jié mé kjuakoxin kixin jehe ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tjetooan.

⁵ Kjuasáyé Jesucristo k'uáyéheni kjuachaxin kixin sich'eheni ch'án xrá sátsjichronkaxinni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrótjuèhe sín ch'án.

⁶ Jahará k'uék'ejorá éxí tjejó tí jehe sín, a ntá jie la kjueyará Dios kixin chrókuitekáonrá Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuàhará Dios la kjueyará ch'án kixin tjóá chrók'uejórá. Kjuasáyé It'éni Dios la ko Ìnchéni Jesucristo kixin kjuanjon ch'án kjuaxróxin k'uayéherá.

Ch'ín Pablo tjínkaon chrókjuitsjehe ch'án chjasin Roma

⁸ Xrankíxixín kjuachaxién Jesucristo tjánchàxian Dios kjuasáya kixin jahará ó kuitekáonrá ch'án la ko nkuíxín chjasintajni nixja sín nkexrí tinkachónkirá ch'án.

⁹ Dios, tí nkexro t'ahá xrá kaín asenná xrjanka tí tan jína kuènte Xjeen ch'án, mé nohe ch'án kixin xráxín xráxinkavan tí jahará tió nixjahá ch'án.

¹⁰ Xráxín tjáncháha Dios kixin tí chrókjuanjon ch'án kjuachaxin la chrókjuasántsahará.

¹¹ Kixin tjínkavan chrókjuasántsahará tí jahará kixin chrókuínkítsa tí jahará kixin chrók'uitjará jína nkexrí chrók'uejórá ntoá.

¹² Me xíkaha tsocháhará la ko tsochána kixin jnkokoá tinkáchónkini Ìnchéni, jahará la ko janhan.

¹³ Kíchóni, tjínkavan chrókónohará kixin nchónhya veces tjínkavan chrókjuásantsahará kjánchó naxá xitjahya tsjasán. Tjínkavan chrókjuasán kixin chrókjuít'a xrá kuènte Ìnchéni

kíxin chrókjuachani nchónhya chojni chrókuinkáchónki Dios éxí kjuít'a xṛá í so chjasin naxá chónhya sín Dios.

¹⁴ T'ichjánxin tsjákoḥa kaín chojni, á chojni griego o á chojni jehya griego o á chojni nohe o á chojni noehya.

¹⁵ Mé xíkaha xṛá ó t'échõnḥan chrókjuasán chrókjuákoḥará tí tan tsaáxinrá tí jahará tjejorá chjasin Roma.

Tí kjuachaxin kuènte tí tan jína

¹⁶ Tósuánahya xṛjanka tí evangelio kíxin táha ijnko tan jína kíxin chóna kjuachaxin kuènte Dios chrókuaáxin kaín xín tí chojni chrókuitekaon, mé saoxín tí sín judío la ko kjaxin tí sín jehya judío.

¹⁷ Kíxin tí tan jína kuènte Dios tjakuexin tí jeheni kíxin chrókótjuáxin ijieni kíxin tinkáchónkini ch'án la jehó ch'án tinkáchónkini. Exí ntáchro xroon itén Dios kíxin: "Tí nkexro kótjóá kíxin kuítekaon sín Dios mé táhó ts'ejóchónxin sín."*

Tí jie tjasin chojni

¹⁸ Dios tjen nkaya nkajní mé tsonínkakõnen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'ínkákõnḥen kíxin chrókónohe sín tí nkehe jína chaxín.

¹⁹ Jehé sín ó nohe sín jína nkexrí tjen Dios kíxin jehe ch'án kjuakuexin ch'án tí jehe sín.

²⁰ Tí kjuachaxin kuènte Dios kjónté t'ikonhyani la kjánchó noexínni kíxin tí nkehe kjuích'éna ch'án. Kíxin tí naxá k'ónahya chjasintajni kónoxín kíxin jehó ch'án mé Dios t'etõan la ko chóna ch'án kjuachaxin jnkochrín. La ntá tí sín jínahya xitjahya tsontáchro sín kíxin k'uénoehya sín.

²¹ Kjónté nohe sín kíxin xíkaha itjen Dios la tjikosáyehya sín ch'án la ko ni tjankehya sín ch'án kjuasáya. Tjenkayáxin sín tí nkehe ninkehó sínkíhya kíxin jínahya asén sín la tí sítie ó kuítóhe sín.

²² Kjónté ntáchro sín kíxin imá nohe sín kjánchó imá lõnti sín kíxin antsí kjuasin sín jie.

²³ A ntá ó kjuixin kjuinkí sín tí nkehe tinkáchónki sín la ko kuítekakõnhya sín tí kjuachaxién Dios itjen jnkochrín, t'enhya. A ntá ijie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko iko chóna noó tóté.

²⁴ A ntá xíkaha Dios kuítóhe ch'án tí jehe sín kíxin chrókjuich'e sín tí nkehe jínahya tjenkayáxin sín ntá xíkaha ch'e sín ijnko nkehe chrókósuèxin sín ch'ehe kíchó sín

²⁵ kíxin kuítekakõnhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuích'éna sín dios kuènte sín tí nkehe tsíkjih'éna Dios. A ntá tí nkexro kjuích'éna tí nkehe

* 1:17 Habacuc 2.4

la titekakonhya sín. Jehe ch'án mé chrókjuancheheni ch'án kjuasáya jnkochrínín kixin jehe ch'án mé kaín tí nkehe síin mé kuènte ch'án. Amén.

²⁶ La ntá xikaha kjuích'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuèxin sín chrókjuich'e sín. Kjónté tí chojni chjin la kuítóhe sín tí ichjin sín la ntá kjuích'éna sín asén sín chojni ntoa.

²⁷ A ntá kjaxin xikaha tí chojni ntoa kuítóhe sín chróchónta sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'ehe kíchó sín jnkokón ntoa sín. Mé xikaha mé tí cuerpo kuènte sín mé tsjasótexín sín tí jie kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítóhe ch'án tí jehe sín kixin xikaha tsjenkayáxin sín tí nkehe jínahya kixin sích'e sín tí nkehe chrókjuich'ehya sín.

²⁹ Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchónta sín itsjé nkehe, la ko imá tjasin sín jie, la ko jehe sín chjinóxínhin sín, la ko tjinkaon sín chrók'óyán sín kíchó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia.

³⁰ T'ántaxínhin sín kíchó sín la ko nínkakonhen sín Dios, la ko jehó sín chrók'uetóan sín, la ko nchehnke sín, la ko jehó sín ch'éna sín nkehe jínahya tjasixín chojni jie, la ko tjikosáyehya sín it'é sín la ko ìné sín.

³¹ Tienxínhya sín la nchexiteyáhya sín nkehe nixja sín, la ko tjuèhya sín kíchó sín, la ko tjinkakonhya sín sinchek'itjáyenhen sín ichrén jie kjuasinhin kíchó sín, la ko tikonóehya kíchó sín.

³² Jehe sín ó nohe sín jína kixin nkexrí k'uetóan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naxá tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitoexín ch'án tí jie tjasin chojni

¹ Mé xikaha jahará xitjahya tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xrítjéyará nkexrí chrókjuasótexínrá kjaxin kixin jahará jnkokón jie tjásinrá.

² Ó noheni kixin ntoá sinchekitoexín Dios tí jie kjuasin chojni kixin sinchekjasóte ch'án tí sín xikaha tjasin jie.

³ A ntá jahará la tékará jie í so chojni ntá jahará kjaxin la xikaha jnkokón jie tjásinrá. ¿Á tjenkayáxinrá kixin tsjachará tsinkehéra tí sinchekjasótiará Dios ní?

4 ¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naxa nínkakuanhyará ch'án? A ntá jahará la kuiénxinhyará kixin Dios tjuàhará kixin tjinkaon ch'án chrókujtóhérá tí nkehe jínahya tjenkayáxinrá.

5 Kjánchó jahará imá icha asánrá, tjinkákonhyará chrókujtóhérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótexínrá tí yaon tsjixixín tió tsonoxín kixin sinchekjasóte Dios chojni.

6 Jehé ch'án mé tsjenkehe ch'án jnkojnko chojni nkehe tí xra tsíkjich'e sín.

7 Tsjanjon ch'án kjuachón ts'áyéhe tí sín tjejá sín tí nkehe náxrjón la ko tí kjuachaxin ts'itjáyanhya la ko xráxín kjuích'e xra jína.

8 A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókujich'e sín tí nkehe jína. A ntá náhí, la ichá má kóxrjínhín sín kjuích'e sín tí nkehe jínahya.

9 Mé xíkaha tsjasóte sín la ko kjuaxróxinhya tsonhen kaín tí sín kjuích'e tí nkehe jínahya, mé senó tí sín judío la ko kjaxin tí sín jehya judío.

10 A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuích'e tí nkehe jína, mé senó tí sín judío la ko kjaxin tí sín jehya judío.

11 Dios la t'ikon kixin kaín chojni la jnkokón sínkí.

12 Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótexín sín.

13 Jehya tí sín ó chrókuinhón tí ley la ó chrókótjuáxin ijíé sín. Náhí. Tí sín sinchexiteyéhe sín tí nkehe k'uetóan Dios mé tsótuáxin ijíé sín.

14 A ntá tí sín jehya judío chóntahya sín tí ley t'etuñhen sín la ntá tió jehó sín chrókuinchexiteyéhe sín éxí nixja tí ley la jehí jehó sín t'etuñhen asén sín.

15 Kixin tí kjuínchexiteyá sín ch'e sín tí nkehe jína mé tjakoxin sín kixin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhí.

16 Itsi tí yaon la Dios mé sinchekitóexín kjuachaxin Ìnchéni Jesucristo kaín nkehe imó kjuích'e chojni éxí nixja tí tan jína tjákua janhan.

Tí sín judío la ko tí ley tsíkjin ch'ín Moisés

17 **A** ntá jahará ntáchrórá kixin jahará judíorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios.

18 Ó nohará tí nkehe tjinkaon Dios la ko tí ley ó kjuakohará kixin chrókjuéyará tí nkehe jína.

19 Ihnkerá kixin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sítié, ichrorá.

20 Ntáchrórá kixin nohará tsjákohérá tí sín noehya la ko tsjínkítsará tí sín tienxínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá.

21 Jahará tjákohérá í so chojni, **a** ntá jahará, ¿nkekuènté tjákoéhyará asánrá xikaha? Jahará tjákohérá chojni kixin chrókueéhya sín, **a** ntá jahará la, ¿nkekuènté teerá?

22 Ntáchrórá kixin xitjahya tsochónta chojni yaá chojni chjin, **a** ntá jahará la, ¿nkekuènté xikaha ch'erá? Ntáchrórá kixin titekákonhyará tí nkehe tsíkjanoya, kjánchó jahará, ¿nkekuènté teerá tí nkehe tjete síin nkaxenhen nínko?

23 Nchehnkerá kixin chontará tí ley, **a** ntá jahará chontahyará kjuasáyé Dios kixin kjuinchexiteyéhyará éxi k'ueṭoan tí ley.

24 Ntoá ntáchro tí xroon itén Dios kixin: “Tí sín jehya judío la t'ántaxínhin sín Dios kixin tí ijiará.”

25 **A** ntá tí chaxín kjuinchexiteyará tí ley tsíkjin ch'ín Moisés la ntá jehya chónkó tsíkará xroye. **A** ntá tí kjuinchexiteyéhyará tí ley la éxi tsíkahyará ninkehó xroye.

26 **A** ntá tí sín tsíkahya xroye kjánchó titekaon sín nkexrí t'ṭoan tí ley la tjejó sín éxi ó tsíka sín xroye kjónté chaxínhya chónnta sín.

27 **A** ntá tí nkexro kuáhya xroye tí cuerpo chónnta kjánchó nchexiteyéhe tí ley, mé jehe sín tsjanchia sín jje tí jahará kixin jahará kuítekákonhyará kjónté chontará tí xroon nixja tí ley la ko kjónté ó tsíkará xroye.

28 **A** ntá tí xikaha la chaxínhya judío jahará kixin ó ntója ó chontará xroye la chaxínhya tsíkará xroye kixin chrítaón cuéporá ó, chontará.

29 **A** ntá tí chojni chaxín judío la t'ichjánxin chróchónta sín xroye nkaya asén sín. Jehya tí ley chrók'ueṭoan xikaha chrókonhen. Náhi. Táha la Nchakuen Dios. Jehya kixin chojni chrókóxrjínhin kixin ó nchoxon. Náhi. Dios mé tsoxrjínhin kixin nchoxon tíha.

3

1 ¿**A** ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye?

2 Chaxín xikaha jína kixin Dios kjuanjon tí itén ch'án saoxín k'uáyéhe tí sín judío kixin chrókjuinchexiteyá sín.

³ **A** ntá ¿nkehe tsonhen tí jnkojín tí jehe sín chrókjuinchexiteyáhya sín? Kjónté xíkaha chrókjuich'e sín la, ¿á chrókuítóhe Dios chrókjuinchexiteyáhya ch'án tí nkehe tsíntáchro ch'an?

⁴ Kjá náhí. Dios la sinchexiteyá kaín nkehe tsíntáchro ch'án kjónté kaín chojni chrókjuich'ia. Ntáchro xroon itén Dios kixin: Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jje.*

⁵ Tí jje chóntani mé tjáqoxin kixin Dios mé nohe nkexrí sinchekitoxén ch'án ijje chojni. ¿A ntá nkehe chróchroni? ¿Á ntoáhya chrókjuich'e Dios kixin chrókjuinchekjasóteni ní? (A ntá janhan nixja éxí nixja chojni ó.)

⁶ Kjá náhí. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitoxén ch'án ijje chojni chjasintajni?

⁷ A ntá tí chrókjuínkítsa tí kjuach'ia kuéntana kixin chrókónoaxínrá tí nkehe chaxín kuente Dios, ¿a ntá nkekuénté ts'ékaráni jje kixin janhan mé ijnko chojni chóna jje?

⁸ Tí xíkaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xíkaha ichro iso chojni t'ekani jje kixin xíkaha tjakoni, ichro sín. Tí sín a chrókjuasóte sín kixin xíkaha ichro sín.

Kaínni chóntani jje

⁹ ¿Ntá nkexrí? Jeheni judíoni la, ¿á antsí má tjetoanni, a ntá tí sín í so la, á náhí? Kjá náhí. Kixin kaín ni chojni judíoni la ko tí sín jehya judío mé kaín ni kjuínchexiteyéheni tí jje kjuasinni.

¹⁰ Ntáchro tí xroon itén Dios kixin:
Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,
Kohya ninkexró chrókjueyá Dios.

¹² Kaín chojni k'uék'aji sín tí ntja jínahya la ko kaín chojni jnkokón k'uáji sín ntoáhya,
kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxí tòye tsíxrankehe tsíxravá chojni kixin tí nejen chojni ch'iyaxín.

La tí veneno kuente konche chóna ir'va chojni.‡

¹⁴ Tí ir'va chojni tsíkaón nkehe jínahya la ko kjuanínkaon.§

¹⁵ Xritinká sín kixin tjinkaon sín chrók'óyán sín chojni.

¹⁶ Tí ntja k'uáji sín tió xíkaha kjuich'e sín mé kjuínchek'itjáyán sín kaín kjuaxróxin k'uéchóna ókjé chojni.

¹⁷ Chónhya sín tí ntja tjanjon kjuaxróxin*

* 3:4 Salmo 51.4 † 3:12 3.10-12 Salmo 14.1-3, Salmo 53.1-3 ‡ 3:13 Salmi 5.9, 140.3 § 3:14 Salmo 10.7 * 3:17 Isaías 59.7-8

18 kixin kjuenkayáxinhya sín chróchrakõnhen sín Dios.†
 Mé xikaha ntáχρο itén Dios.

19 Ó noheni kixin kaín tí nkehe nixja tí xroon chõnta tí ley mé k'uetuēhen kaín tí sín tinkáchónki tí ley kixin ntá kaín chojni chjasintajni chrótání sín kixin kaín chojni tsjasóte kixin Dios mé sinchekitoexín ijíé kaín chojni.

20 Kixin ninkexró chrókjuacha chrókótjuáxin ijíé sín kixin chrókjuinchexiteyéhe sín tí nkehe t'etõan tí ley. Tí ley la jehó ch'e xra tsonoexínni kixin chõntani jíe.

Tsaáxinni kixin tinkáchónkini Cristo

21 A ntá jehya tí ley chrókuaáxinni. La ntá ó kónoxín nkexrí Dios tsaáxinní la kjaxin tí xroon chõnta ley la ko tí nkehe nixja tí sín profeta la ó nixja xikaha.

22 Tsotjuáxin ijíéni kixin titekaonni Jesucristo kixin kaín chojni chrókuaáxin tí tsitekaon sín tí jehe ch'án kixin t'ikon ch'án kixin jnkokón tsjehe kaín chojni.

23 Kixin kaín xín chojni kjuasin jíe la k'uáyèhya sín tí kjuachaxin chrókuaáxin sín.

24 A ntá kjuasáyé Dios kixin k'uenyákonhenni Cristo Jesús la kótjuáxin ijíéni.

25 Dios mé ichr'án ch'án Cristo, kuámá ijíéni, k'uenyákonhenni ch'án kixin chrókuinkáchónkini ch'án ntá chrókuaáxinni. Mé xikaha kjuích'e Dios kixin kjuakoxin ch'án kixin ntoá kjuenkayáxin ch'án kixin kónínkakonhya ch'án kjónté nchónhya jíe tsíkjasinni senó.

26 Xikaha kónhen kjuakoxin Dios kixin jína ch'án ijie la naxa tjechónhen ch'án sinchetjóá ch'án ijíé tí sín kuítekaon Jesús.

27 A ntá ¿nkekuénté chrókjuinchehnkeni? Xitjahya sinchehnke chojni nkayakon Dios kixin jehya kixin kjuínchexiteyéheni tí nkehe k'uetõan tí ley ntá chrókuaáxinni. Náhí. Kixin Inchéni kuítekaonni ntá kuaáni.

28 Mé xikaha ó noheni kixin tsotjuáxin ijíéni tí tsitekaonni Dios kixin Dios tahya cuenta á kjuínchexiteyéheni tí nkehe k'uetõan tí ley.

29 ¿Xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío.

30 Kixin kohya í jnko Dios la jehe ch'án sinchetjóá ch'án ijíéni kixin tinkáchónkini ch'an la tahya ch'an cuenta á chõntani xroye o náhí.

31 A ntá tí tinkáchónkini Inchéni, la ¿á í chrókjuinchexiteyáhyani tí ley? Kjá náhí. Íchá antsí má jína chrókjuinchexiteyéheni tí ley.

† 3:18 Salmo 36.1

4

Tí kjuakoxin ch'ín Abraham

1 ¿Nkehe tsixroni kixin nkehe k'uitja ch'ín Abraham, tí nkexro k'uaxrjeníxinni ósé?

2 Ntá ch'ín Abraham tí chrókótjuáxin ijíé ch'án kixin tí xra kjuích'e ch'án ntá chrókóhnke ch'án, kjónté jehya nkayakon Dios.

3 **A** ntá ntáchro xroon itén Dios kixin: “Ch'ín Abraham kuítekaon Dios ntá táhó kuaáxin ch'án la ko kótjuáxin ijíé ch'án.”*

4 Jnkójín chojni kjuích'e xra la jehya k'uáyéhekoá ch'án tí chichaon. Náhí. Táha la tí xra kjuích'e ch'án mé kjuacha ch'án.

5 **A** ntá kjónté jnkójín chojni kjuích'ehya ninkehó xra ntá chrókuítekaon ch'án Dios a ntá Dios la sinchetjóá ch'án kjónté tí nkexro chóna jie, kixin tí kuítekaon ch'án Dios la táhó mé kuaáxin ch'án.

6 Mé kjaxin tsintáchro ch'ín David kixin náxrjón tí nkexro kótjóá kixin Dios kuáhya kuentá nkerí jie tsíkjasin ch'án.

7 Ntáchro ch'ín David kixin: Náxrjón tjejó tí nkexro kjuíncheyaon Dios kjónté jínahya kjuích'e sín la kjuakjín ch'án ijíé sín.

8 Náxrjón tjejó tí nkexro kixin Ìnchéni kuáhya ch'án kuentá tí jie k'uéchóna sín.†

9 ¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chóntahya xroye? Ó chrónkani kixin Dios la kuikonóehé tí ch'ín Abraham kixin kuítekaon tí jehe ch'án la táhó mé kótjuáxin ijíé ch'án.‡

10 ¿**A** ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naxa náhí? Kjá naxa náhí. Senó tsíkjincheyaon Dios tí jehe ch'án.

11 Ntá chr'éxin ch'ín Abraham ikuá ch'án tí xroye éxí ijnko sello kjuakoxin Dios kixin ó kótjuáxin ch'án kixin kuinkáchónki ch'án Dios. Kixin ntá xíkaha ts'óna ch'ín Abraham xjeen kaín chojni tinkáchónki Dios, kjónté chojni tsíkahya xroye. Ntá kjaxin jehe sín la Dios sinchetjóá ijíé sín.

12 La ko jehe ch'ín Abraham mé ts'axrjeníxin ch'án kaín tí sín tsíka xroye kixin ntá chrókuinkáchónki sín éxí kuinkáchónki tí jehe ch'án kjónté naxa tsíkahya ch'án xroye.

Tí nkehe tsintáchro Dios la tsoxiteyá kixin tinkáchónki sín tí jehe ch'án

13 Dios tsintáche ch'ín Abraham kixin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. **A** ntá tí nkehe ts'áyéhe ch'ín Abraham la jehya kixin kuítekaon ch'án tí

* 4:3 Génesis 15.6 † 4:8 4.7-8 Salmo 32.1-2 ‡ 4:9 Génesis 15.6

ley. Náhi. Ts'áyéhe ch'án tíha kíxin kuítekaon ch'án Dios la ntá Dios mé kjuínchetjóá ijíé ch'án.

14 A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xíkaha la ko tí nkehe tsintáchro Dios la kjá ninkehó sinkíhya tí xíkaha.

15 Kíxin tí ley la tjikao kíxin tsjasótexín chojni, a ntá tí chrókókohya ley la chrókókohya nkehe chrókjuanchia jje.

16 Méxra tí nkehe tsintáchro Dios la kjuasáyé ch'án tsjanjon ch'án kíxin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhi. Kjaxin tí sín tsitekaon éxí kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni.

17 Éxí nixja xroon itén Dios kíxin: “Janhan kjuánjuan kjuachaxin kíxin jaha ts'óna it'é nchónhya chojni chjasintajni.”§ Mé xíkaha tjetsjehe Dios kíxin jína kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etqan ch'án kíxin ts'óna tí nkehe naxa kohya.

18 Kjónté k'uéchóntahya ch'ín Abraham xjeen ch'án la kuítekaon ch'án la chónhen ch'án kíxin ts'óna ch'án it'é nchónhya chojni éxí tsichronka Dios kíxin xíkaha nchónhya chojni ts'axrjeníxin ch'án.

19 Ch'ín Abraham k'uéchónta ch'án chjina ijnko ciento nánó la kjánchó k'uitjáyenyha ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kíxin naxa chróchónta sín xjeen sín.

20 Ch'ín Abraham la kóxakuenhya ch'án la ko chrakonhya ch'án kíxin tí nkehe tsjanjon Dios. Náhi. Íchá antsí má kuinkáchónki ch'án Dios la ko kjuanchehe ch'án kjuasáyé Dios.

21 Ó nohe ch'ín Abraham kíxin Dios chóna kjuachaxin sinchexiteyá kaín nkehe tsintáchro ch'án.

22 Dios k'uíkon kíxin jehe ch'ín Abraham kuítekaon ch'án ntá Dios kjuínchetjóá ijíé ch'án.

23 La jehya kíxin tsík'óna tí xroon kíxin tí ch'ín Abraham ó.

24 Náhi. Tsíkjin sín xroon kíxin kjaxin jeheni chrókótjuáxin ijíéni kíxin tsitekaonni Dios. Tíhi mé tí nkexro kjuínchexechón Ìnchéni Jesucristo.

25 Jehe ch'án mé k'uenyákonhenni ch'án kíxin tí jje chóntani. Ntá xechón ch'án inaá kíxin tsotjuáxin ijíéni kíxin ó kuítekaonni tí jehe ch'án.

5

Kótjuáxin tí jię chóntani

1 Kótjuáxin tí jię chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo.

2 Kjuasáyé Cristo kixin jína tsochjineheni Dios kixin tinkáchónkini ch'án ntá ts'áyéheni kjuachaxin kuènte ch'án. Ntá tí kjuachaxin la jína tsjinkítsa kixin jína ts'ejóni la ko tsochéheni ts'ejóchónhenni kixin ntá tsjintaxín ts'áyéheni tí kjuachaxin jié kuènte Dios.

3 Kjaxin jehya táhó. Náhí. Kjaxin tsochéheni kjónté nchónhya nkehe tsohneni kixin ó noheni kixin xíkaha tsohneni kixin ntá ts'itjani tsoínkakonhyani.

4 A ntá tí xíkaha jína chrók'uejóni ntá tsjachani kixin jína ts'ejóchónhenni.

5 A ntá tí tjejóchónhenni la tósuèhyani kixin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

6 Tí jehóni xitjahya chrókuaáni. A ntá tió ikui Cristo la k'uenyákonhenni ch'án kixin tí jię chóntani.

7 Kjá ninkexró chróntáchro chrók'uenyákonhen sín í jnko chojni kjónté ijnko chojni imá jína tjuèhe kichó. Kohya nkexro xíkaha chrókjuich'e.

8 A ntá Dios mé kjuakoxin kixin imá tjuèheni ch'án kixin kjónté naxa chóntani jię la Cristo k'úenyákonhenni.

9 A ntá Dios mé kjuínchetjuáxin ch'án ijiéni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótexínni.

10 Kjónté naxa k'uénínkakonhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án.

11 La jehya chrókótíhó. Kjaxin tsochéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxínni kjuaxróxin tí tjen Dios.

Adán la ko Cristo

12 Mé xíkaha ó jnko nkexro kjuasin jię ntá k'uíxin jię kuenté chjasintajni. Mé xíkaha kjuankíxin k'uén chojni ntá kaín chojni kjuankíxin k'uén kixin kaín sín kjuasin sín jię.

13 Kixin ósé la k'uékohya ley ntá ó xráxín k'uíxin jię chjasintajni kjánchó naxa kohya ley chrókjuanchia jię chrókjuasótexín sín.

14 Desde kjuák'e ch'ín Adán hasta kjuák'e ch'ín Moisés la k'uéchónta kjuachaxin tí kjuach'én kixin tí jię kjuasin sín mé k'uénxín sín. Kjánchó tí jię kjuasin sín la yóghya tí nkehe

kjuích'e ch'ín Adán, kuítekakonhya ch'án tí nkehe k'uetqan Dios. Ntá ch'ín Adán yóhē tsotsjehe éxí tí nkexro tsi chr'éxín.

¹⁵ Ntá tí jiē kjuasin ch'ín Adán la xitjahya chrókóyóhē tí nkehe tsjanjon Dios kixin tí jiē kjuasin jnkokoá chojni la ntá nchónhya chojni k'uenxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jína tíha kixin tsaáxin nchónhya chojni.

¹⁶ A ntá tí jiē kjuasin jnkokoá chojni la tóyóghya tí nkehe tsjanjon Dios tsaáxinni. Kixin tí jiē kjuankíxín kjuasótexín chojni kixin kjuasin jnkokoá chojni jiē. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jiē chóntani kjónté nchónhya jiē kjuasin chojni.

¹⁷ Tí kjuach'én la k'uéchónta kjuachaxin kixin tí jiē kjuankíxixín kjuasin jnkokoá chojni. A ntá kjuasáyé Dios kjuínchetjóá ch'án tí jiē chóntani la ntá antsí tsochóntani kjuachaxin ts'ejóni jína kixin k'uenyákonhenni jnkokoá nkexro, mé Cristo tíha.

¹⁸ A ntá tí jiē kjuasin ch'ín Adán la ntá kaín chojni kjuasin sín jiē chrokjuasótexín sín. A ntá ijie la Cristo mé kótjuáxin ijie kaín chojni kixin tí jína ch'án k'uenyákonhenni ch'án.

¹⁹ Mé xíkaha kuítekakonhya jnkokoá chojni, mé Adán tíha, ntá nchónhya chojni kjuasin jiē. A ntá jnkokoá nkexro jína kuítekaon kjuakoxín, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jiē.

²⁰ Ikui tí ley kuínhin sín ntá kónoxín kixin íchá antsí kjuasin sín jiē. A ntá antsí k'uíxin jiē la kjónté xíkaha la antsí má kuikonóeheni Dios kixin jehe ch'án tsjinkitsani ch'án tsaáxinni.

²¹ Mé xíkaha tí jiē k'uíxin k'uéchónta kjuachaxin kjuikao kjuach'én chrók'uenxínni. A ntá kjuasáyé Dios kjaxin antsí má chóntha ch'án kjuachaxin sinchetjóá ch'án tí ijieni la ko tsjanjon ch'án kjuachón jnkochrín kixin Ìnchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jiē ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jiē kixin ntá Dios naxa chrókjuakoxín ch'án kixin chrókuikonóeheni ch'án?

² Kjá náhi. A ntá jeheni la éxí chojni tsík'en chrokjuahya tsjasin jiē. ¿A ntá nkekuènte naxa chrókjuasinni jiē ínaá?

³ ¿Á noahyará jahará kixin tí kuíkiteni kixin tinkáchónkini Cristo la yóhē k'uénkoni ch'án?

⁴ Tí kuíkiteni la éxí yóhē xravákoni Cristo la ko tsík'enkoni ch'án kixin ntá ó xechónni ntá chrók'uajini ijnko ntia nixin mé xíkaha Cristo xechónxin ch'án tí kjuachaxin jié chóntha tí It'é ch'án.

⁵ Kíxin tí chaxín k'uenxínni éxí ik'uén tí jehe ch'án la ntá kjaxin tsoxechónni éxí xechón tí jehe ch'án.

⁶ Ó noheni kixin nkexrí k'uejóni senó mé táha mé k'uenxín Cristo kjuák'enkánixín ch'án ntacruz kixin ntá chrók'uitjáyanxín kaín tí jie k'uékjasinni kixin ijie í chrókjuinchexiteyèhyani tí jie.

⁷ Tí nkexro ó k'uén la ntá ó kuítóhe tí jie.

⁸ A ntá jeheni tí k'uenxínni Cristo la ó noheni kixin ts'ejókoni tí jehe ch'án.

⁹ Kíxin ó noheni kixin Cristo jnkokoá vez xechón ch'án a ntá í ts'enhya ch'án ínaá kixin tí kjuach'én í chóntahya kjuachaxin kixin naxa ts'óyán tí jehe ch'án.

¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijiéni. Ntá xechón ch'án ijie kixin tsjak'eko ch'án Dios.

¹¹ A ntá kjaxin jahará chrókjuenkayáxinrá kixin ik'uénrá, xit-jahya tsjásinrá jie kixin ntá ijie la xíxechonrá chrókjuich'eherá xra Dios kixin tinkachónkirá Cristo Jesús, mé Ìnchéni tíha.

¹² Méxra chrókuítóéhyará kixin chrókjan tí jie chrók'uetuēhen tí cuérporá ínaá kixin tí jie chrók'uetōan kixin chrókjuinchexiteyéhérá tí nkehe tjenkayáxinrá.

¹³ Tjánjonhyará tí cuérporá kixin chrók'óna nkehe chrókjuásixínrá jie. A ntá íchá jína chróchjehérá asánrá Dios éxí ijnko chojni tsík'en ó xíxechón ínaá. Chjehérá Dios tí cuérporá ts'óna ijnko nkehe sich'exín ch'án xra jína.

¹⁴ Kíxin tí jie la í chóntahya kjuachaxin ts'etuēhen tí jahará. Jehya tí ley ts'etōan ijie. Náhi, jehó kjuasáyé Dios.

Kjuíncheyōexin ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jie kixin í t'etuēhyani tí ley? Kjá náhi. Kjuasáyé Dios tsaáxinni la kjá í chrókjuasinhyani jie.

¹⁶ Jahará ó nohará jína kixin tí sich'ehe ni ijnko lámō xra la tsitekakohenni ch'án la tí xíkaha la t'ichjánxin ch'ehe ni xra tí lámō la t'ichjánxin sinchexiteyéhēni ch'án. Mé xíkaha tónhen tí naxa sinchexiteyéhēni tí jie la táha mé ts'enxínni. A ntá tí tsitekaonni Dios la mé chrók'uejóni jnkójina.

¹⁷ Jahará la ósé k'uékjásinrá jie, a ntá ijie kjuasáyé Dios kujkonóahará ch'án kixin kaín asánrá kuítekáonrá tí nkehe xrakohará.

¹⁸ A ntá ó kuítóhérá tí k'uékjinchexiteyéhérá tí jie. A ntá ijie ó kjuánjonrá asánrá kixin sich'erá xra jína kuènte Ìnchéni.

¹⁹ A ntá jie nixja éxí ijnko chojni ó kixin jahará la tiénxinhyará jína tí nkehe i. A ntá xíkaha tí senó kjuinchexiteyéhérá tí nkehe ntoáhya la ko jínahya kixin sich'erá tí nkehe jínahya. A ntá ijie la xíkaha chrókjuánjonrá tí cuérpō kuéntará kixin

chrókjuich'exínrá tí xrā jína éxí tjinkaon Dios kixin ntá jehe ch'án chrókjuinchetjóará ch'án.

²⁰ A ntá tí jahará tió naxa kjuinchexiteyéhérá tí jie la ntá xitjahya sich'erá tí xrā jína ntoá.

²¹ ¿A ntá nkehe chrókjuachará kixin xikaha kjuich'erá tí nkehe chrókósuàxinrá ó? Ntá xikaha kjuéyará tí nkehe ts'énxinrá ó.

²² Na ntá ijie ó kjuin tí nkehe k'uék'etuñhanrá k'uékjásinxínrá jie. A ntá ijie ch'eherá xrā Dios. Táha la tsjinkitsa kixin ts'ejoxínrá jína kixin ntá tsjixixín tsotjuáxinrá ts'ayéhérá kjuachón jnkochrín.

²³ A ntá tí chrókjuasinni jie la chrókjuachani kixin éxí chrók'uenni ó. A ntá tí nkehe chrókjuinchekitonhenni Dios la kjuachón jnkochrín kixin tinkáchónkini Ìnchéni Cristo Jesús.

7

Kjuíncheyóexin ch'in Pablo kuente tí sín tsíkótehe

¹ Kíchóni, jahará ó choxinrá tí ley la ó nohará kixin tí ley chóna kjuachaxin ts'etuñhen tí chojni naxa tjejóchón ó.

² Tíha mé ts'axrjexín éxí ijnko chojni chjin tsíkótehe la tí xii tjan chóna kjuachaxin ts'etuñhen tjan kixin naxa tjechón ch'án. A ntá tió tsík'en tí xii la ntá tí tjachjin la ó kuítóhe tí k'uék'etuñhen ch'án tjan.

³ A ntá tí jehe tjan chrókuakja í jnko chojni ntoa tí naxa tjechón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuítóhe tí k'uék'etuñhen ch'án tjan la jína tsotehe tjan í jnko chojni ntoa la jehya jie tíha.

⁴ Mé xikaha jahará kíchó ni mé k'uenyákonhenni Cristo la ntá jahará la éxí tsík'enrá kixin í t'etuñhyará tí ley la éxí chrókuákjára í jnko xiará la mé xikaha tinkachónkirá Cristo. Cristo mé xechón ch'án inaá kixin ntá jína chrókjuich'ehe ni xrā Dios.

⁵ Tió naxa k'uékjasinni jie a ntá tí ley chrókjuich'e xrā kixin chrókjuasinhyani jie, a ntá íchá antsí má kjuasixínni jie tí cuerpo kuénténi, la táha mé kjuixín tí ts'enxínni.

⁶ A ntá ijie la éxí yóhe ik'uénni, a ntá tí ley chónahya kjuachaxin naxa ts'etuñhenni. A ntá ijie í kohya nkehe t'ínkákonhen kixin jína sich'ehe ni xrā Dios kixin k'ónani ijnko chojni nixin kixin tí Nchakuen Dios k'uáyéhe ni. A ntá í t'etuñhyani tí ley ntaxin tsík'óna.

Tí jie naxa chonta

⁷ A ntá tí xikaha la, ¿nkehe chróchroni? Kixin tí ley la, ¿á jie táha ní? Kja náhi. Kjánchó janhan chrókónonahya nkehe tí jie tí chrókohya tí ley chróchronka. Chrókónonahya kixin tí

nkehe ókjé chrókjuakéhya asenná tí chróchrónkahya tí ley kixin chrókjuakéhya asenná tí nkehe ókjé.

⁸ A ntá tió kónona tí ley a ntá tí jie antsí kjuacha k'uetōan. La ntá k'uixin kain nkehe ntáchro asenná. A ntá tí chrókohya ley la chrókónoxínhya tí jie chrók'uenxiān.

⁹ A ntá tí ósé la nonahya nkehe tí ley. A ntá tió nōna nkehe tí ley, a ntá antsí kjuásian jie la ntá ó nōna kixin tí jie kjuásian me ts'énxiān.

¹⁰ Mé xikaha kónhen kixin tí ley chrókjuanjōn kjuachón ntá kjuikao tí ts'énxinni.

¹¹ Ntá tí jie mé kjuacha k'uetōan kixin sintaxiteyáhya tí ley. A ntá tí ley mé kjuanchia jie ts'énxiān.

¹² Mé xikaha tí ley la chaxín jína la ko tí nkehe t'etōan Dios la kjaxin jína.

¹³ Mé xikaha ti nkehe jína la ¿á táha chrók'uénxiān? Kjá náhi. Tí jie kjuásian mé ts'énxiān. Mé xikaha kjuakōxin tí nkehe jie kixin tsonoxín tí jie kixin tí ley la jína. Mé xikaha kjuakōxin tí ley kixin tí jie tjasin chojni mé imá jínahya tíha.

¹⁴ Ó noheni kixin tí ley la kuēnte Dios tíha. A ntá janhan la kjuintaxiteyáha tí ntáchro asenná kixin tí jie kjuacha k'uetōanna.

¹⁵ A ntá tí janhan la tí nkehe tjet'a la kjaxin naxa tianxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a.

¹⁶ A ntá tí nkehe tjínkakhonhya chrókjuít'a la tíha me it'a la mé xikaha tjátsoanxián kixin tí ley la jína.

¹⁷ A ntá jehya janhan it'a tíha. Náhi tí jie chonta mé ch'e tíha.

¹⁸ Kixin janhan ó nōna kixin tí ntáchro asenná la kohya nkehe jína chrókjuít'a. Tjínkavan chrókjuintaxiteyá tí nkehe jína kjánchó tjachahya sít'a tíha.

¹⁹ T'ahya tí nkehe jína chrókjuít'a. Tí nkehe jínahya tjínkakhonhya chrókjuít'a mé it'a.

²⁰ A ntá tí it'a tí nkehe jínahya tjínkakhonhya chrókjuít'a la ntá jehya janhan it'a tíha. Náhi. Tí jie chonta mé ich'e tíha.

²¹ Tónōna tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya.

²² Kjónté xikaha la tóxrjinna chrókjuintaxiteyáha tí ley kuēnte Dios.

²³ T'íkuan kixin tí nkehe ntáchro asenná mé t'ínkakhōnhen tí nkehe tjínkavan chrókjuít'a. A ntá ti jie chonta mé éxi tjéchinaxián tíha.

²⁴ Nōa tí janhan. ¿Xá nkexro chrókjuatsen tí jie chóna tí cuerpo kuēntana chrók'uénxiān?

²⁵ Kjuasáya tjaha Dios kixin ikui Ìnchéni Jesucristo kuaáxinni. Mé xikaha tí janhan la it'ona tjenkayáxian kixin

chrókju_intaxiteyáha Dios a ntá tí t'ona mé ntáchro asenná chrókju_intaxiteyáha tí nkehe kuènte tí jie.

8

Tjejóchónxinni Nchakuen Dios

¹ A ntá ijie tí sín tinkáchónki Cristo Jesús la kohya jie chrókjuasótexín sín. Jehé sín í tjinkakonhya nchexiteyá sín xíkaha ntáchro asén sín. Jehó tjinkaon sín sinchexiteyéhe sín Nchakuen Dios.

² Kíxin tí nkehe t'etoan Nchakuen Dios mé tjanjon kjuachón kíxin tinkáchónkini Cristo Jesús. Tíha mé kjuatsen tí nkehe kuènte jie chrók'uenxínni.

³ A ntá Dios kjuích'e tí nkehe kjuachahya kjuích'e tí ley kuènte ch'ín Moisés kíxin jeheni kjuachahyani chrókjuinchexiteyéheni tíha. A ntá Dios mé ichr'án ch'án Xjeen ch'án k'óna éxí chojni. La xra ó kui ch'án k'uenyákonhen ch'án tí ijíeni kaín ní ntihi chjasintajni la kjuatsen ch'án tí jie chrók'uitjáyanxínni.

⁴ Mé xíkaha kónhen kíxin ntá jeheni jína chrókjuinchexiteyéheni tí nkehe t'etoan tí ley la chrókjuinchexiteyéhyani tí nkehe ntáchro asénni ó. Náhi. Chrókjuinchexiteyéheni tí nkehe ntáchro Nchakuen Dios.

⁵ A ntá tí sín tjinkaon nchexiteyéhe tí nkehe ntáchro asén sín ntá táhó tjenkayáxin sín. A ntá tí sín tjinkaon nchexiteyéhe Nchakuen Dios la ntá xritjeyá sín tí nkehe kuènte Nchakuen Dios.

⁶ A ntá tí sín tóxakonhen tí nkehe ntáchro asén sín la táhó ts'enxín sín. A ntá tí sín tóxakonhen tí nkehe kuènte Nchakuen Dios la tsochóntaxín sín kjuachón la ko kjuaxróxin.

⁷ A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kíxin tjinkakonhya sín la ko titekakonhya sín tí ley.

⁸ Tí sín tóxrjínhin sín tí nkehe ntáchro asén sín ó la xitjahya sinchechéhe sín Dios.

⁹ A ntá jahará la nchexiteyéhyará tí nkehe ntáchro asánrá. Náhi. Jahará nchexiteyéhérá Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo.

¹⁰ A ntá tí Cristo tjejókoará tí jahará la tí asánrá la tjechón kíxin Dios kuikonóahará, kjuínchetjóá ch'án tí ijíará, kjánchó tí cuerpo la éxí tsík'en kíxin tí jie chontará.

¹¹ A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjéhe ch'án kjuachón níxin tí cuerpo

kuèntará kjónté chóna jìe kixin tí Nchakuen Dios chontará jahará.

12 Mé xikaha kichó ni, ó chóntani nkehe sinchexiteyéheni, kjánchó í chrók'uejorá xínhyani tí nkehe ntáchro asénni.

13 A ntá jahará tí chrók'uejorá éxí ntáchro asánrá la tíha la mé chrók'ueñxínrá. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínrá.

14 Kaín tí nkexro t'etuenhen Nchakuen Dios la mé ó k'óna xjeen Dios.

15 Ntá Nchakuen Dios ó k'uayéherá jahará la jehya tí nchakuen tí nkehe k'uék'etuanhanrá ósé kixin chróchrakonrá. Náhí. Ntá tí Nchakuen chóntani la k'ónaxínni xjeen Dios. A ntá tí Nchakuen ch'án nchexraxinkaonni tsontáchroni kixin: "It'éni Dios kuèntá tí jeheni."

16 Tí Nchakuen Dios tónoexín nchakuenni kixin k'ónani xjeen Dios.

17 A ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxí tsintáchro ch'án ósé. Mé ts'áyèkoni Cristo tí nkehe tsjanjon Dios. Tí chaxín tsjasóteni éxí Cristo kjuasóte ntá chr'éxin ts'ejókoni ch'án kjuaxróxin.

Tí kjuachaxin jìe itsi chr'éxin

18 A ntá ijie la tóxakuenhyani kjónté nkehe ts'atsínkani tsjasótexínni kixin tíha la ninkehó sínkíhya kixin tíha la xitjahya tóyóhé tí nkehe ts'áyéheni chr'éxin kixin antsí má jina náxrjón tíha.

19 Tí nkehe tsík'óna tjejóchónhen kixin ts'ikon tí sín tsík'óna xjeen Dios.

20 Kjónté kaín nkehe tsík'óna siín la ts'itjáyan tíha la jehya kixin xikaha tjinkaon tí nkehe tsík'óna. Náhí. Jehí xikaha tsík'etōan Dios. Ntá tjejóchónhen kaín nkehe tsík'jich'éna Dios

21 kixin chróchóna kjuachaxin chrók'uitjáyanhya. Ntá náxrjón ts'ixin kaín nkehe éxí náxrjón ts'ejó tí sín tsík'óna xjeen Dios.

22 Ó noheni kixin kaín tí nkehe kjuích'éna Dios la naxa tsjasóte éxí yóhé tjetéxin ijnko chojni nchekokjìhi xjeen.

23 A ntá jehya jehó tí nkehe tsík'óna t'ikon chojni chrók'joté. Náhí. Kjaxin jeheni tjasóteni kjónté chóntani Nchakuen Dios kixin tí Nchakuen Dios la mé tí nkehe xrankixixín kuákjani la naxa ts'áyéheni inaá tí nkehe naxa tsjanjon Dios. Tjejójtjasóteni la ko tjejóchónhenni kixin tsjintaxín ts'ónani xjeen Dios la ko ts'áyéheni tí cuerpo chónhya ts'en.

24 Mé ó kuaáxinni la naxa tjejóchónhenni tí nkehe t'ikonhyani. Tí k'uíkoni tí nkehe tjejóchónhenni ntá

t'ichjǎnxĩnhya chrók'uejóchónhenni. Tí nkehe ó t'ikonni la t'ichjǎnxĩnhya chrók'uejóchónhenni naxa chrók'uikonni inaá.

²⁵ A ntá tí chónhenni tí nkehe naxa t'ikonhyani la ntá t'ichjǎnxĩn tsonínkakonhyani tsochónhenni.

²⁶ Mé kǎxin xíkaha tí Nchakuen Dios tjinkĩtsani tí noehyani nkexrí tsonixjeheni Dios kixin chaxín noehyani tsonixjeheni ch'án éxí chrónixjani. A ntá tí Nchakuen Dios tjinkĩtsa nixjǎxin ch'án tí jeheni kjónté noehyani nkexrí tsochrónóaxinni éxí tjinkaon ch'án.

²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxí tjinkaon Dios la nixjǎxin ch'án tí sín tinkáchónki Dios.

²⁸ Ó noheni kixin Dios la k'uetóan kaín nkehe chrók'uaxrje jina kixin tí sín tjuèhe ch'án kixin tsíkjoyá ch'án sín kixin xíkaha tjinkaon ch'án.

²⁹ Tí sín tsíkjoyá Dios ósé la ntá tsík'íyehē ch'án kixin ts'óna sín éxí tí Xjeen ch'án kixin ntá tí Xjeen ch'án mé ts'etueñhen nchónhya tí sín kichó ch'án.

³⁰ Mé xíkaha tí sín tsíkjoyá Dios ósé mé kǎxin k'uíyehē ch'án sín la ko tí sín k'uíyehē ch'án la kjuínchetjóá ch'án ijíé sín la ntá tí sín kjuínchetjóá ch'án ijíé la kjuanjon ch'án kjuachaxin kuènte ch'án tsochóna sín.

³¹ ¿A ntá nkehe chróchroni tí xíkaha? Tí Dios tjuèhe tí jeheni, ¿a ntá nkexro chrókjuacha chrókónínkakonhen tí jeheni?

³² Kixin Dios la kjiakuènhya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án.

³³ ¿Nkexro chrókjuacha chrókjuanchia jíe chrókónínkakonhen tí sín kjueyá Dios? Kixin Dios la ó kjuínchetjóá ijíé tí sín a.

³⁴ ¿Nkexro chrókjuinчекjasóte tí jehe sín? Kixin Cristo la ó k'uenyákonhen sín la kǎxin xechón ch'án inaá la itjen ch'án tí tja chjina Dios tjen nkaya nkajní la tjechronòa ch'án kixin kaín tí jeheni.

³⁵ ¿Xá nkexro chrókuakitsjeheni tí tjuèheni Cristo? Kjónté ichrén nkehe chrókónhenni la ko chrókónínkakonhen chojni tí jeheni la ko kjónté chrók'uenxínni kjinta la ko chróchóntahyani ikéni o kjónté tí kjuaxikaon chrók'uenxínni la chrókuítqehya ch'án tí jeheni.

³⁶ Éxí ntáchro xroon itén Dios kixin: Tí tinkáchónkini tí jaha la siín kjuaxikaon kaín yaon chrók'uenxínni.

Chrók'óyánni sín éxí t'óyán sín kolélo tí matanza.*

* 8:36 Salmo 44.22

37 Kaín tíha la antsí chrókjuachaxinni kixin kjuachaxiэн tí nkexro tjuèheni.

38 Ó noheni kixin ninkehó nkehe tsjachahya tsakitsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxiэн tí jínahya, o kjónté tí nkehe sitónhen ijje, o tí nkehe tsonhen chr'éxin,

39 o kjónté tí nkehe siín nkaya nkajní, o tí nkehe imá ninka siín chjasintajni, o íjngo nkehe kjuích'éna Dios. Mé kohya nijngo tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Ìnchéni Jesucristo.

9

Dios kjueyá tí sín Israel

1 Ntoá xrjanka kixin janhan ijngo chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxín.

2 Imá t'ává asenná la ko náxrjónhya tjèn

3 kixin tjínkavan kjónté chrók'uitjáyanxinna tí tinkachónkia Cristo kixin ntá jína chrókuinkáchónki Cristo tí sín kíchíná naxa kjéhyana.

4 Jehe sín mé tsík'axrjeníxin sín tí sín Israel la Dios k'uáyéhe sín éxi xjeen ch'án la ko Dios chónthehe tí jehe sín la kjuanjon kjuachaxiэн ch'án la kjaxin k'uáyéhe sín tí nkehe k'uətoan Dios la ko ti ley tsíkjin ch'ín Moisés la ko k'uáyéhe sín kjuachaxin ts'ətoan sín kixin nkehe tí xra tsonhen nkaxenhen njnko la ko k'uáyéhe sín tí nkehe tsintácho Dios.

5 Tsík'axrjeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tió k'óna ch'án chojni. Jehe ch'án mé Dios kuènte kaín nkehe la tinkáchónkini ch'án jnkochrín. Amén.

6 A ntá tí nkehe chrókuakja tí sín Israel kjuanjon Dios la jehya kixin chróxiteyáhya tíha. Náhi. Kixin jehya kaín tí sín tsík'axrjeníxin tí sín israelita mé chrók'óna sín chojni chjasin Israel.

7 Kixin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsintáche ch'ín Abraham kixin: “Tí sín ts'óna kjéhya jaha mé ts'axrjeníxin sín ti ch'ín Isaac.”*

8 Tíhi mé tienxínni kixin ninkexró xitjahya ts'óna xjeen Dios kixin tí tsík'axrjeníxin sín chojni ó. Náhi. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án.

9 Tí nkehe tsíchenka Dios tí ch'ín Abraham mé tíhi: “Itsi ijngo yaon mé tjan Sara sich'éna tjan ijngo xjan.”†

* 9:7 Génesis 21.12 † 9:9 Génesis 18.10

10 **A** ntá jehya táhó. Náhí. Kjaxin tí yaá chánjan tsíkijich'éna tjan Rebeca mé chóna jnkokoá it'é xjan mé it'in Isaac, mé tsík'axrjeníxinni ch'án.

11 **A** ntá tí xjan la naxa kokjéhya xjan la ninkehó nkehe jína o jínahya kjuích'e xjan. Ntá kjuakoxin Dios kixin chóna ch'án kjuachaxin éxi tsíkjenkayáxin ch'án tsjeyá ch'án nkexro ts'iyehé ch'án la tahya ch'án kuentá nkehe tí xra kjuích'e sín.

12 Ntá kjónté la ntá chenka ch'án tí tjan Rebeca kixin: “Tí ch'ín saó mé sich'ehe xra tí ch'ín tsoyo.”†

13 Mé kjaxin xikaha ichro xroon itén Dios kixin: “Tjuaha Jacob, a ntá Esau la náhí.”§

14 ¿A ntá nkehe chróchroni? ¿Á ntoáhya tjenkayáxin Dios? Kjá náhí.

15 Kixin tsintáche Dios tí ch'ín Moisés kixin: “Tsojuaha tí nkexro tjínkavan tsojuaha la ko tsikonóaha tí nkexro tjínkavan tsikonóaha.”*

16 Jehya éxi tjinkaon chojni o jehya kixin tí nkehe ch'e chojni. Náhí. Ó jehí Dios tsíkikonóehé ti jehe sín.

17 Tí ntáchro xroon itén Dios mé nixjehé Dios tí ch'ín rey Egipto kixin: “Kjuánjuan kjuachaxin kixin jaha k'óna rey kixin tjínkavan chrókjuakoxian kjuachaxin kuéntana kixin ntá kuénté chjasintajni chrókonohe la chrókuitekaon tí nina.”†

18 Mé xikaha tí tjinkaon Dios tsikonóehé ch'án chojni la tsikonóehé ch'án, a ntá tí nkexro tjinkakonhya ch'án tsikonóehé ch'án la tsikonóehya ch'án.

19 **A** ntá tsontáchorá kixin: “**A** ntá tí xikaha la, ¿nkekuénté t'eka Dios chojni jié? ¿Nkexro chrókjuacha chrókjuanjonko tí nkehe t'etōan Dios?”

20 ¿Xá nkexro tí jahará kixin chróntácherá Dios xikaha? ¿Á ti chí tsík'óna nchetje chróntáche tí inché chí kixin: “¿Nkekuénté xikaha kjuích'énani?” chróchro.

21 **A** ntá kjaxin tí nkexro ch'éna chí mé chóna kjuachaxin tjinkaon sich'éna ch'án tí nkehe tóxrjínhin ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhya.

22 Tjinkaon Dios chrókjuakoxin ch'án tí kjuachaxin kuénte ch'án chrókjuinчекjasóte ch'án chojni la kjónté xikaha kónhen la kjuacha ch'án kónínkakonhya ch'án la kuíkonóehé ch'án tí sín chrókjuinчекjasóte ch'án kixin chrókjuinчек'itjāyan ch'án sín.

23 Mé xikaha kjuích'e ch'án kjuakoxin ch'án tí kjuachaxin imá jié chóna ch'án kixin jehe ch'án kuíkonóeheni ch'án kixin xikaha tsíkjenkayáxin ch'án ósé kixin náxrjón chrók'uejókoni tí jehe ch'án.

‡ 9:12 Génesis 25.23 § 9:13 Malaquías 1.2-3 * 9:15 Éxodo 33.19 † 9:17 Éxodo 9.16

24 Mé xikaha Dios tsíkjeýá ch'án iso tí sín judío la ko iso tí sín jehya judío.

25 Mé xikaha ntáchro tí xroon tsíkjin ch'ín Oseas kixin: Tí sín jehya chjasenná la mé sintak'ian chjasenná.

La tí sín k'uétjuahya mé tsotjuahá sín ijie.‡

26 Tí chjasin ntiha tsintáchro ch'án kixin: “Jahará jehya chjasenná”,

a ntá ijie sintak'ian xjeen Dios tjechón.§

Mé xikaha ichro itén Dios.

27 Kjaxin nixja ch'ín Isaías kuènte tí sín israelita tsintáchro ch'án kixin: “Nchónhya chojni ts'axrjenixin tí sín Israel éxi tí nchónhya nchesen siín ntayaon kjánchó tsjéhya tí jehe sín tsjacha sín tsaá sín.

28 Ntá tjoka tsonhen tí nkehe tsintáchro Ìnchéni sinchexiteýá ch'án.”*

29 Ntá kjaxin ch'ín Isaías tsintáchro ch'án ósé kixin:

Tí Ìnchéni chóna kaín kjuachaxin kuítóehya chrók'uitjýan kaín tí sín k'uaxrjenixin Israel éxi k'uitjýan tí sín chjasin Sodoma la ko Gomorra.†

Tí sín judío la ko tí tan jina

30 ¿Ntá nkehe tsixroni? Tí sín jehya judío kjueyáhya sín Dios sinchetjóá ijie sín ntá kjónté la k'uitja sín kixin tsotjóá ijie sín kixin tinkáchónki sín Cristo.

31 A ntá tí sín israelita chrókjuinchexiteyéhe sín ley kixin chrókótjuáxin ijie sín kjánchó kjuachahya sín kjuínchexiteyéhe sín tíha.

32 ¿A ntá nkekuènté kixin xikaha k'uitjahya sín nkexrí chrókuinkáchónki sín Dios? Kixin kjueyáhya sín nkexrí chrókjuinchetjóá ch'án ijie sín kixin tinkáchónki sín ch'án. Jehó tí xrá kjuích'e sín chrókuaáxin sín, ichro sín. La méxrá xikaha tjen tí xró kóténkixin sín.

33 Mé xikaha chronkaxín xroon itén Dios kixin: Mé xikaha kjuaké tí xró chjasin Jerusalén mé tí xró tsóténkixin sín la ko tí tjo ts'ánótjenxin sín.

A ntá tí sín chrókuitekaon tí jehe la chrókósuèhya sín.‡

10

1 Kíchóni, kaín asenná níxjahá Dios kixin tjínkavan kixin tí sín israelita chrókuaá sín.

2 Janhan ntáxrjan kixin tí sín israelita imá tjinkaon sín chrókjuich'ehe sín xrá Dios kjánchó chaxínhya kixin jehe sín la tienxínhya sín.

‡ 9:25 Oseas 2.23 § 9:26 Oseas 1.10 * 9:28 Isaías 10.22-23 † 9:29 Isaías 1.9

‡ 9:33 Salmo 118.22

³ Kjaxin noehya sín kixin nkexrí chrókjuinchetjóá Dios tí ijíé sín. A ntá jehó sín xritjeyá sín nkexrí chrókótjóá sín la tjinkakonhya sín chrókjuinchexiteyéhe sín Dios.

⁴ A ntá Cristo mé kjuínchexiteyá kaín nixja tí ley. A ntá ijíe kaín tí sín kuítekaon tí jehe ch'án mé sinchetjóá ch'án ijíé sín.

⁵ A ntá tí chrókótjóá ijíé sín kixin tí ley la ch'ín Moisés mé tsíkjin ch'án xíkíhi: “Tí nkexro chrókjuinchexiteyéhe kaín tí ley la táhó chrókuaáxin sín.”*

⁶ A ntá tí chrókjuinchetjóá Dios tí ijíéni kixin tí tinkáchónkini ch'án ó mé ntáchro xíkíhi: “Ntáchrohyará kixin, ¿Xá nkexro sáchrókjuí nkaya nkajní? (Tí xíkaha la t'axrjexín kixin naxa chrókui Cristo.)

⁷ La ko ntáchrohyará kixin: ¿Xá nkexro chrók'uinkajin tí imá njinka?” (Mé t'axrjexín tíha kixin chrókjuíakajín sín Cristo chrók'uaxrjetaón ch'án kixin itjen ch'án tí siín tí sín tsík'en, ichro sín.)

⁸ ¿A ntá nkehe ichro? Ntáchro kixin: “Itén Dios la chjinaxón tjen tí tjejorá kixin ó nohará la ko xraxinkaon asánrá.”† Tí tan a mé tí nkehe tinkáchónkini kjuakoni.

⁹ Tí ir'va tsontáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá.

¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchroxian kixin choxian Jesucristo ntá sinchekaá ch'án tí jaha.

¹¹ Ntáchro xroon itén Dios kixin: “A ntá tí sín chrókuítekaon tí jehe ch'án la chrókósuèhya sín.”‡

¹² Dios la t'ikon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe.

¹³ Mé xíkaha ntáchro xroon itén Dios kixin: “Kaín tí sín tjanchaxín nkehe ihnjé Ìnchéni la tsaá sín.”§

¹⁴ ¿A ntá nkexrí chrókjuanchehe sín ch'án kixin chrókjuinkítsa ch'án sín tí naxa kuítekakonhya sín ch'án? ¿A ntá nkexrí chrókuítekaon sín tí jehe ch'án tí naxa kuíenhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakohe sín tí itan a?

¹⁵ ¿La nkexrí chrókjuichronka sín tí tan tí kohya nkexro ichr'án sín sátsji? Éxí ntáchro xroon chóna itén Dios kixin: “Náxrjón tí sín xrichronka itan jína.”*

* 10:5 Levítico 18.5 † 10:8 Deuteronomio 30.12-14 ‡ 10:11 Isaías 28.16

§ 10:13 Joel 2.32 * 10:15 Isaías 53.1

16 Kjánchó kénhya sín titekaon sín tí itan tsaáxinni. Tsíntáchro ch'ín Isaías kixin: “Ínchéni ¿xá nkexro ó kuítekaon tí tan xrichronkani?”†

17 Méxra t'ichjánxin tsinhin sín, a ntá chrókuítekaon sín, a ntá tí tan tsinhin sín mé itén Cristo.

18 A ntá tjánchánkía kixin: ¿Á kuíenhya sín tí tan? Kjá ó kuínhin sín. Ntáchro xroon itén Dios kixin: A ntá tí nkehe kjuako sín la ó kuínhin chojni kuenté chjasintajni.

Tí nkehe nixja sín la ó kjuixraká hasta kjuèxin chjasintajni.”‡

19 Ntá tjánchánkía inaá: ¿Xá tí sín Israel la naxa kíenxínhya sín ní? Senó ntáchro ch'ín Moisés kixin:

Ijnko chjasin jehya chjasin kuéntana la tsoninkákonhénra sín kixin injko chjasin tjinkakonhya tsinhin la tsoninkákonhénra sín. §

20 Ntá ntáchro ch'ín Isaías kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

21 La ko nixja ch'ín Isaías kuènte tí sín israelita kixin: “Kuenté yaon k'uiyaha injko chjasin síin chojni titekakonhya sín la ko jiehe sín.”†

11

Tí sín Israel tsíkjeyá Dios

1 A ntá ijie tjánchánkía kixin: ¿Dios la á kuítóhe ch'án tí sín Israel? Kjá náhi, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín.

2 Kixin ósé tsíkjeyá Dios tí sín israelita kixin ts'óna sín chjasén ch'án. A ntá ijie la kjá sinchek'itjányanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehé ch'án Dios tjanchia ch'án jie kuènte tí sín Israel? Mé ntáchro xikihi:

3 “Ínchéni, jehe sín k'óyán sín tí sín chrónka itán la ko k'óxíka sín tí altar kuéntá ntá jehóni kuítóheni tjechónni la tjinkaon sín kjaxin chrók'óyán sín tí jeheni.”*

4 A ntá Dios kjuátehe ch'án kixin: “Naxa kuítóhe yato mil chojni kuítekaon sín tí janhan kjuíxienhya sín toch'in sín tí nkehe tsíkjanoya Baal.”†

5 Ntá kjaxin xikaha ijie naxa kuítóhe iso tí sín naxa tinkáchónki Dios. Kjuasáyé Dios kixin kuikonóehé ch'án tí sín la tsíkjeyá ch'án kixin tsaá iso tí jehe sín.

† 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 * 10:20

Isaías 65.1 † 10:21 Isaías 65.2 * 11:3 1 Reyes 19.10, 14 † 11:4 1 Reyes 19.18

⁶ Mé xikaha kjuasáyé Dios sinchekaá ch'án tí jehe sín kixin jehya tí xra kjuich'e sín chrókuaáxin sín. Náhi. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

⁷ A ntá tí xikaha la, ¿nkexrí? Tí sín israelita la k'uitjahya sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín í so a la icha asén sín la kuitekakonhya sín.

⁸ Éxí ntáchro xroon itén Dios kixin: “Dios kjuanjonhya kjuachaxin chrókienxín tí sín a la ko mé kjaxin xikaha naxa sítönenhén tí yaon ijie. La kjuanjonhya ch'án kjuachaxin kixin chrók'uikon sín la ko chrókienxín sín.”[‡]

⁹ Kjaxin tsintáchro ch'ín David kixin:

Tí kia tjasin sín mé tjasixín sín jie,
tsjasótexín sín.

¹⁰ Tí ikon sín ts'ikonxínhya sín kixin ts'óna sín ntakótán ntá tí jie kuènte sín mé jnkochrín yámá sín. §

Tsaá tí sín jehya sín judío

¹¹ A ntá ijie tjánchánkiá: Tí sín judío la tí kjuasin sín jie la ¿á ó naá kuítóexón Dios tí jehe sín? Kjá náhi. Tió kuitekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín.

¹² A ntá tí jie kjuasin tí sín judío, a ntá kuítóhe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. A ntá tí nkehe ntoáhya kjuich'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuitekaon sín Cristo la antsí má náxrjón tíha.

¹³ Chonta iso nkehe chrókuinhínrá jahará jehya judíora kixin Dios mé chr'ánna kixin tsjakohá tí sín jehya judío la antsí tjetoan tí xra kuènte Ìnchéni chrókjuít'a.

¹⁴ Tjínkavan kixin tí sín chjasenná chrókóchjinoxínhin sín kixin jahará tinkachónkirá Dios kixin ntá chrókjuacha chrókuaá iso tí jehe sín.

¹⁵ Kuítóhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuitekaon tí sín judío kjaxin la yóhe éxí chróxechón chojni tsík'en tí jehe sín.

¹⁶ Tí chrókjuinchetjóá Dios tí niotja xrankíxixín chrók'óna tí ich'o la ntá kuenté tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuèè ijnko nta la kjaxin kaín tí chaon tí nta chrókjuinchetjóá ch'án.

¹⁷ Ntá isó tí sín judío la éxí iso chaon tí nta olivo mé xikaha tsíchrinjin la ntá jahará la éxí ijnko chaon nta olivo nteje

tsík'óna injerto mé xikaha ts'ejóchónxin tí nta chaon tí tronco tí nta olivo jína xráxín tjechón.

¹⁸ Ntáchrohyará kixin tí chaon tí nta la antsí jína. Íchá jína tsontáchrórá kixin jehya tí nta t'etueñhen tí nuéé nta. Náhí. Tí nuéé mé tsjinkĩtsa tí nta mé xikaha tí jahará.

¹⁹ Ntá jahará tsontáchrórá kixin: “A ntá tí chaon tí nta la tsíchrinjin kixin ntá jeheni tsitoheni lùké tí nta chaon tsíchrinjin”.

²⁰ Tíha la chaxín. Kjánchó chrínjin kixin kuítekakonhya Dios. A ntá jahará la tjejorá ntiha kixin tinkachónkirá Dios. A ntá chrokjuinchehnkehyará. Íchá jína chróchrakonrá.

²¹ Kixin Dios la kuikonóghya ch'án tí nta chaon kuènte tí nta tronco la ntá mé xikaha kjaxin tí jahará la tsikonóahyará ch'án.

²² Tsjehérá kixin Dios la imá jína kjánchó kjaxin sinchekjasóte ch'án tí sín titekakonhya. A ntá jína ch'án la kjuínkĩtsa ch'án tí jahará. Kjánchó chrók'uejorá jnkojína éxí tjinkaon tí jehe ch'án. A ntá tí náhí la chaxín jahará la tsitohará ch'án.

²³ A ntá tí sín judío tsitohé sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco ínaá kixin jehe ch'án la imá chóna ch'án kjuachaxin kixin xikaha sich'e ch'án.

²⁴ A ntá jahará jehya judíorá mé tsíkóchrínjinrá ch'án nta olivo nteje. A ntá antsí má xrá tsotséxin tí nta olivo jína. A ntá tí sín judío la nta chaon kuènte tí tronco nta olivo jína la antsí xráhya tsjatsueñhen tsotséxin kíchó ínaá kixin ó nta chaon kuènte.

Tí tsjixixín ntá tsaáxin tí sín Israel

²⁵ Kíchóni, tjínkavan tsonohará tí nkehe jehó Dios nohe kixin sinchehnkehyará jahórá kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon.

²⁶ Tió xikaha tsonhen ntá kaín tí sín Israel tsaá sín kixin tí xroon itén Dios ntáchro kixin:

Tí nkexro sinchekaáni mé tsixín ch'án chjasin Jerusalén la tsjatsen ch'án tí jie kuènte tí sín tsík'axrjeníxin ch'ín Jacob.

²⁷ Tíhi mé kjuachaxin nixin kuèntana ts'áyéhe tí jehe sín kixin janhan mé kjuatsiyán ijie sín.*

²⁸ Xikaha kixin tí tan nixin tsaáxinni ntá tí sín judío mé tsonínkakonhen sín Dios kixin ntá jahará ts'ayéherá tí nkehe kuènte Dios. Kjánchó Dios naxá tjuèhe tí jehe sín judío kixin jehe ch'án tsík'eyá ch'án tí sín tsík'axrjeníxin tí jehe sín.

²⁹ Kixin tí kaín nkehe kjuanjon Dios la tsakitsjehya ch'án la ko tsitohéhya ch'án tí sín tsík'íyehé ch'án.

* 11:27 Salmo 14.7, Isaías 59.20

³⁰ Senó la jahará k'uékítekákonyará Dios a ntá ijie la tí sín judío titekakonyha sín. A ntá jahará la kjónté la kuikonóahará Dios.

³¹ Mé xikaha jehe sín kuítekakonyha sín Dios la ntá kjónté xikaha la jehe ch'án tsikonóehé tí jehe sín éxí kuikonóahará ch'án.

³² Kíxin Dios la kuítóhe ch'án kaín chojni kíxin chrókjuasin sín jie kíxin ntá tsjakoxin ch'án tí kjuachaxin kuènte ch'án kíxin sinchetjóá ch'án kaín sín kjónté chojni chóna jie.

³³ A ntá tí kjuachaxin kuènte Dios la imá jie la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntia kuènte ch'án.

³⁴ Ntáchro xroon itén Dios kíxin: “¿Xá nkexro chrókienxín nkexrí tjenkayáxin Inchéni la xá nkexro chrókjuinkítsa chrókjuakohe tí jehe ch'án?

³⁵ ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe inaá?”†

³⁶ Kíxin kaín nkehe la tixin tí tjen Dios kíxin kaín nkehe la kjuich'éna ch'án kíxin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

12

Chjehérá cuérporá Dios kíxin sinchetjóá ch'án

¹ Mé xikaha kichó ni, xrjanóahará kíxin Dios ó kuikonóahará ch'án ntá jahará chróchjehérá cuérporá Dios éxí ijnko nkehe tjechón kíxin jehe ch'án ó kjuíntatjóárá ch'án la mé xikaha chrócoxrijnhin ch'án. Tíhi mé ijnko nkehe ntoá t'ichjánxin chróchjéheni ch'án.

² Chrócoxrijánhyará tí nkehe síin chjasintajni. Náhi. Chrókónixin tí nkehe tjenkayáxinrá kíxin jina chrókjuenkayáxinrá. Xikaha ntá chrókónohará kíxin nkexrí tjinkaon Dios kíxin ntoá chrók'uejorá éxí tóxrjinhin ch'án.

³ Kjuasáyé Dios kjuanjon ch'án tí xrā tjét'ahā ch'án. Mé xikaha nixjahará kaín rá kíxin chrókjuenkayáxinhyará kíxin imá tjetoanrá. Náhi. Chrókjuenkayáxinrá jina éxí tí kjuachaxin tjáhará Dios éxí nkexrí tinkachónkirá ch'án.

⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xrā chrókjuich'e.

⁵ Mé kjaxin xikaha tí jeheni kjónté nchónhyani la ts'ónani jnkokoá cuerpo kuènte Cristo. Mé xikaha jnkokoá chrókjuenkayáxinni kíxin ó k'ónani jnkokoá cuerpo.

⁶ Dios kjuanjon nchónhya clase xrā éxí tjinkaon ch'án chróchjéhe ch'án jnkoinko chojni tí xrā. Ntá t'ichjánxin jina

† 11:35 Isaías 40.13-14

sich'eni tí xṛa kjuanjon ch'án. A ntá tí kjuanjon ch'án kjuachaxin kixin tsochronkaxínni tí tan kuènte ch'án ntá t'ichjánxìn sich'eni tí xṛa éxí titekaonni ch'án.

7 A ntá tí kjuanjon ch'án xṛa tsjinkĩtsani í jnko nkexro ntá t'ichjánxìn jína sich'eni tí xṛa a. A ntá tí nkexro tsík'áyéhe kjuachaxin tsjako la t'ichjánxìn jehó tí xṛa a chrókjuako.

8 Tí nkexro tsík'áyéhe kjuachaxin nchexraxinkaon í jnko nkexro la kaín asén chrókjuich'e ch'án tí xṛa a. A ntá tí nkexro tsjanjon ichrén nkehe la chrókójiehya chrókjuanjon ch'án. A ntá tí nkexro t'etōan la jína chrókjuich'e ch'án xṛa la ko tí nkexro chrókjuinkĩtsa tí sín chóntahya la kjuaxróxin chrókjuinkĩtsa sín.

Tí nkehe chrókjuich'e tí sín tinkáchónki Cristo

9 Kaín asánrá chrótjuèherá kichuárá. Chrókuĩtoherá tí nkehe jínahya tjenkayáxinrá la chrókjuenkayáxinrá tí nkehe jína.

10 Chrótjuèherá kichuárá la ko chaxín chrókjuĩkosáyehérá kichuárá.

11 Chrókósáhyará la chrókjuich'eherá Ìnchéni xṛa kaín asánrá.

12 Chrókócháhará kixin tjejóchónhénrá la chrókóninkákonhyará kjónté chrókjuasótiará. Chrókuĩtoéhyará chrónixjehérá Dios.

13 Chrókjuinkĩtsará tí sín tinkáchónki Ìnchéni tí chóntahya sín nkehe sine sín. Chjehérá kjuachaxin ts'ejó tí sín tsjijnixjahará sín.

14 Nixjehérá Dios la tsjancheherá ch'án kixin sincheyaon ch'án tí sín chonkíhará. Tjancheherá Dios tsjinkĩtsa tí jehe sín la jehya kixin chrókóninkákonhénrá sín.

15 Tócháħakoárá tí sín tjejóchéhe sín la ko tí tjejótsjánka sín la koirá chrótsjankará.

16 Kjuaxróxin chrók'uejorá. Chrókjuĩnchehnkehyará. Náhi. Chrókóyóħará éxí tí sín nõa. Chrókjuĩnchehnkehyará kixin nohará.

17 Chrókjuich'ehyará jínahya tí sín kjuít'ahará ichrén nkehe jínahya. Náhi. Íchá jína chrókjuákoxínrá nkehe jína kixin chrók'uikon kaín chojni.

18 Chrókjuéyará jnkojína chrók'uejórá. Éxí nkexrí chrókjuachará la kjuaxróxin chrók'uejorá kaín rá.

19 Tjuħhará kichó ni, la chrókjuĩnchekjasótehyará jahorá tí sín ichrén nkehe kjuít'ahará. Náhi. Tjtoherá kixin Dios sinchekjasóte tí sín a. Ntáchro xroon itén Dios kixin: "Ixṛa kuèntana sjntakitoaxián tíha. Janhan tsjénkaħa tí sín a, ichro Ìnchéni."*

* 12:19 Deuteronomio 32.35

20 Kjaxin ntáchro xroon itén Dios kixin: “Tí sín nínkakonhan t'enxín sín kjinta la chróchjehé sín nkehe chrókjóné sín la tí t'enxín sín ntá la kjaxin chróchjehé sín nkehe chrók'ui sín. Mé xikaha chrókjuich'e kixin chrókósuèhè sín kixin tí nkehe kjuich'e sín.”†

21 Chrókujtoéhyará kixin chrókjuacha tí nkehe jínahya chrók'ueṭuānhanrá. Náhí. Chrókjuich'erá tí nkehe jína kixin chrókjuachahya tí nkehe jínahya chrók'ueṭoan.

13

1 Kaín chojni t'ichjánx̄in sinchexiteyéhè sín tí gobierno kixin tí kjuachaxin chónṭa sín la Dios tsíkjanjon kixin kohya nijnko gobierno chrók'uejó tí jehya kjuachaxién Dios.

2 Mé xikaha tí sín tjanjonko tí sín t'ēṭoan la kjaxin nínkakonhen sín tí nkehe k'ueṭoan Dios. A ntá tí sín xikaha ch'e la mé jehe sín tjejá sín jiē tsjasótexín sín.

3 A ntá tí sín gobierno t'ēṭoan la sinchekjasótehya sín tí nkexro titekaon ch'e nkehe jína. Náhí. Tsonínkakonhen sín tí nkexro ch'e tí jínahya. Tí tjinkáonrá tsonínkakuanhyará sín la chrók'uejorá jnkojína. Chrókjuinchexiteyéhérá sín kixin chrókónínkakuanhyará sín.

4 Kixin Dios k'ueṭoan tí xṛa tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhí. Chónṭa sín kjuachaxin sinchekjasótiará sín kixin jehe sín la Dios k'ueṭoan tjejó sín tí xṛa a kixin sinchekjasóte sín tí sín jínahya tjenkayáxin.

5 Mé xikaha t'ichjánx̄in sinchexiteyéhérá tí gobierno la jehya jehí kixin chrókjuinchekjasótiahýará sín. Náhí. Ó jehí jahará chróxráinkáonrá kixin t'ichjánx̄in sinchexiteyéhérá sín.

6 La kjaxin jehya táhó. Náhí. T'ichjánx̄in chrókjuenkehérá gobierno tí chichaon kuènte tí xṛa ch'erá tjanchia sín kixin tí gobierno la Dios k'ueṭoan tjejó sín t'ēṭoan sín.

7 Kjaxin chrókjuenkehérá kaín chojni tjasikéhérá. Tí nkexro síká kuènte xṛa la chrókjuenkā sín kuènte tí xṛa, la tí nkexro síká ichrén nkehe nchekji ntá tíha kjaxin chrókjuenkā sín, la kjaxin chrókjuikosáyehérá tí sín t'ēṭoan.

8 Kjaxin chrókjuasikéhyará ninkexró. T'ichjánx̄in chrótjuèherá kichuárá kixin tí nkexro tjuèhe kichó la mé xikaha kjuinchexiteyá tí nkehe k'ueṭoan tí ley.

9 Kixin ntáchro tí mandamiento kixin: “Tjakéhya asánrá í jnko chojni chjin la ko t'oyánhyará kichuárá la ko tēehýará la nixjahýará kjuach'ia kuènte í jnko chojni. La ko tjaké hya

† 12:20 Proverbios 25.21-22

asánrá nkehe ókjé.”* Kaín tíha la ko í so nkehe t'etōan Dios mé tienxínni t'axrjexín kixin: “Chrótjuèheni kichó ni éxí tjuèxín asénni.”

¹⁰ Tí chojni tjuèhe kichó la ninkehó nkehe jínahya sich'ehe kichó. Mé xíkaha chrótjuèhe kichuárá la mé xíkaha mé chróxitayá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejótsheni chrók'uajuahyani. Tí nkexro tsaáxinni la í séhya itsi ch'án ijie, a ntá tí kjuankíxinni kuítekaonni itén ch'án la ísé tsixín ch'án.

¹² A ntá tí tie la í séhya tsjak'e kixin ó tsi tí t'inkáséyan la chrókuítóheni tí nkehe ch'eni kuènte sítié la chróchóntani kjuachaxin kuènte Nchakuen Dios kixin tsjinkítsa ts'ajini tí t'inkáséyan, éxí ijnko soldado t'inkáyate ch'án ka tsík'óna chica kixin kohya nkehe tsonhen ch'án.

¹³ Chrók'uejóni jnkójina éxí nkexrí chrók'uajini chaxín ntoá tí t'inkáséyan a. Chrókjuasinhyani kia chrókjuanjonxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjuedayáhyani kjuanínkaon la ko chrókóchjinoxíenhyani.

¹⁴ A ntá jahará tákjára tí kjuachaxin kuènte Ìnchéni Jesucristo tsjinkítsará la tíha mé éxí chrók'uínkayára nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjóntahyará kichuárá

¹ A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjóntahyará ch'án kjónté kánhyó nohe ch'án.

² A ntá iso sín chaxín nohe sín la tjinkaon sín chrókjóné sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín.

³ Tí nkexro chrókjóné kaín nkehe chrókjonjéhya tí nkexro tjinkaon chrókjónéhya nkehe. A ntá tí sín chrókjónéhya nkehe chrókjontahya sín tí sín chrókjóné sín kaín nkehe kixin kjónté xíkaha la Dios tsakja tí jehe sín.

⁴ ¿Xá nkexro jaha kixin chrókjóna tí nkexro ch'ehe xṛá í jnko nkexro? Tíha la xṛá kuènte tí lámóé ch'án tsontáchro á jína kjuích'e ch'án xṛá o náhí. A ntá kjá tsjak'e ch'án jína kixin

* 13:9 Éxodo 20.13-15, 17; Deuteronomio 5.17-19, 21; Levítico 19.18

Ìnchéni chón̄ta ch'án̄ kjuachaxin tsjinkĩtsa ch'án̄ tsjak'e tí ch'ín̄ a jína.

⁵ Iso sín tjenkayáxin sín kixin imá tjetōan ijnko yaon a ntá í jnko yaon la náhí. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín.

⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xikaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xikaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kixin jehóni chrók'ueṭoanni la ko jehya jehí chrók'uenni.

⁸ Tí tjejóni la tjejóni kixin sich'ehe ni xra Ìnchéni la kjónté its'enni la kuènte ch'án̄ tí jeheni. Méxra kjónté chrók'uejóchónni o kjónté chrók'uenni la kuènte ch'án̄ tí jeheni.

⁹ Méxra xikaha ntá Cristo la ik'uén ch'án̄ la ko xechón ch'án̄ inaá kixin k'óna ch'án̄ Ìnché tí sín tsík'en la ko tí sín tjejóhón.

¹⁰ A ntá jahará la, ¿nkekuènte tjóntará tí kichuárá o nkekuènte chontehyará kaín sín kjuasáya? Kixin kaín ni tsochjinani tí tjen Dios kixin tsontáchro ch'án̄ á jína xra kjuích'eni o náhí.

¹¹ Ntáchro xroon itén Dios kixin:

Méxra janhan takjénxian asenná, ichro Ìnchéni, kixin tí tjeñ la ts'ejóxin toh'in kaín chojni

kixin kaín chojni la tsjanchia sín kjuasáya kixin janhan mé Dios kuènte sín.*

¹² Mé xikaha jnkojnkonni chrókónoheni kixin tsochenkani Dios nkexrí kjuích'eni.

Tjachruehyará kichuárá

¹³ Méxra chrókjóntahyará kichuárá. Íchá jína kixin ninkehó nkehe chrókjuích'ehyará kixin ntá tí sín kichó ni chrókjuasinxinhya sín jie kixin tí chrókjuasin sín jie ntá xikaha chrók'uitjáyanxín tí tinkáchónki sín Ìnchéni.

¹⁴ Janhan tinkáchónkia Ìnchéni Jesús la ntá xikaha ó nòna kixin kohya ninkehó nkehe jehí tjuáhya. A ntá ijnko nkexro tjenkayáxin kixin jehya nkehe jína tíha ntá chaxín tjuáhya tí nkehe kixin xikaha tjenkayáxin ch'án̄.

¹⁵ Tí tjenkayáxin tí kichuá kixin tí nkehe inte la ntoáhya a ntá tí xikaha ch'e la tjuèhya tí kichuá. Kixin jehya tí nkehe

* 14:11 Isaías 45.23

chrókjón_te ó chrókjuinchek'itjáyanxián tí kichuá kixin Cristo k'uenyákonhen ch'án kjaxin.

¹⁶ Chrókjuich'ehyará nkehe jínahya kixin ntá xikaha chrók'uantaxínhin sín tí nkehe jína tinkachónkirá.

¹⁷ Kixin tí kjuachaxién Dios la jehya tí nkehe chrokjóneni o tí nkehe chrokuini. Náhí. Tí tjen tí kjuachaxién Dios la chrók'uejóni jnkójina la ko kjuaxróxin chrók'uejóni la ko chrókóchéheni kixin chóntani Nchakuen Dios.

¹⁸ Tí nkexro ch'ehe Cristo xra mé chrókjuinchechéhe Dios la ko chrókjuinchechéhe chojni.

¹⁹ Mé xikaha chrókjueyáni kaín tí nkehe tjikao kjuaxróxin kixin ntá tsjinkitsani tí sín kichó ni kixin ntá kjaxin sín antsí chrókuinkáchónki sín Ìnchéni.

²⁰ Chrókjuinchek'itjáyanhyará tí xra kuente Dios kixin tí nkehe chrókjón_terá ó kixin kaín nkehe chrókjón_terá la ó tsíkjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyanxín tí nkehe tinkáchónki sín.

²¹ Ntá íchá jína chrókjón_tehyará into la ko chrók'uihyará vino la ko ninkehó nkehe chrókjuich'ehyará tí xikaha chrókjuasixín jje kichuára.

²² Tí nkehe tinkachónkirá la jahóra chrókónohará kixin Dios la tjetsjehe ch'án. A ntá jína tsjak'e tí nkexro tí chrókjuasixínhya ch'án jje tí nkehe tjenkayáxin ch'án.

²³ A ntá tí nkexro ine nkehe la tjenkayáxin sín kixin tsjasixín sín jje ntá chaxín xikaha yamá sín jje kixin kénhya asén sín kjóne sín tí nkehe. La tió kénhya asén sín tjenkayáxin sín la ó kjuasin sín jje.

15

Nchechéhé_rá kichuára la jehya jahóra

¹ Tí antsí tinkáchónkini Ìnchéni ntá chrókjuinkitsani tí sín kánhyó tinkáchónki tí jehe ch'án la chrókjuich'ehyani tí nkehe chrókóchéxinni jehóni.

² Kjaxin kaín ni chrókjuinchechéheni kichó ni kixin chrók'uejó sín jína la ko kixin antsí chrókuinkáchónki sín Ìnchéni.

³ Kixin kjaxin Cristo kjuich'ehya ch'án tí nkehe chrókóchéxin ch'án jehó ch'án. Náhí. Kjuínchexiteyá ch'án éxí ntáchro xroon itén Dios kixin: “K'uinka kjuasótexinna kaín tí kjuanínkaon chón_ta tí sín nínkakonhen Dios.”*

⁴ Kaín nkehe chrónka xroon itén Dios senó la tsíkjin sín ósé kixin chrókónoheni kixin ntá chrók'uejóchónhenni la chrókónínkakonyani kixin tíha mé nchechéheni.

⁵ Dios, mé tí nkexro tjinkitsani la ko nchechéheni, la kjaxin tsjinkitsa ch'án tí jahará kixin ts'ejorá jnkójina la ko

* 15:3 Salmo 69.9

jnkokón tsjenkayáxinkoará kíchuará kixin xíkaha kjuakoxin Cristo Jesús.

⁶ Kixin kaín ni jnkokoá chrók'uákjenxinni Dios la chrókjuancheheni kjuasáyé ch'án mé jehe ch'án mé It'é Ìnchéni Jesucristo.

Tí tan jína xrakohé tí sín jehya judío

⁷ Chrókjuánjonrá kjuachaxin ts'ejó í so chojni la chrótjuèherá sín kixin éxí Cristo tsík'áyéhe ch'án tí jahará mé xíkaha tsjikosáyehérá Dios.

⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsíchenka Dios tí sín tsík'axrjeníxinni ósé kixin xíkaha tsjakoxin kixin Dios la jína ch'án la sinchexiteyá ch'án tí nkehe tsíntáchro ch'án.

⁹ La kjaxin ikui ch'án kixin kjónté tí sín jehya sín judío la chrokjuanchehe sín kjuasáyé Dios kixin kuikonóehé ch'án sín éxí chrónka tí xroon itén Dios kixin:

Janhan la ko tí sín tjejó ókjé nación mé tsjancheheni kjuasáyé Dios

la ko tsotsjeni himno kixin ts'ákjenxinni ihnjé ch'án.†

¹⁰ Kjaxin ntáchro í jnko parte xroon itén Dios ínaá kixin:

Tsocháhakoará kaín tí sín kuènté Dios.‡

¹¹ Kjaxin ntáchro xroon itén Dios ínaá kixin:

Tjanchehérá kjuasáyé ìnchéni Dios kaín rá kjónté jehya judíora mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkjin kixin:

Ts'axrjeníxin ch'ín Isaí ijnko nkexro

la ts'etuñhen ch'án kaín tí sín jehya judío,

a ntá tí sín a mé tsínkáchónki sín tí nkexro a.*

Mé xíkaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe ch'án kixin ntá ts'ánkí tí kjuachéhe tjejóchónhenni kjuachaxièn Nchakuen ch'án.

¹⁴ Kíchóni, chaxín tónòna kixin jahará la jína tjejora la kaín xín kjuaxrexinkaon jína tjenkayáxinrá la nohará tsjínkĩsará chénkará kíchuará.

¹⁵ La kjónté xíkaha la chrakonhya ikjian tí xroon i chr'anhánrá xrjanca kaín tí nkehe kixin chrók'uitjáyanhyará chrórxáinkáonrá kaín nkehe. Mé xíkaha it'a tí xra kixin kjuasáyé Dios kjuanjon ch'án tí xra.

¹⁶ Kixin sjt'aha Jesucristo xra tsotjanca tí sín jehya judío tí itén Dios. Tí xra mé tjákua tí tan jína tsaáxin chojni kixin ntá

† 15:9 2 Samuel 22.50; Salmo 18.49

‡ 15:10 Deuteronomio 32.43

§ 15:11

Salmo 117.1

* 15:12 Isaías 11.10

janhan tsjánjuan tí sín jehya judío ts'áyéhe Dios éxi ijnko nkehe tsoxrjínhin ch'án kixin Nchakuen ch'án kótjuáxin sín.

17 Janhan mé ijnko chojni tinkáchónki Cristo Jesús la mé xikaha siín kjuachaxin tsochána kixin t'ahá xra Dios.

18 Chrokjuahya tsohnke tsontáxrjan í jnko nkehe. Jehó tsoxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuítekaon sín kixin tí itan kjuákua la ko tí nkehe jina kjuít'a.

19 Kixin tí kjuachaxién Dios mé kjuákoxián tí kjuásian kjuaxroan la ko kjuákoxián tí kjuachaxin kuènte Nchakuen Dios. Mé xikaha kjuintaxíxin kjuákua tí tan jina tsaáxin chojni Cristo xrankíxín chjasin Jerusalén la nkuíxín chjinaxón ntiha la hasta estado Ilírico.

20 Mé xikaha tjínkavan tsjìkjàkua tí tan tsaáxinni tí chjasin naxa tienhyé sín ihnié Cristo kixin tí janhan tjínkakhya tsjìxrónkáxián tí xra kuènte í jnko chojni xráxín tjech'e xra.

21 Íchá jina éxi ntáchro xroon itén Dios kixin: Chrókuinhin tí sín naxa kienhyé sín tí tan kuènte tí jehe ch'án. La ko chrókienxín tí sín naxa kienhyé tí tan kuènte ch'án.†

Ch'ín Pablo tjenkayáxin ch'án sátsji ch'án chjasin Roma

22 Nchónhya veces tjínkavan chrókjuasántsjaḥa tí jahará kjánchó naxa xitjahya kjuasán ntiha.

23 Kjánchó ijie la ó kjuixinna tí xra nkuíxín tí tjèn ntihi. Ntá itsjé nánó tjínkavan chrókjuasántsjaḥa tí jahará

24 a ntá ijie ts'atsínka tsonixjahará tí sátsjia nación España. Ntá tsochána ts'íkuán tí jahará ntá tsjixin ntá chr'éxin tjínkavan kixin jahará tsjínkìtsará tí sátsjia.

25 A ntá ijie la sátsjia chjasin Jerusalén, sátsjìkian tí nkehe tsjinkìtsa tí sín kíchó ni ntiha.

26 Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'énnen sín tí sín kíchó ni ntiha tsochjéhe tí sín nòda tjejó chjasin Jerusalén.

27 Jehe sín kóxrjínhin sich'e sín xikaha kixin tí sín judío tinkáchónki Cristo kjuínkìtsa tí jehe sín tsonohe sín itén Dios. Ntá ijie la jehe sín chrókjuinkìtsa sín inaá chrókjuanjon sín iso tí nkehe chóntha sín chrók'uáyéhe tí sín judío tinkáchónki Ìnchéni.

28 A ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará.

29 Ó nòna kixin tió sátsjia la Cristo mé imá sincheyaon ch'án tí janhan la ko tí jahará.

30 Kíchóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèheni kíchó ni mé

† 15:21 Isaías 52.15

xrjannóahará kixin jnkokoá chrókjuenkayáxinni kixin tí xra tjet'a la ko chrónixjehérá Dios kixin tí janhan.

³¹ Tjanchehérá Dios kixin tsjinkitsa ch'án tí janhan kixin kohya nkehe tsonna kixin kaín tí sín titekakhya Dios síin chjasin Judea. La ko tjanchará kixin jína sátsjikian tí nkehe tsjinkitsa tí sín kichó ni tjejó chjasin Jerusalén kixin jína chrók'uáyéhe sín.

³² Ntá tí tjinkaon Dios la tsöchàna tsjasán ti tjejorá jahará la ko kjuaxróxin tsjak'é tí tsjasántsahará.

³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehe ch'án tí sín chóxin ch'án

¹ Tétuanhanrá tsjinkitsará tí tjan kichó ni Febe ch'e tjan xra ninko chjasin Cencrea

² mé tjánjonrá kjuachaxin tsjak'e tjan kjuachaxiéin ihnié Ìnchéni éxí ch'eherá í so sín kichó ni tinkáchónki Ìnchéni. Tsjinkitsará tjan ichrén nkehe t'ichjánxinhin tjan kixin jehe tjan kjaxin kjuínkitsa tjan nchónhya chojni la kjaxin kjuinkitsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuích'ekoni xra kixin kjaxin sín mé ch'ehe sín Cristo xra.

⁴ Jehe sín chrók'uenxín sín kixin kjuínkitsana sín tí janhan mé xikaha tjahá sín kjuasáya la jehya janhván, kjaxin kaín sín kichó ni ninkoé tí sín jehya judío.

⁵ Nixjehérá kjaxin kaín kichó ni tóchjina ntøe tjan Priscila la ko ch'ín Aquila. Nixjehérá tí ch'ín choxian jína Epeneto mé jehe ch'án la saxín kuítekaon ch'án Cristo estado Acaya.

⁶ Nixjehérá tjan María kixin kjaxin tjan kjuích'e tjan xra tí tjejorá ntiha.

⁷ Kjaxin nixjehérá tí sín tsíkixin chjasenná mé ch'ín Andrónico la ko ch'ín Junias. Tí k'uikjèna ntøechiso la kjaxin tí jehe sín k'uikjehe sín. Kjaxin kaín tí í so sín apóstol la tjikosáyehe sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tjuahá tinkáchónki Ìnchéni.

⁹ Nixjehérá ch'ín Urbano kixin jnkokoá kjujt'akian ch'án xra kuènte Jesucristo la ko nixjehérá tí ch'ín choxian Estaquis.

¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo.

¹¹ Kjaxin nixjehérá tí ch'ín kjéhyana Herodión la ko kjaxin nixjehérá kaín tí sín kjéhya ch'ín Narciso kixin kjaxin sín tinkáchónki sín Ìnchéni.

12 Nixjehérá tjan Trifena la ko tjan Trifosa. Kjaxin jehe sín kjuich'e sín xra kuènte Ìnchéni la ko nixjehérá kjaxin tí tjan kichó ni Pérsida. Kjaxin kjuínkĩtsa tjan kjuich'e tjan xra kuènte Ìnchéni.

13 Kjaxin nixjehérá ch'ín Rufo, ijnko chojni tsíkjeýá Ìnchéni la ko nixjehérá tí ìné ch'án kjaxin kixin kjaxin tjan kjuínkĩtsa tjan tí janhan la éxí naná k'uíquau tí jehe tjan.

14 Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kichó ni tjejóko tí jehe sín ntiha.

15 Nixjehérá kjaxin ch'ín Filólogo la ko tjan Julia la ko ch'ín Nereo la ko tí tjan kichó ch'án la ko ch'ín Olimpas la ko kaín tí sín kichó ni tinkáchónki Ìnchéni tjejóko sín ntiha.

16 Kjaxin tsehérá tja kíchuará kjuachaxin ihnjé Ìnchéni. Kaín tí sín nĩnko kuènte Cristo ntihi xraxinkaon sín tí jahará la nixjehérá sín.

17 Kichóni, xrjanóahará kixin chrótsjehérá nkexro tí sín tjixrónkaxin chrók'óxika tí sín jnkokoá tinkáchónki Ìnchéni. Jehe sín titekakonhya sín tí itén Dios kjuákohará k'uitjará. Tí xikaha ch'e sín la chrók'uaxrjekjanxínrá ntiha.

18 Tí nkexro xikaha ch'e la jehya Ìnchéni Jesucristo ch'ehe xra. Náhi. Jehí tjinkaon sín chrókjuixrónkaxin sín la nixja sín tí nkehe náxrjón ó la xikaha ch'iyehé sín asén tí chojni naxa noehya.

19 Kaín chojni ó nohe kixin jahará la ó kuítekáonrá Ìnchéni. Mé xikaha chàna tí janhan la tjínkavan chrókóxakonhanrá chrókjuich'erá xra jina. Jehya kixin chrókjuich'erá nkehe jínahya.

20 Tí Dios tjanjon kjuaxróxin mé tjoka tsinkátja Satanás, í ts'etueñhya. A ntá Ìnchéni Jesucristo mé sintayaonrá ch'án.

21 Ch'ín Timoteo nixjehérá ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjehérá sín.

22 Janhan Tercio ikjian tí xroon i k'uetqan ch'ín Pablo la kjaxin nixjehérá kjuachaxièn Ìnchéni.

23 Ch'ín Gayo nixjehérá ch'án. Jehe ch'án kjuanjon kjuachaxin kjuak'é janhan ntq̄e ch'án la ko kaín tí sín kuènte nĩnko tójnkotsé ntq̄e ch'án. La ko nixjehérá ch'ín Erasto. Jehe ch'án mé tesorero kuènte chjasin la ko tí ch'ín kichó ni Cuarto kjaxin nixjehérá ch'án.

24 Ìnchéni Jesucristo sincheyaon ch'án kaín tí jahará. Amén.

25 Ntá ijie tsjancheheni kjuasáyé Dios kixin jehe ch'án tjinkĩtsa ch'án kixin jina chrók'uejorá éxí chrónka tí tan jina tsaáxinni la ko éxí kjuakoni kuènte Jesucristo. Tíha mé

chaxín chrónka éxí Dios k'uętoan nchenoheni ch'án tí nkehe ninkexró k'uénoehya desde k'óna chjasintajni.

²⁶ A ntá ijie kaín ni tşonoexínni nkexrí nixja xroon ikjin tí sín profeta kíxin nkexrí k'uętoan Dios itjen jnkochrín. Ntá kaín nkehe k'uénoehya ninkexró a ntá tşochóxin kuenté chjasintajni kíxin tsinkáchónki sín la ko tsitekaon sín Dios.

²⁷ Itjen jnkokoá Dios la jehó ch'án imá nohe ch'án la jehó ch'án mé tjancheheni kjuasáya kíxin tinkáchónkini İnehéni Jesucristo jnkochrín. Amén. Ó tjen.

Tí xroon saoxín ikjin ch'ín Pablo chr'énhen ch'án tí sín tinkáchónki Cristo síin chjasin Corinto

Ch'ín Pablo mé ikjin ch'án xroon ichr'án ch'án tí nínko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókjuít'ahá ch'án xra. Janhan la ko kichó ni Sóstenes mé

² ikjinni tí xroon i chr'ánhanráni tí jahará tójnkotsérá nínko chjasin Corinto. Ó kjuínchetjóará Ìnchéni Jesucristo na mé kjueyára Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xíkaha kjueyá ch'án kaín xín tí sín tjanchehe sín ìnchéni Jesucristo kixin chrókjuinkítsa ch'án sín, tíha mé Ìnché sín la ko Ìnchéni.

³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochríxín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús.

⁵ Na mé Dios tjáhará kjuachaxin kuènte ch'án ntá xíkaha antsí jína nohará chrónkaxínrá kixin nkexrí tinkachónkirá Ìnchéni la ko kjaxin antsí jína tiénxinrá kaín nkehe chaxín ntoá.

⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá.

⁷ Ntá jahará ó chontará kaín xín tí kjuachaxin kuènte Nchakuen Dios, la í ninkehó t'itjáyankíhya tí kjuachaxin kuènte ch'án k'uayéhérá nachrohe tjejochonhénrá tsokjan Ìnchéni Jesucristo.

⁸ Ntá Ìnchéni ts'ayakonhanrá ch'án kixin tsjtoéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án.

⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsíkjayará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

10 Kíchóni, xrjanóaxínrá tí kjuachaxin ihníé Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxin koará kichuára.

11 Kíchóni, ó kuñhan tí nkehe chrónka tí sín kjéhya ch'ín Cloé kixin siín kjuanínkaon tí tjejorá tójnkoá ntiha.

12 Na mé ntáxrjan kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin jahará chréhérá tí ch'ín Pedro, la ko í sorá ntáchrórá kixin chréhérá Cristo.

13 ¿Xá nkekjaín Cristo siín kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitexínrá tí nina ní?

14 Tjáncháha Dios kjuasáya kixin nijnko tí jahará kuíkitiahyará ntiha. Jehó ch'ín Crispo la ko ch'ín Gayo mé kuíkite janhan.

15 Na mé nijnkorá xitjahya tsontáchrórá kixin nina kuíkitexínrá.

16 Kjaxin jehó kuíkite tí ch'ín Estéfanos la ko tí sín kjéhya ch'án. Xráxinkakonhya á kuíkite í so sín o náhí.

17 Kixin tí xrá chjina Cristo jehya kixin chrókuíkite chojni. Náhí. Tí xrá chjina Ìnchéni kixin tsóxrjan kaxián tí tan tsaáxinni. Tjínkakonhya kixin chrókjuákoáxián palabra náxrjón noi kixin xikaha chrókjuákua ntá chrókjuíntamá tí kjuachaxin jié kónoxín tí k'uénxin Ìnchéni Jesús tí ntacruz, kjuák'enkáni ch'án, k'uényákonhenni ch'án.

Cristo mé tjákoáxin tí kjuachaxién Dios la ko tjákoáxin ch'án kixin imá nohe Dios

18 Chronkaxinni kixin k'uényákonhenni Cristo tí ntacruz. A ntá tí tsinhin tí sín xráxín ts'itjáyán ntá ts'ikon sín tíha éxi nkehe chónkó. A ntá kaín ni chojni kuaáni mé t'ikonni kixin kjuachaxin jié tíha.

19 Mé xikaha ntáchró xroon itén Dios tsíkjin sín ósé kixin Dios mé sinchek'itjáyán tí nkehe tjenkayáxin tí sín imá nohe, la ko tsítóenta ch'án tí nkehe ntáchró tí sín imá tienxín sín.*

20 ¿Mé nkehe tsonhen ntáchró sín kixin imá nohe sín la ko nkehe tsonhen tjáko sín la ko nkehe tsonhen tí imá nohe sín nixja sín? Táha la nkehe siín chjasintajni ó. A ntá Dios mé t'ikon ch'án kixin lontj sín kixin xikaha ichro sín.

21 Kixin Dios antsi nohe ntá xikaha kuítóehya ch'án kixin kjuachaxin kuènte sín ó chrókjuacha sín chróchóxixín sín ch'án. Ntá kóxrjínhin Dios chrókjuéyá ch'án chrókjuínchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

* 1:19 Isaías 29.14

22 Tí sín judío mé tjinkaon sín chrók'uikon sín kjuaxroan jié, ichro sín. A ntá tí sín nkíva griego mé xritjeyá sín kixin antsí chrókónohe sín, ichro sín.

23 A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjakoxinni. Chrónkani kixin ijnko ntacruz kjuák'enkání ch'án, k'uénxin ch'án. A ntá tí sín judío ntáchro sín kixin ijnko nkehe chrókósuèheni chrókuinkáchónkini tíha, ichro sín. A ntá tí sín jehya judío ntáchro sín kixin chojni lontí tí jeheni kixin xíkaha tinkáchónkini, ichro sín.

24 A ntá tí sín kjueyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhenni ch'án. Mé xíkaha tjakoxin Dios tí kjuachaxin jié la ko tí kjuaxrexinkaon jína kuènte ch'án.

25 Ntá jehe sín ntáchro sín kixin éxí ijnko nkehe chónkó tí nkehe kjuenkayáxin Dios, na kjónté xíkaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjaxin ntáchro sín kixin jiéhya tí kjuachaxin chóna Dios. A ntá tí sín antsí má chóna kjuachaxin ntihi chjasintajni kjónté la tóyóehya sín Dios kixin antsí chóna ch'án kjuachaxin t'etóan ch'án.

26 Kíchóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxí t'ikon tí sín chjasintajni la kjónté kjueyará Dios tí jahará. La ko tsjéhyará imá kuétóanrá la ko tsjéhyará k'uaxrjeníxinrá tí sín imá k'uék'etóan.

27 Ntá kjónté Dios mé kjueyá iso tí sín noehya éxí t'ikon tí sín chjasintajni kixin xíkaha tjinkaon ch'án chrókjuinchesuèhe ch'án tí sín imá nohe ntihi chjasintajni. La ko kjaxin kjueyá Dios iso tí sín chónahya kjuachaxin éxí t'ikon tí sín chjasintajni kixin xíkaha tjinkaon ch'án chrókjuinchesuèhe ch'án tí sín imá chóna kjuachaxin ntihi chjasintajni.

28 Dios mé kjueyá ch'án iso tí sín t'etóanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuinchek'itjáyan ch'án kjuachaxién tí sín jehó chrók'uetoan.

29 Méxra xíkaha ninkexró tsjachahya sinchehnke tí tjen Dios.

30 A ntá tí kjuachaxin kuènte Dios mé tinkáchónkirá Cristo Jesús, a ntá chónaxinni Cristo kjuaxrexinkaon jína, la ko tí kjuachaxin kuènte ch'án kóxíka tí jié kuènteni, la ko tí kjuachaxin kuènte ch'án sinchetjuáxinni ch'án, la ko tí ijnié ch'án k'uénaxinni ch'án.

31 Mé xíkaha éxí chrónka tí xroon tsíkjin sín ósé ntáchro kixin: "Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kixin

imá t'etōan tí kjuachaxin kuènte Dios.”†

2

Ch'ín Pablo mé tjako ch'án kixin Jesucristo kjuák'enkáni ch'án ntacruz

¹ Kíchóni, tió kjuasán ntiha chjasánrá níxjāhará chrókjuákoahará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá.

² Kíxin tió k'uéjóni jnkokoá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz.

³ K'uéjóni jnkokoá ntiha la ntá jahará ó nohará kixin janhan kjuak'é éxí chrókjuachahya kixin síxránkana, chràkonna.

⁴ Tí kjuankíxian níxjāhará la ko xrjankaxián tí tan tsaáxin chojni, la tjínkakhonhya chrókjuáchruàxinrá tí nkehe náxrjón níxja chojni tsíkónohe má. Náhi. Tió kjuákohará kónoxín kixin tjékian Nchakuen Dios la ko kónoxín tí kjuachaxin jié kuènte ch'án,

⁵ kixin jehya kjuaxrexinkaon kuènte chojni tsíkónohe má chrókuinkachónkirá. Náhi. Tí kjuachaxin kuènte Dios mé chrókuinkachónkirá.

Nchakuen Dios mé tsochóxixínni ch'án

⁶ Kjánchó tió tjáqohā tí sín chaxín ó nohe sín tinkáchónki Ìnchéni mé xrjanka tí kjuaxrexinkaon àntsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etōan chjasintajni, na mé tí kjuachaxin kuènte sín la tjoka ts'itjáyan.

⁷ Jeheni mé àntsí chrónkani tí nkehe jehó Dios nohe, na mé tí nkehe tsíkjenkayáxin ch'án naxā k'ónahya chjasintajni kixin nkexrí tsaáxinni.

⁸ Nijnko tí sín t'etōan chjasintajni kienxínhya sín tí nkehe tsíkjenkayáxin Dios. A ntá tí chrókienxín sín tíha la ntá chrókjuák'enkanihya sín Ìnchéni tjetoan tí ntacruz.

⁹ Éxí ntáchro xroon itén Dios tsíkjin sín ósé kixin: Naxā k'uikonyha chojni la ko naxā kienhya chojni, la ko naxā kjuenkayáxinhya chojni kixin nkexrí siín kaín xín nkehe kjuích'éna Dios ts'áyéhe tí sín tjuèhe ch'án.*

¹⁰ A ntá Dios mé nchenoexínni kaín tíha kixin chóntani Nchakuen ch'án. Na mé tí Nchakuen Dios mé tjetsjehe kixin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

¹¹ Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén.

† 1:31 Jeremías 9.23

* 2:9 Isaías 64.4

Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe.

¹² A ntá jehya tí nchakuen chojni chjasintajni k'uáyéheni. Náhi. Tí Nchakuen kuixin tí tjen Dios mé k'uáyéheni kixin ntá tsonoexínni kixin kaín xín nkehe kjuínchekitonhenni Dios.

¹³ Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhi. Tí Nchakuen Dios mé nche-noexínni nkexrí tsjakoxénni tí sín chóna Nchakuen ch'án.

¹⁴ Kjánchó tí sín naxa chóntahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxí lóco t'ikon sín kaín tíha kixin jehó tí sín chóna Nchakuen Dios mé tsjacha sín tsienxín sín tíha.

¹⁵ A ntá tí nkexro chóna Nchakuen Dios mé chrókjuacha chrókónohe nkexrí siín kaín xín nkehe. Kjánchó tí nkexró chóntahya Nchakuen Dios tsjachahya tsjanchia jie tí jehe ch'án.

¹⁶ Méxra ntáchro xroon itén Dios kixin: ¿Xá ninkexró chrókónohe kixin nkexrí tjenkayáxin Ìnchéni kixin chrókjuacha sín chrókjuakohe sín ch'án inaá?† Kjánchó jeheni la ó chóntani tí kjuaxrexinkaon kuènte Cristo.

3

Tí sín jnkokoá kjuích'ehe sín Dios xra

¹ Mé xikaha, kichó ni, kjuachahya janhan chróníxjahará éxí chojni t'etuèhenen asén sín Nchakuen Dios. Náhi. Éxí chojni naxa nchexiteyéhe sín tí nkehe ntáchro asén sín, na mé éxí xjan ntsíntí na ntá kjuankíxin kuinkáchónki Cristo mé xikaha tí jahará.

² Janhan na kjuákoáxinrá nkehe xrahya éxí yóhe ijnko xjanhnté tí jahará naxa nchekakí iné tsjen kixin naxa xitjahya sine nkehe cha. Mé xikaha tí jahará naxa xitjahya sinterá nkehe cha

³ kixin naxa éxí chojni ó nchexiteyéherá tí nkehe ntáchro asánrá kixin tí naxa siín kjuachjinoxínhin la ko siín kjuanínkaon la ko jnkokoáhya tjenkayáxinrá, la mé tjejoch'erá éxí ch'e kaín xín chojni chjasintajni.

⁴ Isorá ntáchrórá kixin chréhérá tí janhan Pablo, la ko í sorá ntáchrórá kixin chréhérá tí ch'in Apolos. Na mé éxí chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkachónkirá Ìnchéni kixin janhan kjuákoahará. Jnkojnkonni kjuích'eni tí xra kjuanjon Ìnchéni.

† 2:16 Isaías 40.13

6 Janhan kuènkà, a ntá ch'ín Apolos ìntà kjuáka ch'án, a ntá Dios la mé kjuínchek'ánkí ch'án tí nkehe a.

7 Méxra tí nkexro k'uènkaxin la ko tí nkexro tjáka ntà la kánhyó tjetooan kixin Dios mé chóna kaín kjuachaxin la jehe ch'án nchek'ánkí kaín nkehe sín.

8 A ntá tí sín t'enka la ko tí sín tjáka ntà la ó jnkokón ch'e sín xra, a ntá Dios mé tsjenkehe sín jnkojnko tí xra kjuích'e sín.

9 Méxra jeheni mé jnkokoá ch'eheeni Dios xra, a ntá jahará mé éxí tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án.

10 Janhan mé tí maestro ch'éna nchia kixin Dios kjuanjon kjuachaxin tsjaké tí xro xrankíxixín, a ntá í jnko nkexro sich'éna nchia chrítaón tí xro a. A ntá jnkojnko nkexro t'ichjánxin ntoá chrókjuích'éna sín nchia chrítaón tí xro a,

11 kixin kohya ninkexró tsjacha tsjak'e í jnko xro xrankíxixín tí nchia a kixin táha la ó tsíkjixin tsík'óna, kixin Jesucristo tíha.

12 A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xro náxrjón tjete, la ko ìnta tabla, la ko kanj, la ko ntaxro.

13 Na mé tsonoxín nkehe tí xra kjuích'e jnkojnko chojni tió tsi tí yaon tsjixixín. Kixin tí yaon a mé tsi xrohi. A ntá tí xrohi mé tsjakoxin nkexéhe tí xra tsoche la ko nkexéhe tí xra tsochehya.

14 A ntá tí jnkojín chojni kjuích'éna ijnko nchia tsochehya la mé tsjacha ch'án tí xra kjuích'e ch'án.

15 A ntá tí chróche tí nchia kjuích'éna ijnko chojni, ntá chrók'uitjayan kuenté. A ntá tí nkexro kjuích'éna nchia la tsaá éxí yóhe chrókuinkéhe ch'án xrohi.

16 ¿Á noahyará kixin jahará kaín rá na mé ijnko ninkoe Dios la ko Nchakuen Dios mé chóna asánrá?

17 A ntá jnkojín nkexro tjinkaon ts'ókíka tí ninkoe Dios na mé Dios mé sinchek'itjayan tí nkexro xíkaha sich'e kixin tí ninkoe Dios la tjóá tíha. A ntá tí ninko a mé jahará tíha.

18 Ninkexró chrókjuenkayáxin kixin imá nohe. Tí jnkojínrá tónhen asánrá kixin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kixin ntá chrók'uitjára chrók'ónará ijnko chojni chaxín nohe.

19 Tí nkehe nohe tí chojni chjasintajni la mé ijnko nkehe loñtj t'ikon Dios. A ntá ntáchro tí xroon itén Dios tsíkjin sín ósé kixin: “Tí nkehe tsík'itjá sín ch'iyaxín sín la tíha mé tsokjan ts'enxín sín.”*

20 La ko kjaxin ntáchro xroon itén Dios kixin: “Ìnchéni la ó nohe ch'án kixin kaín nkehe tjenkayáxin tí sín ntáchro sín

* 3:19 Job 5.13

kíxin imá nohe sín la mé ijnko kjuaxrexinkaon loṅti tíha, ichro Dios.”†

²¹ Méxra chrókjuinchehnkehyará jahará kíxin chréhérá ijnko chojni imá nohe, kíxin kaín xín nkehe siín la kuèntará jahará,

²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxin, la kaín la kuèntará tí jahará.

²³ A ntá jahará la Cristo mé t'ayakonhanrá. Kíxin Cristo la jehe ch'án la mé kuènte Dios.

4

Tí xra kjuích'e tí sín kjueyá Ìnchéni

¹ Jahará chrók'uikonrá tí jeheni éxí chojni ch'ehó Cristo xra k'uáyéhéni tí xra tjakoni tí nkehe kuènte Dios ninkexró k'uénoehya.

² A ntá ijnko chojni k'uáyéhe xra ts'etōan chrókjuakoxin kíxin jína ch'án la ko jína ch'e ch'án xra.

³ A ntá janhan tóxakonnahya tí nkehe chróntáchrórá jahará chrókjuanchiará jie tí janhan kíxin tí xra t'aha Dios, la ko kjaxin tóxakonnahya tí nkehe chróntáchró í so chojni chjasintajni, chrókjuanchia sín jie tí janhan. Kjaxin janhan la tékahya jie asenná.

⁴ Kjánchó janhan tjenkayáxinhya kíxin chonta jie. Kjánchó jehya xikaha tsontáxrjan kíxin Dios t'íkon kíxin chontahya jie janhan. Náhi. Jehe Ìnchéni mé tsotsjehe ch'án nkehe tí jie chonta janhan.

⁵ Méxra naxa kjuixrakáhya yaon chrókjuinchekitōexínrá ichrén jie. Chonhénrá tí tsi Ìnchéni kíxin jehe ch'án mé sinchenoxín ch'án kaín tí nkehe símá tí sítié, la ko sinchenoxín ch'án kaín xín nkehe imó tjenkayáxixín asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kíchóni, nixjahará tí nkehe í kíxin jína chrók'uejorá jahará ntá xikaha kjuíntayóaxian éxí ch'ín Apolos la ko éxí janhan kíxin chrók'uitjará kíxin chrókjuenkayáxínrá jehó tí nkehe tsíkjin sín ósé, kíxin nijnko nkexro chrókjuinchehnkehya kíxin chréhe sín ijnko chojni, a ntá tsochóntehya sín kjuasáyé tí íjnko chojni.

⁷ ¿Méxra nkexro ntáchró kíxin jahará antsí tjetoaná? ¿Xá nkehe chontará naxa kjuanjonhya Dios kíxin? Tí kjuanjon Dios kaín nkehe chontará, ¿ntá nkekuènte nchehnkerá kíxin jahóra tsikjéyará tíha?

† 3:20 Salmo 94.11

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxi ijnko rey, la í t'ichjánxianhyará ninkehó tí jeheni kixin naxa chrókjuinkĩsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'ueṭoanni.

⁹ Ntá tónhen asenná kixin jeheni chojni kjueyá Ìnchéni mé kjuanjon Dios kixin jeheni chrókjuixixín chrók'uejóni éxi chojni kuĩtonhenni kixin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin.

¹⁰ A ntá jeheni tinkáchónkini Cristo, a ntá xikaha t'ikon sín tí jeheni éxi chojni lontĩ. A ntá t'ikon sín tí jahará éxi imá nohará. Jeheni la éxi chóntahyani kjuachaxin, a ntá jahará la éxi imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín.

¹¹ A ntá kjónté naxa jie jeheni t'enxínni kjinta, la ko t'enxínni nta, la ko chóntahyani ikéni, la ko nínkakohenni chojni, la ko chóntahyani nkeri ts'ejóni.

¹² La ko tóxrjéni kixin itjani ch'exínni xra. A ntá tió t'ántaxínhinni sín la tjancheheni Dios kixin sincheyaon ch'án tí jehe sín. La ko tió chónkíhi sín tí jeheni la tónínkakuenhyani sín.

¹³ Tió t'ántaxínhinni sín la jnkojína tjateheni tí jehe sín. T'ikon sín tí jeheni éxi chjínínó ntihi chjasintajni, na mé éxi ijnko nkehe ninkehó sínkíhya la ko mé xikaha naxa sítónhen tí yaon jie.

¹⁴ Ikjian tíhi na jehya kixin chrókjuintasuhará. Náhi. Tjínkavan chrókjuĩtaxráxinkáonrá kixin éxi xjanna t'ikuān tí jahará, tjuahará.

¹⁵ Kjónté chróchontará ite mil chojni chrókjuákoḥará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonrá Cristo Jesús kixin kjuákoḥará tí tan jína tsaáxinni.

¹⁶ Mé xikaha xrjanóahará kixin chrókjuákoḥxinrá éxi tí janhan.

¹⁷ Méxra kuétuānhan tí ch'ín Timoteo kixin tsjiji ch'án ntiha. Na mé éxi xjanna t'ikuān tí jehe ch'án, tjuahā ch'án, kixin kjuákoḥā ch'án ntá kuítekaon ch'án Ìnchéni ntá xráxín jína ch'e ch'án xra. Ntá tsjiji ch'án syntaxraxinkáonrá ch'án nkexrí tjákoḥian tí ntje Cristo éxi xráxín tjákua kaín xín nínko t'atsinka tí janhan.

¹⁸ Ntá iso tí jahará imá ihnkerá kixin tjenkayáxinrá kixin chaxínhya chrókjuasántsahará.

¹⁹ A ntá tjoka chrókjuasántsahará tí chaxín xikaha tjinkaon Ìnchéni. A ntá jehya jehó tí nkehe nixja tí sín xriko kjuahnke

mé chrókuinhan. Náhi. Na mé ts'íkuān á chaxín chóna sín kjuachaxin kixin xikaha nixja sín.

²⁰ A ntá tí kjuachaxiēn Dios la jehya tí nkehe tsonixjani ó. Náhi. Tí tjakoxinni la tí kjuachaxiēn Dios.

²¹ ¿Nkehe tjinkáonrá tí jahará, kixin á chrókjuasán chrókjuintakjasótiará? o ¿á tjinkáonrá kixin jnkojina chrókjuasán?

5

Tsitoxin ijnko jie tjachehe kichó chojni

¹ ¿Á chaxín tsík'ikon sín kixin tí tjeorá ntiha la ijnkorá mé chontará nájoanrá éxi ichjiánrá? Tíha mé ijnko jie jie, la mé kjónté tí sín chónhya Dios la xikaha ch'e sín.

² A ntá kjónté xikaha tsikónhen la imá ihnkerá. Íchá jina imá chrók'uavará. A ntá tí xikaha ch'e ijnko chojni ntá chrókuétuenhénrá ch'án sáchrókjui ch'án, chrók'uejokoahyará ch'án ntiha.

³ A ntá ntáxrjan janhan kjónté tjenhya cuerpo kuéntana tí tjeorá ntiha la tí tjenkayáxian la ntaha tjèn éxi chrókjuak'é janhan, ntá t'akjénxian ihnié Ìnchéni Jesucristo la ntáxrjan kixin ó kjuixin kjuenkayáxian kixin nkexrí chrókjuasóte tí ch'ín xikaha tsíkjih'e.

⁴ Tió tsojnkotsérá kaín rá ntiha la éxi koyá tsjak'é ntiha la kjánchó nchakuennà ó la ko koí tí kjuachaxiēn Ìnchéni Jesús ts'ejókoará ntiha.

⁵ A ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuente ch'án. Ntá tió tsokjan Ìnchéni mé tsaá asén ch'án.

⁶ Jahará chrókjuinchehnkehýará kixin tí nkehe tsikónhen ntiha. ¿Á noahýará nkehe ntáchro sín, kixin tí ch'o a mé tjiko intsíkoá tí xroān nchek'ánki niotja, ntá kjónté la tsosán kaín tí ch'o?

⁷ Méxra chrókuakítsjerá ntója kaín tí xroān ntaxin nchek'ánki niotja, kixin ntá jahará ts'ejorá éxi niotja tsík'óna ch'o nixin tsíkjikohya xroān nchek'ánki niotja. Éxi niotja ine sín tí yaon pascua, mé jahará tíha. Kixin jehe Cristo, éxi ijnko kolélo t'óyán sín tí yaon pascua, mé k'uenyákonhenni ch'án.

⁸ A ntá chrókjuasinni tí kia a la kaín asénni chróxaxinkaonni, tíha la éxi tí niotja chóntahya xroān nchek'ánkixin. La jehya kixin chrókjuasinni tí kia naxa chróchóntani kjuanínkaon kixin táha la yóhe tí xroān ntaxin nchek'ánki tí niotja a.

⁹ A ntá í jnko xroon chr'anhánrá k'uéntáxrjan kixin ninkehó chrók'uitohýará tí sín tjasin jie chóna chojni chjin ókjé.

¹⁰ Ntá jehya kixin kuétuanhanrá kixin chrók'uitohyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhi. Tí xikaha chrókjuich'erá la t'ichjánxin chrók'uaxrjéxinrá tí chjasintajni.

¹¹ Méxra ó kuétuanhanrá kixin chrók'uitohyará ninkehó jnkójin chojni ntáchro sín kixin kichó ni tí jehe sín, ntá naxa tjasin sín tí jie chóna sín chojni chjin ókjé, la ko tjinkaon sín jehó sín tsochóna sín itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjóntekoahyará sín.

¹² Jehya xraa chrókjuintakitoxián tí ijié tí sín jehya kuènte ninko ntiha. A ntá tí xra kuèntará jahará kixin chrókjuinchekitoexínrá tí ijié tí sín kichó ni tójnkoatsé ninko ntiha.

¹³ A ntá Dios mé sinchekitoexín ch'án ijié tí sín jehya kuènte ninko. Méxra, takítsjekjanxinrá tí ch'ín jínahya kjuasin jie tí tejorá ntiha.

6

Chrókjuikjanchahya sín jie nkayakon tí ch'ín juez tinkáchónkihya Ìnchéni

¹ A ntá jnkójinrá chrókjuánjonkoará kichuára chrókjuikjanchahyará jie nkayakon tí ch'ín juez tinkáchónkihya Ìnchéni. Íchá jína chrókjuirá chróchenkará tí sín tinkáchónki Dios.

² ¿Á noahyará kixin tí sín tinkáchónki Ìnchéni mé sinchekitoexín sín ijié kaín xín chojni chjasintajni? A ntá xikaha sinchekitoexínrá ijié kaín xín chojni chjasintajni, ¿ntá nkekuènte tsjachahyará sinchekitoexínrá kjónté ijnko jie ntsí?

³ ¿Á noahyará jahará kixin kjónté tí sín ángel tsotsjeheni nkehe tí xra kjuich'e sín? A ntá ijnko nkehe intsí ntihyó, la ¿á xitjahya chrókjuásiyóxinrá?

⁴ A ntá xikaha chrókjuánjonkoará kichuára, ¿ntá nkekuènte tjíkjanchiará jie nkayakon tí sín tikiínixinhya kuènte ninko?

⁵ Ntáxrjan xikaha kixin chrókjuintasuàhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijié kichó ni?

⁶ Jahará jnkokoá kichuára ntá tjanjonrá, la ko kjaxin sátjíkjanchiará jie nkayakon tí ch'ín juez tinkáchónkihya Ìnchéni.

⁷ Kjónté ijnko jie ntsí ntá imá tjanjonkoáxinrá kichuára; tíha mé t'óna ijnko jie jié. Íchá jína chrókóninkákonhyará kixin tí

nkehe jínahya kjuít'ahará sín. Íchá jína chrókuítòhérá sín kjónté tsaáhará sín.

⁸ Kjánchó kjaxin jahará ntoáhya tjejoch'erá kixin kjónté jnkokóá kichuárá la tēherá sín.

⁹ ¿Á noahyará kixin tí sín jínahya ch'e la ts'áyèhya sín kjuachaxin kuènte Dios? Chrókuítòéhyará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsikjanoya, la ko tí sín tjachèhe kichó sín, la ko tí chojni t'ò chjin, t'ò ntoa, la ko tí sín jnkokón ntoa sín tóxrjínhìn kichó sín,

¹⁰ la ko tí xíchee, la ko tí sín tjinkaon sín jehó sín tsochónta sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyèhya sín kjuachaxin kuènte Dios.

¹¹ Xíkaha k'uéjórá isorá senó. Ntá jie ó k'uújmárá, kjuínchetjóará Dios, ntá ó xíka ijjárá kjuachaxin ihnjé Ìnchéni Jesucristo la ko kjuachaxin kuènte Nchakuen Dios.

Tí cuerpo ó tsíkótjóá

¹² Siín kjuachaxin kaín nkehe chrókjuít'a, kjánchó iso nkehe la ó chónkó. Siín kjuachaxin kaín nkehe chrókjuít'a, kjánchó chrókuítóahya ninkehó nkehe chrók'uetuanna.

¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjáyán yóí tíha. A ntá k'ónahya tí cuerpo kuènteni kixin chrókjuasixínni jie. Náhí. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni.

¹⁴ Méxra Dios mé kjuínchexechón Ìnchéni, mé xíkaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kixin jnkójnko cuerpo kuèntará mé it'ò tí cuerpo kuènte Cristo? ¿Á chrókjuít'a janhan kixin it'ò tí cuerpo kuènte Cristo chrók'óna it'ò cuerpo kuènte ijnko chojni chjin ch'iyehé nchónhya chojni ntoa? Méxra kjá náhí.

¹⁶ ¿Á noahyará kixin tió ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín chrók'óna sín jnkokóá cuerpo? Kixin ntáchro xroon itén Dios kixin: "Yóí sín la ts'óna sín jnkokóá chojni."*

¹⁷ A ntá tí jnkójín chojni tinkáchónki Ìnchéni, ntá jehe la ko Ìnchéni mé ts'óna jnkokóá.

¹⁸ Méxra chrókuítòhérá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín

* 6:16 Génesis 2.24

nchekjasóte sín. **A** ntá tí sín tjasinko jie chojni chjin ókjé la mé nchekjasóte sín tí cuerpo kuènte sín.

¹⁹ ¿Á noahyará kixin jnkojnko cuerpo kuèntará mé éxi ijnko ninko itjen Nchakuen Dios kjuanjon ch'án k'uayéhérá, la ko chontará tí Nchakuen ch'án tjóá? Jahará la jehya ìché tí cuerpo kuèntará

²⁰ kixin jahará la tjete k'uenaxínrá Dios. Méxrá chjeéxinrá kjuasáyé Dios tí cuerpo kuèntará la ko tí nchakónrá kixin yóí la kuènte Dios.

7

Chenka ch'án tí sín tsíkótehe kixin nkexrí chrók'uejó sín

¹ **A** ntá jie tsjataha tí nkehe tsíkjinrá kjuanchankínará, na mé ntáxrjan kixin chaxín chrókójína kixin tí chojni ntoa chrókuakjahya ichjién.

² Kjánchó tí xikaha imá tjinkaon sín tsochónta sín itsjé chojni chjin tjasinko sín jie, la íchá jína jnkojnko chojni ntoa chróchónta jnkojnko ichjién kuènte la ko jnkojnko chojni chjin chróchónta jnkojnko xii kuènte.

³ Tí chojni ntoa la ko tí chojni chjin chrókjuinchexiteyéhe sín kíchó sín.

⁴ Tí chojni chjin jehya ìché tí cuerpo kuènte tjan, na mé kuènte xii tjan. Ntá kjaxin xikaha tí chojni ntoa la jehya ìché tí cuerpo kuènte ch'án, na mé kuènte ichjién ch'án.

⁵ Chrókjuincheniéhyará kichuára, jehí jnkokoá chrókjuenkayáxinrá yóírá kixin tsochonteherá iso yaon kixin ntá kaín asánrá chrónixjehérá Dios. Ntá tsjixin ntá chrókóchjineherá kichuára ínaá kixin chrókjuitoéhyará kixin ch'ín Tsochren chrókjuacha chrókjuachroerá ch'án chrókjuásinrá jie.

⁶ Kaín tíhi tjonkará kixin tsonohará kixin siín kjuachaxin xikaha na kjánchó jehya kixin xikaha tétuanhanrá.

⁷ **A** ntá janhan ntáxrjan kixin chrókójína kixin kaín rá chojni ntoará chrókóyohará éxi tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ **A** ntá tí sín naxa tóteehya la ko tí chojni tsíkók'án na ntátjan sín kixin chrókójína kixin xikahó chrók'uejó sín chrókóteehya sín éxi tí janhan xikaha.

⁹ Kjánchó tí chrókjuachahya sín tí tjak'e asén kíchó sín, naxa chrókjuasin sín jie, ntá íchá jína chrókótehe sín kixin jehya jína kixin jnkochrínín chrókjuak'ó asén sín.

¹⁰ **A** ntá jahará ó tsíkjin tsíkótahará, la tétuanhanrá tíhi: a ntá jehya kixin kjuachaxin kuèntana tétuanxínrá. Náhi.

Kjuachaxin kuènte Ìnchéni mé tétuānxínrá kixin tí chojni chjin chrókjuákeḡhya xìi.

11 **A** ntá tí chrókjuákeḡhe ijnko chojni chjin tí xìi, ntá xikahó chrókuítóhe tjan jehó tjan la ko chrókójína chrókóyóxin, chrókjuínhin tí kjuaníkaon kixin tí kjuákeḡhe kichó sín. Kjaxin xikaha tí chojni ntoa la chrókjuákeḡhya tí ichjién.

12 **A** ntá tí nkehe tétuānḡan tí í so sín jaí la kuèntana janhvàn, jehya kuènte Ìnchéni, kixin tí tjen ijnko ch'ín kichó ni chóna ch'án ichjién ch'án tinkáchónkihya Ìnchéni, na kjónté naxa tjinkaon tjan chrókjuak'eko tjan tí jehe ch'án la chrókjuákeḡhya ch'án tí jehe tjan.

13 La ko tí tjen ijnko tjan kichó ni chóna xìi tjan tinkáchónkihya Ìnchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákeḡhya tjan tí jehe ch'án.

14 Kixin tí xìi tjan tinkáchónkihya Ìnchéni ntá jie ó kótjóá ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kixin tí xìi tjan mé tinkáchónki Dios. **A** ntá tí xikahya, la tí xjeen sín chrókótjuáhya, na ntá jie la mé ó kótjóá tí xjeen sín.

15 **A** ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákeḡhe kichó sín, la ája nohe sín tjákeḡhe kichó sín, kixin Dios tjinkaon kixin kjuaxróxin chrók'uejorá.

16 Jahará chojni chjinrá, ¿nkexrí chrókónohará kixin nkexrí chrókuaá xiará? La ko jahará chojni ntoará, ¿nkexrí chrókónohará kixin nkexrí chrókuaá ichjiánrá?

17 **A** ntá jnkojnko chojni chrók'uejó sín éxí tsíkjanjon Ìnchéni kjuachaxin tsík'áyéḡhe sín, la ko éxí tí k'uejó sín tió k'uíyēḡhe sín Dios, kjánchó chrókuítóḡehya sín tí jehe ch'án. Mé xikaha tétuānḡan kaín tí njnko.

18 Tí chrók'uíyēḡhe Dios ijnko ch'ín chóna xroye, ntá xikahó chrókuítóhe ch'án. **A** ntá tí chrók'uíyēḡhe Dios ijnko ch'ín chónahya tí xroye a, ntá kjónté chrókuaḡhya ch'án tí xroye a.

19 Na mé tjetuanhya á chóna chojni tí xroye o á chónahya chojni tí xroye. Na mé tí nkehe tjetuan kixin chrókjuinchexiteyēḡeni tí nkehe k'ueḡtoan Dios.

20 Chrók'uejóni jnkojnkoní éxí k'uejóni tí k'uíyēḡeni Dios.

21 **A** ntá tió Dios k'uíyāḡha jaha, kjónté jaha ijnko chojni ch'exón xḡa, ntá chrókóxakuanhya kjónté xikahó tjech'e xḡa. Kjánchó tí chrók'uitjá tí tsaáxian la chrókuaákjá tíha.

22 Kixin tí nkexro kjuích'exón xḡa tió k'uíyēḡhe Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uítuēnhya tió k'uíyēḡhe Ìnchéni la mé jie mé ch'ehe ch'án xḡa Cristo.

23 Dios imá tjete k'ueñaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna ìnchárá.

24 Méxra kichó ni, éxí k'uejorá tió k'uíyahará Dios kixin tsinkachónkirá ch'án, la xikahó naxa chrók'uejorá jie kixin chontará Ìnchéni tsjinkĩtsa.

25 A ntá tí chojni naxa tóteehya sin na mé janhan chontahya nkehe kuènte Ìnchéni chrókuétuñhan sín. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kixin kujikonóana Ìnchéni.

26 Mé xikaha tónna kixin chrókójína kixin jnkojnko chojni chrókuítóhe sín éxí tjejó sín chrókóteehya sín, kixin ijie la kjuaxróxinhya tjejóni.

27 A ntá tí chontará ichjiánrá ntá chrókjuakeéhyará tjan. A ntá tí chontahyará ichjiánrá ntá íchá jina chrókjuéyáhyará.

28 Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsíkótehe la tsochónta sín kjuaxikaon, mé xikaha janhan chrókjuínkĩtsa sín kixin chróchóntahya sín kjuaxikaon.

29 Mé xikaha tjétjonkará kichó ni kixin tsjéhya yaon naxa t'itjáyan tsokjan Ìnchéni. Mé xikaha tí chojni ntoa chónta ichjién sín, la antsí tjetoan saoxín chrórxaxinkaon sín Ìnchéni, la ntá chr'éxin chrótjuèhe sín ichjién sín.

30 A ntá tí sín tsjánka la chrók'uejó sín éxí chrótsjánkahya sín. La ko tí sín chéhe la chrók'uejó sín éxí chéhya sín. La ko tí sín t'ena nkehe la chrók'uejó sín éxí chóntahya sín tí nkehe tsík'ena sín.

31 La ko tí sín kjuacha nkehe siín chjasintajni la chrók'uejó sín éxí ninkehó chróchóntahya sín, kixin kaín nkehe t'ikonni chjasintajni ntihi mé tjoka tsjeje.

32 Tjínkakonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuènte Ìnchéni chrókjuinchexiteyéhe ch'án tí nkehe tóxrjínhin Ìnchéni.

33 A ntá tí ch'ín tsíkótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án.

34 Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí asén tjan. A ntá tí tjan tsíkótehe mé tóxakonhen tjan tí nkehe siín chjasintajni kixin xikaha sinchechéhe tjan xii tjan.

35 Tjétjonkará tíhi kixin tjínkavan kixin jina chrók'uejorá, jehya kixin xikaha chrókuétuñhanrá. Náhi. Tjínkavan

kíxin kjuasáya chrók'uejorá jnkojína la jehó Ìnchéni chrókjuich'eherá xra.

³⁶ A ntá jnkojínrá tjenkayáxinrá kíxin chrókójína chrókótehe ijnko xjaanrá chjin kíxin ó tsícha tjan, la ntá tí xíkaha la ó nchoxon tsoetehe tjan na mé jehya jie.

³⁷ A ntá jnkojínrá tjinkáonrá kaín asánrá kíxin chrókóteehya xjaanrá chjin la kjaxin tjan xíkaha tjenkayáxin tjan la antsí jína tíha.

³⁸ Mé xíkaha tí tjtóhérá xjaanrá chjin kíxin tsoetehe tjan la ó nchoxon. La ko kjaxin tí tjinkakonhya tjan kíxin chrókótohe tjan na mé antsí jína tíha.

³⁹ Tí tjan tsíkótehe mé k'uítuénxín tjan kjuachaxin tí ley kíxin tsjak'eko tjan tí xìi tí naxa tjechón ch'án. A ntá tí chrók'uen ch'án ntá tsochónta tjan kjuachaxin tsoetehe tjan ínaá tí nkexro tsoxrjínhin tjan, kjánchó jehó ijnko nkexro tinkáchónki Ìnchéni mé chrókótehe tjan.

⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xíkaha tjenkayáxian janhan la ko kjaxin tónna janhan kíxin chonta janhan tí kjuachaxin kuènte Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsoxrjanka kuènte tí ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kíxin tí chrók'uitjani má ntá chrókóhnkeni má. Antsí tjetóan chrótjuèheni kíchó ni kíxin xíkaha antsí chrókuinkáchónkini Ìnchéni.

² Tí jnkojín nkexro ntáchro kíxin nohe ch'án, na mé chaxínhya tíha la naxa t'itjayan tí nkehe chrókónohe ch'án.

³ A ntá jnkojín nkexro tsoetjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jína kíxin tí nkehe tsíkjanoya la t'etuánhya ninkehó ntihi chjasintajni, la ko ó noheni kíxin jnkokoá Dios tjan.

⁵ A ntá síin nkehe nchek'in sín díos nkaya nkajní la ko chjasintajni na, kjánchó tí xíkaha la kjá chrók'uixin itsjé díos la ko itsjé inché sín.

⁶ A ntá jeheni chóntani jnkokoá Dios na mé It'éni tíha, la jehe ch'án mé kjuích'éna ch'án kaín xín nkehe la ko tjejóni kíxin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe síin la kjuích'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuènnen sín kuinkáchónki sín tí nkehe tsíkjanoya, a ntá jie tió ine sín tí

nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko dios, kixin náxa noehya sín má, ntá ntáchro sín kixin ó kuámá sín tí jie kuente tí nkehe tsíkjanoya.

⁸ Ó noheni chaxín kixin jehya kixin chrókóxrjínhin Dios tí jeheni kixin tí nkehe jína chrókjóneni. Náhí. Jehya kixin chrók'uejóxinni jína kixin tí nkehe chrókjóneni na ko tí nkehe chrókjónehyani.

⁹ Méxra títóehyará kixin tí kjuachaxin chontará sinterá kaín xín nkehe mé xikaha chrókjuachroe ijnko chojni kichó ni náxa noehya jína tinkáchónki Ìnchéni ntá tíha chrókjuasixín sín jie.

¹⁰ A ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko ninkoe nkehe tsíkjanoya, ntá tí chojni kichó ni náxa noehya jína ntá chrók'uikon sín xikaha ntá kjaxin jehe sín tsotjinkaon sín sine sín tí nkehe tsíkjokehe chojni ijnko dios chaxínhya.

¹¹ A ntá jahará ó nohará jína ntá xikaha tjejoch'erá itsará sinchek'itjayanrá tí kichó ni náxa noehya jína tinkáchónki Ìnchéni kixin Cristo k'uenyákonhen tí jehe ch'án kjaxin.

¹² Méxra tí xikaha chrókjuich'erá la chrókjuásinhínrá jie tí sín kichó ni náxa tinkáchónkihya sín Ìnchéni jína, na mé xikaha kjaxin chrókjuásinrá jie chrókuitekákuenhyará Cristo.

¹³ Méxra tí xikaha chrókjuasixín jie ijnko kichó ni kixin tí nkehe chrókjóneni, ntá íchá jína chrókjónehyani nto ínaá kixin xikahya ntá chrókjuichroexín tí sín kichó ni ntá chrókjuasixín sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjejá Ìnchéni kixin janhan k'uikuáñ ch'án. Jahará mé tjákoxinrá tí xra kjuít'a kuente Ìnchéni.

² Iso sín ntáchro sín kixin tjátsqanhyana sín kixin ijnko apóstol tsíkjejá Ìnchéni. Ntá jahará kaín rá mé chrókjuátsqanrá tí janhan kixin tí kuitekáonrá kuinkachónkirá Ìnchéni mé xikaha tjákoxinrá kixin chaxín janhan tsíkjejána ch'án.

³ Méxra janhan jína chrókjuátaḡa tí sín xritjontana, chróntáxrjan kixin:

⁴ Janhan chonta kaín kjuachaxin chrók'uayáḡa nkehe chrókjonè la ko chrók'uia.

⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxí chóna tí í so sín tsíkjejá Ìnchéni, la ko tí sín kichó Ìnchéni, la ko éxí chóna ch'ín Pedro.

6 ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítóheni tí xrá sich'exínni tjani?

7 ¿Nkexro ch'e xrá soldado ntá chichakoen ch'án ó chrókuicháxinhin? Nkexro k'uenká nta to uva ntá kjónehya ch'án to? ¿La ko nkexro t'ayakonhen kolélo ntá k'uíhya tí tsjen t'énnen sín va?

8 Ntáchrohyará kixin janhvàn kjuenkayáxian tíha kixin kjáxin xroon tsíkjin ch'ín Moisés xikaha nixja.

9 Méxra kjáxin ntáchro tí xroon tsíkjin ch'ín Moisés ósé kixin: “Chrókjuéjójáhyará kamposa ir'va koxinta tí tsinkátja va noa-trigo tí tsónkéhe sín noa.”* Tíha mé t'axrjexín kixin jehya koxinta ó tóxakonhen Dios.

10 Náhi. Tóxakonhen ch'án kixin tí jeheni. Méxra xikaha nixja tí xroon kixin chrók'uejóxinni jína. A ntá tí nkexro kjuínchentá nche la ko tí nkexro tsónkéhe noa, yóí sín la chróchónhen sín chrók'uáyéhe sín tí nkehe k'óna.

11 A ntá tí k'uenkani tí itén Dios asánrá, la kjá chróchóntani kjuachaxin chrókjuanchaharáni ichrén nkehe t'ichjánxinhinni.

12 A ntá tí xikaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uáyéheni nkehe.

Kjónté chóntani kjuachaxin xikaha la kjuanchahyani nkehe, kjónté kánhyó náxrjón k'uéjóni kixin tjinkakonhyani chrókjuanchiani nkehe chrók'uichjánxinhinni kixin ách'e xikaha ntá chrók'uinkákonhen tí itén Cristo chrókjuakoni.

13 Jahará ó nohará kixin tí sín ch'e xrá kùente nínko mé ntaha xránjon nkehe ine sín. La ko tí sín t'óyáxin sín ko tí altar tsochjéhe sín Dios kjáxin ine sín tí ntøe tí ko t'óyáxin sín ntiha.

14 Méxra xikaha kjáxin k'ueṭoan Inchéni kixin tí sín ch'e tí xrá ó chrónka sín tí tan tsaáxinni na mé tí xrá a chrók'uaxrjeníxin tí nkehe chrókjóne sín.

15 Kjónté janhan siín kjuachaxin xikaha chrókjuít'a, la xikahya kjuít'a la ko kjáxin xikahya ikjian tí xroon i kixin jahará chróchjínará ichrén nkehe. Náhi. Kjónté chrók'uénxian kjinta chrókjuáncháhyará nkehe kixin tjínkakonhya kixin ninkexró chrókuakitsjena tí kjuachéhe chonta.

16 Jehya kixin chrokjuintahnke chrókjuàkua tí tan tsaáxinni. Náhi. Janhan na ó jehí sít'a tí xrá a. Nòa tí janhan tí chrókjuàkohya tí tan jína chrókuaáxin chojni.

17 A ntá tí janhvàn tjínkavan chrókjuàkua la xikahó chrókjuacha janhan. A ntá tí tjàkua itén Dios kixin xikaha kuítuanna ntá xikahó ntaxiteyá tí xrá chjina Dios.

18 ¿A ntá nkehe chrókjuacha janhan? Tíha mé chrókjuacha janhan kixin chrókóchàna má kixin chrókjuàkua tí itan tsaáxinni

* 9:9 Deuteronomio 25.4

la ninkehó chrókjuánchàhya chrókjuacha la ntá tí xíkaha la chrókuákjaáhya tí kjuachaxin tí chrókjuákua.

¹⁹ Méxra kohya nkexro t'etuanna. Kjánchó ó jehi chrókjuít'aha kaín xín chojni xra kixin xíkaha antsí tsjé chojni chrókjuacha janhan kixin chrókuitekaon sín Cristo.

²⁰ Ti tjèn tí siín tí sín judío ntayóha éxi jehe sín xíkaha janhan kixin xíkaha chrókjuacha jnkojín sín chrókuitekaon sín. Na mé t'axrjexín kixin tí chrókjuacha iso ti sín nchexiteyéhe tí ley k'uetōan ch'ín Moisés, la t'ichjánxin kixin kjaxin janhan chrókjuintaxiteyá tí ley kjónté janhan la xíkahya t'etuanna tí ley.

²¹ A ntá tí chrókjuacha jnkojín tí sín nchexiteyéhya tí nkehe k'uetōan ch'ín Moisés la ntayóha éxi tí jehe sín xíkaha janhan kjaxin, kjónté chaxin t'etuanna tí nkehe k'uetōan Dios méxra ntaxiteyá tí nkehe k'uetōan Cristo.

²² Tió tjèn tí siín tí sín tienxínhya jína, ntá kjaxin janhan t'óna éxi tí jehe sín kixin xíkaha chrókjuacha jnkojín tí jehe sín chrókuitekaon sín. Méxra ntayóha éxi kaín xín chojni xíkaha janhan kixin xíkaha chrókjuacha janhan kixin chrókuaá iso tí jehe sín.

²³ Mé xíkaha kaín tíha tjét'a kixin chrókuinhin sín tí tan chrókuaáxin sín la ko kjaxinna antsí má chrókjuintayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsitonhen nkehe. A ntá jahará xíkaha chrókuinkará kixin chrók'uayéherá tí nkehe chrókjuitonhanrá.

²⁵ Tí sín tinkáko kichó sín na mé jína t'ayakonhen sín asén sín, títohe sín kaín xín nkehe chrókjuich'ehe sín daño kixin tjinkaon sín chrókjuacha sín, chrók'uayéhe sín kjónté ijnko corona tsík'óna kayoa ó tjoka tsoxámá. Kjánchó jeheni ch'eni xra kuènte Ìnchéni kixin ntá ts'áyéheni ijnko nkehe chónhya tsoxámá.

²⁶ A ntá janhan jehya éxi ijnko chojni t'ikonhya chrókuinka. Jehya éxi xríntō ó chrókjuánjonkian.

²⁷ Náhí. Janhan tjánjonkian tí cuerpo kuèntana, tétuanhan kixin jína chrókjuinchexiteyàna kixin tóxakonna kixin chrókjuásian ichrén jie ntá janhan chrókjuachahya kjónté senó kjuákōha itsjé chojni.

10

Tí nkehe t'etoan ch'án kuènte tí nkehe tsíkjanoya

¹ Tjínkavan janhan kixin chrókónohará kichó ni kixin tí sín k'uaxrjenixinni ósé, kaín sín k'uixinkánkí sín chrínkí tí tjuj, la ko kaín sín k'uátòye sín Ntayaon Kjåtse,

² la ko kaín sín k'uéchréhe sín ch'ín Moisés éxi yóhe chrókuikite sín kixin jnkokoá k'uéjó sín tí tjen tí tjuj la ko tí ntayaon la ko kjuínchexiteyéhe sín ch'án kixin jehe ch'án k'uék'etoan ch'án.

³ La ko kaín sín kjóne sín jnkokón nkehe kujxin nkaya nkajni

⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuíncheyaon Dios, na mé tí tjo a la mé t'axrjexín kixin Cristo tíha.

⁵ Kjánchó itsjé tí jehe sín kjuínchechèhya sín Dios, méxra kónínkaon ch'án la tí nteje ó k'uénxin tí sín a.

⁶ Kaínxín tíha kónhen kixin chrórxaxinkakonxínni jeheni, chróntáchrohya asénni chrókjuich'eni tí nkehe jínahya éxi kjuích'e tí jehe sín.

⁷ Méxra chrókuinkachónkihyará jahará nkehe tsíkjanoya éxi k'uékinkáchónki iso tí jehe sín, éxi ntáchro tí xroon itén Dios tsíkjin sín ósé kixin: “Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín”.*

⁸ Méxra chrókjuasinkohyani jie chojni chjin ókjé éxi kjuích'e iso jehe sín ntá ik'uén sín, ventitres mil sín, jnkokoá yaon.†

⁹ Kjaxin chrókjuinchecóninkakonhyani Ìnchéni éxi kjuích'e sín ntá ik'uén sín kixin kjónehe sín konche,‡

¹⁰ la ko chrók'uántaxíenhyani Dios éxi k'uántaxínhin tí jehe sín ntá tí ángel kuènte kjuach'én mé kui k'óyán sín.§

¹¹ Kaín tíha kónhen tí sín k'uaxrjeníxinni ósé kixin chrókónoexínni la ko k'óna xroon chrónka xikaha kixin nchexraxinkaonni tí jeheni tjejóni jie kixin í séhya tsjixixín tsjeje chjasintajni.

¹² A ntá tí nkexro ntáchro kixin ntoá tjen na chrókóxakonhen kixin chrókjuichroehya.

¹³ Jahará naxa k'uatsínkahyará ninkehó nkehe tí chrókjuachahya chojni chrókónhen. Méxra jahará chrórxaxinkáonrá Dios kixin jehe ch'án chrókuítóehya ch'án tí jahará kixin chrók'uatsínkará nkehe imá xra chrókjuachahyará. Méxra tí itsi ichrén nkehe tsonhanrá la Dios tsjinkitsará ch'án kixin chrókjuachará chrók'uatsínkará tí nkehe chrókónhanrá.

¹⁴ Méxra tjuahará jahará kichó ni, la ntá ntáxrjan kixin chrókuítóhéra tí nkehe tsíkjanoya.

¹⁵ Nixjahará jahará kixin jahará chojni ó tienxín. Méxra jahóra chrokjuenkayáxinrá kixin á jína tí nkehe ntáxrjan.

¹⁶ Tí tjanchiani kjuasáya kixin tí nkehe it'ini na mé kaín ni jnkokoá tjakoxinni tí ijnié Cristo ó k'uitji. La ko tíó tóchrít'oni tí niotja ineni, na mé kaín ni jnkokoá tjakoxinni tí cuerpo kuènte Cristo.

* 10:7 Éxodo 32.6 † 10:8 Números 25.6-9 ‡ 10:9 Números 21.5-6 § 10:10 Números 16.41-49

17 Kjónté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuènte Cristo.

18 Chrókónohará nkexrí ch'e tí sín chjasin Israel, na mé ine sín tí ko tsíkjokehe sín Dios ntá xíkaha tjakoxin sín kixin xíkaha tinkáchónki sín.

19 Ntáxrjanhya kixin tí nkehe tsíkjanoya la chóna kjuachaxin, la ko ntáxrjanhya kixin tí nto tsíkjokehe sín tí nkehe tsíkjanoya la antsí chóna kjuachaxin.

20 Náhí. Ntáxrjan kixin tí nkehe tjanjon tí sín chónhya Dios na mé tjokehe sín tí nchakuen tí jínahya la jehya Dios tjokehe sín tíha. Méxra janhan tjínkakhonhya kixin xíkaha chrókjuich'erá jahará chróxráxinkáonrá tí nchakuen tí jínahya.

21 Tí its'ini tí nkehe xraxinkakonxínni ijnié Ìnchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrók'uini. Tí sineni tí nkehe xraxinkakonxínni tí cuerpo kuènte Ìnchéni ntá kjaxin tí chrókjóneni tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrókjóneni tí nkehe.

22 ¿Á jína chrókjuintekóninkaonni Ìnchéni ní? ¿Á jeheni antsí chóntani kjuachaxin la ntá jehe ch'án la náhi ní?

Chóntani kaín kjuachaxin kaín xín nkehe na kjónté antsí tje-toan tsotjuèheni kichó ni

23 Siín kjuachaxin ichrén nkehe chrókjuich'eni. Kjánchó jehya kixin kaín nkehe la jína. Siín kjuachaxin ichrén nkehe chrókjuich'eni na kjánchó kénhya nkehe chrókjuintsa chrókónoheni tí nkehe kuènte Dios.

24 Chrókjuéyáhyará tí nkehe chrók'uejóxinrá jína jahóra. Náhí. Kjaxin chrókjuéyará tí nkehe chrók'uejóxin jína í so chojni.

25 Chrókjónterá kaín nto sítóxin la chrókjuanchankíhyará ninkehó kixin tí xíkaha ntá ntoáhya chrókjuenkayáxinrá,

26 kixin kuenté chjasintajni la kaín xín nkehe siín la kuènte Ìnchéni.

27 A ntá jnkojín chojni tinkáchónkihya Ìnchéni chrók'uíyahará sín kixin chrókjóntekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrócoxakuanhyará chrókjuanchankíhyará ninkehó.

28 Kjánchó tí chróntáchro jnkojín sín kixin tí nto la ó tsíkjokehe sín ijnko nkehe tsíkjanoya, ichro sín, ntá tí xíkaha la chrókjóntehyará jahará, chrócoxakonhanrá kixin ntoáhya chrókjuenkayáxin tí nkexro chrónka xíkaha.

29 Méxra ntáxrjan tíhi kixin tjínkakhonhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankìnará kixin nkekuènte chrókóxakonhanrá nkehe chrókjuenkayáxin ókjé chojni kixin tí kjuachaxin chontará.

³⁰ Tí tjáncháḡa Dios kjuasáya kixin tí nkehe inè, ¿ntá nkekuènte kixin chrókjontana chojni kixin kuènte kjonè?

³¹ Tí chrókjónterá nkehe la ko chrók'uirá nkehe la ko ichrén xra chrókjuich'erá la chrókjuákoḡinrá kixin Dios kjuínkĩtsará.

³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni nĩnkoe Dios.

³³ Janhan mé tjéyá kixin kaín xín xra tjét'a chrókóxrjĩnhĩn kaín xín chojni, na mé jehya kixin tjéyá kixin janhvàn chrókjuak'é jína. Náhi. Kjaxin tjínkavan kixin chrókuaáxin í so chojni.

11

¹ Chrókjuákoḡinrá jahará éxi kjuákoḡiḡan janhan kixin janhan mé kjuákoḡiḡan éxi kjuákoḡin Cristo.

Jína chrók'uejé tí chojni chjin tió tójnkotsé chojni

² Kichóni, chàna kixin xráxín xráxinkáonrá tí janhan la ko nchexiteyéhérá tí nkehe kjuákohárá.

³ A ntá tjínkavan kixin chrókiénxinrá kixin Cristo t'etuenhen jnkøjnko chojni ntoa, la ko kjaxin xikaha jnkøjnko chojni ntoa mé t'etuenhen tí ichjién, la ko kjaxin xikaha Dios mé t'etuenhen Cristo.

⁴ A ntá tí jnkójĩn chojni ntoa xrasixín kachjinke ch'án tí tjenixjeḡe ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjakoḡin ch'án kixin chóntehya ch'án kjuasáyé tí Inchéni t'etuenhen ch'án.

⁵ A ntá ijnko chojni chjin tjóchín kja tjan tí tjenixjeḡe tjan Dios la o tjóchín kja tjan tí tjechronka tjan iten Dios, mé xikaha tjakoḡin tjan kixin chóntehya tjan kjuasáyé tí xii tjan. Mé tóyóḡe éxi tsikjín tjan xikaha.

⁶ A ntá tí chojni chjin tjinkakonhya kixin chrók'uiáxin kja tjan nkehe mé chrókjín tjan. Kjánchó tí chrókósuèḡe tjan chrókjín tjan, ntá chrók'uiáxin kja tjan tóte tió tójnkotsérá.

⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxi retratogé Dios la ko t'inkaséyanxín ch'án tí kjuachaxin kuènte Dios. A ntá tí chojni chjin mé t'inkaséyanxín tjan tí kjuachaxin kuènte tí xii tjan.

⁸ Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhi. Tí chojni chjin mé k'uaxrjeníxin tí chojni ntoa.

⁹ Chaxín k'ónahya tí chojni ntoa kixin jehó tsjak'e ch'án. Náhi. Tí chojni chjin mé k'óna kixin tsjak'ekotoḡin ch'án.

10 Ntá t'ichjánxìn kixin tí chojni chjin ts'íáxin kja sín tóte chrókjuakoxìn sín kixin t'ítuenhen sín kixin xikaha ts'ikon tí sín ángel.

11 Kjánchó kaín ni tinkáchónkini Cristo t'ichjánxìn kixin tí chojni ntoa chrókjuinkĩtsa tí chojni chjin la ko tí chojni chjin chrókjuinkĩtsa tí chojni ntoa.

12 Kixin chaxín tí chojni chjin na tí chojni ntoa k'uaxrjeníxin. A ntá jie tí chojni chjin na mé t'axrjeníxin tí chojni ntoa. A ntá kaín ni k'uaxrjeníxinni Dios.

13 Jahará nkechorá, ¿á ó nchoxon kixin ijnko chojni chjin tjóchín kja tjan chrónixjehe tjan Dios?

14 Jahorá chrókónohará kixin chrókósuèhe tí chojni ntoa chóna kaxihi kijnjin.

15 A ntá tí chojni chjin chóna kaxihi kijnjin la mé ntoá tíha kixin ó kuítuénxin tjan kixin tsochóna tjan kaxihi tjan kijnjin kixin tsojtjóchínnya kja tjan.

16 A ntá tí tjen jnkójín nkexro titekakonhya tíha xikaha ntá chrókónohará kixin jeheni la ko kaín xín tí sín nĩnkoe Dios la xikahó kuènhenni.

Ntoáhya kjóne sín tí niotja xraxinkakonxín sín Ìnchéni

17 Méxra tí nkehe tjékjian la mé ijnko nkehe tóxrjinnahya tjejoch'erá. Tió tójnkotsérá ntiha la ijnko nkehe jínahya tjejoch'erá. A ntá náhi la ijnko nkehe jínahya tjejoch'erá.

18 Na mé saoxín na mé ntáchro sín kixin tió tójnkotsérá la jnkokoáhya tjenkayáxinrá. Ntáxrjan kixin ách'e chaxín xikaha tjejorá.

19 ¿Xá t'ichjánxìn kixin chrók'uaxrjentará kixin chrókónoexínni kixin nkexro chaxín tinkáchónki Ìnchéni la ko nkexro tí náhi?

20 Méxra tí xikaha jnkokoáhya tjenkayáxinrá ntá tió tójnkotsérá chrókjónterá niotja la chaxínnya xraxinkákonxínrá Ìnchéni tí xikaha.

21 Kixin tió sinterá la senó isorá tjejonterá tí nkehe tsíkjasánkoará, la isorá la kjónté naxa t'énxinrá kjinta, la í sorá la tsíkókoanrá.

22 ¿Á chontahyará nchia ntoará? Ntahó chrókjóntexínrá la ko chrók'uúxinrá nkehe. Mé xikaha chontahyará kjuasáyé tí nĩnkoe Dios la ko nchesuèhérá tí sín nòà chóntahya ninkehó. ¿Nkehe tsontáxrjan? ¿Á tsontáxrjan kixin jína tjejoch'erá? Kjá náhi. Jehya jína tjejoch'erá.

Jína chróxraxinkakonxínni Ìnchéni

(Mt. 26.26-29; Mr. 14.22-25; Lc. 22.14-20)

23 Kixin Ìnchéni mé chjina ch'án tí nkehe kjuákoará: kixin tí tie tsíkóxi ch'án na mé jehe ch'án kuákja ch'án tí niotja

²⁴ ntá kjuixin kjuanchia ch'án kjuasáya ntá kóchrít'o ch'án tí nioṭṭja ntá ntáchro ch'án kixin: “Tíhi mé nṭona xránjon its'en kixin jína ts'ejóxin tí jahará. Méxra xikaha sich'erá kixin tsoxraxinkákonxínrá tí janhan”, ichro ch'án.

²⁵ La ko kjaxin xikaha tió kjuixin kjóne sín ntá kuákja ch'án tí vaso la ntáchro ch'án kixin: “Tíhi mé tjakoxin kixin chaxín tsoxiteyá ijnko nkehe nixin kuènte Dios kixin ts'ítji jnina. Tió its'irá tíhi mé tsoxraxinkákonxínrá tí janhan”, mé chro ch'án.

²⁶ Kixin tí interá tí nioṭṭja la it'irá tí ìnté to uva mé xikaha tjeotjákoxinrá kixin xikaha k'uénxin Ìnchéni. Mé xikaha tsjákokxinrá tsjixrakájia yaon tsokjan ch'án.

Ntoá chrókjóneni tí nioṭṭja kuènte Ìnchéni

²⁷ A ntá jnkójín nkexro chjini chrókjóné sín tí nioṭṭja la ko chrók'ui sín tí ìnté to uva xraxinkakonxínni Ìnchéni, mé xikaha chrókjuasin sín jie chrókjuikosáyehya sín tí cuerpo la ko tí ijnié Ìnchéni.

²⁸ Méxra jnkójnkoni chrókjuenkayáxinni senó kixin á chóntahyani jie na ntá chrókjóneni tí nioṭṭja la ko chrók'uini tí ìnté to uva.

²⁹ A ntá tí xikaha chjini chrókjóneni la ko chjini chrók'uini la chaxínhya chróxraxinkakonxínni tí cuerpo kuènte Ìnchéni la mé tí xikaha chrókjuich'eni la chrókjuasótexínni tíha.

³⁰ Mé xikaha itsjérá níhará la ko itsjérá tsankahyará la ko jnkójínrá k'uénrá.

³¹ A ntá tí chrókjuatsoanni nkexrí tjen asénni jeheni ntá Ìnchéni t'ichjánxienhya chrókjuincheckjasóteni ch'án.

³² A ntá kjónté chrókjuincheckjasóteni Ìnchéni ntá chrók'uitjani chrókjuincheckxiteyéhéni ch'án, ntá chrókjuasótehyani éxí tsjasóte tí í so chojni chjasintajni.

³³ Méxra kichó ni, tió tójnkotsérá sinterá la chróchonhénrá chrókui tí í so sín ntá chrókjóntekoará sín jnkokoá.

³⁴ A ntá tí nkexro ik'uén kjinta la íchá jína senó chrókjónexín nkehe nṭoé ó kixin ntá chrókjuincheckjasótehyará Dios kixin xikaha ntoáhya tójnkotsérá. A ntá tí í so nkehe la tsjásiyóxian janhan tió tsjasántsahará.

12

Nchakuen Dios mé chjéhe kjuachaxin jnkójnko chojni

¹ Kichóni, tjínkavan kixin tsonohará jína kixin nkexrí siín tí kjuachaxin tjanjon Nchakuen Dios t'áyéhe jnkójnko chojni.

² Jahará ó nohará jína kixin tió naxa kuinkachónkehyará Ìnchéni na mé kuinkachréhéra tí nkehe tsíkjanoya nixjahya.

³ Méxra chrókónohará kixin nijnko nkexro nixjaxin kjuachaxin Nchakuen Dios tsjacha ts'ántaxínhin Jesús, la

ko nijnko nkexro tsjacha tsontáχρο sίν kίxín Jesús mé Ìnché sίν tí nixjaxínhya sίν tí kjuachaxín Nchàkuen Dios.

⁴ A ntá nchónhya xṛa kuènte kjuachaxín Nchàkuen Dios síin la kjánchó jnkokoá Nchàkuen Dios mé tjetjanjon.

⁵ La ko síin nchónhya nkexrí sich'eheni xṛa Ìnchéni, kjánchó Ìnchéni la ójnkó nkexro tíha.

⁶ La ko nchónhya nkehe t'axrjexín tí xṛa ch'e jnkojnko chojni la kjánchó jnkokoá Dios tjetjanjon tí kjuachaxín ch'exínni xṛa kaín ni.

⁷ Jnkojnko chojni mé kujtonhen kίxín chrókjuakoxin kjuachaxín kuènte Nchàkuen Dios kίxín xíkaha chrókjuinkítsa kíchó.

⁸ Iso chojni mé ts'áyéhe kjuachaxín tsonixja sίν kjuaxrexinkaon jína kίxín tjinkítsa Nchàkuen Dios, la ko í so chojni ts'áyéhe kjuachaxín tsochronka ijnko nkehe kuènte Dios noehya tí í so sίν kίxín Nchàkuen Dios mé tjinkítsa sίν tsonixja sίν.

⁹ La ko í so chojni mé ts'áyéhe kjuachaxín antsí tsinkáchónki Dios kίxín Nchàkuen Dios mé tjinkítsa. La ko í so chojni mé ts'áyéhe kjuachaxín sinchekitohe chojni jína.

¹⁰ La ko í so chojni mé ts'áyéhe kjuachaxín tsjasin sίν kjuaxroan, la ko í so chojni mé ts'áyéhe kjuachaxín kίxín Dios sinchenohe sίν ijnko nkehe tsochenka sίν tí í so kíchó ni, la ko í so chojni mé ts'áyéhe kjuachaxín tsjatsōanxín á kjuachaxín kuènte Nchàkuen Dios o á kjuachaxín kuènte ijnko nchàkuen jínahya chronkaxín ijnko chojni, la ko í so chojni mé ts'áyéhe kjuachaxín kίxín ijnko nkíva ókjé naxa k'uitjahya sίν tsonixjaxín sίν ijnko nkehe kuènte Dios, la ko í so chojni mé ts'áyéhe kjuachaxín tsochronkaxín nkexrí t'axrjexín tí nkehe ókjé nkíva tsíchronka tí í jnko chojni.

¹¹ Kjánchó kaín tíha jnkokoá Nchàkuen Dios mé tjinkítsa, na mé k'uáyéhe jnkojnko chojni jnkojnko kjuachaxín éxí tjinkaon tí Nchàkuen Dios nkerí xṛa chrókjuich'e sίν.

Kaínni k'ónani jnkokoá cuerpo kuènte Cristo

¹² Cristo la éxí yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xíkaha Ìnchéni Cristo la ójnkó tí jehe ch'án.

¹³ Kaínni kjónté chojni judío la kjónté chojni jehya judío, la kjónté chojni ch'exón xṛa, la kjónté chojni t'ítuenhya, kaín ni na mé jnkokoáxón Nchàkuen Dios kuíkitexínni, na kaín ni k'ónani jnkokoá cuerpo kuènte Cristo, na mé éxí jnkokoá nkehe ik'uíni kaín ni na mé k'uáyéheni tí jnkokoá Nchàkuen Dios.

¹⁴ Kίxín tí cuerpo kuènteni la jehya jnkokoá parte chóna. Náhi. Itsjé parte chóna tí cuerpo.

15 Tí chróntácho tí tóteni kixin: “Jehya itja tí jeheni na mé jehya jeheni kuènte tí cuerpo”, na mé chaxínhya tíha kixin ó jehe cuerpo kuènte.

16 Kjaxín tí chróntácho ijnko ntatsjoni kixin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kixin ó jehe cuerpo kuènte.

17 Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni?

18 A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kixin jehe ch'án nkexrí tjinkaon ch'án kóxrjínhín ch'án.

19 A ntá tí chrók'óna jnkokoá nkehe tíha, ¿a ntá nkexrí chrókuak'e tí cuerpo a?

20 Kjánchó jie nchónhya parte chóna tí cuerpo kuènteni la ó jnkokoá tíha.

21 Tí ikonni la mé xitjahya tsontáche tí tjani kixin: “T'ichjánxienhyani tí jaha”, la ko kjaxín tí kjani xitjahya tsontáche tí tóteni kixin: “T'ichjánxinnahya tí jaha.”

22 Náhí. Tí nkehe kuènte tí cuerpo tónhenni kixin tjetuanhya na mé kjónté antsí má t'ichjánxín

23 la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakohenni kixin tsoxoxínhya.

24 A ntá tí nkehe náxrjón na mé t'ichjánxienhyani ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókuikosáyehyani jeheni

25 kixin ninkehó xitjahya chróxikeyehe tí cuerpo kixin kaín tí nkehe la jnkokón tjinkítsa kichó.

26 Tió tsikónihi ijnko parte kuènte tí cuerpo la kaín tí í so parte la kjaxín tjeté; la ko tió tjikosáyehe sín ijnko parte la kuenté tsochéhe.

27 A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án.

28 Méxra Dios kjueyá ch'án chojni sich'ehe ch'án xra kuènte njnko, na mé saxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxín kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxín kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxín kjueyá ch'án í so kjojni chjéhe ch'án kjuachaxin antsí tjinkítsa kichó, la ko kjaxín kjueyá ch'án í so chojni chjéhe ch'án

kjuachaxin ts'etəan xra kuènte ch'án, la ko kjaxin kjueya ch'án í so chojni chjéhe ch'án kjuachaxin tsonixjəxín sín í jnko nkíva.

²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan,

³⁰ la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjəxín sín ijnko nkíva ókjé, la ko kénhya chojni chóna kjuachaxin tsochronkaxín sín nkexrí t'axrjexín tí nkehe chrónka tí sín nixjəxín ijnko nkíva ókjé. Chaxín kjá náhi.

³¹ Méxra tjéyará tí kjuachaxin əntsí jína chrótjáhará Dios. Ntá jie tsjákohará ijnko ntía əntsí jína chrók'uejorá.

13

Chrótjuèheni kíchó ni

¹ Tí chrónixja nkívee chojni ó la ko kjaxin chrónixja éxí nixja tí sín ángel, ntá naxa chrótjuəhya kíchó ni la ó chónkó tíha la mé éxí chrókóyóna chica tsjánka ó la ko éxí ijnko chica platillo nchevékjan sín ó, kixin ninkehó són chóntahya.

² La ko tí chrónixja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónona kaín nkehe, la ko əntsí chrókuinkachónkia Dios ntá chrókjuacha chróntátjan ijnko jnə sáchrókjui ókjé, kjónté tí xíkaha ntá naxa chrótjuəhya kíchó ni, ntá ninkehó sínkíhya tí janhan.

³ Tí chrókjuıntakitonhan tí sín nòa kaín nkehe chonta, la ko tí chrókjuánjan kjuachaxin kixin chróchena kuenténa, kjónté tí xíkaha ntá naxa chrótjuəhya kíchó ni la ntá ninkehó sínkíhya tíha.

⁴ Tí tjuèheni kíchó ni na ts'ejóchónhenni kíchó ni, tsonínkakuenhyani kíchó ni, la ko sinchejína əsenni, la ko tsochjinoxíenhyani, la ko sinchehnkehyani, la ko tsohnkehyani,

⁵ la ko ch'ehyani ninkehó nkehe náxrjónhya, la ko tjeyáhyani nkehe kuènteni ó, la ko tsonínkakonhyani tjoka, la ko tsochóntahyani kjuanínkaon isé,

⁶ la ko kjaxin tsochèhyani tió í jnko chojni tjasin jie. Náhi. Chrókóchéheni tió ijnko nkehe jína sitónhen.

⁷ Tí tjuèheni kíchó ni la kjónté kaín nkehe chrókjuasótexínni la chrókuitekaonni kixin jína sín la ko naxa chrok'uejóchónhenni chrókónínkakonhyani.

⁸ Tí tjuèheni kíchó ni la jnkochríxín tsjak'e ts'itjáyanhya. A ntá itsi ijnko yaon í t'ichjánxínhya tsochrónka chojni itén Dios,

la ko tsokohya kjuachaxin tsonixjaxin chojni ókjé nkìva, la ko tsokohya kjuachaxin tsonohe chojni má.

⁹ Naxa t'itjáyán tí nkehe chrókónoheni la ko naxa t'itjáyán tí nkehe chróchronkaxínni.

¹⁰ A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyán.

¹¹ Tió naxa chánjan janhan k'uéníxja éxí chánjan la ko k'uékjenkayáxian éxí chánjan. Ntá kóntetona ntá kuítóha tí nkehe kuènte chánjan.

¹² Méxra éxí ijnko xrosenta t'ikonxínhyani jína jie, ntá tsi ijnko yaon chr'éxín ntá ts'ikonxínni jína kaín nkehe. Ijie naxa t'itjáyán tí nkehe chrókónona; ntá tsi ijnko yaon tsonóna jína kaín xín nkehe éxí xíkaha kjaxin Dios chóxin ch'án tí janhan.

¹³ Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kíchó. A ntá iní nkehe siín, la kjánchó antsí má t'ichjánxin tsotjuèheni kíchó ni.

14

Tí nixjaxin chojni ókjé nkìva

¹ Chrókóxakonhanrá kixin chrótjuèhérá kichuárá la ko kjaxin chrókuéyará kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios.

² Méxra, tí nkexro nixjaxin ijnko nkìva ókjé mé nixjehe sín Dios ó la ntá chojni la náhí, kixin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín.

³ A ntá tí nkexro chronkaxín ijnko nkìva tienxín tí í so sín ijnko nkehe kuènte Dios mé nixjehe chojni ntá xíkaha tjinkĩtsa tí í so sín kixin antsí chrók'uitja sín nkehe kuènte Dios la ko chrókóchéhe sín.

⁴ A ntá tí nkexro nixjaxin ijnko nkìva ókjé la mé tjinkĩtsa jehó ch'án antsí tsonohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkĩtsa tí sín kuènte njnko kixin antsí chrók'uitja sín nkehe kuènte Dios.

⁵ Tjínkavan kixin kaín rá chróchontará kjuachaxin chrónixjaxínrá ijnko nkìva ókjé. Kjánchó antsí tjetóan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetóan chrónixjaxínrá ókjé nkìva tí noahyará tsochronkaxínrá nkexrí t'axrjexín tí nkehe chróchronkará kixin chrókuinhin kaín tí sín tinkáchónki Ìnchéni kixin antsí chrók'uitja sín nkehe kuènte Dios.

⁶ A ntá kíchó ni, tí chrókjuasántsahará chrónixjaáxinrá ijnko nkìva ókjé la ó chónkó tíha. Íchá jína chrónixjaáxinrá ijnko nkìva

tiénxinrá chróxrjankaxián ijnko nkehe kjuínchenòna Dios la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókuákoáxinrá ókjé nkehe nixin.

7 Kíxin kjaxin tí ison flauta la ko tí isón arpa, tí jnkokónhya chróntácho jnkojnko són, ntá chrókuachahyani chrókuatsòanni nkehe tí ntácho tí són a.

8 La ko éxí yóhe tí siín guerra, tjanjonko kichó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókjuikjanjonko kichó sín.

9 Kjaxin xikaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchorá? Mé xikaha tjejonixjará éxí chjéhe xrinto ó.

10 Chaxín siín itsjé nkiva chjasintajni la ko kaín nkiva la siín chojni tienxín sín.

11 Kjánchó tí chrókianxinhya janhan tí nkehe tsontácho ijnko nkexro, ntá tí nkexro a ts'ikon tí janhan éxí ijnko nkexro tsíkjixin ókjé la ko kjaxin janhan ts'ikuán tí jehe ch'án éxí ijnko nkexro tsíkjixin ókjé.

12 Méxra jahará imá tjinkáonrá chrók'uayéhérá ijnko xra kuènte Nchakuen Dios, ntá chrókójina chrókuéyará tí xra chrókuinkitsa tí í so sín kuènte njnko kixin antsí chrók'uitja sín ijnko nkehe kuènte Dios.

13 Méxra tí nkexro nixjaxin ijnko nkiva ókjé la chrókuanchehe Dios kixin chrókuinkitsa chróchronkaxín ch'án nkexrí t'axrxjén tí tan a.

14 Kíxin tí tsonixjaxian Dios ijnko nkiva ókjé, ntá tí nchakuenná ó mé tjenixjehe Dios, la ntá tí kjuaxrexinkaon kuéntana la ókjé tjen.

15 A ntá tí xikaha, ¿nkehe chrókuít'a? Íchá jina chrónixjaxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan.

16 Kíxin tí tsochjeéxinrá kjuasáya Dios nchakuanrá ó ntá tjejótinhin í so chojni, ¿ntá nkexrí kixin tí sín naxa kienxínhya sín tí nkehe nixjehérá Dios chróntácho sín “Amén, ó nchoxon”?

17 Kjónté imá náxrjón tí chrókuanchehérá Dios kjuasáya la ntá chrókienxínhya tí sín tjejótinhin, ntá chrokuinkitsahya kixin chrók'uitja sín nkehe kuènte Dios.

18 Tjáncháha Dios kjuasáya kixin antsí chonta janhan kjuachaxin tsonixjaxian ókjé nkiva, la ntá jahará la kánhyó nixjará xikaha.

19 Kjánchó tió tójnkotsé chojni kichó ni la mé ntáxrjan kixin antsí tjínkavan chrónixja janhan kjónté in'ó palabra ó tienxín

sín kixin xikaha chrókjuákuaxian sín, la ntá kánhyó chrókójína kjónté ite mil palabra chrónixjaxian ijnko nkiva ókjé tienxínnya chojni.

²⁰ Kíchóni, chrókjuenkayáxinhyará éxí chánjan. Kjánchó chrók'uejorá éxí chánjan naxa noehya nkehe jínahya. A ntá chrókjuenkayáxinrá éxí chojni nteto.

²¹ Tí xroon tsíkjin sín ósé nkexrí k'uetōan Dios mé ntáchro kixin: “Janhan tsonixjaxian ókjé nkiva la ko itén chojni ókjé kixin tsinhin tí nación Israel na kjónté tsitekakonhya sín, xikaha ichro Ìnchéni.”*

²² A ntá tí kjuachaxin tsonixjaxin chojni ókjé nkiva mé xránjon kixin chrókjuakoxin chojni chrókuinhin tí sín tinkáchónkihya Ìnchéni, jehya kixin t'ichjánxin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kixin chrókjuakoxin chojni chrókuinhin tí sín tinkáchónki Ìnchéni, jehya kixin chrókuinhin tí sín tinkáchónkihya Ìnchéni.

²³ A ntá tió tójnkotsérá kaín rá tinkáchónkirá Ìnchéni, a ntá kaín rá chrónixjaxinrá ókjé nkiva, ntá tí chrók'uixenhen nchia ijnko chojni naxa kuènyha sín xikaha, o chrók'uixenhen nchia ijnko chojni naxa tinkáchónkihya Ìnchéni ntá chrókuinhin sín xikaha la kjá tsontáchro sín kixin ó k'uixikjánrá.

²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnchéni, o chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chróxraxinkaon sín tí jie chóna sín ntá chrókuítóhe sín kaín jie chóna sín.

²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontáchro sín kixin chaxín tjejókoará Dios.

Ntoá chrókjuich'eni kaín xín nkehe tió tójnkotséni

²⁶ A ntá kichó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuákorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkiva ókjé, la ko isorá chróchronkaxinrá nkexrí t'axrxjén tí nkehe nixjaxin tí í so sín ókjé nkiva. Kjánchó kaín tíha tsonhen kixin tí sín kuènte njnko chrók'uitja sín nkehe kuènte Dios.

²⁷ A ntá tí chrónixjaxin sín ijnko nkiva ókjé na mé yaá o iy'á chojni chrónixja sín la ko chrók'uixinkí chojni tsonixja, la ko t'ichjánxin kixin jnkojín nkexro nohe tsochronkaxín nkexrí t'axrxjén tí nkehe nixja sín.

* 14:21 Isafás 28.11-12

28 **A** ntá tí kohya ninkexro tí nínko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjaxínhya sín ókjé nkíva tí tjejótojnkotsé sín, na mé chrónixjehé sín asén sín ó la ko chrónixjehé sín Dios ó.

29 Tjánjonrá kjuachaxin kixin tsonixja yaá o y'á chojni k'uáyéhe sín kjuachaxin tsochronka sín nkehe kjuínchenohe sín Dios. **A** ntá tí sín tjejótinhin mé chrókjuenkayáxin sín á ó nchoxon tí nkehe kuínhin sín.

30 **A** ntá tí xrínahya chrókjuinchenohe Dios ijnko nkehe ijnko nkexro tjetjaxín ntá chróchronka ch'án tíha. **A** ntá tí nkexro senó kjuankíxin chrónka nkehe la chróchónhen ch'án chrónixjahya ch'án.

31 Ó nchoxon jnkojkorá chróchronkará nkehe tjáhará Dios kixin xíkaha kaín rá chrók'uitjára la ko chrókócháhará.

32 **A** ntá tí nkexro k'uáyéhe kjuachaxin tsochronka nkehe kjuínchenohe Dios kjaxin t'ichjánxin chróchónhen tsochronkaxín í jnko nkexro.

33 Kíxin Dios tjanjon tí kjuaxróxin, a ntá tjinkakonhya ch'án kixin yóxinhya chrók'uejóni.

Tió tójnkotsé chojni kíchó ni tinkáchónki Inchéni

34 chrónixjahya tí chojni chjin jnkosiné servicio. Kohya kjuachaxin xíkaha, na mé chrókjuinchexiteyéhe sín tí sín ntoa éxi t'etoan tí ley kuènte Dios.

35 Tí tjinkaon sín tsonohe sín nkehe na mé chrókjuanchankíhi sín xì sín tío tjiji sín ntoe sín. Náxrxónhya chrónixja ijnko chojni chjin nkehe jnkosiné servicio.

36 Chrókónohará kixin tí itén Dios xrankíxixínhya tí tjejorá la ko jehya jahórá k'uayéhérá tíha.

37 **A** ntá tí tjen jnkójín nkexro tjenkayáxin kixin nixja itén Dios o tjenkayáxin kixin tí Nchakuen Dios tjinkítsa tí jehe ch'án ntá chrókónohe ch'án kixin tí nkehe tjékjian mé ijnko nkehe tsík'etoan Inchéni.

38 **A** ntá tí nkexro titekakonhya tíhi na ntá jahará chrókuitekákuénhyará ch'án kjaxin.

39 Méxra kíchó ni, chrókjuéyará kixin chrók'uayéhérá kjuachaxin chróchronkará nkehe kjuínchenohará Dios la ko chrókuítóhérá tsonixjaxín chojni ókjé nkíva.

40 Kjánchó kaín xín nkehe la jnkójina la ko kjuasáya chrókónhen.

15

Tsíxechón Cristo

1 **A** ntá jie kíchó ni, tjínkavan chrórxaxinkáonrá nkehe tí tan kuaáxinrá kjuákohará. Tíha mé kuitekáonrá, la mé tíha mé tjejóxinrá jína.

² Kjaxin tí nkehe kjuákohára mé kuaáxinrá, tí t̄t̄oéhyará tí nkehe kjuákohára; tí la náhí la chónkó kuinkachónkirá tí nkehe kjuàkua.

³ Saoxín, kjuákohára tí nkehe k'uayáha kixin Cristo k'uenyákonhen ijíeni, na mé xikaha kjuínchexiteyá ch'án tí nkehe ntáchro tí xroon itén Dios

⁴ la ko tsíkjavá sín ch'án la ko tsíxechón ch'án tí nixin yaon éxí ntáchro tí xroon itén Dios.

⁵ Ntá k'uíkon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uíkon sín tí jehe ch'án.

⁶ A ntá chr'éxin chjina quinientos chojni kichó ni jnkokoá k'uéjé sín k'uíkon sín ch'án. A ntá jie itsjé tí sín a naxa tjejó sín, a ntá jnkojín sín na ó tsík'en sín.

⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol inaá.

⁸ A ntá kjuixixín janhan k'uíquān Ìnchéni éxí ijnko xjan naxa xetjahya yaon chrókokjíhi.

⁹ Kjánchó janhan kánhyó tjetóan la mé tóyóehya tí í so sín tsíkjejá Ìnchéni la ko tósuāna chrók'óna ijnko nkexro ch'ehe xra Ìnchéni kixin janhan mé k'uénínkākōnhan tí sín n̄inkōe Dios.

¹⁰ Kjonté jínahya kjuít'a la kjuasáyé Dios la ko kjuachaxin kuènte ch'án mé kjuítóxinhin tí kjuenkayáxian, na mé chónkóhya kuikonóana ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhi. Dios kjuínkítsana ch'án kjuít'a xra.

¹¹ Kjánchó tjetuanhya á janhan o á jehe sín kjuako sín, kixin xikaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuènte ntáchrórá jnkojínrá kixin tsoxechónhya chojni tsík'en?

¹³ Tí chrókóchaxín tí nkehe ntáchrórá kixin tsoxechónhya chojni tsík'en, ntá kjaxin chróxechónhya Cristo.

¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá.

¹⁵ A ntá tí chaxínhya xikaha tsíkónhen, la jeheni la ijnko chojni ntoáhya chrónka kuènté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en

¹⁶ kixin tí chróxechónhya tí chojni tsík'en, ntá kjaxin Cristo chróxechónhya ch'án.

¹⁷ A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kixin naxa chrókjuínhya tí ijjárá.

18 La ko tí chrókóchaxín tíha ntá chrók'uitjáyan tí sín kuítekaon Cristo ik'uén sín.

19 Méxra tí chrókuinkáchónkini Cristo kixin chrókjuinkitsa ch'án tí jeheni chjasintajni ntihyó, ntá kohya chojni chrókóyóhe tí jeheni, imá chrókónòeni chrók'uejóni kaín ni.

20 Kjánchó náhi, la chaxín ó xechón Cristo. Jehe ch'án éxi tí nkehe tsík'óna saoxín kixin jehe ch'án saoxín xechón ch'án.

21 Méxra jnkokoá chojni ntoa kjuankíxin kjuasin jie, ntá kjuankíxin k'uén kaín xín chojni chjasintajni, la ko kjaxin jnkokoá chojni ntoa xechón, ntá xikaha tsoxechón kaín chojni tsík'en.

22 Kixin tí jie kjuasin ch'in Adán ntá kaín xín chojni sít'enxín sín. A ntá Cristo la kaín ni tsochóntaxinni kjuachón.

23 Jnkojnkonni éxi tsohenni tocar, na mé saoxín xechón Cristo, a ntá chr'éxin tió tsokjan ch'án ntá tsoxechónni kaín ni kuítekaonni tí jehe ch'án.

24 A ntá ó tsi yaon tsjixixín ntá sinchek'itjáyan Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kixin ts'áyéhe It'é ch'án Dios.

25 Na mé t'ichjánxin ts'etóan Cristo tsjixrakávia tí yaon tsjachahya tí sín nínkakonhen ch'án.

26 A ntá tí nkehe tsjixixín ts'itjáyan la mé tí kjuach'éni.

27 A ntá Dios kjuanjon kjuachaxin kixin kaín nkehe siín mé chrók'uetuēhen Cristo.* Kjánchó tió xikaha ntáchro tí xroon itén Dios tsíkjin sín ósé kixin kaín xín nkehe mé ts'etuehen ch'án, ntá ó noheni jína kixin jehya kixin Dios la chrók'uituēhen ch'án inaá. Náhi. Jehe ch'án mé chjéhe Xjeen ch'án kaín kjuachaxin ts'etuehen ch'án kaín xín nkehe.

28 A ntá tió tsjixin tsjacha Cristo ts'etuehen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuehen ch'án kaín xín nkehe.

29 A ntá í jnko nkehe, la iso sín tikiteyákonhen tí sín tsík'en. ¿Nkekuēnte xikaha ch'e sín tí titekakonhya sín kixin tí sín tsík'en tsoxechón sín inaá?

30 A ntá tí xikaha, ¿nkekuēnte kixin kaín yaon kjuaxróxinhya tjejóni nínkakonhenni chojni?

31 A ntá kichó ni, kaín yaon siín kjuachakon chrók'uèn janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo.

32 Kjónté kónínkakonna chojni chjasin Éfeso éxi iko jiehe la kjónté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xikaha la ó

* 15:27 Salmo 8.6

nchoxon tí nkehe ntáchro tí sín titekakonhya Ìnchéni kíxìn chrókjóné sín la ko chrók'ui sín kíxìn ijie la ọ ntóye chrók'uen sín.

³³ Chrókuítóéhyará chrokjuit'áyahará sín. Éxí ntáchro sín kíxìn: “Tí chrók'uejókotoxinni chojni jínahya ntá chrók'uitjáyán tí nkehe jína tjenkayáxinni.”

³⁴ Chrókjanrá ntĩa jína ntoá la chrókjuásinhyará jię. Méxra isorá naxa chonhyará Dios. Na mé ntáxrjan tíhi kíxìn chrókósuàhará.

Nkexrí tsoxechón tí sín tsík'en

³⁵ Kjà jnkójínrá tsjanchankínará kíxìn: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochónta sín?”

³⁶ Lontirá tjanchankínará xíkaha. Tí noatje t'enkani nonte t'ichjánxìn its'en ts'itjáyán kíxìn tsjak'echón tí nkehe ts'ayan.

³⁷ Tí nkehe t'enkani la jehya tí ka a. Náhi. Tí nkehe t'enkani la noatrigo ọ í jnko tje.

³⁸ Kjánchó Dios kjuanjón kjuachaxin kíxìn jnkójnko nta ts'óna éxí tjinkaon ch'án, la ko jnkójnko nta tsochónta tje kuènte.

³⁹ A ntá jehya kaín tí cuerpo la jnkókon. Náhi. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte koche.

⁴⁰ Na mé kjaxin xíkaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe.

⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkójnko.

⁴² Kjaxin xíkaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyánhya.

⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chóntahya kjuachaxin, la ntá tí nkehe tsoxechón la ijnko nkehe tsochónta kjuachaxin.

⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochónta kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochónta kjuachaxin kuènte Nchakuen Dios.

45 **A** ntá éxí ntáchro tí xroon itén Dios kixin: “Tí chojni ntoa k'óna saoxín mé ch'ín Adán tíha mé k'uáyéhe ch'án kjuachón ó.”† **A** ntá tí ó kjuixixín ikui í jnko ch'ín éxí yóhe Adán, kjánchó jehe ch'án mé chóna ch'án nchakuen tjanjon kjuachón.

46 Kjánchó jehya saoxín k'óna tí cuerpo antsí chóna kjuachaxin kuente Nchakuen Dios. Náhí. Saoxín k'óna cuerpo kuente chojni chjasintajni ó, la ntá chr'éxin k'óna cuerpo antsí chóna kjuachaxin kuente Nchakuen Dios.

47 Tí nkexro k'óna saoxín la k'óna nche na mé kjuák'e ch'án chjasintajni ó. **A** ntá tí nkexro k'óna yóxin na mé nkaya nkajní kuixín ch'án.

48 Tí cuerpo siín chjasintajni mé yóhe tí cuerpo k'uéchóna tí nkexro tsík'óna nche. **A** ntá tí cuerpo siín nkaya nkajní mé yóhe tí cuerpo chóna tí nkexro kuixín nkaya nkajní.

49 Éxí senó tóyóheni tí nkexro k'óna nche, ntá xikaha chr'éxin tsoyóheni tí nkexro kuixín nkaya nkajní.

50 Ntá tsotjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etōan ch'án. Na mé tí nkehe tsjeje xitjahya ts'áyéhe tí nkehe tsjejehya.

51 **A** ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani.

52 **A** ntá xrínghya titàya tjejóni ntá éxí chróchr'áton konni la ko chrókuakitjenkini konni xikaha tió tsjixixín tsinhinni tsontáchro trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani.

53 **A** ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en.

54 **A** ntá tió tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xikaha na ntá tsoxiteyá éxí nixja tí xroon itén Dios ntáchro kixin: “Tsjachahya tí kjuach'én la mé tsjacha tí kjuachón.”‡

55 “Jaha kjuach'én, ¿kjá tí kjuachaxin kuenta kixin chrókjuacha jaha? Jaha kjuach'én, ¿kjá tí kjuachaxin kuenta kixin chrók'oyánni?”§

56 Tí jie tjasinni mé kuixín tí ts'enni. **A** ntá tí ley k'uetōan ósé antsí k'uixixín jie.

57 **A** ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

58 **A** ntá jahará kichó ni, imá tjuahará. Chrókuitoéhyará tinkachónkirá Ìnchéni. Jnkochríxín chrókjuich'ehérá Ìnchéni

xra ąntsí jína kixin ó nohará jahará kixin tí xra ch'eheni Ìnchéni jehya chónkó tíha.

16

Tí ofrenda tjenájín sín tsochr'énhen sín tí sín tjejó chjasin Jerusalén

¹ A ntá tí chichaon tjenájínrá kixin tsjínkĩtsará tí sín kichó ni tinkáchónki Ìnchéni na mé chrókjuich'erá éxí kuétuąnhan tí sín ninko estado Galacia.

² Jnkojnko domingo jnkojnkorá chrókuakitsjenteherá nkeri síká chichaon kjuachará tí semana kjuich'erá xra kixin t'ichjánxinhya chrókjuasánjia janhan ntá chrókjuénájínrá chichaon.

³ A ntá tío tsjasán janhan tsétuąnhan tí sín tsjéyará kixin sátsji sín chjasin Jerusalén, na ntá tsokjian xroon tsjikoxín sín tí chichaon tsíkjenájínrá tsjikaán tí sín kichó ni ntiha.

⁴ A ntá tí chrókójína kjaxin janhan sáchrókjuiyá, a ntá sáchrókjuikian tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxín ts'atsínka janhan estado Macedonia ntá chr'éxin tsjasán ntiha chjasin Corinto.

⁶ Ách'e ntahó chrókuítõna chrók'uatsínkajia nchakuen kin. A ntá jahará chrókjuínkĩtsará tí janhan tío sátsjia ókjé chr'éxin.

⁷ Méxra tjínkakonhya chrók'uatsínkoá chrótsjahará ó. Náhí. Tjínkavan chrókuítõna iso yaon tí tjejorá ntiha tí Ìnchéni chrókjuanjõn kjuachaxin.

⁸ Kjánchó tsitõna chjasin Éfeso tsjixrakájia yaon Pentecostés,

⁹ kixin ntihi ąntsí chonta kjuachaxin chrókjuit'a xra kuente Ìnchéni la ko jína chrókónhen tí xra kjónté nchónhya chojni nínkakonna.

¹⁰ A ntá tí tsjiji ch'ín Timoteo ntiha la ąntsí jína chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xra éxí janhan.

¹¹ Kaín tí jahará chróchonteherá ch'án kjuasáya. Tjínkĩtsará ch'án kixin jína itsi ch'án ntihi tsitsjehe ch'án tí janhan kixin tjéchõnhan chrókui ch'án la ko tí í so sín kichó ni.

¹² A ntá tí kichó ni Apolos la imá xrjanógha ch'án kixin kjaxin chrókjuijiko ch'án tí í so kichó ni, kjánchó tjínkakonhya ch'án jie. Chr'éxin tsjiji ch'án tío ts'íxranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuítóehyará tí tinkáchónkirá Ìnchéni.

¹⁴ Kaín nkehe chrókjuich'erá la koí chrótjuèhérá kichuárá.

15 Na ntá kichó ni, ó nohará kixin tí sín kjéhya ch'ín Estéfanas saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xra a tjinkitsa sín tí sín kichó ni tinkáchónki Ìnchéni.

16 Tjinkavan kixin chrókjuinchexiteyéherá tí sín tjinkitsa éxi tí jehe sín la ko kaín tí sín ch'e xra.

17 Chàna kixin ó kui ch'ín Estéfanas la ko ch'ín Fortunato la ko ch'ín Acaico, kixin jahará kjónté tjejohyará.

18 A ntá jehe sín kjuínchechéhe sín asenná éxi kjuínchecháhará sín. Chróchontehérá kjuasáyé chojni xikaha.

19 Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntøe sín ima xraxinkaon sín tí jahará kixin tinkachónkirá Ìnchéni.

20 Kaín tí sín kichó ni ntihi xraxinkaon sín tí jahará. Nixjehérá kichuárá kaín rá tsehérá tja kichuárá jnkojína.

21 Janhan Pablo xráxinkavan tí jahará ikjian xroon chr'anhánrá la tjaná kjinxian tí letra i.

22 Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

23 A ntá kjuasáyé Ìnchéni Jesucristo mé sintayaonrá ch'án.

24 Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énhen ch'án tí ninko chjasin Corinto

1 Janhan Pablo mé kjueyána Dios kixin sít'aha Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará ninko Dios chjasin Corinto la ko kaín tí í so kichó ni tinkáchónki Ìnchéni tjejorá nkuixín estado Acaya.

2 Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

3 Tjancheheni kjuasáyé Dios It'é Ìnchéni Jesucristo. Jehé It'éni mé tikonóeheni ch'án la ko xráxín nchechéheni ch'án.

4 Jehé ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxí yóhe jehé ch'án kjuínchechéhe ch'án tí jeheni.

5 Mé xíkaha tjejótjasóteni éxí yóhe kjuasóte Cristo ntá kjaxin jehé ch'án imá sinchechéheni ch'án kixin tinkáchónkini ch'án.

6 Tjejótjasóteni kixin tí jahará chrókóchàxínrá la ko chrókuaáxínrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxí tjasóteni jeheni.

7 Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhe Dios tí jeheni kaín ni.

8 Kíchóni, tjinkaonni kixin chrókónohará kixin nkexrí imá kjuasóteni tí k'uejóni tí estado Asia. Imá náxrjónhya kjuasóteni la chrókjuachahyani, la k'uitjáyenhenni tí tjenkayáxinni kixin chrók'uaxrjéxinni ntiha naxa chrók'uejóchónni.

9 Ó kónoheni kixin chrók'uenxínni ntiha. Mé xíkaha kónhenni kixin chrókónoexínni kixin tí jehóni la chrókjuachahyani tíha. Náhi. Chrókuinkáchónkini Dios, mé tí nkexro nchexechón chojni tsík'en.

10 Jehé Dios mé kjuínchekaáni ch'án la ko naxa sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehé ch'án sinchekaáni ch'án

11 tí tjínkĩtsaráni tjanchehéra Dios kixin tsjinkĩtsani ch'án. A ntá tí tsjé chojni chrókjuanchehe Dios kixin tsjinkĩtsani ch'án ntá chr'éxín itsjé chojni tsjanchehe sín ch'án kjuasáyé kixin xíkaha jehé ch'án kjuínkĩtsani ch'án.

Nkekuènte sákjuíhya ch'ín Pablo tí chjasin Corinto

12 Chéheni kixin noheni kixin ntoá k'uéjóni ntihi chjasintajni kjuích'yiehyani chojni, mé xikaha k'uéjókoaráni. Ntá jehya kjuachaxin kuènteni kjuachaxinni xikaha. Náhí. Kjuachaxin kuènte Dios mé kjuínkítsani kixin xikaha k'uéjóni.

13 Tió chr'ánhanráni xroon, kjinhyani nkehe chrókiénxinhyará. Náhí. Jehó tí nkehe chrókuinchekuáxinrá chrókiénxinrá. Tjéchonhan kixin chrókiénxinrá jína.

14 A ntá ó tinkakiénxinrá ntsí kixin tió tsokjan Ìnchéni Jesús tsocháhará kixin xikaha kjuakoharáni jeheni la ko kjaxin tsochéheni kixin jahará kuítekáonrá.

15 Mé xikaha kjuenkayáxian kixin saoxín chrókjuasántsjahará tí jahará kixin chrókócháhará kixin yáya chrókjuasántsjahará.

16 Kjuenkayáxian janhan chrókjuasántsjahará saoxín tió sáchrókjuia estado Macedonia la ko chrókjuasántsjahará ínaá tió chrókjanxian ntiha. Mé xikaha chrókjuínkítsarána tió sáchrókjuiyá janhan estado Judea.

17 ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya?

18 Méxra tjetsjehe Dios kixin xikahya kjuáteheni tí jahará kixin chrókjuijini la ko chrókjuijihyani.

19 Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuakoxian janhan tí k'uéjóni ntiha, mé xikahya k'uéchronka ch'án, kjuích'yiahya ch'án ninkehó. Náhí. Kaín nkehe tjakoni kuènte Cristo la chaxín tíha.

20 Kixin kaín nkehe tsíchronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni “Amén, ó nchoxon” kixin tí kjuachaxin kuènte Cristo Jesús.

21 A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehe ch'án mé kjueyáni ch'án.

22 Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochóna asénni senó kixin tsoñoexínni kixin chaxín ts'áyéheni nkehe chr'éxin.

23 A ntá tí naxa kjuasánhya janhan chjasánrá Corinto éxí kjuenkayáxian la tjetsjehe Dios kixin tjínkakonhya kixin chrókóxakonhanrá tí chrókjuéntuáhárá tí jahará ínaá.

24 Jehya kixin chrókuétuanhánrá kixin nkexrí chrókuinkachónkirá Ìnchéni kixin ó nòna kixin ntoá tinkachónkirá ch'án. Ó jehí tjínkaonni chrókjuínkítsaráni kixin antsí má chrókócháhará.

2

1 Mé xikaha kjuenkayáxian kixin chrókjuasánhya janhan ntiha ínaá tí naxa xrásinrá kjuanínkaon.

2 A ntá tí naxa chrókjuíntak'ávára, ja ntá nkexro chrókjuinchehána ínaá tí chrókjuinchehánahará jahará kixin janhan kjuíntak'ávára?

3 Mé xikaha ikjian tí xroon chr'anhánrá senó kixin tjínkakonhya chrókjuasán chrókjuinchekóxakonnará ínaá. Náhi. Jahará chrókjuinchehánará. Méxra ó nòna kixin tí chrókóchána janhan ntá chrókócháhará kaín rá.

4 Kjánchó tió ikjian tí xroon a chr'anhánrá senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánrá kixin chrókjuíntak'ávára. Náhi. Ikjian tí xroon chr'anhánrá kixin chrókónoaxínrá kixin imá tjuahará tí jahará.

Ch'ín Pablo chrókjuinchek'itjáyenhen ch'án tí jie kjuasin tí nkexro a

5 A ntá tí nkexro kjuínchexakonna la jehya janhvàn kóxakonna. Náhi. Kaínrá kóxakonhanrá. Kjánchó tjínkakonhya tjetóxin tsontáxrjan tíha.

6 Na mé itsjé tí jahará nixjehérá ch'án kóyakoterá ch'án kixin chrókjuasinhya ch'án jie xikaha la táhó la ó tjen.

7 Ntá jie chrók'uitjáyanhanrá tí jie kjuasin ch'án, chrókjuínkítsará ch'án, kixin tí náhi la ts'itjáyanxín ch'án tí kjuancheníhi.

8 Méxra xrxjanóahará kixin chrókjuákoxinrá ínaá kixin chaxín tjuèhérá ch'án.

9 Mé xikaha senó ikjian xroon chr'anhánrá kuènte tí kjuanínkaon chontará kixin tsononaxian á chrókjuinchexiteyànará kaín nkehe chrókuétuánhánrá.

10 A ntá tí sinchek'itjáyenhenrá ijnko chojni ichrén jie kjuasin ch'án ntá janhan kjaxian sintak'itjáyanhan ch'án tí jie kjuasin ch'án. Méxra tí chaxín k'ué ichrén jie chrókjuíntak'itjáyanhan ijnko chojni la ó kjuixin kjuíntak'itjáyanhan ch'án tí jie a kixin chrók'uejorá jnkojína. Kjaxin xikaha tjetsjehe Cristo,

11 kixin ntá tí ch'ín Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

12 A ntá tió kjuasán tí chjasin Troas chrókjuákua tí tan jína kuènte Cristo la antsí xránjon kjuachaxin kixin chrókónhen xra kuènte Ìnchéni.

13 Kjánchó náxrxónhya tjen asenná kixin k'uitjahya tí kichó ni Tito. Ntá tuénxín níxjahá tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochónta sín kjuachaxin kuènte Cristo

¹⁴ Kjuasáyé Dios kixin xráxín jehe ch'án tjinkitsani ch'án ntá tjachani kixin chóntani tí kjuachaxin kuènte Cristo Jesús. Ntá kaín nketí sáchrókuini mé tjakoxinni tí tan kuènte ch'án éxí ijnko nkehe xraxé náxrjón chrókóxrjínhín kaín xín chojni.

¹⁵ Kaínni la éxí yóhe tí xraxé náxrjón kuènte chjínco chrókjuanjon Cristo chrók'uáyéhe Dios kixin tíha mé chrókónoexín tí sín tsaá la ko kjaxin chrókónoexín tí sín ts'itjáyan.

¹⁶ Tí sín ts'itjáyan mé tókaxraxéhe sín éxí ts'enxín sín tí xraxé a. A ntá tí sín tsaá mé tóxrjínhín sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha?

¹⁷ A ntá jeheni mé xrinchekjihyani nkexrí nixja itén Dios éxí ch'e nchónhya chojni chrókjuacha sín chichaon. Náhi. Kaín asénni tjakoni itén Dios kixin kjueyáni ch'án sich'ehe ni Cristo xra, la ko tjetsjehe ch'án tí xra tjejóch'eni.

3

Tí pacto nixin

¹ A ntá xikaha ntáchroni, ¿á tjenkayáxinrá kixin kjuankixinni tsochronkani inaá kixin jína tí jeheni, o á t'ichjánxin kixin chrókjujikonni xroon kixin tsonoaxínrá kixin jína tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jína tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jína tí jeheni éxí ch'e í so sín?

² Náhi. T'ichjánxienhyani nijnko xroon kixin jahará mé éxí yóhe ijnko xroon tsíkjinni xrikoni chróchóxin la ko chrókjuinchekuáxin kaín xín chojni tsonoexín sín kixin jeheni mé ch'ehe ni Cristo xra.

³ T'ikon sín noxín kixin tí jahará mé éxí yóhe ijnko xroon tsíkjín Inchéni Cristo xrikoni nchekuáxin chojni. Kjánchó jehya ntahni tsíkjínxin ch'án. Náhi. Kjuanjon ch'án Nchakuen ch'án tjechón chontará la kjaxin jehya xrotabla tsíkjín ch'án. Náhi. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjinkitsani Cristo.

⁵ Jehya kixin ó jehí chróchóntani kjuachaxin kixin chrókjuich'eni xra. Náhi. Kaín tí xra ch'eni na Dios tjetjanjon kjuachaxin.

⁶ Jehe ch'án mé kjuanjon ch'án kjuachaxin kixin chrókjuich'ehe ni ch'án xra tsochenkani chojni tí tan nixin kui. Tíha jehya ijnko nkehe tsíkjín chojni chrókjuinchexiteyéhe ni. Náhi. Tíha mé kjuachaxin kjuanjon Nchakuen Dios kixin sinchexiteyéhe ni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákiní tsjehe ikon ch'án.* Kjánchó tí t'inkaséyan kjuankíxin ó tinkák'anka. Méxra tí xikaha tí ley tjanjon kjuach'én mé kuikao ijnko t'inkaséyan imá náxrjón.

⁸ ¿á chrókójehya kixin antsí má t'inkaséyan kuikao tí tan nixin kuixin kjuachaxin Nchakuen Dios?

⁹ Méxra xikaha tí ley k'uéchónta kjuachaxin jie kjónté ntáchro kixin its'en chojni, a ntá antsí má jína tí tan chrónka Dios kixin tsotjuáxin tí jie chóntani.

¹⁰ Méxra tí kjuachaxin k'uéchónta tí ley k'uék'etōan ósé la ninkehó tóyóehya tí kjuachaxin jie tjen jie.

¹¹ A ntá tí k'uéchónta kjuachaxin tí nkehe séhyó ntá tinkákjeje, a ntá antsí má chónka kjuachaxin tí nkehe tsjak'e jnkochrín.

¹² Mé xikaha tí nkehe tsjejehya tjejóchónhenni ntá chrakonhyani chronkaxínni kaín tíha.

¹³ Ch'ehyani éxí kjuích'e ch'ín Moisés k'uikjèxin ch'án ka ikon ch'án kixin tsonoehya tí sín israelita kixin ó tinkákjeje tí t'inkaséyan chónka ch'án.

¹⁴ Kjánchó jehe sín naxa kienxínhya sín la ko naxa xikaha tjejó sín ijie tió nchekuáxin sín tí nkehe k'uítuenhen sín ósé kixin tí ka naxa t'inkákonhen tí chrókienxín sín kixin naxa kjuínhya tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a.

¹⁵ A ntá kjónté jie tió nchekuáxin sín tí xroon tsíkjin ch'ín Moisés la tjejó sín éxí naxa t'inkákonhen tí ka a kixin tienxínhya sín.

¹⁶ A ntá tió ijnko chojni tsjankíxin tsinkáchónki Ìnchéni ntá tí ka t'inkákonhen la tsjín.

¹⁷ A ntá Ìnchéni mé Nchakuen Dios tíha. A ntá tí tjen Nchakuen kuènte Ìnchéni Dios la ntiha kohya nkehe ts'inkákonhen.

¹⁸ A ntá jeheni kaín ni kohya nkehe t'inkákonhen ikonni la mé tjejóni éxí xrosentá tjákiní tí kjuachaxin kuènte Ìnchéni, na mé tinkák'ixitóxin tí kjuaxrexinkaon kuènténi kixin antsí chrókóyóhēni éxí tí jehe ch'án kixin antsí tsochóntani tí kjuachaxin kuènte ch'án, kixin Ìnchéni, na tí Nchakuen a, mé xikaha ch'e xra.

4

¹ Méxra xikaha chrókóxrjéhyani chrókjuich'eni tí xra kjuanjon Dios kixin jehe ch'án kuikonóhēni ch'án.

* 3:7 Éxodo 34.29-35

² Ó kuítóhēni kaín nkehe imó la ko kaín nkehe chrókósuèxinni, la ko ch'iyehyani kíchó ní, la ko tjitoxijenhyani itén Dios. Náhí. Jehí tí nkehe ntoá chrónkani. A ntá xíkaha chrókónoexín kaín xín chojni kíxín ntoá tjejóni éxí tjinkaon Dios.

³ A ntá jeheni mé tjakoni tí itan tsaáxinni, kjánchó iso sín kjónté xíkaha tinhin sín mé tienxínhya sín kíxín xráxín jehe sín la ts'itjáyan sín.

⁴ A ntá jehe sín kuítekakonhya sín, a ntá tí dios kuènte chjasintajni mé kjuínchek'ikonhya sín kíxín chrókiénxínhya sín, kíxín ntá chrók'uiakonhya sín tí t'inkaséyan kuènte tí tan kuènte Cristo, mé tí nkexro chóna kjuachaxin, a ntá jehe ch'án la mé yóhē éxí tsjehe Dios.

⁵ Tió tjakoni na mé jehya tjakoni kíxín jeheni chrókuitekáonrá. Náhí. Chronkaxínni kíxín chrókuitekáonrá Jesucristo mé Ìnchéni la ko chrónkani kíxín jeheni mé t'aharáni xra tsjinkítsani tí jahará kíxín tjuahará Jesús.

⁶ Na mé jehe Dios k'ueṭoan kíxín tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asénni kíxín chrókjuachani chrókónoheni nkexrí tjen tí kjuachaxin jíé kuènte Dios t'inkaséyanxín Ìnchéni Jesucristo.

Nkexrí chrók'uejóni kíxín tinkáchónkini Ìnchéni

⁷ A ntá tí cuerpo kuènteni la yóhē ijnko chí tsík'óna nchetje tjinka nkehe tjete, mé xíkaha ts'ikon sín kíxín tí kjuachaxin jíé chóntani la kuixín tí tjen Dios kíxín jehya kuènteni tíha.

⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títoehyani tinkáchónkini ch'án.

⁹ Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékonni kjuítsínkani kjánchó kjuínchek'itjáyanhyani sín.

¹⁰ Kjónté nketí sátjini xráxín chrók'uenxínni éxí k'uénxin Ìnchéni Jesús, kíxín xíkaha tjakoṭxínni tí kjuachón chóna ch'án.

¹¹ Méxra jeheni naxa tjejóchónni la xráxín sínni kjuaxikaon kíxín chrók'uenxínni kíxín tinkáchónkini Jesús kíxín kjaxin xíkaha chrókjuakoṭxínni tí kjuachón chóna ch'án kjónté chrók'uen tí cuerpo chóntani.

¹² Kjónté xíkaha chrók'uenxínni, a ntá jahará tsochontará kjuachón.

¹³ Éxí ntáchro tí xroon itén Dios tsíkjin sín ósé kíxín: “Kuítekavan ntá xíkaha xrxanka.”* A ntá kjaxin jeheni kuítekaonni ntá xíkaha chrónkani.

* 4:13 Salmo 116.10

14 **A** ntá ó noheni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. **A** ntá jehe ch'án tsjiko ch'án tí jeheni la ko tí jahará kjaxinrá tí tjen Dios.

15 Kaín tíha kónhen kixin jahará jína chrók'uejoxinrá. La ko kjaxin xikaha nchónhyará chrók'uayéhérá tí kjuasáyé Dios, ntá antsí tsjé chojni ts'ejóni tsjancheheni Dios kjuasáyé kixin tí kjuachaxin jíé chóna ch'án.

16 Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuénténi.

17 **A** ntá tí nkehe tjasótexínni tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jíé la ko í tsjejehya tíha.

18 Ntá chrókomáhyani tí nkehe síin chjasintajni ntihyó. Náhi. Chrókjueyáni tí nkehe naxa t'ikonhyéni kixin tí nkehe t'ikonxínni ikonni na mé nkehe chóxin tsjeje. **A** ntá tí nkehe t'ikonhyani mé nkehe tsjejehya.

5

1 **A** ntá ó noheni kixin tió tsjeje tí cuerpo chóntani na mé yóhe éxí ijnko nchia tjoka tsjeje, a ntá Dios mé kjuích'éna jnkojnko nchia nixin ts'itjáyanhya jnkochrixin nkaya nkajní kixin jehya tjá chojni kjuích'éanaxín tíha.

2 Tí naxa chóntani cuerpoéni ntihi la náxrjónhya tjejóni tjinkaonni tí ókjé cuerpo tsochóntani nkaya nkajní

3 kixin táha ts'inkáyani éxí ijnko ka, ntá xitjahya chrókótjóchínni.

4 Tí naxa tjejóchónxinni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuítokoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyan tí chrók'uenxínni la ntá chrókuakjani tí kjuachón nixin.

5 Dios mé kjuenkayáxin ch'án kixin xikaha sinchekitonhenni ch'án ntá kjuínchekitonhenni ch'án tí Nchakuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

6 Mé xikaha xráxin ó noheni kixin tí naxa tjejóni ntihi naxa chóntani cuerpoéni ntá naxa tjejókohyani Ìnchéni.

7 **A** ntá jeheni tjejóni tinkáchónkini ch'án kjónté t'ikonhyani ch'án.

8 Kjánchó jeheni na imá chéheni tjinkaonni chrókuítoheni tí cuerpoéni chóntani jie kixin sáchrókjuini tí tjen Ìnchéni, chrók'uejókoni ch'án ntiha.

9 Méxra xikaha tjinkaonni chrókjuinchechéheni Inchéni kjónté naᵗa chróchóntani cuerpoéni ntihi la o í chróchóntahyani, la naᵗa chrókuinkáchónkini ch'án.

10 Kíxin kaín ni t'ichjánxin tsochjineheni Cristo tí tjen ch'án t'etōan ch'án kíxin nkehe ts'áyéheni jnkojnkonni kíxin nkerí xra kjuích'eni á jína o náhí tí naᵗa k'uéchóntani cuerpoéni ntihi chjasintajni.

Tí tan tjanjon kjuaxróxin

11 Méxra xikaha noheni chróchrakonhenni tí kjuachaxin jie kuènte Inchéni ntá tóxakonhenni tjakoheni chojni kíxin chrókuinkáchónki sín ch'án. Ó nohe Dios kíxin nkexrí tjejóni la ko tjinkaonni kíxin kjaxinrá chrókónohará.

12 Jehya kíxin chrótjonkará inaá kíxin jína ch'eni xra. Náhi. Jehí ntáchroni kíxin síin nkehe chrókócháxinrá kíxin tí jeheni ntoá chrónkani kíxin chrókónohará nkexrí chrókjuáteherá tí sín imá nchehnke sín kíxin imá náxrjón nixja sín a ntá xraxinkakonhya sín tí jie chónta asén sín.

13 A ntá tí lóconi na mé tíha kíxin tjinkaonni chrókjuich'eheni Dios xra. A ntá tí jehya lóco tí jeheni la mé jehí tjinkaonni chrókjuinkítsani tí jahará.

14 Kíxin Cristo la imá tjuèhe kaín xín chojni ntá t'etuehenni ch'án kíxin ó noheni jína kíxin jehó ch'án k'uenyákonhenni ch'án tí ijiéni kaín ni kíxin éxí kjaxinni ik'uénni kaín ni kíxin jehe ch'án k'uenyákonhenni ch'án.

15 Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuènteni chrókjuinchexiteyéheni. Náhi. Chrókjuinchexiteyéheni ch'án kíxin k'uenyákonhenni ch'án la ko xechón ch'án inaá kíxin tsaáxinni ch'án.

16 A ntá jie jeheni tjenkayáxinhyani éxí tjenkayáxin chojni chjasintajni ó. Kjánchó senó k'uéchóxinni Cristo kíxin nkexrí kjuák'e ch'án chjasintajni ó, a ntá jie la xikahya t'ikonni ch'án.

17 Méxra tí nkexro tinkáchónki Cristo mé k'óna ijnko chojni nixin. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

18 Kaín tíha mé tí xra kjuích'e Dios. Jehe ch'án mé kjuanjon ch'án kjuaxróxin kíxin jína chrók'uejókoni ch'án kíxin k'uenyákonhenni Cristo. Ntá jie jeheni k'uáyéheni tí xra tsochénkani í so chojni kíxin kjuaxróxin chrók'uejóko sín ch'án.

19 A ntá ó noheni kíxin Dios ichr'án Cristo k'uenyákonhenni ch'án, ntá xikaha Dios tjinkaon kíxin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chónta chojni, a ntá jeheni k'uáyéheni tí xra tsjakoni itén ch'án.

20 Ntá jeheni kjuachaxin kuènte Cristo chronkaxínni kixin Dios chrónóaxínrá ch'án tí jeheni. Mé xíkaha tí kjuachaxin kuènte Cristo chrónóaxínráni kixin kjuaxróxin chrók'uejokoará Dios.

21 A ntá Cristo la ninkehó jie kjuasinhya ch'án, ntá ijieni k'uénxin ch'án. Kjánchó Dios k'uíkon kixin éxí tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6

1 Ntá kaín ni jnkokoá ch'ehe ni Dios xra, ntá chrónóaharáni kixin chrókuiotóéhyará tí kjuasáyé Dios kjuakuaxínrá ch'án.

2 Kixin ntáchro xroon itén Dios kixin: A ntá tí yaon kóxrjínhín Dios kuínhin ch'án tí nkehe chronòə chojni;

Tí yaon tsaáxin chojni mé kjuínkítsa ch'án tí jehe sín.*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

3 Ch'ehyani ninkehó nkehe jínahya kixin ntá chrók'uántaxínhín sín tí xra tjejóch'eni.

4 Náhí. Kaín nkehe ch'eni tjakoxínni kixin ch'ehe ni Dios xra. Na mé tjachani tónínkakonhyani kjónté nchónhya nkehe tjasótéxínni, la kjónté ichrén nkehe t'ichjánxínhinni, la kjónté ichrén kjuaxikaon síin.

5 Na mé k'uékoni, la k'uéjóchjinani, la nchónhya k'uixite chojni kóninkakonhenni sín, la ko tí xra kjuích'eni la imá xra. Kjaxin k'uájuahyani la ko kjónehyani.

6 Tjakoxínni kixin tjóá tjenkayáxínni, la ko tjakoxínni kixin ó noheni tí nkehe chaxín, la ko tjakoxínni kixin tónínkakonhyani, la ko tjakoxínni kixin ch'eni tí jína. La ko chóntani Nchakuen Dios, la ko kaín aséni tjuèheni kíchó ni,

7 la ko chrónkani tí tan ntoá kuènte Dios, la ko tjakoxínni kixin chóntani tí kjuachaxin kuènte ch'án. Ntoá tjejóni ntá xíkaha tsjachani ntá kohya nkehe tsonhenni.

8 Iso sín náxrjón nixjehe sín tí jeheni la ko iso sín náxrjónhya nixjehe ni sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'ikon sín tí jeheni éxí chojni ch'ia la ko iso sín ntáchro sín kixin jeheni chojni ntoá chrónka.

9 Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín.

10 T'áváni la kjónté xraxinkaonni kixin Inchéni t'ayakonhenni la chéheni. Éxí nòani jeheni na kjónté chénkani itsjé chojni tí itén Dios tsaáxin sín éxí chróchjéheni sín ijnko

* 6:2 Isaias 49.8

nkehe imá tjete xíkaha. Éxí chóntahyani ninkehó nkehe la kjónté la kaín nkehe chóntani.

¹¹ Kíchóni tjejorá chjasin Corinto, ntoá chrónkani nixjahaaráni la ninkehó t'ayahyaráni la mé kaín asénni tjuahará.

¹² Jehya jeheni chrók'uitjáyan kixin chrótjuahará. Náhi. Jahóra t'itjáyan kixin chrótjuèhéra tí jeheni.

¹³ Janhan xrjanóghará éxí ijnko it'é xjan chrónóehé tí xjeen ch'án kixin kjaxinrá kaín asánra chrótjuèhéra tí jeheni éxí tjuèheni tí jahará.

Jeheni mé éxí ninkoe Dios tjechón

¹⁴ Chrók'uitohyará tí sín tinkáchónkihya Ìnchéni kixin tíha mé éxí yóhe ijnko yunta, jnkokónhya koxinta. ¿La ko nkexrí chrókóyóhe ijnko chojni ó kótjóá la ko ijnko chojni naxa náhi? ¿La ko nkexrí chrókóyóhe tí t'inkáséyan la ko tí sítié?

¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kichó ijnko chojni tinkáchónki Cristo la ko ijnko chojni tinkáchónkihya.

¹⁶ Xitjahya chrók'uito tí ninkoe Dios la ko tí nkehe tsíkjanoya. Kixin jeheni mé tí ninkoe Dios tjechón, kixin jehe ch'án tsíntáchro ch'án kixin:

Ntaha tsjak'é la ko xritjak'é tí tjejó tí jehe sín,
a ntá janhan mé ts'óna Dios kuènte sín
la ko jehe sín mé ts'óna chjasin kuèntana.†

¹⁷ Méxra xíkaha kjaxin ntáchro Ìnchéni kixin:
T'axrjekjanxínra tí jehe sín na ókjé tjejorá;
tsehyará tí nkehe tjuáhya.

A ntá janhan mé ts'ayáha tí jahará.‡

¹⁸ Ntá janhan mé ts'óna It'ára,
a ntá jahará ts'ónará xjanna ntoa la ko xjanna chjin,
ichro Ìnchéni Dios chóna kaín kjuachaxin. §

7

¹ Mé xixaha kichó ni, tí nkehe i mé tsíntáchro Dios tsjanjon ch'án. Méxra t'ichjánxin kixin tjóá chrók'uejóni, chrókuítóheni kaín nkehe chrókuinçekjita tí cuérpoéni la ko tí asénni. Ntá chrókóxakönhenni chróchrakönhenni Dios la t'ichjánxin chrókuancheheni ch'án chrókuinchetjóáni ch'án kixin jehó ch'án chrókuinkáchónkini.

Tí sín Corinto kjuitoxinhin sín ntie sín

² Chrókuánjonra kjuachaxin kaín asánra chrókuinhínra tí nkehe chróchronkani. Ninkehó jie chóntehyani ninkexró, la ko kjuích'iyehyani ninkexró.

³ Jehya ntáchroni tíhi kixin chrókuékará jie. Náhi. Ó nohará kixin ósé chrónkani kixin kaín asénni tjuèheni tí jahará kixin jnkokoá chrók'uejóni la ko jnkokoá chrók'uenni.

⁴ Janhan la imá tjíkosáyahará tí jahará la ko imá chàna kixin jína tjejorá. Kjónté kaín nkexrí tjejójtjasóteni na imá chàna.

⁵ A ntá tió kjuíjini estado Macedonia la xitjahya chrók'ok'éheni kixin nkuíxín siín chojni nínkakönhenni la ko kóxakonhen asénni.

⁶ Kjánchó Dios na mé tí nkexro nchechéhe asén kaín tí sín tsíkóxrjé mé kjuínchechéhe ch'án asénni kixin ó kjuíji ch'ín Tito.

⁷ Ntá jehya kixin tí kjuíji ch'án ó chrókóchéxinni. Náhi. Chéheni kixin jahará kjuínchechéhérá ch'án. Chrónka ch'án kixin imá tjinkáonrá chrók'uíkonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuqanhanrá. Mé kujnhan kaín tíha ntá antsí má kóchána.

⁸ Kjuíntak'ávára kixin tí xroon kjian chr'anhánrá la kjónté la ntá jie í tóxakonnahya. Na mé senó kóxakonna ntá k'uíquqan kixin tí xroon kjuíntaxakonhanrá kjánchó kánhyó isé tíha.

⁹ Ntá jie chàna, kjánchó jehya kixin tí nkehe kjuíntak'ávára. Náhi. Chàna kixin tí kjuat'ává a ntá ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjínhjin ch'án. Méxra xikaha jeheni la ninkehó nkehe jínahya kjuít'aharáni.

¹⁰ A ntá tí kjuat'ává kjuacha chojni ntá sinchechéhe sín Dios kixin kjuítóxinhjin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuitóehya tí nkehe kuente chjasintajni mé t'ává sín kixin táhó ts'enxín sín.

¹¹ A ntá jahará kjuachará k'uátsínkará tí kjuat'ává éxi kóxrjínhjin Dios, a ntá jie kónohará kixin jína tjejorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuínchekónínkaonrá la ko kjaxin kjuínchechrakonrá. Ntá chr'éxin ntá tjinkáonrá chrók'uikonrá tí janhan. Ntá kjuínchekjasóterá tí nkexro kjuasin jie. Kaín tíha kjuákoxínrá kixin chontahyará ninkehó jie tí nkehe tsíkónhen.

¹² A ntá tí nkehe kjian la jehya kixin kjuenkayáxian janhan kuente tí ch'ín kjuasin jie, la ko jehya kixin kjuenkayáxian janhan kuente tí ch'ín k'uává ó. Náhi. Íchá jína kixin jahará chrókjuákoxínrá nkayakon Dios kixin imá tóxakonhanrá kixin jeheni xikaha k'uetóanni.

¹³ Mé xikaha kjuich'erá ntá kóchéheni.

Kjánchó antsí má kóchéheni kixin k'uíkonni kixin kóchéhe ch'ín Tito kixin jahará kaín rá kjuínkítsará kixin kjuaxróxin kjuák'e ch'án ntiha.

¹⁴ Janhan k'uétjanka tí ch'ín Tito kixin chàna kixin tí jahará la jehya kjuach'ia tíha la kósuànahya. Náhí. Kaín nkehe k'uétjonkará la chaxín la ko kjaxin kaín nkehe k'uéntátjan ch'ín Tito la chaxín kixin chéheni kixin kuítekáonrá.

¹⁵ A ntá jie antsí tjuahará ch'án kixin xráxinkaon ch'án kixin nkexrí jína kuítekáonrá la ko nkexrí imá kjuíkosáyehérá ch'án kjuánjonrá kjuachaxin kuítóhe ch'án ntiha.

¹⁶ Ntá imá chàna kixin ó nòna kixin jahará sìnchexiteyànará.

8

Antsí má chrókjuínkítsa sìn kíchó sìn

¹ Ntá jie kíchó ni, tjinkaonni chrókónohará kixin nkexrí tí sìn tinkáchónki Ìnchéni tójnkotsé sìn estado Macedonia kjuakoxin sìn nkexrí tí kjuasáyé Dios.

² Kjonté nchónhya nkehe tsíkónhen sìn la kjonté la kóchéhe sìn; la ko kjonté nòna sìn la antsí má kjuínkítsa sìn tí sìn í so éxí chojni chóna itsjé chichaon xikaha kjuích'e sìn.

³ Chaxín k'uíkuan kixin kjuanjon sìn éxí tí nkehe chóna sìn la ko antsí má xíkjanjon sìn inaá kixin xikaha kjuenkayáxin sìn.

⁴ Nchónhya chrónóehé sìn tí jeheni kixin chrókjuanjonni kjuachaxin kixin chrókjuínkítsa sìn tí sìn kíchó ni tinkáchónki Dios.

⁵ Na mé antsí má kjuanjon sìn la xikahya kjuenkayáxinni kixin xikaha chrókjuanjon sìn, na mé senó kuínkáchónki sìn Ìnchéni, ntá kjuixin ntá kjuínchexiteyéhe sìn tí jeheni éxí tóxrjínhin Dios.

⁶ Méxra chrónóeheni tí ch'ín Tito kixin chrókjuenájin ch'án chichaon tí tójnkotsérá ntiha éxí kjuankíxin ch'án senó.

⁷ A ntá jahará la tjákoxinrá jína kixin antsí tinkachónkirá Ìnchéni, la ko antsí k'uitjará chonkaxínrá itén Dios, la ko antsí k'uitjará nkehe kuènte Dios, la ko antsí chontará kjuachéhe, la ko antsí tjuèhéra tí jeheni. Méxra xikaha antsí chrókjuákoxinrá tí xra jína chrókjuínkítsará tí sìn kíchó ni.

⁸ Jehya ntáxrjan tíhi kixin chrókuétuanhanrá xikaha. Náhí. Jehí tjínkavan chrókónohará nkexrí jína kjuích'e tí í so sìn kixin kjaxinrá chrókjuákoxinrá kixin tjuèhéra kichuára.

⁹ Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónòna ch'án kixin imá tjuèhe ch'án tí jahará kixin tí kónóaxin ch'án mé jahará kórikóxinrá.

¹⁰ Méxra tsotjonkará tí nkehe tjenkayáxian janhan kuènte tí xra i kixin jahará tí nánó k'uátsínka kjuankíxinrá kjuínkítsará kjuánjonrá nkehe, la mé jehya kixin ó jehí kjuínkítsará sìn. Náhí. Kjaxin imá kócháhará kixin kjuínkítsará sìn.

¹¹ A ntá jie chrókjuintaxín chrókjuánjonrá éxí tí chrókjuachará chrókjuánjonrá éxí xrankíxixín tsíkateherá tsjínkĩtsará tsjánjonrá nkehe.

¹² Mé xíkaha tí chaxín tjinkaon jnkojín chojni chrókjuanjon sín nkehe, ntá tsoxrjínhìn Dios tí tjanjon sín tí nkehe chóntha sín. Dios la tjanchahya ch'án tí nkehe chóntahya chojni.

¹³ Jehya kixin xíkaha tí í so sín chrók'uejó sín jína kixin tí nkehe kjuínkĩtsará sín la ntá jahará chrók'uitjáyan nkehe t'ichjánxìnhanrá. Náhi.

¹⁴ Chrókójína chrókóyóhe chróchontará nkehe jnkokón. A ntá jie jahará chontará tí nkehe chóntahya tí í so sín. A ntá í jnko yaon jehe sín tsochóntha sín tí nkehe tsochontahyará. Chrókjuínkĩtsará tí sín chóntahya kixin chróchontará nkehe jnkokón.

¹⁵ Éxí ntáchro xroon itén Dios kixin: “Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.”*

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxí tóxakonna kixin tí jahará.

¹⁷ Ntá kóxrjínhìn ch'án tí nkehe k'uetuenhenni ch'án, la ntá kjaxin jehe ch'án kóxakonhen ch'án kixin á jína tjejorá, ntá jehe ch'án tjinkaon ch'án chrókjuijitsjehe ch'án tí jahará.

¹⁸ Kjaxin k'uetoanni sátsjikotoxìn tí ch'ín Tito í jnko kichó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xra jína tjech'e ch'án tjako ch'án tí tan tsaáxinni.

¹⁹ La ko kjaxin tí sín kaín tí ninko ntihi kjueyá sín tí nkexro kichó ni kixin sátsjikotoxìn ch'án tí jeheni tí xra sátsjikoni tí chichaon tsjikénhenni tí sín nõa. Na mé tí xra ch'eni kixin xíkaha tsjikosáyeheni Ìnchéni la ko xíkaha tjakoxinni kixin tjinkaonni chrókjuínkĩtsani sín.

²⁰ Tjinkaonni kixin tsokohya nkexro chrók'uántaxínhinni kixin tí chichaon xrenájín kjuíjijikoni.

²¹ Méxra tjinkaonni chrókjuich'eni tí nkehe ntoá, jehya jehó tí nkehe chrókóxrjínhìn Ìnchéni. Náhi. Kjaxin tjinkaonni kixin chrók'uikon chojni kixin jína tjejóch'eni.

²² La ko kjaxin k'uetuenhenni sín sátsjikotoxìn sín í jnko kichó ni, na mé ijnko nkexro nchónhya nkexrí kjuakoxìn ch'án kixin chéhe ch'án chrókjuínkĩtsa ch'án kixin itsjé xra kjuích'e ch'án. A ntá jie antsí má chrókjuich'e ch'án xra kixin chóxin ch'án tí jahará.

* 8:15 Éxodo 16:18

²³ A ntá jnkójín sín tsjanchankí sín kixin nkehe tí xrə ch'e ch'ín Tito la mé chenkará sín kixin jehe ch'án mé tjinkĩtsa ch'án tí janhan kixin xikaha tjinkĩtsa ch'án tí jahará. A ntá tí tsjanchankí sín kixin nkehe tí xrə ch'e tí í so kichó ni ntá chenkará sín kixin tí sín kaín n̄nko k'uetəan sín kixin sátsji sín ntiha kixin mé xikaha tsjikosáyehe sín Cristo.

²⁴ Méxrə chrókjuákoxinrá kixin chaxín tjuéhérá kichuárá kixin tsonohe tí sín kichó ni í so n̄nko la ko kjaxin tsonohe sín kixin chaxín chéheni kixin tí jahará.

9

Tí chichaon xrenájín tsjinkĩtsa tí sín kichó ni

¹ A ntá tí xrenájín chichaon kixin tsjinkĩtsará tí sín kichó ni tinkáchónki Ìnchéni, la t'ichjánxienhya tsokjian xroon tsochr'anhánrá

² kixin xráxín kónòna kixin jahará tjinkáonrá chrókjuínkĩtsará, na mé xikaha chàna la tjanca tí sín tjejó estado Macedonia kixin jahará chojni estado Acaya desde tí nánó k'uátsínka xráxín tjejorá tjinkáonrá chrókjuínkĩtsará. A ntá antsí tsjé sín estado Macedonia tjinkaon sín chrókjuinkĩtsa sín kixin jahará xikaha kjuákoxinrá nkexrí tjinkáonrá chrókjuínkĩtsará.

³ A ntá ichr'an tí sín kichó ni kixin tjínkavan kixin tsontáchrohya sín kixin chaxínhya tí nkehe jina ntátjan sín senó. Mé xikaha jahará chrókóyaxínhanrá chrókjuínkĩtsará tí sín kichó ni éxí ntátjan sín senó.

⁴ Kixin tí chrókjuasánkian iso tí sín Macedonia ntá tí chrókónoxín kixin naxə kohya nkehe tsjánjonrá ntá chrókósuèheni tí jeheni kixin imá chóxinni kichó ni la ko kjá chrókósuàhará kjaxinrá.

⁵ Méxrə xikaha tóna kixin t'ichjánxin tsontátjan tí sín kichó ni kixin sátsji sín tsitónxin sín ntja tsjijitsjehe sín tí jahará senó tsjinkĩtsa sín kixin tsjenájínrá tí chichaon tsintáchorá senó kixin chrókjuánjonrá. A ntá chrókóyaxínhanrá kixin chrókjuánjonrá tí chichaon éxí ijnko nkehe chaxín tjinkáonrá chrókjuánjonrá la jehya éxí ijnko nkehe chrókjuanchaharáni afuerza.

⁶ Xráxinkáonrá kixin tí nkexro k'uenkə tsjéhya na mé tsjéhya tsotjá. A ntá tí nkexro k'uenkə itsjé mé tsotjá itsjé.

⁷ Méxrə jnkójnko chojni chrókjuanjon tí nkehe kjuenkayáxixín sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjuèhe ch'án tí nkexro chéhe tjanjon nkehe.

⁸ A ntá Dios chóna kaín kjuachaxin jíé ntá tsotjáhará ch'án kaín nkehe t'ichjánxinhanrá kixin tsochontará nkehe

tsotchjehérá í so chojni chóntahya kixín xíkaha sích'erá kaín xra jína.

⁹ Éxí ntáchro tí xroon itén Dios kixín:
Tí nkexro t'óxikayehé ch'án itsjé nkehe nchekitonhen ch'án tí
sín nòà

na mé nunca tsjejehya tí xra jína ch'e ch'án.*

¹⁰ Dios mé tjanjon noatje kixín ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinchek'ánkí ch'án tí nkehe ts'ènkará la ko jehe ch'án sinchek'ánkí ch'án tí xra jína tje-joch'erá.

¹¹ A ntá tsochontará kaín nkehe tjete kixín ntá antsí tsjachará tsjínkítsará tí í so sín kichó ni. A ntá xíkaha tsjjikenhenni sín tí nkehe tsochjehérá tí sín kichó ni ntá tsjanchehe sín Dios kjuasáya.

¹² Kixín xíkaha chrókjuínkítsará tí sín kichó ni na jehya kixín chrók'uáyéhe sín tí nkehe t'ichjánxinhin sín ó, la mé kjaxin chróchéhe sín Dios kjuasáya.

¹³ Mé xíkaha tsjanchehe sín Dios kjuasáya kixín tí nkehe kjuánjonrá kjuákoxinrá kixín nchexiteyéhérá tí tan kuènte Cristo. Kjaxin tsjikosáyehe sín Dios kixín tí í so nkehe kjuánjonrá k'uáyéhe sín la ko tí nkehe k'uáyéhe í so chojni.

¹⁴ La ko jehe sín tsjanchehe sín Dios kixín tsjínkítsa ch'án tí jahará kixín jehe sín tjuahará sín kixín t'íkon sín kixín tjákoxinrá kixín tí kjuasáyé Dios chontará.

¹⁵ Tjancheheni Dios kjuasáya kixín kjuínchekitonhenni ch'án ijnko nkehe imá jié tsaáxinni la tsjachahyani tsochronkaxinni kaín tíha.

10

Kjuachaxin chóna ch'ín Pablo kixín tsík'óna ch'án apóstol

¹ Janhan Pablo tió xrjanóahará nkehe la jnkojína xrjanóahará la mé tjákoxian éxí toxrjínhin Cristo. Ntáchrórá kixín tió tjèn tí tjejorá ntiha la tósuàna, a ntá tí kjín tjèn la imá jièna, ichrorá.

² Méxra xrjanóahará kixín tí tsjasántsahará tjínkakonhya kixín chrókjuínchekóninkáonráni kixín ntá tsonínkakhánrá jnkojínrá kixín tsékaráni jié kixín ixria éxí chojni chjasintajni ó, tsixrorá. A ntá xra ó tsjasán tsjentuáha tí jehe sín.

³ Chaxín tjejóni éxí chojni ó, na kjánchó tió tjanjonni la tjanjonhyani éxí tjanjon chojni chjasintajni.

⁴ Kixín tí nkehe xraáni tjanjonxinni jehya nkehe kuènte chjasintajni. Náhi. Táha la kjuachaxin kuènte Dios la tíha mé tsjacha sinchek'itjáyan kaín kjuachaxin kuènte tí Jínahya.

* 9:9 Salmo 112.9

5 Na mé tsjachani sinchek'itjáyanni tí nkehe ntoáhya tjenkayáxin chojni la ko kaín nkehe nchehnkexín sín t'inkákonhen kixin chrókóchóxin chojni Dios. A ntá kjuachaxin kuènte Cristo tjakoheni kaín chojni kixin ntá tsítqhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án

6 la ko tjejóchónhenni sinchekjasóteni kaín tí sín ntiha naxa tjinkakonhya sín chrókjuinchexiteyá sín tí tsjixin tsonoheni kixin á chaxín tsjachará sijnchexiteyará jína.

7 A ntá jahará tékaráni jie kixin tí nkehe t'ikonrá ó. A ntá tí nkexro tjenkayáxin kixin chaxín ch'ehe Cristo xra la mé kjaxin chrókjuátsōan kixin kjaxinni jeheni la ch'eheeni Cristo xra.

8 A ntá tí chrókjuintahnkena ntsí kixin tí kjuachaxin chonta janhan ntá chrókósuánahya kixin Ìnchéni kjuanjon tí kjuachaxin kixin chrókjuínkítsa tí jahará kixin antsí chrók'uitjará kuènte Dios, la mé jehya kixin chrókjuintak'itjáyanrá.

9 Tjínkakhonhya kixin chrókjuintachrakonxínrá tí xroon chr'anhánrá.

10 Kixin ntáchro sín kixin ixra la ko jiehe tí nkehe ikjian janhan, a ntá tí chrókjuak'é ntiha la jienahya la ko kánhyó chonta janhan kjuachaxin tí nixja janhan.

11 Kjánchó tí nkexro xikaha ntáchro chrókónohe ch'án kixin jnkokón nixja janhan éxí nixja tí xroon tsíkjian kjónté ikjín tjèn la ko kjónté tí chrók'uejóni ntiha.

12 Tjinkakonhyani chrókjuenkayáxinni kixin chrókóyóhēni tí í so sín ntáchro sín kixin jína tí jehe sín. Jehe sín mé lōnti sín kixin ncheyóhe sín asén sín í so chojni.

13 A ntá jeheni la chrókjuinchehnkehnkexínhyani ijnko xra jehya xra kuènteni. Dios mé kjuako nketí sich'eni xra la kjuanjon ch'án kjuachaxin kixin kjuújini kjuích'eni xra tí tjejorá chjasin Corinto.

14 Jehya kixin chróchóntahyani kjuachaxin chrók'uetuāhanráni. Tí chaxín jehya jeheni saoxín kjuújini tí tjejorá ntá xikaha chróchóntahyani kjuachaxin. Ntá náhí, kixin jeheni saoxín kjuújini ntiha kjuakoharáni itan kuènte Cristo.

15 Chrókjuinchehnkehnkexínhyani ijnko xra kjuích'e ókjé chojni éxí xra chrókjuích'eni jeheni. Náhí. Tjinkaonni kixin antsí chrók'uitjará tsinkachónkirá Ìnchéni ntá xikaha la antsí chrókjuínkítsani tí jahará kixin jehó tí xra k'uáyéhēni tjejóch'eni.

16 Kjāxin tjinkaonni chrókjuakoni tí itén Ìnchéni chrókuaáxin chojni í so chjasin sáchrókjuini la ko kjāxin chrókjuinchehnkehnkexínhyani tí xra chrókjuích'e ókjé chojni.

¹⁷ A ntá jnkojín sín tjinkaon sín chrókjuinchehnke sín ntá jehó chróntáchro sín kixin kjuachaxin Ìnchéni mé chóna sín.*

¹⁸ Kixin tóxrjjenhya Dios ijnko nkexro jehó chróntáchro kixin jína ch'án. Náhi. Ìnchéni mé tsontáchro ch'án nkexro chaxín jína.

11

Ch'in Pablo la ko tí sín chaxínhya apóstol

¹ Tjínkavan chrókuinhínra ntsí tí lontina. ¿Á chrókjuachará chrókuinhínra nkehe tsontáxrjan?

² Janhan tjínkakhonya kixin í jnko nkexro chrókuinkachónkirá. Kjaxin xikaha tjinkakhonya Dios. Ó ikjua Cristo kixin chrókuakja ch'án tí jahará. Tjínkavan chrókjuánjuan tí jahará chrókuakja tí jehe ch'án éxi yóhe ijnko tjan tjarisoá chrókótehe jnkokoá xìi.

³ Tóxakonna kixin éxi tí konche tí kjuach'ia xriko ntá kjuich'iyehé tjan Eva, ntá xikaha kjaxinrá jahará tsitohérá sit'ayahará ókjé chojni ntá tsitohérá tí nkexrí kaín asánra tinkachónkirá Cristo.

⁴ A ntá jahará cháhará tjánjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxi tí chronkaxinni jeheni, la ko kjaxin cháhará k'uayéhérá ókjé nchakuen jehya tí Nchakuen Dios k'uayéhérá saó, la ko cháhará chrókuítekáonrá ijnko nkehe ókjé chrókuaáxinrá jehya éxi tí nkehe kuítekáonrá senó.

⁵ Ó nõna kixin chaxínhya ninkehó sínkíhyana janhan, a ntá antsi sínkí tí sín chréhérá jahará, ichrorá.

⁶ Kjónté kánhyó náxrjón níxja janhan la jehya kixin kánhyó chrókónõna chrókjuakua. A ntá tjákoáxinrá jahará tíhi kixin kaín nkehe t'a.

⁷ ¿Á ntoáhya kjuít'a janhan xrjankaxián tí tan tsaáxinni kixin ninkehó kjuáncháhya chrókjuacha la ko éxi ijnko chojni nõé kjuak'é janhan kixin tjínkavan chrókjuínkítsará chrók'uitjará?

⁸ Tí sín í so njnko kjuínkítsana sín kjuanjon sín chichaon k'uayáha kixin tsjak'é tsjákohará jahará.

⁹ Tí kjuak'é tí tjejorá jahará la kjónté t'itjáyan nkehe la ninkexró kjuáncháhya nkehe. Jehó tí sín kichó ni kjuixín estado Macedonia kjuikao sín tí nkehe t'ichjánxinna. Méxra tjínkakhonya kixin chrótjāhará xra tí jahará la ko xikaha naxa tjet'a jie.

¹⁰ Xikaha chaxín choxian tí tan chaxín ntoá kuènte Cristo, a ntá kóhya ninkexró nkuixín estado Acaya tsjacha tsakitsjena tí kjuachéhe chonta.

* 10:17 Jeremías 9.24

¹¹ ¿Nkekuènte xikaha ntáxrjan? ¿Á xikaha ntáxrjan kixin tjuahyará tí jahará ní? Náhi. Dios la ó nohe kixin imá tjuahará.

¹² Kjánchó ó jehí tsjintaxín xikaha sit'a kixin tjínkakonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjákua la ko tí nkehe tjako sín.

¹³ Kjánchó jehe sín ijnko apóstol chaxínhya mé ch'ia sín ncheyóhó sín éxí chojni kjueyá Cristo.

¹⁴ Jehya ijnko kjuachrakon tíha kixin kjaxin ch'ín Tsochren kjaxin xikaha ncheyóhē ch'án éxí ijnko ángel kuènte tí t'inkaséyan.

¹⁵ Méxra xikaha kjaxin kuèhen tí sín ch'ehe tí Jínahya xra mé ncheyóhē sín tí sín jína. Ntá tsjixixín mé tsjasótexín sín tí xra jínahya kjuích'e sín.

Kjuasóte ch'ín Pablo kixin apóstol tí jehe ch'án

¹⁶ Ntáxrjan ínaá kixin nijnkorá chrókjuenkayáxinrá kixin lócona. Kjánchó tí xikaha tjenkayáxinrá la títóhéra tsonixja janhan éxí lócona kixin kjaxinna jína chrókjuíntahnke ntsí.

¹⁷ Tí xikaha ntahnkexián la jehya kjuachaxin kuènte Inchéni ntáxrjanxian tíha. Náhi. Jehí éxí ijnko chojni lóco nixja.

¹⁸ A ntá nchónhya chojni siín nchehnkexín sín tí nkehe nohe sín a ntá jie la kjaxin janhan sintahnke.

¹⁹ Kixin jahará ntáchrora kixin imá nohará ntá cháhará tjejó tí sín lóco.

²⁰ Kixin tjánjonrá kjuachaxin t'etuñhanrá sín la nchexiteyéhérá sín la ko takitsjahará sín tí nkehe chontará la ko ch'éna asén sín éxí inché sín tí jahará, la ntá kjoniehýará sín la ko tjate sín nkaya ikonrá.

²¹ Kjónté chrókósuàna tsontáxrjan kixin jeheni la kánhyó jiehe k'uetuñhanráni.

Kjánchó tí nkehe nchehnkexín sín la janhan ntahnkexián kjaxinna, kjónté ntáxrjan tíhi éxí ijnko chojni lóco.

²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'ín Abraham? Kjaxin janhan k'uaxrjeníxian ch'án.

²³ Ch'ehe sín Cristo xra kjánchó janhan la antsí má la jehe sín la kénhyó, kjónté ntáxrjan tíhi éxí ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntoechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uíxin kjuaxikaon kixin chrók'uén.

²⁴ In'ó veces tí sín judío kjuatena sín la ko treinta y nueve tí kjuatjoté.

²⁵ Níya kjuatexínna sín inta la ko í jnko vez kjuak'e sín xro. Níya k'uániánkí ntabárcō ntā ntā ijnko yaon la ko ijnko tie tjénkataván ntayaon.

²⁶ K'uájia má, k'uíkuañ kjuaxikaon chrók'uénxian tí ntarío la ko chrók'óyánna tí xíchee la ko chrók'óyánna tí sín chjasenná la ko tí sín tsíkijixín ókjé. K'uíkuañ kjuaxikaon tí chjasin jié la ko tí nteje la ko tí ntayaon la ko chrók'óyánna tí sín chaxínhya tinkáchónki Ìnchéni.

²⁷ Kóxrjéna kixin tí xra kjuít'a la ko itsjé nkehe náxrjónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntā la ko itsjé yaon kjónēhya ninkehó la ko kókinna la ko chontahya kaná.

²⁸ Kjonté kaín tíha la ko í so nkehe kónna la mé jnkojnko yaon imá tóxakonna kixin kaín tí sín tójnkotsé sín kaín tí nínko.

²⁹ ¿Á tjen jnkójínrá níhará? A ntā tí xíkaha la koína éxi nina. ¿Á tjen jnkójínrá kjuásinrá jie? A ntā tí xíkaha la kjaxin tóxakonna.

³⁰ Tí chrókjuíntahnkexian nkehe la mé tjínkavan kixin jehó chrókjuákoxian kixin kánhyó jiēna.

³¹ Dios, It'é Ìnchéni Jesucristo, na mé tí nkexro chrórxaxinkaonni jnkochrínín mé ó nohe ch'án kixin chaxín tí nkehe ntáxrjan.

³² Ntā tí kjuak'é chjasin Damasco la mé tí ch'ín gobernador kjuích'ehe ch'ín rey Aretas xra mé k'uētuenhen ch'án tí sín soldado kixin tsochónhen sín tí ntója tí chjasin kixin chrótséna sín chrókjuak'échjina.

³³ Kjánchó siín nkexro k'uínkajinxinna ijnkontaxra ijnko ventana tí tjat'o k'uantatjen chjasin la mé xíkaha kuaána, tséhyana sín.*

12

Tí nkehe k'uíkon ch'ín Pablo

¹ Ninkehó tsjachahya tí nkehe tsoxrjanka kuèntana ó. Íchá jína tsoxrjanka tí nkehe k'uíkuañ la ko tí nkehe kjuínchenóna Ìnchéni.

² Choxian ijnko nkexro tinkáchónki Cristo. A ntā k'uátsínka catorce nánó sátsíkji ch'án tí níxin nkajní. Nonahya á sátsíkji ko ch'án cuerpo kuènte ch'án o asén ch'án ó. Jehó Dios mé nohe.

³ Méxra ó nóna kixin xíkaha sátsíkji ch'án la ntā nonahya á koí cuerpo kuènte ch'án o asén ch'án ó. Jehó Dios mé nohe.

⁴ A ntā sátsíkji ch'án nkajní. La ntā tí palabra kuínhin ch'án la kohya kjuachaxin nijnko chojni tsochronka.

⁵ Jína chrókjuíntahnkexián kixin xíkaha kónhen tí nkexro a. A ntā tí chrókjuíntahnkexián kixin kjuachaxin kuèntana

* 11:33 Hechos 9.23-25

la jehya jína tíha. Íchá jína chrókjuákoxiã kixin janhvàn la chontahya kjuachaxin.

⁶ Tí chrókjuíntahnkexián tí nkehe kònna la chrókólócohyana kixin chaxín tí nkehe chróxrjanka. Kjánchó xikahya t'ã kixin tjínkãkonhya kixin xikaha chrókjuenkayáxin chojni kixin antsí jína janhan. Náhi. Tjínkãvan kixin tí xrã t'ikon sín la ko tí nkehe tinhin sín mé chrókjuenkayáxixín sín kixin á jína tí janhan, tsixro sín.

⁷ Méxrã chrókjuíntahnkexinhya ntá xikaha xránjon kjuachaxin kixin chrók'uayáha ijnko kjuatjoté éxi ijnko ch'í kuikjiáte cuerpo kuèntãna mé ijnko nkehe tsík'etuenhen ch'ín Tsochren ikui kjuínchekjoténa.

⁸ Iní veces xrjanóãhã Ìnchéni kixin chrókjuatsen ch'án tí kjuatjoté chonta.

⁹ Kjánchó ntáchro Ìnchéni kixin jehó tí kjuachaxiën ch'án chrókjuachaxiã janhan. Kixin tí kjuachaxiën ch'án antsí tsjakoxín chojni fuértehya. Méxrã ntá chàna kixin fuértehyana kixin ntá xikaha tsjakoxiã tí kjuachaxin kuènte Cristo.

¹⁰ Méxrã chàna kjónté fuértehyana la ko kjónté t'ántaxina sín la ko kjónté t'ichjãxinna nkehe la ko kjónté chónkina sín chrók'óyãna sín la ko kjónté siín kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

Tóxakonhen ch'ín Pablo kixin tí sín tjejó nínko chjasin Corinto

¹¹ ¿Á lócona kixin xikaha xrjanka? Kjánchó jahará kuítekákonhyará ntá xikaha xrjanka. Jahará chróchronkãrá xikaha kixin jína janhan. Jehya kixin kãnhýó sínkina la ntá tí sín chréhérá la antsí sínkí sín. Náhi. Kjónté janhan la chaxín ninkehó sínkíhyana.

¹² Kjuásian itsjé kjuaxroan jié la jína kjuak'é kóninkãkonhya kjuákoxiã kixin chaxín janhan ijnko nkexro tsíkjeýá Ìnchéni.

¹³ ¿Xá k'uikuã tí jahará éxi kãnhýó sínkírã ã ntá tí í so nínko la antsí sínkí sín kixin tí kjuasán janhan la ninkehó xrã tjãáhyará? Æ ntá tí xikaha ntoáhya kjuít'a la tóninkãkonhyará.

¹⁴ Æ ntá ijie ó yaxinna tí níxin vez chrókjuasãntsahará la ko tjãáhyará ninkehó xrã. Janhan la tjéyáhya tí nkehe chontará. Tí nkehe tjéyá janhan la mé jahará kixin jahará éxi yóhe xjãna t'íkuã. Méxrã tí sín it'é xjan chrókjuenájín sín chichaon chrók'uayakuenxín sín xjeen sín. Jehya xrã kuènte tí xjan chrókjuenájín xjan chichaon chrók'uayakuenxín sín tí it'é xjan.

¹⁵ Tóxakonnahya kjónté chrókjuíntakjeje káin nkehe chonta janhan o kjónté chrók'uénxiã kixin tí jahará la jína

chrók'uejorá. A ntá janhan imá tjuahará la kjánchó éxí tóna janhan kixin jahará kánhyó tjuèherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrórá kixin kjuít'ayahará, ichrorá.

¹⁷ ¿Xá kjuít'ayahará kixin jnkojín sín ichr'an kjuíjitsjehe sín tí jahará?

¹⁸ Kjuáncháha tí ch'ín Tito kixin tsjijitsjehe ch'án tí jahará la ko kjaxin kuétuñhan tí í jnko kichó ni sátsjikotoxin ch'án. ¿Á kjuít'ayahará ch'ín Tito ní? ¿Á chaxínhya jina k'uéjóni yóini ntiha kixin jnkokón Nchakuen Dios chóntani?

¹⁹ ¿Á tjenkayáxinrá kixin xikaha kjuáteheni kixin chóntani jie ní? Kjánchó xikahya. Dios tjetsjehe kixin nixjani éxí chojni tinkáchónki Cristo. Kichóni tjuahará la kaín tíha ntáxrjan kixin tjínkavan kixin antsí chrókuinkachónkirá Ìnchéni.

²⁰ Tóxakonna kixin tió tsjasántsjahará la tsqxrjínnya nkexrí tjejorá la ko kjaxinrá tsqxrjíanhyará tí nkehe tsontáxrjan. Tóxakonna kixin naxa ts'ixin kjuanínkaon la ko naxa ts'ixin kjuachjinoxínhin la ko tsoninkákonhénra kichuára la ko chrókuétoanrá jahóra la ko naxa tsinkachónkirá kjuach'ia la ko naxa ts'ántaxínhínra kichuára la ko naxa chontará kjuahnke la ko jnkoqáhya tsjenkayáxinrá.

²¹ Tóxakonna kixin tió tsjasántsjahará inaá la tí Dios kuéntana mé sinchesuàna tí tjejorá la ntá imá tsotsjanka kixin itsjérá tsíkjasinrá jie tí ósé la naxa titoéhyará tí nkehe tjuáhya ch'erá la ko naxa titoéhyará chontará chojni chjin ókjé tjásinkoará jie la ko titoéhyará kaín tí í so nkehe jinahya k'uékjich'erá ósé.

13

Nhexraxinkaon ch'án sín la ko tsjixixín nixja ch'án

¹ A ntá jie la níyaxín tsjasántsjahará. A ntá tí kaín nkehe tjinkáonrá tsonóna la mé chróchrónka yaá o iy'á chojni tsík'ikonxín kon sín tí nkehe tsíkónhen.

² Nixjaha tí sín tsíkjasin jie ósé, la ko nixjahará kaín rá kixin kjónté ikjín tjèn la inaá nixjahará éxí nixja tí kjuak'é k'uéjóni tí iyó kjuasántsjahará kixin tió tsjasán inaá la í tsíkonóahya tí sín kjuasin jie.

³ Jahará tjinkáonrá tsinhínra á chaxín níxjaxian kjuachaxin kuénte Cristo. Jehya kixin Cristo tsjachahya tsjakoxin ch'án tí kjuachaxién ch'án tí tjejorá ntiha. Náhi. Chaxín tjakoxin ch'án tí kjuachaxin chóna ch'án tí tjejorá ntiha.

⁴ Chaxín tí k'uénxin ch'án tí ntacruz la mé éxí chóntahya ch'án kjuachaxin. Kjánchó ijie tjechónxin ch'án tí kjuachaxin kuénte Dios. Kjaxinni jeheni éxí kjuák'e ch'án k'uéchóntahyani kjuachaxin la ntá ijie tinkáchónkini tí jehe ch'án la

tjejóchónxinni tí kjuachaxin kuènte Dios kixin jína tsjinkĩtsani tí jahará.

⁵ Jahará chrókjuenkayáxinrá á nchoxon tjejorá, á kaín asánrá tinkachónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxín tinkachónkirá o náhí.

⁶ Kjaxin tjínkavan chrókónohará kixin jeheni la jehya chojni chaxínhya tinkáchónki Ìnchéni.

⁷ Nixjeheni Dios kixin chrókuítøehya ch'án tí jahará kixin ninkehó nkehe jínahya chrókjuich'erá. Jehya kixin chrókjuakoxinni kixin jína tí jeheni. Náhí. Jehí tjinkaonni kixin jahará chrókjuich'erá nkehe jína. Ántosénni kjónté tsóntáchro sín kixin chóntani jje.

⁸ Ninkehó nkehe chrókjuich'eni kixin chrókjuinçek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín.

⁹ Méxra chrókóchéhēni tí t'ichjánxinhya imá chrók'uetøanni, tí chaxín jína chrók'uejorá. Ntá naxa tsonixjehēni Dios kixin chrókjuixraká chrók'uejorá ntoá.

¹⁰ Mé xikaha ikjian tíhi senó naxa tsjasántsjáhyará ntiha kixin ntá tió tsjasán la ts'ichjánxinhya naxa sìnchekóninkáonrána tsoníxjaxian tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuintak'itjáyanrá. Náhí. Kjuanjon ch'án tíha kixin jahará antsí chrókuinkachónkirá Ìnchéni.

¹¹ Na ntá kichó ni, chrókócháhará. Tjéyará kixin jína chrók'uejorá. Chrókjuinchechéhérá kíchuará la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án.

¹² Nixjehérá kíchuará jnkójina la tsehérá tja kíchuará.

¹³ A ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkĩtsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí nínko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjeueýána la ko jehya chojni ichr'ánna. Náhi. Kjeueýána Jesucristo la ko It'éni Dios, mé tí nkexro kjuínchexechón Jesús.

² Janhan la ko kaín tí sín kíchó ni tjejókoni ntihi ikjinni tí xroon ts'áyéhe tí nínko síin estado Galacia.

³ Tjancheheni It'éni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéhéra tí kjuaxróxin kuénte ch'án.

⁴ Jesucristo mé k'uenyákonhen ch'án ijiéni ntá kuaáxinni la mé ijie tsjachahya tí nkehe jínahya síin chjasintajni tsjachroeni mé xíkaha tjinkaon It'éni Dios.

⁵ Tjáncháha Dios kjuasáya jnkochrín mé xíkaha tsoxiteyá. Amén.

Kohya í jnko tan tsaáxinni

⁶ Janhan tóxakonna kixin jahará imá tjoka tinkakìtohéra Dios kjeueýará kjuasáyé Cristo. Jahará la tjoka ó kjuankíxinrá chréhérá ókjé tan chrókuaáxinrá.

⁷ A ntá chaxínhya xíkaha. Kohya í jnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuítóxinhin sín tí tan chrókuaáxinni kuénte Cristo.

⁸ A ntá tí jnkojín nkexro chrókjuakohará ókjé tan chrókuaáxinrá yóehya tí nkehe ó kjuakoni la tí xíkaha la Dios mé sinchekjasóte tí sín kixin xíkaha sich'e sín, kjónté á janhan o ijnko ángel chrókujixin nkaya nkajni.

⁹ Senó xrjanka la inaá tsoxrjanka kixin jnkojín nkexro chrókjuako ijnko tan ókjé tsaáxinrá yóehya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kixin chrókóxrjínhin chojni tí xra t'a. Náhi. Tjínkavan kixin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijnko nkexro ch'ehe xra Cristo.

Ch'ín Pablo k'óna ijnko chojni tjako itén Dios

¹¹ Jahará kíchó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó.

¹² Jehya chojni chjina tí tan la jehya chojni kjuakona. Náhi. Jesucristo mé kjuakona.

13 Jahará la kjá ó kuinhínrá nkexrí k'uékjak'é tíó naxa k'uéchráha tí sín judío. Ó nohará kixin k'uéchonkíha tí sín tinkáchónki Ìnchéni la ko tjínkavan chrókjuintak'itjáyán sín.*

14 Tí naxa k'uék'ájikian tí sín judío la antsí má k'uénòna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekavan tí nkehe k'uék'etoan tí sín tsík'axrjeníxinni.

15 Kjánchó Dios kjueyána kjónté naxa tókjínahya la kjuasáyé ch'án kjueyána ch'án kixin xíkaha kóxrjínhín ch'án.

16 Kjuínchenòna ch'án nkexrí tjen tí Xjeen ch'án kixin tsjákoḥa tí sín jehya judío tí tan tsaáxinni. Tíó kjueyána Dios la ninkexró kjuakonahya.

17 La ko kjaxin kjuítsjàhya janhan tí sín tsík'óna apóstol síin chjasin Jerusalén. Náhi. Janhván tuénxín sákjuia chjasin Arabia, a ntá chr'éxin ikjan tí chjasin Damasco.

18 Á ntá iní nánó chr'éxin na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekian ch'án quince yaon.

19 Kjánchó k'uíkònhya tí í so sín apóstol. Jehó k'uíkuan ch'ín Jacobo kichó Ìnchéni.

20 Ó tjetsjehe Dios kixin tí nkehe ikjian la mé chaxín tíha.

21 A ntá chr'éxin ntá sákjuia nó estado Siria la ko Cilicia.

22 A ntá tí sín kichó ni tinkáchónki Cristo tjejó estado Judea la naxa tjatsoanhya sín.

23 A ntá ó kuínhón sín kixin tí nkexro k'uéchréhe sín chrók'óyán sín la ntá ijie mé tjako tí tan chrókjuinçek'itjáyán ch'án.

24 A ntá ijie tjanchia sín kjuasáya kixin janhan ó tinkachónkia Ìnchéni.

2

Tí iso sín kjueyá Jesús k'uáyéhe sín ch'ín Pablo

1 La ntá catorce nánó chr'éxin ntá sákjuiyá chjasin Jerusalén inaá la sákjuíkian ch'ín Bernabé la ko kjaxin ch'ín Tito.

2 Sákjuiyá ntiha kixin Dios kjuínchenòna kixin sáchrókjuiyá. Ntiha chjasin Jerusalén la kójnkotsékoni tí sín t'etoan nínko ntiha la ntá xrjankaxián nkexrí tí tan tsaáxinni tjákoḥa tí sín jehya judío. Mé xíkaha kjuít'a kixin janhan tjínkavan jnkokoá chrókjuenkayáxinni kixin ntá tí xra kjuít'a la jehya chrókóchónkó.

3 A ntá kjónté tí ch'ín Tito kjuák'ekian ch'án la jehe ch'án mé griego ch'án la k'uetuanyha sín kixin chrókua ch'án xroye.

* 1:13 Hechos 8.3; 22.4-5; 26.9-11

⁴ Á ntá iso tí sín kíchó ni chaxínhya tinkáchónki Ìnchéni k'uejókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuènte Cristo chóna kjuachaxin. A ntá jehe sín tjinkaon sín kixin chrókjuinchexiteyéheni inaá tí nkehe k'uek'etōan tí ley.

⁵ A ntá tahyani kuenté nkehe tí tjejóchro sín kixin jehi tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etōan kjuakōnahya sín ninkehó. A ntá jeheni la tahyani kuentá á chojni t'etōan o náhi kixin Dios la jnkokón t'íkon ch'án kaín chojni.

⁷ A ntá kjuátsōan sín kixin Dios ó chjina tí xrā tjákoḥa tí sín jehya judío tí tan jina éxi yóhe tsíchjéhe Dios xrā ch'ín Pedro tjákoḥe ch'án tí sín judío.

⁸ Tí Dios tsík'etueñhen ch'ín Pedro ts'óna apóstol tsjákoḥe ch'án tí sín judío la ko kjaxin tsík'etuanna ch'án ts'óna apóstol tsjákoḥa tí sín jehya judío.

⁹ Méxra ch'ín Jacobo la ko ch'ín Pedro la ko ch'ín Juan, mé tí sín t'etōan kuènte ninko, mé kjuátsōan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xrā la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjákoḥeni tí sín jehya judío la jehe sín nachrohe tsjákoḥe sín tí sín judío.

¹⁰ Jehó k'uetōan sín kixin tsoxraxinkaonni la ko tsotjuèheni tí sín nòa la xráxín tókakhenni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquía

¹¹ A ntá tió kjuíji ch'ín Pedro chjasin Antioquía la kjuentuáha ch'án kixin ntoáhya kjuích'e ch'án.

¹² Senó k'uekjineko ch'án iso chojni kjónté jehya sín judío. Ntá ikui iso sín kuixin tí tjen ch'ín Jacobo. A ntá kjuankixin k'uaxrjenta ch'án la kuítóhe kjónekohya ch'án tí sín jehya judío a. Xíkaha kjuích'e ch'án kixin chrakōñhen tí sín kui kixin tí sín neko ch'án naxā tsíkahya sín xroye.

¹³ Tí iso sín kíchó ni judío kjaxin kuítekakohenen sín tí ch'ín Pedro kjónté ntoáhya kjuenkayáxin ch'án. Kjaxin ch'ín Bernabé la kjuacha kjuachroe sín ch'án kixin tí nkehe ntoáhya kjuích'e sín.

¹⁴ A ntá tió k'uíkuan kixin tí nkehe kjuakōxin sín la tóyóehya tí chrónka tí tan jina tsaáxinni tjako sín la ntá níxjaha tí ch'ín Pedro nkayakon kaín tí sín tsíkójnkotsé. Ntáxrjan kixin: “Jaha mé ijnko chojni judío la kjónté itjen éxi jehya ijnko chojni judío. ¿A ntá kuènte tétueñhen tí sín jehya judío kixin chrók'uejó sín éxi chrókóyóḥe tí sín judío?”

Tí sín judío la ko tí sín jehya judío la jnkokón tsaá sín kixin chóna sín fe

¹⁵ Jeheni la k'uaxrjeníxinni chojni judío desde tí kokjíexinni la jeheni na chónahyani jìe éxí tí í so chojni chónhya Dios.

¹⁶ Kjónté xíkaha la ó noheni kixin tsotjuáxinhya ijíe chojni tí nkehe tsík'etōan ch'ín Moisés. Jehó tí sín tinkáchónki Jesucristo mé tsotjóá ijíe sín. Méxra kjaxinni tinkáchónkini Jesucristo kixin tjinkaonni sinchetjóá ch'án ijíeni kixin titekaonni ch'án. Méxra ninkexró tsjachahya tsotjuáxin ijíe sín kixin chrókjuinchexiteyéhe sín tí nkehe t'etōan tí ley.

¹⁷ Tí tjinkaonni tinkáchónkini Cristo kixin tsotjuáxin ijíeni, a ntá jeheni kjaxin xraxinkaonni kixin ó kjuasinni jìe. A ntá í jehya Cristo k'uetōan kixin chrókjuasinni jìe. Kjá chaxín náhí.

¹⁸ Tí kuitōheni tí ley la ntá naxa chrókjanni chrókuinkáchónkini tí ley inaá la tíha la ó jìe kuènteni tíha.

¹⁹ A ntá tí ley la kjuanchia jìe k'uénxian. A ntá ijie la tjéchuān kixin tinkachónkia Dios.

²⁰ Janhan la ó tsík'en kixin ó k'uénkian Cristo. A ntá ijie la janhya tjéchuān. Cristo mé tjechónxin tí janhan. La ntá jie la tjéchonxian tí cuerpo chonta kixin tinkachónkia tí Xjeen Dios kixin jehe ch'án la tjuāna ch'án la k'uenyákonhenni ch'án.

²¹ Tjínkakhonhya tsjanoá tí kjuasáyé Dios. Tí chrókótjuáxin ijíe chojni tí ley tsík'etōan ch'ín Moisés, a ntá ó chónkó ik'uén Cristo tí xíkaha.

3

Tí ley o tí fe

¹ Jahará kichó ni gálatas imá lontirá. ¿Nkexro kjuít'ayahará? Kixin tí nkehe kjuákoará mé kuinhínrá kixin Cristo k'uénxín tí ntacruz k'uenyákonhenni ch'án.

² Jnkokoá nkehe tjínkavan chrókjuateherá. ¿Á k'uayèxínrá Nchakuen Dios kixin kuítekáonrá tí nkehe tsík'etōan ch'ín Moisés o á k'uayèxínrá Nchakuen Dios kixin kuítekáonrá tí tan chrónkani kuinhínrá?

³ Imá lontirá jahará. Tí kjuankíxixínrá la kuítekáonrá kjuachaxién Nchakuen Dios. A ntá jie la tjínkáonrá jahóra sìnchekjintaxínrá tí xra.

⁴ ¿Á chónkó kaín tí nkehe tsík'atsínkará? Kjá chrókjuinkítsa chrókjuich'e xra tíha. Jehya chónkó tí nkehe kjuasótiaxínrá.

⁵ ¿Nkekuènté kjuanjon Dios tí Nchakuen ch'án la ko kjuasin ch'án kjuaxroan k'uíkonrá? Jehya k'uayèxínrá tíha kixin kuítekáonrá tí nkehe tsík'etōan tí ley. Náhí. K'uayèxínrá tí nkehe kixin kuinkachónkirá tí tan kuinhínrá.

⁶ Ch'ín Abraham kuítekaon tí nkehe k'uetōan Dios ntá Dios k'uíkon kixin jína ch'án.

⁷ Méxra chrókónohará jahará kixin tí sín chaxín tikinixin sín ch'ín Abraham a mé tí sín a chaxín tinkáchónki Dios.

⁸ Tí xroon itén Dios mé chrónka kixin tí sín jehya judío mé sinchetjóá Dios ijje sín kixin tsinkáchónki sín ch'án. Mé xikaha Dios mé chénka ch'ín Abraham ósé tí tan jína, ntáchro ch'án kixin: “Ijnko nkexro ts'axrjenixin tí jaha mé tsoyaonxín kaín naciòn.”*

⁹ Mé xikaha kjaxin kaín sín tinkáchónki Dios mé tsoyaon sín jnkokón éxí kóyaon ch'ín Abraham kixin kuítekaon ch'án.

¹⁰ Kaín sín jehó tinkáchónki tí nkehe tsík'etōan ch'ín Moisés la tsjasóte sín kixin ntáchro xroon itén Dios kixin: “Tsjasóte kaín tí sín tsjachahya sinchexiteyēhe tí nkehe tsík'etōan tí xroon chóna ley.”†

¹¹ Ntá ó ntoá ntáchro kixin kohya nkexro tsotjuáxin ijje sín tí tsitekaon sín tí ley. Xroon itén Dios ntáchro kixin: “Tí nkexro tsíkótjóá la tjejóchónxin sín kixin tinkáchónki sín Dios.”‡

¹² Ntá tí chrókuinkáchónkini tí ley tsík'etōan ch'ín Moisés la chrókuinkáchónkiyhani Cristo. Ntáchro xroon itén Dios kixin: “Tí nkexro sinchexiteyá tí ley la táhó chrók'uejóchónxin sín.”§

¹³ A ntá Cristo kjuatsen ch'án kaín tí chrókjuasótexinni tí ley. Tí náhí la chrókjuasóteni kixin chrókjuachahyani sinchexiteyēheni tí ley. Jehé ch'án kjuenka ch'án tí ijjeni kixin k'uenyákonhenni ch'án. Ntáchro xroon itén Dios kixin: “Kaín tí chojni chóna jie ts'ejótjian sín ijnko nta ntá its'en la mé xikaha k'uáyēhe sín tí kjuanínkaon kuènte Dios.”* Mé xikaha k'uikon sín tí ch'ín Jesús.

¹⁴ Mé xikaha kónhen kixin ntá tí nkehe chénka Dios tí ch'ín Abraham senó mé ts'áyēhe tí sín jehya judío kixin kjuachaxièn Cristo Jesús. Ntá xikaha kaín ni ts'áyēheni tí Nchakuen Dios kixin tinkáchónkini ch'án mé xikaha tsíntáchro ch'án.

Tí ley la ko tí nkehe kjuanjon Dios

¹⁵ Kichóni, tíhi mé sintayóaxian kuènte chojni ó. Tió ijnko chojni ch'éna ijnko xroon tsochóna firma kuènte sín la ntá xitjahya ts'óxíka í jnko nkexro la xitjahya í jnko nkexro sich'éna í so nkehe.

¹⁶ A ntá Dios mé tsíkjo ch'án tí ch'ín Abraham kixin tsjanjon ch'án nkehe ts'áyēhe tí nkexro ts'axrjenixin ch'án. Tí xroon itén Dios ntáchrohya kixin kaín nkexro ts'axrjenixin ch'ín Abraham chrók'uáyēhe tíha. Náhí. Ntáchro kixin ts'áyēhe jnkokoá nkexro ts'axrjenixin ch'án la mé Cristo tíha.†

¹⁷ Méxra xrjanka tíhi. Dios chénka tí ch'ín Abraham ijnko nkehe chaxín la tsoxiteyá tíha kixin éxí yóhe ijnko xroon chóna firma tíha. A ntá cuatrocientos treinta nánó chr'éxin la ntá

* 3:8 Génesis 12.3 † 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 * 3:13 Deuteronomio 21.23 † 3:16 Génesis 12.7

ikui tí ley k'uéchrónka ch'ín Moisés. La ntá kjónté xíkaha la xitjahya tsoxíka tí nkehe tsíchrónka Dios ǝ tsonáchro chojni kixin tjetoanhya tí nkehe tsíntáchro ch'án.‡

18 Tí chrókjuanjón Dios nkehe kixin chrókjuinchexiteyáni tí nkehe k'uętoan tí ley la ntá tí nkehe tsíntáchro Dios senó mé chróxiteyáhya. A ntá Dios mé tsíchénka ch'ín Abraham kixin sinchekitonhen ch'ín Abraham ti nkehe kjuasáyé ch'án.

19 ¿A ntá xíkaha la nkehe tsonhen tí ley tsík'ętoan ch'ín Moisés? Chr'éxin kjuanjón Dios tí ley kixin tsonoxínni nkehe tí jie tjasinni. K'uętoan Dios sinchexiteyéhe chojni tí nkehe tsík'ętoan ch'ín Moisés tsijia tí nkexro ts'axrjeníxin ch'ín Abraham, mé tí nkexro kjueyá Dios kixin xíkaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án.

20 A ntá tí nixjehę Dios tí ch'ín Abraham la jehó ch'án la ko jehó Dios la méxra t'ichjánxinhya í jnko nkexro.

Tí xra kuènte tí ley

21 ¿A ntá á chrók'uaxrjexín kixin tí ley tsík'ętoan ch'ín Moisés chrókjuanjónko tí nkehe tsjanjón Dios? Kjá náhi. Tí chrók'uixin ijnko ley chrókjuanjón kjuachón la ntá chrókótjuáxin ijiéni tí chrókuitekaonni tí nkehe t'ętoan tí ley.

22 A ntá tsíntáchro xroon itén Dios kixin tí jie mé t'ętuęnen kaín xín chojni kixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchrónka Dios.

23 A ntá tí naxa kuihya Cristo la ntá tí ley la k'uętuęnen kaín ni la k'uejóchónhenni kixin chrókónoxín tí nkehe chrókuinkáchónkini.

24 Tí ley la éxí ijnko maestro kuènte chánjan k'uętoan. A ntá jie ikui Cristo la jehe ch'án mé kótjuáxinni ch'án kixin titekaonni ch'án.

25 A ntá ijie ó titekaonni Cristo la í nchexiteyèhyani kaín tí nkehe t'ętoan tí ley.

26 A ntá jahará ó k'ónará xjeen Dios kixin ó tinkáchónkirá Jesucristo.

27 Kaínrá kuíkítiaxínrá kjuachaxién Cristo mé xíkaha jehe ch'án kótjuáxinrá ch'án.

28 A ntá jehya tjetoan á chojni judío ǝ á chojni jehya judío ǝ á chojni ch'exón xra ǝ á chojni t'ętoan ǝ á chojni ntoá ǝ á chojni chjin. Kaínni la ó k'ónani jnkokǝ kixin tinkáchónkini Cristo.

29 A ntá tí tinkáchónkini Cristo chaxín la ntá tí xíkaha ó chaxín tsík'axrjeníxinni ch'ín Abraham la ts'áyéheni tí nkehe tsíchrónka Dios.

‡ 3:17 Éxodo 12.40

4

¹ Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuítøeko tí nkehe kuènte tí it'é la jehe ch'án la tóyóhó ijnko nkexro ch'exón xra kixin tí jehe la xitjahya t'etøan xra kjónté chaxín kuènte ch'án kaín tí nkehe a.

² Siín nkexro t'ayakonhen ch'án la t'etøan tí xra kuènte ch'án tsjixrakájia tí yaon tsíntáchro tí it'é.

³ Mé xikaha kónhen tí jeheni. Kixin tí naḡa k'uéchánjanni la kuítekaonni kaín tí nkehe kuènte chjasintajni.

⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxin ch'án ijnko chojni chjin. La kjuínchexiteyá ch'án kaín tí nkehe tsík'etøan tí ley kuènte Moisés.

⁵ Ikui ch'án xikaha kixin tsaáxinni ch'án kjónté senó k'uék'etueñhenni tí ley. A ntá jie la chrók'uáyéhe Dios tí jeheni éxí xjeen ch'án.

⁶ A ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochónta asénni la tí Nchakuen ch'án mé t'èyaxín: “It'éni jaha mé kuéntá tí jeheni.”

⁷ Méxra xikaha jahará la jehya ijnko nkexro ch'exón xra. Náhi. Jahará mé xjeen Dios. Jahará mé xjeen ch'án la jehe ch'án tjinkaon sinchekitonhanrá tí nkehe kuènte ch'án kixin tinkachónkirá Cristo.

Ch'in Pablo tóxakonhen ch'án kixin tí sín tinkáchónki Ìnchéni

⁸ Ósé la jahará k'uéchonhyará Dios la kjuínchexiteyéhérá tí dios chaxínhya.

⁹ A ntá ijie la ó choxínrá Dios, o íchá jína chróntáchroni kixin Dios la ó chóxin ch'án tí jahará. A ntá jehya jína kixin naḡa chrókuinkachónkirá inaá tí nkehe chóntahya kjuachaxin la ko tí nkehe chónkó kixin tí xikaha naḡa chrókjuínchexiteyéhérá tí nkehe tinkáchónki chojni.

¹⁰ A ntá jahará la tjásinrá kia ichrén tí yaon la ko tí nitjó la ko tí yaon kia tí nánó.

¹¹ Imá tóxakonna kixin á chónkó tí xra kjuít'a kjuákohará.

¹² Kíchóni, xrjanóahará kixin chrókóyóhará éxí tí janhan kixin janhan mé tóyóhe éxí k'uejorá senó kixin t'etueñhyani tí ley. Janhan la tékahará ninkehó jje.

¹³ Ó nohará kixin tió saoxín kjuákohará tí tan tsaáxinni la k'uétsankahyana kixin k'uénina k'uéchonta ijnko chin k'uékjínchekjoténa.

¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxí chrók'uayéhérá ijnko ángel kuènte Dios o éxí chrók'uayéhérá jehe Ìnchéni Jesucristo mé xikaha kjuak'é jína ntiha.

15 ¿Nkehe kónhen tí kjuachéhe k'uéchontará? Kíxin ntáxrjan kíxin jína tí jahará kíxin tjinkáonrá kjónté ikonrá chrókuakítsjerá chróchjinará tí janhan.

16 A ntá ijie la, ¿á ninkákònnará jehó kíxin kuinhínrá tí nkehe ntoá xrjanka?

17 Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kíxin jehe sín tjinkaon sín kíxin chrókuítòhérá tí jeheni kíxin ntá tjinkaon sín kíxin jahará chróchréhérá tí jehe sín.

18 Jína chrókótjinkáonrá tí í so sín kjánchó ntoá chrókjuenkayáxinrá kíxin jehya tí chrókjuak'é tí tjejorá ó chrókuítekáonrá jína.

19 T'ikonni tí jahará éxí xjeenni. Ijie la imá kjuíncheníhi asenná kíxin tóxakonna tí jahará. Éxí yóhe ijnko ìné xjan tsjoté tjan tió sinchekokjíhi tjan xjeen tjan mé xikaha janhan la naxa tsjasótena kíxin tjínkavan kíxin Cristo chrókjuinchetjóá tí jahará.

20 Chrókójína ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

21 A ntá jie chronkará nkehe. Jahará naxa tjinkáonrá chrókjuinchexiteyéhérá tí ley tsík'etòan ch'ín Moisés la ¿á kuiénhyará nkehe chro tí ley?

22 Ntáchro kíxin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuenhya.*

23 Tí xjeen tjan ch'exón xra kokjíhi ch'án éxí tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kíxin tsoxiteyá tí nkehe tsintáchro Dios.

24 Tíhi mé ntáyóaxián. Tí yaá chojni chjin mé tóyóexín tí yaá nkehe tsík'etòan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxí chojni ch'exón xra tí jehe sín kíxin t'ítuenhen sín.

25 Mé xikaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kíxin tí chjasin la ko tí sín tjejó ntiha la mé t'ítuenhen sín la ko kaín xjeen sín.

26 A ntá tí chjasin Jerusalén itjen nkaya nkajní la mé t'ítuenhya. Náhí. Mé jeheni la kuènteni tíha.

27 Ntáchro xroon itén Dios kíxin: Jaha chojni chjin chontahya chánjan kjónté chrokócháha. Jaha k'uíkonhya ninkehó kjuatjoté kíxin kjuínchekokjíehya xjan la kjónté chrokócháha.

Tí tjan kuítsínkehe na mé nchónhya ìnté tjan ts'ikon tjan,

* 4:22 Génesis 16.15; 21.2

ḁ ntá tí tjan kjuák'eko xì tjan la kánhyó ts'ikon.†

28 Kíchóni jeheni la éxí yóhēni ch'ín Isaac kixin kaín ni la xjeen Dios kixin xikaha tsíntáchro ch'án.

29 Ḃ ntá éxí senó tí xjan kokjíhi éxí tokjíhi chojni ó la jehe ch'án k'uéchónkíhi ch'án tí xjan kokjíexín kjuachaxién Nchakuen Dios. Mé xikaha kjaxin sítónhen jie.

30 Ḃ ntá ntáchro tí xroon itén Dios kixin: “Tétuēhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsítōnhēn tí xjeen tí tjan t'ítuēhya.”‡

31 Méxra kichó ni, kaín ni la jehya xjeen ijnko tjan ch'exón xra. Náhi. Jeheni mé xjeen tí tjan t'ítuēhya.

5

Jína chrók'uejorá kixin kuaáxinrá

1 Cristo mé kuaáxinni la ntá ó tí ley la t'etuehnyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuēhen inaá.

2 Tinhínrá, janhan Pablo mé ntáxrjan kixin tí chrókuará tí xroye ḁ ntá ó chónkó chrókuinkachónkirá Cristo.

3 Tjínkavan tsoxrjanka inaá kixin tí jnkojín nkexro itsa tí xroye la jehe ch'án mé t'ichjánxín sinchexiteyéhe ch'án kaín tí ley tsíkjin ch'ín Moisés.

4 Ḃ nta jahará la xritjéyará tsotjuáxin ijjará kixin sinchexiteyéhérá tí ley la ntá ó kuítōhérá Cristo la ko ó kuítōhérá tí kjuasáyé Dios tjuahará.

5 Ḃ ntá jeheni la tinkáchónkini Cristo la chóntani Nchakuen Dios la ntá tjejóchónhenni kixin tsjintaxín tsotjóá ijjéni.

6 Jeheni mé tinkáchónkini Jesucristo la ntá kánhyó tjetōan tí xroye. Antsí tjetōan chrókuinkáchónkini Ìnchéni la ntá tí tinkáchónkini Ìnchéni la chrótjuèheni kichó ni.

7 Jahará la jína kjuankixinrá tinkáchónkirá Ìnchéni. ¿Ḃ ntá nkexro k'ueṭōan kixin chrókuítōhérá tí nkehe chaxín?

8 Jehya nkehe kuènte Dios tí tjejoch'erá méhe. Méxra jehe ch'án la kjuéyará ch'án.

9 Ntáchro sín kixin tí ch'o t'óna niotja tsjiko intsíkoá tí xroan nchek'ánkí niotja, ḁ ntá ts'ánkí kaín tí ch'o.

10 Ḃ ntá janhan tinkáchónkia Ìnchéni la ko ó ñona kixin jahará kjaxin tinkáchónkirá ch'án la kjá í chrókuenkayáxinhyará í jnko nkehe. Ḃ ntá Dios mé sinchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

11 Kíchóni, tí naxa chrókuétōan chrókua chojni xroye la ntá tí sín judío chrókónínkakonnahya sín. Tí xikaha la

chrók'uantaxíenhya sín tí tan jína chrónka nkexrí k'uenxín Cristo tí ntacruz.

¹² Méxra tí sín ntaxakonhanrá la t'etōan sín itsará xroye la íchá jína naá chrók'uatínsínkó chrókóchrít'ō sín kaín.

¹³ Jahará kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhi. Chrókuinkitsani kichó ni la ko chrótjuèheni kichó ni.

¹⁴ Mé xíkaha tí ley mé t'axrjexín kixin: “Chrótjuèhéra kichuára éxi tjuèxinrá asánra.”*

¹⁵ A ntá tí chrókjóntehéra kichuára la ko chrókjóntera kichuára la ntá chrókóxakonhanrá kixin tí xíkaha la chrókuinçek'itjáyanrá kichuára.

Tí jię chrókuasin chojni la ko tí nkehe t'etōan Nchakuen Dios

¹⁶ A ntá ntáxrjan kixin chrók'uejorá éxi tjinkaon Nchakuen Dios, a ntá chrókuéyáhyará tí nkehe jínahya chrókuenkayáxinrá.

¹⁷ A ntá tí nkehe jínahya tjenkayáxinrá la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kichó. Méxra jahará la xitjahya ch'erá tí nkehe tjinkáonrá chrókuich'erá.

¹⁸ A ntá tí Nchakuen Dios tjetjinkitsará, a ntá jehya tí ley t'etuanhanrá jie.

¹⁹ Xrahya ts'ikonna tí jię tjasin chojni jínahya tjenkayáxin. Mé tíha la tí sín tjasinko jię chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin,

²⁰ la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni níinkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjinkaon jehó tsochónta itsjé nkehe, la ko tí chojni tjinkaon ts'axrjenta, la ko tí chojni t'óxika kichó,

²¹ la ko tí chojni chjinóxínhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóhe xíkaha. Na mé éxi yóhe senó mé k'uétjonkará la ko ijie la xíkaha tjetjonkará inaá kixin tí nkexro xíkaha tinkákjasin jie mé xitjahya ts'áyéhe sín tí kjuachaxin kuente Dios.

²² A ntá tíó chóntani Nchakuen Dios ntá tsotjuèheni kichó ni, la ko tsochéheni, la ko kjuaxróxin ts'ejóni, la ko tsochónhenni tsoínkakonhyani, la ko jnkojína ts'ejókoni kichó ni, la ko nchexiteyáni jnkojína.

²³ La ko tsohnkehyaní, la ko ts'etuenhenni asénni kixin tsjasinhyani jie. Kohya nijnko ley chrókuinçekjasóteni kixin tí jína chrók'uejóni xíkaha.

* 5:14 Levítico 19.18

24 Mé tí chojni tinkáchónki Jesucristo la kaín jię k'uéchónta sín la ko tí jínahya k'uékjenkayáxin sín la ó kjuenka Ìnchéni kjuák'enkáni ch'án ntacruz.

25 A ntá tí tjejókoni Nchakuen Dios t'ichjánxin tsítóheni kixin Nchakuen Dios ts'etuenhenni.

26 Méxra chrókjuinchehnkehyaní la ko chrókjuachaxinhyani kichó ni la ko chrókóchjinoxíenhyani.

6

Tjínkĩtsará kichuára

1 Kichóni, a ntá tí chrók'uikonrá jnkojín nkexro kjuasin ichrén jię a ntá tí jahará tí chaxín chontará Nchakuen Dios la chrókjuentuéhérá sín la chrókjuinkĩtsará sín. A ntá jnkojína chrónixjehérá sín, a ntá jahará la chrókóxakonhanrá kixin xikahya chrókónhanrá chrókjuásinrá jię kjaxin.

2 Tsjínkĩtsará kichuára kixin jóhya tsamára tí nkehe ye. Kixin tí xikaha la ó chrókjuinchexiteyáni tí nkehe t'etóan Cristo.

3 Ntá jnkojín nkexro ntáchro kixin imá tjeotan tí jehe ch'án la chaxínhya tíha la jehó ch'iyehé asén.

4 Jnkojnko chojni chrórxaxinkaon á nchóxon tjenkayáxin la chrókónohe kixin ó nchóxon la jehya jehó chrókjuikosáyehe asén. Náhi. Chrókjuikosáyehe í so chojni.

5 Kixin jnkojnko chojni yamá tí jię kuente.

6 Tí nkexro xrakóhe tí tan jína la chrókjuinkĩtsa sín chrókjuanjon sín nkehe chrók'uáyéhe tí nkexro tjako.

7 S'ich'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá.

8 Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochríxín ts'áyéhe sín.

9 Mé xikaha chrókóxrjéhyani chrókjuich'eni kaín nkehe jína kixin tí tsóxrjéhyani la ntá chaxín tsjixraká tí yaon tsjachani ts'áyéheni tí nkehe jína.

10 Méxra xikaha xráxín chrókjuich'eni nkehe jína la antsí t'ichjánxin chrókjuinkĩtsani tí sín kichó ni tinkáchónki Ìnchéni.

Ch'ín Pablo nchexraxinkaon tí sín ntiha la ko kjuixixín nixja ch'án

11 Tsjehérá kixin imá ihyé tí letra tjékjinxian tjaná.

12 Tí sín tjinkaon ts'etuánhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuente Cristo.

13 Kjonté tí sín tsíka xroye la nchexiteyáhya sín kaín tí nkehe t'etóan tí ley. A ntá tjinkaon sín kixin chrókuará xroye kixin ntá

kjāxin sín tsohnke sín kixin tsontáchro sín kixin jahará kjāxinrá tjínkáonrá tsochontará xroye tí cuerpo kuèntará.

¹⁴ A ntá janhan mé tóxrjínahya s̄intahnke ninkehó. Íchá jína chróntáxrjan kixin Cristo k'uenyákonhenni. A ntá x̄ikaha k'uexín Cristo tí ntacruz la ntá tí nkehe k'uék'et̄oan kuènte chjasintajni la kjāxin k'uitjāyan la ko janhan kjāxin kuj̄toḥa tí nkehe kuènte chjasintajni.

¹⁵ La ntá ninkehó sínkíhya á tsíka chojni xroye o náhí. Tí nkehe sínkí la chrók'ónani ijnko chojni n̄ixin.

¹⁶ A ntá tí sín ts'áyéḥe kjuaxróxin kixin kuj̄konóḥe Dios tí jehe sín la mé kaín tí sín kuítekaon tí nkehe t'et̄oan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkakhonya kixin chrók'uekana jie ninkexró. Janhan mé chaxín chonta tí tsíkjats̄oenxín tsíchrít'o cuerpo kuèntana kixin kjuasótexinna kixin kuj̄t'ahā xrā Ìnchéni Jesús.

¹⁸ Kíchóni tjáncháḥa Ìnchéni Jesucristo kixin kjuasáyé ch'án chrókjuincheyaon ch'án kaín rá. Mé x̄ikaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí nínko chjasin Éfeso

1 Janhan Pablo tsíkjeýána Jesucristo kixin xíkaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko titekáonrá Cristo Jesús.

2 Tjétjáncháha It'éni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

3 Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xíkaha jehe ch'án mé kjuíncheyaonni ch'án kixin kaín nkehe jína tìxin nkaya nkajní kjuanjon ch'án.

4 Dios mé kjuéyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án.

5 Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xíkaha tsíkjenkayáxin ch'án kixin xíkaha kóxrjínhìn ch'án.

6 Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án.

7 Imá tjuèhe Dios tí jeheni la xíkaha kuaáxinni ijníé tí Xjeen ch'án k'uítji la xíkaha tsjìixín kaín ijjéni.

8 Dios kjuakoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuienxínni jína la ko kjuanjon ch'án kjuaxrexinkaon jína.

9 Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjínhìn ch'án tsoxiteyá.

10 Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjon kjuachaxin kixin Jesucristo ts'etuénhen ch'án kaín xín nkehe sínn nkaya nkajní la ko chjasintajni.

11 Dios kjuéyáni kixin chrókuinkáchónkini Cristo la ntá xíkaha chrók'uáyéheni tí nkehe tsík'áyéhe ch'án. Kaín tíha la mé xíkaha tsonhen éxí tóxrjínhìn Dios.

12 Mé xikaha kjuích'e ch'án kixin ntá jeheni kuítekaonni Cristo saoxín chrók'uejóni chrókjuancheheni kjuasáya Dios kixin tí kjuachaxin jié chóna ch'án.

13 A ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsíntáchro ch'án.

14 Tí Nchakuen Dios kuítõnhenni mé kjuínchenoexínni Dios kixin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xikaha kaín ni tsjancheheni kjuasáyé ch'án kixin tí kjuachaxin jié chóna ch'án.

Ch'ín Pablo kjuanchehe Dios kixin antsí chrókónohe tí sín tinkáchónki Ìnchéni

15 Méxra ó kuínhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios.

16 Ntá janhan nunca títuaha nixjaha Dios tjáncháha kjuasáya kixin ó tinkachónkirá ch'án.

17 Tjéníxjaha Dios, mé jehe ch'án mé ichr'án Ìnchéni Jesucristo, mé It'éni imá tjetõan la tjétjáncháha ch'án kixin tsotjáhará ch'án kjuaxrexinkaon jína kuente Nchakuen ch'án kixin ntá antsí chrókuiénxinrá jína tí nkehe kuente ch'án kixin ntá antsí má chróchoxínrá ch'án.

18 Kjaxin tjétjáncháha Dios kixin tsjinkítsa ch'án tsjanjon ch'án ijnko kjuaxrexinkaon jína kixin ntá tsonohará ts'ejochonhénrá kixin xikaha kjueyará ch'án. La ko tsonohará kixin imá tjetõan tí nkehe sinchekítõnhenni ch'án kixin jeheni mé tinkáchónkini ch'án.

19 La ko kjaxin tjétjáncháha Dios tsjinkítsará ch'án tsonohará kixin tí kjuachaxin kuente ch'án mé ijnko nkehe imá jié noehyani nketí kjuèxín. Tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chóntani la ko tí kjuachaxin imá jié kjuakoxin ch'án

20 tió kjuínchexechón ch'án Cristo. Ntá Cristo sákjui kjuák'etjaxin ch'án tja chjina tí It'é ch'án itjen nkaya nkajní.

21 Mé xikaha kjuanjon Dios kjuachaxin kixin Cristo ts'etuenhen ch'án kaín xín gobierno la ko kaín tí sín t'etõan. Ijie tjet'etuenhen ch'án kaín xín nkehe siín chjasintajni la ko chr'éxin ts'etõan ch'án kjaxin.

22 Cristo k'uáyéhe ch'án kjuachaxin ts'etuenhen kaín xín nkehe siín. Jehe ch'án mé ts'etuenhen kaín tí sín k'óna nínkoé ch'án.

²³ Tí n̄nko mé éxí tí cuerpo kuènte ch'án la jehó ch'án mé t'et̄uēnhen ch'án. Jehó ch'án mé kuènte ch'án kaín xín nkehe síin.

2

Kuaáxinni kjuachaxiēn Dios

¹ La ntá ijie Dios mé kjuínchek̄itonhanrá tí kjuachón jnkochr̄ixín k̄ixin tinkachónkirá Cristo. Senó la jahará la éxí tsík'enrá k̄ixin tí jínahya k'uék̄j̄ich'erá la ko tí j̄iē k'uék̄j̄ásinrá.

² Mé x̄ikaha k'uéchréhérá éxí sítónhen chjasintajni. K'uék̄jinchexiteyéhérá éxí tóxr̄j̄ín̄h̄in tí nchakuen jínahya t'et̄uēnhen tí x̄rint̄o la ko t'et̄uēnhen kaín xín tí chojni titekakuenhya Dios.

³ Kaín̄ni x̄ikaha k'uék̄'ejóni tí óse a nax̄a kjuínchexiteyéhēni tí nkehe ntáchro asēni la ko kjuínchexiteyáni tí kjuaxrexinkaon jínahya k'uéchóntani. A ntá tí nax̄a x̄ikahó chrók̄juich'eni la Dios imá chrók̄juinchek̄jasóteni éxí tsjasóte tí í so sín.

⁴ A ntá Dios mé imá kuik̄onóēhēni ch'án la ko imá tjuèhēni ch'án.

⁵ La ntá kjuanjon ch'án tí kjuachón éxí chón̄ta Cristo. Jeheni la éxí chojni tsík'en k'uék̄'ejóni x̄ikaha k̄ixin tí j̄iē k'uék̄jasinni. A ntá j̄ie kjuasáyé Dios tsaáxinrá ch'án.

⁶ Dios mé kjuínchexechón Cristo Jesús la ko k̄j̄axin jeheni tsoxechónni k̄ixin ts'ejókoni ch'án nkaya nkajní.

⁷ Mé x̄ikaha kjuích'e ch'án kjuak̄ox̄in ch'án la nax̄a tjet̄jak̄ox̄in ch'án k̄ixin tjuèhēni ch'án la ko kjuínk̄itsani ch'án k̄ixin tinkáchónkini Cristo Jesús.

⁸ Kjuasáyé Dios k̄ixin kuaáxinrá ch'án k̄ixin tinkachónkirá ch'án k̄ixin táha la jehya jahórá k'uitjará tíha. Náhi. Táha la mé kjuasáyé Dios k̄ixin tjáhará ch'án.

⁹ K̄ixin jehya ichrén nkehe jína kjuích'eni k̄ixin chrók̄juinchehn̄kex̄inni.

¹⁰ Dios mé kjuích'ēna tí jeheni ntá chr'éx̄in kjuínk̄itsa ch'án k̄ixin tsinkáchónkini Cristo Jesús, k̄ixin ntá chrók̄juich'eni tí x̄r̄a jína k̄ixin x̄ikaha tsík̄jenk̄ayáxin ch'án tí senó a.

Kjuaxróxin tjejóni k̄ixin tinkáchónkini Cristo

¹¹ Méx̄r̄a jahará la jehya chojni judiórá. Mé tí sín judío ntak'inrá sín chojni chón̄tahya tí xroye tí jahará. A ntá tí sín judío, mé tí sín itsa sín xroye cuerpo kuènte sín, mé nchek'in sín asén sín tí chojni chón̄ta xroye.

¹² Xr̄axinkáonrá k̄ixin tí senó la k'úechonhyará Cristo. Jahará la jehya kuènte tí nación Israel la x̄ikaha k'uéchonhyará tí nkehe tsík'et̄oan Dios la ko tí nkehe tsintáchro ch'án tsjanjon ch'án. Mé x̄ikaha k'uék̄'ejorá la k'uéchonhyará Dios la k'úechoénhyará k̄ixin chrók̄uaará.

¹³ La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'uitji ijnié ch'án.

¹⁴ Jehe Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókjuenkayáxin sín kixin k'óna éxi jnkokoá chjasin. Cristo k'óxíka ch'án tí kjuanínkaon éxi ijnko tjat'o k'uinkákonhen.

¹⁵ Jehe ch'án kjuasóte ch'án, la kjuatsen ch'án tí ley. Tí iyó chjasin k'uejó kjuích'ena ch'án jnkokoá chjasin nixin kixin tinkáchónki sín ch'án. Mé xikaha kjuanjon ch'án kjuaxróxin.

¹⁶ Mé xikaha k'uenyákonhenni ch'án k'uexín ch'án tí ntacruz la kjuakjini ch'án tí kjuanínkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxi jnkokoá cuerpo kuente ch'án.

¹⁷ Cristo mé ikui la kjuakohe ch'án kaín chojni tí tan jina kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uejó.

¹⁸ A ntá kjuachaxin kuente Cristo la kaín ni kjónté jeheni o í so chojni mé tsochjineheni It'éni Dios kixin jnkokoá k'uáyéheni Nchakuen ch'án.

¹⁹ A ntá jahará la í tóyóahyará chojni tsíkjin ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án.

²⁰ Jahará la mé tsík'ónará ijnko nchia tjat'o jie k'óna chrítaón tí xro k'uejo tí sín kjueya Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xro imá t'etoan kuente tí tjat'o a.

²¹ Tí xrankixín mé Cristo la chrítaón k'óna kuenté nchia la tinkák'ánki tí nchia kixin jina tsjak'e, ntá tsjixraká kixin ts'óna ijnko ninko tjóá kuente Inchéni.

²² Mé xikaha jahará tinkachónkirá Cristo la tsojnkotsérá kaín rá ts'óna éxi ijnko nchia kuente Dios la ntaha tsjak'exenhen tí Nchakuen ch'án.

3

Ch'in Pablo k'uáyéhe ch'án tí xra tsjakohe ch'án tí sín jehya judío tí tan jina

¹ Mé xikaha janhan Pablo mé tjechjinaxián tí tjákua itén Cristo Jesús kixin jina ts'ejorá kjónté jehya chojni judío tí jahará.

² Chrókónohará kixin kjuasáyé Dios kjuanjon ch'án tí xra k'uayáha kixin tsjákohará.

³ Dios mé kjuəkoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijnko xroon kánhyó tsjé nixja k'uayéhérá.

⁴ Tió sinchekuáxinrá tíha ntá tsonohará kixin ó nòna tí nkehe kuènte Cristo ninkexró k'uénoehya.

⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xrə la ko tí sín chrónka itén ch'án.

⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxi ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchronka Dios sinchexiteyá Cristo Jesús.

⁷ Janhan k'uékítekakonhya, a ntá jie kjuasáyé Dios kjuanjon ch'án tí xrə i sít'a kixin tsjəkuá tí itén ch'án kixin tí kjuachaxin kuènte ch'án.

⁸ Janhan mé kánhyó tjetooan kixin janhan la imá intsína la kaín tí í so sín tsíkjinchetjóá Dios la antsí tjetooan sín. Kjónté la Dios mé kjuínchekitonna tí xrə imá tjetooan kixin tsotjanka tí sín jehya sín judío tí tan jína nkexrí imá tjetooan tí nkehe kuènte Cristo.

⁹ La k'uayáha tí xrə tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuích'éna ch'án kaín xín nkehe.

¹⁰ Mé xikaha kónhen kixin ntá tí sín kuènte nínko tsjakuexin sín kaín xín tí sín t'etooan nkaya nkajní kixin tsonohe sín kixin xikaha kaín nkehe jína tsíkjenkayáxin Dios.

¹¹ Kaín tíha kjuích'e Dios éxi tsíkjenkayáxin ch'án ntá Inchéni Jesucristo la ó kjuínchexiteyá tíha.

¹² Kjuasáyé Cristo ntá ó chóntani kjuachaxin tsoghjineheni Dios kixin tinkáchónkini ch'án.

¹³ Méxrə xrjanóahará kixin chrókuitoéhyará chrókuinkachónkirá ch'án kjónté tjétjasótena kixin kaín tíha kónhen kixin jahará chrók'uejoxinrá jína.

Cristo imá tjuèheni

¹⁴ Méxrə xikaha tjak'éxian tóch'ian nkayakon It'é Inchéni Jesucristo.

¹⁵ Mé tsík'áyéhe ihnjé Dios kaín xín chojni tinkáchónki ch'án mé tí sín siín nkaya nkajní la ko tí sín siín chjasintajni.

¹⁶ Tjáncháha It'éni kixin tsjanjon kjuachaxin kuènte ch'án ts'ayéhérá kjuachaxién Nchakuen ch'án

¹⁷ kixin Cristo chróchóna asánrá kixin tinkachónkirá ch'án la ntá ntoá chrók'uejorá éxi ijnko nta tsíkji nuèe nínka la chrótjuéhérá kichuárá.

18 Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kǐjǐnxǐn la ko nǐnkaxín la ko ntetoxín kǐxin nkexrí tjuèheni Cristo.

19 Tjǎncháha Dios kǐxin ǎntsí chrókónohará nkexrí imá tjuèhe ch'án tí jeheni mé ǎntsí má tjuèheni ch'án la tsjachahyani tienxínni kaín tíha. A ntá tí jehe ch'án chrókjuinkǐtsani ch'án la ǎntsí chrókuiénxínni tí kjuachaxin kuènte ch'án.

20 Ijie la chjéheni kjuasáya Dios kǐxin jehe ch'án chóna kjuachaxin tsjanjon ch'án ǎntsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkǐtsa tí jeheni.

21 Kjuasáyé Dios itjen jnkochrǐxín kǐxin Cristo Jesús kjuíncheakaá ch'án tí nǐnko, mé xǐkaha ó xiteyá jnkochrǐxín. Amén.

4

Jína chrók'uejókoni kǐchó ni kǐxin chóntani Nchakuen Dios

1 Janhan mé tjéchjǐnaxián tí xra kuènte Ìnchéni. Méxra xrganóahará kǐxin jína chrók'uejorá kǐxin xǐkaha Dios tsǐkjeyá tí jahará.

2 Méxra chrókjuínchehnkehýará la ko chrókójiahyará la ko chrókójinárá chrókóninkákonhyará la ko chrótjuèhérá kǐchuára.

3 Méxra jína chrók'uejokoará kǐchuára kǐxin chrókjuinkǐtsa Nchakuen Dios kjuaxróxin chrók'uejorá la ko jnkokoá chrókjuenkayáxinrá.

4 Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kǐxin jnkokoá nkehe ts'ejóchónhenni.

5 Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni.

6 Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuènen ch'án kaín nkehe.

7 Jnkojnkoni k'uáyéheni kjuachaxin sich'eheni Dios xra kǐxin xǐkaha kjuanjon Cristo.

8 Méxra xǐkaha nixja xroon itén Dios kǐxin:
 “Jehe ch'án sákjuǐ ch'án nkaya nkajní la ko sákjuǐko ch'án tí sín tjejóchjina,
 la ntá kjuínchekǐtonhen ch'án chojni jnkojnko kjuachaxin kuènte ch'án.”*

9 ¿Ntá nkexrí t'axrjexín kǐxin sákjuǐ ch'án? Tíhi mé t'axrjexín kǐxin jehe ch'án mé senó k'uínkajǐnxǐn ch'án nkaya nkajní la kjuák'e ch'án chjasintajni.

10 Jehe ch'án mé k'uínkajǐnxǐn ntiha mé ntá jie sáxíkji ch'án tí nkajní imá noi. La ntá tjet'etuènen ch'án kaín xín nkehe.

* 4:8 Salmo 68.18

11 Jehe ch'án mé kjuínchekitonhen ch'án ijnko kjuachaxin jnkojnko chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án.

12 Mé xikaha tí xrá k'uáyéhe tí sín kjueyá ch'án kixin sich'ehe sín ch'án xrá kixin ntá ts'ánkí tí sín k'óna tí cuerpo kuènte Cristo.

13 Ntá xikaha kaín ni jnkokoá tsinkáchónkini tí Xjeen Dios la ko tsochóxinni ch'án jína kixin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo.

14 Méxrá chrók'ónahyani éxí xjan ntsíntsí. Tí xjanntsí la xrahya tsjinkí kjuaxrexinkaon éxí ijnko nkehe sákjuiko xrínto xikaha kixin sich'iyehé sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroeni sín í jnko ntjá ntoáhya kixin chrok'uitjáyenhenni Cristo ntá chrókjuasinni jie.

15 A ntá íchá jína chrónixjani tí nkehe chaxín ntoá la kaín asénni chrótjuèheni kichó ni ntá xikaha chrókónoheni kixin xikaha tjinkaon Cristo. Jehe ch'án mé tí kja t'etuèhenen tí cuerpo kuènte ch'án.

16 A ntá kjuachaxièn Cristo kuenté tí cuerpo, tí ch'e xrá jnkokón la tjinkítsa kuenté. Ntá jnkojnkoní jína ch'eni xrá la mé xikaha ts'ánkí tí xrá kuènte ch'án la mé jína chrótjuèheni kichó ni.

Tí kjuachaxin nixin kuènte Cristo

17 Tíhi mé ntáxrjan la ko tétuànhanrá kjuachaxièn ihnié Ìnchéni. Ijie la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha.

18 Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios.

19 Ó tsíkjinchek'itjáyan sín tí kjuaxrexinkaon kuènte sín la í tósuèhya sín chrókjuasin sín jie. Imá tóxrjínhin sín chrókjuich'e sín kaín nkehe jínahya.

20 A ntá jahará xikahya xrakohará tí nkehe kjuako Cristo,

21 tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án.

22 Méxrá títóhérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínahya naxa t'ayahará.

23 Jahará t'ichjánxin kixin chrókónixin tí kjuaxrexinkaon kuèntará la ko tí nchakuanrá.

24 Méxra chrókuákjárá tí kjuaxrexinkaon nixin kjuích'éna Dios xikaha tjinkaon ch'án la ntá chrókjuákoxinrá ijnko ntia jína ntoá.

25 Méxra chrókuítóhérá tí kjuach'ia. Méxra jnkojnkorá chrónixjehérá kichuára ntoá kixin kaín ni tsík'ónani jnkokoá cuerpo.

26 Tí chrókóninkáonrá la chrókjuásinhyará jie la chrókóninkákonhyará kuenté yaon.

27 Chrókuítóehyará kixin Tsochren chrókjuít'ayahará.

28 Tí jnkojínrá kueerá la titóhérá kjuachee. Íchá jína kixin itjárá chrókjuích'exínrá xra kixin tsochontará chichaon sinchekitonhénrá jnkojín nkexro t'ichjánxinhin.

29 Nixjahyará tí nkehe náxrjónhya. Nixjará ijnko tan jína kixin tsjinkitsará ts'ánkí kjuaxrexinkaon kuente kichuára la xikaha tsjinkitsará tí sín tjejótinhin.

30 Nchek'ávahyará tí Nchakuen Dios kixin tíha mé k'uayéxinrá éxí ijnko xroye kixin tsonoaxínrá kixin jahará mé tinkachónkirá Dios la ko tsochonhénrá tí yaon itsi ch'án ntá tsjintaxín tsaará.

31 Titóhérá tí kjuanínkaon chontará la ko titóhérá tí nkehe ntoáhya tjenkayáxinrá la ko titóhérá tí kjuanoton la ko kaín nkehe jínahya.

32 A ntá chrókójínará chrókuíkonóehérá kichuára. Sinchek'itjáyenhénrá ijié kichuára kixin Dios kjuatsen tí jie chontará kixin tinkachónkirá Cristo.

5

Jína chrók'uejó tí sín k'óna xjeen Dios

1 Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxí kjuákoxin tí jehe ch'án.

2 Chrótjuèhérá kichuára éxí Cristo tjuèhe tí jeheni kixin jehe ch'án la k'uenyákonhenni ch'án, éxí yóhe ijnko kolélo xikaha kjokehe sín Dios la kóchéhe Dios k'uáyéhe ch'án tí xraxé náxrjón.

3 Ntá jahará mé tsík'ónará chojni kuente Dios la ntá chrónixjahyará kuente í jnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará.

4 Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuente Cristo tíha. Íchá jína antsí má chrókjuancheherá Dios kjuasáya.

5 Ó nohará kixin tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchónta sín la mé tíha ó yóhe tí nkexro

tinkáchónki nkehe tsíkjanoya xíkaha. Mé tí nkexro xíkaha ch'e mé tsjachahya ts'ixenhen tí tjet'etoan Cristo la ko Dios.

⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xíkaha ntá itsi tí kjuanínkaon kuènte Dios la tsjasóte tí sín titekakuenhya sín tí jehe ch'án.

⁷ Méxra chrók'uítohyará tí sín xíkaha ch'e.

⁸ Senó la k'uék'ájirá ntia sítié. A ntá ijie ó k'ónará chojni kuènte Ìnchéni la ó xritjejorá tí ntia t'inkaséyan kuènte ch'án. Méxra tjenkayáxinrá jína éxí tí sín xritjejó tí ntia t'inkaséyan.

⁹ Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá.

¹⁰ Tóxakonhanrá chrókjuich'erá tí nkehe tóxrjínhin Ìnchéni.

¹¹ Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjákoxinrá tí xra tí itjen tí t'inkaséyan.

¹² Chrókósuèheni chrónixjani kuènte tí nkehe imó ch'e tí sín jínahya.

¹³ Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe.

¹⁴ Mé xíkaha ntáchro xíkíhi:

T'aya jaha tjéchrian t'inkatjenxian tí sínn tí sín tsík'en. Cristo mé tjetjoka xrohi.

¹⁵ Méxra imá chrókóxakonhanrá jnkójina chrók'uejorá. Jehya éxí tí sín noehya chrók'uejorá. Náhi. Chrók'uejorá éxí ijnko chojni nohe má.

¹⁶ Chrókóxakonhanrá chrókjuich'erá xra tí jie kixin itsi ijnko yaon jínahya xitjahya sich'erá xra.

¹⁷ Chrókólontihyará. Chrókóxakonhanrá chrókuiénxinrá tí nkehe tóxrjínhin Ìnchéni.

¹⁸ Chrókókoanhyará kixin tíha mé chrók'uitjáyaxinrá. Íchá jína chrókjuánjonrá kjuachaxin chrók'uetuānhanrá Nchakuen Dios.

¹⁹ Chrónixjexínrá kichuárá tí salmo la ko tí himno la ko chrótsjerá la xíkaha kaín asánrá chrókjuancheherá kjuasáyé Ìnchéni.

²⁰ Jnkochrín chjehérá kjuasáya It'éni Dios kixin kaín nkehe kjuanjon ch'án la ko chrókjuanchaxinrá kjuasáya kjuachaxién ihnié Ìnchéni Jesucristo.

Jína chrók'uejókoni tí sín kjéhyani kixin tinkáchónkini Ìnchéni

²¹ Titekákonhénrá kichuárá kixin ó tinkáchónkirá Ìnchéni.

²² Tí chojni chjin chrókjuinchexiteyéhe xì sín éxí nchexiteyéhe sín Ìnchéni.

²³ Tí chojni ntoa chóna kjuachaxin ts'etuēnhen ichjién éxí Cristo mé ikja t'etuēnhen tí nínko. Kjaxin jehe ch'án kjuíncheakaá ch'án tí nínko, mé tí cuérpogé ch'án.

24 Méxra éxí tí n̄nko nchexiteyéhe Cristo mé x̄ikaha k̄jaxin tí chojni ch̄jin chrókjuinchexiteyéhe tí x̄i.

25 Tí chojni ntoa chrótjuèhe tí ichjién k̄ixin éxí Cristo la tjuèhe tí n̄nko la k'uenyákonhen ch'án.

26 Mé x̄ikaha k̄juich'e Cristo k̄ixin sinchetjóá ch'án tí n̄nko mé k̄juínchetjuáxin ch'án tí nt̄a kuíkítexín s̄in k̄juachaxién itén ch'án.

27 Nt̄a tsjanjon ch'án tí jeheni éxí ijnko n̄nko imá j̄ina chóntahya jié la ko chóntahya ninkehó nkehe náxrjónhya, mé ijnko n̄nko tjóá la ko ntoá.

28 Mé x̄ikaha tí chojni ntoa chrótjuèhe tí ichjién s̄in éxí tjuèxín ch'án cuérpóé ch'án. Tí nkexro tjuèhe ichjién mé k̄jaxin tjuèhe asén ch'án.

29 Kohya ninkexró nínkakonhen tí cuerpo kuènte. Kaín chojni la ine s̄in la t'ayakonhen s̄in cuérpóé s̄in la mé x̄ikaha Cristo t'ayakonhen tí n̄nko.

30 Kaínni mé k'ónani cuerpo kuènte ch'án. Jeheni mé nt̄oe ch'án la ko huésóé ch'án.

31 Nt̄achro k̄ixin: “Méxra ijnko chojni ntoa mé tsít̄he it'é la ko iné k̄ixin tsakja ichjién la yóí s̄in mé ts'óna éxí jnkokoá chojni.”*

32 Tíhi mé ijnko nkehe imá jié tienxínhya ninkexró. Mé janhan xr̄janka kuènte Cristo la tíha mé n̄nkoé ch'án.

33 Méxra k̄jaxin tjéxr̄janka k̄ixin chojni ntoa t'ichj̄ánx̄in tsotjuèhe ichjién s̄in éxí tjuèxín asén s̄in la tí chojni ch̄jin chróchóntehe s̄in k̄juasáya tí x̄i s̄in.

6

1 Jahará ch̄anjanrá la t'ichj̄ánx̄in s̄in chexiteyéhérá it'ará la ko inárá k̄ixin tjuèherá Ìnchéni k̄ixin tí x̄ikaha mé j̄ina.

2 Tí nkehe saoxín tsík'ítuenhenni k̄ixin chrókuitekaomni nt̄a chrókjuanjon Dios nkehe mé tíhi: “Chrókjuíkosáyehérá it'ará la ko inárá

3 k̄ixin mé náxrjón chrók'uejorá la isé chrók'uejorá ntihi chjasintajni.”*

4 Jahará it'é xjan la chrókjuínchekónínkakonhyará tí x̄jaanrá. Íchá j̄ina k̄ixin s̄in chék'ánk̄ixinrá x̄jaanrá ijnko k̄juaxrexinkaon j̄ina k̄ixin ts'ánk̄ixin xjan tsinkáchónki xjan Ìnchéni.

5 Jahará chojni ch'e xra mé chrókuitekákonhénrá tí lámóará ntihi chjasintajni la chróchontehérá s̄in k̄juasáya. S̄ich'eherá s̄in xra éxí ch'eherá xra Ìnchéni Cristo.

6 Chrókjuich'erá xra j̄ina la jehya k̄ixin tí tjejó s̄in tjejótsjehe s̄in k̄ixin nt̄a x̄ikahó nt̄a j̄ina chrók'uejox̄inrá. Náhí. Éxí

* 5:31 Génesis 2.24 * 6:3 Éxodo 20.12; Deuteronomio 5.16

ch'eherá xṛa Cristo kaín aśánrá s̄ich'erá xṛa kíxin mé x̄ikaha tóxrjín̄h̄in Dios.

7 Kaín aśánrá chrókjuich'erá xṛa éxi ch'eherá xṛa Ìnchéni la jehya éxi chojni ó chrókjuich'eherá xṛa.

8 Ó nohará kíxin jnkojnko nkexro kjónté ch'exón xṛa o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kíxin nkexrí tí xṛa jína kjuíuch'e sín.

9 Tí jahará chojni lamó mé jnkójina chrókuétuēnhénrá tí sín t'ahará xṛa la séchrókóninkákonhénrá sín. Xráxinkáonrá kíxin jahará la ko jehe sín mé jnkokón chrókjuinchexiteyéhérá Ìnchéni itjen nkaya nkajní kíxin kaín chojni la jnkokón t'ikon ch'án.

Tí nkehe tjink̄itsa t'ayakonhen tí sín tinkáchónki Ìnchéni

10 A ntá jie kichó ni, nchefuérte aśánrá kíxin tjejókoni Ìnchéni la tjetōan tí kjuachaxin kuēnte ch'án.

11 Chrókuaáxinrá kaín tí kjuachaxin tsjanjon Dios kíxin ntá x̄ikaha jína chrók'uejorá la chrókjuít'ayahyará Tsochren.

12 Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya siín chjasintajni. Tíha mé tjinkaon chrók'ueṭōan tí chjasintajni sítié.

13 Méxṛa chrókuákjára kaín tí kjuachaxin kjuanjon Dios kíxin ntá chrókjuachará tí itsi tí yaon jínahya ntá tí x̄ikaha chrókjuich'erá la chr'éxin la jína chrók'uejorá.

14 Nchefuérte aśánrá. Jína chrók'uejorá. Chrókuítekáonrá tí itan chaxín kíxin tí nkehe ntoá mé chrók'uayakonhanrá.

15 Méxṛa listo chrók'uejorá sátsjichronkará tí tan tjanjon kjuaxróxin.

16 La aṅtsí tjetōan chrókuinkachónkirá Ìnchéni. Tíha mé chrok'uinkákonhen tí chica flecha tsochr'án Tsochren.

17 Tí chrókuaáxinrá la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios.

18 La ko kjaxin chrókuitoéhyará chrónixjehérá Dios la jnkochrín̄x̄in chrókjuanchehérá ch'án kaín nkehe t'ichjánx̄inhanrá la chrokjuanchatóxixínrá Nchakuen ch'án. Chrók'uejotsjehérá la chrókjuanchiará kíxin tsjink̄itsa Dios kaín tí sín tinkáchónki ch'án.

19 Chrónóehérá ch'án kíxin kjaxin janhan tsjink̄itsana ch'án tsjanjon ch'án tí tan t'ichjánx̄in tsoníxja janhan kíxin ntá janhan aṅtsí jína chrónixja kíxin ntá tsinhin sín tí nkehe ninkexró k'uénoehya kíxin nkexrí tjen tí itén ch'án tsaáxin chojni.

20 Dios mé ichr'ánna tsoxrjanka tí itén ch'án, mé x̄ikaha tjéchjinaxián ijie. Nixjehérá ch'án kíxin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkexro imá tjuèheni la ko xráxín ch'ehe xra Ìnchéni mé tsochenkará ch'án tí jahará nkexrí tjén la ko nkexrí tí xra tjét'a.

²² Mé xikaha tétuñhan ch'án sátsjitsjehe ch'án tí jahará kixin tsochrónka ch'án nkexrí tjejóni la xikaha chrókócháhará.

²³ Tjáncháha It'éni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsotjuèhe kichó sín la ko tsinkáchónki sín ch'án.

²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énnen ch'án tí sín siín chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'eheeni xra Jesucristo, mé ikjinni tí xroon i chr'anhánrá kaín tí jahará kichó ni tin-kachónkirá Cristo Jesús tjejorá chjasin Filipos la ko tí sín t'etōan kuènte nínko ntiha.

² Tjanchiani kixin It'éni Dios la ko Ìnchéni Jesucristo kjuasáyé ch'án imá chrókjuincheyaonrá ch'án la ko chrók'uayéhérá kjuaxróxin.

Ch'ín Pablo tjechrónóhe ch'án Dios kixin tí sín tinkáchónki Jesús ntiha

³ A ntá tió xráinkavan tí jahará la imá tjaḥa Dios kjuasáya

⁴ la ko níxjaha Dios la imá chàna tjáncháha ch'án kixin tsjinkitsa ch'án kaín tí jahará.

⁵ Jahará la kjuínkitsará tió kjuàkua tí tan jína tí saoxín kuinhínrá itén Dios la naḥa tjejotjinkitsará ije.

⁶ Ó nòna chaxín kixin xikaha Dios ó kjuankixin ch'án ch'e ch'án xra jína kixin kuítekáonrá mé xikaha naḥa tsjintaxín sich'e ch'án tsjixrakája tí yaon tsokjan Jesucristo.

⁷ Jína kixin tjenkayáxian kuènte kaín tí jahará. Méxra xikaha imá tjuahará. Jahará la ko janhan la jnkokón kjuachaxin k'uáyéheeni la kjónté janhan tjechjina o itjén tí tjejó tí sín t'etōan tjejrjanka kixin jína tí tan tsaáxinni.

⁸ Dios la ó nohe kixin imá tjínkavan chrók'uíkuan kaín tí jahará kixin éxi tjuàxinrá Cristo.

⁹ Tjáncháha Dios kixin tsjinkitsa ch'án tí jahará kixin antsí má chrótjuèhéra ch'án la ko chrók'uánkí tí kjuaxrexinkaon kuèntará kixin antsí chrókuiénxinrá kaín nkehe.

¹⁰ La ntá chrókónohará chrókuákjára tí nkehe jína. A ntá tí xikaha chrókjuich'erá la jína tjóá chrók'uejorá la ko kohya nkehe chrókjuanchia jie tió tsokjan Jesucristo.

¹¹ Méxra jahará chrókjuich'erá xra jína éxi ijnko nkehe jína chrók'óna kixin kjuasáyé Jesucristo la ntá xikaha la chrókjuikosáyehérá Dios.

A ntá janhan la tjechōnxian Cristo

¹² Kichóni tjínkavan tsonohará kixin tí nkehe kjuasótexinna la kjuínkitsa kixin kuinhin chojni tí itén Dios tsaáxinni.

¹³ Kaínxín tí chojni siín palacio la ko kaín tí í so sín mé nohe sín kixin tjechjīnaxián kixin tinkáchónkia Jesucristo.

14 A ntá tí tjéchjina la itsjé tí sín kichó ni antsí má kóxrjnhin sín tjako sín itén Ìnchéni la í chrakonhya sín tinkáchónki sín ch'án.

15 A ntá chaxín iso sín nixja sín itén Cristo kjánchó chjinoxínhin sín kixin tjinkaon sín chrókjuachaxinna sín. A ntá í so sín tjako itén ch'án kixin tjinkaon sín jína chrókjuinkitsana sín.

16 Kjánchó iso sín tjinkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjinkaon sín chrók'uekana sín antsí má jié kixin naxa tjéjina.

17 La í so sín nixja sín kuente Cristo kixin tjuèhe sín ch'án la ko tjuana sín la ó nohe sín kixin ntihi tén kixin tsoxrjanka tí itan tsaáxinni.

18 Kjánchó ántosenná kjónté á chaxín kaín asén sín tjako sín o náhi, la imá chàna kixin chrónka sín tí tan jína kuente Cristo la antsí má chéhe asenná.

19 Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyará jahará tjejónixjehérá Dios la ko tí Nchakuen Jesucristo mé tjetjinkitsana.

20 Jína tjéonhan kixin Dios la tsítóehya tí janhan kixin ichrén nkehe jínahya chrókóna. Tjínkavan tsochonta kjuachaxin kixin jína tsonixja kaín asenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoexín sín kixin Cristo imá chóna kjuachaxin kjónté á naxa tjéuan o á ó tsík'ena.

21 Kixin janhan na Cristo tjéonxian la ntá kjónté ts'énxian xikaha la mé chrókjuácha.

22 A ntá tí naxa tsjak'é naxa tjéuan ntá naxa jína sít'aha Ìnchéni xra. Nonahya nkehe tí chrókuákjaá, á chrók'uén o á chrókjuak'éuan.

23 Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékian Cristo. A ntá janhan la ntáxrjan kixin íchá jína tíha.

24 Kjánchó t'ichjánxin naxa chrókjuak'é kixin naxa chrókjuinkitsa tí jahará.

25 Méxra ó nòna kixin naxa tsitona tí tjejorá kixin chrókjuinkitsa tí jahará kixin ntá antsí chrókónohará la chrókócháhará kixin jína chrókuinkachónkirá Ìnchéni.

26 Ntá tió tsjasán janhan ts'ejóni inaá la imá tsocháhará la tsjanchehérá kjuasáyé Jesucristo.

27 A ntá jahará chrókjuákoxinrá chrók'uejorá jína éxi ntáchro tí tan kjuakoxin Ìnchéni Cristo. Mé xikaha tí tsjasántsahará o náhi la tjínkavan chrókuinhan kixin naxa imá tinkachónkirá

Cristo la ko jnkokoá tjenkayáxinrá la ko jnkokoá tjejoch'erá xra tjàkorá tí itan jína tsaáxinni.

28 Chrókuítóéhyará kixin tí sín nínkakonhanrá chrókjuintachakonrá sín. Tí xíkaha chróchrakonhyará la chrókónoexín sín kixin ts'itjáyan sín, a ntá chrókónoxín kixin jahará mé chaxín tsaará. Tíha mé Dios tsjinkĩtsará.

29 Ó kuítõnhanrá tí kjuachaxin kixin tsinkachónkirá Jesu-cristo la ko kjaxin kuítõnhanrá kjuachaxin tsjasótiaxínrá kixin jahará mé tinkachónkirá ch'án.

30 Jahará la ko janhan jnkokón ch'eni xra. Jahará ó k'uíkõnrá senó nkexrí kjuít'a xra la ó kuinhínrá ijie kixin naxa tjét'a xra kjónté nínkakonna sín.

2

Kuítóhe Jesús tí kjuachaxin chrók'ueṭoan ch'án ntá ijie imá tjeṭoan ch'án

1 Tí chaxín tí Cristo nchexraxinkaonrá la tí chaxín Cristo tjuàhará ch'án nchecháhará ch'án la tí chaxín tí Nchakuen ch'án xrikoará la tí chaxín nohará kixin tikonóahará ch'án

2 la nchechànará kixin jnkokoá chrók'uejokoará kichuárá la ko jnkokoá chrótjuèhérá kichuárá la ko jnkokoá chrókjuenkayáxin nchakuanrá la ko jnkokoá xra chrókjuich'erá.

3 Chrókjuenkayáxinhyará chrókuéṭoanrá la ko chrókjuínchehnkehyará. Náhi. Chrók'ónará chojni t'ṭoanhya. Chrók'uikonrá éxi antsí tjeṭoan tí í so sín, a ntá kánhyó tjeṭoan tí jahará.

4 Ninkexró chrókjueyá tí nkehe kuènte jehó. Náhi. Chrókjueyárá tí nkehe chrókjuinkĩtsa tí í so chojni.

5 Jahará chrókjuenkayáxinrá éxi kjuenkayáxin Cristo Jesús.

6 Jehé ch'án chónṭa ch'án kaín kjuachaxin kuènte Dios la kjónté xíkaha la tjinkakonhya ch'án chrókjuíncheyóhe ch'án éxi Dios.

7 A ntá kuítóhe ch'án ntáha tí kjuachaxin k'uéchónṭa ch'án la k'óna ch'án ijnko chojni ntoa chjasintajni la ko kjuích'e ch'án xra.

8 La éxi ijnko chojni k'ueṭoanhya kjuák'e ch'án la kjuínchexiteyéhe ch'án Dios kaín asén ch'án kixin ik'uén ch'án, mé k'uénxin ch'án tí ntacruz.

9 Méxra Dios imá kjuikosáyehe tí jehé ch'án la ko kjuínchek'in ch'án ijnko ihnié imá tjeṭoan.

10 Kixin ntá tsinhin kaín chojni tí ihnié Jesús ntá ts'ejóxin toch'in sín, mé tí sín siín nkaya nkajni la ko tí sín siín chjasintajni la ko tí chojni siín chrínkí nche.

11 La ko kaín xín chojni tsochrónka sín kixin Jesucristo mé Ìnché sín mé xíkaha tsjikosáyehe sín It'èni Dios.

Tí sín tinkáchónki Cristo tóyóhē éxí xrohi t'inkaséyanxín chjasintajni

12 Jahará kichó ni imá tjuahará la xráxín kjuinchexiteyànará tí k'uék'ejóni. A ntá ijie la chrókjuinchexiteyànará kjónté ikjín tjén. Chrókuítóéhyará tí nkehe tsjanjon kjuachón la chrók'uayakonhénrá jnkojína

13 kixin Dios ntaxraxinkaonrá sých'erá tí nkehe jína tjinkaon ch'án.

14 Kaín xra ch'erá la chrókóninkákuénhyará kíchuará la ko chrókjóntahyará kíchuará

15 kixin tsókohya ninkexró tsontáchro kixin jahará la chon-tará jie. Kixin jahará la mé tí xjeen Dios chróchontahyará jie, la tjejorá tí síin tí sín jínahya tjasin jie. Na ntá jahará chrók'uinkaséyanxín tí jehe sín éxí tí konotsé t'inkaséyanxín tí chjasintajni sítié.

16 Méxra jahará chrók'uayakonhénrá jína tí tan tjanjon kjuachón. Tí xíkaha chrókjuinchexiteyará jnkojína ntá tió tsi Cristo tsöchéhe asenná kixin xíkaha xra tjejoch'erá kixin ntá tsonòna kixin jehya ó chónkó kjuak'ékjit'a xra.

17 Kjónté chrók'uénxiān la éxí nkehe chrókjuanchatóxixínrá Dios chrók'uikonrá tí janhan. Mé xíkaha chrókjuintaxín tí nkehe chróchjehérá ch'án kixin tinkachónkirá ch'án, la ntá mé janhan mé tsöchàna la ko tjínkavan kixin kaín rá xíkaha chrók'uayéhérá kjuachéhe.

18 Méxra chrókócháhará jahará kjaxin la chrók'uayéhérá éxí tí kjuachéhe chonta.

Ch'ín Timoteo la ko ch'ín Epafrodito

19 Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'ín Timoteo tsjijitsjehe ch'án tí jahará kixin ntá tsöchàna tsinhan nkexrí tjejorá.

20 Kohya í jnko nkexro chrókjuenkayáxín éxí tí janhan la ko chrókóxakonhen kixin jahará chrók'uejorá jína.

21 Kaín tí í so sín tjeyá sín tí nkehe tóxrjínhìn sín ó la jehya tí nkehe tóxrjínhìn Jesucristo.

22 A ntá jahará ó nohará kixin ch'ín Timoteo ó kjuakoxin ch'án kixin jína asén ch'án kixin jehe ch'án kjuít'akian ch'án xra kjuakoni tí tan jína. Éxí ijnko xjanna xíkaha kjuínkítsana ch'án.

23 Mé xíkaha tjínkavan tsochr'an ch'án tsjijitsjehe ch'án tí jahará tió tsonòna nkexrí tsji tí xra kuèntana.

24 La ko kjaxin chonhan kixin Ìnchéni tsjinkítsana kixin tjoka tsjasán kjaxinna.

²⁵ **A** ntá kjaxin tónhen asenná kixin t'ichjánxín tsochr'an kichó ni Epafrodito tsiji ch'án tí tjeorá. Jehé ch'án mé jnkokoá ch'ekoni ch'án xra kjónté nínkakönhenni chojni. Jahará k'uéchr'anrá ch'án ntihi kixin jehé ch'án tsjinkitsana ch'án kaín nkehe tjínkavan.

²⁶ Imá tóxakonhen ch'án tsjijitsjehé ch'án tí jahará kixin ó nohe ch'án kixin tsíkinhínrá kixin k'uéníhi ch'án.

²⁷ Chaxín k'uéníhi ch'án ó mero chrók'uen ch'án, a ntá Dios kuikonóehé tí jehé ch'án kjánchó jehya jehó ch'án, kjaxin kuikonóana Dios tí janhan kixin kánhyó chrók'uavá.

²⁸ Méxra tjínkavan tsochr'an ch'án kixin ó nõna kixin tsocháhará ts'ikonrá ch'án inaá la ko xíkaha janhan í kánhyó chrók'uavá.

²⁹ Imá chrókócháhará chrókjuiji ch'án kixin jehé ch'án mé ijnko kichó ni tinkáchónki Ìnchéni la ko chrókjuikosáyehérá ch'án éxí chrókjuikosáyehérá kaín tí í so sín éxí jehé ch'án.

³⁰ Jehé ch'án ó mero chrók'uenxín ch'án tí ch'ehe ch'án xra Cristo. Mé siín kjuaxikaon chrók'uenxín ch'án kixin jehé ch'án kjuínkitsana ch'án kixin jahará xitjahya ts'inkará tsjínkitsará tí janhan.

3

Tí nkehe chaxín sínkí

¹ **A** ntá ijie, kichó ni, chrókócháhará kixin jahará la kuènte Ìnchéni. **A** ntá tí janhan la xrahya tsokjateé tsokjian tí nkehe ó kjian kixin tíha la chrókjuinkitsa tí jahará.

² Chróchontará cuidado tí sín ch'e jínahya éxí koniá la tóchrít'ò sín cuérpóé sín.

³ **A** ntá tí chojni chaxín chóna xroye la mé tí jeheni kixin jeheni chaxín xraxinkakonxínni Dios kjuachaxién Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpóéni chrókóchrínjinni.

⁴ **A** ntá janhan kjaxin jína chróntáxrjan kixin chrókóchrít'ò tí cuérpóé chojni. Ninkexró antsí chróchóna kjuachaxin kixin chrókuitekaon tí nkehe a.

⁵ Janhan mé tsíkana xroye tí k'uéchonta ijní yaon la ko janhan mé tikiníxian tí sín israelita la tsík'axrjeníxinna tí sín tsík'axrjeníxin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxí tinkáchónki tí sín fariseo.

⁶ **A** ntá imá k'uénínkakonhan k'uéchonkíha tí sín tinkáchónki Jesús la ko imá kjuíntaxiteyáha tí ley la kohya ninkexró tsontáchro kixin chaxínhya tíha.

⁷ Ntá kaín tíha la tí ósé k'uékjenkayáxian janhan kixin sínkí tíha, a ntá ijie la tinkachónkia Cristo la ntá tí nkehe k'uékóxrjìnna k'uékjìt'a la ntá jie la ninkehó sínkíhya.

⁸ La kjaxin kaín xín nkehe t'íkuan éxí chónkó tíha kixin antsí má tjetooan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuíntak'itjáyan kixin ijie ó tinkachónkia Cristo la kaín xín tí nkehe k'uéchonta la t'íkuan éxí chjínínó ó kixin ntá xíkaha jína chrókjuak'ékian Cristo.

⁹ Chrókóchàna kixin jnkokoá chrók'uejókoni ch'án. Tjéyáhya kixin tí ley chrókjuìnxín ijíeni tí chrókjuìnchexiteyéheni. Náhi. Tinkachónkia Cristo la tsaáxinni kixin Dios la tsjakjìn tí ijíeni kixin tinkáchónkini ch'án.

¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tió xechón ch'án la ko tjínkavan tsjasótexinna éxí kjuasóte ch'án la ko kjónté chrók'uénna éxí k'uénxin ch'án

¹¹ kixin ntá tjínkavan tsjácha tsoxechónna ínaá.

Ch'ín Pablo tjínkaon chrókjuacha ch'án

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'án senó xíkaha.

¹³ Kíchóni, ntáxrjanhya kixin janhván kjuácha tíha. Náhi. Janhan mé ts'itjáyan kaín xín tí nkehe ó kuítóhe senó la t'ichjánxin kaín asenná tjichráha tí nkehe naxa t'itjáyan tsjácha.

¹⁴ Kixin xíkaha ntá chrókjuácha chrók'uayáha kaín tí nkehe jína tsjanjon Dios. Jehe ch'án la sinchexiteyá kaín tíha kixin tinkachónkia Jesucristo.

¹⁵ Kaínni tí tinkáchónkini Jesús kaín asénni la méxra xíkaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha.

¹⁶ A ntá t'ichjánxin chrók'uejóni éxí tí nkehe ó kjuachani.

¹⁷ Kíchóni, chrók'uejorá éxí kjuak'é janhan la ko chrótsjehérá nkexrí tjejó tí í so chojni tjejóch'e éxí kjuakoni kixin xíkaha kjuakoharáni tí jahará.

¹⁸ Nchónhya xrjankaxián senó la ntá xrjanka ínaá la imá tsjanka kixin síin nchónhya sín tjejó sín éxí níinkakonhen sín tí Cristo k'uénxin ntacruz.

¹⁹ Tí sín a mé ts'itjáyan sín. Tí dios kuénte sín la mé tí nkehe ntáchro asén sín ó la ko tjínkaon sín chrókjuìnchehnkexín sín tí nkehe chrókósuèxin sín. Jehó tjenkayáxin sín tí nkehe síin chjasintajni ó.

20 **A** ntá jeheni kaín ni la mé chojni kuènte nkajní la tjejóchónhenni kixin ts'inkajinxin nkaya nkajní tí nkexro tsaáxinni, mé Ìnchéni Jesucristo.

21 Ntá jehe ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhe éxí tí cuerpo náxrjón chónta ch'án. Tíha mé tsoxiteyá kjuachaxièn ch'án jíé kixin ó chónta ch'án kjuachaxin ts'etuenhen ch'án kaín xín nkehe.

4

Jnkochrín chrókócháhará kixin tinkachónkirá Ìnchéni

1 Jahará kichó ni imá tjuahará la ko imá tjínkavan chrókjuasántsjahará tí jahará kixin jahará imá nchechànará kixin jahará mé éxí ijnko nkehe ó kjuácha. Méxra jína chrók'uejorá chrókuinkachónkirá Ìnchéni kixin tjuahará kichó ni.

2 Xrjanóaha tjan Evodia la ko tjan Síntique kixin jnkokoá chrókjuenkayáxin sín kixin jehe sín la jnkokoá kichó sín kixin tinkáchónki sín Ìnchéni.

3 Jaha la jína k'uejóni kjuích'eni xra, méxra xrjanóaha tjínkítsa tí sín chjin kichó ni kixin jnkokoá chrókjuenkayáxin sín. Jehe sín kjaxin kjuích'e sín xra tió kjuakoni tí tan jína tsaáxinni. Koí tí ch'ín Clemente la ko í so sín kjuích'ekoni xra. Tí ihñié sín la ó ts'ínixín ts'ínixín ihñie chojni tsaá.

4 Nchechéhérá asánrá jnkochrín kixin tjejókoará Ìnchéni. Ínaá kjatée xrjanka nchechéhérá asánrá.

5 Kaín chojni chrókónohe kixin jahará la chojni jínar. Chróxráxinkáonrá kixin í séhya tsokjan Ìnchéni.

6 Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxinhánrá la kjaxin chrókjuancheherá ch'án kjuasáya.

7 **A** ntá jehe ch'án mé tsotjáhará kjuaxróxin. Jeheni ts-jachahyani tienxínni tí kjuaxróxin kuènte ch'án kixin imá ijié tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuèntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

8 Méxra tsjixixín tétuñhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xíkaha tjenkayáxinrá kaín xín tí nkehe náxrjón la ko tí nkehe tóxrjínhin Dios.

9 Chrókjuích'erá kaín tí nkehe kjuákohará la ko tí nkehe kuínhínrá xrjanka la ko tí nkehe kuétuñhánrá la ko tí nkehe

k'uikonrá kjuít'a, mé kaín tíha chrókjuinchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkitsa sín tí ch'ín Pablo

¹⁰ Inchéni imá nchechána kixin jahará xráxinkáonrá tí janhan inaá. Ntáxrjanhya kixin tsík'itjáyanhanrá tí janhan kixin jahará xitjahya k'uékjínkitsará tí janhan.

¹¹ Jehya kixin ntáxrjan tíha kixin imá t'ichjánxinna kixin janhan na ó kuàna kjuaxróxin tjén kjónté tí nkehe chonta ó.

¹² Janhan ó kuàna tjén kjónté nóana la ko kjaxin ó kuàna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántosénna.

¹³ Kaín xrá tsjácha sít'a kixin Cristo tsjinkitsana.

¹⁴ Kjánchó jahará jína kjuich'erá kixin kjuínkitsará kjuánjonrá nkehe t'ichjánxinna.

¹⁵ Tió sákjuíxián estado Macedonia la kjuankíxian kjuákua tí tan tsaáxinni inaá la jahóra tí nínko chjasin Filipos ichr'anrá chichaon k'uayáha kixin cháhará kjuákohará itén Dios.

¹⁶ Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuínkitsará tí nkehe k'uichjánxinna ntiha.

¹⁷ La jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará ántsí má chrókjuich'erá tí nkehe tjínkaon Dios kixin ntá ántsí chrókjuachará.

¹⁸ Ó k'uayáha kaín nkehe tsíkjánjonrá la ántsí itsjé chonta. Ó k'uayáha tí nkehe tsích'anrá mé tí nkehe kujkao ch'ín Epafrodito, la kaín tíha la ó tsjácha. Tíha la éxí yóhe ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjínhjin ch'án.

¹⁹ Tí Dios kuéntana mé tsotjáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjete la tsjanjon ch'án kixin jahará la tinkachónkirá Cristo Jesús.

²⁰ Kjuasáyé It'éni Dios jnkochrín. Mé xikaha tsoxiteyá. Amén.

Tsjixixín nixja ch'ín Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kíchó ni tjejókoni ntihi nixjahará sín.

²² Kjaxin kaín tí sín tinkáchónki Dios la ko tí sín ch'ehe xrá tí ch'ín t'etōan romano mé nixjahará sín.

²³ Tjáncháha kixin Inchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énnen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjeýána Jesucristo t'ahá ch'án xra kixin xikaha tjinkaon Dios, la ko kichó ni Timoteo

² mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tjejórá chjasin Colosas. Kjuasáyé It'éni Dios chrókuintayaonrá kixin kjuaxróxin chrók'uejórá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochrínin tjancheheni kjuasáya Dios la ko tjanchiani kixin chrókuinkitsa ch'án tí jahará mé jehe ch'án It'é Ìnchéni Jesucristo.

⁴ Ó kuínhinni kixin jína tinkachónkirá Ìnchéni Jesucristo la ko tjuèhéra kaín tí sín ó tsíkjinchetjóá Dios.

⁵ Mé xikaha tjejochonhénra kixin ts'ayéhéra tí nkehe chóna Dios tjen nkaya nkajní. Jahará la xikaha tjejochonhénra kixin tjejotinhínra tí tan chaxín kuènte Dios tsaáxinni.

⁶ Tí tan i mé kuínhin chojni la itsjé sín tinkáki tekaon sín la tinkák'ánki tí kjuachaxin kuènte Dios kuenté chjasintajni. Mé xikaha kónhen tió kuinhínra la ko kuítekáonrá kixin chaxín tjuahará Dios.

⁷ Tíhi mé kjuakohará kichó ni Epafras. Jehe ch'án la jnkokoá kjuích'ekoni ch'án xra kixin jehe ch'án la jína ch'ehe ch'án xra Cristo kixin xikaha tjinkitsa ch'án tí jahará.

⁸ Jehe ch'án mé kui ch'án ntihi chrónka ch'án nkexrí tjuèhéra kichuára kixin Nchakuen Dios tjinkitsa tí jahará.

⁹ Méxra xikaha tí yaon tió kuínhinni nkexrí tjejórá la títoehyani tjancheheni Dios kixin tsjinkitsa tí jahará kixin tsonohará jína nkexrí tóxrjínhin ch'án la ko tjanchiani kixin tsjanjon ch'án kjuachaxin kixin tsiénxinra kaín nkehe kuènte ch'án.

¹⁰ Tjancheheni ch'án kixin jína chrók'uejórá kixin tinkachónkirá Ìnchéni la ko chrókuítóéhyará chrókuich'era éxi tóxrjínhin tí jehe ch'án. Ntá jína chrókuachará chrókuich'era xra kuènte ch'án la ntá chrókónohará jína nkexrí tjen Dios.

¹¹ Tjanchiani kixin jehe ch'án chrókuinkitsa kixin chrók'uejórá fuerte kixin tí kjuachaxin jié kuènte ch'án kixin ntá chrókuachará la kjónté ichrén nkehe chrókónhanra la chrókóninkákonhyará.

12 La ko chrókócháhará chróchjehérá kjuasáya It'eni Dios kixin kjuanjon ch'án kjuachaxin kixin ts'áyéhēni tí nkehe tí tjen tí t'inkaséyan mé tí nkehe ts'áyéhē kaín tí sín tsíkjinchetjóá tí jehe ch'án.

13 Jehe ch'án mé kuakitsjekjanxinni ch'án tí sítie la ntá kjuanjon ch'án kjuachaxin ts'ejóni tí t'etōan tí Xjeen ch'án, tjuèhe ch'án.

14 Jehe ch'án kjuínchekaáni ch'án kixin k'uenyákonhēni ch'án la tí ijnié ch'án mé kjuenkā ch'án tí ijieni.

Kjuaxróxin ts'ejókoni Dios kixin k'uenyákonhēni Cristo

15 Éxi tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxin tjen tí naxā t'ónahya ninkehó.

16 Kjuachaxién tí jehe ch'án kjuích'énaxín Dios kaín tí nkehe siín nkajní la ko chjasintajni la ko kaín tí nkehe naxā t'ikonhyani la ko tí nkehe ó t'ikonni. Kjaxin kaín tí sín ángel t'etōan la ko chóna kjuachaxin la mé jehe ch'án kjuích'éna ch'án kixin sich'ehe sín ch'án xrā.

17 Cristo la ó xráxin tjen kjónté naxā t'ónahya ninkehó la jehe ch'án t'ayakonhen ch'án kaín nkehe siín kixin tí kjuachaxin kuènte ch'án.

18 La kjaxin jehe Cristo mé tí kja t'etuēnhen tí cuerpo mé tíha mé tí ninko. Jehe ch'án senó xechón ch'án kixin jehe ch'án mé ts'etuēnhen ch'án kaín nkehe siín.

19 Dios tjinkaon chróchjéhe ch'án tí Xjeen ch'án kjuachaxin éxi tí kjuachaxin chóna tí jehe ch'án.

20 Kjaxin tjinkaon Dios kixin kjuachaxién Cristo chrók'uixin kjuaxróxin nkuíxin mé chjasintajni la ko nkaya nkajní. Mé xikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

21 Jahará la ósé ikjín k'uék'ejorá la k'uéninkákonhénrá Dios kixin tí nkehe jínahya k'uékjich'erá. A ntá jie la kjuaxróxin tjejoará Dios

22 kixin k'uenyákonhánrá Cristo, kjuasóte tí cuérpoé ch'án. Mé xikaha kónhen ch'án kixin ntá tsjanjon ch'án tí jahará ts'áyéhē Dios kixin kjuíntatjóará ch'án, a ntá jie la chontahyará ninkehó jie.

23 Méxrā xikaha chrókuitoéhyará chrókuinkachónkirá Inchéni la ko chrókuitoéhyará tí nkehe tjejochonhénrá kixin ó kuinhínrá tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjínkítsa xrjanka xikaha.

Ch'ín Pablo ch'e ch'án xrā kuènte ninko

24 Méxrā ijie la tjasótexinna kixin tí jahará la chàna kixin xikaha mé tsjintaxín tjasóte janhan kixin tí nkehe t'itjáyan tí

naxa chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpóé ch'án.

²⁵ Mé xikaha Dios kjuéyána kixin sit'a xra kuente nínko kixin xikaha tí xra k'uețuanna ch'án kixin ntá jína chrók'uejoxinrá tí jahará kixin chrókjuintaxín chróxrjankaxián tí itan kuente Dios.

²⁶ Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án.

²⁷ Dios tjinkaon chrókjuinchenohe tí jehe sín tí nkehe tjemá náxrjón tjete ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénrá ts'ayéhérá tí kjuachaxin jíé kuente ch'án.

²⁸ Jeheni mé chronkaxínni nkehe kuente Cristo la nhexraxinkaonni kaín chojni la ko tjakoheni sín kixin chrókuienxín sín jína. Ntá jnkojnko sín chrók'uánkí kjuaxrexinkaon kuente sín kixin tinkáchónki sín ch'án.

²⁹ Méxra xikaha tí xra it'a la kaín asenná it'a xra tí kjuachaxián chjina Cristo.

2

¹ Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'ikonhya tí janhan.

² Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuèhe sín kichó sín. Mé xikaha chrók'uánkí kjuaxrexinkaon kuente sín chrókuienxín sín jína kixin ntá chrókónohe sín tí nkehe ninkexró k'uénoehya kuente It'éni Dios, mé Cristo tíha.

³ Jehe ch'án chóna kaín xín kjuaxrexinkaon kuente Dios la jehe ch'án mé nohe ch'án kaín nkehe.

⁴ Kaín tíha xrjanka kixin ntá ninkexró chrókjuít'ayahyará tí jahará kixin tí náxrjón chrónixja sín ó.

⁵ Kjonté tjenhya tí cuerpo kuéntana tí tjejorá la ntá nchakuenná la mé tjen ntiha kixin xráxinkavan tí jahará la chàna kixin t'íkuan kixin jína tjejorá naxa tinkachónkirá Cristo.

⁶ Méxra xikaha kuinkachónkirá Inchéni Jesucristo la mé xikaha jnkokoá chrókjuenkayáxinkoará tí jehe ch'án.

⁷ Éxí ijnko nta tsíkji nuée nínka mé xikaha chrókuinkachónkirá tí jehe ch'án éxí kjuakohará ch'án la ko chrókjuanchehérá Dios kjuasáya jnkochrín.

Cristo tjanjon ijnko ntia nixin

⁸ Chrókuítóehyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhí. Tjako sín tí nkehe tjenkayáxin

chojni chjasintajni ó la ko tjako sín tí kjuachaxin kuènte tí nkehe jínahya siín chjasintajni.

9 Kaínxín kjuachaxin chón̄ta Dios mé chón̄ta Cristo kjónté k'ón̄a ch'án chojni.

10 La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'et̄uēnhen ch'án kaín nkehe siín la ko t'et̄uēnhen ch'án kaín nch̄akuen t'et̄oan.

11 Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jnko xroye k'uayéhérá kjánchó jehya tí xroye kuènte tí cuerpo. Náhi. Kjuakj̄in ch'án tí j̄ie k'uékóxrj̄inhanrá la kjuíntakaárá ch'án, mé tíha mé tí xroye kjuanjon Cristo.

12 Tí kuíkiterá jahará mé x̄ikaha éxi xravákoárá Cristo. Ntá ó xechón tí jehe ch'án la kjaxinrá xechónrá kixin ó kuítekáonrá tí kjuachaxin kuènte Dios kixin Cristo la ó xechón ch'án inaá.

13 Jahará ósé la éxi tsík'en asánrá k'uék'ejorá kixin tí j̄ie k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxi xechónrá kixin Cristo kjuats̄en tí j̄ie chontará.

14 Mé Dios kjuats̄en ch'án kaín tí nkehe tsík'et̄oan ch'án ósé kjuachahyani nchexiteyáni la ko kjuats̄en ch'án kaín tí j̄ie k'uéchóntani kixin Cristo kjuák'enkáni ch'án tí ntacruz la x̄ikaha kjuats̄enxin ch'án tíha.

15 Cristo k'uenyákonh̄enni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchón̄ta tí nch̄akuen jínahya kixin jehe ch'án kjuínchesuèh̄e ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe siín nkaya nkajni

16 Méxra ninkexró chrókjontahyará kixin tí nkehe chrókjón̄terá o tí nkehe chrók'uirá o á tjíkosáyehérá tí yaon kia o tí nitj̄o n̄ixin o tí yaon t'ok'éheni.

17 Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha.

18 Méxra chrókuīt̄oéhyará kixin ninkexró chróntáchro sín kixin ts'it̄j̄ayanrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxi kotáchrién sín t'ikónxín sín la nchehnke sín kixin tí nkehe t'axrjen̄ixin kja sín ó.

19 A ntá jehe sín la chaxínhya tinkáchónki sín Cristo kixin jehe ch'án mé tí kja t'et̄uēnhen kaín ni la jehe ch'án mé ch'éna ch'án jnkokoá cuerpo kuènte ch'án kaín ni la nchek'ánki ch'án tí cuerpo kixin jehe ch'án t'ayakonh̄enni ch'án kixin x̄ikaha tjinkaon Dios.

20 A ntá jahará la ó k'uénkoará Cristo la kūtohérá tí nkehe k'uék'et̄oan kuènte chjasintajni ó. ¿A ntá nkekuènté naxa

tjejorá éxí tí chojni síin chjasintajni chrókjuin_uchexiteyará tí nkehe t'et_oan sín?

²¹ Mé xíkaha t'et_oan sín kixin jahará chrótsehyará tíha la chrókjóntehyará tí nkehe la chrókuákjáhyará nkehe.

²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjeníxin ikja chojni ó.

²³ Chaxín kixin jehe sín ntáchro sín kixin jína xíkaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérp_oé sín, kjánchó kaín tí nkehe ch'e sín xíkaha la chónkó kixin tjinkj_itsahya kixin chrókuít_ohe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxra chrókjuéyará tí nkehe síin nkaya nkajní kixin Cristo la ntiha tjetj_axin ch'án tí tja chjina Dios.

² Chrókjuenkayáxinrá tí nkehe síin nkaya nkajní. Chrókjuenkayáxinhyará tí nkehe síin chjasintajni.

³ Kixin jahará la ó ik'uenrá la ntá ijie la Cristo la ko Dios chón_tehe tí kjuachón kuèntará.

⁴ Jehe Cristo mé chontaxínrá kjuachón jahará la tió tsokjan tí jehe ch'án ntá kj_axinrá ts'ejókoará ch'án ntá ts'íkonrá tí kjuachaxin jie kuènte ch'án.

Tí ntja ntaxin la ko tí ntja nixin

⁵ A ntá chrókuít_oh_erá kaín tí jie tjenkayáxinrá chjasintajni. Ninkexró chrókjuasinko jie chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kj_axin chrócox_rjiénhya sín chróchón_ta sín itsjé nkehe kixin tíha mé yóhe tí chróx_raxinkaon sín tí nkehe tsíkjan_oya.

⁶ Méxra tí nkexro titekakonhya tí nkehe t'et_oan Dios la tsonín_kakonhen Dios tí jehe sín la sinchekjasóte sín ch'án.

⁷ Mé xíkaha k'uékj_ich'erá jahará tí ósé.

⁸ Méxra ijie chrókuít_oh_erá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kíchuará la ko tí nkehe jínahya t'axrjexín ir'vará.

⁹ Chrókjuich'iyéhyará kíchuará kixin ósé xíkaha k'uékj_ich'erá a ntá jie la ó chrókuít_oh_erá kaín tí nkehe ntaxin k'uékj_ich'erá.

¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxí tí jehe ch'án kixin jehe ch'án kjuí_uch'éna ch'án tí jahará. Mé xíkaha chrókjuixraká chróchoxínrá tí jehe ch'án jína.

¹¹ Jehya tjet_oan á chojni judío o náhi o á chojni tsíka xroye o náhi o á chojni tsíkj_ixin kjín o náhi o á chojni noehya o á

chojni ch'exón xr̄a o á chojni t'et̄oan. Tí nkehe t̄jetoan la tinkáchónkini Cristo la jehó ch'án t'et̄uēnhen kaín nkehe.

12 Dios la t̄juèhe ch'án tí jahará la tsikjeyará ch'án kixin tsinkachónkirá ch'án. A ntá jahará la ó k'ónará ijnko chojni n̄ixin la chrókuīkonóehérá kichuárá la jina chrók'uejorá la ko chrókjūinchehnkehyará la ko chrókój̄jahyará la ko chrókóninkákonhyará.

13 Chrókóninkákuénhyará kichuárá la chrók'uit̄jáyahanrá ichrén j̄ē kjuasinhánrá í jnko chojni kixin Cristo la k'uit̄jáyenhen ch'án tí j̄ē kjuásinrá la k̄j̄axin jahará la x̄ikaha chrókjūich'erá.

14 Mé x̄ikaha chrót̄juèhérá kichuárá la jnkokoá chrókjuenkaýáxinrá.

15 Tí kjuaxróxin kuènte Cristo mé chrók'uet̄uēnhen asánrá kixin x̄ikaha kjuenkaýáxin Dios k'uíyahará ch'án kixin chrók'ónará jnkokoá cuerpo kuènte ch'án mé x̄ikaha chrókjuancheherá ch'án kjuasáya.

16 Tí tan kuènte Cristo jnkochr̄ixín chróchónta asánrá. Mé x̄ikaha chrókjuákohérá kichuárá la chrókjūinchechéhérá kichuárá kaín kjuaxrexinkaon jina. Chrótsjerá salmo la ko himno la ko canto kuènte Dios la chrókjuancheherá Dios kjuasáya kaín asánrá.

17 Kaín xr̄a chrókjūich'erá la ko tí nkehe chróntáchrórá la kaín táha chrókjuanchaxínrá ih̄njé Ìnchéni Jesús la chrókjuancheherá kjuasáya It'éni Dios kjuachaxién Jesucristo.

Jnkójina chrók'uejóko kichó tí sín tinkáchónki Cristo

18 Jahará chojni ch̄jin la chrókjūinchehexiteyéhérá tí x̄iyará kixin mé t'ich̄jánxin x̄ikaha chrókjūich'erá kixin tinkachónkirá Ìnchéni.

19 Jahará chojni ntoa la chrót̄juèhérá tí ich̄jiánrá la chrókóninkákuénhyará tí jehe tjan.

20 Jahará chánjanrá la chrókjūinchehexiteyéhérá it'ará la ko ìnará kaín nkehe chrók'uet̄oan sín kixin x̄ikaha mé tóxr̄jín̄in Ìnchéni.

21 Jahará it'é xjan la chrókjūinchekónínkakonhyará tí x̄jaanrá kixin tí x̄ikaha la chrókjūinchek'ávahyará tí jehe xjan.

22 Jahará chojni ch'exón xr̄a chrókjūinchehexiteyéhérá tí lámoará n̄ih̄i ch̄jasintajni. Jehya kixin tí t̄j̄ejótsjehe sín ó chrókjūich'erá xr̄a kixin ntá jina chrók'uejoxínrá. Náhí. Kaín asánrá chrókjūich'erá xr̄a kixin ó nohará kixin x̄ikaha ch'eherá Ìnchéni xr̄a.

23 Kaín nkehe chrókjūich'erá la kaín asánrá chrókjūich'erá xr̄a éxí chrókjūich'eherá xr̄a Ìnchéni la jehya kixin éxí chojni ó chrókjūich'eherá xr̄a.

²⁴ Ó nohará kixin Ìnchéni la sintakitonhanrá tí nkehe chóna ch'án kixin jahará ch'eherá Cristo xra la jehe ch'án mé chaxín Ìnchéni.

²⁵ A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tikonohya ninkexró ch'e tí nkehe jínahya.

4

¹ Méxra jahará lámorá la jína chrónixjehérá tí sín t'ahará xra. Chrórxáinkáonrá kixin kjaxinrá jahará chontará ijnko Dios tjen nkaya nkajní.

² Chrókuitoéhyará nixjehérá Dios la ko chrókuanchehérá ch'án kjuasáya.

³ Kjaxin tjanchehérá ch'án tsjinkitsa tí jeheni kixin tsjanjon Ìnchéni kjuachaxin chrókuinhin chojni tsochrónkaxínni tí itén Cristo. Tí xra k'uénoehya ninkexró mé tjéchinaxián jie.

⁴ Tsjanchehérá Dios kixin tsjinkitsa ch'án tí janhan kixin chrókianxian jína chrókuákuá éxí tjinkaon Dios.

⁵ A ntá jahará la jína chrókuákohérá itén Dios tí sín naxa tinkáchónkihya Ìnchéni kixin kánhyó tiempo siín kixin tsjakorá.

⁶ Chrónixjehérá sín jnkojína kixin chrókóxrjínhin sín la chrókónohará chrókuáteherá nkexrí tsixro jnkojnko chojni.

Kjuixin nixja ch'ín Pablo

⁷ Kíchóni Tíquico, mé ijnko nkexro jína tjinkitsa tí janhan ch'ehe Ìnchéni xra, mé tsjiji ch'án tsochrónka ch'án nkexrí tjén janhan.

⁸ Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará.

⁹ Jehe ch'án la ko kjaxin ch'ín Onésimo mé tjuèheni kíchó ni la ko jehe ch'án mé kjaxin jína ch'e ch'án xra, la mé tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sítónhen tí tjejóni ntihi.

¹⁰ Ch'ín Aristarco mé jnkokoá tjechinakian ch'án ntoechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína.

¹¹ Kjaxin nixjahará ch'ín Jesús, kjaxin tikitexín sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xra tjét'a la chrónkaxín sín nkehe kuènte tí kjuachaxin kuènte Dios. La tí sín a mé imá kjuínchechàna sín tí janhan.

¹² Ch'ín Epafras nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánrá. Jehe ch'án

jnkochrínín chrónóēhē ch'án Dios tjinkaon ch'án kixin kaín asánrá chrókuinkachónkirá Dios éxí tjinkaon ch'án.

¹³ Ó nòna kixin ch'ín Epafras la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis.

¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kichó ni tjejó chjasin Laodicea la kjaxin nixjehérá tjan Ninfas la ko tí sín tójnkotsé ntōe tjan.

¹⁶ Tió tsjixin s̄inchekuáxinrá tí xroon tsíkijji tí tjejorá ntiha la ichr'anrá xroon sátsji sinchekuáxin tí sín tjejó n̄inko chjasin Laodicea la ko kjaxin s̄inchekuáxinrá tí xroon tsíkijjihi tí jehe sín tió tsjiji tí xroon tí tjejorá.

¹⁷ Kjaxin chenkará ch'ín Arquipo kixin chrókjuinchexiteyá ch'án jína tí xr̄a tsíkjanjon Ìnchéni sich'e ch'án.

¹⁸ Janhan Pablo tjaná k̄jinxian tí palabra nixjahará. Jahará chróxráxinkáonrá kixin janhan la tjéchjina la Dios mé chrókjuintayaonrá. Amén. Ó tjen.

Xroon saoxín ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehę ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kíchó ni nınko chjasin Tesalónica kixin jnkokoá tinkáchónkini It'eni Dios la ko Ìnehéni Jesucristo. Kjuasáyé It'eni Dios la ko Ìchéni chrók'uejorá.

Tí sín ókjé chjasin mé kjuíncheyóhę sín tí sín Tesalónica

² Jnkoyaxón chjéheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkitsa ch'án tí jahará.

³ Tió nixjeheni It'eni Dios xraxinkaonni kixin kaín asánrá kuítekáonrá Ìnehéni, a ntá tjejoch'erá xra la ko imá tjuèhérá kichuára ntá jnkokoá tjejochonhénrá tsokjan Ìnehéni Jesucristo.

⁴ Kíchóni jahará, imá tjuahará Dios la ó noheni kixin jehe ch'án tsíkjayará ch'án tí jahará.

⁵ Na mé xikaha tió kjuújini chjasánrá kjuakoharáni tí tan jına nixin tsaáxinni chrónkani na jehya iténni ó. Náhí. Kjaxin kjuachaxién Nchakuen Dios kjuakoxinni la ko tí Nchakuen Dios mé kjuínchenoheni kixin tí itan kjuakoni la chaxin ntoá. Jahará la ó nohará jına kixin nkexrí k'uéjóni tí tjejorá kixin xikaha chrók'uejorá chrókjuákoxinrá.

⁶ Mé xikaha kjuíncheyóhérá tí jeheni la ko kjuíncheyóhérá tí Ìnehéni Jesucristo. A ntá tió kuínhínrá tí itén Dios ntá kaín asánrá kuinkachónkirá Ìnehéni la ko kóchahará kixin tí Nchakuen Dios mé t'etueñhen asánrá kjónté nchónhya nkehe k'uatsínkará.

⁷ Mé xikaha kjuákuexinrá kaín tí sín tinkáchónki Ìnehéni ntiha estado Macedonia la ko tí sín estado Acaya.

⁸ Jahará kjuákoxinrá tí itén Dios la jehya jehó estado Macedonia la ko tí estado Acaya kjuákoxinrá. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya í jnko nkehe naxa chróchronkani,

⁹ kixin ijie jehe sín mé tjejóchronka sín kixin nkexrí kjuújini chjasánrá a ntá kaín rá kjuánjonrá kjuachaxin k'uéjóni la ko kuítekáonrá tí itén Dios kjuakoharáni la ntá kuítóhérá kaín tí nkehe tsíkjanoya kixin ntá kjuankíxinrá kuinkachónkirá Dios tjechón chaxín.

¹⁰ La ko kja_xin tjejóchronka sín kixin jahará tjejochonhénrá tsokja_nxin nkaya nkajni tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasótexínhyani tí nkehe jínahya chrókjuasótexínni itsi.

2

Tí xra tsíkijch'e ch'ín Pablo tí chjasin Tesalónica

¹ Kónohará kaín rá kichó ni kixin jehya chónkó kjuíjini chjasánrá.

² Ó kónohará kixin senó tí sín chjasin Filipos k'uekjinchekjasóteni sín la ko k'uek'ántaxínhinni sín. Kjánchó Dios mé kjuínkítsa ntá chrakonhyani kjuakoharáni tí tan tsaáxinni kuénte Dios kjónté imá k'uéninkakonhenni sín.

³ Kónohará kixin jehya ntoáhya kjuakoharáni la ko jehya ijnko nkehe náxrjónhya kjuakoni la ko kjuít'ayahyaráni ninkehó.

⁴ Náhi. Dios mé kjueyá ch'án tí jeheni kixin chrókjuakoni tí tan tsaáxinni, mé xíkaha ntoá tjakoni. Jehya kixin chojni ó nchechéheni. Náhi. Nchechéheni Dios tí nkexro nohe nkehe tónhen asénni.

⁵ Ó nohará kixin kjuích'iyaxínhyani itan imá náxrjón kixin xíkaha chrókuakitsjexínni chichaon chrókjuachani. Náhi. Dios la ó nohe ch'án kixin xíkahya kjuích'eni.

⁶ Tjeyáhyani kixin chojni chrókjuikosáyeheni sín la á jahará la o í so chojni. Náhi, xíkahya ch'eni, kjónté chóntani kjuachaxin chrók'ue_tuanhanráni kixin chrókjuánjonrá nkehe chrók'uáyéheni kixin jeheni ch'ehe_ni xra Cristo.

⁷ Jnkojína k'uénixjaharáni k'uek'ejóni. Éxí yóhe ijnko ìné xjan t'àyakonhen xjeen kixin ts'ánkí xjan mé xíkaha jeheni k'uàyakonhanráni tí jahará.

⁸ Imá tjuàhará ntá jehya jehó tí itén Dios chrókjuakoharáni. Náhi. Kjónté chrók'uénxínni tí tjakoharáni kixin xíkaha imá tjuàhará.

⁹ Kichóni, chróxraxinkáonrá kixin tió k'uejóni chjasánrá la mé nchónhya xra kjuích'eni nchakotjin la ko tie ntá kjuachani chichaon k'ue_naxínni nkehe sineni kixin tjinkakonhyani kixin chrótjáharáni xra chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kixin chaxín jína k'uejókooaráni jahará chojni tinkáchónki Ìnchéni. Nijnko nkexro ts'ekahyani jie kixin ichrén nkehe jínahya chrókjuich'eni.

¹¹ Jahará ó nohará kixin kjuakoharáni la ko kjuínchechéheni tí jahará jnkojnkorá éxí ch'e ijnko it'é xjan tjuèhe xjeen ch'án.

¹² La ko k'uętuąnhanrání kixin jína chrók'uejorá éxí tjinkaon Dios chrók'uéjó tí sín tinkáchónki ch'án kixin jehe ch'án ó k'uíyąhará ch'án kixin chrók'uayéhérá tí kjuachaxin kuènte ch'án.

¹³ Méxra jnkochrín tjancheheni Dios kjuasáya kixin tió kuínhínrá tí tan jína kuènte ch'án kjuąkoğaráni na ntá kjuátsoanrá kixin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxitóxin ntjará.

¹⁴ Mé xikaha jahará kichó ni kjuasótíará kónínkakonhanrá tí sín chjasánrá éxí yóğe kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankíxin kuinkáchónki sín Ìnchéni ntá tí sín judío chjasén sín mé kjuankíxin sín kónínkakonhen sín chrók'óyán sín.

¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuích'e sín la kónínkakonhen sín kaín chojni. A ntá Dios la kóxrjienhya ch'án kixin xikaha kjuích'e sín.

¹⁶ A ntá tjinkaonni kixin chrókjuąkoğeni tí sín jehya judío tí tan jína chrókuaáxin sín a ntá tí sín judío tjinkakonhya sín chrókjuakoni. Na mé xikaha imá nchek'ánkí sín tí jię kuènte sín. A ntá xikaha kjuích'e sín ntá Dios sinchekjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kichóni, tió kuítóheni tí jahará a ntá kjónté ókjé k'uéjóni la k'uéxraxinkaonni kaín asénni tí jahará la ko imá tjinkaonni chrókjuijitsjeheni tí jahará inaá.

¹⁸ Na mé xikaha janhan Pablo itsjé veces mé tjínkavan chrókjuasántsjaha tí jahará, a ntá tí ch'ín Tsochren mé k'uínkakonna ntá xitjahya tsjasán.

¹⁹ ¿Nkehe tsoñhen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochèxinni tió tsi Ìnchéni Jesucristo kixin kuítekáonrá ch'án.

²⁰ Méxra jahará mé kóchèxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójína jehóni chrókuítóheni chjasin Atenas

² na ntá ichr'ánni tí kichó ni Timoteo a tsjijitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén Ìnchéni la ko sinchechéhe ch'án asánrá

³ Kíxin tsòxrxjéhya asánrá má kíxin tí kjuaxróxinhya tje-jot'atsínkará. Kíxin xíkaha ó nohará kíxin t'ichjánxìn ts-jasótéxínni tí xrà kuènte Ìnchéni.

⁴ Naxa k'uejóni jnkokoá ntiha la ó tjonkará kíxin kaín ni kjuaxróxinhya tsonhenni tsjasóteni. A ntá jie la ó nohará kíxin chaxín xíkaha kónhen.

⁵ Méxra imá kóxakonna ntá ichr'an kíchó ni Timoteo kjujitsjehe ch'án nkexrí tjejorá, á naxa tinkachónkirá Ìnchéni o ách'e ch'ín Tsochren chrókjuachroerá chrókuítóhérá tí ntie Ìnchéni a ntá chrókóchónkó kaín tí xrà kjuich'eni kjuakoharáni.

⁶ Na ntá ó kjanxìn ch'ín Timoteo chjasánrá Tesalónica chrónka ch'án kíxin jína tjejorá naxa tinkachónkirá Ìnchéni, la ko naxa tjejorá tjuèhérá kíchuará la ko chrónka ch'án kíxin xraxinkáonrá tí jeheni tjinkáonrá chrókjujitsjeheni tí jahará. Kjaxin jeheni xíkaha tjinkaonni chrók'uikonni tí jahará.

⁷ Mé xíkaha kíchó ni tjejót'atsínkani kjuaxróxinhya ntihi na ntá kjónté kóchéhe asénni kuínhinni kíxin kaín asánrá naxa tinkachónkirá Ìnchéni.

⁸ A ntá kuínhinni xíkaha kíxin jína tjejorá naxa tinkachónkirá Ìnchéni Jesús a ntá antsí kóchéheni.

⁹ Ntá imá tsjancheheni Dios kjuasáya kíxin xíkaha imá chéhe asénni kíxin tí jahará tinkachónkirá ch'án.

¹⁰ Tie la ko nchakotjin chronóeheni Dios kíxin tsjanjon ch'án kjuachaxin tsjijitsjeheni tí jahará inaá kíxin naxa t'itjayan iso nkehe chrókjuakoharáni naxa chrók'uitjára nkexrí jína chrókuinkachónkirá Ìnchéni.

¹¹ Tjejótjancheheni T'éni Dios la ko Ìnchéni Jesucristo kíxin chrókjuinkitsani ch'án chrókjujitsjeheni tí jahará

¹² la ko tjancheheni Ìnchéni kíxin chrókjuinkitsa ch'án tí jahará kíxin antsí má chrótjuèhérá kíchuará la ko chrótjuèhérá kaín xín chojni éxí yóhe tjuàhará.

¹³ Tjancheheni ch'án kíxin syntaxraxinkaonrá ch'án kíxin kaín asánrá chrókuitekáonrá ch'án kíxin ntá tsochóntahya asánrá ninkehó jie nkayakon It'éni Dios tió tsokjan Ìnchéni Jesús tsikao ch'án kaín tí sín ó tsikótjóá.

4

Nkexrí tóxrxjínhin Dios chrók'uejóni

¹ Jahará kíchó ni chronóaharáni la kontaxraxinkaonráni tí kjuachaxin ihnié Ìnchéni Jesús kíxin jína chrók'uejorá tinkachónkirá Ìnchéni éxí tjejoch'era jie kíxin éxí kjuakoharáni. Mé xíkaha jína sinchechéhérá Dios.

² Ó nohará tí nkehe kjuakuaxinrání kjuachaxin kuènte Ìnchéni Jesús.

³ Tí nkehe tjinkaon Dios kixin jína tjóá chrók'uejorá la ko chrókjuásinkoahyará jìe í jnko chojni chjin ókjé.

⁴ Jnkojnkora chrókónohará chróchontará jnkojnko ichjiánrá la ko jína chrók'uejorá chrótjuèhérá kíchuárá.

⁵ Jehya kixin chrókjuakérá asánrá tí nkehe jínahya chrókjuich'erá éxí ch'e tí chojni chónhya Dios.

⁶ Nijnkorá chrókjuich'iyehérá ichjién kíchuárá xikaha kixin Ìnchéni mé imá sinchekjasóte ch'án tí chojni xikaha sich'e mé xikaha kjuíntaxraxinkaonrání senó.

⁷ Dios mé k'uíyeheni ch'án kixin jína chrók'uejóni, jehya kixin naxa chrókjuasinni jìe.

⁸ A ntá tí sín chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhí. Chóntehya sín kjuasáyé Dios, tí nkexro kjuanjon tí Nchakuen chóntani.

⁹ A ntá tí tjuèhérá kíchuárá la í t'ichjánxinhya naxa chrókjinni tsochronkani kixin nkexrí chrótjuèhérá kíchuárá kixin jehe Dios mé tjetjakohará ch'án nkexrí chrótjuèhérá kíchuárá.

¹⁰ Xráxín xikaha tjejoch'erá tjuèhérá kaín tí sín kichó ni tjejó estado Macedonia. Kjánchó chronóaharání kichó ni kixin antsí má chrótjuèhérá kíchuárá.

¹¹ Tóxakonhanrá kixin kjuaxróxin chrók'uejorá. Jnkojnkora nohará nketí xra chrókjuich'exínrá tjára éxí k'uetuanhanrání.

¹² Na mé xikaha chrók'uikon tí sín chónhya Dios ntá chróchóntahará sín kjuasáya la ko chrók'uitjáyanhya ninkehó nkehe chrókuicháxinhanrá.

Itsi Ìnchéni Jesús

¹³ Kíchóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankàmara sín chrókóyóahyará tí sín tinkáchónkihya sín Ìnchéni naxa chónhya sín kixin chróxechón sín ínaá.

¹⁴ Kuítekaonni kixin ik'uén Ìnchéni Jesús la ko xechón ch'án ínaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani ti jahará tí nkehe kjuako Ìnchéni kixin tí naxa tjejóchónni tió tsi ch'án na kjónté naxa tsitónxinhyani ntia, naxa tsochónhenni tí sín tsík'en.

¹⁶ Jehe Ìnchéni mé ts'inkajinxin ch'án nkaya nkajní la ko itsen tsonixja ch'án kixin tí kjuachaxin jìe kuènte ch'án la ko ts'èya tí ángel t'etōan la ko tsontáchro tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín.

17 **A** ntá chr'éxin kaín xínni tjejóchónni la ko kaín xín tí sín tsíxechón mé jnkokoa tsochriinni kixin tí kjuachaxin jié kuènte Ìnchéni. **A** ntá xríkjan tjuj tsoxetani ch'án. Mé xíkaha ts'ejókoni ch'án jnkochrín.

18 Méxra xíkaha chrókjuinchechéxínrá kichuára tí tan i kixin xíkaha tsonhen tió tsokjan Ìnchéni.

5

1 **A** ntá tí yaon tsonhen tíhi kichó ni t'ichjánxinhya naxa tsokjinni í jnko nkehe tsinhínra.

2 Jahará ó nohará jína kixin titàya itsi tí yaon tsokjan Ìnchéni éxi yóhe chrókui ijnko xíchee tí tie a.

3 Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrínahya titàya itsi tí kjuaxikaon jié la ko kjuachrakon mé ts'itjáyanxín tí kjuachón chróchóna sín éxi yóhe ijnko tjan tjejá xrínahya titàya ts-jankíxin ts'óntáki tjan kixin sinchekokjíhi tjan xjeen tjan na mé jehe tjan xitjahya tsontácho tjan “Náhi”, mé xíkaha jehe sín chóntahya sín nkerí tsaáxin sín.

4 Ntá jahará kichó ni sítiéhya tjejorá ntá chróchrakonhyará tí yaon itsi Ìnchéni. Tí náhi chróchrakonrá éxi chrókui ijnko xíchee chrókjuintachrakonrá.

5 Ntá jie kaín rá mé tjejorá tí ntia t'inkáséyan. Jeheni la jehya tjejóni tí ntia sítié a.

6 Méxra xíkaha chrók'uejójua hyani éxi tjejójua tí sín í so na mé chrók'uejósjehe ni chrókjuenkayáxinni jína.

7 **A** ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a.

8 **A** ntá jeheni na tjejóni tí ntia t'inkáséyan t'ichjánxín kixin jína chrók'uejóni chrókjuasinhyani jié. Chrókuinkáchónkini Ìnchéni la ko chrótjuèheni ch'án. Ntá jeheni na Ìnchéni ts'ayakonhenni ch'án tsaáxinni ch'án éxi tí ch'ín soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejóchónhenni itsi Ìnchéni tsaáxinni ch'án na mé éxi tí ch'ín soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án.

9 Kjueyáhya Dios tí jeheni kixin chrókjuinchekjásóteni ch'án. Náhi. Kjueyá ch'án tí jeheni kixin chrókuaáxinni Ìnchéni Jesucristo.

10 Jehe Jesucristo mé k'uenyákonhenni ch'án kixin chrók'uejókoni ch'án jnkochrín kjónté naxa tjejóchónni o kjónté ó tsík'enni tió tsokjan ch'án.

11 Méxra xíkaha chrókjuinchechéhéra kichuára la ko chrókjuínkítasará kichuára kixin jína chrók'uejó sín éxi xráxín tjejoch'era.

Ch'ín Pablo mé nhexraxinkaon ch'án tí sín tinkáchónki Cristo

¹² Kíchóni chronoàharáni kixin chróchontehérá kjuasáyé tí sín tjejóch'e sín xr̄a kuènte Dios ntiha tjejójtitaón sín nt̄ja chrónka sín itén Ìnchéni.

¹³ Na mé chróchontehérá sín kjuasáya la ko chrótjuèhérahá sín má kixin tí xr̄a tjejóch'e sín. A ntá jahará kaín rá jnkojína chrók'uejokoará kíchuárá.

¹⁴ Méxr̄a tétuanhanráni kichó ni kixin chrókjuéntuéhérá tí sín tjinkakonhya sich'e sín xr̄a la ko chrókjuínchechéhérá asén tí sín kóxr̄jé asén sín la ko chrókjuínk̄itsará tí sín nax̄a noehya sín jína la ko chrókóninkákuénhyará ninkexr̄o.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákōxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejtjenkayáxinrá.

¹⁶ Méxr̄a nchechéhérahá asánrá jnkochr̄ixín.

¹⁷ Chrókjuitoéhýará chrónixjehérá Dios jnkochr̄ixín.

¹⁸ Kjónté ichrén nkehe chrókónhanrá la chróchjehérá Dios kjuasáya kixin x̄ikaha mé tjinkaon ch'án chrókjuákōxinrá kixin tinkachónkirá Ìnchéni Cristo Jesús.

¹⁹ T'ók'ankahýará tí xrohi t'inkáséyanxín Nch̄akuen Dios.

²⁰ Chontehérá kjuasáyé nkehe tjako tí sín kichó ni chronkaxín sín kjuachaxin kuènte Nch̄akuen Dios.

²¹ Chrótsjehérá jína tí nkehe tjejóch'e sín. A ntá tí jína na chrókuítekáonrá.

²² Chrókjuitoéhérá kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'àyakonhen ch'án nch̄akuanrá la ko asánrá la ko cuerpo kuéntará kixin tsochóntahya ninkehó j̄ie tió tsi Ìnchéni Jesucristo.

²⁴ Dios tí nkexro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjeh̄e ch'án sín la ko tjanchehe ch'án Dios kixin chrókjuincheyaon tí jehe sín

²⁵ Kíchóni chrónóehérá Dios kixin tsjink̄itsani ch'án kaín ni.

²⁶ La ko nixjehérá kaín xín tí sín kichó ni ntiha tsehérá tja sín.

²⁷ T'et̄oanxínni tí kjuachaxin kuènte Ìnchéni kixin nchekuáxinrá tí xroon chr'anhánrá tsinhin kaín xín tí sín kichó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'in Silvano la ko ch'ín Timoteo ikjinni tí xroon i chr'anhánrá kichó ni n̄nko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo.

² Kjuasáyé It'éni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoexín ch'án tí ijíe chojni tíó tsokjan Ìnchéni Cristo

³ Kichóni chrókjuancheheni Dios kjuasáya jnkochrín kixin tí jahará. Na mé jína x̄ikaha chrókjuich'eni kixin tinkák'ánkí tí tinkachónkirá Ìnchéni Jesús la ko tinkák'ánkí tí tjuèhéra kichuárá tjejorá ntiha.

⁴ Ntá chéheni chenkaní tí sín kichó ni kaín tí n̄nkoje Dios kixin naxa tjákoxinrá kixin naxa tinkachónkirá Ìnchéni kjónté siín chojni nínkakonhanrá la ko kjónté t'atsínkará itsjé kjuaxróxinhya.

⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuénte ch'án. Méxra x̄ikaha tjejtjasótexínrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie.

⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajní tsikao ch'án kaín tí sín ángel t'etōan kuénte ch'án na mé tsikao ch'án xrohi nene.

⁸ Mé x̄ikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína kuénte Ìnchéni Jesucristo chrókuaáxin sín.

⁹ A ntá tí sín kuítekakonhya mé tsjasóte sín jnkochrín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etōanxin ch'án.

¹⁰ X̄ikaha tsonhen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuínkáchónki sín ch'án la ts'ikon sín tí kjuachaxin jie kuénte ch'án. Mé x̄ikaha kjaxinrá jahará kixin ó kuítekaonrá tí nkehe kjuakoḥaráni.

¹¹ Mé x̄ikaha jnkochrín tjancheheni Dios kixin jína chrók'uejorá éxí tjinkaon ch'án chrók'uejó tí sín kjuéyá

ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkĩtsará ch'án kixin chrókjuachará ch'erá kaín tí xrá jína tjinkáonrá chrókjuich'erá kixin tinkachónkirá ch'án.

¹² Mé xikaha kaín xínrá tsjikosáyehérá tí ihnié Ìnchéni Jesucristo la ko jehe ch'án mé kjaxin tsjikosáyahará ch'án kixin tinkachónkirá ch'án. Mé xikaha kjuasáyé Dios la ko Ìnchéni Jesucristo kixin kuikonóeheni ch'án.

2

Tsonoxín ijnko ch'ín jínahya

¹ Kichóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni

² kixin chrókjuítóxinhýará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkójín nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxí jeheni tsíkjanjonni chrónka kixin xikaha tsonhen.

³ Títóehýará kixin jnkójín nkexro chrókjuít'ayahará xikaha. Naxa tsihya tí yaon ntá senó itsjé chojni tsonínkakonhen sín Dios, la ko tsonoxín ijnko ch'ín jínahya chóna jje, na ntá tíha mé tsjasóte jnkochrín.

⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxin ch'án nkaxenhen tí ninkoe Dios kixin jehe ch'án mé sich'éna asén ch'án éxí Dios tí jehe ch'án.

⁵ ¿Á xráxinkákonhyará kixin xikaha k'uéxrjanka senó tí naxa k'uéjóni jnkokoá?

⁶ Ntá jahará ó nohará nkehe tí kjuachaxin naxa chónthehe kixin naxa tjexrakáhya tí yaon tsonoxín tí ch'ín jínahya.

⁷ Ntá jie imó ch'e xra tí kjuachaxin jínahya. Kjónté naxa t'itjáyán kixin sáchrókjuí tí nkexro chónthehe.

⁸ A ntá tí ch'ín jínahya tsonoxín ch'án. Ntá tió tsi Ìnchéni Jesús ntá tí itén ch'án ts'axrjexín ir'va ch'án ó mé ts'enxín tí jínahya a kixin mé xikaha sinchek'itjáyánxín ch'án tí jínahya tí kjuachaxin jie tsíkəo ch'án.

⁹ Méxra tí ch'ín jínahya mé tsíkəo ch'án tí kjuachaxin kuènte ch'ín Tsochren la mé xikaha tsochóna ch'án kjuachaxin jie tsjakoxin ch'án sich'iyaxín ch'án tsjasin ch'án kjuaxroan ntoáhya.

¹⁰ Mé xikaha kaín nkehe jínahya sich'iyexín ch'án tí sín xráxín ts'itjáyán sín kixin chrohya sín chrókuitekaon sín tí tan chaxín ntoá chrókuaáxin sín.

¹¹ Méxra tsítóhe Dios tí jehe sín kixin tsitekaon sín kaín nkehe chaxínhya

¹² kixin ntá tsjasóte kaín tí sín kuítekakonhya sín tí tan chaxín chrókuaáxin sín na mé aṅtsí kóxrjínhín sín chrókjuasín sin jié tsjasótexín sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnehéni kixin tí tsíkjeýá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuítekáonrá.

¹⁴ Méxra xikaha k'uíyahaará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jié kuènte Ìnehéni Jesucristo.

¹⁵ Mé xikaha kichó ni, jína chrók'uejorá chrók'uitjáyanhyará tí nkehe kjuakoharáni tió k'uéjóni jnkokoá la ko tí nkehe chrónka tí xroon ikjinni k'uayéherá.

¹⁶ Ntá Ìnehéni Jesucristo la ko It'éni Dios na mé tí nkexro kjuasáyé ch'án tjuèhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnehéni

¹⁷ na mé sinchechéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kixin tsjinkĩtsa kaín ni

¹ Méxra kjuixixín chrónóaharáni kichó ni kixin chrókjuanchehérá Dios kixin chrókjuinkĩtsa ch'án tí jeheni kixin tjoka sáchrókjuikjakoni itén Ìnehéni nkuíxín kixin ntá tsinhin chojni la tsjikosáyehe sín ch'án éxí yóhe kuítekáonrá jahará.

² Kjaxin nixjehérá Dios kixin chrókjuinkĩtsani ch'án kixin kohya nkehe chrókónhenni tí siín chojni jínahya nínkakonhenni kixin kénhya sín tinkáchónki Ìnehéni.

³ Ntá Ìnehéni mé chaxín jína ch'án la jehe ch'án tsítóehya ch'án tí jahará naxa tsjinkĩtsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá.

⁴ Ó noheni kixin Ìnehéni la tsjinkĩtsa ch'án tí jahará kixin naxa sich'erá xra éxí k'uətuəhanrání.

⁵ Ìnehéni tsjinkĩtsará ch'án tsonohará kixin Dios la tjuahará ch'án la ko tsjinkĩtsará ch'án kixin chrókóninkákonhyará éxí kónínkakonhya Cristo.

T'ichjánxin chrókjuich'eni xra

⁶ Kíchóni t'et̄oanxínni tí kjuachaxin ihnié Ìnchéni Jesucristo kíxin chrók'uaxrjekjanxínrá tí sín kíchó ni tjinkakonhya sich'e xra la ko xrihya sín éxí kjuakoharáni.

⁷ Ó nohará kíxin nkexrí chrók'uejorá chrókjuákoxinrá éxí k'uéjó tí jeheni kíxin tí k'uéjókoaráni la jehya kíxin kjuich'ehyani xra.

⁸ Jehya kíxin kjóneni niotjé jnkojín nkexro ntá chrókjuenkahyani. Náhi. Kóxakönhenni nchakotjin la ko tie kjuich'eni xra kíxin ninkehó chóntiāxinhyani tí jahará kíxin chrókjuánjonrá tí nkehe chrókjóneni. Náhi.

⁹ Kjonté chóntani kjuachaxin chrókjuanchaharáni kíxin chrókjuínkĩsará tí jeheni kjánchó jeheni na kjuich'eni xra kjuakoxínni kíxin xíkaha jahará chrókjuich'erá xra.

¹⁰ Kíxin tí naxa k'uéjóni jnkokoá ntiha k'uet̄oanni kíxin: Tí nkexro tjinkakonhya ch'e xra la kjaxin chrókjonehya.

¹¹ Ó kuínhinni kíxin tjejorá jnkojínrá ninkehó xra ch'ehyará a ntá kjuach'ia ó xríkoará.

¹² A ntá tí kjuachaxién Ìnchéni Jesucristo t'et̄oanxínni la ko chrónoexinni tí sín a kíxin chrókóninkakonhya sín chrókjuich'e sín xra kíxin chrókjuacha sín chichaon chrók'uite tí nkehe chrókjone sín.

¹³ Ntá jahará kíchó ni, chrókóxrxjéhyará chrókjuich'erá tí nkehe jína.

¹⁴ A ntá tí tjen jnkojín nkexro titekakonhya tí nkehe t'et̄oanxínni tí xroon i la tsjehérá jína nkexro tíha la ntá chrók'uitohyará ch'án la ntá chrókósuèhe ch'án.

¹⁵ Kjánchó jehya kíxin chrókjuánjonkoará ch'án. Náhi. Chrókjuinchesraxinkáonrá ch'án jnkojína éxí ijnko chojni kíchó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochrixin kjonté ichrén nkehe chrók'uatsínkará. Jehé ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xíkaha chrókjuátsoanxínrá tí letra kaín carta tsíkjian.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énnen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi.

² Ikjian tí xroon chr'anhan jaha Timoteo. T'íkuan éxí xjanna tí jaha kixin jaha tinkachónkia Cristo Jesús. Kjuasáyé It'eni Dios la ko Ìnchéni Jesucristo chrókjuintayavan ch'án la ko chrókuikonóaha ch'án kixin kjuaxróxin tsjak'e jaha.

Chrókuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxí xrjannóaha tió sákjuia estado Macedonia la mé jaha chrókuitoaha tí chjasin Éfeso la ntaha chrókuétuènhén iso tí sín ntiha kixin chrókuakohya sín tí nkehe ntoáhya.

⁴ La ko chrókuétuènhén sín kixin chrókuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkĩtsahya kixin sinchexiteyéheni Dios kixin tinkáchónkini ch'án.

⁵ Tí nkehe tjinkaonni la chrótjuèheni kichó ni kaín ni kixin ó kótjóá asènni la ko ó noheni kixin jína tjenkayáxinni la ko kaín asènni tinkáchónkini Cristo.

⁶ Iso sín la kjuíchròe sín kixin itjo tí nkehe chónkó.

⁷ Tjinkaon sín chrók'óna sín maestro chrókuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jína tí chrokuakoni éxí tjinkaon Dios.

⁹ Ó noheni kixin tí sín tjasinhya jie t'ichjánxienhya sín tí ley tsík'etoan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jie la ko tí sín chóntahya kjuasáyé Dios la ko tí sín t'óyán it'é la ko ìné sín la ko kaín tí sín tjàya.

¹⁰ La ko tí sín tjasinko jie ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakonhen tí nkehe jína tjakoni.

¹¹ Tí nkehe tjakoni mé chaxín tí tan jína sinchekaá chojni la tí Dios tjetoan mé k'uetuanna kixin tsjàkua tíha.

Ch'ín Pablo kjuanchehe ch'án kjuasáyé Dios

12 Tjáncháha kjuasáyé Ìnchéni Jesucristo kixin imá kjuinkĩtsana ch'án la ko k'uikon ch'án kixin jina sīt'aha ch'án xra ntá chjina ch'án tí xra i.

13 Mé xikaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkíha sín la ko chrók'oyán sín. Kjónté la Dios imá kuikonóhehe ch'án tí janhan kixin ó nohe ch'án kixin k'uékinkachónkihya janhan tí jehe ch'án la ko k'uénonahya nkehe tí xra k'uékjit'a.

14 Méxra Ìnchéni antsí má kjuíncheyaonna kixin ntá kjuanjon ch'án kjuachaxin kixin tsinkachónkia ch'án la ko tsotjuaha ch'án. Mé xikaha kaín ni chóntani tí kjuachaxin tinkáchónkini Cristo Jesús.

15 Tíhi mé chaxín la kaín ni chrókuitekaonni. Ikui Jesucristo chjasintajni kixin sinchekaá ch'án tí sín kjuasin jie. Ntá janhan mé antsí má kjuásian jie.

16 Kjónté xikaha kjuít'a la Dios antsí má kuikonóana ch'án tí janhan kixin xikaha kjuakoxin Jesucristo kixin kóninkakonhya ch'án. Mé xikaha tsjákuaxian kaín nkexro tsitekaon tí jehe ch'án kixin tsochónta sín kjuachón jnkochrín.

17 Ntá jnkochrín tsochónteheni kjuasáyé tí Rey t'etoan. Jehe ch'án mé ijnko nkexro xráxín tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

18 Timoteo, éxí xjanna t'ikuán tí jaha, la kaín tí xra i tjaha kixin tsjanjonkoa tí jínahya la tsjacha kixin tinkachónkia jina Ìnchéni la ko tjenkayáxian tí nkehe jina. Mé xikaha sinchexiteyá tí nkehe kuínhín senó kixin tí sín kichó ni chrónkaxín ihñié Dios.

19 Í so sín la kjuenkayáxinhya sín tí jina ntá kjuíchròe sín kuítóhe sín tí nkehe tinkáchónki sín.

20 Mé xikaha kónhen ch'ín Himeneo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xikaha ts'itja sín kixin í ts'ántaxíenhya sín Dios.

2

Nkexrí chrónixjeheni Dios

1 A ntá saoxín la xrjanóaha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkĩtsa ch'án kaín xín chojni.

2 Chrókjuanchia sín kixin Dios imá chrókjuinkĩtsa ch'án kaín tí sín t'etoan la ko tí sín gobierno kixin ntá kjuaxróxin ts'ejóni la ko sinchexiteyéheni Dios la ko ntoá ts'ejóni.

3 Xikaha mé imá jína la tóxrjnhin Dios, mé tí nkexro tsaáxinni.

4 Jehe ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsonohe chojni tí nkehe chaxín ntoá.

5 Mé itjen jnkokoáxón Dios la ko itjen jnkokoáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasintajni.

6 Jehe Jesucristo mé k'uenyákonhenni kaín xinni, kjuenkayákonhen ch'án ijieni kixin tsaáxinni ch'án. Táha mé xiteyá tí tsintáχρο Dios ósé kixin xikaha tsonhen ch'án.

7 Méxra tí xra mé kjueyána Dios kixin tsíkjákoḡa tí sín jehya judío kixin tsinkáchónki sín Jesucristo la ko tsonohe sín tí nkehe chaxín. Janhan mé tinkachónkia Cristo la xrxanka tí nkehe chaxín mé t'ayahya.

8 Méxra tjínkavan kixin kaín tí sín ntoa mé chrónixjeḡe sín Dios la chrókjuaya sín tja sín la chrókótjóá asén sín la ko chrókónínkakonyha sín la ko chrókjuehya sín kjuanínkaon.

9 A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxihi sín nkehe tjete xroxrjo náxrjón la ko chrók'uitsahya sín ika imá tjete.

10 Íchá jína kixin tí chojni chjin chrókjuich'e sín tí xra jína éxi chrókjuich'e kaín tí sín tsíkjinchetjóá Dios.

11 Tí chojni chjin t'ichjánxin chrókuinhin sín itén Dios la chrónixjahya sín la ko chrók'uetoanhyha sín.

12 A ntá janhan tjánjonhyha kjuachaxin kixin chojni chjin chrókjuako tí nchónhyha chojni siín la ko tjánjonhyha kjuachaxin chrók'uetuēnhen sín chojni ntoa. Jehe sín la tání sín chrók'uejé sín

13 kixin saoxín la Dios kjuích'éna ch'án tí ch'ín Adán la ntá chr'éxin kjuích'éna ch'án tjan Eva.

14 A ntá ch'ín Adán la ninkexró kjuích'iyehya ch'án. Náhi. Tí tjachjin mé tsíkitekakonhen tjan tí nkexro tsíkjich'iyehhe tjan ntá xikaha xrankixixín k'uixin jie.

15 A ntá tí chojni chjin la kjónté xikaha kjuích'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuēhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejé tí sín t'etuēnhen tí nínko

1 Ijnko nkehe chaxín tjonka. Tí nkexro tjinkaon sich'e xra kuēnte nínko mé imá jína xra tjinkaon ch'án.

2 Tí ch'ín chrók'uetoan mé ntoá chrókjuak'e ch'án kixin konyha nkexro chrók'ueka ch'án jie la ko kjaxin chróchónta ch'án

jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchónta ch'án kjuasáyé ch'án la ko kjaxin jína chrónixjehē ch'án tí nkexro tjiji ntōe la ko kjaxin chrókónohe ch'án tí nkehe chrókjuako ch'án.

³ La ko kjaxin chrókókoanhya ch'án la ko chrókjuehya ch'án kjuanínkaon la ko kjaxin chrókóxrjienhya ch'án kixin chrókjuacha ch'án nchónhya chichaon. A ntá chrókójiehya ch'án la ko kjuaxróxin chrókjuak'e ch'án la ko chrókóxrjienhya ch'án chróchónta ch'án itsjé chichaon.

⁴ Jehē ch'án mé kjaxin jína chrók'uetuēnhen ch'án tí sín tjejó ntōe ch'án la ko chrókjuentuēhe ch'án xjeen ch'án kixin tsitekaon xjan la tsjikosáyehe xjan it'é xjan.

⁵ Tí tsjachahya ch'án ts'etuēnhen ch'án tí sín tjejó ntōe ch'án la çntá nkexrí chrók'uetōan ch'án tí nínko kuēnte Dios?

⁶ Íchá jína kixin jehya ijnko nkexro na ntá k'uixenhen chrókjuako kixin tí nkexro na ntá k'uixenhen la imá chrókjuinchehnke ch'án la ntá chrókjuasin ch'án jie éxí kjuasin ch'ín Tsochren ijie senó.

⁷ Kjaxin t'ichjánxin kixin kaín xín tí sín naḡa tinkáchónkihya Ìnchéni mé tsochónta sín kjuasáyé tí ch'ín t'etōan a. Tí náhi la ts'eka sín ch'án jie ntá tí xikaha la ch'ín Tsochren tsjacha tsjachròe tí ch'ín a ntá tsjasin ch'án jie.

Nkexrí chrók'uejó tí sín tsjinkitsa tí xra kuēnte nínko

⁸ Kjaxin tí sín diácono ch'e xra kuēnte nínko la kjaxin ntoá chrók'uejó sín kixin chróchóntehe sín kjuasáyé chojni. Kjaxin t'ichjánxin kixin chrókjuinchexiteyá sín tí nkehe ntáchro sín la ko chrókókoanhya sín la ko kjaxin chróchóntiaxinhya sín itsjé chichaon chrókjuacha sín.

⁹ T'ichjánxin chrókónohe sín jína tí nkehe tinkáchónki sín kixin jehē sín chrórxaxinkaon sín á nchoxon tí xra ch'e sín.

¹⁰ Saoxín chrótsjehe kaín chojni á ninkehó jie chóntahya tí nkexro la ntá tí chaxín jína jehē ch'án la ninkehó jie chóntahya ch'án ntá jína ts'ixenhen ch'án tí xra kuēnte nínko.

¹¹ La ko kjaxin tí chojni chjin mé chrók'uejó sín jína kixin chróchónta sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchexiteyá sín kaín nkehe.

¹² Tí sín diácono la mé chróchónta sín jnkokoá ichjién sín la jína chrók'uetuēnhen sín xjeen sín la ko jína chrók'uetōan sín ntōe sín.

¹³ T'ichjánxin ijnko xra jína sich'e sín kixin ntá tsjacha sín ts'áyéhe sín ijnko nkehe jína tsjanjon ìnchéni la ko kjaxin tsosuehya sín tsochrónka sín nkexrí tinkáchónki sín Cristo Jesús.

Dios mé kjuínchenoheni tí nkehe k'uékienxínhyani

14 Tjínkavan tjoka chrókjuasántsjaḡa tí jaha kjánchó senó tsokjian tí xroon i.

15 A ntá tí tsoxrjenna isé ntá kjónté tsonoha nkexrí chrók'uejó tí sín naxa kjéhya Dios mé tí sín t'óna ninkoē Dios tjechón. Jeheni kaín ni mé tjejó't'ayakonhenni tí tan chaxín ntoá.

16 Ninkexró chróntáchronya kixin chaxínhya tí nkehe tinkáchónkini mé ijnko nkehe imá jié tíha la ninkexró k'uénoehya tí senó a.

Dios mé ikui k'óna chojni;

ikui ch'án kjuakoxin ch'án kjuachaxién Nchakuen Dios chóna ch'án kixin jína tí jehe ch'án.

La ntá tí sín ángel mé k'uikon sín ch'án

la kuenté chjasintajni mé ó kuínhin sín nkehe chrónka ch'án ntá itsjé sín kuítekaon sín ch'án.

Ntá Dios k'uáyéḡe tí jehe ch'án nkaya nkajní.

4

Tí sín kuítóhe tinkáchónkihya Cristo

1 A ntá ntáchro Nchakuen Dios kixin tí chjina tsjeje chjasintajni mé iso sín mé tsítóhe sín í tsinkáchónkihya sín Inchéni la ntá tsitekaon sín nchakuen tí jínahya sich'iyehe sín la ko tsitekaon sín tí nkehe tjako tí sín demonio.

2 Mé tsinhin sín tí nkehe tjako tí chojni tjuáhya la ch'ia sín. Kjónté imá tsjasin sín jié la í tsoḡuehya sín kixin éxí tsíchján tí tjenkayáxixín sín la í tjenkayáxinhya sín jína.

3 Jehe sín mé tjinkakonhya sín kixin chrókótehe chojni la ko kjaxin tjinkakonhya sín kixin chrókjóneni nto. A ntá jeheni ó noheni kixin Dios mé kjuích'éna ch'án kaín xín nkehe ineni la tjinkaon ch'án kixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni.

4 Méxra kaín xín tí nkehe kjuích'éna Dios la jína la kohya nkehe chróntáchroni kixin jehya jína sineni. Chrókjuancheheni Dios kjuasáya la ntá jína chrókjóneni

5 kixin tió tsoxraxinkaonni itén Dios la tsonixjeheni ch'án la ntá sincheyaon ch'án tí nkehe sineni.

Ijnko chojni jína ch'ehe xra Jesucristo

6 Jaha tjácohé tí sín kichó ni kaín tí nkehe i la ntá xíkaha imá jína sich'ehé xra Jesucristo la ko antsí tsjinkitsa ch'án ts'ánki kjuaxrexinkaon kuéntá tí tinkachónkia tí tan kuénté ch'án la ko naxa tjákua tí nkehe jína ó xráqoha.

⁷ Jaha mé tahya kuenté tí cuento chónkó la ko tí nkehe ntoáhya tinkáchónki iso sín. A ntá jaha la chrókuitoéhya chrókuinkachónkia Dios.

⁸ Tí chojni tsítán la jína tíha kjánchó antsí má tjetoan chrórxaxinkaonni Dios. Tíha la tsjinkĩtsa kixin jína xritjejóni ijje la ko kjaxin tsjinkĩtsa kixin ts'áyéheni kjuachón jnkochrínín tió tsokjan Ìnchéni.

⁹ Kaín tíhi mé chaxín la kaín chojni chrókuitekaon.

¹⁰ Mé xikaha kjónté t'ántaxínhinni chojni la jína ch'eni tí xra i kixin tinkáchónkini Dios tjechón. Jehe ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'ichjánxin tsétoan la ko tsjàkua.

¹² Jaha chrókuitoéhya kixin chrokjuanoá sín kjónté naxa ntasoyá. Chrókjuákoxián tí sín tinkáchónki Ìnchéni nkexrí chrónixja sín la ko nkexrí ntoá chrók'uejó sín la ko nkexrí chrójtuehe sín Dios la ko nkexrí chrókuitekaon sín Ìnchéni la ko nkexrí tjóá chrók'uejó sín.

¹³ Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sinchexraxinkávan kaín tí sín kichó ni la ko tjákohé sín.

¹⁴ Sinchek'itjáyanhya tí kjuachaxién Dios k'uayéhé tió tí sín t'etoan kuente nínko kjuachaxién Dios k'uejotja tja sín chrítaón ikjá.

¹⁵ Chrókóxakonhan chrókjuinchexiteyá kaín tíha kixin kaín chojni tsotsjehe sín kixin jína noha.

¹⁶ Chrókjuenkayáxian jína tí nkehe tjàkua kixin jína chrókjuak'e jaha, chrókjuinchexiteyá kaín nkehe la ntá tí xikaha sich'e la tsaá jaha la ko tí sín tjejótinhin tjàkua la tsaá sín kjaxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó tada. Náhí íchá jína chrónixjehé sín jnkójina éxí chrónixjehé it'á. La kjaxin tí sín ntasoá chrónixjehé sín éxí chrónixjehé kichuá mero.

² A ntá tí sín ó nána la mé chrónixjehé sín éxí chrónixjehé iná xikaha. Kjaxin tí sín tjarisoá mé jnkójina chrónixjehé sín éxí chrónixjehé kichuá mero la kjaxin chróchóntehé sín kjuasáya.

³ La ko kjaxin chrókjuínkĩtsa tí síchjin tsíkók'án la ko nchekitonhén sín nkehe sine sín tí chaxín kohya nkexro tsjinkĩtsa sín.

⁴ A ntá tí chojni chjin tsíkók'án chóna xjeen o chóna ìnté, a ntá tí jehe sín mé chrók'uitja sín chrókjuinkĩtsa sín kixin sine tí sín kjéhya sín. Tíha mé chrókjuenkaxin sín tí it'é, ìné sín kixin kjuínchek'ánkí sín, kixin xikaha mé jína tóxrjinhin Dios.

5 Tí tjan chaxín tsíkók'án na jehó tjan tjen tjan mé jehó Dios tinkáchónki tjan la imá chrónóehē tjan Dios tie la ko nchakotjin.

6 A ntá tí sín tsíkók'án ixri sín tjasin sín jiē la kjónté tjejóchón sín la éxí tsík'en sín xikaha tjejó sín.

7 Tétuēnhén tí sín kixin sinchexiteyá sín kaín tíha kixin tsokohya nkexro tsjanchia jiē.

8 A ntá tí nkexro tóxakuenhya kixin tí sín naxa kjéhya la ko kjaxin tóxakuenhya kixin tí sín tjejó ntōe ch'án mé xikahó tjakoxin kixin ninkehó tinkáchónkihya ch'án Dios. Mé xikaha antsí chóna ch'án jiē a ntá tí sín tinkáchónkihya Ìnchéni la kénhyó.

9 Tí ts'ínixín ihnié tí sín tsíkók'án la chrók'uínixín jehó tí sín chóna sesenta nánó la ko tí sín k'uéchóna sín jnkokoá xii.

10 Kjaxin chrókjuakoxin tjan kixin jína ch'e tjan xra la ko chrókjuakoxin tjan kixin jína kjuínchek'ánki xjeen tjan la ko kjaxin jína nixjehe tjan tí nkexro tjiji ntōe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkĩtsa tjan tí sín níhi la ko í so xra jína kjuích'e tjan.

11 A ntá chrók'uénixínhya ihnié tí sín tsíkók'án naxa tsjéhya nánó chóna kixin tsontácho asén sín kixin í jnko chojni ntoa tsotehe sín inaá la ntá tsítóhe sín ixra kuènte Cristo.

12 Ntá xikaha tsjasin sín jiē kixin sinchexiteyáhya sín tí nkehe tsintácho sín.

13 Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jína tí xikaha chrónixja sín.

14 Méxra tí sín tsíkók'án naxa tjarisoá sín la íchá jína chrókótehe sín chróchóna sín xjeen sín la ko chrók'uàyakonhen sín ntōe sín. A ntá tí xikaha la tí sín nínkakonhan la chrókjontahya sín tí jaha.

15 A ntá iso tí sín tsíkók'án ó kuítóhe sín tinkáchónki sín Ìnchéni kixin ch'ín Tsochren tsíkjachròe sín.

16 A ntá jnkojín chojni tinkáchónki Cristo ts'ikon sín kixin tsíkók'án tí síchjin kjéhya sín ntá t'ichjánxin tsjinkĩtsa sín kixin sine tí sín a kixin tsochóntahya sín tí nínko tsjinkĩtsa. Méxra jehó tí sín chaxín tsíkók'án chónahya nínkexró tsjinkĩtsa mé chrókjuintsa tí nínko.

17 Tí nkexro jína t'etōan xra kuènte nínko la jehe sín chrókjuacha sín la ko kjaxin antsí chrókjuikosáyehe chojni tí sín chaxín xra ó tjejóchronkaxin sín la ko tjako sín.

18 Kixin xroon itén Dios mé ntácho kixin: “Chrók'uéjójáhyará kampoxa ir'va tí koxinta tjejóch'e xra”, la ko kjaxin ntácho

kíxin: “Tí sín ch'e xr̄a la síin kjuachaxin chrókjuacha sín.”*

¹⁹ Chrókuaehya kuente jnkojín nkexro tsjikao kjuach'ia t'eka jie tí nkexro t'et̄oan xr̄a kuente n̄inko. T'ichjánxin tsonoxín yaá o iy'á sín tsochrónka kíxin chaxín chón̄ta jie tí nkexro a.

²⁰ Chrókjuéntuéhé tí sín tjasin jie nkayakon kaín sín kíxin ntá tsinhin tí í so sín kíxin tsochrakon sín, í tsjasinhya sín jie.

²¹ Tétuaxian kjuachaxién Dios la ko Ìnchéni Jesucristo la ko tí sín ángel kjueyá ch'án kíxin jnkokón tsjéntuéhé kaín chojni la ko jnkokón tétuenhén sín kaín tí nkehe xr̄janka.

²² Chrókjuéyáhya chjini jnkojín sín kíxin ts'et̄oan sín xr̄a kuente n̄inko kíxin tí chróchón̄ta sín jie la kjaxin jaha chrókuamá tí jie. A ntá jaha chrókuítōhé kaín nkehe jínahya.

²³ Jaha la jnkoyaxón tóníha tjoté tsaa. Jehya ìnt̄a ó chrók'uia. Kjaxin intsí xranvino chrók'uia ntá chrókuítōaxián jína.

²⁴ Tí ijie jnkojín chojni la t'ikonna noxín tí nax̄a kuítōexínhya ijie sín. A ntá í so sín nóxinhya tjasin sín jie kjánchó tíó tsjixixín la tsonoxín tí jie tjasin sín.

²⁵ Mé xikaha kjaxin ó t'ikonna kíxin iso chojni imá ch'e sín tí xr̄a jína. A ntá í so sín kjónté t'ikonhyani la xitjahya tsjak'emá sín tí nkehe jína ch'e sín.

6

¹ Tí sín ch'exín xr̄a mé t'ichjánxin tsochón̄tehe sín kjuasáya tí lamo kuente sín, kíxin ntá tí í so sín la ts'ántaxiēnhya sín ihnié Dios la ko ts'ántaxiēnhya sín tí nkehe tjakoni.

² A ntá tí sín ch'exín xr̄a la chón̄ta sín lámōé sín tinkáchónki Cristo la mé chrókuítōehya sín tsjikosáyehe sín tí lamo kíxin jnkokoá kichó sín. La mé antsí jína chrókjuinkitsa sín kíxin ó nohe sín kíxin tjinkitsa sín ijnko nkexro tinkáchónki Cristo la chrótjuēhe sín kichó sín. Jaha mé tjákehé sín kaín tíha.

Tí nkehe tinkáchónkini tsochèxinni

³ Iso sín tjako tí nkehe jehó sín tjenkayáxin sín la tóyóehya tí nkehe jína kjuako Ìnchéni Jesucristo la ko jehya tí nkehe tinkáchónkini.

⁴ Ó jehí nchehnke sín la nínkehó noehya sín. Tí ntoáhya nixja sín la tíha mé éxí ijnko chin chón̄ta sín la tíha mé tjixín tí kjuachjinoxínhin la ko tjanjonko kichó sín la ko t'ántaxínhin sín kichó sín la ko chón̄tehya sín kichó sín kjuasáya.

⁵ Mé tí sín la náxrjónhya tjenkayáxin sín la jnkochrínxín tjanjonko kichó sín la noehya sín tí nkehe chaxín. Mé tjenkayáxin sín kíxin tinkáchónki sín Ìnchéni kíxin xikaha chrókjuacha sín nchónhya chichaon, ichro sín. Jaha la chrókuítōhé tí sín xikaha ch'e.

* 5:18 Deuteronomio 25.4, Mateo 10.10; Lucas 10.7

⁶ Tí tinkáchónkini Ìnchéni la ijnko nkehe imá tjetaon la ko tjete tíha a ntá kjuaxróxin chrók'uejóni kjónté tí nkehe chóntani ó.

⁷ A ntá tí kokjìhini la ninkehó kuikohyani tí kuini chjasintajni la kjaxin tió ts'enni la ninkehó nkehe xitjahya sátsjikoni.

⁸ A ntá tí chóntani nkehe sineni la ko chóntani ikéni la kjónté táhó la chrókóchéheni.

⁹ A ntá tí sín tjinkaon sín imá chrókóríko sín mé tí sín a mé tsjichròe sín la lontì sín kixin xikaha tjenkayáxin sín, la mé ts'itjáyanxín sín tíha.

¹⁰ Tí imá tjuèheni chichaon la tíha mé nuèé kaín nkehe jínahya. Jnkójín chojni imá tjinkaon sín tsochónta sín chichaon ntá tsjichròe sín tsítóhe sín tsinkáchónki Ìnchéni la tíha mé imá sinchekjasótexín sín asén sín.

Jína tí nkehe tinkáchónkini

¹¹ Jaha mé tinkachónké Dios la títóhé kaín tí nkehe i. Chrókuak'e ntoá la ko kaín asán chróxráxinkávan Dios la ko chrókuinkachónkia ch'án la ko chrótjuéhé kíchua la ko chrókónínkákonhya tjoka la ko chrókuinchehnkehya asán.

¹² Tjanjonkoa kaín nkehe jehya tí jína la ko kaín asán tinkachónkia Ìnchéni kixin ntá chrókuacha chrók'uayéhé tí kjuachón jnkochrín kixin mé xikaha k'uíyaha Dios tí jaha. Jaha la ó tsíchronka kixin tinkachónkia Ìnchéni la ó kuínhin la ko k'uíkon nchónhya chojni.

¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé tétuanhan

¹⁴ kixin sinchexiteyá kaín tí nkehe t'etòan Dios kixin í chrókuínkíhya tí nkehe chrókuinkachónkia la ntá tsokohya ninkexró ts'eka jìe tió tsjixrakájia tí yaon tsokjan Ìnchéni Jesucristo.

¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chónta ch'án kjuachaxin ts'etòan ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Ìnché kaín chojni.

¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsochjina tí tjen ch'án. Nínkexró k'uíkonhya tí jehe ch'án la ko ninkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chónta ch'án kjuachaxin ts'etòan jnkochrín. Amén.

¹⁷ Tí sín chónta itsjé nkehe chjasintajni mé tétuenhén sín kixin sinchehnkehya sín la ko tétuenhén sín kixin tsochóntiaxinhya sín tí nkehe chónta sín kixin jnkochrínnya

tsochónta sín tíha. Íchá jína chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xikaha tjinkaon ch'án tsochéheni.

¹⁸ Tétuēnhén sín kixin chrókjuich'e sín tí nkehe jína kixin tí chaxín chrókóríko sín la chrókjuinkĩtsa sín kíchó sín la chrók'óxikeyehe sín tí nkehe chóna sín.

¹⁹ Mé xikaha chrókjuacha sín tí nkehe tjete kixin chr'éxin la jína chrók'uejó sín kixin chrókjuacha chróchóna sín tí kjuachón jnkochrín.

Kjuixixín k'uítuēnhen ch'ín Timoteo

²⁰ Jaha Timoteo t'ayakonhén tí xra la tiénhya tí nkehe ntoáhya nixja chojni. Ntáchro sín kixin imá nohe sín kjánchó chaxínhya tíha.

²¹ Iso sín ó xikaha ntáchro sín kixin imá nohe sín la ntá kjuíchròe sín í tinkáchónkihya sin Ìnchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo mé kjueyána Jesucristo t'ahá ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochónta chojni kjuachón jnkochrín tí tsinkáchónki sín Jesucristo.

² Ikjian tí xroon i chr'anhan jaha kichó ni Timoteo. T'íkuan éxi xjanna tí jaha mé imá tjuaha. Kjuasáyé It'eni Dios la ko Ìnchéni Jesucristo chrókjuintayavan ch'án la ko chrókuikonòaha ch'án la ko chrótjáha ch'án kjuaxróxin.

Chróchrónka ch'án kixin tinkáchónki ch'án Jesucristo

³ Xráxinkavan tí jaha tió níxjaha Dios nchakotjin la ko tie la ko tjétjáncháha kjuasáyé Dios kixin imá tinkachónkia ch'án. Jehe ch'án mé t'ahá xra kaín asenná éxi xikaha mé k'uékjich'e tí sín tsík'axrjeníxinna.

⁴ Xráxinkavan jnkochrín nkexrí tsjanka la tjínkavan kixin chrótsjaha tí jaha inaá kixin tsochéhe asenná.

⁵ Ó nõna kixin kaín asán tinkachónkia Jesucristo. Kjaxin náchria tjan Loida la ko ìná tjan Eunice mé saoxín kuinkáchónki sín Ìnchéni Jesús la ntá ó nõna kixin kjá kjaxin jaha xikaha tinkachónkia ch'án.

⁶ A ntá ijie ntáxráxinkávan kixin chrók'uitjáyanhya tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha.

⁷ Dios la kjuanjonhya Nchakuen ch'án kixin tsochrakonni. Náhi. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni.

⁸ Chrókósuàhya chróchronka kixin tinkachónkia Ìnchéni la ko kjaxin chrókósuàhya chróchronka kixin janhan tjéchjinaxián tí xrjanka itén ch'án. Kjónté la íchá jína chrókjuasótexián tí tjákua tí tan tsaáxinni kixin tí kjuachaxin kuènte Dios ó k'uayéhé.

⁹ Jehe Dios mé kuaáxinni la ko kjueyá ch'án tí jeheni kixin jína chrók'uejóni. La jehya tí xra jína kjuích'eni ntá chrókuaáxinni. Náhi. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxa xrankíxíxínya chjasintajni mé tsíkjenkayáxin ch'án tíha kixin jehe ch'án mé imá tjuèheni ch'án.

¹⁰ Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyan ch'án tí kjuachaxin k'uéchónta tí kjuach'én kixin kjuacha ch'án xechón

ch'án inaá. Chronkaxín itén ch'án nkexrí tsaáxinni ntá ó kónoexínni kixin tí kjuachón kjuakoxin ch'án mé xitjahya ts'itjáyan.

¹¹ Dios mé k'uetuanna sátsjixrjanka itén ch'án la ko kjueyána ch'án tsjáqoha tí sín jehya sín judío tí tan jína.

¹² Mé xikaha tjétjasótexinna kaín tí nkehe i la kjónté tosuànahya kixin ó choxian jína tí nkexro tinkachónkia. Mé ó nòna kixin chóna ch'án kjuachaxin ts'àyakonhenni ch'án tsjixrakájia tí yaon tsokjan ch'án. Méxra janhan tjaha ch'án asenná kixin ts'ayakonhen ch'án.

¹³ T'itjáyanhya tjákua kaín nkehe jína ó kjuákoha. Naxa titekávan la ko tjuèhé kichuára kixin tinkachónkia Cristo Jesús.

¹⁴ Kjuachaxién tí Nchakuen Dios chóntani jnkojnkonni mé t'àyakonhén jína tí tan tjákua kjuíntakitonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehe sín kuítona sín la ko kjaxin tí ch'ín Figelo la ko ch'ín Hermógenes.

¹⁶ Tjáncháha Ìnchéni kixin imá tsikonóehé ch'án tí sín tjejó ntøe tí ch'ín Onesíforo kixin jehe ch'án mé imá kjuínkítsana ch'án la ko kósuèhya ch'án ikui ch'án kjónté tjéchjina.

¹⁷ Tí nantá kjuíji ch'án chjasin Roma ntá kuítóehya ch'án kjueyána ch'án hasta k'uitjana.

¹⁸ Tjáncháha Ìnchéni kixin tí yaon itsi ch'án ntá chrókujkonóehé ch'án tí ch'ín a kixin jaha ó noha jína kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóexin ch'ín Pablo kixin jeheni éxí yóhe ijnko soldado jína kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjinkítsa kixin tinkáchónkini ch'án.

² Tí nkehe kuínhín kjuákua nkayakon nchónhya chojni mé xikaha chjehé tí xra tí sín jína choxian jína ch'e xra kixin ntá jehe sín mé xikaha chrókjuakohe sín í so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jína kuènte Jesucristo.

⁴ Kohya nijnko soldado jína ch'e xra chrók'uixenhen ókjé xra kixin t'ichjánxin jnkójínxón xra sich'e ch'án kixin éxí tjinkaon tí nkexro t'etuènen ch'án.

⁵ Mé xikaha éxí yóhe ijnko nkexro tsotsítán. Ntá tsjachahya ts'áyéhe ch'án nijnko nkehe tí sinchexiteyèhya ch'án tí sín t'etoan.

⁶ La éxí yóhe ijnko nkexro ch'e xra nonte ntá chóna ch'án kjuachaxin saoxín tsakja ch'án tí nkehe ts'óna.

⁷ Chrórxaxinkávan jína kaín tí nkehe xrxanka la ìnchéni mé tsjinkítsa tsiénxian kaín nkehe.

⁸ Xŕaxinkávan ḱixin Jesucristo la ó xechón ch'án. Jehé ch'án mé k'uaxrjeníxin ch'án ch'ín rey David. Tíha mé tí tan jína tsaáxinni tjétjákua.

⁹ Tí tan tjéxrjanka mé tjasótexinna. Tíha mé tjéchrontetoxínna cadena éxi ijnko chojni tsíkjàya la kjónté tí itén Dios la jehya tjechrontetoxín cadena.

¹⁰ Méxrà kjónté nchónhya t'atsínka tí janhan la ntáxiteyá ḱixin tí í so sín kjueyá Dios tsaáxin sín ch'án ḱixin tsochónta sín kjuachón jnkochŕixín ḱixin tinkáchónki sín Jesucristo.

¹¹ Tíhi mé chaxín;

Tí jehé ch'án k'uénxinni ch'án a ntá chr'éxín ts'ejókoni ch'án.

¹² La tí tsjasótexínni tí jehé ch'án la ntá kjáxin ts'áyéheni kjuachaxin kuènte ch'án ts'etòanni.

A ntá tí chrókjuinchemáni tí jehé ch'án na ntá kjáxin ch'án la xíkaha sich'e ch'án.

¹³ Kjónté nchexiteyèhyani ch'án la jehé ch'án tjenchexiteyá ch'án ḱixin Dios la xitjahya sich'ia ch'án.

Chrókjuich'eni tí xrà jína

¹⁴ Nchexraxinkávan sín kaín tí nkehe i. Dios tjetsjehe tétuènhén sín ḱixin chrókuítóhe sín tí nixja sín tjanjónxín sín ḱixin ó chónkó tíha la ninkehó sínkíhya. Tí xíkaha ch'e sín la sinchek'ítjáyán sín tí sín tjejótinhin.

¹⁵ Sích'e xrà jína ḱixin tsoxrjínhin Dios tí xrà tjech'e a. Ntoá chrókjuákua tí tan jína chaxín ḱixin ntá chrók'uichjánxínhya chrókósuàha.

¹⁶ La títòhé tí nkehe náxrjónhya la ko chónkó nixja iso sín ḱixin tí sín nixja xíkaha la antsí tsinkák'ánkí tí nkehe jínahya nixja sín.

¹⁷ Tí nkehe jehya jína tjako sín mé éxi yóhe ijnko iton sóa sítinkáchr'enka. Mé xíkaha tjako tí ch'ín Himeneo la ko ch'ín Fileto.

¹⁸ Jehé sín mé ó kjuixin kuítóhe sín tí ntía ntoá la ntáchro sín ḱixin ó kjuixin k'uátsínka tí tsoxechón chojni. Ntá xíkaha ch'iehe sín tí í so sín la tsjitóxinhin sín tí nkehe tinkáchónki sín.

¹⁹ Kjánchó tí sín tinkáchónki Dios éxi yóhe tí xrò xrankíxixín tjàt'ò xitjahya tsoxíka la chónka éxi ijnko sello tí itén Dios ntáchro ḱixin: “Ínchéni mé tjatsoan ch'án tí chojni kuènté ch'án”,* la kjáxin ntáchro ḱixin: “Kaín tí sín tinkáchónki Cristo mé t'ichjánxín chrókuítóhe sín kaín nkehe jínahya,” mé xíkaha ichro itén Dios.

²⁰ Ijnko nchia jié kuènte tí sín rico la síin vaso tsík'óna chica oro la ko vaso tsík'óna chica plata. La kjáxin síin nkehe tsík'óna

* 2:19 Números 16.5; Juan 10.14

ntachiso la ko nkehe tsík'óna nchetje. Iso la xṙā ó tsík'óna kuènte tí xṙā tjetooan la í so la tsík'óna kuènte tí xṙā tjetuanhya.

21 **A** ntá ijnko chojni chrókuítóhe kaín jiē chrókóyóhé éxí ijnko vaso tjóá jína kixin chrókuicháxinhin Ìnchéni. **A** ntá tí nkexro xíkaha chrókjuich'ehya tí nkehe jínahya kixin chrókuicháxinhin Ìnchéni tí xṙā jína.

22 **T**itohé kaín tí nkehe jehya tí jína tóxrjínhin í so tí sín ntasoá a. Chrókjuak'e tí ntja ntoá la ko kaín asán chrókuinkachónkia Cristo la ko chrótjuéhé kaín chojni la ko kjuaxróxin chrók'uejokoa kaín sín. Mé xíkaha chrók'uéjó kaín xín tí sín kótjóá asén mé kaín tí sín tinkáchónki Ìnchéni.

23 **J**aha chrókuahya kuèté tí sín lontj tjenkayáxinhya jína kixin jaha ó noha kixin xṙahya chrókjuanjonko kichó sín.

24 **A** ntá ninkexro ch'ehe xṙā Ìnchéni chrókjuanjonko kichó sín kixin jína chrókjuinkitsa kichó sín. Chrókónohe sín kaín nkehe jína chrókjuako sín la ko chrókónínkakuenhya sín kichó sín.

25 **K**aín asén sín jnkójina chrónixjehé sín tí sín titekakonyha kixin chróchónhen sín kixin Dios chrókjuinkitsa tí sín a chrók'uixinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín

26 **k**ixin t'ichjánxin chrókónohe sín nkexrí chrókuaáxin sín kixin ch'ín Tsochren tjinkaon chrókjuich'iyehé sín ntá chrókjuasin sín jiē.

3

Nkexrí ts'ejó tí chojni chjasintajni tí yaon tsjixixín

1 **T**'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni.

2 **T**í sín chjasintajni tsinkáchónkihya Ìnchéni mé imá chrók'uetooan sín jehó la ko imá tsoxrjínhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó dios.

3 **T**sotjuèhya sín kichó sín la ko tsikonóehya kichó sín la ko tsjonta sín kichó sín la ko ninkexró tsochrakuenhya sín la ántosén sín tsjasin sín jiē, la ko imá tsojiēhe sín la ko imá tsonínkakonhen sín kaín nkehe jína.

4 **J**ehe sín mé sinchekji kichó sín la ko tsjenkayáxinhya sín jína la ko sinchehnke sín. Tsojtinkaon sín tsjeyá sín tí nkehe ntáchro asén sín ó a ntá tsjeyáhya sín Dios.

5 **J**ehe sín la éxí chojni tinkáchónki Dios xíkaha ts'ejó sín. Kjánchó chaxínhya. Tsinkáchónkihya sín tí kjuachaxin kuènte Dios chaxín ntoá.

Méxṙā jaha la chrókuankíehya tí chojni ch'e xíkaha.

⁶ Iso tí sín a mé ixri sín t'ixenhen ntøe ókjé chojni la ch'iyehé sín tí chojni chjin lontj tjasin jie la nchexiteyéhe sín kaín tí ntáchro asén sín.

⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá.

⁸ A ntá éxí yóhe tí sín k'uékjinchexroan mé ch'ín Janes la ko ch'ín Jambres mé k'uéninkakonhen sín ch'in Moisés mé xikaha tí sín tjako ijie nínkakonhen sín tí nkehe chaxín ntoá. Imá jínahya tí kjuaxrexinkaon kuènte sín la ko titekakonhya sín tí nkehe chaxín tinkáchónkini.

⁹ Kjánchó tsjachahya sín sich'ia sín isé kixin kaín chojni tsonohé kixin tí sín a mé lontj sín kixin éxí xikaha tsikónhen tí yaá sín k'uékóninkakonhen ch'ín Moisés.

Tí nkehe kjuixixín k'uætuenhen ch'ín Pablo tí ch'ín Timoteo

¹⁰ A ntá jaha mé ó kuítekávan tí nkehe kjuàkua. Ó noha nkexrí kjuak'é janhan la ko ó noha tí xrá kjuít'a janhan. Ó noha nkexrí tinkáchónkia Ìnchéni la ko noha kixin tjokahya kónínkavan la ko noha nkexrí tjuahá chojni. Ó noha kixin kjónté kónínkaon chojni la kuitoahya tí xrá a

¹¹ kjónté chónkìna sín la ko kjuasótena. Ó noha nkehe kònna tí chjasin Antioquía la ko Iconio la ko Listra. Chrók'óyánna sín la kjuínchekjuasótena sín kjánchó Ìnchéni mé kjuínkìtsana kjónté kaín tí nkehe chrókònna.

¹² Kaínxín tí sín tjinkaon tjóá chrók'u'ejó sín nchexiteyéhe Cristo Jesús la t'ichjánxin tsjasóte sín.

¹³ A ntá tí sín jínahya la ko tí sín ixri ch'ia sín mé ts'óna sín antsí jínahya. Jehé sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'uítjá la ko tí nkehe ó kuítekávan. Jaha la ó noha tí nkexro kjuakoha.

¹⁵ Jaha la desde xjanntsia k'uítjá nkexrí nixja xroon itén Dios la tíha mé tónoexinni kixin Cristo Jesús tsaáxinni kixin tinkáchónkini ch'án.

¹⁶ Ntá kuenté xroon Biblia kjuachaxién Nchakuen Dios kjuínkìtsa tí nkexro ikjin la tíha mé jína tsoxrácuexinni tí nkehe chaxín la ko tíha mé jína tsjentuéheni la ko tsjinkìtsani tsonoheni nkexrí chrók'uejóni ntoá

¹⁷ kixin tí nkexro tinkáchónki Dios chrókónohé jína la ko chrókjuacha sich'e kaín tí xrá jína.

4

¹ Kjuachaxién Dios la ko Ìnchéni Jesucristo, tí nkexro itsi éxí injko rey la sinchekitøexín ijje kaín chojni tjejóchón la ko tí chojni tsík'en,

² mé tétuanhan chrókjuàkua itén Dios kaín asán kjónté á chrókuinhin sín o náhí. Nixjehé sín jnkojína kixin tsitekaon sín

la ko tjéntuéhé sín jnkojína. Chrókóninkákonhya chrókjuákohé sín.

³ Itsi ijnko yaon ntá tsotjinkakonhya sín tsinhin sín tí nkehe jína. A ntá sinchexiteyéhe sín tí nkehe ntáchro asén sín ó. Tsjeyá sín nchónhya maestro tsjakohé sín jehó tí nkehe tóxrjínhín sín chrókuinhin sín.

⁴ Méxra tsítóhe sín tí nkehe chaxín ntoá la ntá itsa sín kuèté kaín nkehe chaxínhya.

⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókjuákohé chojni itén Dios tsaáxinni mé xikaha sinchexiteyá jína tí xra chonta.

⁶ Ntá janhan ó kjuixraká tí hora tsjasótena la ko ó kjuixraká tí hora its'èn.

⁷ Ó kjuánjonkian jína kaín tí nkehe jínahya la ko ó kjuixinna tí xra kuèntana la ko kuítóahya jína kuinkachónkia Ìnchéni.

⁸ A ntá ijie la tí nkehe tsítonna mé tjechónhen kíxín jína kjuak'é ntihi. Tíha mé tsjanjon Ìnchéni tí yaon itsi ch'án. Jehe ch'án mé ijnko juez jína. Jehya kíxín janhván tsákjaá tí nkehe tsjanjon ch'án. Náhi, kjaxin kaín tí nkexro kuítekaon sin ch'án la ko chéhe sín tjejóchónhen sín tió tsi ch'án.

Ch'ín Pablo k'uetōan tsijitsjehe sín ch'án

⁹ Jaha chrókóxakonhan tjoka chrók'uinkatsjehé tí janhan

¹⁰ kíxín ch'ín Demas la kuítóhe ch'án tí janhan kíxín imá kóxrjínhín ch'án tí nkehe kuènte chjasintajni. Sátsíkji ch'án chjasin Tesalónica. Ch'ín Crescente mé sátsíkji ch'án chjasin Galacia a ntá ch'ín Tito sátsíkji ch'án chjasin Dalmacia.

¹¹ Jehó ch'ín Lucas naxa tjékian ch'án. Tjijkéyá ch'ín Marcos la tsjúkuana ch'án ntihi kíxín jehe ch'án mé jína tsjinkítsa ch'án tí xra chonta ntihi.

¹² A ntá ch'ín Tíquico mé kuétuānhan ch'án sátsji ch'án chjasin Éfeso.

¹³ Tió ts'inka ts'inkakuana tí ka t'ítsate kuítóha chjasin Troas ntóé ch'ín Carpo la ko kjaxin ts'inkakuana tí libro kuèntana la ko koí tí tjoé iko tsík'óna xroon.

¹⁴ Tí ch'ín Alejandro tí ch'ín ch'e xra chica mé nchónhya nkehe jínahya kjuich'ena ch'án. Kjánchó Ìnchéni mé tsjenkehe ch'án kaín nkehe kjuich'e ch'án.

¹⁵ Jaha mé tóxakonhan kíxín tí jehe ch'án kíxín imá nínkakonhen ch'án tí nkehe tjakoni.

¹⁶ A ntá tí saoxín k'uèya tí síxree tí kjuia tí tjejó sín la ninkexró kjuinkítsahyana. Kaín sín mé kuítōna sín janhván. Kjónté xikaha la tjáncháha Dios kíxín chrókuahya ch'án kuèntá kíxín xikaha kjuich'e sín.

17 Kjánchó Ìnchéni mé chaxín kjuínkĩtsana ch'án la kjuanjon ch'án kjuachaxin kixin tsjachana naxa jina tsjækua itén ch'án. Ntá kuínhin kaín tí sín jehya judío. A ntá Ìnchéni kjuínkĩtsana kixin kjónehyaana koxra.

18 Ìnchéni mé tsjinkĩtsana kixin naxa tsonnahya kaín nkehe jínahya. Jehé ch'án mé ts'ayakonna ch'án ts'ixanhan tí tjet'etoan ch'án nkaya nkajní. Kjuasáyé ch'án kixin xikaha jnkochrín tsoxiteyá. Amén.

Ch'ín Pablo kjuixixín nixja ch'án

19 Jaha nixjehé tí tjan Prisca la ko ch'ín Aquila la ko nixjehé tí sín siín ntoe ch'ín Onesíforo.

20 Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kixin kóníhi ch'án.

21 Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kíchó ni ntihi nixjaha sín jnkójina.

22 Ìnchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énnen ch'án tí ch'ín Tito

Ch'ín Pablo nixjehe tí ch'ín Tito

¹ Janhan Pablo mé t'aha xra Dios la ko tsíkjeýana Jesucristo kixin tsjákoḥa tí í so sín tsíkjeýa Dios kjaxin kixin ts'itja sín tsonohe sín kixin nkexrí chrókuinkáchónki sín tí nkehe chaxín.

² Ntá ts'ejóchónhen sín tsochónṭa sín kjuachón jnkochríxín. Dios la xitjahya sich'ia la kaín tí nkehe tsíchrónka ch'án ósé tí naxa k'ónahya chjasintajni la mé xíkaha tsonhen.

³ Ntá tí yaon tsíntácho Dios la mé jie ó xiteýa la ntá kónoxín tí tan kuènte ch'án. A ntá Dios tí nkexro tsaáxinni mé k'uetoan kixin sít'aha ch'án xra tsjáku itén ch'án.

⁴ Ikjian tí xroon i chr'anhan jaha Tito. T'ikuḡan éxí chaxín xjanna tí jaha kixin yóini tinkáchónkini Jesús. Kjuasáyé It'eni Dios la ko Jesucristo tí nkexro tsaáxinni, chrókjuintayavan la ko chrókuikonóḡa ch'án la ko chrótjáha ch'án kjuaxróxin.

Tí xra sich'e tí ch'ín Tito chjasin Creta

⁵ Kujtoḡa jaha tí isla Creta kixin jaha chrókuétuḡnhén tí sín siín ntiha kixin nkexrí chrók'uejó sín la ko chrókónoxín nkexro ts'etoan kuènte jnkojnko nṅko jnkojnko chjasin éxí tí kuétuḡhan jaha.

⁶ T'ichjánxin kixin tí nkexro ts'etoan xra kuènte nṅko la jína chrókjuak'e kixin kohya nkexro chrók'ueka jie, la ko chróchónṭa jnkokoá ichjién la ko tí xjeen sín chrókuinkáchónki Ìnchéni kixin tsokohya nkexro chrókjuanchia jie kixin jehya tí jína tjejóch'e sín, la ko kjaxin chrókójiḡehya sín.

⁷ Mé xíkaha tí nkexro ts'áyéhe tí xra ts'etoan xra kuènte nṅko mé ts'etoan nkexrí tsonhen xra kuènte Dios la ntá t'ichjánxin ijnko nkexro tsjenkayáxin jína, chrókjuasinhya jie. La chrókjuinchehnkehya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjeyá kjuanínkaon la ko chrókóxrjienhya sín chrókjuich'ia sín ntá chrókjuacha sín chichaon.

⁸ Kjaxin jína chrókjuak'e ch'án kixin tí tsjiji ijnko nkexro ntōe ch'án chrókjuanjon ch'án kjuachaxin chrókjuak'e tí nkexro a. La ko jína chrókjuak'e ch'án la ko jína chrókjuenkayáxin ch'án kixin ijnko nkexro ó tsíkjinchetjóá Dios la ko chróchónṭa ch'án kjuasáyé ch'án.

⁹ Kjaxin t'ichjánxin chrókuítóehya ch'án tí tan jína xrákoḡe ch'án kixin ntá jína tsjákoḡe ch'án í so chojni tí nkehe ntóá la

kjonté nkexro tjinkakonhya tsinhin la jína chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxí lɔnti sín mé xikaha ch'iyehé sín chojni.

¹¹ Tí sín a la chrók'uikjeheni ir'va sín kixin tjachròe sín nchónhya chojni kixin tjako sín tí nkehe jehya jína kixin chrókjuich'ia sín chrókjuacha sín nchónhya chichaon.

¹² Ijnko ch'ín kuènte chjasin Creta la mé tsíchronka ch'án nkexrí tjejó tí sín chjasén ch'án. Ntáchro ch'án kixin: “Kaín tí chojni chjasénni mé imá ch'ia sín la ko imá jiehe sín la ko imá kóchjinka sín la ko séhe sín”, mé xikaha chrónka ch'án.

¹³ Tí nkehé tsíchronka ch'án mé chaxín ntoá. Méxra antsi fuerte chrókjuéntuéhé sín kixin ntá jína chrók'uejó sín chrórxaxinkaon sín Dios.

¹⁴ Nixjehé sín kixin chrókuahya sín kuenté kaín tí nkehe tsík'axrjeníxin kja tí sín judío tjako la ko chrókuitekakonhya sín tí nkehe t'etɔan tí sín nínkakonhen tí nkehe chaxín.

¹⁵ Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. A ntá tí nkexro titekakonhya la tjuáhya kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín mé tjuáhya.

¹⁶ Ntáchro sín kixin chóxin sín Dios a ntá tí t'ikonni nkexrí ch'e sín ó noexínni kixin chaxínhya tíha la ch'ia sín. Jehé sín mé ntoáhya tjenkayáxin sín la ko jiehe sín la ko titekakonhya sín. A ntá tí xikaha ch'e sín la, ¿nkexrí chrókjuich'e sín tí xra jína?

2

Chrókjuako ch'ín Tito tí tan chaxín

¹ A ntá jaha chrókjuàkua éxí tí chrónka tí tan jína chaxín.

² Tjákohé tí sín ó táda kixin chrókókoanhya sín la ko jína chrók'uejó sín la ko chróchóna sín kjuasáyé sín la ko chróchóna sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kichó sín la ko chrókónínkakonhya sín kjónté tsjasóte sín.

³ A ntá kjaxin xikaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxin sín ijnko kjuaxrexinkaon jína

⁴ kixin xikaha chrókjuakuexin sín tí chojni chjin tjarisoá a kixin chrótjuèhe sín xii sín la ko chrótjuèhe sín xjeen sín

⁵ la ko chrókjuich'e sín xra jína la ko ntoá chrókjuenkayáxin sín la ko jína chrók'uàyakonhen sín nchia ntóé sín la ko chrókójna sín la ko chrókuitekakonhen sín xii sín. Tí xikaha chrókjuich'e

sín chrókjuinchexiteyá sín la kohya nkexro chrók'uántaxínhín tí itén Dios tinkáchónkini.

⁶ Kjaxin xíkaha chrókjuinchexraxinkávan tí sín ntasoá kixin jína chrók'uejó sín chróchóna sín kjuasáyé sín.

⁷ Jaha mé chrókjuákoéxian sín kaín nkehe jína la ko chrókjuákohé sín kixin ntoá chrók'uejó sín.

⁸ Jaha la chrónixja tí nkehe jína kixin kohya nkexró chrók'uántaxín la ntá xíkaha chrókósuèhè tí sín nínkaon la ntá kohya nkehe jínahya chróntáchro sín kuènte tí jeheni.

⁹ Tétuènhén tí sín xrich'exón xra kixin chrókjuinchexiteyéhe sín tí lamo kuènte sín la ko chrókójína sín la ko chrónixjankiehya sín tí nkexro ch'ehe sín xra

¹⁰ la ko kjaxin chrókueéhya sín kixin jehya ijnko chojni chëe tí jehé sín. Ntá kaín chojni chrók'uikon sín kixin tjakoxin sín kixin náxrjón tí itén Dios chrókuaáxinni.

¹¹ Kixin Dios mé kjuakoxin ch'án kixin nkexrí tjuèheni ch'án kixin jehé ch'án mé tsaáxin kaín chojni.

¹² Kjuasáyé Dios mé tjakoheni ch'án kixin chrókuítóheni kaín nkehe jië la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios.

¹³ Kjaxin chrók'uejóni jína kixin chrókóchéheni chrók'uejóchónhenni tí yaon kjuachaxiën Dios jié itsi Dios la ko Jesucristo tí nkexro tsaáxinni.

¹⁴ A ntá jehé ch'án mé k'uenyákonhenni ch'án kixin tjinkaon ch'án tsaáxinni ch'án kixin tsotjuáxin kaín jië chóntani kixin ntá jeheni mé ts'ónani ijnko chojni sich'ehe ch'án xra la ko tsoxrjínhinni sich'eni kaín xra jína tjinkaon ch'án.

¹⁵ Tíhi mé chrókjuákua la ko chrókjuinchexraxinkávan sín la ko chrókuétuènhén sín kjuachaxiën Dios. Chrókuítóéhya kixin ninkexró chrókókjoniéhya tí nkehe tjákua jaha.

3

Jína chrók'uejó tí sín tinkáchónki Cristo

¹ Chrókjuinchexraxinkávan sín kixin sinchexiteyéhe sín tí gobierno la ko tsitekaon sín ichrén xra ts'etöan tí síxreé kixin chrókjuich'e sín kaín xra jína ts'etöan tí sín a.

² La ko chrók'uántaxiënnya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxin sín kixin jehya ijnko chojni nchehnke la chrókjuikosáyehé sín kaín chojni.

³ Jeheni kjaxin ósé k'uélontini la ko k'uékitekakonhyani Dios. Chjini k'uék'ajini la k'uékóxrjínhinni kaín nkehe jínahya. La ko jehya jína k'uék'ejóni la ko k'uéchóntani kjuachjinoxínhin la ko k'uéchjinoxíenhenni í so chojni.

⁴ A ntá tí Dios tsaáxinni mé kjuákuexinni ch'án kixin jína ch'án la ko tjuèhe ch'án kaín chojni.

⁵ Jehé ch'án kuaáxinni ch'án la jehya kixin ichrén xra jína chrókjuich'eheni ch'án. Náhi, ó jehí kuikonóeheni ch'án la ntá kjuínchekaáni ch'án la ko kjuínchetjóáni ch'án. Ntá kokjihiní nixin kixin tí Nchakuen ch'án la mé k'uáyèxinni kjuachón nixin.

⁶ Kjuasáyé Jesucristo tí nkexro tsaáxinni ntá kjuínchekitonhenni Dios Nchakuen ch'án kixin tsochóntani kjuachaxin kuèté ch'án.

⁷ A ntá xikaha kjuasáyé ch'án kjuínchetjóáni ch'án kixin ntá tjejóchónhenni tí kjuachón jnkochríxín tsjanjon ch'án.

⁸ Kaín tíha mé chaxín. Tjínkavan kixin jaha chrókuétoan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkítsa kaín chojni.

⁹ A ntá jaha mé tìtohé tí sín tjachaxin kichó sín lontì sín la ko tìtohé tí nkehe tinkáchónki sín kuènte tí sín tsík'axrjeníxin sín la ko tìtohé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰ Jnkojin nkexro tjinkaon tsjixrónkaxin tí tójnkotsé nínko ntiha la nixjehé ch'án jnkojína senó la ko yóxin inaá ntá tí titekakonhya ch'án ntá tìtohé sátsji ch'án

¹¹ kixin ó noha kixin tí chojni xikaha a mé ntoáhya tjenkayáxin sín kixin jehó sín nchek'ánkí sín ijíe sín.

Tí nkehe k'uetóan ch'ín Pablo

¹² Tí tsétuanhan ch'ín Artemas la ko ch'ín Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsínkajia tí nchakuen kin.

¹³ Jína chrókjuínkítsa jaha tí ch'ín Zenas tí ch'ín nix-jayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanyha tí t'ichjánxinhin sín.

¹⁴ Ntá tí sín í so chrók'uitja sín nkexrí sich'e sín tí xra jína la ko chrókjuínkítsa sín kichó sín ichrén nkehe t'ichjánxinhin sín kixin chrókjuákoxin sín kixin jína tjejó sín.

Ó kjuixixín nixja ch'ín Pablo

¹⁵ Kaín tí nkexro tjékian janhan ntihi nixjaha sín jnkojína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyaonrá ch'án kaín rá. Amén. Ó tjen.

Tí xroon chr'énhen ch'ín Pablo tí ch'ín Filemón

Ch'ín Pablo nixjehe ch'ín Filemón

¹ Janhan Pablo tjéçjinaxián tí xra kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhe. Jaha mé tjuaha kixin jnkokón tjejóç'eni xra kuènte Dios.

² Kjaxin chrókuinhin kaín tí sín tinkáchónki Ìnchéni tójnkoçsé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxi tí jeheni.

³ Kjuasáyé It'éni Dios la ko Ìnchéni Jesucristo chrókjuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xráxín tjáncháha kjuasáyé Dios tí xráxinkavan tí jaha tí nixjaha Dios

⁵ kixin ó kujnhan kixin imá tinkachónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios.

⁶ Tjáncháha Dios kixin tsjinkitsa ch'án tí sín kuítekaon tió kjuákohé sín kixin ntá tsienxín sín jína nkexrí kaín tí nkehe chóntani kixin kjuíncheyaonni Cristo Jesús.

⁷ Imá chàna kixin ó nõna kixin jaha kichó ni imá tjuèhé tí sín kichuá ntiha la ko imá kjuínchechéhé asén tí sín tinkáchónki Ìnchéni.

Ch'ín Pablo chrónóçhe tí ch'ín Filemón kixin tsikonóçhe ch'án tí ch'ín Onésimo

⁸ Janhan na kjueyána Jesucristo t'aha ch'án xra méxra chonta kjuachaxin tsétuanhan jaha tí nkehe chrókjuiç'e.

⁹ A ntá íchá jína jehó xrjannóaha tsítekavan kixin jaha tjuèhé tí janhan. Janhan Pablo mé ó tádana la ko tjéçjinaxián tí xra kuènte Jesucristo.

¹⁰ Méxra xrjannóaha tsjinkitsa tí ch'ín Onésimo. Jehé ch'án mé t'íkuan éxi xjanna kixin kjuankixin ch'án tsinkáchónki ch'án Jesucristo tí tjéçjinakian ch'án ntihi.

¹¹ A ntá tí ósé ch'ín Onésimo mé kjuít'ahya xra jína. A ntá ijie ó nõna kixin imá jína sit'aha ch'án xra tí jaha la ko jína sich'ena ch'án xra kjaxin.

¹² Ntá ijie tsétuanhan ch'án tsjiji ch'án tí tjen jaha ínaá. Chrótjuèhé ch'án éxi chrótjuèhé tí janhan.

¹³ Janhan tjínkavan chrókuitonakian ch'án ntihi kixin chrókjuintasana ch'án chrínki tí chrókjuaç'e jaha kixin tjéçjinaxián tí itén Jesucristo.

14 Kjánchó tjínkəkonhya tsjáncháha xíkaha tí tjínkəkonhya jaha. Jehya kixin jaha chrókjuínkɪtsani kixin chrókuétuəŋhan xíkaha. Náhi. Jehí tjínkaonni éxi jaha tóxrjínhan chrókjuich'e.

15 Tí ch'ín Onésimo kuitəha ch'án iso yaon a ntá jie la tsochonta ch'án jnkochrín.

16 Ijie la jehya éxi ijnko chojni tsík'íná chrók'uikuan ch'án. Náhi. Ntá jie la éxi ijnko nkexro ch'e xra əntsí jína mé éxi ijnko kichua chrótjuèhé ch'án. Janhan na tjuəha ch'án kjánchó tí jaha la əntsí má chrótjuèhé ch'án. Jehya éxi chojni ó chrók'uikuan ch'án. Náhi. Chrók'uikuan ch'án éxi ijnko kichua kuente Ìnchéni.

17 Méxra tí chaxín t'ikuan tí janhan éxi kichó ni jnkokoə tinkáchónkni Ìnchéni ntá chrók'uayéhé ch'án éxi chrók'uayéhé tí janhan.

18 A ntá tí ichrén nkehe kuaáha ch'án o ichrén nkehe síkáha ch'án la janhan tsjénkəha tíha.

19 Janhan Pablo mé tjaná kjinxian tí xroon i na mé janhan tsjénkəha tíha. A ntá janhan tjínkəkonhya chrókjuintaxraxinkávan tí jaha kixin kaín tí nkehe tjasikəna tí janhan kixin kjuákohá jaha.

20 Méxra kichó ni tsotsenkávan sɪch'e tí nkehe tjáncháha chaxín tinkachónkia Ìnchéni. Mé xíkaha sɪnchechéhé əsenná kixin jaha mé kichó ni tinkachónki Cristo.

21 Méxra ikjian tí xroon i chr'anhan kixin ó nòna kixin jaha la sɪnchexiteyá tíha la ko ó nòna kixin jaha la sɪch'e əntsí má que tí nkehe tjáncháha jaha.

22 Kjaxin tjáncháha kixin tjéyá ijnko nchia tsjak'é. Tjéçonhan kixin jahará la nixjehérá Dios la ntá Dios chrókjuanjon kjuachaxin kixin chrókjuasəntsahará.

Kjuixixín nixja ch'ín Pablo

23 Kjaxin ch'ín Epafra mé nixjahará ch'án jnkojína. Jehé ch'án mé tjéchjinakian ch'án jnkokoə tí ntəéchiso ntihi kixin kjaxin tinkáchónki ch'án Cristo Jesús.

24 Ch'ín Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkojína. Jehé sín mé tjínkɪtsana sín tí xra.

25 Tjétjáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ **A** ntá tí imá ósé Dios mé nixjehe tí sín tsík'axrjeníxinni nchónhya veces kixin nchónhya nkexrí chrókiénxín sín, nixjaxin ch'án tí sín k'uéchrónka tí itén ch'án.

² **A** ntá jie tió tsjixixín Dios nixjaxin ch'án tí Xjeen ch'án, na mé Dios kjuích'éna ch'án kaín xín nkehe síin kixin kjuachaxién tí Xjeen ch'án, mé tí nkexro k'uáyéhe kaín xín nkehe.

³ Jehe ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxí tsjehe Dios xikaha tsjehe tí jehe ch'án. Jehe ch'án t'aykonhen ch'án kaín xín nkehe síin kixin tí kjuachaxin jie chóna tí tan nixja ch'án. **A** ntá kjuixin kjuínchetjóá ch'án tí jie chóntani, ntá sákjuí ch'án kjuák'etjaxin ch'án tí tja chjina It'é ch'án tí tjen ch'án t'etoan ch'án nkaya nkajní.

Tí Xjeen Dios imá t'etoan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuenhen tí sín ángel, kixin tsík'áyéhe ch'án tí kjuachaxin kuènte It'é ch'án, a ntá imá t'etoan ch'án, a ntá tí jehe sín la náhí.

⁵ Méxra Dios ntáchehya nijnko ángel kixin:

Jaha mé Xjanna,

janhan mé kjuít'ána tí jaha ijie.

la ko kjaxin ntáchrohya Dios kuènte nijnko ángel kixin:

Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ **A** ntá tió kui tí jnkokoá Xjeen Dios chjasintajni, ntá ntáchro Dios kixin:

Kaín tí sín ángel kuènte Dios chrókjuikosáyehe tí jehe ch'án.†

⁷ **A** ntá ntáchro Dios kuènte tí sín ángel kixin:

Tí sín ángel ch'éna ch'án éxí xrínto kixin nchakuen sín ó,

la ko tí sín ch'ehe ch'án xra la ch'éna ch'án éxí xrohinene.‡

⁸ **A** ntá ntáche ch'án tí Xjeen ch'án kixin:

Tí trono kuéntá itjen jnkochrín, jaha Dios,

la mé jaha mé ijnko nkexro t'etoan jína.

⁹ Jaha tóxrjínhan tí nkehe jína, a ntá ninkákonhén tí nkehe jínahya.

Mé xikaha tí Dios tsíkjejá jaha, la Dios kuéntá kjuíntacháha má, a ntá tí í so sín k'uájikoa la kánhyó.§

¹⁰ Kjaxin ntáchro kixin:

* **1:5** Salmo 2.7; 2 Samuel 7.14; 1 Crónicas 17.13 † **1:6** Deuteronomio 32.43

‡ **1:7** Salmo 104.4 § **1:9** 1.8-9 Salmo 45.6-7

Jaha Ìnchéni, tí xrankíxixín kjuich'éna chjasintajni,
la ko jaha kjuich'éna nkajní.

¹¹ Táha mé ts'itjáyan, a ntá jaha la tsjak'e jnkochrín.

Kaín tíha tsontaxín éxí iké chojni,

¹² éxí ijnko iké chojni xíkaha tsoxrát'o,

ts'ixinkí éxí ijnko iké chojni.

A ntá jaha la ts'ixitóxinhya jnkochrín tsjak'e,

a ntá tí kjuachón chonta jaha la nunca tsjejhya.*

¹³ Dios la ntáchehya nijnko tí sín ángel kuente ch'án kixin chrók'uejó sín tja ch'án chjina ntahó chrók'uetōan sín, tsjix-injian kaín xín tí sín nínkakonhen sín la chrókjuachahya sín chrók'uetōan sín.†

¹⁴ Kaín tí sín ángel mé nchakuen sín ó mé ch'ehe Dios xrā mé k'uítuenhen sín tsjinkítsa tí sín ts'áyéhe kjuachaxin tsaá sín.

2

Chrókjoniehyani tí nkehe tsaáxinni

¹ Mé xíkaha chrókjuenkayáxinni jína tí nkehe ó kuínhinni kixin chrókúitōehyani tí ntja ó kuákjani.

² A ntá tí tan tsíchrónka tí sín ángel ósé la mé tsíkónoxín kixin chaxín tíha. A ntá tí sín kuítেকakonhya sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín.

³ ¿Xá nkexrí chrókuaáni tí chrókuaahyani kuentá tí nkehe jie chrókuaáxinni? Jehé Ìnchéni tsíchrónka ch'án saoxín nkexrí chrókuaáxinni, a ntá chr'éxin tí sín tsíkinhin mé kjuakohe sín tí jeheni.

⁴ Méxrā Dios kjuakoxin ch'án kjuaxroan jie la ko kjuachaxin jie kixin chaxín tíha, la ko noexínni kaín tí kjuachaxiēn Nchakuen ch'án tsík'áyéheni éxí tjinkaon ch'án tsjanjon ch'án.

Jesucristo k'óna ch'án chojni

⁵ Dios la tsíchjéhya tí sín ángel kjuachaxin kixin chrók'uetōan chjasintajni chr'éxin éxí tí jie tjejónixjani.

⁶ Náhí. Éxí nixja xroon itén Dios chronkaxín kixin:

¿Xá nkexéhe tí chojni a, jaha It'eni Dios, kixin imá xráxinkávan tí jehe ch'án?

¿Xá nkexro tíha kixin imá tóxakonhan kixin tí jehe ch'án?

⁷ Jaha tsíkjich'éna ch'án éxí ijnko chojni t'etuanhya kjánchó kánhyó isé, a ntá tí sín ángel antsí má k'uéchóna sín kjuachaxin,

a ntá jie la imá kjuíkosáyehé ch'án;

⁸ la jaha tsíchjehé ch'án kjuachaxin kixin kaín nkehe ts'etuenhen ch'án.*

* 1:12 1.10-12 Salmo 102.25-27 † 1:13 Salmo 110.1 * 2:8 2.6-8 Salmo 8.4-6

Mé xikaha ntáchro tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuítøehya ninkehó nkehe chrókuitekakuenhya ch'án. Kjánchó naḡa t'ikonhyani kixin á kaín nkehe titekakonhen ch'án.

⁹ Kjánchó ó noheni kixin Jesús la tsíkjich'éna Dios éxí chojni t'etøanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuèhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhe ch'án kjuachaxin náxrjón la ko Dios tjikosáyehe tí jehe ch'án kixin tí kjuasóte ch'án, ik'uén ch'án.

¹⁰ Kaín nkehe síin la kuènte Dios la ko tjejó kixin tí kjuachaxin kuènte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjen ch'án tí t'inkaséyan. Méxrā Dios kjuanjon Ìnchéni Jesucristo kixin tsjasóte ch'án kixin ntá jína kjuakoxin ch'án kixin ntá jehe ch'án tsaáxinni ch'án.

¹¹ Kaín tí sín tsíkótjóá la ko tí nkexro kjuínchetjóá na mé chóna jnkokoá It'é. Méxrā tí Xjeen Dios tósuehya ch'án tsontáchro ch'án kixin kíchó ch'án tí jehe sín.

¹² Éxí ntáchro tí xroon itén Dios kixin:
Tsochénkani tí sín kíchó ni kixin nkexro tí jaha,
tsjikosáyahani tsotsjeni himno tí tójnkotsékoni tí sín kíchó ni.†

¹³ Kjaxin ntáchro kixin:

Janhan titekavan Dios.‡

La ko kjaxin ntáchro ínaá kixin:

Ntihi tjékian tí xjeen Dios tsíkjanjon ch'án tsík'ayáha.§

¹⁴ A ntá tí xjeen chojni mé jnkokoá kíchó la k'óna nto la ko ijni; la kjaxin ch'ín Jesús xikaha tsík'óna ch'án nto la ko ijni kixin jína its'en ch'án kixin jína sinchek'itjáyan ch'án tí nkexro chóna kjuachaxin t'óyán chojni, na mé t'axrjexín kixin diablo tíha,

¹⁵ mé xikaha chrókjuinchekaá ch'án kaín tí sín chrakonhen sín tí kjuach'en, tjejó sín éxí t'ítuenhen sín kaín yaon tjejó sín.

¹⁶ Kjaxin kuihya ch'án kixin chrókjuinkitsa ch'án tí sín ángel. Náhi. Ikui ch'án kixin tsjinkitsa ch'án tí sín tsík'axrjeníxin ch'ín Abraham.

¹⁷ A ntá t'ichjánxin chrókóyóhe ch'án éxí tí sín kíchó ch'án kixin jína chrók'óna ch'án nchat'á t'etøan kuènte Dios la chrókujikonóeheni ch'án, ntá jína tsjatsen ch'án ijíé kaín chojni kixin k'uenyákonhenni ch'án.

¹⁸ Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí Jínahya kixin chrókjuasinhya sín jie.

3

Antsí tjetooan ch'ín Jesús, a ntá ch'ín Moisés la kánhyó

¹ **A** ntá kichó ni, jahará la tsíkótjóará, la mé Dios tsík'íyahasá ch'án kixin ts'ónará xjeen ch'án, a ntá chróxaxinkáonrá jina Cristo Jesús na mé jehe ch'án mé tí apóstol la ko tí nchát'á t'etooan kuènte tí nkehe tinkáchónkini.

² Tí ch'ín Jesús jina kuítekakonhen ch'án Dios, mé tí nkexro tsíkjeýá ch'án sich'ehe ch'án xra, éxí kjaxin ch'ín Moisés jina kjuích'e ch'án xra k'uáyakonhen ch'án ntøe Dios.

³ Dios antsí kjuikosáyehe tí ch'ín Jesús, a ntá ch'ín Moisés la kénhyó, éxí antsí tjikosáyehe sín tí nkexro kjuích'èna ijnko nchia, a ntá tí nchia la kénhyó tjikosáyehe sín.

⁴ Jnkojnko nchia k'óna kixin siín nkexro kjuích'èna, kjánchó Dios mé kjuích'èna kaín nkehe siín.

⁵ Ch'ín Moisés jina kjuích'e ch'án xra k'uáyakonhen ch'án tí nchia kuènte Dios. Tí xra kjuích'e ch'án mé k'uénixja ch'án kuènte tí nkehe tsontáchro Dios chr'éxin.

⁶ **A** ntá Cristo la mé Xjeen Dios tí jehe ch'án, ntá kjuínchexiteýá ch'án jina la t'ayakonhen ch'án tí nchia kuènte Dios, la tíha mé jeheni, kixin tí tsítóehyani ch'án la naxa tsinkáchónkini ch'án ntá tsochéheni kixin tí nkehe tjejóchónhenni.

Ts'ok'éheni tí tjen Dios

⁷ Mé xikaha éxí ntáchro Nchakuen Dios nixja xroon itén Dios kixin:

A ntá jie tí chrókuinhínrá tí nkehe ntáchro Dios,

⁸ chrókjuích'ehyará éxí kjuích'e tí sín ósé kuítekakonhya sín Dios tí yaon kjuích'ehe sín prueba Dios tí nteje.

⁹ **A** ntá ntaha tí sín tsík'axrjeníxinrá ósé kjuích'èna sín prueba, kjónté cuarenta nánó k'uíkon sín tí xra kjuít'a.

¹⁰ Méxra kónínkakonhan tí chojni a, ntáxrjan kixin: “Xrácín xrichoe asén sín, tjinkakonhya sín tsochóxin sín ntianá.”

¹¹ Méxra kónínkakonhan tí jehe sín, ntátjan sín kixin chaxín tsoxiteýá kixin ts'ixenhya sín ts'ok'éhe sín tí tjén janhan.*

¹² Kichóni, chrókóxakonhanrá kixin chrókókohya nijnko tí jahará chróchontará asánrá jínahya chrókuítóhéra Dios tjechón chrókuítekákuenhyará tí jehe ch'án.

¹³ Chrókjuínchechéhéra kichuará jnkojnko yaon naxa tjen tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójiahará.

* 3:11 3.7-11 Salmo 95.7-11

¹⁴ **A** ntá tí chrók'uejóni jnkójina hasta tsjixixín éxi kuinkáchónkini tí xrankíxixín, ntá síin kjuachaxin ts'ejókoni Cristo.

¹⁵ Mé xíkaha ntáchro kíxin:

A ntá jie tí chrókuinhínra jahará tí nkehe ntáchro Dios, chrókjuich'ehyará éxi kjuích'e tí sín ósé kuítekakonhya sín Dios.†

¹⁶ ¿**A** ntá nkexro tí sín kuínhin itén Dios, a ntá tí chr'éxin kuítekakonhya sín? ¿**Á** jehya kaín tí sín tsíkakitsjexín ch'ín Moisés tí naciòn Egipto?

¹⁷ ¿**A** ntá nkexro tí kónínkakonhen Dios tí cuarenta nánó? ¿**Á** jehya tí sín kjuasin jie k'uénxin nteje?

¹⁸ ¿**A** ntá nkexro ntáche Dios kíxin chaxín tsoxiteyá kíxin ts'ixenhya sín ts'ok'éhe sín tí tjen tí jehe ch'án? ¿**Á** jehya tí sín kuítekakonhya?

¹⁹ **A** ntá ó noheni kíxin kjuachahya sín k'uíxenhen sín kíxin kuítekakonhya sín.

4

¹ Méxra, tsíntáchro Dios kíxin tsjanjon ch'án kjuachaxin ts'ixenhenni ts'ok'éheni tí tjen ch'án, a ntá tóxakonhenni kíxin ách'e jnkójín tí jahará chrókjuachahyará chrók'uixenhenrá ntíha.

² Kíxin kjaxin jeheni kuínhinni itén ch'án tsaáxinni éxi kuínhin tí jehe sín, kjánchó tí jehe sín la ninkehó kjuínkítsahya sín tí tan jína kuínhin sín, kíxin kjónté kuínhin sín tí tan na kuítekakonhya sín.

³ **A** ntá jeheni kuítekaonni, ntá ts'ixenhenni ts'ok'éheni ntaha, éxi tsíntáchro Dios kíxin:

Méxra kóninkakonhan sín tí jehe sín ntátjan sín kíxin chaxín tsoxiteyá

kíxin ts'ixenhya sín ts'ok'éhe sín tí tjén janhan.*

Kíxin Dios la tió kjuixinhin ch'án xra kjuích'éna ch'án chjasintajni ntá kjuák'e ch'án k'ok'éhe ch'án.

⁴ Mé xíkaha í jnko nketí nixja tí xroon itén Dios chrónka kuènte tí yaon yatoxin ntáchro kíxin:

Kjuixinhin Dios kaín xra ntá kjuák'e ch'án k'ok'éhe ch'án tí yaon yatoxin.†

⁵ **A** ntá ínaá ntáchro tí xroon itén Dios kíxin:

Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjayan jnkójín chojni chrók'uixenhen sín chrók'ok'éhe sín. **A** ntá tí sín saoxín kuínhin tí tan chrókuaáxin sín la k'uixenhya sín kíxin kuítekakonhya sín tí tan a.

† 3:15 Salmo 95.7-8

*

4:3 Salmo 95.11

† 4:4 Génesis 2.2

‡ 4:5 Salmo 95.11

⁷ Méxra Dios tsíkjeyá ch'án í jnko yaon, mé tí yaon jie, a ntá chr'éxín nixjaxín ch'án tí nkehe tsíchronka ch'ín David éxí ntáchro tí xroon itén Dios kixin:

A ntá jie tí tsinhínrá tí nkehe ntáchro Dios, chrókjuinchexiteyará.Š

⁸ Kixin tí chrókjuanjon ch'ín Josué kjuachaxin kixin chrók'ok'éhe tí sín israelita,* ntá Dios la í chrónixjahya ch'án kuènte í jnko yaon.

⁹ A ntá naxa tjechónhen tí ts'ok'éhe tí sín tinkáchónki Dios;

¹⁰ kixin tí nkexro ts'ixenhen ts'ok'éhe tí tjen Dios tsíkjixinhin ch'án tí xra kuènte ch'án éxí yóhe kjaxin Dios kjuixinhin ch'án tí xra kuènte ch'án ntá kjuák'e ch'án k'ok'éhe ch'án.

¹¹ T'ichjánxín kixin kaín asénni chrókjueyáni nkexrí chrók'uixenhenni chrók'ok'éheni, kixin chrókóyóehyani éxí tí sín kuítekakonha.

¹² Kixin tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí ninka asén chojni la ko nchakuen chojni hasta tí nkaya asén chojni. Tíha mé nchexraxinkaon chojni kaín nkehe tjenkayáxin sín la ko kaín nkehe ntáchro asén sín.

¹³ Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kixin kaín nkehe la noxín siín t'ikon tí nkexro ts'áyéhe kuentá.

Jesús mé tí nchat'á imá tjetooan

¹⁴ Jesús tí Xjeen Dios mé tí nchat'á tjetooan kuèténi mé k'uixenhen tí tjen Dios la méxra chrókuítóehyani tí tinkáchónkini tí jehe ch'án.

¹⁵ Méxra jehe ch'án mé tí nchat'á tjetooan kuèténi mé tsjinkítsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxí sítónhen tí jeheni, kjánchó jehe ch'án la ninkehó jie kjuasinhya ch'án kjónté xikaha kónhen ch'án.

¹⁶ Méxra kaín asénni chrókóchjineheni Dios tí tjen ch'án t'etooan ch'án kixin chrókuikonóeheni ch'án la ko chrókjuinkítsa ch'án tí jeheni tí nkehe chrók'uichjánxínhinni.

5

¹ Kaín nchat'á t'etooan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjáyanxín tí jie kuènte chojni.

² Kjaxin tí nchat'á a la fuértehyani kixin chojni ó, a ntá chrókóninkakuenhya ch'án tí sín noehya la ko tí sín tsíkjichroe.

³ Kjaxin jehe ch'án, kixin fuértēhya ch'án t'ichjánxin tsjanjon ch'án iko its'en kixin tí jiē chóna ch'án jehe ch'án éxí tjanjon ch'án nkehe kuènte tí í so chojni chóna jiē.

⁴ Ninkexró xitjahya jehó sich'éna asén nchat'á t'etōan. Náhí. Jehó tí sín tsíkjeýá Dios tsík'áyéhe tí xra éxí tsík'áyéhe ch'ín Aarón.

⁵ Mé xikaha Cristo, kjuích'énahya ch'án jehó ch'án asén ch'án nchat'á t'etōan. Náhí. Dios mé kjuikosáyehe ch'án mé tsíkjanjon tí xra éxí tsíntáchro kixin:

Jaha mé xjanna;

Janhan mé kjuít'ána ijie.*

⁶ Kjaxin í jnko nketí nixja xroon itén Dios ntáchro kixin:

Jaha mé jnko nchat'á tsjak'e jnkochrín,

éxí yóhe k'uékjak'e ch'ín Melquisedec.†

⁷ Tió kjuák'e Cristo ntihi chjasintajni imá tsjánka ch'án la ko itsen chrónōēhe ch'án Dios, kixin Dios chóna kjuachaxin chrókuinchekaá ch'án kixin chrók'uenhya ch'án; la Dios la kuínhin kixin xikaha kuítekaon ch'án.

⁸ Méxra Cristo, kjónté Xjeen Dios, la kuítekaon ch'án kjuínchexiteýá ch'án kjónté tí kjuasote ch'án.

⁹ Mé kjuínchexiteýá ch'án, ntá kjuacha ch'án k'óna ch'án tí nkexro sinchekaá jnkochrín kaín tí chojni sinchexiteýéhe tí jehe ch'án.

¹⁰ A ntá Dios mé tsíkjich'éna ch'án nchat'á t'etōan éxí yóhe kjuák'e ch'ín Melquisedec.

Jehya jína chrókuítōheni tí tinkáchónkini Inchéni

¹¹ Chóntani nchónhya nkehe chróchrónkani kuènte tíha, kjánchó imá xra chróchrónkaxínni tíha kixin tiénxinyará jahará.

¹² Ntá k'uátsínka nchónhya tiempo, a ntá ó jína chrók'ónará maestro, ntá náhi kixin naxa t'ichjánxinhanrá nkexro chrókuakohará inaá tí nkehe xrahya kuènte itén Dios. Éxí xík'ónará lontirá, t'ichjánxin chrók'uirá tsjen inaá kixin xitjahya sinterá nkehe cha.

¹³ A ntá tí sín it'i tsjen ó, na mé yóhe chánjan takí tsjachahya sín tsjeýá sín nkexrí chrók'uejó sín jína.

¹⁴ Á ntá tí nkehe cha mé ine tí chojni nteto kixin ó nohe sín ti nkehe jína la ko tí nkehe jínahya.

6

¹ Naxa chrókjueýáni kixin jína chrókjueñkayáxinni éxí chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxín kuènte Cristo. Náhí. T'ichjánxinhya

* 5:5 Salmo 2.7 † 5:6 Salmo 110.4

naxa chrókjuakoharáni kixin chrókuítóherá tí jje k'uékjásinrá chrók'uénxinrá, la ko nkexrí chrókuinkachónkirá Dios,

² la ko nkexrí chrókuikite chojni, la ko nkexrí ts'ejotja tjára chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítóexín ijíe chojni.

³ *A* ntá tí Dios chrókjuanjon kjuachaxin la chrókjuakoni í so nkehe.

⁴ *A* ntá tí sín ó tsík'áyéhe sín tí xrohi, la ko ó tsjexín sín tí nkehe kjuanjon Dios, la ko tsík'áyéhe sín tí Nchakuen Dios,

⁵ la ko kóxrjnhin sín tí nkehe jína kuènte itén Dios, la ko kónohe sín nkexrí tí kjuachaxin tsochónta tí chjasintajni chr'éxin,

⁶ *a* ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín inaá, kixin tí xikaha la éxi chrókjuak'enkani sín ntacruz tí Xjeen Dios inaá la ko chrókjuanoá sín ch'án nkayakon nchónhya chojni.

⁷ Éxi nonte jnkojnko vez t'aniá chrin la tsjatan la ts'óna jína, *a* ntá kjuacha tí sín kjuích'e xra kixin Dios kjuíncheyaon ntiha.

⁸ *A* ntá tí t'óna ntach'i la ko kach'i la ninkehó sínkíhya la tsonínkakohen Dios, la tí tsjixixín mé tsoche.

Tí nkehe tjejóchónhenni mé tjinkitsa kixin jína ts'ejóni

⁹ Kjónté nixjani xikaha, kichó ni, ó noheni kixin chaxín jína tjejorá k'uitjará tí ntja tsaáxinrá.

¹⁰ Kixin Dios la jína, la ts'itjáyenhya ch'án tí xra jína tjejoch'erá kixin tjuèherá kichuárá, mé xikaha kjuákoxinrá kixin kjuínkitsará tí kichuárá tinkáchónki Cristo la *naxa* tjejótjinkitsará sín xikaha.

¹¹ Tjinkaonni kixin jnkojnkorá chrókjuákoxinrá hasta tsjixixín kixin chontará kjuachéhe chrókjuínkitsará kichuárá kixin chaxín ts'ayéherá tí nkehe tjejochonhénra.

¹² Tjinkakonhyani kixin chrókjanrá chrókósáhará. Náhí. Tjinkaonni kixin chrókjuákoxinrá éxi tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsíntáchro Dios kixin tsjanjon ch'án.

¹³ *A* ntá Dios, tió tsíntáchro ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjenxin *asén* kixin kohya nkexro *antsí* tjetoo chrók'uákjenxin ch'án.

¹⁴ Ntáchro ch'án kixin chaxín sincheyaon ch'án tí ch'ín Abraham la ko nchónhya chojni ts'axrjenixin tí jehe ch'án.*

¹⁵ Ch'ín Abraham kjuák'echónhen ch'án isé kixin ts'áyéhe ch'án tí nkehe tsíntáchro Dios.

¹⁶ *A* ntá tió t'ákjenxin chojni ijnko nkexro la mé t'ákjenxin sín ijnko nkexro *antsí* tjetoo, *a* ntá jehó sín la náhí. *A* ntá

* 6:14 Génesis 22.16-17

ts'ákjenxin sín tí xíkaha kíxin ijnko nkehe tsoxiteyá, a ntá kohya nkexro tsontáchro ninkehó.

¹⁷ Méxra Dios k'uákjenxin ch'án asén ch'án tsintáchro ch'án kíxin chaxín tsoxiteyá, kíxin tjinkaon ch'án chrókjuakoxin ch'án noxín kíxin chrókónohe tí sín ts'áyéhe tí nkehe tsjanjon ch'án kíxin sinchexiteyá ch'án tí nkehe tsintáchro ch'án la í tsjitóxiénhya ch'án ninkehó tíha.

¹⁸ Mé xíkaha siín yaá nkehe xitjahya ts'ixitóxin, kíxin Dios la xitjahya sich'ia; kíxin tíha Dios nchenoexínni kíxin chaxín tsoxiteyá, la mé jeheni kjuancheheni ch'án kíxin chrók'uayakonhenni ch'án la ko tjejóchónhenni tí nkehe tsjanjon ch'án.

¹⁹ Tí tjejóchónhenni xíkaha la jína ts'ejó asénni éxí yóhe tí ntabárcq chóna gancho tjechruéxin kíxin kohya nketí sátsji. Méxra xíkaha kjaxin tí nkehe tjejóchónhenni la sátsíkji hasta nóton tí ka cortina tjen nkaxenhen nínko tjen nkaya nkajní,

²⁰ tí senó k'uixenhen Jesús kuakitjehe ch'án ijnko ntja ts'ixenxínni. Mé xíkaha jehe ch'án k'lóna ch'án nchat'á t'etoan jnkochrín éxí yóhe kjuák'e tí ch'ín Melquisedec.

7

Ch'ín Jesús mé nchat'á éxí yóhe k'uéjkak'e ch'ín Melquisedec

¹ Tí ch'ín Melquisedec mé k'ué rey kuènte chjasin Salem la ko nchat'á kuènte Dios tjen nkaya nkajní. A ntá tió ch'ín Abraham kjanxin ch'án tí tsíkjikjanjonko ch'án tí í so sín rey, kjuacha ch'án, ntá ch'ín Melquisedec kjuixinhin ch'án ntja ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham.

² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjacha ch'án tí tsíkjikjanjonko ch'án tí sín rey.* A ntá ihnié ch'ín Melquisedec mé t'axrjexín saoxín kíxin “ijnko rey jína”; a ntá jehe ch'án k'ué rey kuènte chjasin Salem, tíha mé t'axrjexín kíxin “kjuaxróxin”, la mé xíkaha jehe ch'án mé “ijnko rey tjanjon kjuaxróxin”.

³ A ntá ch'ín Melquisedec la noehya sín nkexro it'é ch'án la ko nkexro iné ch'án la ko nkexro tsík'axrjeníxin ch'án; la ko noehya sin nkesá tsíkokjíhi ch'án la ko nkesá tsík'en ch'án. Mé xíkaha tóyóhe tí Xjeen Dios kíxin jehe ch'án mé ijnko nchat'á jnkochrín.

⁴ A ntá jie, tsjehérá kíxin imá t'etoan tí ch'ín Melquisedec kíxin tí ch'ín Abraham k'uaxrjeníxinni, la tsíchjéhe ch'án tí ch'ín Melquisedec diezmo tí nkehe tsíkjacha ch'án tí tsíkjanjonko ch'an tí sín rey.

* 7:2 7.1-2 Génesis 14.17-20

⁵ Éxí nixja ley tsík'et̄oan ch'ín Moisés, kixin tí sín nch̄at'á tsík'axrjeníxin tí ch'ín Leví chón̄ta sín kjuachaxin tsjanchehe sín kaín xín chojni diezmo kjónté n̄ax̄a kjéhya sín, tsík'axrjeníxin sín tí ch'ín Abraham éxí tí jehe sín.

⁶ A ntá ch'ín Melquisedec, kjónté tsík'axrjeníxinha ch'án tí ch'ín Leví, na mé kjuích'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintácho Dios. Mé x̄ikaha tí ch'ín Melquisedec tsíkjincheyaon ch'án tí ch'ín Abraham.

⁷ Kohya nkexro tsontácho kixin chaxínhya kixin tí nkexro ncheyaon la ant̄sí má t'et̄oan, a ntá tí nkexro tsíkóyaon la t'et̄oanhya. Náhi.

⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntácho tí xroon itén Dios kixin tí ch'ín Melquisedec mé ijnko chojni n̄ax̄a tsík'enhya, la n̄ax̄a tjechón.

⁹ Mé t'axrjexín kixin ch'ín Leví la ko kaín xín tí sín nch̄at'á tsík'axrjeníxin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sín diezmo tí ch'ín Melquisedec tió tsíkjenk̄a ch'ín Abraham,

¹⁰ kixin n̄ax̄a tjiko cuerpo kuente ch'án tí sín ts'axrjeníxin ch'án, n̄ax̄a kokjéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nch̄at'á levita, mé tsík'axrjeníxin sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya n̄ax̄a chrókónoxín í jnko nch̄at'á í chrókóyóehya éxí tí ch'ín Aarón. A ntá kjuachahya sín x̄ikaha ntá t'ichjánxín chrókónoxín ijnko nch̄at'á chrókóyóhe éxí tí ch'ín Melquisedec.

¹² A ntá tí chrók'uixinkí tí nch̄at'á la kjaxin chrók'uixinkí tí ley.

¹³ A ntá tí xroon itén Dios chrónka tíhi kuente Ìnchéni. A ntá jehe ch'án la tsík'axrjeníxin ch'án í jnko nkexro kuente Israel la kohya ninkexró tsík'óna nch̄at'á tsík'axrjeníxin tí sín a.

¹⁴ Kixin ó noxín kixin Ìnchéni tsík'axrjeníxin ch'án tí ch'ín Judá, a ntá ch'ín Moisés la chrónkahya ch'án ninkehó kuente tí sín ts'axrjeníxin tí ch'ín a tió nixja ch'án kuente tí sín nch̄at'á.

¹⁵ A ntá tíhi la ant̄sí má kónoxín kixin tí nch̄at'á n̄ixin la tóyóhe éxí ch'ín Melquisedec

¹⁶ kixin tió k'óna ch'án nch̄at'á la jehya kixin x̄ikaha chrók'uetoan ijnko ley kixin nkexro chrók'uaxrjeníxin ch'án. Náhi. Ó jehí k'óna ch'án nch̄at'á kixin tí kjuachaxin chón̄ta ch'án la xitjahya ts'itjayan.

¹⁷ Kixin nixja Dios kixin nkexrí tjen tí jehe ch'án, ntácho kixin:

Jaha mé ijnko nch̄at'á tsjak'e jnkochrín, éxí yóhe k'uékjak'e ch'ín Melquisedec.†

18 Méxra tí nkehe k'uék'etōan senó mé ch'ehya xra jie kixin kánhyó kjuachaxin k'uéchónta la ko kjuachahya,

19 kixin tí nkehe k'uetōan ch'ín Moisés kjuachahya kjuínchetjóá ninkehó nkehe. A ntá jie chóntani ijnko nkehe antsi jína tjejóchónhenni kixin tíha mé antsi jína tsochjinexinni Dios.

20 A ntá tió ntáchro Dios tíha la tsík'ákjenxin ch'án asén ch'án jehó ch'án.

21 La ntá tí í so nchat'á, tió tsíkónoxín sín, tsík'ákjenxinhya Dios asén ch'án. A ntá tió tsíkónoxín tí nchat'á i la Dios tsík'ákjenxin ch'án asén ch'án. A ntá ntáchro xroon itén Dios kixin:

Ìnchéni tsík'ákjenxin asén ch'án

a ntá ts'ixitóxinhya tí nkehe tsíntáchro ch'án:

“Jaha mé ijnko nchat'á tsjak'e jnkochrín

éxí yóhe k'uékjak'e ch'ín Melquisedec.”‡

22 Méxra ch'ín Jesús ntáchro kixin tí pacto t'etōan ch'án la antsi má jína, a ntá tí pacto senó la náhi.

23 Ntá k'uixin nchónhya sín nchat'á, kjánchó nkák'en sín, ntá xitjahya naxa chrókuich'e sín tí xra a.

24 A ntá ch'ín Jesús la ts'enhya ch'án la t'ichjánxinhya kixin í jnko nkexro chrókuakja tí xra kuente ch'án chrók'óna nchat'á.

25 Méxra jehe ch'án tsjacha sinchekaá ch'án jnkochrín tí sín tsochjinehe Dios kixin tinkáchónki sín tí jehe ch'án kixin itjen ch'án jnkochrín chrónóhe ch'án Dios kixin chrókuinchekaáni ch'án.

26 Mé xikaha Jesús mé tí nchat'á t'etōan t'ichjánxinhinni; jehe ch'án mé ijnko nkexro tjóá, chóntahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní.

27 Ntá tóyóehya tí í so nchat'á t'etōan, kixin t'ichjánxin ts'óyán sín iko tsjanjon sín tsochjéhe sín Dios káin yaon, saoxín kixin tí jie kuente sín, a ntá chr'éxin kixin tí jie chónta tí í so chojni. A ntá ch'ín Jesús jnkokoaxón vez kjuanjon asén ch'án ik'uén ch'án.

28 Tí ley k'uék'etōan ch'ín Moisés t'etōan kixin chojni naxa chónta jie chrók'óna nchat'á, a ntá Dios tsík'ákjenxin asén ch'án tió kjuixin k'óna tí ley, ntáchro ch'án kixin tí Xjeen ch'án mé ts'óna nchat'á t'etōan kixin jína kjuínchexiteyá ch'án jnkochrín.

8

Ch'ín Jesús nixjxin ch'án ijnko pacto nixin

1 Tí nkehe antsí má tjetooan chrónkani la mé tíhi kixin tí nch'at'á kuènteni mé t'etooan ch'án, la ko tjetjaxin ch'án nkaya nkajní, nó chjina tí trono t'etooanxín Dios,

2 k'óna ch'án nch'at'á tí ninko chaxín tsíkjich'éna Ìnchéni, la jehya chojni tsíkjich'éna tíha.

3 Kaín nch'at'á t'etooan tsík'áyéhe xra kixin tsjanjon nkehe la ko iko its'en. Méxra Jesucristo t'ichjánxin kixin tsjanjon ch'án ichrén nkehe.

4 Tí chrókjuak'e ch'án chjasintajni, chrók'ónahya ch'án nch'at'á kixin naxa siín nch'at'á tjanjon nkehe k'uetooan tí ley tsík'áyéhe ch'ín Moisés.

5 A ntá tí sín nch'at'á k'uékjanjon nkehe tóyóhó tí nkehe siín nkaya nkajní. Noheni kixin tóyóhó kixin tió ch'ín Moisés chrókjuich'éna ch'án ninko la ntáche Dios tí jehe ch'án kixin: “Tjenkayáxian jína, a ntá sich'éna jaha éxí tí nkehe kjuákuáxian chrítaón jna.”*

6 A ntá tí nch'at'á t'etooan kuènteni tjech'e ch'án xra antsí jína kixin jehe ch'án mé tí nkexro nixjaxin tí pacto nixin tsintácho Dios chrónka tí nkehe jína tsoñhen chr'éxin.

7 A ntá tí pacto tsík'etooan saxín la tí chróxiteyá jína, la t'ichjánxinhya chrók'óna yóxin pacto.

8 A ntá Dios k'uikon kixin kjuínchexiteyáhya tí sín a, éxí ntácho xroon itén Dios kixin:

Ntácho Ìnchéni kixin: Itsi ijnko yaon

mé tsjánjuan ijnko pacto nixin tsochónta tí sín nación Israel la ko tí sín chjasin Judá.

9 Jehya xikaha tí pacto kuétuanhan tí sín tsík'axrjeníxinrá ósé, tí yaon kjuínkítsa sín k'uaxrjexín sín tí nación Egipto; kjánchó kjuínchexiteyáhya sín tí pacto kuétuanhan sín, méxra kujtoha sín, ichro Ìnchéni.

10 Tí pacto tsétuanhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráxinkavan asén sín tí ley tsétoan,

a ntá tí kjuaxrexinkaon kuènte sín tsokjian tí nkehe tsétuanhan sín.

A ntá janhan ts'óna Dios kuènte sín,

a ntá jehe sín mé ts'óna chjasin kuéntana.

11 Ts'ichjánxinhya naxa tsjakohé kichó sín

kixin chróchóxin sín Ìnchéni,

kixin kaín sín tsochóxinna sín,

kjonté chojni imá ntsínsí la ko chojni imá hyé.

12 Sintak'itjáyan tí nkehe jínahya kjuích'e sín

la ko í tsoxráxinkakonhya inaá tí jie chónta sín.†

* 8:5 Éxodo 25.40 † 8:12 8.8-12 Jeremías 31.31-34

¹³ Xikaha nixja Dios kuènte tí pacto nixin ts'etōan ch'án kixin tsíkóntaxin tí pacto saoxín k'uētoan ch'án, tíha mé tinkákóntaxin la ko tinkákjeje, na í séhya ts'itjayan.

9

Tí nínko chjasintajni la ko tí nínko nkaya nkajni

¹ A ntá tí pacto saoxín t'etōan nkexrí chrórxaxinkaonni Dios, kixin tí nínko ntihyó chjasintajni.

² A ntá tí nínko k'uékjak'e mé tí cuarto saoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejójen tí niotja k'uérxaxinkakonxín sín Dios.

³ Nóton tí yóxin ka cortina kjuák'e tí cuarto k'uekjinchek'in sín tí Cuarto Antsí Tjóá.

⁴ Ntiha k'uékjak'e tí altar tsík'óna chica oro k'uékjakaxín sín tí chjincō la ko k'uékjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uékjak'e ijnko nchésen tsík'óna chica oro k'uék'inka maná k'óna niotja, la ko kjaxin k'uékjak'e tí nta k'uékjixín ch'in Aarón kjuankíxin k'uayan nta ntahte, la ko kjaxin ntiha kjuák'e tí xro chóna tí tan k'uētoan Dios.

⁵ Chrítaón tí ntacajón k'uék'ejó yaá ángel tsíkjanoya tsíkjentoá kanēñee chrítaón tí kjuák'e tí kjuachaxin kuènte Dios; ntaha k'uékjixín tí jie k'uéchóna chojni. A ntá ijie la t'ichjánxinhya naxa tsonixjani kuènte tíha.

⁶ A ntá xikaha k'uéjé tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuènte nínko kixin tí xra ch'e sín kuènte nínko.

⁷ A ntá tí yóxin cuarto jehó tí nchat'á t'etōan t'ixenhen ch'án jnkokóá vez jnkojnko nánó; a ntá tí t'ixenhen ch'án t'ichjánxín ts'ixenko ch'án ijnié iko tsochjéhe ch'án Dios tsotjuáxin ijie ch'án la ko ijie tí i so chojni.

⁸ A ntá tí Nchakuen Dios nchenoexínni tíhi kixin nachrohe k'uékjich'e xra tí cuarto saoxín la naxa tjexrankehya kixin chrók'uixenhenni tí Cuarto Antsí Tjóá.

⁹ Kaín tíha tjakoxin ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín kixin á chaxín kótjóá tí jie k'uéchóna sín kixin xikaha k'uérxaxinkaon sín Dios.

¹⁰ A ntá tíha jehó t'etōan kuènte tí nkehe chrókjóné sín la ko tí nkehe chrók'ui sín la ko tí chrók'ónti sín kixin chrókótjuáxin ijie sín, kaín tíha mé k'uítuenhen sín kuènte cuerpo ó la jehó k'uéchóna kjuachaxin tí naxa kjuinkíhya Dios nkexrí chrórxaxinkaon sín ch'án.

¹¹ A ntá ó kui Cristo, jehe ch'án mé nchat'á t'etōan kuènte tí nkehe antsí jina itsi. A ntá tí nínko ch'e ch'án xra la antsí

jína la ko antsí ntoá, la jehya chojni tsíkjich'éna tíha kíxín jehya chjasintajni ntihi tjen.

¹² Tió k'uixenhen Cristo tí Cuarto Tjóá, la jehya kíxín chrókjuanjón ch'án ijníé kotèntso la ko ijníé koxintáxjan. Náhi. Ijníé ch'án kjuanjón ch'án; mé xíkaha k'uixenhen ch'án jnkokoá vez ntiha mé xíkaha kjuenka ch'án kíxín chrókuaáxinni jnkochrín.

¹³ A ntá tí ijníé koxinta la ko ijníé kotèntso la ko tí nteso kuènte tí koxintáxjan tsíchexín tí altar tikitexín tí sín tjuáhya la mé tíha chóna kjuachaxin tsotjuáxin tí chrítaón ó.

¹⁴ A ntá tí xíkaha, la kjá antsí má chóna kjuachaxin tí ijníé Cristo. Kíxín tí kjuachaxin Nchakuen Dios tjen jnkochrín, la Cristo kjuanjón asén ch'án ik'uén ch'án k'uáyéhe Dios, la jehe ch'án la ninkehó jie chóntahya ch'án. A ntá ijníé ch'án nchetjóá tí nkehe kjuích'eni senó chrók'uenxínni kíxín ntá jie la jína chrókjuich'ehe ni xra Dios tjechón.

¹⁵ Méxra Jesucristo nixjaxín ch'án tí pacto nixín k'uetōan Dios. Kíxín k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuenhenni senó; kíxín tí sín k'uíyēhe Dios la jína chrók'uáyéhe sín tí nkehe tsjejehya kíxín jehe ch'án xíkaha tsíntáchro ch'án tsjanjón ch'án.

¹⁶ A ntá tí siín ijnko nkehe tsíntáchro ijnko chojni kjuák'e na ntá ik'uén la t'ichjánxín tsonoxín kíxín chaxín tsík'en tí nkexro tsíkjich'éna.

¹⁷ A ntá tí nkehe tsíntáchro ch'án la sínkíhya tí naxa tjechón tí nkexro tsíkjich'éna; jehó tió chrók'uen ch'án mé sínkí.

¹⁸ Méxra tí pacto xrankíxixín tsík'etōan Dios kjuankíxín kjuích'e xra kíxín k'uítji ijní.

¹⁹ Ch'ín Moisés tsíchrónka ch'án kaín nkehe tsík'etōan tí ley kuínhin kaín tí chojni; a ntá chr'éxín kuákja ch'án ichjóén kolélo kjátse la koí ntarama hisopo, ntá kjuínchekjatjaxín ch'án ijníé koxintáxjan la ko ijníé kotèntso tsíkjiko ìnta, ntá kuíkjanjin ch'án tí libro chóna ley la ko kuíkjanjin ch'án káin tí chojni.

²⁰ A ntá ntáchro ch'án kíxín: “Tí jni i tsoxiteyáxin tí pacto k'uetōan Dios chrókjuínchexiteyéhérá jahará.”*

²¹ Tí ch'ín Moisés kjaxín kuíkjanjin ch'án jni tí nínko la ko kaín nkehe t'ichjánxín tí nkaxenhen nínko.

²² Kíxín xíkaha ntáchro tí ley kíxín kaín nkehe la chrókótjuáxin tí jni; a ntá xitjahya chrókótjóá tí jie tí chrók'uixikjanjinhya jni.

Tí ik'uén Cristo mé tsjünxín ijíéni

²³ Méxra t'ichjánxín kíxín ik'uén iko kótjuáxin tí nkehe a, táha mé tóyóhó tí nkehe siín nkaya nkajní; a ntá tí nkehe

* 9:20 9.19-20 Éxodo 24.6-8

chaxín kuènte nkaya nkajní t'ichjánxìn ijnko nkehe antsí jína chrók'uen.

²⁴ A ntá Cristo k'uixenhya tí nínko tsíkjich'énaxín chojni tja, táha mé ijnko nkehe tóyóhó tí nínko chaxín. Náhi. Jehé ch'án mé k'uixenhen ch'án tí nkaya nkajní, a ntá jie mé tjen ch'án tí tjen Dios nixjaxìn ch'án kaín ni.

²⁵ A ntá jehé ch'án la jehya jnkoyaxón k'uixenhen ch'án ntiha k'uenyákonhenni ch'án. Náhi. A ntá tí nchat'á t'etoan t'ixenhen tí Cuarto Tjóá jnkojnko nánó kixin tsjanjon ch'án ijnié ko ó.

²⁶ A ntá tí xikaha chrókónhen Cristo la t'ichjánxìn kixin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kixin tsjinxín ijieni.

²⁷ Mé xikaha kaín ni its'enni jnkokoá vez, a ntá chr'éxìn tsitoexín ijieni.

²⁸ Mé xikaha kjaxin Cristo jnkokoá vez ik'uén ch'án kixin tsjinxín ijie nchónhya chojni. A ntá chr'éxìn itsi ch'án inaá, jehya kixin naxa tsjatsen ch'án ijie chojni. Náhi. Sinchekaá ch'án tí chojni ó tsíkótjóá tjejóchónhen itsi ch'án.

10

¹ A ntá tí ley k'uetoanxín ch'ín Moisés la tóyóhó tí nkehe jína tsi la jehya tí nkehe chrókuaáxinni. Méxra tí ley kjuachahya kjuínchetjóá tí sín kóchjinehe Dios kjuanjon sín iko its'en jnkojnko nánó.

² A ntá tí chrókjuacha tí ley chrókjuinchetjóá ijie sín, ntá chrókjuenkayáxinhya sín kixin naxa chróchóna sín jie, la chrókuítóhe sín, í chrókjuanjonhya sín iko its'en.

³ A ntá xikaha ich'e sín t'óyán sín ko, la jnkojnko nánó xraxinkakonxín sín tí jie tsíkjasin sín

⁴ kixin ijnié koxinta la ko ijnié kotentso xitjahya tsjinxín ijie chojni.

⁵ A ntá tió Cristo kui chjasintajni ntáche ch'án Dios kixin: Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhi.

Jaha tsíkjich'éna ijnko cuerpo kixin tsochonta janhan.

⁶ Jaha tóxrjánhya iko tsíchján la ko tí í so nkehe chrókjuanjonni chrókjuakjlinxian ijie.

⁷ A ntá ntátjan ch'án kixin: “A ntá ijie la ntihi tjen janhan kixin sintaxiteyá tí nkehe tóxrjánhan jaha Dios,

éxi nixja xroon chrónka nkexrí chrókjuít'a.”*

⁸ Senó ntácho kixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni

* 10:7 10.5-7 Salmo 40.6-8

chrókjuínxín ijiéni kjónté tí ley k'uətoan kixin xikaha chrókónhen.

⁹ A ntá chr'éxín tsíntáchro kixin: “A ntá k'uinka janhan kixin sintaxiteyá tí nkehe tóxrjínhan jaha Dios,” ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe nixin.

¹⁰ Dios kjuínchetjuáxinni kixin Jesucristo kjuínchexiteyá éxi tóxrjínhin Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrín.

¹¹ A ntá kaín nchat'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjinxín ijié chojni.

¹² A ntá Jesucristo mé jnkokoá vez k'uenyákonhenni ch'án kixin tsotjuáxin ijiéni la tíha mé sich'e xra jnkochrín. A ntá kjuixín ntá sákjuí ch'án kjuák'etjaxín ch'án nó tí tja chjina kuènte Dios.

¹³ A ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'ətoan sín.

¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsíkótjóá.

¹⁵ A ntá tí Nchakuen Dios nchenoheni tíhi kixin senó tsíntáchro kixin:

¹⁶ Tí pacto tsotjahá tí jehe sín tió ts'atsínka tí yaon a, ichro
Inchéni;

Sintaxráxinkavan asén sín tí ley tsətoan,

a ntá tí kjuaxrexinkaon kuènte sín tsokjian tí nkehe tjínkavan.†

¹⁷ Kjaxín ntáchro kixin:

Í tsoxráxinkakonhya ínaá tí ijié sín la ko tí nkehe jínahya kjuích'e
sín.‡

¹⁸ Mé xikaha tí ó kótjóá ijiéni la t'ichjánxinhya í so nkehe chrókjuanjonni chrókótjuáxin tí ijiéni.

Méxra t'ichjánxín tsochjineheni Dios

¹⁹ Kichóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijnié Jesucristo,

²⁰ chréheni tí ntja nixin mé tí ntja tjechón kuakitjehe ch'án nóton tí ka cortina, tíha mé tí cuerpo kuènte ch'án.

²¹ Jesús mé tí nchat'á tjetóan kuènteni t'ətoan tí ntəe Dios.

²² Méxra xikaha chrókóchjineheni Dios kaín asénni chrókuínkáchónkini ch'án chaxín kixin jehe ch'án tsíkjinchetjóá ch'án asénni kixin chrókjuenkayáxinhanyi kixin naxa chóntani jie kixin tí cuerpo kuènteni kótjuáxin tí ntə jehó.§

† 10:16 10.16-17 Jeremías 31.33-34 ‡ 10:17 10.16-17 Jeremías 31.33-34 § 10:22 Ezequiel 36.25

23 Chrókuítōehyani chrók'uejóchónhenni tí nkehe tinkáchónkini ḱixin Dios la chaxín sinchexiteyá ch'án tí nkehe tsíntáchro ch'án.

24 Chrókjueyáni nkexrí chrókjuinkjitsani ḱíchó ni ḱixin chrórtjuèheni ḱíchó ni la chrókjuich'eni tí nkehe jína.

25 Chrókuítōehyani chrókójkotséni, chrókóyóehyani éxí tí sín í tójkotséhya sín. Náhi. Chrókjuinchehéheni ḱíchó ni antsí má jie ḱixin ó noheni ḱixin í séhya tsokjan Ìnchéni.

26 A ntá tí naxá chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani.

27 A ntá jehó itjen tí kjuachrakon jie tsitoexín jie la ko tí xrohi tjeche ts'itjáyanxín tí sín nínkakonhen Dios.

28 A ntá tí tjen jnkójín nkexro titekakonhya tí ley k'uetōanxín ch'ín Moisés, la tsonoxín yaá o y'á tí sín tsík'ikon tí jie tsíkjasin sín, tíha mé ts'enxín sín la kohya nkexro tsíkonóehé tí jehe sín.

29 ¿Á tjenkayáxinhyará ḱixin antsí má chrókjuasóte tí sín kuítékakuenhya tí Xjeen Dios la ko chóntehya sín kjuasáya tí ijníé ch'án la ko t'ántaxínhin sín tí Nchakuen Dios tjuèheni? Ḱixin tí jni chrónkaxín ḱixin ts'etōanxín tí pacto la ko tí jni k'uíjmáxinni.

30 Noheni ḱixin tsíntáchro Ìnchéni ḱixin: “Janhan mé tóna tocar s̄intakitoaxián ijíé chojni la ko janhan tsjénkahá sín.”* Kjaxin tsíntáchro ḱixin: “Ìnchéni sinchekitoexín ijíé tí sín tinkáchónki ch'án.”†

31 Méxra kjuachrakon jie chrók'uanótjenyáni tí tja Dios tjechón.

32 A ntá chróxráxinkáonrá jahará tí nkehe tsíkónhen ósé ḱixin tió jahará nantá tsík'ayéherá tí nkehe t'inkaséyan, a ntá kjuachará kjónté tí nchónhya nkehe tsíkónhanrá.

33 A ntá jnkójín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkítsa tí sín tsík'ekon.

34 A ntá jahará kuíkonóehéherá tí sín tjejóchjina ntoechiso, a ntá jahará kóninkákonhyará kjónté k'uaxrjahará kaín nkehe chontará, ḱixin ó nohará ḱixin nkaya nkajni chontará nkehe antsí jína chónhya tsjeje.

35 Chrókuítōéhyará tí nkehe tinkachónkirá ḱixin ó nohará ḱixin tíha mé ts'ayéxinrá nkehe chr'éxin.

36 Kjaxin jahará t'ichjánxin chrók'uejochonhénrá chrókóninkákonhyará kjónté ichrén nkehe chrókónhanrá, ḱixin s̄ich'erá tí nkehe tjinkaon Dios, ḱixin xíkaha chrók'uayéherá tí nkehe tsíntáchro tí jehe ch'án.

* 10:30 Deuteronomio 32.35-36 † 10:30 Deuteronomio 32.35-36

³⁷ Kíxin xíkaha ntáchro xroon itén Dios kixin:
Kánhyó sé

itsi tí nkexro tsi, í sinchexrjenhya.

³⁸ Tí sín kótjóá asén mé tjejóchónxin sín kixin tinkáchónki sín
Dios;

á ntá tí sín tsítóhe tí janhan la í tsochànahya tí xíkaha ch'e sín.‡

³⁹ Kjánchó jeheni jehya xíkaha chrókuítóheni
chrókuinkáchónkihyani tí jehe ch'án kixin ntá chrókjuasinni
jie chrók'uitjayanxinni. Náhi. Tinkáchónkini ch'án la tíha
chrókuaáxinni.

11

Tífe

¹ Tí fe chóntani la mé noexínni chaxín kixin tsoxiteyá
ts'áyéheni tí nkehe tjejóchónhenni, la ko noexínni chaxín kixin
kjónté ijnko nkehe t'ikonhyani la chaxín tjen.

² Tí sín tsík'axrjeníxinni ósé la kóxrjínhìn Dios kixin
k'uéchónta sín fe.

³ Tí fe mé noexínni kixin Dios tsíkjich'éna kaín nkehe tí
kjuachaxin tí nixja ch'án la ko noexínni kixin tí nkehe t'ikonni
mé tsík'óna tí nkehe t'ikonhyani.

⁴ A ntá tí fe k'uéchónta ch'ín Abel mé k'óyán ch'án ijnko kolélo
chjéhe ch'án Dios. Tíha ijnko nkehe antsí jína kjuanjon ch'án, a
ntá tí nkehe tsíkjanjon ch'ín Caín la náhi. Méxra Dios kóxrjínhìn
tí nkehe kjuanjon ch'ín Abel ntá ntáchro Dios kixin jína tí ch'ín
a. Kjónté ó tsík'en ch'ín Abel la tí nkehe tsíkjich'e ch'án naxa
tjakoqxin kixin jína tí fe k'uéchónta ch'án.*

⁵ A ntá tí fe k'uéchónta ch'ín Enoc la Dios sátsíkjikó tí jehe
ch'án la k'uénhya ch'án, a ntá k'uitjahya sín ch'án kixin Dios
sátsíkjikó. Naxa sákjuihya ch'án la xráxín kóxrjínhìn Dios
nkexrí k'uékjak'e ch'án.†

⁶ A ntá tí chróchóntahyani fe la xitjahya chrókjuinchechéheni
Dios, kixin t'ichjánxin kixin tí sín chrókóchjinehe sín Dios
chrókuitekaon sín kixin chaxín itjen ch'án la ko jehe ch'án
tsjenkehe ch'án tí sín xritjeyá sín tí jehe ch'án.

⁷ A ntá tí fe k'uéchónta ch'ín Noé tí Dios chénka tí jehe ch'án
tí nkehe naxa k'uíkonhya ch'án tsonhen, la kuítekaon ch'án
kjuích'éna ch'án ntabarco kixin tsaáxin ch'án la ko tí sín naxa
kjéhya ch'án. Tí fe k'uéchónta ch'án kjuakoqxin kixin tí í so
chojni chjasintajni la jínahya sín tsjasóte sín. A ntá kóxrjínhìn
Dios tí jehe ch'án kixin kuítekaon ch'án la tí xra kjuích'e ch'án
mé kuaáxin ch'án.‡

⁸ A ntá tí fe k'uéchónta ch'ín Abraham tí k'uíyehé Dios tí
jehe ch'án la kuítekaon ch'án sákjui ch'án tí nonte tsjanjon

‡ 10:38 10.37-38 Habacuc 2.3-4

* 11:4 Génesis 4.3-10

† 11:5 Génesis 5.21-24

‡ 11:7 Génesis 6.13-22

Dios ts'áyéhe ch'án, ntá k'uaxrjexín ch'án chjasén ch'án kjónté noehya ch'án nketí nó sátsji ch'án. §

⁹ **A** ntá tí fe k'uéchónta ch'án k'uékjak'e ch'án tí nonte chrókjuanjon Dios, éxí jehya nontee ch'án tíha. Kjuák'e ch'án nchia tsík'óna ka, la ko kjaxin xikaha k'uéchónta ch'ín Isaac la ko ch'ín Jacob la ko kjaxin jehe sín tsík'áyéhe sín tí nkehe tsíntácho Dios.*

¹⁰ **A** ntá ch'ín Abraham k'uékjak'e chónhen ch'án tí chjasin tsíkjach'éna Dios ts'itjányaha.

¹¹ **A** ntá tí fe k'uéchónta tjan Sara kjónté ó nána tjan, k'uáyéhe tjan kjuachaxin sich'éna tjan ijnko xjan; a ntá kjuích'éna tjan ijnko xjan kixin kuítekaon tjan kixin Dios sinchexiteyá tí nkehe tsíntácho ch'án. †

¹² **K**jaxin xikaha ch'ín Abraham, kjónté ó mero chrók'uen ch'án kixin ó táda ch'án, la k'uaxrjeníxin ch'án nchónhya chojni éxí konotsé siín nkajní o éxí nchesen siín chrínta ntayaon, xitjahya ts'ekini. ‡

¹³ **A** ntá kaín tí chojni a ik'uén sín k'uáyèhya sín tí nkehe tsíntácho Dios kixin chrók'uáyéhe sín, a ntá k'uéchónta sín fe, la kjónté ikjín k'uíkon sín la ko kuítekaon sín kóchéhe sín. Mé xikaha k'uéchrónka sín kixin tí chjasintajni jehya chjasén sín.

¹⁴ Mé xikaha k'uénixja sín la tienxínni jína kixin naxa xritjeyá sín nketí chrók'óna chjasén sín.

¹⁵ **A** ntá tí chrórxaxinkaon sín tí chjasin tsík'axrjexín sín ntá jína chrókjan sín ntiha inaá.

¹⁶ **K**jánchó tjinkaon sín ijnko chjasin antsí má jína, tíha mé chjasin nkaya nkajní. Méxra Dios la tósuèhya ch'án kixin chrókjuinchek'in sín ch'án tí Dios kuènte tí jehe sín, kixin ó tjechónhen tí chjasin ts'áyéhe tí jehe sín.

¹⁷ **A** ntá fe k'uéchónta ch'ín Abraham kixin Dios kjuích'e prueba tí jehe ch'án kjuanchia tí xjeen ch'án Isaac, a ntá kjuikao ch'án chrók'óyán ch'án, chrókjuanjon ch'án. Tjechónhen ch'án chrókjuanjon ch'án kjónté jnkokoaxón xjeen ch'án tsíkjanjon Dios § tsíntácho kixin:

¹⁸ “Tí ch'ín Isaac ts'axrjeníxin nchónhya xjan.”*

¹⁹ **A** ntá ch'ín Abraham kjuátsqan ch'án kixin Dios imá chóna kjuachaxin, la kjónté chojni tsík'en na nchexechón ch'án, la éxí yóhe chrók'uen tí xjeen ch'ín Abraham ntá chrók'uáyéhe ch'án inaá.

²⁰ **A** ntá tí fe k'uéchónta ch'ín Isaac kjuíncheyaon ch'án tí xjeen ch'án ch'ín Jacob la ko Esaú, kixin jína ts'ejó sín. †

§ **11:8** Génesis 12.1–5 * **11:9** Génesis 35.27 † **11:11** Génesis 18.11–14; 21.2
 ‡ **11:12** Génesis 22.17 § **11:17** Génesis 22.1–14 * **11:18** Génesis 21.12 † **11:20**
 Génesis 27.27–29,39–40

21 **A** ntá tí fe k'uéchónta ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójjixin ch'án nixjehe ch'án Dios.‡

22 **A** ntá tí fe k'uéchónta ch'ín José tió chjina its'en ch'án tsintáchro ch'án kixin tí sín israelita la chr'éxin tsaxrjexín sín chjasin Egipto, tsík'etoan ch'án kixin tió sátsji sín la sátsjiko sín tí huesoé ch'án. §

23 **A** ntá tí fe k'uéchónta it'é la ko iné ch'ín Moisés tió kokjíhi ch'án kjuak'ema sín ch'án iní nitjó kixin tsík'ikon sín kixin ijnko xjan ntoa náxrjón tsjehe ch'án, la ko chrakuenhya sin tí nkehe tsík'etoan tí ch'ín rey kixin chrók'óyán sín xjan.*

24 **A** ntá tí fe k'uéchónta ch'ín Moisés tió kónteto ch'án la chrohya ch'án its'in ch'án xjeen tí tjan xjeen ch'ín rey Egipto.†

25 Náhí. Kjueyá ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jie. Náhí.

26 Kjuenkayáxin ch'án kixin antsí tjetooan chrókjuasótéxin ch'án tí tinkáchónki ch'án tí Cristo itsi chr'éxin, a ntá kánhyó tjetooan chróchónta ch'án kaín nkehe tjete sín chjasin Egipto. Kjuenkayáxin ch'án kixin chrók'uáyéhe ch'án tí nkehe chrókjuanjon Dios.

27 **A** ntá tí fe k'uéchónta ch'ín Moisés sákjuixin sín tí chjasin Egipto,‡ chrakonhya ch'án kjónté kónínkaon tí ch'ín rey, a ntá kuítøehya ch'án tí tinkáchónki ch'án Dios kixin éxi t'ikon ch'án tí Dios ninkexró t'ikonhya.

28 **A** ntá tí fe k'uéchónta ch'ín Moisés kjuasin ch'án tí kia pascua, k'uetoan ch'án kixin chrókuikjanjin sín jni tí puerta, kixin tí ángel t'óyán chojni chrókjuincheníehya nijnko tí xjan sao kuènte tí sín Israel. §

29 **A** ntá tí fe k'uéchónta tí sín israelita k'uátøye sín tí Ntayaon Kjátse kixin k'óna nche xamá, a ntá tió tí sín Egipto tjinkaon sín chróchréhe sín xikaha la kjánchó kjuínhin sín tí nta a.*

30 **A** ntá tí fe k'uéchónta tí sín israelita la xítjen tí tjat'ò t'inkákuènxín tí chjasin Jericó, tió kjuixin k'uántatjen sín yato yaon tí chjasin a.†

31 **A** ntá tí fe k'uéchónta tí tjan Rahab, na mé ijnko tjan k'uéchónta nchónhya chojni ntoa, ntá k'uénkohya tjan kaín tí sín jiehe kuítekakonhya, kixin tsíkjanjon tjan kjuachaxin kixin kjuaxróxin tsíkitohe ntøe tjan tí sín israelita kjujitsàya sín tí chjasin Jericó.‡

‡ 11:21 Génesis 47.31–48.20 § 11:22 Génesis 50.24–25 * 11:23 Éxodo 1.2; 2.2

† 11:24 Éxodo 2.10–12 ‡ 11:27 Éxodo 2.15 § 11:28 Éxodo 12.21–30 * 11:29 Éxodo 14.21–31 † 11:30 Josué 6.12–21 ‡ 11:31 Josué 2.1–21

³² ¿Nkehe *naxa* chróntáxrjan? Sintak'itjáyan tiempo *naxa* chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta.

³³ Kíxin tí fe k'uéchónta tí jehe sín kjuacha sín k'uetōan sín jína ókjé chjasin, la ko jína kjuínchekitoexín sín ijíé chojni, la ko k'uáyéhe sín tí nkehe tsíntáchro Dios kíxin tsjanjon ch'án, la ko k'uikjehe sín ir'va koxra,

³⁴ la ko k'uanka tí xrohi chróchexín sín, la ko kjuachahya tí espada chrók'uenxín sín. A ntá tí sín chrakon la kófuérte sín, k'óna sín chojni tsehe kjuacha sín kjuánjonko sín tí sín soldado tsíkjixín ókjé.

³⁵ Kjaxin k'uék'ixin chojni chjin k'uáyéhe ínaá tí chojni tsík'en kuènte sín tsíxechón ínaá.

A ntá í so sín la kjuasote sín k'uénxin sín kíxin kjuínchemáhya sín kíxin kuinkáchónki sín Dios kíxin ó nohe sín kíxin tsoxechón sín antsí jína ínaá.

³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín.

³⁷ Í so sín la ixro k'uénxin sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uénxin sín espada, la í so sín k'uék'aji sín tsík'inkáya sín tjoé kolélo la ko tjoé kotèntso, nòa sín, kjuasóte sín, kjuaxróxinhya la náxrxónhya k'uéjó sín.

³⁸ A ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjuí sín nteje, la ko jna, la ko tjo síxrja la ko tōye.

³⁹ Kaín tí sín a kónhen sín prueba kíxin á chaxín chóna sín fe la kjónté xíkaha k'uáyèhya sín tí nkehe tsíntáchro Dios kíxin tsjanjon ch'án

⁴⁰ kíxin Dios kjuenkayáxin ch'án ijnko nkehe antsí jína kíxin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakoxín sín tí fe k'uéchónta sín, la ntá chrókuítōheni ntáha kaín tí nkehe t'inkákonhen, la ko tí jie chrókjuachroeni, a ntá chrókjuich'eni jína tí xra chóntani la ntá chrókjuachani antsí má chrókónoheni.

² Jehó Jesús chrókuinkáchónkini kíxin jehe ch'án kjuanjon tí fe chóntani kíxin jína kjuakoxín ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuèhya ch'án tí nkehe kónhen ch'án ik'uén ch'án, kíxin nohe ch'án kíxin

tsjixin tsjasóte ch'án ntá náxrjón tsjak'e ch'án la ko tsochéhe ch'án kixin tsjak'etjaxin ch'án tí tja chjina tí trono kuènte Dios.

³ Méxra chrókjuenkayáxinrá jahará nkexrí kjuakoxin ch'ín Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án.

⁴ A ntá jahará naxa k'uénxinhyará tí tjanjonkoará tí jie.

⁵ ¿Á k'uitjáyanhanrá tí jahará tí nkehe ntaxraxinkaonrá Dios kixin éxi xjeen ch'án t'ikon ch'án tí jahará? Éxi ntá chro xroon itén Dios kixin:

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kixin Ìnchéni mé tjentuéhe tí sín tjuèhe ch'án la ko nchekjasóte kaín tí sín ts'áyéhe ch'án ts'óna xjeen ch'án.*

⁷ Chrókuítekáonrá tí nkehe t'etqan Dios kixin Dios t'ikon kixin éxi xjeen ch'án tí jahará. ¿Á síin ijnko it'é xjan chrokjuentuéhya tí xjeen?

⁸ A ntá tí chrókjuentuáhyará Dios tí jahará éxi tjentuéhe ch'án kaín tí xjeen ch'án, ntá jahará kjá jehya xjeen ch'án chaxín.

⁹ A ntá tí naxa k'uéchánjanni, na mé it'éni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuinchexiteyéheni It'éni tjen nkaya nkajni kixin chróchóntaxínni kjuachón.

¹⁰ It'éni ntihi chjasintajni kjuentuéheni ch'án kjónté kánhyó sé éxi nkexrí kóxrjínhin ch'án; a ntá It'éni Dios tjentuéheni ch'án kixin jnkojína chrók'uejóni, kixin chrók'ónani tjóá kixin jehe ch'án la tjóá ch'án.

¹¹ Chaxín ninkehó xikaha chrókjuinchekjasóte Dios tí jeheni chrókóxrjínhinni tí nantá chrókónhenni kixin tí kjuatjoté. A ntá xikaha ts'itjaxínni tí kjuaxróxin éxi ijnko nkehe náxrjón kjuachani.

Tí sín tjanoá tí kjuasáyé Dios

¹² Méxra tjisójirá tí tjára tsíkóxrjé la ko tóch'inrá chóntahya fuerza,

¹³ la ko chrókjuéyará tí ntia ntoá. A ntá tí totará níhi xitjahya tjixinrá chrókuitohe jina la ko chrókóniehya inaá.

¹⁴ Chrókóxakonhanrá kixin kjuaxróxin chrók'uejorá kaín rá, jnkojína tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni.

¹⁵ Chrókóxakonhanrá kixin nijnkorá chrókuitoéhyará tí kjuasáyé Dios la ko nijnkorá chrók'ónahyará éxi ijnko nuèe ka tsjá chóna veneno chrókóniéxin tí í so chojni.

* 12:6 Job 5.17; Provérbios 3.11-12

16 Nijnko tí jahará chrókjuásinkoará jie ijnko chojni chjin ókjé, la ko chrókjoníehyará tí nkehe tjóá éxí kjuích'e ch'ín Esaú, kixin jnkokoá comida kjuínchekjixin ch'án tí nkehe chróchóna ch'án kixin xjan sao jehe ch'án.†

17 Jahará ó nohará kixin chr'éxin, tí tjinkaon ch'án kixin chrókjuincheyaon it'é ch'án tí jehe ch'án la í xitjahya tsoyaon ch'án kixin kohya nkexrí chrók'uixitóxín tí nkehe tsikjich'e ch'án kjónté imá chrótsjánka ch'án.‡

18 A ntá jahará la jehya kóchjinará éxí kóchjina tí sín israelita tí jnā jína chrótsé sín tí síchr'ákjen xrohi, tí tjen tí sítié t'inkaséyanhya la ko tí chjéhe xrinto.

19 Na ni tsikíenhyará tí tsintáchro trompeta, la ko tí itén Dios nixja. A ntá tí sín tsíkinhin tí tan a na mé chronòa sín kixin í chrónixjahya ch'án inaá,§

20 mé xikaha ichro sín kixin tsjachahya sín sinchexiteyá sín tí nkehe k'uetqan ch'án kixin “Tí nkexro tsinkátja tí jnā mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jnā la chrók'uen.”*

21 Ijnko kjuachrakon jie tí nkehe k'uíkon sín la kjónté ch'ín Moisés tsintáchro ch'án kixin: “Kjāxin síxranqana chrakonna.”†

22 A ntá jahará tsíkóchjineherá tí jnā Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel

23 tsíkójnkotsé sín kixin tsochjéhe sín kjuasáyá Dios, la ko tí sín tsíkójnkotsé sín tsík'óna sín xjeen Dios saoxín ts'ínixín ihnié sín nkaya nkajní. Jahará tsíkóchjineherá Dios, jehe ch'án mé Juez sinchekitqoxín ch'án ijjié kaín chojni, la ko tsíkóchjineherá tí nchakuen chojni jína ó tsíkjinchetjóá Dios,

24 la ko tsíkóchjineherá ch'ín Jesús, jehe ch'án mé nixjāxin ch'án tí pacto nixin kixin tí ijnié ch'án k'uíti kjuínchetjuáxinni ch'án. A ntá antsí jína chrónkaxín tí ijnié ch'án, a ntá kánhyó tí ijnié ch'ín Abel.

25 Chrókóxakonhanrá chrókuítekákonhénrá tí nkexro tjenixja. Kixin tí sín kjuanoá Dios tíó kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kuixín nkaya nkajní.

26 A ntá tí itén Dios tí yaon a kjuínchekinkí nonte. A ntá jie tsintáchro ch'án kixin: “A ntá inaá jehya nonte ó sintakinkíá. Náhí. Kjāxin nkajní sintakinkíá”,‡

† 12:16 Génesis 25.29-34 ‡ 12:17 Génesis 27.30-40 § 12:19 Éxodo 19.16-22, 20.18-21 * 12:20 Éxodo 19.12-13 † 12:21 Deuteronomio 9.19 ‡ 12:26 Hageo 2.6

27 **A** ntá tí tsíntáchro ch'án kixin “ínaá” mé t'axrjexín kixin tsjakjín ch'án tí nkehe jína tsinkí, a ntá tsítóhe ch'án tí nkehe xitjahya tsinkí.

28 **A** ntá tí ts'áyéhēni tí kjuachaxin kjuanjon Dios la xitjahya ts'ixinkí tíha. Méxra chróchjēheni Dios kjuasáya chrórxaxinkaonni ch'án chróchrakonhēni ch'án

29 kixin tí Dios kuēnteni mé éxí ijnko xrohi tsjacha sinchek'itjáyan kaín nkehe. §

13

Nkexrí chrók'uejóni kixin chrókóchéhe Dios

1 Méxra chrókuitóéhyará chrótjuèherá kichuárá.

2 Chrók'uitjáyanhyará chrókjuánjonrá kjuachaxin chrókuitóhe ntóará tí sín tsíkji_xín kjín. Mé xikaha kjuích'e iso sín la kjónté ángel tsík'áyéhe sín la kónoehya sín.*

3 Xráxinkáonrá tí sín tjejóchjina éxí kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxí kjaxin tí jahará xikaha chrókonhanrá kjaxin.

4 Kaínrá chróchontehará kjuasáya tí kótehe chojni. **A** ntá jahará tsíkótahará la jína chrók'uejokoará kichuárá chrótjuèherá kichuárá. **A** ntá tí sín tjinkaon tsochónta chojni chjin ókjé la Dios sinchekjasóte sín kixin xikaha ich'e sín.

5 Kénhyó má chrókóxrjínhanrá itsjé chichaon. Chrókócháhará kjónté tí kánhyó tsjé chontará; kixin tsíntáchro Dios kixin: “Janhan na tsítóahya tí jahará la ko ts'itjáyanahya tí jahará.”†

6 Mé xikaha chrakonhyani tsontáchroni kixin:

Ìnchéni mé tjinkitsani,

méxra chróchrakonhyani kjónté ichrén nkehe chrókjuich'eheni chojni.‡

7 Chrórxáxinkáonrá tí sín kjuínkítsa tí jahará kjuakohará sín itén Dios, chrókjuenkayáxinrá nkexrí k'uejó sín ntá xikaha chrókóyóhará sín éxí tí fe k'uéchónta sín.

8 Jesucristo mé itjen ch'án ijna la ko ijie la ko jnkochrín.

9 Chrókuitóéhyará chrókjuakohará chojni ijnko nkehe ókjé chrókuinkachónkirá. Íchá jína tí asánrá chrók'uáyéhe fuerza kixin Dios tjuahará la jehya tjetóan chrókjuinchexiteyéheni tí nkehe t'etóan nkehe sineni. Mé xikaha tí sín kjuích'e xikaha kjuínchexiteyá tí nkehe k'úituenhen sín nkexrí chrókjóne sín la ninkehó kjuínkítsahya tíha.

§ 12:29 Deuteronomio 4.24

*

13:2 Génesis 18.1-8, 19.1-3

† 13:5

Deuteronomio 31.6 ‡ 13:6 Salmo 118.6

10 **A** ntá jeheni chóntani í jnko altar ḱixin k'uenyákonhenni Cristo la ntiha kohya kjuachaxin chrókjónexín tí nchat'á kjuích'e xrá nkaxenhen nínko ós.

11 **A** ntá tí nchat'á t'etóan judío kjuíko sín tí ijnié ko nkaxenhen tí Cuarto Antsí Tjóá ḱixin tí nkehe la tsjatsen tí ijie sín. **A** ntá tí cuérpóé tí ko kjuakaxín sín ikon tí chjasin k'uejé sín.

12 **Kj**axin Ìnchéni Jesús kjuasóte ch'án k'uénxin ch'án ikon chjasin ḱixin tsotjuáxin kaín ijie chojni tí ijnié ch'án.

13 **Tsochré**hēni Ìnchéni Jesús éxí k'uénxin ch'án ikon chjasin kjónté tsjasóteni éxí kjuasóte tí jehe ch'án kjuikosáyehya sín tí jehe ch'án.

14 **A** ntá ntihi chjasintajni chóntahyani nijnko chjasénni chrók'uitjáyanhya; a ntá xritjeyáni tí chjasin itsi chr'éxin.

15 **Mé**xrā chrókuítóehyani chrókjuikosáyeheni Dios ḱixin Jesucristo k'uenyákonhenni ch'án. Tí xraxinkaonni ch'án la yóhē tí ko tsík'en tsíchjéhe sín Dios. Yóhē xíkaha chrókjuanjonni ḱixin ir'vani ó chrókjuikosáyexínni ch'án.

16 **Chrók'**uitjáyanhyará chrókjuích'erá xrā jína la ko chrókjuínkítsará kíchuará. Tí xíkaha chrókjuích'erá la imá tóxrjínhjn Dios.

17 **Chrókuíte**kákonhénrá tí sín tjakohará chrókjuínchexiteyéhérá tí jehe sín. Jehe sín mé t'ayakonhen sín asánrá ḱixin jehe sín la ó nohe sín ḱixin tsjanjon sín kuentá tí tjen Dios. Tsjínkítsará sín ḱixin tsochéhe sín sich'e sín xrā la tsonínkakonyha sín. **A** ntá tí chrókjuínchek'ávárá sín, ntá ninkehó tsjachahya sín tsjinkítsa sín tí jahará.

18 **Nixjehérá** Dios ḱixin tí jeheni kaín ni, ḱixin chaxín jína kjuenkayáxinni la ko tjinkaonni ḱixin jína chrók'uejóni.

19 **Tjánchíá** xrā ó ḱixin chrónixjehérá Dios ḱixin chrókjuanjon ch'án kjuachaxin ḱixin tjoka chrókjan janhan chrók'uejóni.

Tjanhia ch'án ḱixin chrókóyaon sín

20 Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetoan t'ayakonhen tí kolélo, la tí ijnié ch'án mé tsoxiteyáxin tí pacto sich'e xrā jnkochŕixín,

21 jehe Dios mé tsjinkítsa tí jahará ḱixin jína chrók'uejorá la ko kaín xrā jína chrókjuích'erá kixin xíkaha tjinkaon ch'án; ḱixin jehe ch'án t'etuēnhenni ch'án kaín nkehe nkexrí tjinkaon ch'án ḱixin tí kjuachaxin chóna Jesucristo. Mé xíkaha chjéheni Cristo kjuasáya jnkochŕixín. Amén.

22 **Kíchóni**, xrjanóahará ḱixin tóninkákonhyará ḱixin tí palabra xrjanka sjntaxraxinkáonrá. Méxrā ikjian tí xroon kjónté kánhyó tsjé nixja ts'ayéhérá.

²³ Chrókónohará kixin kichó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

²⁴ Nixjehérá jnkojína kaín tí sín tjítaón ntja tjako la ko kaín tí sín kichó ni tinkáchónki Dios. Tí sín tinkáchónki Inchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayehe

¹ Janhan Santiago mé t'aha xra Dios la ko Ìnchéni Jesucristo nixjaha kaín tí sín tsík'axrjeníxin tí teyó xjeen ch'ín Israel tsíxikayehe sátsíkji kuenté chjasintajni.

Dios mé tsjanjon tí kjuaxrexinkaon jína

² Jahará kichó ni, chrókócháhará kjónté chrók'uats'ínkará ichrén nkehe náxrjónhya.

³ Ó nohará kixin tí ichrén nkehe chrókónhanrá kixin tinkáchónkirá Ìnchéni la t'ichjánxin chrókjuachará la chrókóninkákonhyará.

⁴ Chrókónohará kixin tí chrókóninkákonhyará la tíha mé ijnko xra jína chaxín kixin ntá jahará ijnko chojni chaxín kjuacha titekaon la í t'itjányanhya ninkehó.

⁵ Tí jnkojín tí jahará t'itjányan kjuaxrexinkaon la chrókjuancheherá Dios la Dios mé chrótjáhará ch'án tíha. Jehe ch'án mé xráxín tsjanjon ch'án kaín nkehe ts'áyéhe tí chojni tjanchia la tsonínkakonhya ch'án.

⁶ Tió chrókjuancheherá Dios nkehe la kénxín asánrá chrókjuanchiará la chrókjóhya asánrá ninkehó. A ntá tí chojni tjo asén la éxí ntayaon tjiko xrinto ijnko lado la í jnko lado.

⁷ A ntá tí xíkaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni.

⁸ A ntá tí nkexro xíkaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

⁹ Tí kichó ni tinkáchónki Cristo la kjónté nòa chóntahya it-sjé nkehe chjasintajni la kjónté xíkaha chrókóchéhe kixin tí tinkáchónki ch'án Ìnchéni la antsí má sínkí tíha.

¹⁰ A ntá tí nkexro rico kjónté chrók'uitjányan tí nkehe chóntha la antsí chrókóchéhe kixin tinkáchónki ch'án Ìnchéni, kixin tí nkehe chóntha ch'án la kánhyó sínkí la ts'itjányan éxí itsjo tsík'óna ka.

¹¹ Tió tsjiton yaon la tsosóa imá la tí ka tsoxámá la ko tí tsjo la ts'ánótjen la tí náxrjón tsjehe la tsjeje. Mé xíkaha tsonhen tí ch'ín rico, ts'itjányan ntá tsítqhe ch'án tí xra k'uéchóntha.

Tí nkehe tsonhen chojni

¹² Náxrjón tí nkexro tsjacha ts'atsínka tí nkehe náxrjónhya tsonhen. A ntá tí tsjacha ch'án ts'atsínka kaín tí nkehe náxrjónhya tsonhen ntá ts'áyéhe ch'án tí corona kuente

kjuachón kixin Dios tsíntáchro ch'án kixin tíha mé tsochjéhe ch'án tí sín tjuèhe ch'án.

¹³ **A** ntá jnkójínrá tí chróntáchro **asánrá** chrókjuich'erá ichrén nkehe jínahya, la chróntáchrohyará kixin Dios tsíkjanjon kjuachaxin **xikaha** **sich'erá** kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'ueṭoan ch'án kixin ninkexró chrókjuich'e ijnko nkehe jínahya.

¹⁴ **A** ntá jnkójín chojni tí ó jehó tjenkayáxixín **asén** tí jínahya la mé **xikaha** tsjachroe, tsjasin sín jiē.

¹⁵ Mé **xikaha** tí nkehe jínahya tjenkayáxin chojni mé **tjixín** tí jiē. La mé **xikaha** ts'ánkí tí jiē la ntá tíha ts'enxín chojni.

¹⁶ Kichóni, chrókjuich'iyéhyará **asánrá**.

¹⁷ Kaín nkehe jína ntoá t'áyéheni mé **tjixín** nkajní tí tjen Dios tí nkexro kjuich'éna kaín tí xrohi kuènte nkajní. Jehe ch'án mé Dios jnkochrín la jehe ch'án mé xitjahya ts'ixitóxín.

¹⁸ Jehe ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxí tí nkehe senó tsík'óna, mé **xikaha** tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chróxráxinkáonrá tíhi jahará kichó ni. Kaínrá chrók'uejorá chrókuinhínrá jína la tjokahya chrónixjará kixin tjokahya chrókóninkáonrá.

²⁰ **A** ntá tí chojni tjoka tónínkaon la ch'ehya tí xra jína éxí tóxrjínhin Dios.

²¹ Méxra **tjtohé**rá tí nkehe tjuáhya la ko tí nkehe jínahya kjuachjínqxínhin siín nkuixín la chrókjuínchehnkehyará, chrók'uayéhérá tí itén Dios chrók'uinka nkaya **asánrá**. Tí tan a mé chóna kjuachaxin kixin chrókuaáxinrá.

²² Jehya kixin chrókuinhónrá; jahará chrókjuich'erá éxí tí nkehe tjako tí tan a. **A** ntá tí náhi la jahóra ch'iyehérá **asánrá**.

²³ **A** ntá tí chojni tsinhón tí tan la ntá sinchexiteyáhya la éxí ijnko chojni tsjexín xrosentá tí kon ó.

²⁴ **A** ntá tí k'uikon tí kon la sátsji la tuénxín k'uitjáyenhen nkexrí tsjehe.

²⁵ **A** ntá tí nkexro k'uitjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etōan tíha la ntá náxrjón tsjak'e kixin kjuínchexiteyá ch'án.

²⁶ **A** ntá jnkójín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'iyehé **asén** la ninkehó sínkíhya tí nkehe tinkáchónki ch'án.

²⁷ **A** ntá tí nkexro tinkáchónki Dios chaxín jína la ko tjasinhya jiē nkayakon It'éni Dios la mé tíhi: mé chrókjuinkítsa tí chojni

nòé la ko tí chojni k'án chóntahya nkehe sine sín ọ níhi sín, la ko chrókjuasinhya tí jiẹ jínahya síin chjasintajni.

2

Jnkokón chrókjuikosáyehé kíchó ni

¹ Kíchóni, jahará tinkáchónkirá Ìnchéni Jesucristo imá tjetóan la t'ichjánxìn chrókjuikosáyehérá kaín chojni jnkokón.

² Éxí ijnko chojni rico chrók'uixenhen tí tójnkotsérá la chónṭa koch'aninko oro la ko chónṭa iké náxrxón, a ntá ntiha kjaxin chrók'uixenhen ijnko chojni nòà chónṭa iké ntaxin.

³ A ntá tí chrókjuikosáyehérá tí chojni t'itsa ka jína la tsontácherá ch'án kixin: “Ntihi ąntsí jína tjak'e.” A ntá tí chojni nòà tsontácherá ch'án kixin: “Jaha la tjak'éxian totá ntiha ọ tjak'e nonte ó.”

⁴ Mé xíkaha la jnkokónhya tjíkosáyehérá kichuárá la tí nkehe jínahya tjenkayáxinrá.

⁵ Kíchóni tjuahará, tsinhínrá tíhi: Dios tsíkjejá tí sín nòà ntihi chjasintajni kixin ąntsí má tsinkáchónki sín tí jehe ch'án kixin ts'áyéhe sín tí kjuachaxin kuènte ch'án éxí tsíntáchro ch'án tsochjéhe ch'án tí sín tjuèhe ch'án.

⁶ A ntá jahará mé tjíkosáyehyará tí sín nòà. A ntá tí sín rico mé tjíkosáyehérá. ¿Á jehya tí sín rico tjanchia sín jiẹ sátjiko sín tí jahará nkayakon tí sín t'etóan ní?

⁷ ¿La á jehya jehe sín t'ántaxínhìn sín tí ihníé Cristo tjíkosáyeheni?

⁸ A ntá jahará la jína tjejoch'erá tí nchexiteyará éxí t'etóan tí ley éxí nixja tí xroon itén Dios kixin: “Chrótjuèherá kichuárá éxí tjuèxíná ąsánrá”.

⁹ A ntá tí jnkokónhya tjíkosáyehyará chojni la ntá xíkaha la tjásinrá jiẹ la nchexiteyéhyará éxí tí nixja tí ley kuènte Dios.

¹⁰ A ntá ijnko nkexro titekaon kaín tí ley la ntá kjuínchexiteyáhya jnkokoá tí nkehe tjetóan la mé tí xíkaha la kjuínchexiteyéhya kaín tí nkehe t'etóan tí ley.

¹¹ Ntá Dios tsíntáchro kixin: “Chrókuákjahyará í jnko chojni chjin ókjé”, la kjaxin tsíntáchro ch'án kixin: “T'oyánhyará kichuárá.” A ntá tí nkexro kuákjahya í jnko chojni chjin ókjé kjánchó kjuàya la kjuínchexiteyéhya tí nkehe t'etóan tí ley.

¹² A ntá jahará chrónixjará la ko chrókjuínchexiteyará kixin chrókjuanchiahya jiẹ tí ley sinchekaáni.

¹³ A ntá tí nkexro kuíkonóehya í jnko chojni la kjaxin tsíkonóehya Dios tí jehe. A ntá tí nkexro kuíkonóehé kíchó la mé xíkaha tsjacha tsaáxin ch'án tí yaon tsjixixín tsitóexín jiẹ.

Tí fe ch'ehya xraq la tsík'en

14 Kíchóni, ¿nkehe tsonhen ntáchrórá kixin chontará fe a ntá ninkehó nkehe jína tjákoxinhyará? ¿Á ntáchrórá kixin xikahó chrokuaáxinrá?

15 Éxí ijnko kichó ni ntoa o kichó ni chjin chóntahya iké o chóntahya nkehe sine sín t'ichjánxinhin sín jnkójín yaon.

16 Ntá jnkójín tí jahará tsontácherá sín kixin: “Sátjia jnkójina la ko ts'itsa ká la ko sinte jína.” A ntá tí kjuánjonhyará tí nkehe t'ichjánxinhin tí cuerpoé sín la sínkíhya tí nkehe ntáchrórá.

17 La mé xikaha tónhen tí fe la tí tjákoxinhyará ninkehó nkehe jína kjuich'erá la éxí nkehe tsík'en tí ntáchrórá.

18 A ntá jnkójín chojni tsontáchro kixin: “Jaha chonta fe a ntá janhan it'a tí xrá jína.” Tí xikaha la jaha tjákoxian tí fe kjónté kohya xrá la janhan tsjákoxian tí fe la ko tí xrá jína jtét'a.

19 Jaha titekávan kixin jnkokoá Dios itjen la chaxín jína xikaha, kjánchó kjaxin tí jínahya titekaon tíha la ko síxranká chrakon.

20 T'ónahyará lontí. Jahará la nohará kixin tí fe ch'ehya xrá la chónkó tíha.

21 Dios kóxrjínhin tí nkehe chrókjuich'e ch'ín Abraham, tí nkexro k'uaxrjeníxinni ósé, tíó chrók'óyán ch'án tí xjeen ch'án Isaac la chrókjuanjon ch'án chrók'uáyéhe Dios.

22 Chrókónohará kixin tí fe k'úechónta ch'ín Abraham la kjuakoxin ch'án tí xrá kjuich'e ch'án la ntá xikaha kjuakoxin ch'án kixin antsí má kuinkáchónki ch'án Dios.

23 Mé xikaha xiteyá éxí ntáchro xroon itén Dios kixin: “Abraham kuítেকаон Dios la ntá Dios ntáchro kixin jína ch'án”, la ntá Dios kjuínchek'in ch'án amigo kuènte ch'án.

24 Chrókónohará jahará kixin Dios la t'áyéhe ch'án chojni la nchetjóá ch'án kixin tí xrá jína ch'e sín la jehya kixin jehó chrókuinkáchónki sín ch'án.

25 Mé kjaxin xikaha kónhen tí tjan Rahab, tí tjan k'úechónta nchónhya chojni ntoa. Jehé tjan kjuanjon tjan kjuachaxin kuítóhe ntóe tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntía, a ntá Dios la kóxrjínhin tí nkehe kjuich'e tjan.

26 Éxí tí cuerpoé chojni chóntahya nchakuen la tsík'en la kjaxin xikaha tí fe la tsík'en tí ninkehó tjákoxinhya tí nkehe jína chrókjuich'e sín.

3

Tí kjuachaxin chóna nejen chojni

1 Kíchóni, chrók'ónahya tí jahará nchónhya maestro kixin tí ntoáhya chrókjuàkorá la tíha mé chrókjuasótiaxinrá imá.

² Kaínni chóntani jię, a ntá tí nkexro ninkehó jię ntáchrohya la ijnko chojni jína tíha la ó tsjacha ch'án ts'ętuęnen ch'án kuenté tí cuerpo kuęnte ch'án.

³ Éxí tí kokate tsochónta chica freno tí ir'va va kíxin tsitekaon va la sátsjiko tí ñché va la tsjacha ch'án ts'ętuęnen kuenté tí cuerpo kuęnte va.

⁴ Tjenkayáxinrá kjaxin nkexrí tjejó tí ntabárcō kjónté imá jié la tsjacha tí xrintō chjéhe tjiān sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án.

⁵ Mé xikaha tí ir'va chojni. Kjónté ijnko nkehe imá ntsí kuęnte tí cuerpo kjánchó nchónhya nkehe jínahya ntáchro éxí ijnko xrohi ntsí la tsjacha tsochéxin kuenté ijnko jnā jié.

⁶ Mé xikaha tí ir'vani la éxí ijnko xrohi kíxin nchónhya jię t'axrjexín la éxí ijnko veneno ncheníhi cuerpo mé xikaha mé tsjasixín kuenté cuerpoé chojni jię. La tí kjuachaxin kuęnte ir'vani la mé tjixín tí infierno la tíha mé tjixín tí ts'itjáyaxínni.

⁷ Tí chojni la tsjacha sinchesáncho kaín ko jięhe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va.

⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxí ijnko nkehe chóna nchónhya veneno ts'ęnxín chojni.

⁹ Tí ir'vani la kjaxin tjikosáyexinni It'éni Dios la tíha kjaxin t'ántaxięnxinni chojni tsíkjich'éna Dios éxí tsehe tí jehe ch'án.

¹⁰ Kjaxin tí ir'vani t'axrjexín tí nkehe itsjeni kuęnte Dios la kjaxin tíha t'ántaxínxinni. Kíchóni, xikahya chrókjuich'erá.

¹¹ Jnkokoá tòye xitjahya ts'axrje ntā xé la ko kjaxin ntā tsjá.

¹² Kíchóni, ¿á jína tí nta higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntā xíjnta la ko ntiha kjaxin chrók'uaxrje ntā xé.

Tí kjuaxrexinkaon jína

¹³ Tí tjen jnkójín nkexro tí tjejorá nohe jína la ko tienxín la chrókjuakoxín ch'án jnkójína la ko chrókjuinchehnkexínhya ch'án tí nkehe imá nohe ch'án.

¹⁴ A ntá tí jahará chóna kjuachjinoxínhin asánrá la tjinkáonrá jahorá chrókuétoaná. A ntá tí xikaha la chrókjuinchehnkexínhyará tí nkehe nohará kíxin tí xikaha la ch'iyará la tjinkákonhyará chróchronkará tí nkehe chaxín ntoá.

¹⁵ A ntá tí xikaha sinchehnkerá la jehya tí kjuaxrexinkaon kujxin tí tjen Dios. Tí xikaha la kjuachaxin kuęnte chojni chjasintajni ó la ko kuęnte ch'ín Tsochren.

¹⁶ A ntá tí xikaha siín kjuachjinoxínhin la ko tjinkaon chojni jehó chrók'uetōan la ntá xitjahya tsonhen xra yóxin kixin xikaha siín nkehe jínahya.

¹⁷ A ntá tí siín kjuaxrexinkaon jína tsíkixín tí tjen Dios la saoxín tjejó chojni jína la ko kjaxín kjuaxróxin tjejó sín la ko náxrjón tjejó sín la ko jnkojína nixjehe kichó sín la ko kjaxín tikonóehe kichó sín la ko tí xra jína tjejóch'e sín la tí nkehe ntoá nixja sín.

¹⁸ Tí nkexro tjejá tí kjuaxróxin xikaha chrók'uenka sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

¹ ¿Nketí tjixín tí guerra la ko tí kjuanínkaon tjanjonkoaxínrá kichuárá? Táha la mé jahórá t'axrjeníxinrá kain tí kjuanínkaon a.

² Jahará tjinkáonrá tsochontará ichrén nkehe ntá chontahyará ntá tónínkáonrá t'oyánrá kichuárá. Tóchjinoxínhanrá kixin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjinkáonrá kixin tjanchehyará Dios.

³ La tí tjanchará la ts'ayéhyará kixin ntoáhya kjuanchiará kixin tjinkáonrá chrókuicháxinhanrá ó la chrókuinchehnkexínrá.

⁴ Jahará chojni titekakonhya Dios. ¿Á noahyará tí jahará kixin tí imá tsotjuèhéra chjasintajni la ntá tsoninkákonhérrá Dios? A ntá tí jnkojínrá tjinkáonrá tsotjuèhéra chjasintajni la tsokjanrá tsoninkákonhérrá Dios.

⁵ ¿Á tjenkayáxinrá kixin ti nkehe ntáchro xroon itén Dios la á chónkó? Ntáchro xikihi: “Tí Nchakuen Dios kjuanjon ch'án k'uayéhéra la tjuahará ch'án la tsonínkaon tí tsitohérrá ch'án.” Mé xikaha ichro Dios.

⁶ Kixin Dios la imá tjinkjitsani ch'án, méxra ntáchro xroon itén Dios kixin: “Dios la nínkakonhen tí chojni nchehnke a ntá tjinkjitsa ch'án tí chojni nchehnkehya.”*

⁷ Méxra chrókjuinchehnkehýará. Íchá jína chrókuítekáonrá Dios la chrókjuánjonhyará kjuachaxin tí jínahya chrók'uetuānhanrá ntá chrók'uikon tí jínahya kixin chrók'uetuānhyá ntá sáchrókjui.

⁸ Chrókóchjineherá Dios, la tí jehe ch'án kjaxin tsochjinahará ch'án. Jahará chojni chóna jie la chrókjonemará tjára. Chrókjuinchetjóará asánrá kixin chrótjuèhérrá Dios la kánhyó chrótjuèhérrá chjasintajni.

⁹ Chrók'uavará la ko chrótsjankará. Chrókjuínkírá tí tjanorá la chrótsjankará la chrókjuínkí tí cháhará la chrók'uavará.

* 4:6 Proverbios 3.34

10 Chrókjuinchehnkehýará chróxráxinkáonrá Ìnchéni a ntá jehe ch'án chrókjuínkĩtsa ch'án antsí chrókónohará.

Chrók'uántaxíenhyani kichó ni

11 Kichóni, chrók'uántaxíenhyará kichuárá. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jie tí ley. A ntá tí t'eka ch'án jie tí ley la mé t'óna juez chrínkí chrókuitekaon tí ley.

12 Kíxin jnkokoá nkexro kjuanjón tí ley la tí nkexro a mé tí juez la jehe ch'án sinchekaá ch'án chojni la ko sinchekjasóte ch'án chojni. ¿A ntá nkexro tí jaha kíxin chrókjuanchéhé jie tí kichuá?

Í noehyani nkehe tsonhen ntóye

13 A ntá jie jahará chrókuinhínrá tíhi kíxin tsíntáchrórá kíxin: "Tije o ntóye sáchrokjuini ijnko chjasin la ntiha chrók'uejóni ijnko nánó chrókjuinchekjini nkehe chrókjuachani chichaon."

14 A ntá jahará noahýará nkehe tsonhen ntóye kíxin tí tjejóchónni la éxi ijnko tjuj nonte ts'ikónni a ntá tuénxín ts'itjáyan.

15 Íchá jína chróntáchrórá kíxin: "Tí tjinkaon Ìnchéni la naḡa chrók'uejóchónni la chrókjuich'eni tíhi o tíha."

16 A ntá jahará tí nixjará la imá ihnkerá la kaín tí kjuahnke la mé jínahya.

17 A ntá tí nkexro nohe chrókjuich'e tí nkehe jína la ntá ch'ehya xikaha la mé antsí tjasin jie.

5

Tí nkehe chrókuinhin tí sín rico

1 Jahará rícorá chrókuinhínrá tíhi. Chrótsjankará la ko chrók'uíyatorá kíxin tí nkehe tsonhanrá tsjasótíará.

2 Tí nkehe rícoxínrá la ó tsíkótje la ko tí ka chontará la ó tsík'in kué.

3 Tí oro la ko tí plata chontará ó tsíkóchjisen. Tíha mé tjakoxin kíxin nkexrí tsonhen ntoará tsoche. ¿Nkehe tsonhen kjuásintonrá nkehe kíxin ó tsi tí yaon tsjixixín?

4 A ntá tí nkehe chrókjuacha tí sín kjuít'ahará xra la kjuénkehýará sín la ntá tjanchia sín jie tí jahará la t'èya sín, ntá Ìnchéni imá t'etoan mé kuínhin kíxin xikaha ichro tí sín kjuích'e xra.

5 A ntá ntihi chjasintajni la náxrxón tjejorá la kaín nkehe tóxrjínhanrá ch'erá la éxi iko imá jína ine la tsíkótsanka la ntá itsji yaon ntá its'en la mé xikaha tsonhanrá.

6 Kíxin jahará la kjuinchekjásóterá la k'oyánrá chojni ninkehó jie chóntahya kjónté kohya nkehe kjuít'ahará sín.

Chrókónínkakonhyani chróchónhenni la chrónixjeheni Dios

⁷ Méxra kichó ni, chrókóninkákonhyará chróchonénrá tsok-janjian Ìnchéni. Éxí tí ch'ín ch'e xra nontee chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna.

⁸ Mé xikaha jahará la kjaxin chrókóninkákonhyará chróchonénrá chrókóxrjéhyará kixin tí yaon itsi Ìnchéni la ó chjina tsi.

⁹ Kichóni, chrókoninkákuenhyará kichuára kixin ntá chrókjuanchahya Dios jie tí jahará kixin Dios la mé tí juez la ó tjen ch'án tí ntója puerta.

¹⁰ Kichóni, chrókuankíhírá éxí tí sín k'uéchrónka itén Dios k'uéchrónkaxín sín kjuachaxin ihníé Ìnchéni. Jehe sín kjónté kjuasóte sín la kónínkakonhya sín.

¹¹ A ntá jeheni ntáchroni kixin kóchéhe tí sín a kjónté kjuasóte sín la kjuacha sín. Jahará la ó kuinhínrá kixin nkexrí kónhen ch'ín Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la kuikonóehé ch'án tí ch'ín a.

¹² A ntá kichó ni, chrókuakjénxínhyará ihníé Dios tjen nkaya nkajní la ko ni chjasintajni la nijnko nkexro chrók'uakjénxínhyará. Tí chróntáchorá chaxín la chaxín la tí náhí la náhí kixin Dios la chrókjuinchekjasótiahýará.

¹³ A ntá jnkójín tí jahará náxrjónhya tjejorá la chrónixjehérá Dios, a ntá jnkójínrá náxrjón tjejorá la chrótsjerá kuènte Dios.

¹⁴ A ntá tí jnkójín nkexro níhi la chrók'uíyehé sín tí sín táda t'etoan kuènte nínko kixin ntá chrónixjehé sín Dios kixin tí sinníhi la ko chróchjéhe sín aceite tí sín a kjuachaxín ihníé Ìnchéni.

¹⁵ Chrónixjehérá Dios kaín asánrá kixin tí sinníhi chrókuítóhe jína la ntá Ìnchéni chrókjuinkítsa sín, a ntá ichrén jie kjuasin sín la jehe ch'án sinchek'itjayan tíha.

¹⁶ Méxra chróchenkará kichuára tí jie chontará la ko chrónixjehérá Dios kixin chrókuítóhará jína. Tí nixjehé Dios ijnko chojni jína tinkáchónki Ìnchéni la chóna nchónhya kjuachaxin tíha.

¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án kixin ts'aniáhya chrin la ntá k'uániáhya chrin chjasintajni iní nánó ko t'ó.

¹⁸ A ntá chr'éxín kjuanchehe ch'án Dios kixin ts'aniá chrin la ntá k'uániá chrin inaá chjasintajni la jína k'óna tí nkehe k'uénka sín.

¹⁹ Kichóni, tí jnkójín chojni chrókjuichroe chrókuítóhe tí nkehe ntoá la í jnko nkexro chrókjuinkítsa kixin chrókjan tí nkexro a

²⁰ la chrókónohará tí jahará kixin jnkojín chojni tjinkitsa ijnko nkexro chóna jje tsokjanxin tí ntia jínahya k'uék'aji ch'án la ntá ó kjuínkitsa kixin tsaáxin asén tí ch'ín a kixin ts'itjáyannya ch'án la ntá chrók'uitjayan tí nchónhya jje k'uéchóna ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énhen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahá ch'án xra mé ikjian tí xroon chr'anhánrá jahará sátsíkjirá ókjé chjasin tjejorá, mé tjejorá estado Ponto, la ko Galacia, la ko Capadocia, la ko Asia, la ko Bitinia.

² Kjueyará It'eni Dios kixin jehe ch'án tsíkjenkayáxin ch'án ósé xíkaha. Kótjuáxinrá Nchakuen ch'án kixin chrókuítekáonrá ch'án la ko kótjuáxinrá ijníé Jesucristo. Kjuasáyé ch'án chrókuintayaonrá ch'án kixin antsí chrókuákjára tí kjuaxróxin kuènte ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kuikonóeheni ch'án kixin éxí kokjéxinni nixin kixin xechón Jesucristo. Mé xíkaha tjejóchónhenni sinchekaáni ch'án.

⁴ Mé xíkaha ts'ayéhérá jahará tí nkehe tsjanjon Dios chóna ch'án nkaya nkajní mé ijnko nkehe chónhya ts'itjayan, la ko chónhya tsokjita, la ko chónhya tsqxamá.

⁵ Dios mé t'ayakuanxínrá ch'án tí kjuachaxin kuènte ch'án kixin jahará tinkachónkirá ch'án kixin ntá tsjacha tsaará éxí tsíkjenkayáxin ch'án ósé mé tjinkaon ch'án kixin chrókuaará tí tsjixixín tsjeje chjasintajni.

⁶ Méxra xíkaha chrókócháhará kjónté ichrén nkehe chrókónhanrá iso yaon kixin jehí t'ichjánxin xíkaha itsjé nkehe chrókónhanrá.

⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxí yóhe chica oro xíkaha t'ichjánxin ts'atsínka tí siín xrohi tsotsjexín sín á chaxín jina kohya nkehe tsonhen. A ntá antsí má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xíkaha tí tinkachónkirá Ìnchéni t'ichjánxin xíkaha tsonhanrá kixin tsontáchro Dios kixin jina kjuachará ntá ts'ayéhérá kjuachaxin tió tsi Jesucristo.

⁸ Jahará tjuèhéra Jesucristo kjónté k'uíkonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jié kohya nkehe sincheyóeheni kixin imá náxrjón tíha.

⁹ Mé xíkaha k'uitjará nkexrí tsaáxin asánrá. Tíha mé tí nkehe tjejochónhénrá tinkachónkirá.

10 Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérá tí jahará.

11 Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'áyéhe ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkesá tsonhen tí nkehe chrónkaxín Nchakuan Ìnchéni.

12 Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uéjó sín. Náhí. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kuixin nkaya nkajní mé kjuínkítsa tí jehe sín. Kjaxin tí sín ángel tjinkaon sín chrók'uinkon sín nkexrí tíha.

Dios k'uíyehé ch'án tí jeheni kixin tjóá chrók'uejóni

13 Méxra chrókjuenkayáxinrá jína nkehe chrókjuich'erá kixin chrók'uejorá jnkójina. Káin asánrá chrók'uejochonhénrá kixin tí nkehe sintakitonhanrá Dios tíó tsi Ìnchéni Jesucristo.

14 Éxí ijnko xjan titekaon mé xikaha jnkójina chrók'uejorá jahará, chrókjuenkayáxinhyará éxí k'uékjenkayáxinrá senó naxa k'uéchonhyará Dios.

15 Náhí. Jnkójina tjóá chrók'uejorá kixin Dios k'uíyahará la mé jína ch'án la ko tjóá ch'án.

16 Kixin ntáchro xroon itén Dios kixin: “Jahará chrók'uejorá tjóá kixin janhan na mé ijnko nkexro tjóá.”*

17 Tí ntáchrórá jahará kixin It'ará mé Dios la ko ó nohará kixin jehe ch'án sinchekitoxín ch'án ijíé jnkójnko chojni, kixin t'ikon kixin jnkokón sínkí jnkójnko chojni, a ntá jahará chróxráinkáonrá ch'án jnkochrínín tí naxa tjejochónrá ntihi chjasintajni.

18 Dios mé kjuíntakaará ch'án kixin chrók'uejohyará éxí k'uék'ejó tí sín tsík'axrjeníninrá. Jahará ó nohará jína kixin tí nkehe k'uínáxinrá tsaáxinrá jehya ijnko nkehe chrókjueje éxí chica oro o chica plata.

19 Náhí. Ná mé k'uínáxinrá ijníé Jesucristo imá tjete. Jehe ch'án mé k'óyán sín la k'uáyéhe Dios éxí ijnko kolélo ninkehó xéhya va.

20 Kixin Cristo mé ósé tsíkónoxín ch'án tí naxa k'ónahya chjasintajni. Kjánchó jehya tuénxín kónhen tíha hasta tí chr'éxin ntá kónoxín ch'án kixin jína chrók'uejoxinrá tí jahará.

21 Ntá xikaha kónhen Cristo a ntá jie jahará la kuítekáonrá Dios, mé tí nkexro kjuínchexechón Cristo la ko kjuikosáyehe

* 1:16 Levítico 11.44

ch'án. Mé xikaha jahará tinkachónkirá Dios la ko tjejochonhénrá sintakaará ch'án.

²² A ntá jie ó kuítekaónrá tí tan chaxín ntoá kixin tjinkitsará Nchakuén Dios. Tíha mé kótjuáxin asánrá kixin ntá tsotjuèhérá kichuára. Mé xikaha chrótjuèhérá kichuára kaín asánrá.

²³ Méxra jahará kokjíhará nixin, jehya kixin naxa chrók'uaxrjenixinrá it'ará chjasintajni ntiho ts'itjayan. Náhi. Kokjíaxínrá itén Dios itjen jnkochrín.

²⁴ Kixin ntáchro xroon itén Dios kixin: Kaín chojni chjasintajni tóyóhe kayoa ó, a ntá tí kjuachaxin chóna la tóyóhe itsjo t'óna kayoa. Tí ka la tsoxámá a ntá tí tsjo la ts'anótjen

²⁵ a ntá tí tan kuènte Ìnchéni la tsjak'e jnkochrín.†
Tí tan í mé tsaáxinni la kuinhínrá tí jahará.

2

¹ Méxra títóhérá kaín nkehe jínahya, la ko kaín kjuach'ia, la ko tí ntoáhya tjenkayáxinrá, la ko tí kjuachjinoxínhin, la ko tí xrikoará kaín xín kjuach'ia.

² Chrók'uejorá éxi chánjan na ntá tsíkokjíhi la itsjen ó chrók'ui, mé xikaha jahará chrókjuéyará itén Dios, tíha mé chrókónohará la chrók'uánkixin kjuaxrexinkaon kuéntará kixin chrókuaáxinrá,

³ tí chaxín kjuátsoanrá kixin Ìnchéni la jína.

Cristo mé tí xro tjechón

⁴ Chrókóchjineherá Ìnchéni, mé jehe ch'án me éxi tí xro tjechón. A ntá tí chojni la kuítekakonhya tí xro a, a ntá Dios la kjuéyá ch'án tí xro a imá tjete sínkí.

⁵ Mé xikaha Dios kjuíchénará tí jahará éxi xro tjechón la Dios chrókjuíchéna ch'án tí jahará jnkokoá nínko kuènte ch'án, la mé ts'ónará nchat'á tsíkjinchetjóá Dios, a ntá chróchjehérá ch'án tí nkehe tóxrjínhin ch'án kixin tinkachónkirá Jesucristo.

⁶ Mé xikaha kjaxin xroon itén Dios ntáchro kixin: Tsjaké chjasin Jerusalén ijnko xro t'etqan ts'óna nchia, ijnko xro tsíkónoxín imá tjete sínkí

a ntá tí sín tsitekaon tí jehe ch'án mé tsoxiteya sín.*

⁷ A ntá jahará títekaónrá tí xro kixin imá tjete. A ntá tí sín kuítekakonhya, la mé tsoxiteyá éxi ntáchro xroon itén Dios kixin: Tí xro náxrjónhya kuitqenta tí sín ch'éna tjat'o, mé ijie mé k'óna tí xro tjetean.†

⁸ La ko kjaxin tsoxiteyá tí nkehe ntáchro xroon itén Dios kixin: Tí xro mé tsóténkixin sín la mé tíha ijnko tjo tsjitsínkaxín sín.‡

† 1:25 1.24-25 Isaías 40.6-8

* 2:6 Isías 28.16

† 2:7 Salmo 118.22

‡ 2:8 Isaías

Kjánchó jehe sín kóténkixin sín tí xro kixin kuítekakonhya sín tí itén Dios mé xráxín tsíkitoenxín sín xikaha tsonhen sín.

Tí sín tinkáchónki Dios

⁹ A ntá jahará tsík'axrjeníxinrá tí sín tsíkjejá Dios la ko tsík'ónará nchát'á ch'eherá xra tí rey, la ko tsík'ónará ijnko nación tjóá, la ko tsík'ónará ijnko chjasin kuente Dios kixin ntá tsochronkará tí xra náxrjón kuente Dios. K'uíyahará ch'án kixin ts'axrjéxinrá tí sítié ntá ts'ixenhénrá tí síin xrohi náxrjón t'inkaséyan kuente ch'án.

¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uékikonóahyará. A ntá jie la kuikonóahará Dios.

Chrók'uejóni ch'ehe ni xra Dios

¹¹ Kíchóni, xrjanóahará tí jahará kixin éxí chojni tsíkjixin ókjé chrók'uejorá ntihi chjasintajni chrókjuánjonhyará kjuachaxin chrókóxrjínhiñ asánrá tí nkehe síin chjasintajni, mé tí nkehe tjanjonko asánrá.

¹² Jina chrók'uejorá tí síin tí sín chónhya Dios kixin kjónté t'ántaxínhanrá sín éxí chojni jínahya chóna jie tí jahará, ichro sín, la ntá tí chrók'uikon sín kixin jina tjejoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Ìnchéni chrókjuínchexiteyéherá kaín tí sín t'etōan kuente chjasintajni, á tí ch'ín rey kixin imá t'etōan ch'án,

¹⁴ O á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jina.

¹⁵ Dios tjinkaon kixin jina chrók'uejorá kixin tí sín noehya la ko tí sín lontj la kohya jie ts'ekará sín tí jahará.

¹⁶ Chrók'uejorá éxí chojni t'ítuenhya, a ntá tí kjuachaxin chontará jehya kixin chróchontaxínrá kjuachaxin kixin chrókjuich'erá tí jínahya. Náhi. Chrókjuákoxinrá éxí chojni ch'ehe Dios xra.

¹⁷ Chrókjuíkosáyeherá kaín chojni. Chrótjuèherá tí sín kíchó ni, la ko chróchontehérá Dios kjuasáya, la ko chrókjuíkosáyeherá tí ch'ín gobierno t'etōan.

Tóyóexin éxí tí nkehe kjuasótexín Cristo

¹⁸ Jahará chojni ch'exón xra, chrókjuínchexiteyéherá tí lámóará, chróchontehérá kjuasáyé sín, kjónté tí sín jina la o tí sín jínahya.

¹⁹ Tíha mé ijnko nkehe jina chrókjuákoxinrá kjónté chrókjuasótiaxinrá ijnko nkehe jínahya kixin xikaha mé chrókjuínchexiteyéherá Dios.

20 **A** ntá tí tjejoch'erá ichrén nkehe jínahya, ntá nchekjasótiaxínrá sín la çnkehe tsonhen kíxin chrókóninkákonhyará? **A** ntá tí chrókjuasótiaxínrá ijnko nkehe jína la ntá chrókjuachará chrókóninkákonhyará, la tíha mé tóxrjínhjn Dios.

21 Méxra xíkaha k'uíyahará Dios kíxin Cristo kjuasóteyákonhánrá. Tíha mé kjuákoxin ch'án kíxin mé xíkaha chrókjuich'erá.

22 Kíxin Cristo la ninkehó jie kjuasinhya ch'án la ko ninkexró kjuích'iyehya ch'án,

23 la ko ninkehó kjuáttehya ch'án tió k'uántaxínhjn sín ch'án; a ntá tió kjuínchekjasóte sín ch'án la ninkehó k'ókjanxinhya ch'án. Náhi. Jehe ch'án kjuanchia ch'án kíxin Dios ts'ayakonhen tí jehe ch'án kíxin Dios mé ntoá nchekitoxén ijíé chojni.

24 Cristo mé kuamá ch'án tí ijíeni kíxin tí cuérpóé ch'án kjuák'enkáni ntacruz kíxin éxí tsík'enni k'uék'ejóni kíxin tí jie k'uéchóntani, a ntá jie chrók'uejóni jnkojína. Kíxin Cristo kjuasóte ch'án, chrít'o ch'án kíxin jahará chrókuitoaxínrá jína.

25 **A** ntá jahará k'uék'ejorá éxí kolélo tsíkjichroe. **A** ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsíkótehe

1 Kjaxin jahará chojni chjin ó tsíkótahará chrókuítekákonhénrá tí xiyará, kíxin kjaxin jnkojín tí sín titekakonhya itén Dios chrókuítekaon sín kíxin jína tjen tí tjachjin, kjónté t'ichjánxinhya chróchrónka tjan kíxin jína tjen tjan,

2 kíxin chrók'uikon sín xíkaha kíxin jína tjen tí tjachjin chónta kjuasáyé tjan.

3 Chrókjuínchehnkexinhýará nkehe náxrjón chróchontará la ko tí nkehe náxrjón chróchónta kaçihará la ko nkehe náxrjón tsík'óna chica oro la ko tí ikará imá náxrjón.

4 Náhi. Chrókjuínchejínará asánrá, kíxin tí nkehe náxrjón chrók'uitjáyanhya na mé tí asén chojni tójiehya la ko náxrjón. Tíha mé imá sínkí nkayakon Dios.

5 **A** ntá tí ósé xíkaha k'uékjenkayáxin tí chojni chjin jína. Jehe sín mé kuínkáchónki sín Dios la ko kjuínchexiteyéhe sín xì sín.

6 Mé xíkaha kjuích'e tjan Sara kjuínchexiteyéhe tjan tí ch'ín Abraham, mé kjaxin ntáçro tjan kíxin ìché tjan tí jehe ch'án. **A** ntá tí jahará tí xjeen tí jehe tjan la chrókjuínchexiteyará jína la ko ninkehó kjuachrakon chróchontahýará.

7 Kjaxin jahará chojni ntoará tsíkótahará chróchontehérá ichjiánrá kjuasáya kíxin ó nohará kíxin kánhyó tsehe tjan la ko ó nohará kíxin yóirá tjahará Dios tí kjuachón. Xíkaha

chrókjuich'erá ntá tió chrónixjehérá Dios la kohya nkehe chrók'uinkákonhēn.

Tí sín tjasótexín sín kixin jína kjuich'e sín

⁸ Méxra, jnkokoá chrókjuenkayáxinrá kaín rá chrókjuikonóehérá kichuárá, chrótjuéhérá kichuárá. Jnkójina chrónixjehérá kichuárá la chrókjuinchehnkehyará asánrá.

⁹ Tí ichrén nkehe jínahya chrókjuít'ahará sín la jahará la xikahya chrókjuich'ehérá sín. Tí chrók'uantaxínhanrá sín la jahará chrók'uantaxíenhyará sín. Náhi. Íchá jína chrókjuancheherá Dios kixin chrókjuincheyaon ch'án sín kixin Dios la k'uíyahará ch'án kixin chrók'uayéhérá kjuachaxin kuèntē ch'án.

¹⁰ Kixin:

Tí nkexro tjinkaon tsotjuèhe asén kixin jína chrókjuak'e kaín yaon

la chrónixjahya ch'án ninkehó nkehe jínahya

la ko ninkehó kjuach'ia chrók'uaxrjexínhya ir'va ch'án.

¹¹ Tí nkexro la chrókuítóhe tí nkehe jínahya la íchá jína chrókjuich'e tí nkehe jína,

la ko íchá jína chrókjuéyá ch'án kjuaxróxin chrókjuak'e ch'án.

¹² Kixin Ìnchéni t'ayakonhen tí nkexro jína

la ko tinhin ch'án tí nixjehē sín ch'án,

a ntá tí sín ch'e tí jínahya la tjinkjtsahya ch'án.*

¹³ ¿Xá nkexro chrókjuít'ahará nkehe jínahya tí jahará tjejoch'erá nkehe jína?

¹⁴ Kjónté chrókjuasótexínrá tí nkehe jína tjejoch'erá kjónté la chrókocháhará chróchrakuenhyará ninkexró la ko chróchrakonhyará.

¹⁵ Náhi. Íchá jína chrókjuíkosáyehérá Cristo nkaya asánrá kixin Ìnchárá. Chrók'uejorá listo chrókjuátēherá tí nkehe chrókjuanchankíhará kaín chojni kixin nkexrí tinkachónkirá Ìnchéni, la chrókjuinchehnkehyará la kjuasáya chrókjuátēherá.

¹⁶ Chróchontará ijnko kjuaxrexinkaon jína kixin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuèhē sín kixin tí nkehe ntáchro sín la ntoáhya.

¹⁷ Íchá jína chrókjuasótiaxínrá kixin tí jína tjejoch'erá tí xikaha tjinkaon Dios, a ntá chrókósuàhará chrókjuasótiaxínrá tí ichrén jje chrókjuich'erá.

¹⁸ Kixin Cristo kjuasóte ch'án la ko k'uénxin ch'án tí jje kuèntēni, ónaá k'uén ch'án kixin para jnkochrín. Jehe ch'án la jína ch'án la kjuasóteyákonhēnni ch'án kjónté jínahyani, kixin

* 3:12 3.10-12 Salmo 34.12-16

ntá jína sáchrókjuikoni ch'án tí tjen Dios. A ntá ik'uén ch'án éxi chojni, a ntá Nchakuen ch'án la k'uénhya mé xechón inaá,

¹⁹ kixin tí Nchakuen ch'án sákjuíkjakohé tí nchakuen tí sín tsík'en tjejóchjina.

²⁰ Tí sín a mé kuitekakonhya sín tí ósé tió kjuák'e ch'ín Noé na mé Dios la kónínkakonhya ch'án kjuák'echónhen ch'án nachrohe sít'óna tí arca, na mé ijníkoá chojni kuitekaon sín mé kuaá sín tí kuíteé sín ntá.

²¹ Tí ntá a mé tóyóhé tí tikitexín chojni ijie kixin tí xikaha tsohenni la tsaáxinni ijie. A ntá tí tikite chojni la jehya kixin tsojtuáxin tí cuerpo. Náhí. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ìnchéni Jesucristo,

²² mé tí nkexro sátsíkji nkaya nkajní itjen ch'án itja chjina Dios. A ntá jehe ch'án la mé t'etuñhen tí sín ángel la ko tí sín t'etoan.

4

Chrókjuich'eheni Dios xra éxi tí kjuachaxin kjuanjon ch'án

¹ Méxra éxi Cristo kjuasóte tí cuérpoé ch'án ntá kjaxinrá kjónté xikaha chrókjuasóterá chrókóxakuanhyará kixin tí nkexro kjuasóte tí cuérpoé la ó kuítóhe tí jie.

² A ntá tí naxa chrók'uejochónrá intsí la chrók'uejorá éxi tóxrjínjin Dios. Jehya éxi k'uékóxrjínhanrá.

³ A ntá tí ósé nchónhya nkehe k'uékjich'erá éxi ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jie k'uéchontará ókjé chojni chjin la ko k'uékókoanrá la k'uekjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjanoya.

⁴ A ntá ijie la jahará t'itohyará tí sín a kixin tí jínahya ch'e sín. Méxra xikaha t'ántaxínhanrá sín.

⁵ A ntá tí jehe sín tsjanjon sín kuentá tsochéinka sín tí nkexro tjechónhen sinchekitoexín ijie tí sín tjejóchón la ko tí sín tsík'en.

⁶ Méxra kjónté tí sín tsík'en tsíxrákohe sín tí itén Dios kixin tí nchakuen sín chrók'uejó éxi tjinkaon Dios kjónté naxa k'uéjó sín ntihi chjasintajni la kuítóexín tí ijie sín éxi tsitoexín ijie kaín chojni.

⁷ Ó kuichjina tsjeje chjasintajni a ntá xikaha chrók'uejorá jnkojína la ko chrók'uejotsjehérá chrónixjehérá Dios.

⁸ Tí nkehe imá tjetoan kixin antsí chrótjuehérá kichuárá. A ntá tí tjuèhérá kichuárá la mé tíha chrók'uitjáyanxín tí nchónhya jie chonteherá kichuárá.

⁹ Chrókjuánjonrá kjuachaxin chrókuítóhe jnkojín kichuárá ntogará chrókóninkákuénhyará nijnko tí jehe sín.

10 Jnkojnkorá nkehe tí xṛá tjáhará Dios k'uayéhérá chrókjuínkĩtsará kíchuará. Xíkaha jína chrókjuákoṁjínrá tí kjuasáyé ch'án tjáhará ch'án kíxin nchónhya xṛá k'uayéhérá.

11 Tí jnkojínrá tjínkáonrá chrónixjará ichrén nkehe la chrónixjará éxí nixja itén Dios. Tí jnkojínrá tjínkáonrá chrókjuínkĩtsará la chrókjuákoṁjínrá tí kjuachaxin tjáhará Dios. Kaín tí xṛá chrókjuich'erá chrókjuanchehérá Dios kjuasáya kíxin kjuasáyé Jesucristo tinkachónkirá tí jehe ch'án. Kíxin jehe ch'án la kaín tí kjuachaxin siín la kuènte ch'án jnkochríxín. Mé xíkaha chaxín. Amén.

Íchá jína chrókjuasótexínni kíxin tí tinkáchónkini Cristo

12 Kíchóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxín xíkaha tsonhanrá. Chróntáchrohyará kíxin ókjé nkehe tjasótiaxínrá.

13 Náhi. Íchá jína chrókócháhará kíxin xíkaha chrókjuasóterá éxí kjuasótexín Cristo, kíxin kjaxínrá tsocháhará imá tió ts'ikonrá tí kjuachaxin tsíkao Ìnchéni tí itsi ch'án.

14 Chrokócháhará tí t'ántaxínhanrá sín kíxin tinkachónkirá Cristo kíxin tí Nchakuen Dios chóna kjuachaxin t'ayakonhanrá. Jehe sín t'ántaxínhin sín ch'an, a ntá jahará tjíkosáyehérá ch'án.

15 A ntá tí jnkojínrá tjeotjasóterá chrókójuhya kíxin ichrén nkehe chrókjuich'erá chrókjuàyará o chrókuđerá o ichrén nkehe jínahya chrókjuich'erá o chrókjiatérá kjuanínkaon kuènte ókjé chojni.

16 Náhi. A ntá jnkojínrá chrókjuasótiaxínrá kíxin tinkachónkirá Cristo la chrókósuàhyará. Náhi. Chrókjuanchehérá Dios kjuasáya kíxin xíkaha kónhanrá.

17 Ntá jie ó kui tí tsitoxén ijje chojni mé xrankíxixín tí sín tsík'óna xjeen Dios. A ntá tí xíkaha tsitoxén ijje tí jeheni xrankíxixín, a ntá íchá tí ó tsjixixín tí sín titekakonhya tí itén Dios.

18 Íchá tí sín jína la ko xíkaha tsonhen sín ntá tsaá sín a ntá íchá tí sín jínahya chóna jie kjá antsí tjasóte sín.*

19 A ntá tí nkexro tjasóte éxí tjínkaon Dios la kjónté xíkaha la naxá chrókjuich'e sín nkehe jína la ko chrókjuanjón sín asén sín chrók'uayakonhen Dios mé tí nkexro kjuich'éna sín la mé jehe ch'án xráxín jína ch'án.

5

Tí k'uítuenhen tí sín t'etōan kuènte nínko

1 Tjínkavan tétuanhan tí chojni t'etōan kuènte tí nínko tje-jorá ntiha kíxin kjaxin janhan tétōan kuènte nínko éxí tí jehe

* 4:18 Proverbios 11.31

sín, a ntá janhan mé k'uíkuān kixin nkexrí kjuasóte Cristo, la ko kjaxin janhan mé tsochonta kjuachaxin kuènte Dios éxí tsochónta tí jehe sín tió itsi Ìnchéni chr'éxin.

² Jahará chrók'uayakonhénrā tí kolélo kuènte Dios ntiha kixin xikaha tí xra k'uayéherá. Jnkójina chrókjuínkĩtsará sín éxí tjinkaon Dios la jehya kixin ijnko chojni chrók'ueṭuānhanrā chrókjuich'erá xra, la ko kjaxin jehya kixin imá chrókóxrjínhanrā chichaon. Náhi. Kaín aśánrā chrókjuich'erá xra jina.

³ Jehya jahará kuèntará tí jehe sín kixin chjini chrókuéṭuēnhénrā sín. Náhi. Jnkójina chrókjuákoéxínrā tí jehe sín.

⁴ A ntá tió tsi tí Pastor chaxín t'ēṭoan ntá jahará ts'ayéherá ijnko corona náxrjón tsjehēhya.

⁵ Kjaxin jahará ntasoára chrókjuínchexiteyéhérā tí sín t'ēṭoan kuènte nĩnko. Kaínrā chrókjuínchexiteyéhérā kíchuará chrókjuínchehnkehyará kixin:

Dios la tsonínkakonhen tí sín nchehnke,

a ntá tí sín nchehnkehya mé tsjinkĩtsa ch'án.*

⁶ Méxra chrókjuínchehnkehyará, chrókjuínchexiteyéhérā Dios kixin jehe ch'án imá ts'ēṭoan ch'án kixin tsjixraká tí yaon mé jehe ch'án tsoṭjáhará ch'án kjuachaxin kixin tséṭoanrā.

⁷ Chróchjehérā Dios kaín tí kjuaxrexinkaon chontará kixin kjaxin jehe ch'án tóxakonhen ch'án tí jahará.

⁸ Chrókóxakonhanrā jina chrók'uejorá. A ntá ijie ixri tí nkexro nínkakonhanrā mé tí ch'ín Tsochren éxí ijnko koxra tsjánka va xritjeyá va nkehe sine va.

⁹ Tjánjonhyará kjuachaxin kixin jehe ch'án chrókjuacha ch'án chrókjuachroerá ch'án, kixin ó nohará kixin kaín tí sín kíchuará nkuíxín chjasintajni xikaha tjejótjasóte sín kixin tinkáchónki sín Ìnchéni.

¹⁰ Kjánchó kánhyó sé tsjasótiará, a ntá Dios antsí tsjinkĩtsará ch'án kixin tsjachará ts'ejorá jina. A ntá jehe Dios a mé tjuahará ch'án la k'uíyáhará ch'án kixin ts'ejokoará ch'án jnkokoá tí tjen Jesucristo chónta kjuachaxin jnkochrín.

¹¹ Jehe ch'án tsjancheheni ch'án kjuasáya kixin chónta ch'án kjuachaxín ts'ēṭoan ch'án jnkochrín. Amén.

Kjuixixín nixja ch'ín Pedro

¹² Ch'ín Silvano mé t'íkuān ijnko kíchó ni jina mé kjuínkĩtsa ikjinni tí xroon kjónté kánhyó tsjé nixja, la ntáxraxinkáonrā kixin kjuíntayaonrā Dios ntá xikaha kjuákoxín ch'án kixin chaxín tjuahará ch'án. Méxra xikaha jina chrók'uejorá kixin tjuahará ch'án.

* 5:5 Proverbios 3.34

13 Tí n̄inko t̄jen Babilonia mé tsík̄jeyá Dios éxí tsík̄jeyá ch'án t̄í jahará nix̄jhará sín la ko k̄j̄axin nix̄jhará ch'ín Marcos, mé éxí x̄j̄anna t'ík̄uañ t̄í jehe ch'án.

14 Nix̄jehérá kíchuára j̄nkojína. K̄juaxróxin chrók'uejorá tinkachónkirá Jesucristo. Amén.

Xroon yóxin tsíkjin ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'ahá xrá Jesucristo. Ikjian tí xroon ts'ayéhérá jahará ó tinkáchónkirá Ìnchéni éxí tinkáchónkini jeheni kixin Dios la ko Jesucristo tí nkexro sinchekaáni na mé jína ch'án.

² Sintayaonrá Dios la ko antsí ts'ayéhérá kjuaxróxin kixin ó nohará nkexrí tjen Dios la ko Ìnchéni Jesús.

Jína chrók'uejó tí sín tinkáchónki Jesús

³ Dios kjuanjón kjuachaxin tsochóntani kaín nkehe t'ichjánxinhinni kixin chrók'uejóni jína chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrá imá jié kjuích'e ch'án.

⁴ Mé xikaha kjuanjón ch'án kaín xín tí nkehe a, táha la mé imá jié la ko imá tjete sínkí. Mé xikaha kjuakoxin ch'án kixin chrók'uayéhérá kjuachaxin chrók'uejorá éxí tjinkaon ch'án la ko chrókuítóhérá tí nkehe jínahya kixin chrók'uitjáyaxínhyará tí nkehe k'uékjenkayáxinrá síin chjasintajni.

⁵ A ntá jahará tinkáchónkirá Ìnchéni la kjaxin chrókjuéyará kixin chrók'uejorá jnkójina; a ntá tí jína tjejorá ntá chrókjuachará antsí chrókónohará;

⁶ a ntá tí kónohará ntá chrókjuachará chrókjuenkayáxinrá jína; a ntá tí tjenkayáxinrá jína ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios;

⁷ a ntá tí chaxín xráxinkáonrá Dios ntá chrókjuachará chrótjuèhérá kíchuára; a ntá tí tjuèhérá kíchuára ntá chrókjuachará chrótjuèhérá kaín chojni.

⁸ A ntá xikaha tjejoch'erá tinkák'ánkí tí kjuaxrexinkaon kuéntará, ntá jehya kixin chónkó kuinkáchónkirá Ìnchéni Jesucristo.

⁹ A ntá tí nkexro ch'ehya xikaha la mé éxí ijnko chojni t'ikonhya o ijnko chojni t'ikonhya jína, kixin ó k'uitjáyenhen kixin Ìnchéni ó kjuixin kjuínchetjóá tí jié k'uéchóna ósé.

¹⁰ Méxra xikaha kíchó ni jnkójina chrók'uejorá kixin ntá tsonohará jína kixin Dios tsíkjeýará tí jahará la ko tsík'iyahará ch'án kixin xikaha jína chrókjuenkayáxinrá, a ntá xitjahya chrókjuichroerá.

¹¹ **A** ntá xíkaha chrókuítekáonrá ntá tsotjáhará Dios kjuachaxin ts'ixenhenrá tí tjen Ìnchéni Jesucristo t'etōan ch'án jnkochrín. Jehe ch'án mé tí nkexro kjuínchekáani.

¹² Méxra títóahya ntáxráinkáonrá kaín tí nkehe i, kjónté ó nohará tí nkehe ntoá kjuákoahará.

¹³ Ntáxrjan kixin jína tí naxa tjen chrókujintáxráinkáonrá kaín tí nkehe a

¹⁴ Kixin Ìnchéni Jesucristo kjuínchenóna kixin í séhya its'én janhan.

¹⁵ Na mé kaín tíha tjet'a kixin tió its'én, ntá jahará tsoxráinkáonrá jnkochrín kaín tí nkehe kjuít'a.

Tí sín k'uíkon tí kjuachaxin kuènte Cristo

¹⁶ Tí nkehe kjuákoaharáni kuènte tí kjuachaxin kuènte Ìnchéni Jesucristo la ko nkexrí itsi ch'án na mé jehya ijnko cuento kjuích'éna chojni chrókujuich'iyaxín. Náhí. Ikonna k'uíkonxínconi Ìnchéni la ko tí kjuachaxin kuènte ch'án.

¹⁷ K'uíkonni tíha tió It'eni Dios kjuikosáyehe ch'án tí Xjeen ch'án, la ntá kuínhinni nixja Dios tjen nkaya nkajní ntáchro ch'án kixin: “Tíhi mé xjanna tjuaha ch'án. Imá chàna kixin nchexiteyá ch'án éxí tjínkavan janhan,” ichro Dios.

¹⁸ Mé kuínhinni itén Dios kuixín nkaya nkajní kixin xíkaha ntáchro tió k'uejókoni Ìnchéni chrítaón tí jna tjóá.

¹⁹ Mé xíkaha k'uéchrónka tí sín tsíkjin itén Dios ósé ntá noexinni kixin chaxín tsoxiteyá. **A** ntá jahará chrók'uejorá chrókuinhínrá jína nkehe k'uéntáchro sín kixin tí tan mé éxí ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xíkaha ts'inkaséyanxín nkaya asánrá.

²⁰ **A** ntá tjetōan chrókónohará tíhi: kixin ninkehó xroon itén Dios tsík'óna jehó chojni chrókujača chrókiénxín.

²¹ Náhí. Tí sín k'uéchrónka itén Dios la nixjahya sín tí nkehe jehó sín chrókuenkayáxin sín. Náhí. Tsíkjinchetjóá Dios tí jehe sín, a ntá Nchakuen Dios kjuínkítsa k'uénixja sín itén Dios.

2

*Tí sín tjako kjuach'ia
(Judas 4-13)*

¹ Kjaxin k'uék'ixin tí sín ntoáhya k'uéchrónka itén Dios tí chjasin Israel, mé kjaxin xíkaha tí jie ts'ixin maestro sit'ayahará. Jehe sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xíkaha sinchemá sín tí Ìnchéni chrókuaáxinni. Tíha mé tsjixin tsjasótéxín tí jehe sín.

² Nchónhya chojni tsochréhe sín tí nkehe jínahya ch'e sín. A ntá tí xíkaha ch'e sín la ts'ántaxiēnxín chojni tí ntĩa ntoá kuēnte Ìnchéni.

³ Tsōxrjínhīn sín tsochóntha sín nchónhya chichaon, ntá ts-janchiáxínrá sín chichaon tí nkehe ntoáhya tsjakohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kíxin ósé tjechónhen xíkaha tsonhen sín.

⁴ Dios la kjónté tí sín ángel kjuasin jiē la kuikonóghya ch'án sín la k'uetōan ch'án kíxin sátsji sín tsjasóte sín sátsjik'íkjehe sín tí sítié na tjejóchjina sín tsjixrakájia tí tsitoēxín ijíé sín.

⁵ La ko kjaxin kuikonóghya Dios tí sín k'uéjō chjasintajni ósé ntá ichr'án ch'án ntá kuíteē tí sín jínahya, a ntá Dios kjuínchekaá jehó tí ch'ín Noé, na mé tí nkexro kjuako tí tan jína la ko kjuínchekaá ch'án tí yato sín ó.*

⁶ Kjaxin Dios kjuíncheke'itjáyan tí chjasin Sodoma la ko tí chjasin Gomorra iche hasta k'óna nteso, kíxin chrókónohe chojni jínahya ts'ejó chr'éxīn kíxin xíkaha tsonhen sín.†

⁷ Kjánchó Dios kjuínchekaá ch'án tí ch'ín Lot kíxin ijnko chojni jína tí jehe ch'án la ko imá kóxakonhen ch'án tí k'uikon ch'án tí jiē kjuasin tí sín jínahya.

⁸ Tí ch'ín Lot mé jína asén ch'án mé k'uékjak'e ch'án tí síin tí sín jínahya ntá kaín yaon kóxakonhen asén ch'án k'uikon ch'án la ko kuínhin ch'án tí nkehe jínahya k'uékjich'e sín.‡

⁹ A ntá Ìnchéni na sinchekaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjásóte ch'án tí yaon tsitoēxín ijíé chojni.

¹⁰ Dios antsí sinchekjásóte ch'án tí sín nchexiteyéhe tí nkehe jínahya ntáchro asén sín a ntá nchexiteyéhya sín tí nkehe t'etōan Ìnchéni. Titekakonhya sín la ko chrakonhya sín chrók'uantaxínhīn sín tí sín ángel chóntha kjuachaxin.

¹¹ A ntá tí sín ángel imá tsehe sín la ko imá chóntha sín kjuachaxin la kjónté tjinkakonhya ts'ántaxínhīn tí sín a nkayakon Ìnchéni.

¹² A ntá tí chojni a la éxí yóhe iko tjenkayáxinhya ninkehó la nchexiteyéhe tí nkehe ntáchro asén, la kokjíhi kíxin ts'óyán kichó ó. T'ántaxínhīn sín tí nkehe tienxínhya sín, mé xíkaha its'en sín éxí its'en tí ko a.

¹³ Tíha mé tsjasótēxín sín kíxin jehe sín kjuínchekjásóte í so chojni. Xrácín tóxrjínhīn sín ich'e sín tí nkehe ntáchro asén sín. Ijnko kjuatósuēhe kíxin tjejóntaxín sín ntekoará sín tí kia chontará la kjónté tí xíkaha la naxa tjasin sín jiē.

¹⁴ Kohya nijnko chojni chjin chrokjuasinkohya sín jiē. Tóxrjéhya sín tjasin sín jiē tsjasótēxín sín.

* 2:5 Génesis 6.1–7.24; 8.18 † 2:6 Génesis 19.24 ‡ 2:8 2.7–8 Génesis 19.1–16, 29

15 Kuítóhe sín tí ntja ntoá ntá chréhe sín ntja kuènte ch'ín Balaam xjeen ch'ín Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án.

16 A ntá t'ichjánxin tsjasóte ch'án kixin tí jie kjuasin ch'án. A ntá ijnko kolócho chjin xitjahya nixja la xrínahya nixja itén chojni la kjuentuéhe tí ch'ín Balaam kixin tí jie chóna ch'án ntá kuítóhe ch'án tí nkehe jínahya chrókjuich'e ch'án. §

17 Tí chojni tjako mé éxi yóhe tòye tjiáhya ntá la ko éxi tjuí tjakáko xrinto ó; ó kjuixin k'úituenhen sín sátsji sín tí imá sítié tsjasóte sín jnkochrín.

18 Kaín nkehe jínahya nixja sín, a ntá tí jie tjasin sín tóxrjínhin sín chojni chjin ókjé ntá tjachroexín sín tí sín na ntá tjinkaon chrókuítóhe sín tí jie.

19 Chrónka sín kixin kaín nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'uetuenhen sín.

20 A ntá tí nkexro ó chóxin Ìnchéni Jesucristo tsaáxinni mé kuítóhe sín tí nkehe chrók'uitjáyaxín sín kuènte chjasintajni. A ntá chr'éxin tí chrókuakja sín ntja jínahya inaá tí chrókjuacha tí jínahya chrókjuachroe sín, a ntá antsí má jínahya chrókónhen tí jehe sín.

21 Íchá jína chrókónoehya sín tí ntja jína. A ntá jehya jína tí ó nohe sín ntá tsítóhe sín tí nkehe k'uetóan Dios kuínhin sín.

22 A ntá tí jehe sín kjuínchexiteyá sín éxi ntáchro tí proverbio kixin: “Tí koniá t'ókjan ntá xíkjan xíkjine inaá,* la ko tí cochíno na ntá tsík'ónti tjóá ntá xíkjan kjíankí tí nchet'o kjíta.”

3

Tió tsi Ìnchéni

1 Kichóni tjuahará tíhi la xroon yóxin ikjian ts'ayéherá. Yóí tí xroon a ntaxráxinkáonrá kixin jína chrókjuenkayáxinrá.

2 Chróxráxinkáonrá tí nkehe tsíchronka tí sín k'uechrónka itén Dios ósé la ko tí nkehe k'uetóan Ìnchéni, mé tí nkexro tsaáxinni, kjuakohará tí sín kjueyá ch'án.

3 Tjetoan chrókónohará tíhi kixin tí yaon tsjixixín la itsi chojni tsjanoá tí tan jína kuènte Ìnchéni, la sinchexiteyéhe sín kaín nkehe jínahya ntáchro asén sín.

4 Tsjanchankí sín nkehe kónhen tí nkehe tsíntáchro Cristo kixin tsokjan ch'án, kixin desde ik'uén tí sín tsík'axreníxinni k'uéjó ósé la xíkahó naxa sítónhen éxi tíó k'óna chjasintajni.

5 Tí sín a titekakonhya sín kixin ósé k'uenixja Dios ntá k'óna nkajní la ko chjasintajni na mé kjuin tí ntá ntá kuítóhe nonte xámá.

6 A ntá tí ntá k'uitjáyanxín chjasintajni ínaá.

7 A ntá tí nkajní la ko tí chjasintajni naxa tjejó jie tjejóchónhen tsoche kixin xikaha k'uetōan Dios kixin xrohi tsohexín tí yaon tsjixixín tsitoexín ijíe chojni la ko kaín tí sín jínahya tsjasóte sín.

8 A ntá kichó ni, chrók'uitjáyanhyará kixin Ìnchéni tí ijnko yaon t'ikon ch'án éxí mil nánó la ko mil nánó t'ikon ch'án éxí ijnko yaon ó.*

9 Ntá Ìnchéni í séhya sinchexiteyá ch'án tí nkehe tsintácho ch'án la jehya éxí tjenkayáxin í so chojni kixin ó má sé tjejóchónhen sín. Náhi. Jehí tjechónhen ch'án kixin ninkexró chrók'uitjáyanhya kixin tjinkaon ch'án kixin kaín chojni chrókjan sín chrókuinkáchónki sín Dios.

10 A ntá tí yaon tsokjan Ìnchéni mé tsí éxí xíchee itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe síín.

11 A ntá tí xikaha kaín nkehe ts'itjáyan, a ntá jahará la jína chrók'uejorá chróxráxinkáonrá Dios.

12 Chrók'uejochonhénrá tí yaon itsi Dios chrókóxakonhanrá chrókjuich'erá xra kixin ntá tjoka chrókui Ìnchéni. A ntá tí yaon tsjixixín mé ts'itjáyan nkajní tsoche, la ko kaín nkehe tsqxíka ts'itjáyan kixin imá tsosóa.

13 A ntá jeheni tjejóchónhenni nkajní nixin la ko chjasintajni nixin éxí tsintácho Dios kixin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

14 Méxra xikaha kichó ni, nachrohe tjejochonhénrá kixin itsi tí yaon tsonhen xikaha la kaín asánrá chrókjuéyará jnkojína chrók'uejorá kixin ts'ikon Dios kixin kjuaxróxin tjejorá chontahyará jie.

15 Chrókónohará kixin naxa tjechónhen Ìnchéni, tjokahya itsi ch'án kixin í so chojni naxa chrókuitekaon sín ch'án. Kjaxin xikaha tsíkjin tí kichó ni Pablo tí xroon chr'ánhanrá ch'án éxí tí kjuachaxién Dios tsík'áyéhe ch'án chrónka xikaha.

16 Jnkojnko tí xroon tsíkjin ch'án nixja xikaha la imá xra chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrjexín tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xikaha jehó sín tjejá sín nkehe ts'itjáyanxín sín.

* 3:8 Salmo 90.4

17 Méxr̄a kichó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xriko tí sín jínahya ntá chrókujtóhéré tí nkehe jína ntoá tinkachónkirá.

18 Ìchá jína antsí má chróchoxínrá Ìnchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxr̄a tsjikosáyeheni ch'án ijie la ko jnkochrín. Amén. Ó tjen.

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéhérá kíxin tsonohará kuènte tí nkexro xráxín kjuák'e tí naxá t'ónahya chjasintajni, mé tí nkexro kuínhinni nixja la ko tí nkexro k'uíkonxín konni. Kíxin tí nkexro mé k'uíkonni la ko tí nkexro kuákóxín tjani, mé tí nkexro nixja tí tan tsjanjon kjuachón.

² Kjuakoxín ch'án nkexrí kjuák'e ch'án, a ntá kaín tí jeheni k'uíkonni ch'án, mé xíkaha chrónkaxínni nkexrí kjuák'e ch'án; a ntá tjakuxénni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni.

³ Chrónkaxínni tí nkehe k'uíkonni la ko tí nkehe kuínhinni, kíxin kjaxínrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'éni Dios la ko tí Xjeen ch'án Jesucristo.

⁴ Mé xíkaha ikjinni tí nkehe i, kíxin chrókjuintaxín chrókócháhará la ko chrókóchéheni.

Dios mé tí xrohi

⁵ Tí tan i mé Inchéni Jesucristo kjuakohe tí jeheni, a ntá jie tjakoharáni tí jahará, kíxin Dios mé tí xrohi, a ntá kohya ninkehó sítié tí tjen tí jehe ch'án.

⁶ A ntá tí tsontáchroni kíxin tinkáchónkini tí jehe ch'án, a ntá naxá ixrini tí ntja sítié, na mé xíkaha ch'iani kíxin ch'ehyani tí nkehe ntáchroni.

⁷ A ntá tí xritjéjóni tí t'inkaséyan kíxin tí Dios mé jehe ch'án tí t'inkaséyan, na mé xíkaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'íjmáxin kaín jie chóntani.

⁸ Tí chróntáchroni kíxin ninkehó jie chóntahyani, mé xíkaha la jehóni ch'iyeheni asénni, a ntá tí nkehe chaxín la chóntahyani.

⁹ A ntá tí tsontáchroni kíxin chóntani jie, a ntá tsonoheni chaxín kíxin itjen ijnko Dios la jína ch'án la ts'itjáyenhen ch'án kaín jie chóntani la ko sinchetjóáni ch'án kíxin kaín tí nkehe jínahya kjuích'eni.

¹⁰ A ntá tí tsontáchroni kíxin kjuasinhyani ninkehó jie, la éxí chróntáchroni kíxin Dios la ch'ia ch'án, a ntá tí xíkaha tsixroni la chaxínhya tsík'áyéheni tí tan kuènte ch'án.

2

Cristo mé tsonixjayákonhenni ch'án

¹ Kíchóni, éxí xjanna t'íkuḡn tí jahará, a ntá tjékjian tí xroon ts'ayéhérá tsochrónka ḱixin chrókjuásinhyará jię. A ntá tí jnkójínrá chrókjuásinrá jię la chóntani ijnko nkexro tsonix-jayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jína.

² Jesucristo mé k'uenyákonhenni ch'án ḱixin tí jię chóntani; a ntá jehya ijiéni ó. Náhi. Ijié kaín chojni síin chjasintajni.

³ Tí tsitekaonni tí nkehe k'ueṭṭoan Dios ntá tsoñoexinni chaxín ḱixin chóxinni ch'án.

⁴ A ntá jnkójín nkexro ntáchro ḱixin chóxin Dios, a ntá titekakonhya tí nkehe tsík'ęṭṭoan Dios, la mé ch'ia la noehya tí nkehe chaxín.

⁵ A ntá tí nkexro titekaon tí nkehe tsík'ęṭṭoan Dios la chaxín tjuèhe Dios; mé xíkaha noheni ḱixin chaxín jnkokoá tjejókoni ch'án.

⁶ Tí nkexro ntáchro ḱixin chaxín tinkáchónki Dios chrókjuak'e éxí kjuák'e Jesucristo.

Tí mandamiento nixin

⁷ Kíchóni, méxra tí nkehe tjékjian jehya ijnko nkehe nixin tsík'ęṭṭoan Dios. Náhi. Tíha mé tí nkehe k'uyéhérá tí xrankíxixín, mé tí mandamiento ósé tjen, mé tí nkehe ó tsíkinhínrá.

⁸ Kjánchó tí nkehe ikjian mé yóhe ijnko nkehe nixin, éxí kjuákoxin Cristo mé xíkaha tjakoxinni, ḱixin tí sítié la tinkák'itjáyan ḱixin ijie la ó t'inkaséyanxín tí xrohi chaxín.

⁹ A ntá tí nkexro tsonáchro ḱixin ixri tí t'inkaséyan, a ntá naḡa nínkakonhen kíchó, na mé tí xíkaha naḡa itjen tí sítié a.

¹⁰ A ntá tí nkexro tjuèhe kíchó mé tjen tí t'inkaséyan, a ntá xíkaha jína tjen, chóntahya jię la chrókjuachruèhya ch'án ninkexró ḱixin chrókjuasin sín jię ínaá.

¹¹ A ntá tí nkexro nínkakonhen kíchó mé tjejó sín la ko ixri sín tí sítié a la ko noehya sín nketí nó sátsji sín ḱixin tí sítié la kjuích'éna ntakótán sín.

¹² Éxí xjanna t'íkuḡn tí jahará, la méxra tjékjian tí xroon ts'ayéhérá ḱixin tsoňohará ḱixin kjuachaxin ihnié Dios kjuínchetjuáxinrá tí ijiára ḱixin k'uenyákonhenni Ìnchéni Jesucristo.

¹³ Jahará it'é xjan, ikjian tí xroon ts'ayéhérá jahará ḱixin choxínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéhérá jahará ḱixin kjuachará ḱixin kjuachahya tí Jínahya chrók'ueṭṭuḡhanrá.

Ikjian tí xroon ts'ayéhérá jahará chánjanrá, ḱixin choxínrá It'éni.

¹⁴ A ntá jahará it'é xjan ikjian tí xroon ts'ayéhérá ḱixin ó choxínrá tí nkexro itjen tí xrankíxixín tí naḡa t'ónahya chjasintajni. Ikjian tí xroon ts'ayéhérá jahará ntasoírá, ḱixin naḡa

fuérterá, la ko k'uayéherá tí itén Dios, la ko kjuachará kíxin kjuachahya Tsochren chrók'uetuanhanrá.

15 Chrójtuehyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'eni Dios.

16 Kíxin ninkehó tí nkehe chrókjuanjon chjasintajni chrókuixín tí tjen It'eni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni kíxin itsjé nkehe chróchóntani.

17 A ntá tí chjasintajni sítinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínhín Dios mé ts'ejó sín jnkochrín.

Tí nkehe chaxín la ko tí nkehe kjuach'ia

18 Éxi xjanna t'ikuán tí jahará, la chrókónohará kíxin ó kuichjina tí yaon tsjixixín. Jahará ó kuínhínrá kíxin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kíxin ó kuichjina tí yaon tsjixixín.

19 Jehé sín tsík'axrjekjanxín sín tí tjejóni; kjánchó chaxínhya kuinkáchónki sín éxi tinkáchónkini. Náhi. Tí chaxín chrókuinkáchónki sín éxi tinkáchónkini la chrók'uaxrjekjanxínhya sín tí tjejóni, naᵗa chrók'uejókoni sín jnkokoá. A ntá xíkaha kónhen k'uaxrjekjan sín kíxin tsonoxín kíxin kuinkáchónkihya sín éxi tinkáchónkini.

20 A ntá jahará la Cristo tsíkjanjon Nchakuen ch'án tsík'ayéherá kaín rá, ntá jie tiénxinrá intsí kuènte ch'án.

21 Ikjian tí xroon ts'ayéherá kíxin ó nohará tí nkehe chaxín, jehya kíxin chrókónoahyará; jahará la ó nohará kíxin nijnko kjuach'ia tixínhya tí nkehe chaxín.

22 ¿Xá nkexro tí ch'ia? Mé tí nkexro ntáchro kíxin Jesús la jehya tí Cristo. Tí nkexro a mé nínkakonhen Cristo, mé titekakonhya It'eni Dios la ko tí Xjeen ch'án.

23 A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kíxin chóxin tí Xjeen Dios mé kjaxin chóxin sín tí It'é ch'án.

24 Méxra tí nkehe tsíkinhínrá tí xrankíxixín la chrórxáinkáonrá jnkochrín. A ntá xíkaha tí chrórxáinkáonrá jnkochrín tí nkehe tsíkinhínrá tí xrankíxixín, la kjaxin xíkaha jnkokoá chrókuinkachónkirá tí Xjeen Dios la ko tí It'é ch'án.

25 Kíxin Jesucristo tsíntáchro ch'án kíxin tsjanjon ch'án tí kjuachón jnkochrín.

26 Méxra xíkaha tjékjian tí xroon i ts'ayéherá kíxin chrókónohará kuènte tí sín tjinkaon chrókjuít'ayahará.

²⁷ Kjánchó jahará la ó chontará Nchakuen Dios tsítjáhará Jesucristo, a ntá xikaha la í t'ichjánxinhya kíxin ókjé nkexro chrókjuakohará, kíxin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

²⁸ A ntá jie éxí xjanna t'íkuan tí jahará, chrókuítóéhyará chrókuinkachónkirá Cristo, kíxin tió tsi ch'án la antsi chróchoxínrá ch'án la ko chrókósuàhyará chrókóchjinará tió tsi ch'án,

²⁹ kíxin ó nohará kíxin Jesucristo la jína ch'án. A ntá chrókónohará kíxin kaín nkexro jína la xjeen Dios tíha.

3

Tí sín xjeen Dios

¹ Chrókónohará kíxin It'éni Dios, imá tjuèhe tí jeheni kíxin nchek'in ch'án xjeen ch'án tí jeheni, la mé chaxín jeheni tíha. Mé xikaha tí sín chjasintajni chónhya sín tí jeheni kíxin jehe sin la xráxín chónhya sín Dios.

² Mé xikaha kichó ni, ó tsík'ónani xjeen Dios, a ntá naxa tjakoxinnya ch'án nkehe tsonhenni tí tsjixixín. Kjánchó ó noheni kíxin tió itsi Ìnchéni Jesucristo la ts'ónani éxí tí jehe ch'án, kíxin ts'ikonni kíxin nkexrí tjen tí jehe ch'án.

³ A ntá kaín nkexro tjejóchónhen tí tsi ch'án la chrókuítóhe sín ijíé sín kíxin tsotjóá sín kíxin jehe ch'án la tjóá ch'án.

⁴ Kíxin kain tí nkexro tjasin jie mé jínahya ch'e sín, kíxin tió tjasin chojni jie la mé xikaha kuítekakonhya sín tí ley a.

⁵ Jahará ó nohará kíxin Jesucristo kui chjasintajni kíxin tsjatsen ch'án tí ijíéni, a ntá jehe ch'án la ninkehó jie chóntahya ch'án.

⁶ Mé xikaha kaín tí sín chaxín tinkáchónki tí jehe ch'án la mé tjasinnya sín jie; a ntá kain tí sín tinkákjasin jie la tsík'ikonhya sín ch'án la ko xráxín chónhya sín ch'án.

⁷ Éxí xjanna t'íkuan tí jahará; méxra chrókuítóéhyará kixin ninkexró chrókjuít'ayahará; a ntá tí nkexro ch'e nkehe jína la jína ch'án, kíxin Ìnchéni la jína ch'án.

⁸ A ntá tí nkexro xritjasin jie la mé kuènte tí Jínahya; kíxin tí Jínahya mé kjuankíxin kjuasin jie desde tí xrankíxixín k'óna chjasintajni. Méxra tí Xjeen Dios mé kui chjasintajni kíxin sinchek'itjáyan ch'án kaín tí xra kjuích'e tí Jínahya.

⁹ Nijnko tí chojni tsík'axrjeníxin Dios naxa chrónkákjasin jie, kíxin ó chóna tí kjuachón kjuanjon Dios; la í xitjahya naxa chrókjuasin jie kíxin ó tsík'óna xjeen Dios.

10 Mé xíkaha tónoxín kixin nkexro tí xjeen Dios la ko nkexro tí xjeen tí Jínahya, kixin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kichó ni

11 Méxra tí tan tsíkinhínra tí xrankíxixín mé tíhi, kixin chrótjuèheni kichó ni.

12 Chrókjuich'ehyani éxí kjuích'e ch'ín Caín, kixin jehe ch'án mé kuènte tí Jínahya, kixin k'óyán ch'án tí kichó ch'án. ¿Nkekuènte kixin k'óyán ch'án? Kixin tí ch'ín Caín la tí nkehe jínahya kjuích'e ch'án, a ntá tí kichó ch'án la kjuích'e ch'án tí nkehe jína.

13 Kichóni, chróchrakonhyará tí nínkakonhanrá tí sín siín chjas-intajni.

14 A ntá noheni kixin k'uat sínkani tí kjuach'én, a ntá kjuachón, mé noexínni tíhi kixin tjuèheni kichó ni. Tí nkexro tjuèhya kichó la éxí tsík'en sín xíkaha xritjejó sín.

15 Kaín tí nkexro imá nínkakonhen kichó na mé chojni tjàya tíha, la ko ó nohará kixin ijnko chojni tjàya la xitjahya tsochónta kjuachón jnkochríxín.

16 Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni.

17 A ntá tí tjen ijnko nkexro rico t'íkon kixin ijnko tí kichó ch'án t'ichjánxinhin nkehe, a ntá tí tsjinkítsahya tí kichó, ¿a ntá nkexrí chrótjuèhe ch'án Dios kaín asén ch'án?

18 Éxí xjanna t'íkuān tí jahará, méxra chrótjuèxínhyani tí kichó ni tí tan náxrjón chrónixjani ó. Náhí. Chrókjuākoxinni tí nkehe jína chrókjuich'eni.

Jína tsochjineheni tí tjen Dios

19 Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxí tjinkaon Dios.

20 A ntá tí tjoni asénni kixin chóntani ichrén jje, a ntá Dios la imá nohe ch'án la nohe ch'án kaín nkehe tónhen asénni.

21 Mé xíkaha kichó ni, tí tjohya asénni kixin naxa ichrén nkehe jínahya tjenkayáxinni, a ntá antsí jína tsochjineheni tí tjen Dios,

22 a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'ueṭoan ch'án la ko ch'eni tí nkehe tóxrjínhin ch'án.

23 Tí nkehe tsík'ētoan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kichó ni éxí k'ueṭoan ch'án.

24 Tí nkexro nchexiteyéhe tí nkehe k'ueṭoan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé

noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

4

*Tí Nchakuen Dios la ko tí nchakuen tí nkexro nínkakohenh
Cristo*

¹ Kíchóni, chrókuitekákonhyará kaín tí sín ntáchro sín kixin Nchakuen Dios mé nixjaxín tí jehe sín. Náhí. Chrótsjehérá tí nkehe ch'e sín kixin chrókónohará kixin á chaxín chóna sín Nchakuen Dios o náhí, kixin tí chjasintajni la ixri nchónhya chojni ch'ia, ntáchro sín kixin nixja sín tí itén Dios.

² A ntá xikaha mé chrókónoaxínrá kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxí chojni mé chóna sín Nchakuen Dios.

³ A ntá tí nkexro titekakonhya kixin xikaha tsíki Jesús, na chónahya sín Nchakuen Dios. Náhí. Chóna sín tí nchakuen tí nkexro nínkakohenh Cristo. Jahará ó kuínhínrá kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxí xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetóan, kixin tí nkexro tjejókoará la imá t'etóan, a ntá tí nkexro t'etóan chjasintajni la kánhyó t'etóan.

⁵ Kixin jehe sín la kuènte chjasintajni ó, méxra nixja sín tí nkehe kuènte chjasintajni ó. A ntá tí chojni kuènte chjasintajni ó mé tjejótinhin sín.

⁶ A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjatsoanxínni nkexro chóna tí Nchakuen tí nkexro chaxín la ko nkexro chóna tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kíchó ni, kixin tí tjuèheni kíchó ni mé tixín tí tjen Dios. Kaín nkexro tjuèhe kíchó mé xjeen Dios, la ko chóxin Dios.

⁸ A ntá tí nkexro tjuèhya kíchó na mé chónhya Dios kixin Dios la xráxin tjuèhe chojni.

⁹ Dios la ó kjuakoxín ch'án kixin tjuèhe tí jeheni kixin tsích'án ch'án tí jnkokoá Xjeen ch'án chjasintajni kixin tsochóntaxínni kjuachón tí jehe ch'án.

¹⁰ A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhí. Jehe ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xikaha Dios tjuèhe tí jeheni, a ntá kjaxinni jeheni xikaha chrótjuèheni kíchó ni.

¹² **A** ntá Dios la ninkexró k'uíkõnhyã. Kjánchó tí chrótjuèheni kíchó ni la Dios ts'ejókoni ch'án, a ntá tsjinkĩtsã ch'án kixin chaxín tsotjuèheni kíchó ni.

¹³ Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani.

¹⁴ Jeheni mé k'uíkõnxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni siín chjasintajni.

¹⁵ **A** ntá jnkojín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xíkaha mé noexínni la ko titekaonni kixin Dios la tjuèhe tí jeheni. Dios mé xráxin tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín.

¹⁷ Mé xíkaha chaxín chrótjuèheni Dios kixin ntá chróchrakonhyani tí yaon tsitõexín ijíeni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án.

¹⁸ Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. **A** ntá chojni chrakon mé chaxín tsjasóte. **A** ntá jnkojín chojni chrakon la mé chaxínhyã tjuèhe Dios.

¹⁹ **A** ntá jeheni la tjuèheni Dios kixin jehe ch'án senó tjuèhe ch'an tí jeheni.

²⁰ **A** ntá jnkojín nkexro ntáchro kixin jehe mé tjuèhe Dios, a ntá tuénxín nínkakõnhen kíchó mé kjuach'ia xriko. Tí tjuèhyã ch'án tí kíchó chóxin ch'án, la kjaxin xitjahyã tsotjuèhe Dios kixin tsík'íkõnhyã ch'án Dios.

²¹ Tíhi mé tsík'etõan Jesucristo kixin tí nkexro tjuèhe Dios la mé kjaxin chrótjuèhe kíchó.

5

Tí tinkáchónkini Dios la tsjachahyã tí chjasintajni

¹ Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a.

² **A** ntá tí tjuèheni Dios la ko nchexiteyáni tí nkehe t'etõan ch'án, a ntá noheni kixin kjaxin tjuèheni tí sín tsík'ónã xjeen Dios.

³ Tí tjuèheni Dios la t'ichjánxin kixin chrókuitekaonni tí nkehe k'uetõan ch'án, kixin tí nkehe t'etõan ch'án la jehyã ijnko nkehe imá xra

⁴ kixin kaín chojni tsík'ónã xjeen Dios tsjacha, la ntá tí chjasintajni la náhi. **A** ntá tí tinkáchónkini Ìnchéni la mé tsjachaxínni la tsjachahyã tí chjasintajni.

⁵ **A** ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'etuenhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxín tí ìntà la ko tí jni. La jehya kixin jehó tí ìntà kjuakoxín ch'án. Náhí. Kjaxin ìntà la ko ijni kjuakoxín ch'án. **A** ntá tí Nchakuen Dios mé chrónkaxín tíha, kixin tí Nchakuen Dios la chaxín ntoá.

⁷ Siín iní nkexro chrónkaxín nkaya nkajní: ijnko la It'eni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha.

⁸ **A** ntá siín iní tí nkehe chrónkaxín ntihi chjasintajni, mé tí Nchakuen Dios, la ko tí ìntà la ko tí jni; a ntá tí iní mé jnkokón chrónka.

⁹ ¿Á chrókuitekaonni tí nkehe chrónka chojni ó? **A** ntá tí nkehe tsíchrónka Dios, antsí má tjeotan kixin táha la Dios tsíchrónkaxín kixin nkexrí tjen tí Xjeen ch'án.

¹⁰ Tí nkexro titekaon tí Xjeen Dios na mé asén ó tónoexín tíha. **A** ntá tí sín titekakonhya sín Dios, la ntáchro sín kixin Dios la ch'ia ch'án kixin kuítেকakonhya sin tí nkehe tsíntáchro Dios kixin nkexrí tjen Xjeen ch'án.

¹¹ Tí nkehe tsíchrónka Dios mé tíhi kixin tsjanjon ch'án kjuachón jnkochrín, a ntá tí kjuachón mé chónta tí Xjeen ch'án.

¹² **A** ntá tí nkexro chónta tí Xjeen Dios mé kjaxin chónta kjuachón; a ntá tí nkexro chóntahya tí Xjeen Dios la mé chóntahya kjuachón.

Chrónkaxín nkehe kuènte kjuachón

¹³ Tí nkehe mé kjinni kixin jahará ó titekáonrá tí Xjeen Dios, kixin mé tsonoaxínrá kixin chaxín chontará kjuachón jnkochrín.

¹⁴ Tíhi mé chóxixínni Dios kixin noheni kixin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án.

¹⁵ **A** ntá tí xikaha ó noheni kixin Dios tjetinhin tí nkehe nixjeheni ch'án, a ntá kjaxin ó noheni kixin ó chóntani tí nkehe kjuancheheni ch'án.

¹⁶ **A** ntá jnkójínrá ts'ikonrá ijnko kichuárá tjasin jie, a ntá tí jehya ijnko jie chrók'uenxín ch'án, la chrókjuancheherá Dios kixin chrókjuinchexraxinkaon ch'án kixin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. **A** ntá tí jie chrók'uenxín chojni la ntáxrjan kixin íchá jína chrókjuanchehyará Dios kixin chrókjuinkítsa tí ch'ín a.

¹⁷ Kaín nkehe jínahya la ijje tíha. Kjánchó siín jie ts'enxínhya chojni.

18 Ó noheni kixin tí nkexro tinkáchónki It'eni Dios tjasinhya sín jię, kixin tí Xjeen Dios tjinkitsa tí jehe sín, a ntá tí Jínahya tsjachahya tsjachroe tí jehe sín.

19 Ó noheni kixin Dios t'ayakonhen tí jeheni, a ntá tí Jínahya chóna kjuachaxin t'etuenhen kuenté chjasintajni.

20 Ó noheni kjaxin kixin Xjeen Dios kui, la ko kjuínkitsa ch'án tí jeheni kixin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín.

21 Éxí xjanna t'íkuan tí jahará, la titoherá tí dios tsíkjanoya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjeyá Dios tójnkotsé sín ntiha, la mé chaxín tjuahá sín: a ntá jehya janhván, la kjaxin kaín tí sín chóxin tí tan chaxín.

² Tjuahará tí jahará kixin tí tan chaxín ó chónta asénni, tíha mé ts'ejókoni jnkochrín.

³ It'éni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókuikonóahará ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chàna k'uikuán kixin isorá tjejorá titekáonrá tí nkehe chaxín, éxi tsík'etoan It'éni Dios.

⁵ A ntá jie jahará kichó ni, xrjanóahará kixin chrótjuèhéra kichuára. Méxra xíkaha tjéjian tí xroon i, la jehya ijnko nkehe nixin tsík'etoan Dios. Náhi. Tíha la mé tí nkehe tsík'áyéheni tí kjuák'e Ìnchéni Jesucristo.

⁶ A ntá tí tjuèheni kichó ni la mé tíhi kixin chrók'uejóni éxi tsík'etoan Dios; a ntá tí nkehe tsík'etoan Dios la mé ó tsíkinhínra jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xíkaha mé ixri xrich'ia la ko nínkakonhen Cristo.

⁸ Chrókóxakonhanrá kixin chrók'uitjáyanyha tí xra kjuich'erá kixin naxa chrók'uayéhéra tí nkehe tsjintaxín ts'ayéhéra.

⁹ A ntá tí siín ijnko nkexro kuitóhe tí nkehe kjuako Cristo ntá kjuichroe la mé chóntahya sín Dios; a ntá tí nkexro títoehya tí nkehe kjuako Cristo mé chónta sín It'éni Dios la ko tí Xjeen ch'án.

¹⁰ A ntá jnkójín sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuítóhe tí sín a ntoará la ko ni chrónixjeéhyará sín jnkójina.

¹¹ A ntá tí nkexro tsonixjehe tsontácho kixin: “¿Á jína k'uinka?” na mé éxi tóxrjnhín sín tí nkehe jínahya ich'e tí sín a.

Tí tan tsjixín

¹² Chonta nchónhya nkehe chrókuinhínra jahará, kjánchó tjínkakonhya chrókjian xroon ó. Náhi. Tjínkavan kixin tjoka chrókjuasántsjahará tí jahará tsonixjahará kixin chrókjuintaxín chrókóchéheni.

¹³ Tí sín kichuára tójnkotsé kuènte nínko ntihi, mé tí sín kjaxin tsíkjeyá Dios, mé nixjahará sín. Amén. Ó tjen.

Tí níxin xroon tsíkjin ch'ín Juan

¹ Janhan mé tí nkexro t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuaha.

² Kíchóni, tjáncháha Dios kixin éxí jaha jína tjen tinkachónkia Ìnchéni la jína chrók'uaxrje kaín xrá ch'e la ko jína chrókjuak'e jaha.

³ Imá kóchàna tió kui iso tí sín kíchó ni chrónka sín kixin jína tjákoxian tí tan chaxín.

⁴ Kohya ijnko nkehe antsí má nchechána éxí tió kúinhan kixin tí sín t'íkuan éxí xjanna tjejóititekaon sín tí tan chaxín

⁵ Kíchóni, chaxín jína tjech'e xrá tjínkítsa tí sín kíchó ni la ko antsí tjínkítsa tí sín tsíkjinín ókjé chjasin.

⁶ A ntá tí tsíkójnko tsé tí sín kíchó ni la tsíchronka sín kixin nkexrí tjuéhé tí jehe sín. Jaha chrókjuínkítsa tí nkehe t'ichjánxinhin sín tí sátsji sín. Xíkaha mé tóxrjínhin Dios.

⁷ Tió sákjuí sín kjuankixin sín chrónka sín itén Ìnchéni la chrohya sín chrók'uáyéhe sín ninkehó nkehe kuènte tí sín chónhya Dios.

⁸ Méxrá tí jeheni t'ichjánxin chrókjuinkítsani tí jehe sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótrefes

⁹ Janhan ikjian ijnko xroon k'uáyéhe tí sín tójnkotsé ntiha. Kjánchó ch'ín Diótrefes kuítekakonhya ch'án tí nkehe k'uetuenhenni ch'án kixin tjinkaon ch'án chrók'uetōan ch'án jehó ch'án.

¹⁰ Méxrá xíkaha tí sátsjia ntiha tsonixjaha ch'án kixin tí kjuach'ia ntáchro ch'án t'ántaxínhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjon kjuachaxin la t'etōan ch'án kixin tsjanjonhya sín kjuachaxin la ko t'etōan ch'án kixin tsochjinahya sín tí tójnkotsé tí chojni.

¹¹ Kíchóni chrókjuákoxinhya tí nkehe jínahya. Íchá jína chrókjuákoxian tí nkehe jína. Tí nkexro ich'e nkehe jína na mé kuènte Dios. A ntá tí nkexro ich'e nkehe jínahya la mé tsík'ikonhya sín Dios.

Jína tjákoxin tí ch'ín Demetrio

¹² Kaín sín ntáchro sín kixin jína tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixín nixja ch'án

13 Janhan chonta nchónhya nkehe tsontáxrjan, kjánchó tjin_kakonhya tsokjian ó

14 kixin tjin_kavan tjoka ts'íku_un tí jaha, a ntá tsjoni.

15 Kjuaxróxin chrókuak'e jaha. Kaín nkexro choxian ntihi nixjaha sín. Tétu_unhan nixjehé jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'ahá xra Jesucristo, la sana mé Jacobo la mé ikjian tí xroon í ts'áyéhe tí sín tsíkjejá It'eni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín.

² Imá kuikonóahará ch'án ntá ts'ayéherá kjuaxróxin kixin tjuahará ch'án.

*Tí sín ntoáhya tjako
(2 Pedro 2.1-17)*

³ Kíchóni, imá tjínkavan tsokjian tí xroon ts'ayéherá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayéherá tsoxrjanóaxínrá kixin jína chrókiénxinrá nkehe chrókuáteherá kixin nkexrí tinkachónkirá Ìnchéni kixin tí fe la mé ónaá tsík'áyéhé tí sín tsíkjinchetjóá Dios.

⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuente tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etóan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sintaxráxinkáonrá inaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjáyan ch'án tí sín kuítekakonhya sín tí jehe ch'án.*

⁶ Kjaxin tí sín ángel kuítekakonhya sín tí k'uetoan Dios ntá kuítóhe sín tí kjuachaxin tsíkjanjon Dios tsík'áyéhe sín la ko kuítóhe sín tí k'uék'ejó sín jína, a ntá jie Dios k'uetoan ch'án kixin ts'ejóchjina sín tí sítié la ts'ejóchónhen sín tsijia tí yaon tsitoxín ijie sín.

⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoá sín. Tíha mé chróxraxinkakonxín kaín chojni kixin nkexrí tsonhen tí sín titekakonhya tsjasótexín sín tí xrohi jnkochrín ts'ankahya.

⁸ Méxra kjaxin tí chojni a kotáchrién sín tsík'ikonxín kixin ó nchoxon chrókjuasinko sín jie chojni chjin ókjé la ko chrókuítekakonhya sín tí kjuachaxién Ìnchéni la ko chrók'uántaxínhin sín tí sín ángel chóna kjuachaxin t'etóan.

* 1:5 Éxodo 12.51 Números 14.29-30

⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuènte ch'ín Moisés.† A ntá jehe ch'án kjónté xikaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.”

¹⁰ A ntá tí chojni i t'ántaxínhin sín tí nkehe tienxínhya sín la tjenkayáxin sín éxí ko tienxínhya nchexiteyéhe tí nkehe ntáchro asén, mé xikaha tí nkehe jínahya kjuích'e sín ts'itjáyanxín.

¹¹ ¡Nò! tí jehe sín! Chréhe sín éxí kjuích'e ch'ín Caín.‡ Tjinkaon sín chrókjuacha sín chichaon ntá ntoáhya kjuích'e sín éxí kjuích'e Balaam, la ko its'en sín éxí ik'uén ch'ín Coré kixin kuítekakonhya sín.§*

¹² Ijnko kjuatósuehe kixin tjejóyákanxín sín tí síin kia náxrjón chontará, kixin tjejóne sín la ko tjejót'i sín chéhe sín la kjónté xikaha la ninkehó kjuasáya chóntahya sín. Tjejó sín éxí tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxí tjuí chóntahya ntá tjakáko xrínto; la ko éxí injko nta t'ónahya to tí nitjó chrók'óna to, éxí yáya tsík'en tsík'axrjenkixin nuèé.

¹³ Jehe sín na mé éxí ntayaon jjehe síxróji lóxrjo ó chóntahya ntá jína mé xikaha chónkó tí nkehe ch'e sín mé injko kjuatósuehe tíha; la ko éxí konotsé kjuíchroe sákjuí ókjé; a ntá tjechónhen sátsji sín tsjasóte sín sítié jnkochríxín.

¹⁴ A ntá kjuák'e ch'ín Adán, a ntá yatoxin chr'éxin kui ch'ín Enoc nixjaxin kjuachaxién Dios ntáchro ch'án kixin k'uíkon ch'án itjen Ìnchéni kuikao nchónhya mil tí sín ángel kuènte ch'án,

¹⁵ kixin sinchekitoexin ch'án ijié kaín tí sín jínahya kixin kaín tí jínahya kjuích'e sín la ko kaín nkehe k'uénixja tí sín jínahya k'uántaxínhin sín tí jehe ch'án.

¹⁶ Xráxín tóxrjienhya sín nkehe sítónhen la ko ixri sín tjonta kichó sín. Jehó xritjeyá sín tí nkehe tóxrjínhin sín tjenkayáxin sín. Ihnke sín nixja sín la ko itjo sín jína chojni kixin ntá tí sín a chrókjuinkitsa jehe sín.

Nchexraxinkaon ch'án tí sín tinkáchónki Cristo

¹⁷ A ntá jahará kichó ni, xráxinkáonrá kixin tí sín tsíkjeyá Ìnchéni Jesucristo

¹⁸ ntáchro sín kixin tí yaon tsjixixín tsjejexin chjasintajni ts'ixín chojni tsitekakonhya sín ts'ántaxínhin sín tí nkehe tjinkaon Dios la ko tsotjinkaon sín sinchexiteyéhe sín tí nkehe jínahya ntáchro asén sín ó.

† 1:9 Deuteronomio 34.6 ‡ 1:11 Génesis 4.3-8 § 1:11 Números 31.16 * 1:11 Números 16.1-3

19 Tí sín a mé tjinkaon ts'óxika tí sín jnkokqá tjejótojnkotsé kixin naxa tóxrjnhin sín sich'e sín nkehe siín chjasintajni kixin chóntahya sín Nchakuen Dios.

20 A ntá jahará kichó ni tjuahará, antsí jína chrók'uejorá tinkachónkirá Ìnchéni. Chrónixjexínrá Dios tí kjuachaxin kuènte Nchakuen ch'án.

21 Jína chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsojtáhará ch'án kjuachón jnkochrín.

22 Chrókuikonóehérá tí sín naxa tienxínhya.

23 Jnkójín sín chrókjuínchekaará chrókuakitsjekjanxínrá sín chríkjan xrohi, la ko chrókuikonóehérá í so sín kjánchó chróchontará cuidado tí jehe sín kixin kjónté ti iké sín kjaxin chóna jië.

Tjanchia ch'án kjuasáya

24-25 Jnkokqá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jië la ko tió tsjijini tí tjen ch'án la ninkehó jië chróchóntahyani, imá tsochéheni tí tjen ch'án ntiha. Kjuasáyé Dios imá chóna ch'án kjuachaxin t'etoan ch'án la ko kjuínchekaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

1 18

Kaín tí nkehe i mé chénka Dios Jesucristo kixin jehe ch'án tsochénka tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuènte ch'án kixin nkexrí chrókónohe tí ch'ín Juan ch'ehe ch'án xra.

2 A ntá jehe ch'án mé k'uítuenhen ch'án ntá chrónkaxín tí nkehe chaxín tsintácho Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxin Dios.

3 Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyehé tí yato nínko

4 Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án inaá la ko kjaxin tí yato Nchakuen ch'án tjejó tí trono t'etoxanxín ch'án mé tjanjon kjuaxróxin.

5 La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankíxixín xechón kjónté tsík'en kixin tjetoan ch'án kixin t'etuñhen ch'án kjónté kaín tí sín rey la ko tí sín t'etoxan síin chjasintajni. Jehe ch'án mé tjuèheni ch'án la ko tí ijnjé ch'án mé k'uíjmáxinni kaín tí jje chóntani.

6 Jehe ch'án mé tsíkjanjon kjuachaxin tsík'ónani nchat'á kixin sich'eheni xra It'éni Dios. Tí kjuachaxin kuènte ch'án me ts'etoxan jnkochríxín. Mé xikaha tsoxiteyá. Amén.

7 Ts'ikon chojni kixin Cristo la ó tsi chríkjan tjuj. Kaín chojni ts'ikon ch'án la ko kjaxin tí sín k'uékónínkakonhen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin síin chjasintajni tsotsjánka sín tió ts'ikon sín tí jehe ch'án. Mé xikaha tsonhen. Amén.

8 Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé xikaha ichro Ìnchéni Dios, tí nkexro imá t'etoxan. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án inaá.

Ch'ín Juan tsík'ikon ch'án kixin Cristo chóna kjuachaxin

9 Janhan Juan mé ijnko kichó tí jahará mé tjékian Jesús la ko tí kjuachaxin kuènte Dios chonta la mé jahará la ko

jeheni jnkokón tzejótjasóteni la jehe ch'án tjinkĩtsani kixin tsjachani. Kjuàkua itén Dios éxí chrónka Jesucristo la mé tíha kjuak'échjĩnaxián tí isla it'in Patmos.

¹⁰ A ntá ijnko yaon xraxinkakonxinni Inchéni la ikui kjuachaxin Nchakuen Dios tí tjén tí janhan la kujnhan kixin nóton tí janhan ijnko nkexro nixja imá itsen éxí itén ijnko trompeta.

¹¹ Mé ntáchro ch'án kixin:

—Janhan mé tí xrankixixín la ko tí tsjixixín éxí tí letra xrankixixín A la tsjixixín Zeta. Mé tsokjian jaha ijnko xroon kaín tí nkehe k'uíkuan kixin tsochr'enhén tí yato nĩnko tjejó tí estado Asia na mé tí nĩnko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjía tsjaha kixin nkexro itén tí tjenixjana ntá xrinahya k'uíkuan yato candelero tsík'óna chica oro.

¹³ A ntá chríkjan tí yato candelero k'uíkuan ijnko nkexro éxí yóhe Xjeen Dios tsík'óna chojni. Ntá tí iké ch'án la ika kjinjin tjenkáya ch'án hasta tsikóyóhe toté ch'án la ko mé chóna ijnko cinta jehó oro tjenkáni ntakuin ch'án.

¹⁴ Tí kaxihí ch'án la tjóá éxí kaxree kolélo tjóá o éxí chrinta tsjehe la ko tí ikon ch'án la éxí xrohi nene tsjehe.

¹⁵ Ntá tí toté ch'án la éxí chica sine tjákinĩ na ntá tsík'axrjexín tja. A ntá tí itén ch'án la itsen éxí tóvéntó nchónhya ntario.

¹⁶ A ntá tí tja ch'án chjina mé chóna yato konotsé. A ntá tí ir'va ch'án k'uaxrjexín chica espada iyo, yánjin taté. A ntá imá tjákinĩ tsjehe ikon ch'án la éxí yaon t'inkaséyanxín imá.

¹⁷ A ntá tí k'uíkuan xikaha la kjuáchr'ítsinka toté ch'án éxí tsík'énna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kixin:

—Chrakonhya jaha. Janhan mé tí xrankixixín la ko tí tsjixixín.

¹⁸ Janhan tí nkexro tjechón. Ik'uén, a ntá ijie la tjéchuán inaá la itjén jnkochrixin. Amén. Janhan chonta llave kuente chojni its'en la ko kuente tí siín tí sín tsík'en.

¹⁹ Méxra ikjian jaha tí nkehe k'uíkuan mé tí nkehe siín ijie la ko tí nkehe tsonhen chr'éxin.

²⁰ Ninkexró k'uékienxínhya nkexrí t'axrjexín tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kixin tí yato ángel t'ayakonhen tí yato nĩnko la ko tí yato candelero k'uíkuan me kjaxin t'axrjexín tí yato nĩnko.

2

Tí tan k'uáyéhe tí yato nĩnko: Tí tan k'uáyéhe tí sín chjasin Éfeso

¹ 'Tsokjian tí nkehe ts'áyéhe tí ángel t'ayakonhen tí n̄nko Éfeso: “Xíkaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xíkíhi:

² Janhan nòna kaín tí xra ch'erá la ko nòna kixin tóxrjíanhyará tí sín jínahya. Janhan la ó nòna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín.

³ Nchónhya kjuasótiará la kjónté chonhénrá kóninkákonhyará la imá kjuich'erá xra kixin tinkachónkirá n̄ina la ko nunca kóxrjéhyará.

⁴ Kjánchó tjánchía ijnko jie tí jahará kixin tinkachónkihyará éxi kjuankixixínrá k'uétjuanará.

⁵ Méxra chróxráxinkáonrá kixin ó kuitohérá tí k'uétjuanará la ntá chrókjuínkirá tí nkehe tjenkayáxinrá la ko chrókjuich'erá xra éxi tí kjuankixixínrá. A ntá tí náhi, la tjoka tsjasán la tsjakíyan tí candelero tí tjejorá tí nunca tsjínkihyará tí nkehe jínahya tjenkayáxinrá la tí tsokjanhyará tsoxráxinkáonrá Dios.

⁶ Kjánchó chrókónohará kixin tóxrjina tí nkehe tjejoch'erá kixin tóxrjíanhyará tí xra ch'e tí sín nicolaítas kixin kjaxin janhan nínkakonhan tí nkehe ch'e sín.

⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí n̄nko ntáchro kixin: Tí sín tsjacha sinchexiteyàna sín la tsotjahá sín kjuachaxin sine sín tí to t'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasin Esmirna

⁸ 'Ikjian tí nkehe ts'áyéhe tí ángel t'ayakonhen tí n̄nko Esmirna: “Xíkaha ichro tí nkexro xrankixixín la tsjixixín, mé tí nkexro ik'uén la ntá jie tjechón:

⁹ Janhan la ó nòna kaín nkehe tjejoch'erá. Ó nòna kixin nkexrí tjejótjasótiará la ko ó nòna kixin nòará kjánchó jehya. Náhi. Jehe sín mé tójnkotsé sín tí n̄nkoé tí Jínahya.

¹⁰ Kjánchó chrakonhyará kjónté tsjasótiará. Tí ch'in Tsochren tsochr'ánxanhanrá ntøechiso jnkojín tí jahará kixin tsotsjexín nkexrí tí jahará ntá t'ichjánxin tsjasótiará iso yaon. Kjánchó chrókuitoéhyará Dios kjónté chrók'uenrá ntá janhan tsotjáhará tí kjuachón chr'éxin.

¹¹ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí n̄nko: Tí nkexro tsjacha sinchexiteyàna sín la í tsjasótehya, la tí yóxin its'en chojni la í ts'enhya tí jehe sín.”

Tí tan k'uáyéhe tí sín chjasin Pérgamo

¹² 'Tsokjian tí nkehe ts'áyéhe tí ángel t'ayakonhen tí n̄nko Pérgamo: “Mé x̄ikaha ichro tí nkexro chón̄ta ch̄ica espada yán̄jín taté:

¹³ Janhan ó n̄ona kaín nkehe tjejoch'erá la ko ó n̄ona nketi tjejorá k̄ixin tí tjejorá la t'et̄oan ch'ín Satanás la kjónté la j̄ina kuinkachónkirá tí janhan. Jahará kūjtoéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyàna j̄ina. Jehe sín tsík'óyánxin sín ch'án tí tjejorá ntiha k̄ixin ntaha t'et̄oan ch'ín Satanás.

¹⁴ Kjánchó janhan tjánchíá ijnko jiē tí jahará k̄ixin iso nkehe ntoáhya ch'erá. Siín ntiha chjasin Pérgamo tí tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuenhen ch'án tí ch'ín Balac k̄ixin tí sín israelita chrókjuasin sín jiē chrókjóne sín tí nkehe tsíkjokehe sín tí nkehe tsíkjan̄oya la ko chróchón̄ta sín chojni chjin ókjé chrókjuasinko sín jiē.

¹⁵ Kjaxin x̄ikaha tí tjejorá la siín iso sín tjinkakonhya sín tsítóhe sín tí nkehe tjako tí sín nicolaitas. Janhan mé tjínkakonhya tí sín a.

¹⁶ Méxra chrókjanrá chrókuinkachónkirá Dios. A ntá tí náhí, la tjoka tsjasán tí tjejorá la tsjánjonkianxian sín tí espada t'axrjexín ir'va.

¹⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí n̄nko ntáchro k̄ixin: Tí nkexro tsjacha sinchexiteyàna sín la tsot̄jahā sín kjuachaxin chrókjóne sín maná tjechónhen la ko tsot̄jahā sín ijnko x̄o tjóá la tí x̄o la ts'ínixín ihnié sín n̄ixin chón̄hya ninkexró. Jehó tí nkexro ts'áyéhe mé t̄sonohe.”

Tí tan k'uáyéhe tí sín chjasin Tiatira

¹⁸ 'Tsokjian tí nkehe ts'áyéhe tí ángel t'ayakonhen tí n̄nko chjasin Tiatira: “Mé x̄ikaha chro tí Xjeen Dios, tí nkexro ikon éxí yóhe x̄rohi nene sít'axrjexín la ko toté éxí ch̄ica sine tjákini tsjehe.

¹⁹ Janhan ó n̄ona kaín tí nkehe tjejoch'erá la ko ó n̄ona k̄ixin tjuanará la ko tinkachónkirá tí janhan la ko ó n̄ona tí x̄ra tjejoch'erá la ko ó n̄ona k̄ixin tjejochonhénrā tóninkákonhyará. La ko ó n̄ona k̄ixin antsí tjejoch'erá x̄ra ijie ntá tí kjuank̄ixixínrā la kénhyó.

²⁰ Kjánchó tjánchíá ijnko jiē tí jahará k̄ixin tjánjonrā kjuachaxin tjako tí tjan Jezabel. Kjaxin ntáchro tjan k̄ixin nixja tjan itén Dios kjánchó ch'iyehē tjan tí sín ch'ena x̄ra k̄ixin kjaxin sín chrókjuasinko sín jiē chojni chjin ókjé la ko chrókjóne sín tí nkehe tsík'óyán sín tsíkjokehe sín tí nkehe tsíkjan̄oya.

²¹ A ntá janhan ó kūjtohā tjan intsí k̄ixin chrókjuinkí tjan tí t̄jenkayáxin tjan kjánchó tjinkakonhya tjan sich'e tjan x̄ikaha

la tjinkakonhya tjan chrókuítøhe tjan tí jie tjasinko tjan chojni ntoa.

²² A ntá jie tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítóehya sín tí nkehe tjinkaon tjan sich'e tjan.

²³ A ntá janhan ts'oyán tí xjeen tí jehe tjan. Ntá kaín tí nínko tsonoexín sín kixin janhan choxian nkehe tónhen asén kaín chojni. A ntá jnkojnko tí jahará la tsjénkaḥará nkexrí tí xra kjuich'erá.

²⁴ A ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuènte ch'ín Tsochren la xikahó la í tsétuḥnyará íjnko xra.

²⁵ A ntá jahará la tí nkehe ó chontará la t'ayakonhénrá hasta tsokjan janhan.

²⁶ A ntá tí sín tsjacha sinchexiteyána sín la ko xikaha sich'e sín hasta tsjixixín kixin janhan tjínkaḥan xikaha chrókjuich'e sín na mé janhan tsjánjuan kjuachaxin ts'etuḥnen sín kaín nación.

²⁷ Na mé xikaha T'aná mé chjina kjuachaxin tsétøan la kjaxin xikaha jehe sín mé ts'etuḥnen sín tí nación yóhe chróchóna sín ijnko chica vara kixin chróchjéhe sín tí chj chrók'ókuen tí chj tsík'óna nchetje.

²⁸ Me kjaxin tsotjaha sín tí konotsé tí tji nchítjen.

²⁹ A ntá tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

3

Tí tan k'uáyéhe tí sín chjasin Sardis

¹ Tsokjian tí nkehe ts'áyéhe tí ángel t'ayakonhen tí nínko chjasin Sardis: “Xikaha ichro tí nkexro chóna yato Nchakuen kuènte Dios la ko chóna tí yato konotsé: Janhan nòna kaín nkehe ch'erá, ó nòna kixin éxí tsík'en tí xra ch'erá kjónté nchehnerá kixin tjejochónrá.

² T'ayará. Naxa t'ayakonhénrá kjónté í tsjéhya tí nkehe kuítøhe kixin kjaxin tíha mero its'en. Ó k'uikuḥan kixin tí xra ch'erá la t'ikon tí Dios kuèntana kixin ntoáhya.

³ Chrórxáinkáonrá tí nkehe tsíxrakohará la ko tíha chrókjuich'erá la chrókjanrá chrórxáinkáonrá Dios. A ntá tí naxa tjejochrinrá la titaya tsjasán éxí ijnko síchee la tsonoahyará nkesá tíha.

⁴ Kjánchó naxa síin iso chojni ntaha chjasin Sardis naxa kjuínchekjitaḥya sín iké sín la jehe sín la ts'ájikian sín kixin chóna sín ka tjóá kixin jehe sín la jina sín.

⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxikahya ihnié sín chóna tí libro ts'ínixín

ihñié tí sín tsaá la ko tsochoxian sín nkayakon T'aná la ko nkayakon tí sín ángel kuènte ch'án.

6 Tí nkexro tjinkaon chrókuinhin la chrókuinhin tí nkehe nixjehē Nchakuen Dios tí n̄nko.”

Tí tan k'uáyéhe tí sín chjasin Filadelfia

7 'Tsokjian tí nkehe ts'áyéhe tí ángel t'ayakonhen tí n̄nko chjasin Filadelfia: “Xikaha ichro tí nkexro tjóá la ko chaxín mé tí nkexro chóna llave kuènte ch'ín rey David. A ntá tí tsakitjehē ch'án puerta la ninkexró tsjachahya ts'ikjéhe, a ntá tí ts'ikjéhe ch'án puerta la ninkexró tsjachahya tsakitjehē.

8 Janhan ó nòna kaín nkehe tjejoch'erá. Kjuaké tí tjejorá ijnko puerta xitjehē la ninkexró xitjahya ts'ikjéhe. Kjonté intsíkoá kjuachaxin chontará la jahará kjuinchexiteyará tí nkehe kjuákua la ko kjuinchemáhyará tí janhan.

9 Tí sín tsíkiteakon Satanás la ntáchro sín kixin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínkí totará la ntá tsonohe sín kixin chaxín janhan tjuahará.

10 Ó kuítekáonrá tí nkehe kuétuanhanrá la jína tjejorá la mé xikaha janhan ts'ayakonhanrá tí ichrén nkehe tsonhanrá tió tsi tí nkehe tsonhen kuenté chjasintajni kixin ó jehí xikaha tsonhen kaín chojni tjejó chjasintajni.

11 Janhan mé tjoka ts'inka. Méxra t'ayakonhénrá tí nkehe chontará kixin ninkexró chrókuakitsjahará tí nkehe ó kjuachará.

12 Tí nkexro tsjacha sinchexiteyàna la ts'óna sín columna kuènte n̄nko kuènte Dios kuèntana la nunca xitjahya sátsjixin sín ntiha. La janhan tsokjian ihñié tí Dios kuèntana tsjiko sín la ko tsokjian ihñié chjasén Dios kuèntana mé tí Jerusalén n̄xin tsixin nkajní tí tjen Dios kuèntana. Kjaxin tsokjian n̄ina n̄xin tsochóna sín.

13 Tí nkexro tjinkaon chrókuinhin la chrókuinhin tí nkehe nixjehē Nchakuen Dios tí n̄nko.”

Tí tan k'uáyéhe tí sín chjasin Laodicea

14 'Tsokjian tí nkehe ts'áyéhe tí ángel t'ayakonhen tí n̄nko chjasin Laodicea: “Xikaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuích'énoxín Dios kaín nkehe.

15 Ó nòna kaín nkehe tjejoch'erá. Ó nòna kixin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará.

16 A ntá jahará la yásorá la jehya ikinrá la jehya sóará. A ntá ijie ir'va ó tsíkia tí jahará la ts'itjia.

17 Ntáchrórá kixin jahará rícorá la imá jína tjejórá la ko ninkehó t'itjáyanhya tí tjejórá, ichrorá. Kjánchó chontahyará kjuachéhe la ko jehya jína tjejórá la ko nòará la ko ntakótánrá la ko tjóchínrá.

18 Méxra ijie ntáxraxinkáonrá janhan s̄intakjihará tí nkehe oro náxrxón ts'ík'axrxén tja kixin ntá chaxín ts'ónará rico. La ko janhan s̄intakjihará ika tjóá kixin ts'ínkayará ntá ts̄inhanrá kjuatósuehe kixin í tjóchínhyará. La ko janhan ts̄ánjuan xroan kolirio ts̄iankí ikonrá kixin ts'íkonrá.

19 Janhan mé ts̄jentuáha kaín tí sín tjuaha. Méxra íchá jína chrókjan sín chrókuinkáchónki sín Dios.

20 Tsjehérá janhan itjén ntója puerta, tjet'eya. A ntá jnkójín nkexro chrókuinhin tí tanná ntá chrókuakitjehe tí puerta ntá chrók'uixanhan ntøe sín la chrókjónekian sín la ko jehe sín la ko janhan.

21 A ntá tí sín chrókjuacha chrókjuinchexiteyàna la ts̄ánjuan kjuachaxin ts'ejókian sín tí tétøanxian ntiha la éxí xíkaha janhan kjuacha ntá T'aná kjuanjon kjuachaxin tjejkian ch'án tí tjen ch'án t'etøan ch'án ntiha.

22 Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí n̄inko."

4

Tí sín tjikosáyehe Dios nkaya nkajní

1 Ntá chr'éxin janhan k'uikuān ijnko puerta tjexrankehe nkaya nkajní. Ntá kuinhan ijnko itén nkexro éxí trompeta mé tí nkexro nixjana tí xrankíxixín, ntá jehe ch'án nixjana ch'án, ntáchro ch'án kixin:

—T'it'ótjen ntihi ntá tsjákoha kaín nkehe tsonhen chr'éxin.

2 Ntá tuénxín ikui tí kjuachaxin kuènte Nchakuen Dios k'uayáha ntá k'uikuān tí trono itjen nkaya nkajní ntá ntiha tjetjaxin ijnko nkexro.

3 A ntá tí ch'ín tjetjaxin tí trono mé tjákini tsjehe éxí ixro jasje o ixro cornalina. A ntá jnkotatjen tí trono itjen ijnko konchecha tjákini tsjehe éxí ijnko xro esmeralda.

4 A ntá kjaxin jnkotatjen tí trono k'uikuān í so veinticuatro trono kjaxin tjejótxin veinticuatro sín táda, iké sín la tjóá la ko tjejóya kja sín corona tsík'óna chica oro.

5 A ntá tí trono kuènte Dios la ntiha sít'axrxén tí sítjónkixín la ko sítjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios.

6 A ntá nkayakon tí trono la kjaxin itjen ijnko ntayaon éxí xroxro tsjehe.

A ntá tí jnkosiné la ko jnkotatjen tí trono tjejó noó nkexro tjejóchón chóna nchónhya ikon nkayakon la ko nóton.

⁷ **A** ntá tí nkexro tjechón k'uíquān saoxín mé éxí koxrā tsjehe. **A** ntá tí nkexro yóxin tóyóhē éxí koxinta, **a** ntá tí nkexro níxin tsjehe éxí chojni. **A** ntá tí noóxin la éxí kotjuānhnko xritjaká tsjehe.

⁸ **A** ntá jnkójnko tí noó nkexro tjejóhón chóna injon kanēnēe sín la chóna nchónhya ikon nóton la ko nkaxenhen, la nchakotjin la ko tie títōehya sín ntáchro sín kixin:

Santo, santo, santo,

Ìnchéni Dios, jaha chonta kaín kjuachaxin,

jaha xráxin tjen la ko itjen ijie la ko jaha ts'inka ínaá.

⁹ **A** ntá tí nkexro tjejóhón jnkoyaxon tió tjanchia sín kjuasáyé Dios la ko tjikosáyehē sín ch'án la ko nixjehē sín ch'án chjéhe sín kjuasáyé tí nkexro tjetjāxín tí trono mé tí nkexro tjechón jnkochrín.

¹⁰ La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehē sín tí jehe ch'án kixin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kixin:

¹¹ Ìnchéni Dios kuènteni, jaha la imá jína la t'ayéhé kjuasáya kixin tjikosáyahani tí jaha kixin tí kjuachaxin chonta;

kixin jaha kjuich'éna kaín nkehe síin kixin jaha kóxrjínhan xikaha k'óna.

5

Tí libro la ko tí Kolélo

¹ **A** ntá tí tja chjina tí nkexro tjetjāxín tí trono, k'uíquān ijnko libro mé tsikjin sín nkaxenhen la ko nóton la ko mé tsikjèxin yato sello.

² La k'uíquān ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jína chrókjuacha chrókuakitjehē tí libro la ko chrókóchrítōn tí sello chóna?

³ La ninkexró ní nkajní **o** ní chjasintajni **o** ní chrínkí nonte tsjachahya tsakitjehē tí libro la ní komáhya sín.

⁴ **A** ntá janhan la imá tsjanka kixin naxā tónoxínhya ninkexró chrókjuacha chrókuakitjehē tí libro **o** chrókjuinchekuáxin tí libro **o** chrókomá nkehe tí ntáchro tí libro.

⁵ Ntá ijnko tí sín táda ntá nixjana ntáchro kixin:

—Tsjankahya, tsjehé ntihi tí Koxrā k'uaxrjeníxin Judá la ko tsík'axrjeníxin rey David. Mé kjuacha la ó tsjacha tsakitjehē tí libro la ko tsóchrítōn tí yato sello —ichro ch'án.

⁶ **A** ntá jnkosiné tí trono la ko tí tjejó tí noó tí nkexro tjejóhón la ko jnkosiné tí tjejó tí sín táda ntaha mé k'uíquān tjexín toté ijnko Kolélo tsjehe éxí tsík'óyán sín mé chóna yato

ntée la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni.

⁷ A ntá tí Kolélo a kuákja tí libro itjen tja chjina tí nkexro tjetjaxin tí trono.

⁸ A ntá tíó k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uejóxin toch'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihnti tsík'óna chica oro tsíkaón chjinco. Tíha mé oración nixjehe Dios kaín tí sín tsíkjinchetjóá ch'án.

⁹ Itsje sín nkehe nixin ntáchro kixin:

Jaha mé ijnko nkexro jína kjuacha kuákja tí libro la ko kóchrítuan tí sello;

kixin tsík'óyán sín tí jaha la ko tí ijniá k'uenañian tí jeheni ts'áyéhe Dios,

mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsíkijich'énani reyes la ko nchat'á sich'ehe ni xra Dios kuènteni,

la ko jaha tsíkjánjuan kjuachaxin ts'etõanni chjasintajni. Mé xikaha ichro sín.

¹¹ Ntá tuénxín k'uikuañ la ko kuinhan itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín.

¹² Itsen nixja sín ntáchro sín kixin:

Tí Kolélo tsík'óyán sín,

tíha mé kjuacha k'uáyéhe kjuachaxin ts'etõan la ko k'uáyéhe tí nkehe tjete kuènte Dios,

la ko tí kjuaxrexinkaon jína la ko kjuachaxin sich'e xra

la ko mé xikaha tjikosáyeheni ch'án.

¹³ Kjaxin kuinhan kixin kaín nkehe kjuích'éna Dios siín nkajní la ko chjasintajni la ko tí nkehe siín chrínkí nonte la ko kaín nkehe siín ntayaon la kaín tíha mé ntáchro kixin:

Chjéheni kjuasáya tí nkexro tjetjaxin tí trono la ko tí Kolélo kixin chóna kjuachaxin jnkochrín.

¹⁴ A ntá tí noó sín tjejóchón ntáchro sín kixin:

—Xikaha tsonhen. Amén.

La ko tí veinticuatro tí sín táda k'uejóxin toch'in sín la chjéhe sín kjuasáyé tí nkexro tjechón jnkochrín.

6

¹ A ntá k'uikuan kíxin tí Kolélo kóchríton tí xránkíxixín tí yato sello ntá kuinhan ijnko tí noó tí noó tí sín tjejóchón nixja ch'án éxí kjónta, la ntáchro ch'án kíxin:

—Xrákiá tsjehé.

² Ntá k'uikuan ijnko kokate tjóá. A ntá tí nkexro tjejen tí kokate chónta ch'án ijnko arco tí tja ch'án la tsík'áyéhe ch'án ijnko corona. Jehé ch'án mé kjuacha ch'án la naxa xikjacha ch'án ínaá.

³ A ntá tí Kolélo kóchríton tí yóxin sello ntá kuinhan tí nkexro yóxin tjechón ntáchro kíxin: —Xrákiá tsjehé.

⁴ Ntá sákjuí í jnko kokate kjátse. A ntá tí ch'ín tjejen k'uáyéhe ch'án kjuachaxin tsjakjiin tí kjuaxróxin síin chjasintajni kíxin ntá chojni mé ts'óyán kichó sín kíxin jehé ch'án mé tsík'áyéhe ch'án ijnko espada ijié.

⁵ A ntá tí Kolélo kóchríton tí níxin sello la ntá kuinhan nixja tí níxin nkexro tjechón ntáchro kíxin:

—Xrákiá tsjehé.

Ntá k'uikuan ijnko kokate tié. A ntá tí nkexro tjejen tí kokate chónta itja ch'án ijnko báscula.

⁶ La ntá kuinhan itén ijnko nkexro jnkosiné tí tjejó tí noó sín tjejóchón mé ntáchro kíxin:

—Jehó ijnko kilo trigo ijnko chichaon denario la ko íní kilo cebada ijnko chichaon denario. Kjánchó chrókjuinche k'itjáyanhya tí aceite la ko tí vino. (Tíha mé t'axrjexín tsokjinta.)

⁷ A ntá tí Kolélo kóchríton tí noóxin sello ntá kuinhan tí noóxin tí nkexro tjechón ntáchro kíxin:

—Xrákiá tsjehé.

⁸ Ntá k'uikuan ijnko kokate sine. A ntá tí ch'ín tjejen va a mé it'in ch'án Muerte. A ntá nóton tí jehé ch'án la ikui nkehe tóyóhe tí tjejó tí sín tsík'en. Jehé ch'án k'uáyéhe kjuachaxin ts'etoan ch'án noóxin parte chjasintajni kíxin ntá ts'óyán kichó sín la tsokjinta la ko ts'enxín sín ichin la ko kaín ko jiehe síin chjasintajni mé tsjaya va.

⁹ A ntá tí Kolélo kóchríton tí n'óxin sello ntá k'uikuan chrínki tí altar tí asén tí sín tsík'enxín tí tan kuènte Dios tsíchrónka sín.

¹⁰ Ntáchro sín itsen kíxin:

—Jaha mé Inchéni tjóá jína la jaha mé sijnchexiteyá tí nkehe tsintáchrúa, ¿la nkesá sijnchekitoexián ijié tí sín síin chjasintajni tsík'óyán tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uituenhen sín naxa ts'ok'éhe sín í so yaon tsoxetajia tí número tí kichó sín ch'ehe xra Cristo naxa ts'enxín sín éxí k'uén tí jehé sín.

¹² **A** ntá tí Kolélo kóchrítõn tí injonx̄in sello ntá xrínahya imá kuínkí nonte. **A** ntá tí yaon la kótié éxí ika tjiko chojni tsík'en. **A** ntá nitjõ k'óna kjátse éxí jñi.

¹³ **A** ntá konotsé sít'ánótjenx̄in nkajní sítjitsínka nonte éxí yóhe tí inta t'óna to higo la síxènjín tí to yoa tió tsjixraya tí nta kíxín tí imá fuerte chjéhe xr̄intõ.

¹⁴ **A** ntá nkajní k'uitjáyan éxí ijnko xroon tsíxrèya. Ntá kaín jñá la ko tí nonte ntsíntsí siín jnkõsiné ntayaon sákjuí ókjé.

¹⁵ **A** ntá kaín tí sín reyes siín chjasintajni la kjaxin tí sín t'etõan la ko chojni rico la ko comandante la ko tí sín chóna kjuachaxin la ko kaín tí sín ch'exón xr̄a la ko tí chojni náhí mé k'uixenhen sín tjõ siín nteje ts'ejómáxin sín.

¹⁶ Ntáche sín tí jñá la ko tí tjõ kíxín:

—Xrákiá xrátja tí jeheni nchemáni kíxín chrók'uikonhyani tí nkexro t'etõan tjetjax̄in trono la ko chrókjuasótehyani tí kjuachrakon jié tsjanjon tí Kolélo.

¹⁷ Kíxín ó kui tí yaon imá jié kuènte kjuachrakon la, ¿xá nkexro chrókjuacha chrók'uejó ntiha?

7

Tí sín israelita chóna sello

¹ **A** ntá chr'éxin k'uikuån noó sín ángel tjejóxin toté sín la jnkojnko sín tjejó sín tí chrínta chjasintajni chónthehe sín tí noó xr̄intõ kíxín tsochjéhya xr̄intõ chjini chrítaón chjasintajni la ko ní chrítaón ntayaon la ko nijnko tí nta yoa.

² Kjaxin k'uikuån í jnko ángel kjuix̄in nó tjitõxin yaon la chóna sello kuènte Dios tjechón. Ntá tí ángel mé k'uíyehé ch'án itsen tí noó ángel tsík'áyehé kjuachaxin sincheníhi nonte la ko ntayaon.

³ Ntáchro ch'án kíxín:

—Náhí, sincheníehya nonte la ko ntayaon la ko kjaxin tí nta la náhí tí nax̄a tsíkahya sello totjen tí sín ch'ehe xr̄a Dios kuènteni.

⁴ Kuñhan tí número tí sín tsíka sello la me ciento cuarenta y cuatro mil kain tí sín tsík'axrjeníxin tí sín israelita.

⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad

⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés

⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Leví la ko teyó mil tí sín tsíka sello tsík'axrjeníxin Isacar

⁸ la ko teyó mil tí sín tsíka sello tsík'axrjeníxin sín Zabolón la ko teyó mil tí sín tsíka sello tsík'axrjeníxin José la ko teyó mil tí sín tsíka sello tsík'axrjeníxin sín Benjamín.

Sín nchónhya chojni chóna ka tjóá

⁹ Ntá kjuixin tíha ntá k'uíquān nchónhya chojni kaín xín nación la ko kaín xín nkexrí tsjehe sín la ko kaín xín nkíva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín.

¹⁰ Kaín sín itsen nixja sín ntáchro sín kíxin:

Dios kuènteni mé kjuínchekaáni.

Jehe ch'án mé tjetjāxín tí trono tí tjen tí Kolélo kjuínchekaáni.

¹¹ Kaín tí sín ángel tjejóxin toté sín jnkontājen tí trono la ko jnkontājen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios.

¹² Ntáchro sín kíxin:

Amén. Kjuíncheyaonni Dios la tsochjéheni Dios kjuasáya kíxin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kíxin tjinkĩsani ch'án jnkochrín. Amén.

¹³ A ntá ijnko tí sín táda kjuanchankina, ntáchro kíxin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsíkjixín sín?

¹⁴ Ntá janhan ntáxrjan kíxin:

—Ínchéni, jaha ó noha. Ntá jehe ch'án ntáchro ch'án kíxin:

—Tí sín i tsíkjixín sín tí kjuaxróxinhya k'uék'ejó sín, la tí sín a mé tsjjen sín iké sín la ko tsíkótjuáxin ijnié tí Kolélo.

¹⁵ Méxrā xikaha ntá ijie tjejó sín nkayakon tí trono kuènte Dios la tjejóch'ehe sín xrā Dios nchākotjin la ko tie tí nkaxenhen nínko kuènte ch'án. A ntá tí nkexro tjetjāxín chrítaón tí trono mé t'ayakonhen ch'án sín.

¹⁶ A ntá tí sín a mé ts'enxinhya sín kjinta la ko ts'enxinhya sín intā la ko tsochjāxinhya sín yaon la ko ni sóa kohya nkehe sich'ehe sín.

¹⁷ Kíxin tí Kolélo tjen jnkosiné tí trono mé t'ayakonhen ch'án tí jehe sín éxí iko kuènte ch'án la ko sátjiko ch'án tí tjiá ntā tjanjon kjuachón la Dios mé sinchexámá kaín tí ntākon tí jehe sín.

8

Tíyatōxin sello la ko tí ihnti oro

¹ **A** ntá tí Kolélo kóchrítõn tí yatoxin sello kuente tí libro la ntá kohya ninkehó ruido nkajní chjina it'õ hora.

² Ntá tuénxín k'uúkuḡan yato ángel tjejóxin toté nkayakon Dios la jnkojnko sín k'uáyéhe sín jnkojnko trompeta.

³ Ntá chr'éxin ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjincõ tsjak'e ch'án kixin sátsjiko tí oración kuente kaín tí sín tsíkjinchetjóá Dios kixin tsjak'e chrítaón tí altar oro nkayakon tí trono.

⁴ **A** ntá tí ihnchi kuente chjincõ chríinxín tja tí ch'ín ángel tí tjen Dios la ko kjaxin tí oración kuente chojni tsíkjinchetjóá Dios.

⁵ **A** ntá tí ch'ín ángel kuákja ch'án tí ihnti kjuínchekaón ch'án xrinta kuente xrohi kuente tí altar la ik'ue ch'án chjasintajni. La ntá kjõnta la ko nchónhya ruido la ko sítjónkíxín la ko kuínki nonte.

Tí trompeta

⁶ **A** ntá tí yato ángel mé chõnta sín jnkojnko trompeta ó yaxínhin sín kixin ts'ánoa sín.

⁷ **A** ntá tí ángel saxín k'uánoa trompeta ntá k'uániá toni la ko xrohi tsínkíkjan jni mé xíkaha ikui chrítaón chjasintajni. **A** ntá iche níxin parte nonte la ko níxin parte tí nta la ko kaín tí kayoa siín.

⁸ **A** ntá tí yóxin ángel k'uánoa trompeta la ijnko nkehe yóhe tsjehe éxí ijnko jnḡ jié tjeche la sákjuí kjuíankí ntayaon la ntá níxin parte tí ntayaon la k'óna jni.

⁹ **A** ntá tí níxin parte kaín tí nkehe siín tí ntayaon la ik'uén la ko níxin parte kaín tí ntabárcõ la xíka.

¹⁰ **A** ntá tí níxin ángel k'uánoa trompeta la ntá xrínahya k'uánótjen ijnko konotsé jié k'uánótjenxin nkajní mé tjeche éxí ijnko xrohi jié. K'uánótjen chrítaón níxin parte ntarío la ko tí sít'axrje ntḡ.

¹¹ Tí konotsé mé it'in Itsjá la tsíkjiankí níxin parte tí ntḡ ntá kótsjá tí ntḡ la nchónhya chojni ik'uén kixin tí ntḡ xíkaha tsíkótsjá.

¹² **A** ntá tí noóxin ángel k'uánoa trompeta la kjuíncheníhi ijnko níxin parte tí yaon la ko níxin parte tí nitjó la ko níxin parte tí konotsé. Méxra tí níxin parte kuítóhe sítié la í kohya t'inkaséyan tí níxin parte tí nchakotjin la ko tí tie.

¹³ Ntá tuénxín k'uúkuḡan la ko kuínhan ijnko ángel tjetjaká jnkosiné nkajní t'èya ch'án itsen, ntáchro ch'án kixin:

—Nõa tí sín tjejó chjasintajni tió tsontáchro tí trompeta ts'ánoa tí iní ángel inaá.

9

¹ A ntá tí n'óxin ángel k'uánoa trompeta la k'uúkuān ijnko konotsé tsík'ánótjēnxīn nkajní chrítaón chjasintajni ntá k'uáyéhe tí llave kuènte tí tòye nīnka.

² A ntá tuénxín xitjēhe tí tòye nīnka ntá ntiha chrīinxīn nchónhya ihnchi kuènte tja ntá tí t'inkaséyanxín yaon la ko tí xritō k'uúxin tié kīxin tí ihnchi kuènte tí tòye.

³ A ntá tí ihnchi mé k'uaxrjexín kochjōa xritjaká chrítaón chjasintajni. A ntá tí kochjōa k'uáyéhe kjuachaxin éxí tí chóna konchīa síin chjasintajni.

⁴ K'uituenhen va kīxin sincheníehya va tí kayoa síin chjasintajni la ko ninkehó nkehe yoa la ko ninkehó ntayoa. Jehó chojni chónahya sello kuènte Dios tí totjen mé sincheníhi va.

⁵ Kjánchó k'uáyèhya va kjuachaxin ts'óyán chojni. Jehó sinchekjoté va chojni hasta in'ó nitjō la tí kjuatjoté mé yóhe kjuatjoté éxí chojni tsíkijnehe konchīa.

⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjóté tjinkaon sín chrók'uen sín la tí muerte sátsíkji ókjé.

⁷ A ntá tí kochjōa éxí kokatē tsjehe, listo tjen sátsjikjanjōn va. A ntá tí ikja va itjen nkehe tóyóhe ijnko corona tsík'óna oro la ko tí kàré la tóyóhe éxí kàré chojni.

⁸ A ntá tí kaxree va tsjehe tóyóhe éxí kaxīhi chojni chjin, a ntá tí neno va la tóyóhe neno koxra.

⁹ A ntá tí cuérpōé la tjejianjin nkehe tsík'óna chica kīxin kohya nkehe tsonhen va. A ntá ruido kuènte kanēnee la éxí nchónhya carro tinkánkákjen kokatē tió xritinká tí síin kjuanínkaon.

¹⁰ A ntá tí ntané va mé tsjiate chojni la éxí ntané konchīa, la tíha mé tsochóna kjuachaxin sincheníhi chojni hasta in'ó nitjō.

¹¹ A ntá tí kochjōa mé chóna ijnko nkexro t'etōan mé ijnko ángel kuènte tí tòye nīnka. Tí ángel mé nkīva hebreo mé it'in Abadón la nkīva griego la mé Apolión mé t'axrjexín kīxin táha mé sinchek'itjáyan nkehe.

¹² Mé xīkaha kónhen tí kjuachrakon xrankíxixín. A ntá naxa t'itjáyan yaá inaá.

¹³ A ntá tí injonxīn ángel k'uánoa trompeta la kuīnhan ijnko itén nkexro k'uaxrjexín tí tjejó tí noó ntéé kuènte tí altar oro tí tjen Dios.

¹⁴ A ntá tí itén tí nkexro ntáche tí injonxīn ángel chóna trompeta kīxin:

—Tjasintankehé tí noó ángel kuènte tí jínahya tjejóchroé chjinaxón tí ntarío jíé it'in Eufrates.

15 Ntá xikaha xintankehe tí noó sín ángel kixin ts'óyán sín tí níxin parte chojni. Mé xikaha yaxínhin sín sátsji sín tí hora la tí yaon la tí nitjó la tí nánó.

16 Ntá kuinhan tí número tí soldado la ko tí kokate la doscientos millones.

17 Mé xikaha xrinahya k'uikuan tí kokate. A ntá tí sín tjejókjen kokate la tí ntakuin sín chóna nkehe tsík'óna chica kjátse la azul la sine. A ntá tí kokate la ikja la éxi kja koxra la tí ir'va la k'uaxrjexín xrohi la ko ihnchi la ko azufre.

18 A ntá níxin parte chojni tsík'enxín tí iní clase tí chin tsík'axrjexín ir'va kokate mé xrohi la ihnchi la azufre.

19 Tí kjuachaxin chóna tí kokate la k'uaxrjexín ir'va va la ko tí ntané va. A ntá ntané la éxi konche tsjehe la tí kja va mé sincheníhi chojni.

20 A ntá tí í so chojni kuítóhe k'uénxinhya tí chin a la kjónté kjuinkíhya sín tí nkehe tjenkayáxin sín la kuítóehya sín tinkáchónki sín nchakuen jínahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya.

21 La kjónté xikaha la kuítóehya sín tí nkehe jínahya ch'e la ko tí chrók'óyán kichó la ko tí nchekjiko kichó la ko tí chóna sín chojni chjin ókjé la ko tí tjinkaon sín chrókueé.

10

Ijnko ángel la ko tí librito ntsí

1 Ntá k'uikuan í jnko ángel imá chonta kjuachaxin k'uinkajinxin nkajní tjenkakjan ch'án tjuí la ko ijnko konchechá chrítaón tí ikja ch'án. A ntá tí kàré ch'án imá tjákiní tsjehe éxi yaon, a ntá tí toté la éxi xrohi síchr'ákjen.

2 Tjexraá ch'án ijnko libro ntsí tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche.

3 Ntá xrinahya k'uèya ch'án itsen éxi ijnko koxra tsjánka va tí tónínkaon va mé xikaha k'uèya la yato kjóna kjuatéyá tí itén ch'án.

4 Ntá kjuixin ntáchro tí yato kjóna la chrókjian ntá kuinhan ijnko itén nkexro nkaya nkajní ntáchro kixin:

—Chróchronkahya tí nkehe ntáchro tí yato kjóna la ko ni chrókjinhya tíha.

5 Ntá tuénxín tí ángel k'uikuan ijnko toté tjejen ntayaon la ijnko toté tjejen nche ntá kjuaya tja chjina nó nkajní.

6 Ntá kjuasin ch'án testigo tí nkexro tjen jnkochrín mé tí nkexro a mé kjuích'éna nkajní la ko chjasintajni la ko ntayaon la ko kain xín nkehe siín la ntáchro ch'án kixin:

—Í séhya má naxa tsoxjen

⁷ ntá tsjixraká tí yaon tí yatoxin ángel ts'ánoa trompeta ntá tsoxiteyá tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchrónka sín itén ch'án.

⁸ A ntá tí itén nkexro kuinhan k'uaxrjexín nkaya nkajní ntá xínixjana ínaá ntáchro kixin:

—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuia kjuáncháha tí ángel tí libro ntsí ntá jehe ch'án ntáchro ch'án kixin:

—Tákjá la inte. A ntá tí ir'va la tsoxé éxí tsjen kjánchó tí tsaa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxí tsjen ntá chr'éxin la kótsjá nkaya tsena.

¹¹ Ntá tuénxín k'uetuanna ch'án kixin:

—Ínaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijnko ntavara éxí tji tsjehe tsjáchroaxián ntá ntáchro ch'án kixin:

—T'àyá tjáchrōa nkaxenhen ninko kuènte Dios la ko tí altar la tékia nkejain nkexro tjejó ntiha tinkáchónki Dios.

² Kjánchó tí ntasin itjen ntója ninko la tjáchrōahya kixin táha ó tsík'áyéhe tí sín tsíkjin kjin la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó.

³ A ntá mé janhan tsochr'an iyó testigo kuèntana tsonixjainna mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Inchéni kuènte chjasintajni.

⁵ A ntá tí jnkojin sín tjinkaon sich'ehe sín daño la jehe sín la xrohi ts'axrjexín ir'va sín la tsoche kaín tí sín nínkakonhen sín la mé xikaha its'en kaín tí sín tjinkaon sich'ehe sín daño tí jehe sín.

⁶ A ntá tí testigo i chóna kjuachaxin ts'ikjehe nkaya nkajní kixin í ts'aniáhya chrin tí tsonixja sín kuènte Dios la ko kjaxin chóna sín kjuachaxin tsontáche sín tí ntá kixin ts'óna jni la ko sinchekjasótexín sín chojni chjasintajni nchónhya clase chin nchónhya veces éxí tí tjinkaon sín.

⁷ A ntá tí kjuixinhin sín tí xra ntá tí ko jiehe ts'axrjexín tí tòye ninka mé tsjankixin tsjanjonko tí jehe sín ntá tsjacha va ts'óyán va tí jehe sín.

⁸ **A** ntá tí cuérpōé sín tsitōhe sítsínka tí calle kuènte chjasin jíé tí tsíkjak'enkani sín Ìnchéni ntacruz mé tí chjasin mé kjaxin nchek'in sín Sodoma la ko Egipto.

⁹ **A** ntá iní yaon ko t'ò la kaín chojni itsjé chjasin la ko kaín nkexrí tsehe sín la ko nchónhya nkiva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a.

¹⁰ **A** ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uéchrónka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a.

¹¹ **A** ntá chr'éxin ó k'uátsínka iní yaon ko t'ò la ntá Dios kjuínchexechón tí iyó tí sín a inaá la k'uàya sín inaá la ntá kaín chojni k'uikon la imá chrakon sín.

¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chrìyan xrákiá antsí ntihi.

Ntá chrìnxín sín nkajní ijnko tjuí. **A** ntá kaín tí sín nínkakonhen sín la k'uikon sín kixin xikaha kónhen sákjuí tí iyó sín a.

¹³ Ntá tuénxín imá kuínkí nonte la ntá ijnko ite parte chjasin ntiha la k'uitjáyán la yato mil chojni tsík'en kixin tí kuínkí nonte. **A** ntá kaín tí sín xéhe imá chrakon sín la kjuankíxin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí níxin kjuachrakon inaá.

Tí yatoxin trompeta

¹⁵ **A** ntá tí yatoxin ángel k'uánoa trompeta ntá kuínhin sín ijnko tan nkajní itsen ntáchro kixin:

A ntá tí sín k'uáyéhe kjuachaxin kuènte chjasintajni la ó kjaxin nchexiteyéhe sín

Ìnchéni Jesucristo

kixin jehe Jesucristo mé ts'etōan ch'án jnkochrín.

¹⁶ **A** ntá tí veinticuatro tí sín táda tjejótxaxin sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios.

¹⁷ Ntáchro sín kixin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxin tjen la ko jaha ts'inka inaá.

Kixin jaha k'uayéhé kjuachaxin jíé kixin xráxin tétōan.

¹⁸ **A** ntá kaín tí nación kónínkaon,

a ntá ó kui tí yaon jaha sìnchekjasóte sín

la ko kjaxin jaha sìnchekitoexián ijié tí sín tsík'en

la ko tsjénkehé tí sín kjuít'aha xra chrónkaxín itán

la ko tí sín ó kjuinchetjóá la ko tí sín kjuikosáyehe tí ihniá,
mé tí chojni nteto la ko tí sín chánjan ntsínsí.

Jaha tjoka sìnchek'itjáyan tí sín chrókjuinçek'itjáyan chjasin-
tajni.

¹⁹ A ntá xitjehe tí ninkoe Dios tjen nkaya nkajní, a tí nkax-
enhen kónoxín tí caja tjinká tí nkehe tsík'etəoan Dios. A ntá
sítjónkíxín la ko nchónhya ruido sítjonta la ko kuínkí nonte la
ko imá tsanká k'uániá toni.

12

Tí chojni chjin la ko tí dragón

¹ A ntá kónoxín nkajní ijnko kjuaxroan jié mé ijnko chojni
chjin iké tjákini éxí yaon tsjehe la chrínkí toté tjan itjen nitjó.
A ntá tí kja tjan tjenkáya ijnko corona chóna teyó konotsé.

² A ntá tí chojni chjin a mé tjejá tjan la t'èya tjan kixin tjeté
tjan kixin sinčekokjíhi tjan xjeen tjan.

³ Kjaxin kónoxín í jnko kjuaxroan nkajní mé ijnko dragón
kjátse chóna yato kja la ite ntéé la jnkojnko corona jnkojnko
kja. [Tí dragón mé ijnko kots'aja jié.]

⁴ Tí ntané mé nkánkákjen níxin parte konotsé kuènte nkajní
la ik'ue chrítaón chjasintajni. A ntá tí dragón kjuák'e chók'èxin
tí tjen tí chojni chjin mero tsokjíhi xjeen kixin tjinkaon tjoka
chrókjóne tí xjan tsokjíhi.

⁵ A ntá tí xjan kjuinčekokjíhi tjan mé xjan ntoa kixin jehe
ch'án mé ts'etuenhen ch'án kaín nación la tsochóna ch'án
ijnko vara chica ts'etəoanxín ch'án. Ntá tí xjeen tjan la mé Dios
sákjuiko tí tjen ch'án t'etəoan ch'án.

⁶ A ntá tí chojni chjin la kuínká tjan sákjuí tjan nteje kixin
tsíkjincheyóxin Dios nketí sátsji tjan kixin ntaha tsoxranjon
nkehe sine tjan mil dos cientos sesenta yaon.

⁷ Ntá chr'éxin xrínahya k'uúxin kjuanínkaon jié nkajní la mé
tí arcángel Miguel la ko tí í so ángel xriko ch'án mé kjuánjonko
sín tí dragón, la tí dragón la ko tí ángel kuènte mé kjuánjon sín.

⁸ Kjánchó kjuachahya tí dragón la kohya lugar kuènte nkaya
nkajní.

⁹ Mé xikaha kuakitsjexín sín tí dragón nkajní. Jehe mé tí
konche óse ikjí mé nček'in sín diablo la ko Satanás. Jehe mé
k'uékjich'iyehé tí chojni kuenté chjasintajni. Jehe la ko tí sín
ángel kuènte k'uaxrjexín ntiha la kjuitsínka chjasintajni.

¹⁰ Ntá kuínhan itén ijnko nkexro nkaya nkajní itsen nixja
ntáchro kixin:

—Ó kui tí tsaáxinni tí kjuachaxién tí Dios kuènténi la ko tí
kjuachaxin t'etəoan Cristo kixin ó k'uaxrjexín nkajní tí nkexro
t'eka jié tí kichó ni mé kjuanchia jié nchakotjin la ko tie
nkayakon Dios kuènténi.

¹¹ Tí sín kichó ni la kjuacha sín kuaáxin sín kixin tí ijnié tí Kolélo k'uitji la ko kixin jehe sín chrónkaxín sín tí tan tsík'áyéhe sín la chrakonhya sín kjónté chrók'uenxín sín.

¹² A ntá jie la tócháhará kaín rá tjejorá nkajní. Ntá nòà tí sín tjejó chjasintajni la ko ntayaon kixin k'uínkajin tí ch'ín diablo la imá nínkaon ch'án kixin ó nohe ch'án kixin í kánhyó sé tsjak'e ch'án.

¹³ Ntá tí ch'ín dragón ó nohe kixin k'uánótjexin nkajní ikui chjasintajni ntá sákjuíchréhe tí chojni chjin chóna tí xjan ntoá kixin chrókjuinchek'itjáyan tjan.

¹⁴ Kjánchó tí chojni chjin k'uáyéhe yaá kanenee kuente kotjuanhnko ijié kixin jína tsjaká tjan sátsji nteje kixin ntá ikjín tsitöhe tí konche. Sátsji tjan kixin ntiha tsoxranjon nkehe sine tjan iní nánó ko t'ò.

¹⁵ A ntá tí konche mé k'uaxrjexín ntá ir'va kixin ts'óna ijnko ntarío kixin tjinkaon va chrók'uátjoáko tí tjan a tí ntá a.

¹⁶ A ntá tí nonte kjuínkítsa tí tjan a kixin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uixenhen.

¹⁷ A ntá tí dragón la imá kónínkakonhen tí tjan a ná imá kónínkaon kjuánjonko tí í so sín naxá kjéhya tí tjan a kixin naxá titekaon sín tí nkehe tsík'etoan Dios la naxá tinkáchónki sín tí nkehe tsíchrónka Jesucristo.

13

Tí yaá bestia

¹ Tí kjuak'é chrínta ntayaon ntá ntaha k'uíkuan chrínxín ijnko bestia chóna yato kja la ko ite ntéé chojni t'ántaxínhin Dios.

² Tí bestia k'uíkuan mé tóyóhe kotigre la chóna toté éxí toté ko oso la ko tí ir'va la éxí ir'va koxra. Tí dragón kjuanjon kjuachaxin imá ts'etoan tí bestia a.

³ A ntá ijnko kja tí bestia chóna ijnko tsíchrít'ò jié chóna chrók'uenxín ntá tsíkítóhe jína ntá kuenté chjasintajni la chrakon chojni ntá chréhe sín tí bestia.

⁴ Kjuikosáyehe sín tí dragón kixin jehe kjuanjon tí kjuachaxin k'uáyéhe tí bestia ntá kjaxin kjuikosáyehe sín tí bestia la ntáchro sín kixin:

—¿Xá nkexro chrókóyóhe tí bestia la xá nkexro chrókjuacha chrókjuanjonko tí jehe?

⁵ Kjaxin tí bestia k'uáyéhe kjuachaxin tsontáchro kixin chóna kjuachaxin má la ts'ántaxínhin Dios la tsochóna kjuachaxin cuarenta y dos nitjó.

⁶ Ntá mé xíkaha kjuích'e k'uántaxínhin Dios la ko k'uántaxínhin ihnié Dios la ko k'uántaxínhin tí nínko tjen nkaya nkajní la ko kaín tí sín tjejó ntiha.

⁷ Kjaxin tsík'áyéhe kjuachaxin tsjanjonko tí sín tinkáchonki Dios hasta tsjacha ts'etuēhen tí sín ntá k'uáyéhe kjuachaxin ts'etuēhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín naciōn.

⁸ A ntá tí bestia mé kaín xín chojni siín chjasintajni mé tsjikosáyehe sín tí bestia. Tí chojni a mé ts'ínixínhya ihnié tió k'óna chjasintajni, mé ts'ínixínhya ihnié sín tí libro ts'ínixín ihnié tí sín tsaá. Tí xroon a mé chóna tí Kolélo tsík'óyán sín.

⁹ La jnkojín nkexro tjinkaon chrókuinhin la chrókuinhin tíhi.

¹⁰ Tí nkexro sátsjiko tsjik'ikjehe í so chojni la kjaxin ch'án ts'ikjehe ch'án la tí nkexro tsjayaxin espada la kjaxin espada ts'enxín. A ntá tí nkexro tinkáchónki Dios la t'ichjánxin tsonínkakhya la ko tsochóna fe.

¹¹ A ntá chr'éxin k'uíquān í jnko bestia k'uaxrjexín nonte, chóna yaá ntèé éxí tsjehe ntèé coronta la mé nixja éxí nixja tí dragón.

¹² Tí bestia la chóna kaín xín kjuachaxin éxí k'uéchóna tí bestia saoxín tí k'ue la t'etuēhen tí sín siín chjasintajni kixin tinkáchónki sín tí bestia saoxín mé tí bestia tsíchrít'o kja ntá tsíkitohe jína.

¹³ Kjaxin kjuasin kjuaxroan jié hasta xrohi k'uánótjenxin nkajni ikui nonte ntá nchónhya chojni k'uíkonxín kon sín kixin xikaha kónhen.

¹⁴ Mé xikaha tí bestia tsík'áyéhe kjuachaxin kjuasin kjuaxroan tí tjen tí bestia saoxín la kjuích'iyehe nchónhya chojni siín chjasintajni. La ntá k'uetuēhen tí sín siín chjasintajni sich'éna sín ijnko nkehe tsíkjanoya éxí yóhe tsjehe tí bestia tsíchrít'oxin espada la kjónté xikaha naxa kjuák'echón.

¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsíkjanoya tóyóhe tí bestia saoxín kixin ntá tí nkehe tsíkjanoya la jína tsonixja la ko jína ts'etōan its'en kaín nkexro tinkáchónkihya tí jehe.

¹⁶ Kjaxin ts'etōan kixin kaín chojni tsochóna marca, á chojni hyé o chojni ntsínsí, la á chojni rico, la á chojni nòa la á chojni ch'exón xra la ko chojni náhi, mé kaín sín tsochóna sín marca, á tja sín chjina o totjen sín.

¹⁷ Ntá ninkexró xitjahya ts'ena la ko ninkexró xitjahya sinchekji tí chónahya sín marca o ihnié tí bestia o chónahya sín número kuente ihnié tí bestia.

¹⁸ T'ichjánxin chrókienxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ **A** ntá k'uíkuan tí Kolélo tјexín toté chrítaón tí jnā Jerusalén. Jehé ch'án tјeko ch'án ciento cuarenta y cuatro mil chojni ts'ínixín totjen sín ihníé tí Kolélo la ko ihníé It'é ch'án.

² Ntá tuénxín kuinhan ijnko itén nkexro kuixín nkaya nkajní mé ijnko ruido éxí nchónhya ntarío la ruido éxí sítjonta itsen la éxí ijnko ruido nchónhya chojni it'in sín isón arpa.

³ Itsje sín nkehe níxin nkayakon tí trono la ko nkayakon tí noó nkexro tјejóchón la ko tí sín táda. Nijnko nkexro chrók'uitjahya tí nkehe tјejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni.

⁴ Tí sín a mé k'uéchóntahya sín itsjé chojni chjin la tjóá sín la chréhe sín tí Kolélo kјónté nketí k'uáji. Tí sín a mé kuaá sín tí k'uék'ixín chojni k'uékjasin jje la ko tí sín a mé éxí ijnko ofrenda xrankíxín k'uáyéhe Dios la ko tí Kolélo kјaxin.

⁵ Kónoxínhya ninkehó kjuach'ia k'uaxrјexínhya ir'va sín. La tí sín la ninkehó jje chóntahya sín tí tјejó sín nkayakon tí trono kuènte Dios.

Tí nkehe chrónka tí iní ángel

⁶ **A** ntá k'uíkuan í jnko ángel tјetjaká jnkosiné nkajní chrónka tí tan tsaáxinni jnkochrín tsinhin tí sín síin chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin.

⁷ Ntá t'èya itsen ntáchro kíxin:

—Chróchrakonrá la chróxráxinkáonrá Dios la chróchјeherá ch'án kjuasáya kíxin ó kjuixraká tí yaon sinchekitoxín ch'án ijje chojni. Tјikosáyehérá ch'án kíxin jehé ch'án kjuích'éna ch'án nkajní la ko chjasintajni la ko ntayaon la ko tí sít'axrјe nta.

⁸ Ntá xíki yóxin ángel, ntáchro kíxin:

—Ó kjuixin kjuítsínka, ó kjuixin kjuítsínka tí chjasin jje Babilonia. Mé ntiha kuixín tí vino kókuaxín sín kaín nación ntá kjuasin sín jje chóna sín chojni chjin ókjé.

⁹ Ntá xíki tí níxin ángel níxja itsen, ntáchro kíxin:

—Jnkojín sín tsјikosáyehé sín tí bestia la ko tí nkehe tsíkjanoya kuènte o tsítóhe sín tsochóna tí marca tí totjen sín o tí tja sín,

¹⁰ mé t'ichjánxin its'i sín tí vino tsjasótexín sín kuixín tí tjen Dios kíxin xíkaha tјechónhen tí kjuanínkaon kuènte Dios ntá ntiha tsjasótexín sín tí xrohi la ko azufre mé xíkaha tsonhen tí sín a ts'ikon tí sín ángel kuènte Dios la ko tí Kolélo.

¹¹ Tí ihnchi kuènte xrohi sítjasótexín sín síchrin jnkochrín la tí sín a kuinkáchónki tí bestia la ko tí nkehe tsíkjanoya kuènte o chóna sín ihníé kuènte.

¹² **A** ntá tí sín tinkáchónki Dios la kuítekaon sín tí nkehe k'uetqan ch'án la ko naxa jína tinkáchónki sín Jesús mé t'ichjánxin chrókuíteqehya sín titekaon sín ch'án.

¹³ Ntá kuinhan itén ijnko nkexro kuixin nkajni ntáchro kixin: —Ikjian tíhi: “Náxrjón tjejó tí nkexro kjónté its'en sín ijie o chr'éxin kixin tinkáchónki sín Inchéni.” Kjá jína, ichro Nchakuen Dios, kixin tí jehe sín ts'ok'éhe sín kixin ó kjuích'e sín xra la tí xra kjuích'e sín mé kjuacha sín.

Tí nkehe tsík'óna chjasintajni

¹⁴ Ntá xrínahya k'uikuau ijnko tjuí tjóá la chrítaón tí tjuí tjetjxin ijnko nkexro éxi yóhe tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjexraá ch'án.

¹⁵ **A** ntá nkaxenhen njnko mé k'uaxrjexín í jnko ángel itsen nixja ch'án nixjehe ch'án tí nkexro tjetjxin chrítaón tjuí ntáchro ch'án kixin:

—Tjankíxian tatexian chica hoz kixin ó kjuixraká tí yaon tsotjá tí nkehe siín chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxin tí nkexro tjetjxin chrítaón tjuí ntá kjuínchek'átsínka ch'án chica hoz kuenté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí njnko tjen nkaya nkajni la kjaxin sákjuíko ch'án ijnko chica hoz imá taté.

¹⁸ Ntá sákjuíxin í jnko ángel tí tjen altar la chóna ch'án kjuachaxin kuènte xrohi la itsen k'uíyehé ch'án tí nkexro chóna tí chica hoz imá taté la ntáchro ch'án kixin:

—Tjankíxian tatexian tí chica hoz taté la tjankíxian itja tí racimos to uva tsík'óna chjasintajni kixin ó tsíchjé to —ichro ch'án.

¹⁹ **A** ntá tí ángel kjuínchek'atsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí tjat'o ts'ényaxín sín to. Tíha mé t'axrjexín kixin xikaha Dios sinchekjasóte chojni.

²⁰ **A** ntá tí to uva tsík'ényaxín sín tjat'o tí ikon chjasin a ntá tí tjat'o a mé k'uaxrjexín nchónhya jni noixín éxi tí freno tjinka ir'va kokate la trescientos kilómetro kjínxin sátsíkji tí jni a.

15

Tí yato tí ángel la ko tí chin tsjixixín

¹ Ntá k'uikuau tí nkajni í jnko kjuaxroan jie mé ijnko kjuachakon: mé tí yato sín ángel kuikao tí yato chin tsjixixín tsoniéxin chojni. Tíha mé tí kjuanínkaon kuènte Dios tsjixixín.

² Kjaxin k'uikuau ijnko nkehe tóyóhe ijnko ntayaon tsík'óna éxi xrosenta tsínkíjjan xrohi. La tí sín tsíkjacha kixin

kuinkáchónkihya sín tí bestia la ko tí nkehe tsíkjan̄oya kuènte la ko kuáhya sín tí número kuènte ihnjé tí bestia mé tjejóxin toté sín chjinaxón ntayaon tsík'óna éxí xrosent̄a la ko chón̄ta sín isón arpa tsíkjan̄jon Dios tsík'áyéhe sín.

³ Itsje sín isón k'uétsje ch'ín Moisés, tí nkexro kjuích'ehe xrā Dios la ko isón kuènte tí Kolélo la mé ntáchro kixin:

Imá ijíe tí kjuaxroan kuèntá kixin kaín nkehe tsík̄jich'éna.

Jaha Ìnchéni Dios kaín kjuachaxin chonta.

Ntoá la ko chaxín tí nt̄ia kuèntá.

Jaha mé ijnko Rey t'et̄oan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kixin jaha mé ijnko nkexro jina tjóá?

Kuenté chjasintajni tsjikosáyehe sín tí jaha

kixin k'uúkon sín tí xrā tsík̄jich'e la jina tíha.

⁵ Kjuixin tíha la k'uúkuan nkajnī tjexrankehe tí n̄nko la ko tí cuarto tjóá t'inkachjina tí nkehe tsík'et̄oan Dios.

⁶ Ā ntá tí n̄nko a k'uaxrjexín yato ángel kuik̄ao yato chin. Tí iké sín la ika tjete tjóá tják̄ini. Ā ntá tí cinta chón̄ta ntakuin sín mé jehó oro.

⁷ Ā ntá ijnko tí noó tí nkexro tjejóchón mé kjuanjon ijnko copa k'uáyéhe jnkojnko tí yato ángel mé copa tsík'óna chica oro tsíkaón tí nkehe tsjasótexín chojni kuix̄in tí t̄jen Dios tí nkexro tjechón jnkochríxín.

⁸ Ā ntá tí nkaxenhen n̄nko la tsíkaón ihnchi kuix̄in tí kjuachaxin jíe kuènte Dios la nijnko nkexro xitjahya ts'ixenhen ntiha tsjixinjian ts'átsínka tí yato tí chin kuik̄ao tí yato ángel.

16

Tí copa tjinká nkehe tsjasótexín chojni

¹ Ntá kuñhan̄ ijnko itén ijnko nkexro imá itsen k'uaxrjexín nkaxenhen n̄nko, ntáche tí yato sín ángel kixin:

—Sátjia tikíkjanjian chrítaón chjasintajni tí nkehe tjiá tí yato copa la táha mé tsjasótexín chojni kuix̄in tí t̄jen Dios —ichro ch'án.

² Ā ntá tí ángel saoxín sákjuík'itji tí nkehe tjiá tí copa chrítaón chjasintajni. Ā ntá kaín tí chojni chón̄ta marca kuènte tí bestia la ko tjikosáyehe sín tí nkehe tsíkjan̄oya kuènte tí bestia mé tsík'ayan sín tosóa, imá t̄jotéhe sín.

³ Ā ntá tí yóxin ángel sákjuík'itji tí nkehe tjiá copa chrítaón ntayaon. Ā ntá tí ntayaon la k'óna j̄ni éxí ijnjé ijnko chojni tsík'óyán kichó la kaín ko sínkánkí ntayaon ik'uén.

⁴ Ā ntá tí níxin ángel sákjuík'itji tí nkehe tjiá copa chrítaón ntario la ko chrítaón tí nt̄a sít'axrje t̄oye, la ntá tí nt̄a k'óna j̄ni.

⁵ Ntá tuénxín kuñhan̄ nixja tí ángel kuènte nt̄a ntáchro kixin:

—Jaha mé ijnko nkexro jína kíxin kjuínchekitoexián ijíé chojni. Ìchéni jaha ijnko Dios jína, ósé tjen la ko naxa tjen ijie
 6 kíxin jehe sín k'óyán tí sín tinkáchónki tí jaha la ko tí sín tsíchrónka itan la ntá jaha Ìnchéni chjehé sín ijni its'i sín kíxin mé xíkaha sítjasóte tí jehe sín.

7 Kjaxin kuínhan nó altar ijnko nkexro ntáchro kíxin:

—Chaxín Ìnchéni Dios, jaha mé chonta kaín kjuachaxin la ntoá jína kjuínchekitoexián tí ijie a.

8 A ntá tí noóxin ángel sákjuik'itji tí nkehe tjiá copa chrítaón yaon, a ntá tí yaon antsí k'uáyéhe kjuachaxin tsosóa kíxin tsochjánxin chojni tí sóa kuènte.

9 A ntá kaín chojni chjánxin tí imá sóa kuènte yaon la k'uántaxínhin sín ihnjé Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

10 A ntá tí in'óxin ángel sákjuik'itji tí nkehe tjiá copa chrítaón tí trono t'etoanxín tí bestia. A ntá kaín tí k'uéchóna kjuachaxin k'uék'etoan tí bestia la k'uúxin tié. A ntá tí chojni a la netja nejen sín kíxin tjtóthe sín.

11 La kjónté xíkaha la kjuinkíhya sín tí nkehe jínahya ch'e sín. Náhí. Íchá má k'uántaxínhin sín Dios tjen nkaya nkajní kíxin tjtóthe sín kíxin xíkaha kónhen sín.

12 A ntá tí injonxin ángel sákjuik'itji tí nkehe tjiá copa chrítaón ijnko ntarío jie it'in Eufrates. A ntá tí ntarío la kjuixié kíxin jína tsakitjehe sín ijnko ntja tsjixín tí sín rey tsjixín nó tjtóxin yaon.

13 A ntá k'uúkuan kíxin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxí korána tsjehe.

14 Tíha mé nchakuen tí jínahya kjuasixín sín kjuaxroan. A ntá sákjuikjinchekójnoktsé kaín rey síin chjasintajni kíxin tsjanjon sín ijnko yaon jie kuènte Dios chóna kaín kjuachaxin.

15 “Tsjehe, janhan titàya ts'inké éxí ijnko xíchee. Chéhe tí nkexro tjejótsehe la t'ayakonhen tí iké kíxin ts'itjáyanyha kíxin chrók'uajihya sín tjóchin sín la chrókósuèhya sín kíxin chrókónoxín kíxin tjóchin sín.”

16 A ntá tsojnkotsé tí sín rey tí nonte it'in Armagedón nkíva Hebreo.

17 A ntá tí ángel yatóxin sákjuik'itji nkehe tjiá copa chrítaón tí xrínto ntá nkaxenhen nínko nkaya nkajní k'uaxrjexín ijnko itén chojni itsen nixja mé kuixín tí tjen tí trono la ntáchro kíxin:

—Ó kjuixin kónhen tíha.

18 A ntá sítjónkíxín la ko ruido sítjonta la ntá imá kuínkí nonte fuerte. La desde tí kjuankíxin k'uúxin chojni chjasintajni

la xikahya kónhen kuínki nonte a ntá jie antsí fuerte kuínki nonte.

¹⁹ A ntá tí chjasin jie xitjehe nonte la iní k'óna, chjenca. La koí kaín chjasin síin chjasintajni tsík'oya. A ntá Dios xraxinkaon kixin chrókjuínchekjasóte tí sín síin tí chjasin jie Babilonia la k'uetqan ch'án its'i sín tí vino tsjasótexín sín kixin mé xikaha kónínkaon ch'án.

²⁰ A ntá kain tí nonte sínkátaón ntayaoon k'uániankí ntá la ko tí jnā k'uitjáyan.

²¹ A nta nkajní k'uánótjenxin toni ijié xrátja chojni mé cuarenta kilo yexín jnkojnko toni. A ntá chojni na antsí má k'uántaxínhín sín Dios kixin tí xikaha kónhen sín xratja sín toni la imá kjoté sín.

17

Tsjasóte tí tjan jínahya

¹ A ntá ikui ijnko tí yatqxin ángel chóna tí yato copa la ntáchro ch'án kixin:

—Xrákiá tsjáqoha nkexrí tsjasóte tí chojni chjin tjasin jie tjetjaxin tjan chrítaón tí nchónhya ntá.

² Tí sín rey t'etqan chjasintajni kjuasinko tjan jie la ko tí chojni síin chjasintajni kókuaxin sín tí vino a mé kjaxin kjuasixín sín jie.

³ A ntá tuénxín Nchakuen Dios sákjuikian nteje ntá k'uíkuan ijnko chojni chjin tjetjaxin chrítaón ijnko bestia kjátse la kuenté tí ko a la síimá ihnié náxrjónhya tsík'ántaxiexín sín Dios la chóna yato kja la ko ite ntéé.

⁴ A ntá jehe tjan chóna tjan iké tjan morado la ko kjátse la teyá tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie.

⁵ Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jie Babilonia, mé ñé tí chojni chjin tjasin jie la ko kain chojni jínahya ch'e síin chjasintajni.”

⁶ Ntá kónona kixin tí tjan a la tsékanxin tí ijnié tí sín tinkáchónki Dios la ko tí ijnié tí sín tsík'enxín tí chrónka sín kixin tinkáchónki sín Jesús. Ntá k'uíkuan xikaha imá chrakonna.

⁷ A ntá ijnko ángel ntáchro ch'án kixin:

—¿Nkekuènté chrakuan? Ntá ijie sñntanoha tí nkehe tienxínhya chojni kuènte tí tjan a la ko kuènte tí bestia tjekjen tjan chóna yato kja la ko ite ntéé.

⁸ Tí bestia k'uíkuan jaha kjuák'e ósé la ijie tjechónhya kjánchó senó tsochrìinxín tí tòye ninka ntá chr'éxin ts'itjáyan. A ntá tí sín síin chjasintajni ts'ínixínhya ihnié sín tí libro ts'ínixín ihnié chojni tsaá desde k'óna chjasintajni, la mé jehe sín tsochrakon

sín tió ts'ikon sín tí bestia kjuák'e ósé la tsík'en la ntá ijie xikjan ínaá.

⁹ Tí jnkojín nkexro chrókiexín la mé tí yato kja la t'axrjexín yato jna tjekjen tí chojni a.

¹⁰ A ntá tí kja kjaxin t'axrjexín yato rey la ntá in'ó tí sín rey la í t'etuñhya sín ijie la ijnko tí jehe sín t'etoan ijie la í jnko naxa tjihya. A ntá tió tsji tí yatoxin la í kánhyó sé ts'etoan.

¹¹ A ntá tí bestia kjuák'e senó la ijie tjechónhya mé tí jnínxín rey la jehe ch'án kuènte tí yato rey la chr'éxin la ts'itjayan.

¹² A ntá tí ite ntèé tsík'ikuan mé ite rey naxa t'etuñhya. A ntá ijie la ts'áyéhe sín kjuachaxin ts'etoanko tí bestia kjánchó kánhyó sé.

¹³ Tí ite tí rey la jnkokoá tsjenkayáxin sín la tsjanjon sín kjuachaxin kuènte sín kixin ts'etoan tí bestia.

¹⁴ Tsjanjonko sín tí Kolélo a ntá tí Kolélo la tsjacha ts'etoan kixin jehe ch'án mé Inché kaín chojni la ko jehe ch'án mé tí Rey ts'etuñhen kaín rey la ko tí sín tjejóko ch'án mé tsík'íyehé Dios la tsíkjejá ch'án sín la jína nchexiteyá sín.

¹⁵ Kjaxin ntáchro tí ch'ín ángel kixin:

—Tí ntá k'uíquañ la chrítaón tjetjaxin tí chojni chjin tjasin jie la mé t'axrjexín kixin nchónhya chjasin la ko nchónhya chojni la ko nchónhya nación la ko nchónhya nkiva.

¹⁶ A ntá tí bestia k'uíquañ la ko tí ite ntèé la tíha mé tsonínkakonhen tí tjan tjasin jie la tsitohe tjan tjóchin tjan la sine tí bestia tí nto chóna cuérpóé tjan la ko tsoche tí huésoé tjan.

¹⁷ Dios tsík'etuñhen asén sín kixin xikaha sich'e sín éxi tjinkaon ch'án kixin jnkokoá tsjenkayáxin sín la ko tsjanjon sín kjuachaxin kuènte tí sín rey kixin ts'etoan ti bestia tsoxiteyája tí nkehe tsíntáchro Dios.

¹⁸ A ntá tí chojni chjin k'uíquañ la táha mé tí chjasin jie t'etoan tí sín rey t'etoan chjasintajni.

18

Kjuítsínka chjasin Babilonia

¹ Ntá chr'éxin k'uíquañ í jnko ángel k'uínkajinxín nkajni chóna nchónhya kjuachaxin ntá chjasintajni antsí k'uínkaséyanni tí tjákiní tsjehe ch'án.

² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jie Babilonia. Ntá tí jínahya ó kjuacha k'uíxenhén t'etoan ntiha la ntiha síin kaín xín clase nchakuen jínahya la ko síin kaké ko xritjaká tjuáhya la ko jínahya.

³ A ntá kaín xín nación kókuaxín tí vino kjuínchekji tjan ntá kjuasinko tjan sín jie la ko tí sín rey t'etoan chjasintajni

kjāxin kjuasinko tjan jie. La tí sín nchekji nkehe chjasintajni kórixoxín sín kixin k'ueña tjan nchónhya nkehe.

4 Ntá kuinhan í jnko itén nkexro kuixin nkaya nkajni ntácho kixin:

—T'axrjéxinrá tí chjasin ntiha kixin tí jahará tinkachónkirá tí janhan kixin chrók'uícahyará tí ijíé sín la ko chrókjuasótexínhyará tí nkehe tsonhen sín.

5 Kixin tí nchónhya jie tinkák'ánki hasta kjuixraká nkajni la Dios ó nohe tí jie chóna sín.

6 Ch'eherá tjan éxi tí jehe tjan kjuích'ehe tjan í so chojni kixin xikaha tsjasótexín tjan. Chrókjuenkehérá tjan iyó veces éxi tí tsíkjich'éna tjan ik'ui í so chojni.

7 Antsí chrókjuasóte tjan tóyohé tí nkehe kjuích'e tjan kixin kjuínchehnke tjan la ko k'uéchóna tjan kaín nkehe tóxrjínhin tjan. Jehe tjan ntáche asén tjan kixin: “Ntihi tjétjāxian éxi ijnko reina. Jehya ik'ána kixin chrókjuasótēna.”

8 Mé xikaha kjāxin jnkokoá yaon itsi tí kjuaxikaon tsonhen tjan mé its'en tjan la ko tsjasótexín tjan kjinta la tsoche tjan kixin Inchéni imá chóna kjuachaxin la jehe ch'án sinchekjasóte ch'án tjan.

9 A ntá tí sín rey siín chjasintajni tsíkjasinko sín tjan jie la ko nchónhya nkehe kjuínchexenko sín tjan la mé tsotsjánka sín la ts'èya sín tió ts'ikon sín ts'àya ihnchi tió tsoche tjan.

10 Ntá jehe sín tsitohé sín ikjín kixin chrakon sín kixin xikaha tsjasóte tjan la tsontácho sín kixin:

—Nòa tí jaha chjasin jie Babilonia, chjasin imá t'etōan kixin titàya kjuasótia.

11 Tí sín xrinchekji nkehe la kjāxin tsjánka sín, t'èya sín kixin xikaha kónhen tí chjasin ntiha kixin kohya nkexro ts'enehe sín tí nkehe sinchekji sín.

12 Kjuínchekji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjátse la ko kjāxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronze la ko ixro chica la ko ixro mármol.

13 Kjāxin xrinchekji sín canela la ko xroan xraxé náxrjón la ko chjincō la ko xroan mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokatē la ko carreta la ko chojni ch'exón xra kjāxin kjuínchekji sín.

14 Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'uitjāyan kaín nkehe náxrjón tjete k'uéchonta.

15 Tí sín k'uékjinchekji tí nkehe la kóricó sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon

sín kixin xikaha kónhen kjuasóte tí chjasin. Tsjánka sín la t'èya sín

¹⁶ la tsontáchro sín kixin:

—Nòà tí chjasin jié. Éxí ijnko chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla.

¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etōan tí ntabároço la ko tí sín tsík'ixenhen tí ntabároço la ko tí sín ch'e xra chrítaón ntayaon kuítóhe sín ikjín

¹⁸ la tió k'uíkon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jié í?

¹⁹ La tjíkjanjin kja sín nche la tsjánka sín t'èya sín kixin:

—Nòà tí chjasin jié. Kóricó tí sín k'uéchónta ntabároço chrítaón ntayaon kixin tí chjasin i la ntá jnkorató koá kjuixin k'uitjayan tí nkehe chóna sín.

²⁰ A ntá jahará tjejórá nkajní tócháhará kixin xikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án kixin Dios kjuínchekjasóte tí chjasin a kixin tí jié kjuasin sín kjuínchekjasótiará sín tí jahará.

²¹ A ntá ijnko ch'ín ángel chóna kjuachaxin kjuatsen ijnko xro éxí ijnko xro jié kuènte molino la k'uenkí ch'án ntayaon la ntá ntáchro ch'án kixin:

—Mé xikaha tsonhen tí chjasin Babilonia, tí chjasin jié la nunca ts'ikonhya chojni chr'éxin.

²² Nunca tsienhya sín música kuènte isón arpa la ko flauta la ko trompeta tí ntja la ko ninkexró xitjahya sich'e ninkehó xra ntiha la ko kjaxin tsienhya sín ninkehó tóvéntó xro molino.

²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsotehe chojni ntiha. Tí sín k'uékjinchekji nkehe ntiha la imá k'uék'etōan kuènte chjasintajni la tí sín k'uékjich'iyehé tí sín siín chjasintajni la k'uékjich'e sín jínahya, k'uédkjinchexroan sín.

²⁴ A ntá tí chjasin jié ntiha tsíkónoxín ijnié tí sín tsík'en k'uéchronka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajni.

19

¹ Ntá chr'éxin ntá kuínhan itén nchónhya nkexro tjejó nkaya nkajní itsen nixja, ntáchro sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án ti jeheni la imá chóna kjuachaxin Dios kuènteni.

2 Kíxin jehe ch'án ntoá kjuínchekjasóte ch'án tí tjan kjuasin nchónhya jie
 kixin jehe tjan kjuachroe tjan chojni síin chjasintajni kixin tí nkehe jínahya k'uékjich'e tjan.
 Dios kjuínchekjasóte tjan kixin k'óyán tjan tí sín k'uékjich'ehe ch'án xra.

3 La ntá kjaxin ínaá xíntáchro kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítøehya chríin hasta tí ntihi.

4 A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja sín nonte kjuikosáyéhe sín Dios tí nkexro tjetjaxin tí trono la ntáchro sín kixin:

—¡Amén! ¡Aleluya! ¡Kjuasáyé Dios!

5 Ntá xrínahya kuínhin sín itén ijnko nkexro tjen nó trono ntáchro kixin:

Chjehérá kjuasáya tí Dios kuènteni kaín rá ch'ehérá ch'án xra la kuítekákohénrá ch'án,
 mé kaín tí jahará kjónte chánjan ntsíntí o chojni nteto.

Tí kia tsøtehe tí Kolélo

6 Kjaxin kujnhan nkehe éxi itén nchónhya chojni éxi nchónhya ntario sítóvéntó la ko imá itsen sítjonta la ntáchro kixin:

¡Aleluya! Kjuasáyé Inchéni ó kjuankíxin t'etøan Inchéni Dios kuènteni chóna kaín kjuachaxin.

7 Chrókóchéheni la chrókjuikosáyeheni Dios

kixin ó kjuixraká tí yaon ts'ixin kia kuènte Kolélo.

La tí tjan tsøtehe la tsíkóyaxínhin tjechónhen,

8 mé tsík'áyéhe kjuachaxin tsík'itsa ka lino náxrjón tjóá tjákini. A ntá tí ka lino náxrjón a mé t'axrjexín kixin tí jína k'uéjéjé tí sín tinkáchónki Dios.

9 Ntá tí ch'ín ángel k'uøtøan ch'án kixin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsøtehe tí Kolélo.”

A ntá ntáchro ch'án ínaá kixin:

—Tí palabra a mé chaxín ntoá nixja Dios.

10 Ntá kjuak'éxian tøch'ian tøté tí ángel kixin chrókjuikosáyaha ch'án, kjánchó jehe ch'án ntáchro ch'án kixin:

—Xíkahya chrokjuich'e kixin janhan kjaxian t'aha xra Dios éxi tí jaha la ko éxi tí sín kíchuá kuítøehya kuítekaon tí tan jína chrónka Jesús. Jehó Dios mé chrókjuikosáyéhe jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokatø tjóá

11 Ntá k'uíkuan kixin nkajní tjexrankehe la ntaha kónoxín ijnko kokatø tjóá la ko tí nkexro tjejen va mé it'in Jína la ko

Chaxín kixin ntoá kjuínchekitoexín ch'án ijíe chojni la ko ntoá kjuánjonko ch'án chojni.

¹² A ntá tí ikon ch'án mé tjákini éxi xrohi nene xikaha tsjehe. A ntá tí kja ch'án la chóna nchónhya corona la ko ts'inixín ijnko ihnié ijnko nkexro la jehó ch'án mé nohe ch'án tíha.

¹³ Tjenkáya ch'án ijnko ka tsík'ixikjanjin jni ntá ihnié ch'án mé Itan Kuènte Dios.

¹⁴ Chréhe tí sín soldado kuènte nkajní. Iké sín mé ka lino náxrjón tjóá la tjejókjen sín kokate tjóá.

¹⁵ Ir'va tí jehe ch'án k'uaxrjexín espada imá taté kixin táha mé tsjik'óyáxin ch'án tí sín siín kaín nación la ko ts'etoxán ch'án ijnko chica vara. Jehe ch'án mé sinchekitoexín ch'án ijíe sín éxi t'énxin sín to uva toté sín mé xikaha ts'etuèhen ch'án kixin its'i sín vino tsjasótexín sín kixin mé xikaha tsixin tí kjuánkaon kuènte Dios chóna kaín kjuachaxin.

¹⁶ Iké ch'án mé ts'inixín kixin jehe ch'án me Rey t'etuèhen kaín rey la ko jehe ch'án mé Ìnché kain chojni.

¹⁷ Ntá tuénxin k'uikuáan ijnko ángel tjexín toté tí tjen yaon la k'uéyato ch'án itsen k'uéyatohe ch'án tí ko xritjaká, ntáchro ch'án kixin:

—Xrákirá tójnkotsérá ntihi kixin Dios tsjanjon nkehe sinterá ijie.

¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jjehe la ko ntoe kokate la ko cuerpo kuènte tí sín tsíkjiták'á va la ko cuerpo kuènte kaín chojni libre o chojni ch'exón xra la chojni hyé o chojni ntsínsí.

¹⁹ K'uikuáan tí bestia la ko tí sín reyes t'etoxan chjasintajni la ko tí soldado kuènte sín, tsíkójnkotsé sín tsjanjonko sín tí nkexro tjekjen kokate la ko koí tí sín soldado kuènte ch'án.

²⁰ A ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xikaha kjuích'e tí nkexro ntoáhya kjuako, kjuích'iehe ch'án tí sín tsíkítóhe tsíka marca kuènte tí bestia la ko kjuikosáyehe sín tí nkehe tsíkjanoya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuenhen sín sátsji tí siín xrohi tsoche tjejóchónxinhín sín tsochéxin azufre.

²¹ A ntá tí í so sín la ts'enxín tí espada k'uaxrjexín tí ir'va tí nkexro tjekjen tí kokate tjóá la kaín ko xritjaká ts'ixin tí siín tí cuerpo kuènte tí jehe sín la hasta tsokjehe va sine va.

1 Ntá xrínahya k'uíkuañ ijnko ángel k'uínkajinxin nkajni tјexraá llave kuènte tí tòye ñinka la ko ijnko cadena jíe tјexraá ch'án.

2 A ntá tí ángel a itsé tí dragón mé tí konche ósé kјí mé tíha tí ch'ín diablo la ko Satanás la kjuak'e chroé ch'án ijnko mil nánó.

3 Ichr'án ch'án sákjuí tòye ñinka ntá k'uikjehe ch'án la ko kjuak'e ch'án ijnko sello chrítaón puerta kixin ntá tí dragón chrókjuich'iyehya tí chojni síin kaín nación hasta chrók'uatšínkajia tí mil nánó. A ntá ts'atsínka tí mil nánó ntá tsoxintankehe kјánchó séhya its'e.

4 Ntá tuénxín k'uíkuañ tí trono la ko tí sín tјejótјaxin tsík'áyéhe sín kjuachaxin sinchekitqexín ijíe chojni. Kјaxin k'uíkuañ asén chojni tsíchrínjin kja kixin kuítekaon sín Jesús la ko tsíchrónkaxín sín itén Dios. Jehe sín la kuínkáchónkihya sín tí bestia la ko tí nkehe tsíkjanoya kuènte la ko kuítqehya sín ikuá sín marca tí totjen sín o tí itja sín. Mé k'uíkuañ kixin tsíxechón sín la ko ts'etqanko sín Cristo ijnko mil nánó.

5 Ntá í so chojni tsík'en la ñaxa xechónhya hasta ts'atsínkajia tí mil nánó. Tíha mé xrankixín tsoxechón chojni.

6 Náxrjón tјejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chóntahya ninkehó kjuachaxin ñaxa xikaha chrókónhen sín. Jehe sín mé nch'at'á kuènte Dios la ko kuènte Cristo la ts'etqanko sín ch'án tí mil nánó.

7 A ntá ts'átsínka tí mil nánó ntá ch'ín Satanás tsoxintankehe tí kјí chroé.

8 La sátsjikich'iyehya tí chojni síin kuenté chjasintajni la ko sátsjikich'iyehya tí chjasin Gog la ko Magog. La tsojnkotsé sín kixin tsjanjon sín la ko tí soldado kuènte tí jehe sín. Nchónhya sín tsojnkotsé ntiha éxí tí nchesen síin ntayaon.

9 Mé xikaha sátsji sín tí tonxín la ko tí tekaxin nonte la ts'ántatjen sín tí tјejó tí sín tsíkjinchetjóá Dios mé tí chjasin jíe tјuehe ch'án. A ntá xrohi tsixin nkajni kixin tsochexín tí sín jínahya ts'itjáyaxín sín.

10 A ntá tí diablo tsíkjich'iyehya tí jehe sín kјaxin sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochrín.

Tsitqexín ijíe chojni tí tјen tí trono jíe tјóá

11 Ntá k'uíkuañ ijnko trono jíe tјóá la ko tí nkexro tјetјaxin nó ntiha. A ntá tí tјen ch'án ntiha la ó k'uitjáyankoá nonte la ko nkajni la í kónoxínhya ínaá tí nonte.

12 Ntá k'uíkuañ tí sín tsík'en; chojni hyé la ko chojni ntsínsi tјejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihníe tí sín tsaá. Ntiha tsitqexín

ijjé chojni tsík'en éxí nixja tí í so libro nkehe tí xrā kjuích'e sín ts'ínixín ntiha.

¹³ Tí sín tsík'enxín ntayaon la ntiha xrakuaxín sín la tí sín sátsíkji tí siín chojni tsík'en la ntiha xrakuaxín sín kaín sín tsq̄hjina sín tsitq̄exín ijjē jnkojnko sín kixin nkexrí tí xrā kjuích'e sín.

¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha.

¹⁵ La ko ntaha sátsji tí chojni ts'ínixínhya ihñié sín tí libro ts'ínixín ihñié chojni tsaá.

21

Nkajní nixin la ko nonte nixin

¹ Ntá k'uíkuān ijnko nkajní nixin la ko ijnko nonte nixin kixin tí nkajní saoxín la ko tí nonte saoxin tsík'itjáyan la ko kjaxin kohya ntayaon.

² Janhan Juan k'uíkuān tí chjasin jiē tjóá. Táha mé tí Jerusalén nixin k'uínkajinxín nkajní kuixín tí tjen Dios la kuenté tsíkóyóxin éxí ijnko chojni chjin tsq̄tehe tsík'itsa kixin tsákja tí xii.

³ Ntá kuñhan ijnko itén ijnko nkexro itsen kuixín nkajní ntáchro kixin:

—Dios itjen tí siín chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín.

⁴ Jehe ch'án mé sinchexámá kaín ntakon sín la í tsq̄kohya nkexro its'en la tsq̄kohya nkexro tsotsjá̄nka la ko ts'áváhya sín la ko tsq̄kohya kjuatjoté kixin kaín tí nkehe k'uékónhen ósé la ó kjuixin k'uátsínka.

⁵ Ā ntá tí nkexro tjetjaxín tí trono ntáchro ch'án kixin:

—Janhan mé t'ána kaín nkehe nixin.

Kjaxin ntáchro ch'án kixin:

—Ikjian tíha kixin tíha mé palabra chaxín la chrókuítekávān kaín tíha.

⁶ Ntá chr'éxin chrónka ch'án kixin:

—Kaín nkehe la ó kjuixin tsík'óna. Janhan la tí xrankixixín la ko tí tsjixixín éxí tí letra xrankixixín A la ko tsjixixín Zeta. Tí nkexro t'enxín ntā la janhan tsq̄tjahā sín tí ntā its'i sín mé tí ntā tjanjon kjuachón la ninkehó ts'ixinkíehya sín tíha.

⁷ Tí nkexro tsjacha tsítq̄ehya tí janhan la ts'áyéhe sín kaín tí nkehe tsq̄tjahā sín. La janhan mé ts'óna Dios kuènte sín, ā ntá jehe sín mé xjanna ts'íkaān tí jehe sín.

⁸ Ā ntá tí chojni chrakon la chojni titekakonhya la tí sín chjinoxínhin la ko tí chojni ts'óyán kichó la ko tí chojni tsákja chojni chjin ókjé la ko tí chojni xrinchexroān la ko chojni

tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí síin xrohi tsochexín sín azufre tió itsi tí yóxin muerte.

Tí Jerusalén nixin

⁹ Ntá ikui ijnko tí ya_{to}xin ángel chón_{ta} tí ya_{to}xin copa tsíkaón tí ya_{to}xin chin tsjixixín tsjasótexín chojni. Ntá ntáchro ch'án kixin:

—Xrákia tsjáqoha tí tjan tsq̄ehe tí Kolélo.

¹⁰ Ntá k'uíkuan ijnko nkehe kjuakoxin Nchakuen Dios la ntá tí ángel sákjuíkian ijnko jnā jíé la ko noi la kjuakona ch'án tí chjasin jíé tjóá mé tí Jerusalén ts'inkajinxin nkajní tsíkixin tí tjen Dios.

¹¹ A ntá tí chjasin a mé tjákinixin kjuachaxin kuente Dios. A ntá tjákiní éxí ijnko xro imá náxrjón tjete éxí xro jaspe éxí xrosentā tsjehe.

¹² A ntá jnkontatjen tí chjasin chón_{ta} tjat'o noi la chón_{ta} teyó puerta la jnkojnko ángel jnkojnko puerta tjejónta la ihnié tí teyó tí sín tsík'axrjenixin sín Israel ts'ínixín jnkojnko puerta.

¹³ La iní puerta la nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur.

¹⁴ Tí tjat'o tsík'antatjen tí chjasin chón_{ta} teyó xro chóntaxín fuerza tí tjat'o la jnkojnko ihnié tí teyó tí sín k'uájiko tí Kolélo a mé ts'ínixín jnkojnko tí xro a.

¹⁵ A ntá tí ángel tjenixjana chón_{ta} ijnko nta vara oro, éxí tji tsjehe, tsjachoxín tí chjasin la tí puerta kuente chjasin la ko tí tjat'o t'inkákuènxin.

¹⁶ Tí chjasin la cuadrada la tí kjinjinxin jnkokón la ko tonxín la jnkokón. A ntá tí ángel kjuachoxín tí chjasin tí nta vara éxí tji tsjehe tsíkjachqa ch'án tí chjasin mé chón_{ta} dos mil dos cientos kilómetro tí kjinjinxin la ko tí ntetoxín la ko tí tonxín la jnkokón.

¹⁷ Ntá tsíkjachqa ch'án tí tjat'o tsíkjintajin tí chjasin a la chón_{ta} sesenta y cuarto metro kixin éxí tjachroa chojni chjasintajni mé xikaha kjuachqa tí ángel.

¹⁸ Tí tjat'o tsík'antatjen tsík'óna xro jaspe, a ntá tí chjasin tsík'óna jehó chica oro tóyohē jehó xrosentā tjóá.

¹⁹ Tí xro tsík'óna xrankixín tsík'antatjen tí tjat'o la nchónhya xro chjiní náxrjón tsínkíkjan. A ntá tí xro xrankixín la jaspe, a ntá tí xro yóxin la zafiro, la tí xro nixin la ágata, a ntá tí noóxin la esmeralda.

²⁰ A ntá tí n'óxin xro la xro mármol la tí injonxin la cornalina, la tí ya_{to}xin la crisólito, a ntá tí jnixin la berilo, la tí xro naxin la topacio, la tí texin la crisoprasa. A ntá tí tejncoxin la jacinto, a ntá tí teyóxin la amatista.

21 **A** ntá tí teyó puerta mé tjejó perla la jnkojnko puerta tsík'óna jnkokoá perla. **A** ntá tí ntja jíe kuènte chjasin la tsík'óna jehó chica oro éxí xrosentá tsjehe.

22 Ntaha la k'uikõnhya ninkehó n̄nko tí chjasin a, kixin Ìnchéni Dios chóna kaín xín kjuachaxin la jehe ch'án la ko tí Kolélo mé tí n̄nko ntiha.

23 Tí chjasin a mé t'ichjánxinhya yaon la ko ni nitjó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuènte.

24 **A** ntá tí chojni kuènte kaín nación tsíkaá la ts'ikonxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín.

25 **A** ntá tí puerta kuènte chjasin la tsíkjèhya tí nchakotjin la ntaha la tsokohya ts'ixin tie.

26 Ntaha sátsjiko kaín xín nación tí nkehe náxrjón k'uéchóna sín chjasintajni.

27 **A** ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin o chojni ch'ia. Jehó ts'ixenhen tí sín ts'ínixín ihnié tí libro ts'ínixín ihnié tí sín tsaá, mé tí libro chóna tí Kolélo.

22

1 **A** ntá tí ángel kjuákõna ijnko ntario tjóá, a ntá tí nta a mé tjanjon kjuachón. Táha mé t'ikonxínni éxí xrosentá la mé k'uaxrjexín tí trono kuènte Dios la ko tí Kolélo.

2 **A** ntá jnkosiné tí calle tjetean kuènte tí chjasin a la ko nanánko tí ntario ntiha itjen tí inta tjanjon kjuachón mé t'óna to teyó veces jnkojnko nánó kixin t'óna to jnkojnko nitjó. Tí ka kuènte tí nta la xroan tsitõexín jina tí nación síin ntiha.

3 La mé ntiha tsokohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án.

4 Ts'ikon sín tí kare Dios la ko tsochóna sín ihnié ch'án tí totjen sín.

5 Ntiha la tsokohya ts'ixin tie la tí sín síin ntiha la t'ichjánxienhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxín sín ntiha la ko tsochóna sín kjuachaxin kuènte Dios jnkochríxín.

Tí itsi Ìnchéni la kánhyó sé

6 **A** ntá tí ángel mé nixjana ch'án ntáchro kixin:

—Tí itan a mé chaxín la chrókuítekákõnhén tí tan a. La ko Ìnchéni mé tí Dios nhexraxinkaon tí sín nixja kjuachaxin ihnié ch'án mé ichr'án ch'án tí ángel kuènte ch'án kixin tsjakuexín ch'án tí sín ch'ehe ch'án xra, tí nkehe tjoka tsonhen.

7 —¡Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuñhan la ko k'uíquān tíha. A ntá chr'éxin kjuixin kuñhan la ko k'uíquān tíha ntá kjuak'éxian toç'hian chrínkí toté tí ángel kixin xíkaha kjuakona la ntá chrókjuíkosáyaha ch'án.

⁹ A ntá jehe ch'án ntáchro ch'án kixin:

—Xíkaha sích'e kixin janhan kjaxin t'ahā xrā Dios éxí tí jaha xíkaha la ko éxí tí sín kichuá mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókjuíkosáyehé.

¹⁰ Kjaxin k'uetuanna ch'án kixin:

—Chrókjuak'echjinahya tí nkehe jahvá kuinhín kuente Dios éxí nixja tí libro i kixin ó kuichjina tí yaon tsoxiteyá.

¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjínhin Dios la naḡa chrókjuich'e xíkaha la ko tí nkexro tsíkjinchetjóá Dios la naḡa jína chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjahará jnkojnkorá kixin nkexrí tí xrā chuich'erá.

¹³ Janhan mé tí xrankíxixín la ko tí tsjixixín la janhan mé tí saoxín la ko tí tsjixixín éxí tí letra xrankíxixín A la tsjixixín Zeta.

¹⁴ Náxrjón ts'ejó tí nkexro tsíkjen iké kixin tsochónta sín kjuachaxin tsochjinehe sín tí nta tjanjon kjuachón kixin jína ts'ixenxín sín tí puerta kuente chjasin.

¹⁵ A ntá ntója tsitohé tí chojni jínahya kuítekakonhya la ko tí chojni nchexroan la ko tí sín chóna nchónhya chojni chjin la ko tí chojni tjàya la ko tí chojni tinkáchónki tí nkehe tsíkjanoya la ko tí chojni tóxrjínhin xrich'ia.

¹⁶ —Janhan Jesús mé ichr'an tí ángel kuéntana kixin tsochénka kaín nínko kaín tíha. Janhan mé k'uaxrjeníxian tí rey David la ko janhan tí konotsé itji tí chjina t'inkáséyan.

¹⁷ Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enxín nta tjinkaon nta la chrók'ui tí nta tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé antsí sinchekjasóte tí jehe sín tsoníhi sín éxí nixja tí libro i.

¹⁹ A ntá jnkojìn nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro

ts'ínixín ihñié tí sín tsaá la ko Dios tsjatsen tí nkehe chróchónta
sín tí tjen tí chjasin tjóá kixin éxí nixja tí libro i.

²⁰ A ntá tí nkexro chrónkaxín tí tan i mé ntáchro kixin:
—Tjoka ts'inka janhan.

Amén. ¡Xrákiá. Ìnchéni Jesús!

²¹ Ìnchéni Jesucristo mé sincheyaonrá kaín rá. Amén.